


Chyoiyúng  
chyumlaiká:  
dangshikaq asik; Zaiwa



New Testament in Zaiwa

## **Chyoiyúng chyumlaiká: dangshikaq asik; Zaiwa New Testament in Zaiwa**

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

### **The New Testament**

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

## Contents

Mahte . . . . .	1
Markuq . . . . .	52
Lukaq . . . . .	85
Yohan . . . . .	141
Lagyo . . . . .	183
Romaq . . . . .	233
1 Korinhtuq . . . . .	256
2 Korinhtuq . . . . .	279
Galatiq . . . . .	294
Ehpesu . . . . .	302
Hpilipi . . . . .	310
Kolose . . . . .	316
1 Htesaloni . . . . .	322
2 Htesaloni . . . . .	327
1 Timohti . . . . .	330
2 Timohti . . . . .	336
Tituq . . . . .	340
Hpilemon . . . . .	343
Hebre . . . . .	345
Yakuq . . . . .	362
1 Petruq . . . . .	368
2 Petruq . . . . .	375
1 Yohan . . . . .	379
2 Yohan . . . . .	385
3 Yohan . . . . .	386
Yude . . . . .	387
Shing-rân . . . . .	389

## MAHTE é Gabú Danglù Laiká (The Gospel of Matthew)

*Yesuq É Byùxik Shap Kyô É Hkyô*  
*Luk 3:23-38*

<sup>1</sup> Abraham é awut ashín, Dawiq é yhangzo yhangshu,\* Yesuq Hkrisduq é byùxik labaû gi, a-ô mâ é eq rajung za nghut lhê.

<sup>2</sup> Abraham gi, Isak lé hkû;  
Isak gi, Yakup lé hkû;  
Yakup gi, Yudaq eq yhanggu yhangmâng pé lé hku é nghut lhê;

<sup>3</sup> Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû;  
Hesrun gi, Ram lé hkû;

<sup>4</sup> Ram gi, Aminada lé hkû;  
Aminada gi, Nashon lé hkû;  
Nashon gi, Salamun lé hkû;

<sup>5</sup> Salamun gi, Buaq lé hkû;  
Buaq é yhângnu gi, Rahap nghut ri.

Buaq gi, Obet lé hkû;  
Obet é yhângnu gi, Ruhtaq nghut ri.  
Obet gi, Yese lé hkû;

<sup>6</sup> Yese gi, Hkohkâm Dawiq lé hkû;  
Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

<sup>7</sup> Sholumon gi, Rehoboam lé hkû;  
Rehoboam gi, Abiyaq lé hkû;  
Abiyaq gi, Asa lé hkû;

<sup>8</sup> Asa gi, Yehoshaphat lé hkû;  
Yehoshaphat gi, Yoram lé hkû;  
Yoram gi, Uzi-aq lé hkû;

<sup>9</sup> Uzi-aq gi, Yohtam lé hkû;  
Yohtam gi, Ahaza lé hkû;  
Ahaza gi, Hezekiaq lé hkû;

<sup>10</sup> Hezekiaq gi, Manase lé hkû;  
Manase gi, Amon lé hkû;  
Amon gi, Yosiaq lé hkû;

<sup>11</sup> Yosiaq gi, Babelon má shúm dut huí é hkûn, Yehkoniaq eq yhanggu yhangmâng pé lé hku é nghut ri.

<sup>12</sup> Babelon má shúm dut huí é htâng má,  
Yehkoniaq gi, Shalahtila lé hkû;  
Shalahtila gi, Zerubabelaq lé hkû;

<sup>13</sup> Zerubabelaq gi, Abiut lé hkû;  
Abiut gi, Eliakim lé hkû;

Eliakim gi, Azor lé hkû;  
<sup>14</sup> Azor gi, Zaduk lé hkû;

Zaduk gi, Ahkim lé hkû;  
Ahkim gi, Eliut lé hkû;

<sup>15</sup> Eliut gi, Eliaza lé hkû;  
Eliaza gi, Mahtan lé hkû;

Mahtan gi, Yakup lé hkû;  
<sup>16</sup> Yakup gi, Mariq é yhanglâng Yosep lé

hku é nghut ri;  
Mariq gi, Hkrisduq gâ é Yesuq lé hku é sù nghut ri.

<sup>17</sup> Haú mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

*Yesuq Hku Lé Lo É Hkyô*  
*Luk 2:1-7*

<sup>18</sup> Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhângnu Mariq gi, Yosep eq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogûng dut bê nghut ri.

<sup>19</sup> Yhâng é yhumsíng hpó Yosep gi, dingmán sù nghut luí, yhang lé byu pé hí má hoq a kâm lhoq hpu nau é yanmai, tsik za lhoq kâng pyám râ dâ ri.

<sup>20</sup> Nghut kôlhang, yhang haú su myit nyi é hkûn, yhupmoq má, haú Yhumsing é maumang lagyo gi, yhang lé, lé htoq shit luí, "Dawiq é yhangzo yhangshu Yosep ê, haú náng é yhumsíng myhí Mariq lé hâng yù râ hkyô lé, hkâ-myit chiq; haí mù gâ le, yhang wun tô é zoshâng gùng gi, Chyoiyúng Woi-nyí dông lo é nghut lhê.

<sup>21</sup> Yhang gi, yuqzo rayuq hkû râ nghut luí, nàng gi, zoshâng haú lé, Yesuq nghû myìng myhíng byi ra râ nghut lhê; hkâsu mù gâ le, Yhang gi, Yhâng é byu pé lé,

\* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê. † **1:17** Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

yhangmoq é yubak mara mai hkyi yù râ sù nghut lhê." ga taí ri.

<sup>22</sup> Shí hkyô banshoq gi, Garai Gasâng eq, haú myiqhtoi dông taí é dang lé lhoq dik é nghut ri.

<sup>23</sup> Myiqhtoi dang haú gi, "Haú zomyi gyíng gi, zogúng dut luí, yuqzo rayuq hkú râ nghut lhê; Yhâng é myíng lé gi, Emanuelaq ga kó râ nghut lhê."☆ gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

<sup>24</sup> Yosep gi, yhup bûn lo é hkûn, haú Yhumsing é maumang lagyo taí é eq rajung za, Mariq lé, yhangmyi dông yhûm má shuí yù bê nghut ri.

<sup>25</sup> Nghut kôlhang, yhang gi, yuqzo haú hku é hkûn jé shoq, Mariq eq gungsho a zùm nghut ri. Yuqzo haú lé, yhang gi, Yesuq ga myhíng byí ri.

## 2

### *Buihtoq Hkyam Mâ É Hpaqchyî Bò Bang*

<sup>1</sup> Herut hkohkâm up nyi é u lé, Yuda mau mâ é Betlehem wà má Yesuq lé hku é nghut ri. Hau htâng, buihtoq hkyam mâ é hpaqchyî bò bang gi, Yerusalem wà mó má jé lé kômù,

<sup>2</sup> "Haú hku lé lô bê Yudaq byu pé é Hkohkâm gi, hkâmá nghut lhê lhú? Yhâng é kyí lé, buihtoq hkyam má ngamoq myàng luí, Yhang lé noq râ matú jé lé é nghut lhê." ga luí, myí akô nghut ri.

<sup>3</sup> Herut hkohkâm gi, haú hkyô lé wó gyo jáng myit myô nyi ri; hau htoq agó, Yerusalem wà mó mâ é lhunglhang bang le, myit myô bum akô nghut ri.

<sup>4</sup> Haú mù luí, yhang gi, byu pé é hkyangjong agyi pé eq tarâ sará pé banshoq lé, ji tsíng yù mù, haú Hkrisduq hkâmá hku lé lô râ nghut é hkyô lé myí ri.

<sup>5</sup> Haú hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luí, haú myiqhtoi kâ tô é má,

<sup>6</sup> Yudaq mau mâ é Betlehem wà ê, nàng gi, Yudaq mau mâ é wà pé má, je tiq sú a nghut;

hkâsu mù gâ le, ngá é Israelaq byu pé lé upzúng râ Zau gi, náng chyáng mai htoq lô râ nghut lhê.☆

ga bo tô ri." ga tù taí akô.

<sup>7</sup> Hau htâng, Herut gi, haú hpaqchyî bò bang lé haq ji yù mù, kyí lé htoq shit é ahkyíng lé, yhangmoq chyáng mai hkyak wó myí sê yù bê nghut ri.

<sup>8</sup> Haú mù, yhang gi, "Nungmoq, zoshâng haú lé rago ê ho wú keq. Ngò le, Yhang lé ê wó noq râ matú, Yhang lé nungmoq ê myàng eq yhang, ngo lé lo shit kyo keq." ga taí luí, haú bang lé Betlehem wà shut nhang kat bê nghut ri.

<sup>9</sup> Yhangmoq gi, haú hkohkam é dang lé gyô yu é htâng má, htoq e ló bekô nghut ri. Haú buihtoq hkyam má yhangmoq myang é kyí gi, haú zonú nyi é ahtoq ang ang má ló nô é jé shoq, yhangmoq é hí má e ló byí ri.

<sup>10</sup> Yhangmoq gi, kyí haú lé myàng jáng, gyai yhang gabú bum akô nghut ri.

<sup>11</sup> Yhangmoq gi, haú yhûm má wang e ló kô é hkûn, zonú eq yhângnu Mariq lé myàng kômù, hkyihput htuq luí, haú zonú lé noqkuq akô; hau htâng, yhangmoq é sutdek pé lé le hpóng luí, hîng, namngón jung loban eq mura\* pé lé yù mù, Yhang lé chyunghuq byí akô nghut ri.

<sup>12</sup> Yhangmoq gi, Herut chyáng a dum taú ló râ matú, yhupmoq má, yhangmoq lé sidiq byí é hui kômù, hkyô gó hkat dông yhangmoq é mau shut taú ló bekô nghut ri.

### *Egutuuq Míng Shut H pang É Hkyô*

<sup>13</sup> Yhangmoq ló byuq é htâng má, haú Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haú zoshâng eq yhângnu lé, Egutuq míng shut shuí hpang é aq. Ngò, nang lé dum ji yu é ahkyíng jé shoq, haú má nyi nyi keq. Haí mù gâ le, Herut gi, zoshâng haú lé sat râ matú, ho nyi bê nghut ri." ga taí ri.

<sup>14</sup> Haú mù, yhang gi, toq luí, myín lé yhang, zôshang me lé shuí chùng mù, Egutuq míng shut e ló bê nghut ri.

<sup>15</sup> Yhangmoq gi, Herut shi é jé shoq, haú má nyi nyi akô. Haú gi, "Ngá zo lé, ngò, Egutuq míng mai wut htoq yù bê nghut

lê."\* ga, haû Yhumsing eq myiqhtoi dông taí é dang lé lhoq dik é ru nghut lê.

16 Herut gi, yhang lé, hpaqchyî bò bâng eq mhaû pyâm tô é lé sé jáng, nhikmo-yo bê nghut ri; haû mù, yhang gi, haû hpaqchyî bò bâng chyáng mai wó sê yu é ahkyíng lé sôn wú mù, Betlehem wà eq hau é awui ayàm mã é wà pé má nyi é, í zân mai a-ô mã é yuqzo pé banshoq lé, sat pyám nhang ri.

17 Haû gi,

"Ramaq gâ é jowò má, yón kuq é eq ngau garû é htê lé wó gyô ri;

Rahkelaq gi, yhang zô pé a nyi byuq lo kô é yanmai, ngau nyi é eq nhik a wó títg dut ri."\*

ga luí,

18 myiqhtoi Yerehiaq dông taí tô é dang lé lhoq dik é nghut ri.

### *Nazaret Wà Má Dum Taû Lo É Hkyô*

19 Herut shi byuq é htâng, Egotuq ming má, haû Yhumsing é maumang lagyo gi, Yosep chyáng yhupmoq dông lé htoq shit mù,

20 "Toq aq, haû zôshang me lé shuí chûng mù, Israelaq ming má taû lô aq; hkâsu mù gâ le, haû zoshâng lé sat naû bang shi byuq bekô nghut ri." ga taí ri.

21 Haû mù, Yosep gi, zôshang me lé shuí chûng mù, Israelaq ming shut taû lô bê nghut ri.

22 Nghut kôlhang, yhang gi, Yuda mau má, Arhkela-uq, yhangwa Herut é hkó má xoq up nyi é hkyô lé wó gyo jáng, haû mã a wám lô lo nghut ri. Yhupmoq má sidiq byí é huí é eq rajung za, yhang gi, Galile mau shut e lô mù,

23 Nazaret gâ é wà má lô nyi nyi bê nghut ri. Haû mù, "Yhang lé, Nazaret wà byù ga râ nghut lê." ga luí, haû myiqhtoi pé dông taí tô é dang lé lhoq dik é nghut ri.

## 3

### *Wui-myhup Sará Yohan Shui Hen É Hkyô Mrk 1:1-8; Luk 3:1-18; Yhn 1:19-28*

1 Haû yoq má, Wui-myhup Sará Yohan htoq lô mù, Yuda mau mã é yoso má hko kyô é gi,

2 "Myit lêng keq; hkâsu mù gâ le, mauhkûng mingdán gi, chyâng lò bê\* nghut ri." gâ ri.

3 Haû yuq gi,

"Haû yoso má, byù rayuq garû taí é htê gi, 'Haû Yhumsing é matú, hkyô hen to keq; Yhâng é matú, hkyô lhoq nyhang to keq.' gâ ri."\*

ga myiqhtoi Esai-aq taí tô é sù yuq nghut ri.

4 Yohan gi, gola-uq shomaú eq saí é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô byo-î pé nghut ri.

5 Yerusalem wà mó mã é bang, Yuda mau banshoq mã é bang eq Yodan làng awui ayàm lhunglhang mã é bang gi, yhâng chyáng htoq e bum akô.

6 Yhangmoq gi, yhumsing é mara lé yín yû kôluí, yhâng chyáng mai Yodan làng má wui-myhup hkâm yu bum akô nghut ri.

7 Nghut kôlhang, yhang gi, yhang wui-myhup hkâm byí é jang má, Hparishe pé eq Saduke pé myo myo lé lo nyi kô é lé myàng jáng, yhangmoq lé taí é gi, "Duq htân lhangmuí amyû pé ê, jé lô râ yubak dam mai wó hpang lut kó sháng gaq ga, nungmoq lé ó yuq taí pûn é lúhú?

8 Myit lêng hkyô eq gingdán é ashi pé zui keq.

9 'Ngamoq gi, Abraham é yhangzo yhangshú pé nghut lê.' nghu luí, yhum-sing é i-myit unghkaû má hkâlum to kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lê.

10 Ahkuí lhang, Garai Gasang gi, Yhâng é wazung lé haû siggâm wang pé má tô to bê nghut ri; haû mù, ge é ashi a zuí é agàm hkangmó lé gi, htuq lêng pyám mù, myi má dú kat pyám râ nghut lê.

11 Ngò gi, nungmoq myit lêng kó sháng gaq nghu, wui eq za wui-myhup hkâm byí lê. Nghut kôlhang, ngá htoq má wum-o a-tsam je bo é sù rayuq, ngá htâng má jé lé lô shirâ nghut luí, ngò gi, Yhâng é hkyí-tsung chûng byi râ lhang a gingdán; Yhang gi, Chyoiyung Woi-nyí má le, myi má le,

\* 2:17 Yer 31:15 \* 3:2 Mauhkûng mingdán gi, chyâng lò bê gâ é lichyúm gi, Garai up râ ahkyíng chyâng lò bê gâ é nghut lê. \* 3:3 Esai 40:3

nungmoq lé wui-myhup hkám byi râ nghut lhê.

<sup>12</sup> Yhang gi, loq má byò chung to mù, guq chyarâng mâ é guq bùm lé hik sân pyám luí, já é guq cham lé gi, guqchyí má tsíng kat to mù, guqsôm lé kúm gi, hkâ-nhám le shi byuq a sê é myí èq nyhê hkyô pyám râ nghut lhê." gâ ri.

*Yesuq, Wui-myhup Hkâm Yu É Hkyô*  
*Mrk 1:9-11; Luk 3:21-22*

<sup>13</sup> Haú hkûn, Yesuq gi, Yohan chyáng wui-myhup hkâm yù râ ga, Galile mau mai Yodan làng má jé lé lo ri.

<sup>14</sup> Nghut kôlhang, Yohan gi, "Ngò sheq Náng chyáng wui-myhup hkâm yù râ sù ru nghut lhê nhíng! Náng sheq ngá chyáng lé lo lhê lú?" ga luí, lhom taí hkûn ri.

<sup>15</sup> Haú hkûn, Yesuq gi, "Dingmán hkyô banshoq lé, nga-nhúng lhoq dik râ é yan-mai, Ngo lé wui-myhup hkám byi laq." ga tú taí ri. Haú mù, Yohan le, gyo byi bê nghut ri.

<sup>16</sup> Yesuq gi, wui-myhup hkâm yù eq yhang, wui mai htoq lo ri. Haú hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sù é dông mai, Yhâng ahtoq má lé gyó nô tô é lé, Yhang myang kat ri.

<sup>17</sup> Haú hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

## 4

*Yesuq, Gúnglaú Huí É Hkyô*  
*Mrk 1:12-13; Luk 4:1-13*

<sup>1</sup> Hau htâng má, Chyoiyúng Woi-nyí gi, Yesuq lé, nat Tsadán èq gunglaú é hui nhâng râ matú, yoso shut shuí ê ri.

<sup>2</sup> Yesuq gi, zoshuq gám é myi xê nyí myi xê myín jé jáng, zòmut hui bê nghut ri.

<sup>3</sup> Haú hkûn, gunglaú sù gi, Yhâng chyáng lé mù, "Nàng, Garai Gasâng é Yhangzo nghut le gi, luqgok shí pé lé muk dut nhâng aq." ga taí ri.

<sup>4</sup> Haú jáng, Yesuq gi, "Byù gi, muk èq za asak duì râ a nghut; Garai Gasâng é nhut mai htoq lo é mungdang hkangmó èq sheq

asak duì râ nghut lhê.<sup>☆</sup> ga luí, Chyúmdang má kê tô ri." ga yhang lé tú taí ri.

<sup>5</sup> Haú hkûn, nat Tsadán gi, Yesuq lé, chyoyúng myuq<sup>\*</sup> má shuí ê mù, noqkuq yhum je myhang é shúhtâng htoq má yap nhang to luí,

<sup>6</sup> "Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le, 'Náng é matú, Garai Gasang gi, Yhâng é maumang lagyô pé lé taí to râ nghut mù,

luqgok má Náng é hkyí a ló htung shoq, yhangmoq é loq èq Nang lé lhom bún yú kó râ nghut lhê.<sup>☆</sup>

ga luí, Chyúmdang má kê tô ri." ga taí ri.

<sup>7</sup> Nghut kôlhang, Yesuq gi, "Haú Yhumsíng, nungmoq é Garai Gasang lé, wó chyam wú râ a nghut.<sup>☆</sup> ga luí le, Chyúmdang má kê tô ri." ga, yhang lé tú taí ri.

<sup>8</sup> Nat Tsadán gi, Yesuq lé, gyai yhang myhang é bùm htoq má shuí doq ló mù, mینگkan má joq é mینگدان pé banshoq eq haú pé é hkikhkâm hkyô lé tún shit ri.

<sup>9</sup> Hau htâng, yhang gi, "Nàng hkyihput htúq mù, ngo lé noq é nghut jáng, shí pé banshoq, Nang lé ngò byi râ." ga, Yesuq lé taí ri.

<sup>10</sup> Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú Yhumsíng náng é Garai Gasang lé za, nàng noqkuq dojaú ra râ nghut lhê.<sup>☆</sup> ga luí, Chyúmdang má kê tô ri." ga, yhang lé taí ri.

<sup>11</sup> Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

*Yesuq Mungdang Hko Hi Ló É Hkyô*  
*Mrk 1:14-15; Luk 4:14-15*

<sup>12</sup> Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taú ló bê nghut ri.

<sup>13</sup> Yhang gi, Nazaret wà mai htoq ló mù, Zebulun eq Nahtali mau mâ é nhông yàm má joq é Kaperna-um wà má ló nyi nyi ri.

<sup>14</sup> Haú gi, myiqhtoi Esai-aq laiká má,

<sup>15</sup> "Zebulun mau eq Nahtali mau, wuimau mâ é hkyô, Yodan làng yàm, tûngbaù pé nyi é Galile mau ê,

☆ 4:4 Tarâ Pun 8:3 \* 4:5 chyoyúng myuq gi, Yerusalem lé gâ lhê. ☆ 4:6 Hkya-on 91:11-12 ☆ 4:7 Tarâ Pun 6:16  
☆ 4:10 Tarâ Pun 6:13

16 mauchut hkaû má nyi nyi é bang, maubó mó lé myàng bê nghut ri; shî wup hkaû má nyi to bâng é matú, maubó lô bê nghut ri."✠

ga kâ tô é dang lé lhoq dik râ matú nghut ri.

17 Haú hkûn mai, Yesuq gi, "Myit lhîng keq! Mauhkûng mingdán gi, chyâng lò bê nghut ri." ga, mungdang hko hi e lô bê nghut ri.

### *Yesuq É Chángzo Hí Dut Bang*

18 Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri.

19 Haú mù, Yhang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri.

20 Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

21 Yesuq gi, jowò haú mai xoq sô e lô le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhangwa Zebedi eq rahá, lhai hkaû má gùn hpo nyi akô. Yhangnhik lé, Yesuq wut kat jáng,

22 yhangnhik gi, radá dâm, yhangnhik é yhangwa eq lhai haú lé, tô pyâm to kôluí Yesuq htâng cháng bekô nghut ri.

### *Nò Bang Lé, Yesuq Lhoq Gê Byî É Hkyô*

#### *Luk 6:17-19*

23 Yesuq gi, Galile mau ramau gón má htoq ê mù, tarajong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pê chyáng mâ é nòhpyo ajung jung hui bang eq nolì nojàng amyú myû dap bang lé, lhoq gê byî wún ri.

24 Yesuq eq sêng é hkyô ludang gi, Suriq ramau gón má byo myín lô mù, byu pé gi, awáng nòhpyo ajung jung hui é bang, hkê-nhô jamjaû nyi é bang, nat gang wang júng é bang, mhûngtuq tuq é bang, gùngjum shi é bang lé, shuí lé lô kôluí, Yhang gi, haú bang lé lhoq gê byî ri.

25 Galile mau, Dekapoli,† Yerusalem, Yuda mau eq, Yodan làng tû tap mâ é byù

moq mó gi, Yesuq htâng châng bum akô nghut ri.

## 5

### *Hkungsô Wó É Tarâ*

#### *Luk 6:20-23*

1 Yesuq gi, byù moq mó lé myàng jáng, bùm má doq lô luí, lô zung tô ri. Haú hkûn, Yhâng é chángzô pé gi, Yhâng chyáng lé lô kôjáng,

2 Yhang nhut hkum hpóng luí, yhangmoq lé mhoqshit é gi:

3 "Woi-nyí má, asho awui dut é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é mingdán nghut nyi ri.

4 Myit iyon huí é bang gi, hkungsô wó nyi ri; hkâsu mù gâ le, yhangmoq gi, nhik lhoq tîng é hui kó râ nghut lhê.

5 I-myt nú-nhâm é bang gi, hkungsô wó nyi ri; hkâsu mù gâ le, yhangmoq gi, mingkan lé wó sîng kó râ nghut lhê.

6 Dingmán hkyô lé mut shit nyi é bang gi, hkungsô wó nyi ri; hkâsu mù gâ le, yhangmoq gi, nhik dik shoq myàng zo kó râ nghut lhê.

7 Shogyo nhikmyin myit bo é bang gi, hkungsô wó nyi ri; hkâsu mù gâ le, yhangmoq gi, shogyo nhikmyin yu é hui kó râ nghut lhê.

8 Myit sansêng é bang gi, hkungsô wó nyi ri; hkâsu mù gâ le, yhangmoq gi, Garai Gasang lé myàng kó râ nghut lhê.

9 Nguingón hkyô sô xoq byî é bang gi, hkungsô wó nyi ri; hkâsu mù gâ le, yhangmoq gi, Garai Gasang é yhangzô pé gâ é hui kó râ nghut lhê.

10 Dingmán hkyô é yanmai zing-ri huí é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é nghut nyi ri.

11 Ngá é yanmai, byu pê èq, nungmoq lé rhoi é, zing-rî é, a teng a mán é đông agè ashop é dang amyú myû taí tso kô é hkûn, nungmoq hkungsô wó nyi ri.

12 Nguingón gabú nyî keq, hkâsu mù gâ le, nungmoq é matú kô é chyunghuq gi,

✠ 4:16 Esai 9:1-2 † 4:25 Dekapoli gâ é gi, Grik đông myuq raxê lé gâ lhê.



mauhkûng mingdán má joq tô ri. Nungmoq é hí lhê é myiqhtoî pé lé le, yhangmoq gi, haú dông zing-rî lai lo wú bekô nghut ri.

### *Xo Eq Maubó*

*Mrk 9:50; Luk 14:34-35*

<sup>13</sup> Nungmoq gi, myidàm htoq mâ é xo nghut nyi lhê. Nghut kôlhang, xo gi, màn kân byuq jáng, haú lé hai èq dum wó lhoq ngam yù râ lú? Shinggan shut dú pyám mù, byu pé èq nâng pyeq pyâm é mai lai lui, hai akyû le bò rá a nghut lo.

<sup>14</sup> Nungmoq gi, mingkân é maubó nghut akô; bùm htoq mâ é myuq lé gi, wó nghop to rá a nghut.

<sup>15</sup> Myibung lé tap mù, mûng èq nghop tô é ó a kut wú kó; haú su kut rá malaî, yhúmhaû má lúng tô é bang yuq hkanqmó myoq wó myâng rá matú, tsungjang má kúm tsung to rá nghut lhê.

<sup>16</sup> Haú eq rajung za, byu pé gi, nungmoq é ge é muzó pé lé byu-myàng lui, mauhkûng htoq mâ é nungmoq é Îwa lé hkya-on kó sháng gaq, nungmoq é maubó lé yhangmoq é hí má duq nhang to keq.

### *Tarâ Lhoq Dik É Hkyô*

<sup>17</sup> Ngò gi, myiqhtoî pé é dang eq jep é tarâ lé lhoq hpyoq pyám rá matú, jé lé é nghut nhô hkâ-ngâm kó; haú pé lé lhoq dik rá matú sheq jé lé é ru nghut lhê.

<sup>18</sup> Ngò, nungmoq lé teng za tái kôlé, mauhkûng eq myigùng byuq byuq le lhang, haú pé a ban lhoq dik dik gi, jep é tarâ mâ é tiq dik é dangjí eq myihkyet zo ralhùm lhang byuq byuq rá a nghut.

<sup>19</sup> Jep é tarâ shí pé mâ é tiq dik é dang rahkun lé lu lai lui, góbang lé le, haú su kut rá matú mhoq byi é sù ó yuq nghut kôle, mauhkûng mingdán má tiq dik sù gâ é hui rá nghut lhê; nghut kôlhang, jep é tarâ shí pé lé châng kut lui, mhoq byi sù kúm gi, mauhkûng mingdán má, hkik sù gâ é hui rá nghut lhê.

<sup>20</sup> Ngò, nungmoq lé tái kôlé, nungmoq dingmán é hkyô má, haú Hparishe pé eq tarâ sará pé dingmán é htoq je a gyaú le gi, mauhkûng mingdán má, nungmoq wó wâng kó rá a nghut.

### *Byù Hkâsat*

<sup>21</sup> 'Byù hkâsat, ✱ sat é sù gi, jéyáng é hui rá nghut lhê' ga, hí hpyang lhê é bang lé tái tô é dang, nungmoq wó gyô wú bê nghut lhê.

<sup>22</sup> Nghut kôlhang, Ngò, nungmoq lé tái kôlé, gumang rayuq yuq lé nhikjum yô é sù gi, jéyáng é hui rá nghut lhê. Hau htoq agó, gumang hpó lé, 'Byù gang'\* ga tái é sù gi, Yudaq byìn tú wapdoq má jéyáng é hui rá nghut lhê; 'Byù bam ê' ga wut é sù gi, ngaraî myi eq gingdán nyi ri.

<sup>23</sup> Haú mù, hkungga gyap má, nang hkungga nhông rá dá é hkûn, náng é gumang rayuq yuq, nang lé mara hun é hkyô rajung jung joq é lé, myit bûn kat é nghut jáng,

<sup>24</sup> náng é hkungga lé, haú hkungga gyap hí má tô pyâm to mù, náng é gumang hpó haú yuq eq hí nguingón hkyô ló yû lui sheq, hkungga lé nhông byi aq.

<sup>25</sup> Nang lé yui tsuq sù gi, nang lé tarâ rûng má dé e ló é hkûn, hkyô má ru nghut nyi ashî u lé, yhang eq nguingón hkyô hí hân yû aq. Haú a nghut jáng, haú yuq gi, nang lé, tarâ agyi chyáng ê ap pyám mù, haú tarâ agyi gi, nang lé htóng hkyô pyám rá matú, htóng suwún hpô é loq má ap pyám rá nghut lhê.

<sup>26</sup> Ngò, nang lé teng za tái lé, yuichyîn haú a ban xap xap gi, htóng haú mai nang wó htoq ló rá a nghut.

### *Su-myi Sulàng Lú É Hkyô Eq Séng Lui Mhoqshit É Dang*

<sup>27</sup> 'Su-myi sulàng hkâlú' ✱ gâ é dang lé, nungmoq wó gyo wú bê nghut lhê.

<sup>28</sup> Nghut kôle, Ngò, nungmoq lé tái kôlé, myiwe rayuq lé shut nau é myit èq wú é sù gi, yhang é myit hkaû má, myiwe haú yuq eq su-myi sulàng lú hkyô kut é sù nghut bê.

<sup>29</sup> Haú mù, náng é loqyo myoq èq, nang lé mara kut shut nhang é nghut le gi, haú lé lap choq yû mù, dú pyám aq. Hkâsu mù gâ le, náng é ragùngdu gón ngaraî ming gyó rá htoq má, náng é gungsho rajung jung za htên byuq é nghut le gi, náng é matú je ge ri.

<sup>30</sup> Haú eq rajung za, náng é loqyo loq èq, nang lé mara kut shut nhang é nghut le gi,

✱ 5:21 Htoq Ló 20:13 ✱ 5:22 Byù gang gâ é lé, Grik dông "Raka" gâ lhê. ✱ 5:27 Htoq Ló 20:14

haú lé hpyit yû mù, dú pyám aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

*Myi Làng Gâng É Hkyô Eq Séng Luí Mhoqshít É Hkyô*

*Mht 19:9; Mrk 10:11-12; Luk 16:18*

<sup>31</sup> 'Yhumsing é yhangmyi lé kâng é sù gi, lhoq kang laiká byi râ dut lhê. ✧ gâ é dang joq lhê.

<sup>32</sup> Nghut kôlhang, Ngò, nungmoq lé tái kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe haú lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

*Danggidiq*

<sup>33</sup> Hau htoq agó, 'Danggidiq a zùng hkâmû; Yhumsing lé byi tô é danggidiq eq rajung za cháng aq.' ga luí, hí hpyang lhê é bang lé, tái tô é dang lé nungmoq wó gyô wú bê nghut lhê.

<sup>34</sup> Nghut kôlhang, Ngò, nungmoq lé tái kôlé, hai eq le hkâdakâm kó: mauhkûng lé lang luí le, hkâdakâm kó; hkâsu mù gâ le, haú gi, Garai Gasâng é zùng tanghkuq nghut lhê;

<sup>35</sup> myigùng lé lang luí le, hkâdakâm kó; hkâsu mù gâ le, haú gi, Garaî é hkyî nang jang nghut lhê; Yerusalem lé lang luí le, hkâdakâm kó; hkâsu mù gâ le, haú gi, Hkohkâm mó é myuq nghut lhê.

<sup>36</sup> Hau htoq agó, yhumsing é ulhûm eq le, hkâdakâm kó; hkâsu mù gâ le, xâm rahkat lé lhang hpyû shoq noq shoq, nàng wó kut é a nghut.

<sup>37</sup> Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, tái aq; haú mai lai é gi, haú agé ashop su chyáng mâ é nghut ri.

*Lató Hpuq É Hkyô*

*Luk 6:29-30*

<sup>38</sup> 'Myoqjí matú myoqjí xap, zui matú zui xap' ✧ gâ é dang lé, nungmoq wó gyô wú bê nghut lhê.

<sup>39</sup> Nghut kôlhang, Ngò, nungmoq lé tái kôlé, agé ashop kut é sù lé lató hkâhpuq. Náng é loqyo bowâm má pyuq byi sù lé, loqpaî hkyam le hkâm byi shi aq.

<sup>40</sup> Byù rayuq yuq, nang lé mara tsuq mù, náng é buzo lé yu pyám byi é nghut jáng, bumó lé le, hkyut byi shi aq.

<sup>41</sup> Byù rayuq yuq, nang lé zik mù, radéng é nhâng jáng, yhang eq rahá í déng châng é byi aq.

<sup>42</sup> Nang lé dung sù lé, byi aq; náng chyáng mai chyí naú sù lé le, nunghtáng hkâlhik pyám.

*Gyè Lé Chyitdap Râ É Hkyô*

*Luk 6:27-28, 32-36*

<sup>43</sup> 'Náng é chyangnâm mâ é bang lé gi, chyitdap mù, náng é gyè lé gi, a jú kut aq' ✧ gâ é dang lé, nungmoq wó gyô wú bê nghut lhê.

<sup>44</sup> Nghut kôlhang, Ngò, nungmoq lé tái kôlé, nungmoq gi, mauhkûng htoq mâ é nungmoq é Îwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyûdung byi keq;

<sup>45</sup> hkâsu mù gâ le, Yhang gi, agé ashop bâng é ahtoq má le, gè bâng é ahtoq má le, bui tsô byi nhâng mù, dingmán bâng é ahtoq má le, a dingmán bâng é ahtoq má le, mau wô byi nhâng Sù nghut ri.

<sup>46</sup> Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó râ lú? Kang guq bang lhang, haú su kut lhê a nghut kó lú?

<sup>47</sup> Hau htoq agó, nungmoq é gumang wui lé za shi-kyám kô le gi, nungmoq kut é muzó gi, góbâng htoq má haí wá laklai râ lú? Tûngbaù pé lhang haú su kut lhê a nghut kó lú?

<sup>48</sup> Haú mù, mauhkûng htoq mâ é nungmoq é Îwa gumjup é su, nungmoq le gumjup nyi keq.

## 6

*Alu Byi É Hkyô*

<sup>1</sup> Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyi keq. Haú su kut é

nghut jáng, mauhkûng htoq mâ é nungmoq é Îwâ chyáng mai, chyunghuq wó yû kó râ a nghut.

<sup>2</sup> Haû mù, haû gegùn labyoq kut bang gi, byu pê èq shigyaú é hui sháng gaq ga, tarajong pé hká, hkyô pé hká kut é su, nàng gi, alu byî é hkûn, tut htê su hkâlhoq htoq. Ngò, nungmoq lé teng za taí kôlé, haû bang gi, yhangmoq é chyunghuq lé hkúm shoq wó yû bekô nghut lhê.

<sup>3</sup> Ra châ to bang lé nàng alu byî é hkûn, náng é loqyo loq kut é hkyô lé, loqpaí loq lé lháng hkâsé nhâng.

<sup>4</sup> Haû hkûn, nàng alu byî é lé, ó a châng sé râ nghut lhê. Haû jáng sheq, ó a sé loshoq kut é hkyô lé myang é sù, náng é Îwa gi, nang lé chyunghuq shigyaú râ nghut lhê.

### *Kyûdûng É Hkyô*

#### *Luk 11:2-4*

<sup>5</sup> Nungmoq kyûdûng le, gegùn labyoq kut bang su hkâkut kó; hkâsu mù gà le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyûdung râ ô nau akô. Ngò, nungmoq lé teng za taí kôlé, haû bang gi, yhangmoq é chyunghuq lé wó yû bekô nghut ri.

<sup>6</sup> Nghut kôlhang, nàng kyûdûng le, náng é gok hkaû má wang lô mù, hkum myhî pyám luí, a byu-myang é náng é Îwâ chyáng dung aq. Haû jáng, ó a byu-myang é lé myàng sù, náng é Îwa gi, nang lé jeju dum tau byi râ nghut lhê.

<sup>7</sup> Haû mù, kyûdûng le, tûngbaù pé su kut luí, dang puq hkâhtau kó; hkâsu mù gà le, yhangmoq gi, dang hîng chín luí dung jáng sheq, gyo byi nhô ngam akô nghut ri.

<sup>8</sup> Haû bang su hkâkut kó; hkâsu mù gà le, nungmoq é Îwa gi, nungmoq râ é hkyô lé, nungmoq a dung shi mai sê to Sû nghut lhê.

<sup>9</sup> Haû mù, nungmoq kyûdûng le, 'Mauhkûng htoq tsáng myhâng mâ é ngamoq é Áwa ê,

Náng é myìng gi, chyoiyúng nyî sháng gaq,

<sup>10</sup> Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

<sup>11</sup> Ngamoq nyí wuî râ é zoshuq lé, ngamoq lé hkû-nyí byi laq.

<sup>12</sup> Ngamoq lé shut é bâng é mara lé ngamoq hkyut pyám byî é su, ngamoq é mara lé le hkyut pyám byi laq.

<sup>13</sup> Ngamoq lé, agúng alaú hkyô má a wàng nhang é za, agè ashop jang mai hkyi yù laq ô.

(Hkâsu mù gà le, kô dik é up sîng hkyô, a-tsam eq hpungwup shîngkang gi, pyat dedu ahtum abyuq Náng chyáng ru joq nyi ri ô! Amen.)\*

ngû dung keq.

<sup>14</sup> Supê èq, nungmoq lé kut shut é mara lé, nungmoq hkyut pyám byî é nghut le gi, mauhkûng htoq mâ é nungmoq é Îwa le, nungmoq lé mara hkyut pyám byi râ nghut lhê.

<sup>15</sup> Nghut kôlhang, haû bâng é mara lé, nungmoq a hkyut pyám byî é nghut le gi, nungmoq é Îwa le, nungmoq é mara lé hkyut pyám byi râ a nghut.

### *Zoshuq Gám É Hkyô*

<sup>16</sup> Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gà le, haû bang gi, yhangmoq zoshuq gám é hkyô lé, tûn shit râ matú myoqdong lhoq nyhui shit akô nghut ri. Ngò, nungmoq lé teng za taí kôlé, haû bang gi, yhangmoq é chyunghuq wó yû bekô nghut ri.

<sup>17</sup> Nungmoq kúm gi, zoshuq gám é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-myang é Îwa za myàng sháng gaq, myoq chí pyám luí, u xû but keq;

<sup>18</sup> haû jáng sheq, ó a sé loshoq kut é hkyô lé myang é Sû, nungmoq é Îwa gi, nungmoq lé chyunghuq shigyaú râ nghut lhê.

### *Mauhkûng Htoq Mâ É Sutzè*

#### *Luk 12:33-34*

<sup>19</sup> Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byî é myigùng htoq má, nungmoq é matú, sutzè lé hkâhkong to kó.

<sup>20</sup> Jàngkon, jogyik èq le a wó lhoq htên pyâm é eq, hkaú su èq le a wó wang hkaú

\* **6:13** Chyúmlaík ra-am má, shí túm a bo é nghut lhê.

yu pyâm byî é mauhkûng htoq má sheq, nungmoq é matú sutzè hkong to keq.

<sup>21</sup> Hkâsu mù gà le, náng é sutzè joq jang má, náng é i-myit le jé nyî râ nghut lhê.

<sup>22</sup> Myoqjí gi, gungdû é myibung nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê.

<sup>23</sup> Nghut kôlhang, náng é myoqjí a ge é nghut le gi, náng é gungdu gón gi, mauchut tuq dut nyî râ nghut lhê. Náng chyáng bo é maubó gi, mauchut byuq é nghut jáng, mauchut haû gi, hkâ-í yhang htû râ lhâ!

<sup>24</sup> Ó yuq nghut kôle, yhumsing í yuq lé wó dojaú râ a nghut. Hkâsu mù gà le, yhang gi, rayuq lé a jú kut mù, rayuq lé gi, chyitdap râ nghut lhê; haû a nghut jáng, rayuq lé lhumsui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut.

### *Hkâ-myit Chiq Kó*

#### *Luk 12:22-31*

<sup>25</sup> Haû mù luî, Ngò, nungmoq lé taí kôlé, nungmoq é asak matú haî zo haî shuq râ eq nungmoq é gungdû matú haî wut haî tsang râ lé, hkâ-myit chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó lhú?

<sup>26</sup> Maulat mã é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyî pé má le haî a tsing kat to kô é nghut le lháng, mauhkûng htoq mã é nungmoq é Îwa gi, yhangmoq lé, byi tso byi huq nyi lhê. Nungmoq gi, nghoq haû pé htoq má je riyhang hpauhap nyi lhê a nghut kó lhú?

<sup>27</sup> Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lhú?

<sup>28</sup> Haû nghut le nhing, haî mù, mebû matú myit chiq akô lhú? Myigùng mã yuq tô é htutbó ban pé hkâsu kut kô lo é lé, myit wú keq. Haû pé gi, mù le a zui, hkying le a duì kó nghut ri.

<sup>29</sup> Nghut kôlhang, Ngò, nungmoq lé taí kyo kôlé, hkohkâm Sholumon hpung kô dik u lé wut é mebu lháng, ban haû rabó lé a hkyit nghut ri.

<sup>30</sup> Lumjing myit tiq é bang ê, hkû-nyí joq mù, napmá myihkyóm mã dú kat pyám hui râ nghut é yosó mhan pé lé za lháng, Garai Gasang haû su kut hut é nghut le gi, nungmoq lé je riyhang hut râ a nghut kó lhú?

<sup>31</sup> Haû mù, 'Haî zo râ lhi?' 'Haî shuq râ lhi?' 'Haî wut râ lhi?' nghû hkâ-myit chiq myhing kó.

<sup>32</sup> Tungbaù pé kúm gi, haû pé banshoq lé châng hkat ho nyi akó; nghut kôlhang, mauhkûng htoq mã é nungmoq é Îwa gi, haû pé lé nungmoq râ é hkyô, sé byî nyi lhê.

<sup>33</sup> Nghut kôlhang, Yhâng é mingdán eq dingmán hkyô lé hí hô keq, haû jáng, haû pé banshoq, nungmoq lé puq byi râ nghut lhê.

<sup>34</sup> Haû mù, napmá lhê é matú hkâ-myit chiq kó; hkâsu mù gà le, napmá gi, yhâng é yhang myit chiq râ nghut lhê. Hkû-nyí é wuîhke hkyô gi, hkû-nyí é matú gé bê nghut ri.

## 7

### *A Jéyáng Râ Hkyô*

#### *Luk 6:37-38, 41-42*

<sup>1</sup> Nungmoq jéyáng é a hui kó sháng gaq, ó lé le, hkâjéyáng kó.

<sup>2</sup> Hkâsu mù gà le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byî é bung èq, nungmoq lé dum lik byi râ nghut lhê.

<sup>3</sup> Yhumsing myoq hkaû mã lúng tô é siktúm lé lháng a myit wú é nhing, haî mù luî, nunggu nungmâng é myoqwàng lé myang lhê lhú?

<sup>4</sup> Yhumsing é myoq mã siktúm lhung to luî nhing, 'Náng myoq mã lúng tô é myoqwàng lé, ngò choq pyám byi lé.' nghû luî, náng é gumang hpó lé hkâsu wó taí râ lhú?

<sup>5</sup> Gegùn labyoq kut sù ê, náng é myoq mã lúng tô é siktúm lé hí choq pyám aq. Haû jáng sheq, nunggu nungmâng é myoq mã wang tô é myoqwàng choq pyám byi râ matú, náng san za myàng râ nghut lhê.

<sup>6</sup> Hkuí pé lé, yunglhô é zê hkâbyi kó; waq pé hí mã, nungmoq é palhé wuizo lé hkâdú byi kó. Haû su kut jáng, haû bang gi, zè haû pé lé náng pyeq pyám mù, nungmoq lé dum taû ngat lò râ nghut lhê.

*Dung Keq, Hô Keq, Hkum Má Kok Keq*  
*Luk 11:9-13*

<sup>7</sup> Dung keq, haû jáng, nungmoq lé byi râ nghut lhê; hô keq, haû jáng, nungmoq myàng kó râ nghut lhê; hkum má kok keq, haû jáng, nungmoq lé hpóng byi râ nghut lhê.

<sup>8</sup> Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

<sup>9</sup> Nungmoq má, ó yuq wá, yhumsing yhangzo muk dúng le, luqgok byi kó râ lúhú?

<sup>10</sup> Ngozo dúng le, lhangmui\* byi kó râ lúhú?

<sup>11</sup> Agè ashop é bang nungmoq lhang gi, nungmoq é zo wuí lé, ge é chyunghuq dat byi kô le nhing, mauhkung htoq tsáng myhâng mâ é nungmoq é Íwa gi, Yhang lé dúng é bang lé, je riyhang ge é chyunghuq byi râ nghut lhê!

<sup>12</sup> Haû mù, hai hkyô má nghut kôlhang, nungmoq gi, yhumsing ô nau é dông supé lé kut nhâng nau é su, yhangmoq lé le kut byi keq. Haû mù gâ le, haû gi, jep é tarâ eq myiqhtoî pé é dang lo jup tô é nghut ri.

*Chyap É Hkúmdong Eq Lam É Hkúmdong*  
*Luk 13:24*

<sup>13</sup> Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuí e é nghut mù luí, haû dông wàng bang gi, myô akô nghut ri.

<sup>14</sup> Chyap é hkúmdong eq hkyô zo kúm gi, asak hkyô shut shuí e é nghut mù luí, haû lé myang ho é bang gi, shaû akô nghut ri.

*Agàm Eq Ashi*  
*Luk 6:43-45*

<sup>15</sup> Nungmoq chyáng jé lé lo é myiqhtoi pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuí pé nghut akô.

<sup>16</sup> Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyap mai tsibiyiq shi, zugâm mai maihpáng-shi wó yu wú akô lúhú?

<sup>17</sup> Ge é agàm gi, ge é ashí zui mù, a ge é agàm gi, a ge é ashí za dat zui ri.

<sup>18</sup> Ge é agàm gi, a ge é ashí a wó zui, a ge é agàm le, ge é ashí a wó zui nghut ri.

<sup>19</sup> Ge é ashí a zui é shigâm hkangmó lé gi, htuq pyám mù, myi má dú kat pyám râ nghut lhê.

<sup>20</sup> Haû mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

<sup>21</sup> Ngo lé, 'Yhumsing ê, Yhumsing ê,' ga, wut é bang yuq hkangmó gi, mauhkung mingdán má myang wàng kó râ a nghut; haû mauhkung htoq mâ é Ngá Wa ô nau é dông kut sù za sheq, myang wàng râ nghut lhê.

<sup>22</sup> Haû buinyi má, byù myo myo gi, 'Yhumsing ê, Yhumsing ê, Náng é mying mai, ngamoq gi, myiqhtoi le htoi bê; nat gang lé hkat htoq bê; laklai kumlhá ajung jung lé, kut bê a nghut lúhú?' ga luí, Ngo lé myi kó râ nghut lhê.

<sup>23</sup> Haû hkún, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng ló byuq keq.' nghú, yhangmoq lé san za tû taí kat râ nghut lhê.

*Hpaqchyî Bò Sù Eq Ngok Sù*  
*Luk 6:47-49*

<sup>24</sup> Haû mù, Ngá é dang shí pé lé wó gyô yù luí, châng kut é sù gi, hpaqchyî bò mù, lunghtân htoq má, yhúm saí é sù eq wuí nyi ri.

<sup>25</sup> Mau wô, wui je, laidun lò mù, yhúm haû lé lo htung kôlhang, yhúm haû gi, a htên byoq byuq râ nghut lhê; hkâsu mù gâ le, yhúm haû gi, lunghtân htoq má tsuq tô é yanmai nghut ri.

<sup>26</sup> Nghut kôlhang, Ngá é dang lé, wó gyô yù mù, a cháng sù gi, semuî-jàng má, yhúm saí é byù ngok eq wuí nyi râ nghut lhê.

<sup>27</sup> Mau wô, wui je, laidun wò yup dut lò mù, yhúm haû lé lo htung jáng, yù whuí a mù loshoq htên byoq byuq râ nghut lhê." gâ ri.

<sup>28</sup> Yesuq mungdang ban taí é hkún, shiwa byu pé gi, Yhang mhoqshit é hkyô lé maúhong bum akô;

<sup>29</sup> Hkâsu mù gâ le, Yhang gi, yhangmoq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

\* **7:10** Garai Gasang gi, lhangmui a zo râ matú, Yudaq byu pé lé hkunmó hkyô tô é nghut lhê.

## 8

*Manggâm Dap É Byù Rayuq*  
*Mrk 1:40-45; Luk 5:12-16*

<sup>1</sup> Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri.

<sup>2</sup> Haú hkûn, manggâm dap é byù rayuq gi, Yhâng é hí má, lé mù, hkyihput htuq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga taí ri.

<sup>3</sup> Yesuq gi, loq lhâm kat mù, haú yuq lé é záng luí, "Ngò dóng lhê, sân-yúng aq hkoi." ga taí kat ri. Haú hkûn jáng, haú yuq é manggâm gi, ge byuq bê nghut ri.

<sup>4</sup> Haú hkûn, Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tún shit mù, yhangmoq é matú saksé dut sháng gaq, Mosheq taí tô é eq rajung za, hkungga ló nhông byi aq." ga haú yuq lé taí kat ri.

*Gyezau Hpô É Lumjîng Myit*  
*Luk 7:1-10; Yhn 4:43-54*

<sup>5</sup> Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù,

<sup>6</sup> "Yhumsîng ê, ngá é dui-nhâng zoshâng gi, gùngjum shí é htoq agó, yhûm má gyaí no jamjaú leq tô ri." ga garúm lé dung ri.

<sup>7</sup> Haú hkûn, Yesuq gi, yhang lé, "Ngò, lé lhoq gê byi râ." ga taí kat ri.

<sup>8</sup> Gyezau hpó haú, Yhang lé dum tû taí é gi, "Yhumsîng ê, Nàng, ngá é laishîn-htâng má, lé nang râ lháng ngò má a gingdán. Nàng, dang rahkun za taí kat laq; haú hkûn, ngá é dui-nhâng zoshâng ge ló râ nghut lhê.

<sup>9</sup> Hkâsu mù gâ le, ngò le ahkáng ayá wó é zau rayuq é a-ô mâ é zau nghut lhê; ngá é a-ô má le gyezô pé nyi lhê; rayuq lé, 'È aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shí kut aq!' nghu le, yhang kut lhê." gâ ri.

<sup>10</sup> Yesuq gi, dang haú lé wó gyo jáng, maú byuq luí, Yhâng htâng cháng bang lé, "Ngò, nungmoq lé teng za taí kôlé, Israelaq amyû má lháng, shí í lumjîng é sù lé, Ngò, rayuq lé le a myàng wú é nghut lhê.

✧ 8:17 Esai 53:4

<sup>11</sup> Ngò, nungmoq lé taí kôlé, buihtoq buiwàng hkyam mâ é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poí mó má myang zùng kó râ nghut lhê.

<sup>12</sup> Nghut kôlhang, mingdán haú má wàng âng é bang kúm gi, shinggan mauchut hkaú shut dú pyâm é hui luí, haú jowò má ngaubyi ngaù nhap eq zùi kyik kyik shoq hpuzô nyi bùm bekô râ nghut lhê." ga taí ri.

<sup>13</sup> Hau htâng, Yesuq gi, gyezau lé, "Ló aq hkoi! Nàng lumjîng é eq rajung za, dut râ nghut lhê." ga taí ri. Haú-u má yhang, haú dui-nhâng zoshâng gi, ge byuq bê nghut ri.

*Byù Myo Myo Lé Lhoq Gê Byí É Hkyô*  
*Mrk 1:29-34; Luk 4:38-41*

<sup>14</sup> Yesuq gi, Petruq é yhûm má jé wang e é hkûn, Petruq é yhâng-aumó gyai yhang no leq tô é lé, é myang ri.

<sup>15</sup> Yesuq gi, yhâng é loq má ê záng kat é hkûn, Petruq yhâng-aumó gi, nòhpyo ge byuq mù, toq luí, Yhang lé wó gaí tso gaí huq bê nghut ri.

<sup>16</sup> Myinhâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agè ashop é nat gâng pé lé dâng èq hkat htoq pyám mù, nòhpyo huí é bang banshoq lé lhoq gê byí ri.

<sup>17</sup> Haú gi, "Yhang gi, nga-nhûng é noli nojàng lé yu pyám byi mù, nga-nhûng é noli nojàng lé, wùn waq pyám byi bê nghut ri."✧

ga, myiqhtoi Esai-aq taí tô é dang lhoq dik râ matú nghut ri.

*Yesuq Htâng Cháng Râ Bang*  
*Luk 9:57-62*

<sup>18</sup> Yesuq gi, Yhâng é lhîngkyuq má byù moq mó zup míng nyi é lé myàng jáng, Yhâng é chángzô pé lé, nhông hé hpoq shut gû dap é sháng gâ ri.

<sup>19</sup> Haú hkûn, tarâ sará rayuq gi, lé lô mù, "Sará ê, ngò gi, Nàng hká e le hká cháng râ nghut lhê." ga Yhang lé lé taí ri.

<sup>20</sup> Haú jáng, Yesuq gi, "Wamhkuí pé gi, hkyûng wó akô; nghoq pé le, nghoqsut wó akô. Nghut kôlhang, haú Byu Yhangzo gi, u

nghe jowò lhang a wó nghut ri." ga lhom tai kat ri.

<sup>21</sup> Haú hkûn, chángzo rayuq gi, "Yhumsing ê, ngá wa lé ló yhûm pyám rá ahkáng hí byi shilaq." ga tai kat ri.

<sup>22</sup> Nghut kôlhang, Yesuq gi, "Shî bê bang gi, shî bê bang yhangchang yhûm lhum kó sháng gaq, nàng gi, Ngá htàng cháng aq." ga dum taú tai ri.

### *Laidun Lhoq Zim Ê Hkyô*

*Mrk 4:35-41; Luk 8:22-25*

<sup>23</sup> Hau htàng, Yesuq lhai hkaú má wàng mù, Yhàng é chángzô pé le, Yhàng htàng châng wàng bekô nghut ri.

<sup>24</sup> Haú hkûn, nhông má byodan-htik laidun mó lò mù, wuìhêng pé gi, lhai má bat ùm lò bê nghut ri. Nghut kôlhang, Yesuq gi, yhup myhi tô ri.

<sup>25</sup> Chángzô pé gi, Yhàng chyáng jé ê mù, Yhang lé nhaú pun lui, "Yhumsing ê, hkyi yù laq ô! Nga-nhúng myup ló nyi ri." ga tai akô.

<sup>26</sup> Yhang gi, "Lumjing myit shaú é bang ê! Hai mù, haú-í gyuq bum akô lhu?" ga tai kat ri. Hau htàng, Yhang gi, toq lui, laidun eq wuìhêng pé lé tân kat jáng, banshoq zim byuq bê nghut ri.

<sup>27</sup> Byù haú bang gi, maúhong byuq kômù, "Shí yuq gi, hkasú é byù là? Lài eq wuìhêng pé lhang gi, Yhàng é dang lé gyo byi ri myhi-nhung!" ga lui, rayuq eq rayuq myi lhum bum akô nghut ri.

### *Nat Wang Jung Su Nhk Lé, Lhoq Gê Byi Ê Hkyô*

*Mrk 5:1-20; Luk 8:26-39*

<sup>28</sup> Yesuq gi, Gadara byu pé é mau hpoq má jé dap ló jáng, nat gang wang jung é byù í yuq gi, lupdùng mai htoq lé lo kômù, Yhang lé lé huí akô. Haú nhik gi, haú hkyô mai ó lhang a wám lai loshoq wuì é su nhik nghut akô.

<sup>29</sup> Yhangnhik gi, Yesuq lé, "Garai Yhangzo ê, Nàng, ngamoq eq hai sêng lè lhu? Ahkying a jé shimá, ngamoq lé zing-ri rá matú jé lé lo é nghut lè lhu?" ga tai garú akô.

<sup>30</sup> Haú mai a lûm wê é jowò má, waq rajum mó gi, myi dû but zô nyi bum akô nghut ri.

<sup>31</sup> Nat gâng pé gi, Yesuq lé, "Nàng, ngamoq lé hkat htoq rá nghut jáng, hê waq pé chyáng wàng nhâng laq." ga dùng akô.

<sup>32</sup> Yesuq gi, "Htoq ló keq!" ga tai kat ri. Haú mù, yhangmoq gi, htoq ló lui, waq pé chyáng wàng mù, waq haú jûm gi, gampyoq mai nhông hkaú shut din yán wang ló kôlui, wuì hkaú má myup shi byuq bekô nghut ri.

<sup>33</sup> Waq zúng bang gi, myuq hkaú shut hpang din wang ló kômù, dut lai lo é hkyô banshoq lé le, nat gang wang jung huí su nhik hkâsu dut é hkyô lé le, ló tai kyo akô nghut ri.

<sup>34</sup> Haú mù, rawa bang gi, Yesuq lé huí rá matú htoq lé lo bùm kômù, Yhang lé myàng jáng, yhangmoq é mau mai htoq ló byuq rá matú, chôm dùng tôngbán akô nghut ri.

## 9

### *Gungjum Shi Sû Lé Lhoq Gê Byi Ê Hkyô*

*Mrk 2:1-12; Luk 5:17-26*

<sup>1</sup> Yesuq gi, lhai má wàng mù, yhumsing é wà shut jì dap ló bê nghut ri.

<sup>2</sup> Byù ra-am gi, gungjum shi sù rayuq lé, taphkang mai Yhàng chyáng waq lé lo akô. Yesuq gi, yhangmoq é lumjing myit lé byu-myàng jáng, haú gungjum shi sù lé, "Ngá zo ê, nhik hkâ-ngé; náng é yubak mara lé hkyut pyám byi bê." ga tai ri.

<sup>3</sup> Haú hkûn, tarâ sará pé ra-am gi, yhangmoq é i-myit hkaú má, "Byù shí yuq gi, Garai Gasang lé rhoi dang tai nyi ri." ga myit nyi bum akô nghut ri.

<sup>4</sup> Yesuq gi, yhangmoq myit nyi é hkyô lé sé mù, "Nungmoq é i-myit hkaú má, haú su agè ashop é đông hai mù myit nyi akô lhu?"

<sup>5</sup> 'Náng é yubak mara lé hkyut pyám byi bê.' nghu tai rá eq 'Toq lui, hkyô so aq.' nghu tai rá má, hká hkun je tai lui lè lhu?

<sup>6</sup> Nghut kôlhang, haú Byu Yhangzo gi, mingkan htoq má, mara hkyut byi rá ahkáng wó Sû nghut é lé, nungmoq lé sé nhâng nau lè." ga tai lui, haú gungjum shi sù lé, "Toq aq, náng é taphkang yu chùng lui, yhûm taú ló aq hkoi." ga tai kat ri.

<sup>7</sup> Haú mù, haú yuq gi, toq mù, yhûm shut ló byuq bê nghut ri.

<sup>8</sup> Byù hpung mó gi, haú hkyô lé myàng kôjáng, gyuq mau kômù, byu pé lé haú su

é ahkáng ayá byi tô é Garai Gasang lé hkya-on kungton bum akô nghut ri.

*Mahte lé shuí yu é hkyô*

*Mrk 2:13-17; Luk 5:27-32*

<sup>9</sup> Yesuq gi, haú jowò mai sô e ló é hkûn, kang guq zúm má zung tô é Mahte ga sù lé myàng mù, "Ngá htâng cháng aq." ga tái jáng, haú yuq gi, toq luí, Yhâng htâng cháng bê nghut ri.

<sup>10</sup> Yesuq gi, Mahte é yhûm má myinzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô.

<sup>11</sup> Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haí mù luí, kang guq bang eq yubak dap bang eq rahá zo shuq nyi lhê lhú?" ga myí akô.

<sup>12</sup> Yesuq gi, haú su ga kô é lé wó gyo jáng, "Wángzán bang gi, chi sará a ra kó; nòhpyo hui bang za sheq ru rá lhê.

<sup>13</sup> 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.'\* gá é lichyúm lé mhoq yû keq. Hkâsu mù gá le, Ngò gi, dingmán bang lé wut yù rá matú jé lé é a nghut, yubak dap bang lé ji yù rá matú sheq jé lé é ru nghut lhê." ga tú tái kat ri.

*Zoshuq Gám É Eq Sêng É Hkyô*

*Mrk 2:18-22; Luk 5:33-39*

<sup>14</sup> Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haí mù a gám kô é lhú?" ga luí, lé myí akô.

<sup>15</sup> Haú mù, Yesuq tú tái é gi, "Bíng pé gi, lusik eq rahá nghut nyi to ashí hkûn, hkâsu ge yón kó rá lhú? Lusik lé, yhangmoq chyáng mai shuí yu pyâm é hkyíng jé rá nghut lhê; haú hkûn kúm gi, yhangmoq zoshuq gám kó rá nghut lhê.

<sup>16</sup> Ó yuq le, mebu xau má pán sik eq a lhaq hpo wú kó; hkâsu mù gá le, pán sik kun byuq jáng, mebu xau le je lhoq cheq pyám rá nghut lhê.

<sup>17</sup> Tsibiyiq wing asik lé le, shokuq htûng axau má ó a kat wú kó. Kat é nghut jáng,

tsibiyiq wing asik soq htân luí, htûng buq goq byuq mù, tsibiyiq wing le yui shun byuq, htûng le htên byuq, dut rá nghut lhê. Haú mù, tsibiyiq wing asik lé, shokuq htûng sik má kat jáng sheq, haú í jûng é a hten rá nghut lhê." gá ri.

*Shí Bê Myiwe Zo Eq No É Myiwe Myhí*

*Mrk 5:21-43; Luk 8:40-56*

<sup>18</sup> Yesuq haú su ga tái nyi é hkûn, suwún rayuq jé lé lô mù, Yhâng é hí má hkyihput htuq luí, "Ngá zo byizo gi, ahkuí za shi byuq bê. Nghut kôlhang, Náng lé mù, yhâng é ahtoq má loq lé ke byi laq, haú jáng, yhang, asak dum dui lò rá nghut lhê." ga tái ri.

<sup>19</sup> Yesuq gi, toq mù, Yhâng é chángzô pé eq rahá, haú yuq htâng châng e ló akô.

<sup>20</sup> Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huí lé mù, Yhâng é bushi htâng má é záng kat ri.

<sup>21</sup> Myiwe myhí haú gi, yhang gûng yhang, "Ngò, Yhâng é buhtâng má é wó záng jáng gi, ge byuq rá nghut lhê." ga, wó myit é yanmai nghut ri.

<sup>22</sup> Yesuq gi, lhing wú kat luí, yhang lé myàng jáng, "Ngá zo é, nhik hkâ-ngê, náng é lumjíng myit gi, nang lé lhoq gè byi bê nghut ri." ga tái ri. Haú hkûn jáng yhang, myiwe myhí haú gi, ge byuq bê nghut ri.

<sup>23</sup> Yesuq gi, suwún hpô é yhûm má jé wang ló é hkûn, sampyí mut bang eq garu garín dut nyi é bang lé, é myâng mù,

<sup>24</sup> yhangmoq lé, "Hui keq. Myiwe zo gi, shi byuq é a nghut, yhup myhí tô é sheq ru nghut lhê." ga tái jáng, yhangmoq gi, Yhang lé wuizui kut pyám byí akô.

<sup>25</sup> Yesuq gi, byù hpûng lé, shinggan shut htoq ló nhâng mù, Yhang wang é luí, myiwe zo haú lé loq eq zuí kat jáng, myiwe zo haú gi, dum dui toq lo ri.

<sup>26</sup> Haú hkyo é danglù gi, ramau gón yhang jam ló byuq bê nghut ri.

*Myoqjit Í Yuq Eq Nhut Jit Sù Rayuq Lé, Lhoq Gê Byí É Hkyô*

<sup>27</sup> Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng òn uchyang, "Dawiq é Yhangzo é, ngá-nhik lé shogyô yù laq ô!" ga wut tái akô.



<sup>28</sup> Yesuq gi, yhúmkaû má jé wang ló é hkûn, myoqjit su nhik châng wang lò kômù, haú nhik lé, "Ngò wó kut byí é lé, nungnhik lumjíng akô luq?" ga myí ri.

Haú hkûn, yhangnhik gi, "Lumjíng lhê ô, Yhumsíng ê." ga tû taí akô.

<sup>29</sup> Hau htâng, Yhang gi, haú nhik é myoqjí má é záng htung luí, "Nungnhik lumjíng é eq rajung za dut sháng gaq." ga taí ri.

<sup>30</sup> Haú mù, yhangnhik gi, myoq wó myâng bekô nghut ri. Yesuq gi, "Shí hkyô, ó lé le hkâsê nhâng kó." ga, yhangnhik lé htân htân sidiq byí ri.

<sup>31</sup> Nghut kôlhang, yhangnhik gi, haú hkyô lé, haú mau ramau gón yhang taí pyo ló bekô nghut ri.

<sup>32</sup> Haú nhik htoq ló nyí kô é hkûn, nat gang wang júng luí, dang a wó nyô sù rayuq lé, Yesuq chyáng shuí lé lo akô.

<sup>33</sup> Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shí su dut é hkyô lé, Israelaq amyû má radàm lháng a myang wú." ga taí bum akô.

<sup>34</sup> Nghut kôlhang, Hparishe pé kúm gi, "Nat gâng pé é zaú é wum-o a-tsam èq za, nat gâng pé lé hkat htoq pyâm é nghut ri." ga taí bum akô nghut ri.

### *Mû Zui Byù Shaú Ri*

<sup>35</sup> Yesuq gi, myuq pé eq wà pé banshoq má wàng luí, haú pé mâ é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nõhpyo ajung jung eq noli nojàng hui bang yuq hkangmó lé, lhoq gê byí wún ri.

<sup>36</sup> Yesuq gi, byù moq mó lé myàng jáng, wú shogyô nyi ri. Hkâsu mù gâ le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri.

<sup>37</sup> Haú mù, Yhang gi, Yhâng é chángzô pé lé, "Kyôshù yù rá myo shoq joq kôlhang, mû zui rá byù gi, shaú nyi ri.

<sup>38</sup> Haú mù, haú kyô Yhumsíng lé, Yhâng é kyô yô má, kyô shu byù myo myo nhâng byi rá matú, dung keq." ga taí ri.

## 10

### *Raxe Í Yuq Lé Nhang Htoq Kat É Hkyô*

*Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17*

<sup>1</sup> Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, noli nojàng eq nõhpyo ajung jung lé wó lhoq gê rá ahko ahkáng yhangmoq lé byí ri.

<sup>2</sup> Haú lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzô nhiktang Yakuq eq yhanggu Yohan;

<sup>3</sup> Hpilip eq Barhtolume; Htomaq eq kang guq sù Mahte; Alhpe é yhangzo Yakuq, Htade,

<sup>4</sup> Zelutuq\* dut é Simun eq, Yesuq lé ap pyám rá sù, Yudaq Iskarut pé nghut akô.

<sup>5</sup> Yesuq gi, haú bang raxe í yuq lé dangsâng mù, nhang htoq kat ri. Yhang sang kat é dang gi, "Tùngbaù pé chyáng le hkâ-é kó; Samariq wà rawà má le hkâwâng kó.

<sup>6</sup> Haú byuq byuq é sau pé su nghut nyi é Israelaq byu pé chyáng sheq ê keq.

<sup>7</sup> Nungmoq gi, é mù, 'Mauhkûng mingdán gi, chyáng lò bê nghut ri.' nghu é danglù lé hko kyo keq.

<sup>8</sup> Nò bang lé lhoq gê byi, shí bê bang lé lhoq dui toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Láí láí wó é lé, láí láí byi keq.

<sup>9</sup> Nungmoq é hpyihit má, hîng, ngùn eq gyi pé hkâkat chûng kó;

<sup>10</sup> hkyowui é matú, etap, mebu htaí, hkyî-tsung eq dumbáng pé hkâyü chûng kó; hkâsu mù gâ le, mû zui sù gi, zoshuq wó gíng lhê.

<sup>11</sup> Hká wà hká dum má jé wang ló le le, haú mâ é gingdán é byù lé hô mù, haú mai htoq ló é hkûn jé shoq, haú yuq é yhùm má za nyi nyi keq.

<sup>12</sup> Haú yhùm má wang é hkûn, shichyên yù keq.

<sup>13</sup> Haú yhùm gi, gingdán é nghut jáng, nungmoq shimân byí é hkyô, yhangmoq chyáng joq nyi sháng gaq; a gingdán é nghut

\* **10:4** Zelutuq gâ é lichyúm gi, yhumsíng zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó rá matú shikut nyi é hpúng bang lé, Zelutuq gâ lhê.

jáng, nungmoq chyáng dum taû lò sháng gaq.

<sup>14</sup> Nungmoq lé a lhom hap yu é eq nungmoq é dang lé a lhom gyo byi kô é nghut jáng, haú yhûm haú wâ mai htoq lô é hkûn, nungmoq é hkyiwa má dap é hpuilhaû lé ko hkyô pyâm to keq.

<sup>15</sup> Ngò, nungmoq lé teng za taí kôlé, tarâ jéyáng é buinyì má, haú wâ gi, Sodom eq Gomoraq myuq htoq má je hpuzo râ nghut lhê.

<sup>16</sup> Wamhkui hpúng má nhang hâng kat é sau pé lé su, Ngò, nungmoq lé nhang kat é nghut lhê. Haú mù, lhangmuì su hpaqchyì bò luì, hpûngkyui su nú-nhâm nyì keq.

<sup>17</sup> Byu pé lé sidiq keq; hkâsu mù gà le, yhangmoq gi, nungmoq lé, tarâ rûng pé má é ap pyám kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê.

<sup>18</sup> Nungmoq gi, Ngá é yanmai, mauzau wuì eq hkohkam pé é hí má shuì jé é hui luì, yhangmoq é hí má le, tûngbaù pé é hí má le, saksé myang hkám kó râ nghut lhê.

<sup>19</sup> Nghut kôlhang, nungmoq lé ap pyám kô é hkûn, nungmoq hkâsu taí râ eq haí taí râ lé, hkâ-myt chiq kó. Haú hkûn taí râ dang, nungmoq wó kó râ nghut lhê.

<sup>20</sup> Hkâsu mù gà le, haú gi, nungmoq é dang a nghut, nungmoq é Yhângwâ é Woi-nyí sheq, nungmoq dông taí râ ru nghut lhê.

<sup>21</sup> Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó râ nghut lhê; zo wuì gi, mó wuì lé gumlau toq mù, sat pyám nhâng kó râ nghut lhê.

<sup>22</sup> Byù lhunglhang bang gi, Ngá é yanmai, nungmoq lé a nguì kut kó râ nghut lhê; nghut kôlhang, jihâm jé shoq wó hkam jân nyì é sù gi, hkyi yu é hui râ nghut lhê.

<sup>23</sup> Rawò má zing-ri é hui jáng, rawò shut hfang ê keq. Ngò, nungmoq lé teng za taí kôlé, Israelaq byu pé é myuq pé má, nungmoq a ban wang ngap shimá, haú Byu Yhangzo jé râ nghut lhê.

<sup>24</sup> Jongzo gi, sará htoq, dui-nhâng zoshâng gi, yhumsing htoq, gyaú râ a nghut.

<sup>25</sup> Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lhang Bezebulaq† ga kô le gi, Yhâng é yhumbyù wuì lé gi, je riyhang nghû kó râ a nghut lhú?

<sup>26</sup> Haú mù, yhangmoq lé hkâgyuq kó. A byông htoq loshoq wó zaù nghop tô é haí le a joq râ nghut lhê; a sé loshoq wó haq tô é le, haí a joq râ nghut lhê.

<sup>27</sup> Ngò, nungmoq lé mauchut hkaû má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkûng htoq mai taí pyô keq.

<sup>28</sup> Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sù lé sheq, gyuq nyì keq.

<sup>29</sup> Johkyáng í du lé, gyi htingchap rachap eq wó ûng pyâm lhê a nghut kó lhú? Nghut kôlhang, haú radu lhang, nungmoq é Íwâ é myit eq a nghut jáng, myigùng má wó byit gyó râ a nghut.

<sup>30</sup> Nungmoq é ulhum mâ é xâm banshoq lé lhang, nghap to gù nghut lhê.

<sup>31</sup> Haú mù, hkâgyuq kó; nungmoq gi, haú johkyáng myo myô htoq má lhang gù je bo é bang nghut lhê.

<sup>32</sup> Byu pé hí má, Ngo lé lhom yín yu é sù ó yuq lé nghut kôle, mauhkûng htoq mâ é Ngá Wâ é hí má, Ngò lhom yín yû râ nghut lhê.

<sup>33</sup> Byu pé é hí má, Ngo le he-ngik pyâm é sù ó yuq lé nghut kôle, mauhkûng htoq mâ é Ngá Wâ é hí má, Ngò he-ngik pyâm râ nghut lhê.

<sup>34</sup> Ngo lé, haú myidàm htoq má simsaq hkyô byi râ matú lé lo é sù su hkâ-ngâm kó. Ngò gi, simsaq hkyô byi râ matú lé lo é a nghut, sâm byi râ matú sheq lé lo é ru nghut lhê.‡

<sup>35</sup> Hkâsu mù gà le, 'Yuqzo gi, yhângwa eq, byizo gi, yhângnu eq, dumó gi, yhângmhoí eq, byoq lhum kó râ nghut lhê.

<sup>36</sup> Yhumsing é yhumbyù wuì gi, yhumsing é gyè taù dut râ nghut lhê.†\* gâ tô é matú sheq, Ngò jé lé é ru nghut lhê.

† 10:25 Bezebulaq gà é gi, Tsadán é myíng rajà nghut lhê.

‡ 10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq râ nghut é hkyô lé sé mù, haú su ga taí é nghut lhê. \* 10:36 Mihka 7:6

<sup>37</sup> Ngo lé chyt é htoq yhumsing é înu îwa lé je chyt é sù ó yuq nghut kôle, Ngá é chángzo kut râ gingdán sù a nghut; Ngo lé chyt é htoq yhumsing é zo wuî lé je chyt é sù ó yuq nghut kôle, Ngá é chángzo kut râ gingdán sù a nghut;

<sup>38</sup> Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut râ gingdán sù a nghut.

<sup>39</sup> Yhumsing é asak lé ha bûn é sù ó yuq nghut kôle, asak sum râ nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó râ nghut lhê.

<sup>40</sup> Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haû Ngo lé nhang kat Sù lé hap yu é sù nghut bê.

<sup>41</sup> Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yû râ nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yû râ nghut lhê.

<sup>42</sup> Shí, tiq bang mâ é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù râ za nghut lhê." gâ ri.

## 11

### *Yesuq Eq Wui-myhup Sará Yohan Luk 7:18-35*

<sup>1</sup> Yesuq gi, Yhâng é chángzo raxe í yuq lé dang ban pying é htâng má, Galile mau mâ é wà pé má mhoqshit râ matú eq hko kyo râ matú, haû jowò mai htoq e ló bê nghut ri.

<sup>2</sup> Wui-myhup Sará Yohan gi, Hkrisduq kut nyi é hkyô lé, htóng hkaû má wó gyo jáng,

<sup>3</sup> "Nàng gi, haû jé lé lô râ Sù nghut lhê lhú? Haû a nghut jáng, ngamoq gi, góyuq lé láng ra shirâ lhú?" ga, yhâng é chángzô pé lé myí nhang kat ri.

<sup>4</sup> Yesuq tû taí é gi, "Nungmoq wó gyo wó myang é hkyô, Yohan lé ló taí kyo keq;

<sup>5</sup> myoqjit bang, myoq wó myâng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit

bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê.

<sup>6</sup> Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

<sup>7</sup> Yohan é chángzô pé taû ló kô é u lé, Yohan eq séng luî, byù moq mó lé Yesuq taí é gi; "Nungmoq gi, haî lé hpuq wú râ matú, haû yoso shut e akô lhú? Laî eq hik nhûn é jamgàm lé wú râ matú nghut akô lhú?

<sup>8</sup> Haû a nghut jáng, haî lé wú râ matú e akô lhú? Nú-nhâm é mebu wut sù lé wú râ matú e akô lhú? A nghut. Nú-nhâm é mebu wut bang gi, hkohkâm-wâng pé má sheq rû nyi lhê.

<sup>9</sup> Haû nghut lé gi, haî lé wú râ matú ê kô é lhú? Myiqhtoi rayuq lé lhú? Haû kúm nghut ri; Ngò, nungmoq lé taí kôlé, Yohan gi, myiqhtoî htoq lháng gyaú sù nghut lhê.

<sup>10</sup> Haû yuq é hkyô lé, Chyúmdang má kâ tô é gi,

"Wú aq, Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê."\*

gâ ri.

<sup>11</sup> Ngò, nungmoq lé teng za taí kôlé, myiwe wuî mai hku kat é bang má, Wui-myhup Sará Yohan htoq je kô é rayuq lháng a htoq wú shi; nghut kôlhâng, Garai Gasâng é mauhkûng mingdán má je tiq dik sù gi, Yohan htoq je kô lhê.

<sup>12</sup> Wui-myhup Sará Yohan é buinyi mai ahkuî jé shoq, mauhkûng mingdán gi, lú chýn wang nyi é hui mù, sarhé pé gi, haû lé wó yû bekô nghut ri.

<sup>13</sup> Hkâsu mù gâ le, Yohan é ahkyíng jé shoq, haû myiqhtoî pé banshoq eq tarâ gi, haû hkyô eq séng luî, myiqhtoi htoî to gù nghut lhê.

<sup>14</sup> Nungmoq hap yù nau é nghut jáng, Yohan gi, haû jé lé lô râ ga sù Eliyaq nghut lhê.\*

<sup>15</sup> Gyô yù râ nohkyap dap sù gi, gyô yù sháng gaq.

<sup>16</sup> Shí ipyat lhê é byu pé lé, Ngò, hai eq taí kê wú râ lhú?

<sup>17</sup> Yhangmoq gi,

"Nungmoq é matú, ngamoq sampyí mut byi kôlhâng, nungmoq gi, a gó kó;

ngamoq, ngaù hkyangsâng kôlhang, nungmoq gi, a ngaù kó.'

ga luí, gaì pé má zùng mù, góbang lé wut taí lhùm nyi é zoshâng wuì eq wuì akô.

<sup>18</sup> Hkâsu mù gà le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akô.

<sup>19</sup> Haù Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô. Nghut kôlhang, hpaqchyí byéng-yá gi, yhâng é muzò eq saksé tân shit nyi ri." gà ri.

### *Myit A Lhîng É Wà Mó Pé Hkyô*

*Luk 10:13-15*

<sup>20</sup> Hau htâng, Yesuq gi, laklaí kumlhá pé je myo kut shit bê nghut kôlhang, myit a lhîng é myuq pé lé tân é gi,

<sup>21</sup> "Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhîng mù, jimê tú wut lhê, myiwap kyaq gyùn lhê kut bekô râ nghut lhê.

<sup>22</sup> Ngò, nungmoq lé taí kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê.

<sup>23</sup> Dum mù, Kaperna-um wà nàng ê, nàng gi, mauhkûng jé shoq waq toq é hui râ lhú? A nghut, mosumhkung má sheq gyó râ nghut lhê. Nàng chyáng kut shit é laklaí kumlhá lé, haù Sodom wà má kut shit é ru nghut le gi, myuq haù hkû-nyí jé shoq joq nyi râ nghut lhê.

<sup>24</sup> Ngò, nungmoq lé taí kôlé, tarâ jéyáng é buinyi má, Sodom wà hpuzô é gi, náng htoq shau râ nghut lhê." gà ri.

### *Ngú Nyí Bâng É Matú Bánno Jang*

*Luk 10:21-22*

<sup>25</sup> Haù u lé, Yesuq taí é gi, "Mauhkûng eq myigung é Yhumsîng, Áwa ê, Nàng gi, haù pé lé, hpaqchyí byéng-yá bò bang eq myit hpaqchyí sé bâng é hí má nghop to luí,

zoshâng wuì lé tân shit bê nghut é yanmai, Ngò, Nang lé hkya-on lhê ô.

<sup>26</sup> Nghut bê, Áwa ê, haù gi, Nàng ô nau é hkyô nghut ri.

<sup>27</sup> Ngá Wa gi, lhunglhang lé Ngá é loq má ap byí to bê. Haù Zo lé, Áwa mai lai luí ó le a sé; Áwa lé le, haù Zo eq haù Zo mai sé nhâng râ matú hkyin yu é bang mai lai luí ó a sé.

<sup>28</sup> Ngú é eq wòlai wun é lhunglhang bang ê, Ngá chyáng lé keq; Ngò, nungmoq lé bánno nhâng râ nghut lhê.

<sup>29</sup> Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yú keq; haù hkûn, nungmoq é asak woi-nyí bánno kó râ nghut lhê.

<sup>30</sup> Haù mù gà le, Ngá é kandang gi, waq lui é htoq agó, Ngá é wò le sôm lhê." gà ri.

## 12

### *Bánno Buinyi É Yhumsîng*

*Mrk 2:23-28; 3:1-6; Luk 6:1-5, 6-11*

<sup>1</sup> Haù yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaù mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yú mù, zô akô nghut ri.

<sup>2</sup> Hparishe pé gi, haù lé myàng kôjáng, "Wú aq! Nàng é chángzô pé gi, Bánno buinyi má a ge kut jung lé kut nyi akô." ga taí kat akô.

<sup>3</sup> Haù hkûn, Yesuq tú taí é gi, "Dawiq lhang gi, yhâng htâng châng é bang eq rahá zòmut huí é hkûn hkâsu kut é hkyô lé, nungmoq a nghap wú kó lhú?

<sup>4</sup> Dawiq gi, Garai Gasâng é yhúmhaù má wang ê mù, hkyangjông pé mai lai luí, ó le a ge zô é, kyáng tô é muk lé, yhang eq yhâng htâng châng é bang yù zo kô é a nghut kó lhú?

<sup>5</sup> Hau htoq agó, Bánno buinyi má, hkyangjông pé gi, noqkuq yhúmhaù má Bánno buinyi é tarâ lé shut kôlhang mara a wó é lé, haù tarâ laiká má nungmoq a nghap wú kó lhú?

<sup>6</sup> Ngò, nungmoq lé taí kôlé, haù noqkuq yhùm htoq je ko sù gi, shí má nghut nyi lhê.

<sup>7</sup> Ngò ô nau é gi, hkungga nhông hkyô a nghut, shogyo nhikmyin hkyô sheq ru

nghut l  <sup> </sup> g     lychy m l  nungmoq s  k    ru nggut le gi, mara a b  bang l  mara h n k  r  a nggut.

<sup>8</sup> Hk su m  g  le, ha  Byu Yhangzo gi, ha  Banno buinyi   Yhumsing nggut l  ." g  ri.

<sup>9</sup> Hau ht ng, Yhang gi, ha  jow  mai e l  m , yhangmoq   tarajong m  wang e l  ri.

<sup>10</sup> Loq rahkyam ajum shi byuq   by  rayuq le, ha  m  nyi t  ri. Yhangmoq gi, Yesuq l , "Banno buinyi m , n hpyo lhoq g  byi le, tar  wang l   l h ?" ga myi   d ng, Yhang l  mara h n r  hky  ho ak  nggut ri.

<sup>11</sup> Ha  hk n, Yesuq gi, "Nungmoq chy ng m      yuq w , yhumsing   sau radu, Banno buinyi m  dong gy  t  le, a xe htoq yu   nyi k  r  l h ?"

<sup>12</sup> By  gi, sa  htoq m  hpaudap dik   nggut l  ! Ha  m , Banno buinyi m  ge   hky  kut le, tar  wang l  ." ga yhangmoq l  t  ta  ri.

<sup>13</sup> Hau ht ng, Yhang gi, ha  loq jum shi s  l , "N ng   loq nyhang kat aq." ga ta  kat j ng, ha  yuq gi, loq nyhang kat j ng, loq ha  gi, a no   loq su ge byuq b  nggut ri.

<sup>14</sup> Hparishe p  k m gi, htoq l  k m , Yesuq l  hk su kut w  sat py m r  hky  l , ch m hpy  l m bum ak  nggut ri.

### *Garai Hkyin T    Dui-nh ng Zosh ng*

<sup>15</sup> Yesuq gi, ha  hky  l  s  j ng, ha  jow  mai htoq l  b  nggut ri. By  myo myo le, Yh ng ht ng ch ng b m k m , Yhang gi, n hpyo hui bang banshoq l  lhoq g  byi lu ,

<sup>16</sup> Yhang   yuq nggut   hky  l , a ta  by ng htoq r  mat , yhangmoq l  ta  hk m t  ri.

<sup>17</sup> Ha  gi, myiqhtoi Esai-aq   nhut d ng mai ta  t    dang l  lhoq dik r  mat  nggut ri. Dang ha  p  gi,

<sup>18</sup> "Shi yuq gi, Ng  chyt, Ng  myit ngu  lu , hkyin t    Ng    dui-nh ng zosh ng nggut l  ;

Ng  gi, Ng    Woi-ny , Yhang l  kat byi r  nggut m ,

Yhang gi, tar  dingm n   hky  l  by  my  banshoq p  m  ta  kyo r  nggut l  .

<sup>19</sup> Yhang gi, ha  a hpuq t    htoq ag , a garu r  nggut l  ; Yh ng   ht  l , hky  m  p  m  w  gyo r  a nggut.

<sup>20</sup> Yhang gi, tar  dingm n   hky  lhoq ung   hk n j  shoq, n ng chap py m b  j m g m l  le, lhoq hkyui r  a nggut, myihkau za htoq nyi b  myi l  le, lhoq sat py m r  a nggut.

<sup>21</sup> By  my  ch ngjup gi, Yh ng   my ng m  myit myoqby  k  r  nggut l  ."<sup> </sup>

g  ri.

### *Yesuq Eq Bezebulaq*

*Mrk 3:20-30; Luk 11:14-23; 12:10; 6:43-45*

<sup>22</sup> Hau ht ng, ag  ashop   nat gang wang j ng lu , myoqjit nhutjit   by  rayuq l , Yesuq chy ng shui l  l  k j ng, Yesuq gi, ha  yuq l  lhom lhoq g  byi ri; ha  m , ha  yuq gi, dang le w  ny , myoq le w  my ng dut b  nggut ri.

<sup>23</sup> By  hp ng m  gi, ha  l  w  ma  byuq k m , "Shi yuq, Dawiq   Yhangzo za gi, nggut l   laq?" ga ta  bum ak .

<sup>24</sup> Nggut k lhang, Hparishe p  gi, ha  l  w  gyo k j ng, "Shi yuq gi, nat g ng p    zau Bezebulaq\*   wum-o a-tsam  q za nat g ng p  l  w  hkat htoq   nggut ri." ga ta  bum ak  nggut ri.

<sup>25</sup> Yhangmoq myit nyi   hky  l  Yesuq s  m , yhangmoq l  ta    gi, "Hk  mingd n nggut k le, ahka  m  byoq g ng l m nyi k    nggut j ng, ht n byoq byuq r  za nggut l  ; ha  eq rajung za, myuq ralhum nggut nggut, yhumhtu ralhum nggut nggut, yhangchang byoq l m nyi k    nggut j ng, ha  gi, w  g ng nyi r  a nggut.

<sup>26</sup> Tsad n gi, Tsad n l  hkat htoq py m   nggut j ng, yhumsing g ng yhumsing lhoq hpyoq nyi g  b  nggut ri. Ha  su nggut j ng, yh ng   mingd n gi, hk su kut w  g ng to r  l h ?"

<sup>27</sup> Ha  m  lu , Ng  gi, Bezebulaq   wum-o a-tsam  q za nat g ng p  l  hkat htoq   nggut j ng, nungmoq   byu p  gi,   yuq   wum-o a-tsam  q hkat htoq py m k    nggut l   l h ? Ha  su nggut j ng, ha  bang gi, nungmoq l  tar  j y ng bang dut k  r  nggut l  .

<sup> </sup> 12:21 Esai 42:1-4 \* 12:24 Bezebulaq g    gi, Tsad n   my ng raj  nggut l  .

28 Nghut kôlhang, Ngò gi, Garai Gasâng é Woi-nyí eq nat gâng pé lé hkat htoq pyâm é nghut jáng, Garai Gasâng é mingdán gi, nungmoq chyáng jé bê nghut ri.

29 Ó yuq nghut kôle, wum-o bò sù lé hí tuí zing pyâm é a nghut le gi, yhâng é yhùm má lú wâng mù, yhâng é sutzè lé hkâsu wó lú yû râ lú? Haú yuq lé hí tuí zing pyâm jáng sheq, yhâng é sutzè lé wó lú yû râ nghut lhê.

30 Ngá hkyam shut a dap sù gi, Ngo lé gyè kut sù nghut lhê; Ngò eq rahá a shùm tsing sù gi, lhoq pyo pyâm é sù nghut nyi ri.

31 Haú mù, Ngò, nungmoq lé taí kôlé, byu pé é yubak mara hkangmó eq Garai Gasang lé rhoi dang taí pyâm é lhunglhang gi, mara hkyut byí é wó hui râ nghut lhê. Nghut kôlhang, haú Chyoiyúng Woi-nyí lé rhoi dang taí pyâm é gi, mara hkyut byí é hui râ a nghut.

32 Haú Byu Yhangzo lé dang dông shut é sù gi, mara hkyut byí é wó hui râ nghut lhê; nghut kôlhang, haú Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byí é hui râ a nghut.

33 Ashi lé wú luí, agàm lé sé râ nghut é yanmai, agàm lé lhoq gè jáng, ashi le gè râ nghut lhê; agàm lé a lhoq gè jáng, ashi le gè râ a nghut;

34 Duq htân lhangmui amyû ê, nungmoq gi, agè ashop é bang nghut to kôluí nhing, dang gè hkâsu wó taí kó râ lú? Hkâsu mù gâ le, i-myt unghkaú má bying mui tô é lé za, nhut mai taí htoq lo é nghut lhê.

35 Ge é sù gi, yhumsing é i-myt unghkaú má é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myt unghkaú má é agè ashop é sutdò mai, agè ashop é zè pé lé lhoq htoq shit lhê.

36 Ngò, nungmoq lé taí kôlé, byu gi, yhumsing taí kat é akyû a bo é dang pé é matú, tarâ jéyáng é buinyi má taí sân kyo ra kó râ nghut lhê.

37 Hkâsu mù gâ le, yhumsing mara lut râ le, ó le ó taí é dang pé mai; mara byí é hui râ le, ó le ó taí é dang pé mai, nghut râ nghut lhê." gâ ri.

*Limik Kumlhá Lé Dung Kô É Hkyô  
Mrk 8:11-12; Luk 11:29-32; 11:24-26*

38 Hau htâng má, Hparishe pé eq tarâ sará pé ra-am gi, "Sarâ ê, ngamoq gi, Nàng, limik kumlhá kut shit râ lé myàng nau ri." ga Yhang lé dúng akô.

39 Haú mù, Yhang tú taí é gi, "Agè ashop é eq lhum a zuí é ipyat shí gi, limik kumlhá dung nyi ri myhi-nhung! Myiqhtoi Yonaq é kumlhá mai lai luí, gotú hai le tûn shit râ a nghut.

40 Hkâsu mù gâ le, Yonaq gi, ngo mó é wamdau hkaú má sum nyí sum myîn lúng é su, haú Byu Yhangzo le, myigùng kang má sum nyí sum myîn lúng râ nghut lhê.

41 Ninewe wà byu wuí gi, Yonaq mung-dang hko kyô é hkûn myit lhing kô é nghut mù, tarâ jéyáng é buinyi má, ipyat shí má é bang eq rahá toq lò luí, ipyat shí má é bang lé mara hûn kó râ nghut lhê; haú Yonaq htoq ko sù gi, ahkuí shí má jé nyi to bê.

42 Maupyí má é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyô yù bê nghut mù, haú tarâ jéyáng é buinyi má, ipyat shí má é bang eq rahá toq lò luí, ipyat shí má é bang lé mara hûn râ nghut lhê; haú Sholumon htoq ko sù gi, ahkuí shí má jé nyi to bê.

43 Haú agè ashop é nat gi, byu rayuq chyáng mai htoq ló mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri.

44 Haú hkûn, yhang gi, 'Ngò nyi lai lo é yhùm má dum taú ló wú râ.' ga taí ri. Yhang dum taú jé ló wú le, yhùm haú lé, ó le a sing yu hpyuq é htoq agó, san za rago dut to lánng é lé ló myang ri.

45 Haú jáng, yhang gi, dum taú ê mù, yhâng htoq je wuí é nat nyhit nat lé shuí lò luí, haú má lo wang nyi to bekô. Haú mù, haú yuq é nyi yap sâmlai gi, hí lhê htoq má je wuí lò bê nghut ri; agè ashop é ipyat shí le, haú eq rajung za dut râ nghut lhê." gâ ri.

*Yesuq É Yhângnu Eq Yhanggû Pé  
Mrk 3:31-35; Luk 8:19-21*

46 Yesuq, shiwa byu pé lé dang rû nyo nyi ashí hkûn, yhângnu eq yhanggu pé gi, Yhang lé nyò naù kômù, shinggan má lé yap tô akô nghut ri.

47 Haú mù, Yesuq lé, "Náng nu eq nunggu pé gi, Nang lé nyò naù mù, shinggan má lánng yap bum akô." ga taí kyô akô.

48 Haú hkûn, Yhang gi, "Ô pé gi, Ngá nu eq Ngá gu pé nghut akô lúhú?" ga tû taí kat ri.

49 Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wui nghut bê.

50 Hkâsu mù gâ le, mauhkûng htoq mâ é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá ná, Ngá nu chyat nghut bê." ga xoq taí ri.

## 13

*Kyôshi Sân É Dangtú*  
*Mrk 4:1-20; Luk 8:4-15*

1 Haú nyí má yhang, Yesuq gi, yhúmhaú mai htoq ló mù, wui nhông yàm má é zung tô ri.

2 Byù hpûng mó gi, Yhâng é lînhkkyuq má zup zîng lé bûm kô é yanmai, Yhang gi, lhaí hkaú má doq zùng tô ri. Shiwa byu pé kúm gi, gin-gau htoq má yap tô bum akô.

3 Hau htâng, Yhang gi, haú bang lé, dangtú pé dông myo myo taí é má, "Kyô hkyó sù rayuq gi, kyôshi san râ ga htoq e ló ri.

4 Yhang, kyôshi sân kat é hkûn, ra-am gi, hkyô má gyó ang mù, nghoq pé èq lé hte zô pyám ri.

5 Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lô kôle,

6 amyit a wó chin hing é nghut mù, bui htoq lô jáng, lhap kyuq pyám bê nghut ri.

7 Dum ra-am gi, zugyóm hkaú má gyó ang luí, zubyap haú pé kô lò mù, wup pyám ri.

8 Ra-am dum nghut jáng, myìhpún bo é jang má gyó ang luí, ashi zuí lo é gi, sân kat é htoq rashô tú, hkyuq xê tú, sum xê tú, myô jat lo é nghut ri.

9 Gyô yù râ nohkyap dap sù gi, gyô yù sháng gaq." ga le taí ri.

10 Haú hkûn, chángzô pé gi, Yhâng chyáng lé mù, "Nâng gi, haí mù, shí bang lé, dangtú dông taí lè lúhú?" ga myí akô.

11 Haú jáng, Yhang tû taí é gi, "Mauhkûng mingdán eq sêng é sê gyo wui é hkyô pé lé sê gyo râ ahko ahkáng, nungmoq lé byí to bê, nghut kôhang, yhangmoq lé gi, a byi shí é nghut lè.

12 Wó to sù lé gi, yhang agùn agó wó râ matú, jat byi shirâ nghut lè. A wó su chyáng mai kúm gi, yhang wó tô é lé lhang yu pyám byi shirâ nghut lè.

13 Yhangmoq gi, wú to kôhang, a myàng kó; gyô nyí kôhang, a wó gyo, a sê gyo kó nghut é yanmai, yhangmoq lé Ngò dangtú dông taí râ é nghut lè.

14 Haú gi,  
'Nungmoq gi, wó gyô tô nyí kôhang, sê gyo kó râ a nghut;  
myang tô nyí kôhang, wú sé kó râ a nghut.

15 Hkâsu mù gâ le, byù shí bang gi, myit nhikshi jit byuq bê;  
yhangmoq é nohkyap gi, a wó gyo kó, myoqjí le chûm byuq bekô nghut ri.

Haú su a nghut le gi, yhangmoq, myoq myàng no gyo mù,  
i-myit bun bông luí, lîng lò kômù,  
Ngò, yhangmoq lé yâ gè byi berâ nghut lè.<sup>✧</sup>

gâ é, Esai-aq é myiqhtoí dang lé lhoq dik é nghut ri.

16 Nghut kôhang, nungmoq é myoq gi, wó myâng mù, nungmoq é nohkyap gi, wó gyô é yanmai, nungmoq gi, hkungsô wó nyí ri.

17 Hkâsu mù gâ le, Ngò, nungmoq lé teng za taí kôlé, nungmoq wó myâng, wó gyô é pé lé, myiqhtoí pé eq dingmán bang myo myo gi, myàng nau gyo nau kôhang, a wó myâng, a wó gyo kó nghut ri.

18 Ahkuí, kyôshi san sù eq sêng é dangtú é lichyúm lé rago gyô wú keq;

19 Hkyô má gyó âng é kyôshi gi, mauhkûng mingdán eq sêng é danglù lé wó gyo kôhang, a sê gyô é yanmai, haú agè ashop sù lé lô mù, yhâng é i-myit hkaú má san kat tô é kyôshi lé, lé yu pyám byí é hui sù lé gâ nau é nghut lè.

20 Luqgok yò pé má gyó âng é kyôshi gi, mungdang lé wó gyo jáng, radá dâm gabú myit èq hap yù kôhang,

21 amyit a wó chin é yanmai, razup zo za yuq mù, mungdang é yanmai, wuîhkê é eq zing-rî é hui kôjáng, hân hân htak ló byuq é sù lé gâ nau é nghut lè.

22 Zugyóm má gyó âng é kyôshi gi, haú mungdang lé wó gyô yù kôhang, shí ipyat

lhê é myit wui myit hke hkyô pé eq hkyô shuí nghoq jung ngùn hîng zèhkoq eq hup pyâm é yanmai, ashi a wó zuí é sù lé gá nau é nghut lhê.

<sup>23</sup> Nghut kôlhang, myìhpún bo é jang má gyó âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haú yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

### *Myoqgàm Dangtú*

<sup>24</sup> Yesuq, yhangmoq lé dangtú dông xoq taí kyô é gi, "Mauhkûng mingdán gi, ge é kyôshi lé, yò má san kat sù rayuq eq du ri.

<sup>25</sup> Byu pé yhup myhî tô bum é u lé, yhâng é gyè gi, lé jé mù, guq gàm gyoro má, myoqshi lé sân to hkó luí, taú ló byuq bê nghut ri.

<sup>26</sup> Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

<sup>27</sup> Yhumsîng hpô é dui-nhâng zoshâng wuì gi, yhâng chyáng lé jé mù, 'Yhumsîng ê, ge é kyôshi lé za yò má sân tô é a nghut lhú? Myoqgàm pé gi, hkâmai htoq lo é lhú?' ga myi kôjáng,

<sup>28</sup> haú yhumsîng hpó gi, 'Gumlau gye èq kut é nghut ri.' ga tú taí ri.

Haú jáng, dui-nhâng zoshâng wuì gi, 'Ng-amoq, myoq haú pé lé ê nut pyám râ lé, nàng ô nau ri lhú?' ga myi akô.

<sup>29</sup> Haú hkûn, yhang gi, 'Hká nut pyám kó; hkâsu mù gâ le, nungmoq, myoq haú pé lé nut é hkûn, guq gàm pé lé le bo záng nut pyám kó râ nghut lhê.

<sup>30</sup> Kyôshu yoq jé shoq rahá yuq to kó sháng gaq; haú hkûn, myoqgàm pé lé hí hkyin tsîng yù mù, nyhê hkyô pyám râ matú hkyom dîng to luí, guq lé kúm gi, shù yù mù, ngá é chyí má tsing kat to râ matú, kyô shu bang lé ngò taí râ nghut lhê.' ga tú taí ri." gâ ri.

### *Angshi Cham Eq Múnchi Dangtú*

#### *Mrk 4:30-34; Luk 13:18-21*

<sup>31</sup> Hau htâng, Yesuq gi, yhangmoq lé gotú dangtú ralhum dum xoq taí é gi; "Mauhkûng mingdán gi, byù rayuq eq, yhâng hkyâm má hô tô é angshi cham eq wuí ri.

<sup>32</sup> Angshi cham haú gi, kyômyui jí ban-shoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

<sup>33</sup> Yhang, gotú dangtú dum xoq taí é gi, "Mauhkûng mingdán gi, myiwe rayuq eq sungso mún sum bûng má yu nyhó luí, haú pé banshoq lé wó lhoq dau nhang é múnchi eq wuí ri." gâ ri.

<sup>34</sup> Yesuq gi, byù moq mó lé, haú pé ban-shoq dangtú dông mai chyat taí ri; yhang-moq lé, dangtú a bo é haí lhang a taí wú nghut ri.

<sup>35</sup> Haú gi, "Ngá nhut lé hpóng mù, dangtú dông mai taí râ;

mingkan lé sâng-hi hpan é mai zaú tô é hkyô pé lé taí sân kyo râ nghut lhê."\*

ga, myiqhtoi dông taí tô é dang lo dik é nghut ri.

### *Myoqgàm Dangtú Lé Taí Sân Kyô É Hkyô*

<sup>36</sup> Hau htâng má, Yesuq gi, byù moq mó mai htoq ló mù, yhúmhkaú má wang ló ri. Haú hkûn, Yhâng é chángzô pé gi, Yhâng chyáng lé lô kômù, "Yò mâ é myoqgàm dangtú eq sêng é hkyô lé taí sân kyo laq." ga taí akô.

<sup>37</sup> Haú jáng, Yhang tú taí é gi, "Ge é kyôshi san sù gi, haú Byu Yhangzo nghut ri.

<sup>38</sup> Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, haú Tsadán é yhangzô pé nghut akô;

<sup>39</sup> haú lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng nghut ri; kyô shu bang gi, maumang lagyô pé nghut akô.

<sup>40</sup> Haú myoqgàm pé lé, nut yù mù, myi má nyhê pyâm é su, haú mingkan htûm é ahkyíng má dut râ nghut lhê.

<sup>41</sup> Haú Byu Yhangzo gi, Yhâng é maumang lagyô pé lé nhâng râ nghut lhê; haú mù, haú bang gi, hkyô lhoq nghoq nhang é bang banshoq eq agè ashop hkyô kut é bang lhunglhang lé, Yhâng é mingdán mai hkyin she htoq yù mù,

\* 13:35 Hkya-on 78:2



<sup>42</sup> gyúng nyi é myibung hkyûng hkaû má dú kat pyám kó râ nghut lhê; hau má, ngaubyi ngaù nhap eq zùi kyik kyik shoq hpuzô nyi kó râ nghut lhê.

<sup>43</sup> Haú hkûn, dingmán bang gi, yhangmoq Yhângwâ é mingdán má bui su duqbó nyi kó râ nghut lhê. Nohkyap dap sù gi, gyô yù sháng gaq.

### *Haq Tô É Sutzè Dangtú*

<sup>44</sup> Mauhkûng mingdán gi, yò má haq tô é sutzè eq wuí ri. Sutzè haú lé myang é sù gi, haú lé saí haq to mù, gabú myit eq taù ló luí, yhang wó é banshoq lé ûng pyám mù, yò haú lé wui yu ri.

<sup>45</sup> Dum, mauhkûng mingdán gi, réng é palhé lé châng ho wún é hpugá hpó eq wuí ri.

<sup>46</sup> Yhang gi, gyai hpaû é palhé lé myàng jáng, yhang wó é banshoq lé ló ûng pyám mù, haú lé wui yu ri.

### *Gùn Lé Dangtú Yu É Hkyô*

<sup>47</sup> Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri.

<sup>48</sup> Gùn haú má ngozo byíng jáng, ngo kóng bang gi, wui yàm má she htoq yù mù, zung to luí, ge é pé lé gi, ngo-pyap má guq kat yù luí, a ge é pé lé gi, dú pyám akô.

<sup>49</sup> Haú eq rajung za, mingkan htûm é ahkyíng má le, maumang lagyô pé gi, gyó lé lô mù, agè ashop é bang lé, dingmán bâng chyáng mai gam htoq yù luí,

<sup>50</sup> ngaubyi ngaù nhap eq zùi kyik kyik shoq hpuzô nyi râ nghut é, gyúng nyi é myibung hkyûng hkaû má dú kat pyám kó râ nghut lhê.

<sup>51</sup> Shí hkyô banshoq lé nungmoq sê gyo bekô lhú?" gâ ri.

Haú hkûn, yhangmoq gi, "Sê gyo bê." ga tû taí akô nghut ri.

<sup>52</sup> Hau htâng, Yesuq gi, yhangmoq lé, "Mauhkûng mingdán eq séng luí mhoq yù bê é tarâ sará ó nghut kôle, yhang mhoq é hkyô gi, yhumsing é sut-púnglhúng hkaû mai zè sik zè xau lé yu htoq é yhumsing hpó rayuq eq wuí ri." ga dum taí ri.

*Myiqhtoi, Myoqdong A Wó Dut É Jang  
Mrk 6:1-6; Luk 4:16-30*

<sup>53</sup> Yesuq gi, dangtú haú pé lé ban taí jáng, haú jowò mai htoq e ló bê nghut ri.

<sup>54</sup> Yhang gi, Yhâng é yhummau má jé ló jáng, byu pé lé, yhangmoq é tarajong má mhoqshit ri; haú hkûn, yhangmoq gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê là?"

<sup>55</sup> Yhang gi, laksíma hpô é yhangzo a nghut lhú? Yhângnû é myìng gi, Mariq gâ lhê a nghut lhú? Yhanggû pé gi, Yakuq, Yosep, Simun eq Yudaq gâ é bang a nghut kó lhú?

<sup>56</sup> Yhâng nhammó pé le, nga-nhúng eq rahá nghut nyi lhê a nghut kó lhú? Haú su nghut le nhíng, haú pé banshoq lé, Yhang hkâmai wó yu é nghut lhê là?" ga myí bùm kômù,

<sup>57</sup> Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhùm má za, myoqdong a lhaq wó wú é nghut lhê." ga tû taí kat ri.

<sup>58</sup> Yhangmoq lumjíng myit a bò kô é yanmai, Yesuq gi, haú má, laklaí kumlhá myo myo a kut shit lo nghut ri.

## 14

### *Wui-myhup Sará Yohan Shi Byuq É Hkyô Mrk 6:14-29; Luk 9:7-9*

<sup>1</sup> Haú hkûn, mauzau Herut gi, Yesuq eq séng é ludang lé wó gyo jáng,

<sup>2</sup> yhâng a-ô mâ é bang lé, "Shí yuq gi, Wui-myhup Sará Yohan nghut ri-nhung; Yhang gi, shí é mai dum dui toq lo é nghut mù, hpungwup a-tsam haú pé lé wó kut é nghut ri." ga taí ri.

<sup>3</sup> Herut haú su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyám é yanmai nghut ri.

<sup>4</sup> Hkâsu mù gâ le, Yohan gi, yhang lé, "Nàng, myiwe haú lé hâng yu é gi, tarâ a wang é nghut lhê." ga taí byí nyi é yanmai nghut ri.

<sup>5</sup> Herut gi, Yohan lé sat pyám naú kôlhang, mingbyù wui lé gyuq é yanmai, a wám sat nghut ri; haí mù gâ le, yhangmoq gi, Yohan lé myiqhtoi tsuq nyi kô é yanmai nghut ri.

<sup>6</sup> Nghut kôlhang, Herut é hkû ladu hkyúm buinyi má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù,

<sup>7</sup> byizo haú lé, yhang haì dung le haì byi râ ga dakam é danggidiq byi ri.

<sup>8</sup> Byizo haú gi, yhangnu hpaqchyì byì é lé gyô yù mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri.

<sup>9</sup> Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pê é myoqdong lé tê nau é yanmai le, yhang dúng é lé, byi râ matú,

<sup>10</sup> htóng hkaú má lúng tô é Yohan é ulhum lé hpyit râ hkunmó hkyô kat bê nghut ri.

<sup>11</sup> Yohan é ulhum lé bó má kat luí, myiwe zo haú lé byi jáng, myiwe zo haú gi, haú lé yhangnú chyáng yu ló byi ri.

<sup>12</sup> Haú mù, Yohan é chángzô pé gi, yhang é mâng lé lé yù luí, myhup pyám bekô nghut ri. Hau htâng, yhangmoq gi, Yesuq lé ló taì kyô akô nghut ri.

#### *Byù Ngo Hkyîng Lé Byi Tsô É Hkyô*

*Mrk 6:30-44; Luk 9:10-17; Yhn 6:1-14*

<sup>13</sup> Yesuq gi, haú hkyô lé wó gyo jáng, haú mai lhai jí mù, tsím tsâm é jowò shut Yhang baú e ló ri. Haú lé, byu pé wó gyô bùm kôjáng, wà mó pé mai htoq lé lô kômù, hkyô hkyô Yhang htâng châng e ló akô nghut ri.

<sup>14</sup> Yesuq gi, lhai mai gyó dap ló é hkûn, byù moq mó nyi to lánng é lé myàng jáng, yhangmoq lé wú shogyo luí, nò bang lé lhoq gê byi ri.

<sup>15</sup> Myinhtâng jé lô jáng, haú chángzô pé gi, Yhang chyáng lé kômù, "Shí má gi, tsím tsâm é jowò nghut é htoq agó, buì le gym ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wuì kó sháng gaq, yhangmoq lé nhang kat aq hkoì." ga taì akô.

<sup>16</sup> Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taì kat ri.

<sup>17</sup> Haú su ga jáng, yhangmoq gi, "Muk ngo long eq ngozo í du za ru wó lhê." ga dum tû taì akô.

<sup>18</sup> Haú jáng, Yesuq gi, "Yu lò keq." ga tû taì mù,

<sup>19</sup> shiwa byu pé lé, wàhu yò má zùng nhang ri. Hau htâng, Yhang gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byi ri. Haú chángzô pé gi, shiwa byu pé lé gàm byì akô nghut ri.

<sup>20</sup> Yhangmoq banshoq bang zô gyì bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsíng yu ashì kô nghut ri.

<sup>21</sup> Haú má zô é bang gi, myiwe wuì eq zoshâng wuì lé a nghap lhôm é za, yuqgè baú ngo hkyîng kô bo ri.

#### *Yesuq, Wuì Htoq Má Sô É Hkyô*

*Mrk 6:45-56; Yhn 6:15-21*

<sup>22</sup> Yesuq gi, haú shiwa byu pé lé byo ló nhang nyi é hkûn jáng, chángzô pé lé lhai má wang jí nhâng mù, tû tap shut dap ló lánng nhâng ri.

<sup>23</sup> Shiwa byu pé lé nhang pyâm é htâng má, Yhang gi, kyúdung râ ga, Yhang baú bùm shut doq e ló ri. Myinhtâng chutshúm zó jé shoq, Yhang baú haú má nyi nyi ri.

<sup>24</sup> Haú u lé, lhai gi, gin-gau mai tsómra wê é jowò má jé é hkûn, laì tau mut é yanmai, wuìheng èq gyai yhang lo bat nhùn é hui zô ri.

<sup>25</sup> Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri.

<sup>26</sup> Haú mù, chángzô pé gi, Yesuq nhông htoq má sô nyi é lé myàng kôjáng, gyuq dàn kômù, "Sobyô ô!" ga gyuq nán é èq taì garû akô nghut ri.

<sup>27</sup> Haú jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

<sup>28</sup> Haú hkûn, Petruq gi, "Yhumsîng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taì kat ri.

<sup>29</sup> Haú jáng, Yesuq gi, "Lé lô aq." ga tû taì kat ri.

Haú mù, Petruq gi, lhai mai gyó mù, wuì htoq mai Yesuq chyáng sô e ló ri.

<sup>30</sup> Nghut kôlhang, yhang gi, laidun htan é lé myang kat jáng, wú gyuq luí, wuì má nop ló nyi mù, "Yhumsîng ê, ngo lé hkyi yù laq." ga wut garû kat ri.

<sup>31</sup> Yesuq gi, radá dâm yhâng é loq lhâm kat luî, Petruq lé lêng zing to mù, "Lumjîng myit shau sù ê, nàng haî mù úng-âng lhê lhú?" ga taî ri.

<sup>32</sup> Yhangnhik, lhaî má wàng kôjáng, laidun le zîm byuq bê nghut ri.

<sup>33</sup> Hau htâng, haû lhaî má lúng tô é bang gi, Yhang lé paî gop mù, "Nàng gi, gè gè yhang, Garai Gasâng é Yhangzo nghut bê." ga taî akô nghut ri.

<sup>34</sup> Yhangmoq gi, gû dap ló kômù, Gene-sarat mau má jé wang ló bekô nghut ri.

<sup>35</sup> Haú mau mâ é bang gi, Yesuq lé wú sé kôjáng, awui ayàm mâ é bang banshoq lé kyô kat akô. Haû mù, byu pé gi, nòhpyo hui bang lunglhang lé, shuí lé lô kômù,

<sup>36</sup> nòhpyo hui bang lé, Yhâng é bushi htâng má za lhang záng nhâng râ matú dúng tôngbán akô; Yhang lé záng é lunglhang bang gi, lhoq gè byî é huî bekô nghut ri.

## 15

### *Sansêng É Hkyô Eq A Sansêng É Hkyô* *Mrk 7:1-23*

<sup>1</sup> Hau htâng má, Hparishe pé eq tarâ sará pé ra-am gi, Yerusalem wà mó mai Yesuq chyáng jé lé lô kômù,

<sup>2</sup> "Náng é chángzô pé gi, haî mù luî, îchyî îwa pé é htungli lé a cháng kut akô lhú? Yhangmoq gi, loq hí a chí é zang zô akô nghut ri." ga, lé taî akô.

<sup>3</sup> Haû jáng, Yesuq tû taî é gi, "Nungmoq gi, haî mù, nungmoq é htungli é yanmai, Garai Gasâng é hkunmó lé a cháng kô é lhú?

<sup>4</sup> Hkâsu mù gâ le, Garai Gasang gi, 'Nungmoq é înu îwa lé, hkungga keq.'\* ga le, 'Înu îwa lé, nhîng é sù ó yuq nghut kôle, sat pyâm é hui râ lhê.'\* ga le, taî tô é nghut lhê.

<sup>5</sup> Nghut kôlhang, nungmoq taî é gi, 'byù rayuq yuq, yhumsing é yhângnu yhângwa lé byi âng é zè lé, Garai Gasang lé byi râ chyunghuq nghut lhê ga taî é nghut jáng,

<sup>6</sup> haû yuq gi, yhângwa lé hkungga nó a ra.' gâ akô nghut ri. Haû dông mai, nungmoq gi, nungmoq é htungli é yanmai, Garai Gasâng é mungdang lé he-ngik pyâm akô nghut ri.

<sup>7</sup> Gegùn labyoq kut bang ê! Nungmoq eq séng luî, myiqhtoi Esai-aq htoî tô é dang gi, têng ri.

<sup>8</sup> Myiqhtoi dang haû gi, 'Byù shí bang gi, nhut htoq mai za Ngo lé hkunggâ akô; yhangmoq é myit nhiklhum gi, Ngò eq wê gâng nyi akô.

<sup>9</sup> Yhangmoq, Ngo lé noqkuq nyi kô é gi, akôm má za nghut nyi ri; hkâsu mù gâ le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri.\*  
gâ é nghut lhê." gâ ri.

<sup>10</sup> Hau htâng, Yesuq gi, shiwa byu pé lé, Yhâng chyáng wut yù luî, "Gyô yù mù, sé lo keq.

<sup>11</sup> Nhut má wang lo é haî jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga taî ri.

<sup>12</sup> Haû hkûn, haû chángzô pé gi, Yhâng chyáng lé lô kôluî, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lhú?" ga myi kôjáng,

<sup>13</sup> Yhang gi, "Mauhkûng htoq tsáng myhâng mâ é Ngá Wa a hô tô é agàm hkangmó gi, apûn eq roq nut pyâm é hui râ nghut lhê.

<sup>14</sup> Yhangmoq é yanmai, myit hkâ-myô kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhâm é nghut le gi, í yuq é yhang donghkong má byit gyó kô râ za nghut lhê." ga tû taî ri.

<sup>15</sup> Haû hkûn, Petruq gi, "Ngamoq lé, dangtú hau é lichyúm taî sân kyo laq." ga taî jáng,

<sup>16</sup> Yesuq gi, "Nungmoq, ahkuî le haû-í yhang go nyi ashi kô luq?

<sup>17</sup> Nhut má wang lo é haî jung le, wamdau hkaû má jé wang ló mù, gungdu mai dum htoq ló é nghut lhê.

<sup>18</sup> Nghut kôlhang, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri.

<sup>19</sup> Hkâsu mù gâ le, myit nhiklhum mai htoq lo é gi, agè ashop é dông myit é hkyô pé, byù sat é hkyô, su-myi sulàng lú hkyô,

ashop é dông gungsho zùm yap é hkyô, hkaû é hkyô, a tengmán é saksé hkâm é hkyô, lumù gansang é hkyô pé nghut ri.

<sup>20</sup> Haû pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga taî ri.

*Hkanaan Myiwe Myhí Rayuq É Lumjîng Myit*

*Mrk 7:24-30*

<sup>21</sup> Hau htâng, Yesuq gi, haû mai Turuq eq Sidun mau shut htoq e ló bê nghut ri.

<sup>22</sup> Haû hkûn, haû mau má nyi é Hkanaan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsîng ê, ngo lé shogyô yù laq ô! Ngá byizo gi, nat gang wang júng mù, gyai yhang nò gyîn nyi ri." ga taî garú ri.

<sup>23</sup> Nghut kôlhang, Yesuq gi, dang rahkun le a tû taî nghut ri. Haû mù, Yhâng é chángzô pé gi, Yhâng chyáng lé jé kômù, "Myiwe myhí haû lé ló nhang pyám aq; haî mù gâ le, yhang gi, nga-nhûng é htâng má châng garú nyi ri." ga taî akô.

<sup>24</sup> Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga taî ri.

<sup>25</sup> Haû hkûn, myiwe myhí haû gi, Yhâng é hí má lé mù hkyihput htuaq luî, "Yhumsîng ê, ngo lé garúm yû laq ô!" ga taî ri.

<sup>26</sup> Yesuq gi, "Zô wui chyáng mâ é zoshuq lé yù mù, hkuî pé lé byi tsô é jung a nghut." ga tû taî jáng,

<sup>27</sup> myiwe myhí haû gi, "Yhumsîng ê, haû kúm nghut ri; nghut kôlhang, hkuî pé lhang, yhumsîng hpô é zohpoq mai gyô é zang cham zang htâng lé, zô akô mhaî." ga dum taî ri.

<sup>28</sup> Haû mù, Yesuq gi, "Myiwe zo ê, náng é lumjîng myit gi, kô nyi ri! Náng dúng é hkyô lé gyo byi bê nghut lhê." ga tû taî ri. Haû hkûn jáng, myiwe myhí hau é byizo le ge byuq bê nghut ri.

*Byù Myi Hkyîng Lé Byi Tsô É Hkyô*

*Mrk 8:1-10*

<sup>29</sup> Yesuq gi, haû mai htoq ló luî, Galile nhông yàm má ê jé mù, bùm shut doq ló luî, ló zung nyi ri.

<sup>30</sup> Haû hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nò bang gotú myo myo lé shuí lé lô kômù, Yhâng é hkyî wang má lé nyhi to kô é nghut luî, Yhang gi, haû bang lé lhoq gê byî ri.

<sup>31</sup> Haû shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

<sup>32</sup> Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyi bò bê, haî le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmut to gû lé, Ngò a nhang kat naù." ga taî ri.

<sup>33</sup> Haû hkûn, Yhâng é chángzô pé gi, "Isû é yoso má nhîng, byù shí myhò bang lé luq shoq byi tso râ zoshuq gi, hkarâ é wó râ lhú?" ga myî akô.

<sup>34</sup> Yhang gi, "Nungmoq, muk hkâ-myhó long wó akô lhú?" ga tau myi jáng, yhangmoq gi, "Muk nyhit long eq ngo-nú zo rat-suí wó lhê." ga tû taî akô.

<sup>35</sup> Haû mù, Yhang gi, byù hpûng lé, myigùng htoq má zùng nhang ri.

<sup>36</sup> Hau htâng, Yhang gi, haû muk nyhit long eq ngozo lé yù mù, jeju ban hkya-on jáng, myhik hpé luî, haû chángzô pé lé byi jáng, yhangmoq gi, byù hpûng lé gàm byî akô nghut ri.

<sup>37</sup> Yhangmoq lhunglhang bang zô gyî bùm kô é htâng má, haû chángzô pé gi, amyit ahtâng lé nyhit mung byíng shoq wó guq tsîng yu ashî kô nghut ri.

<sup>38</sup> Haû hkûn zô é bang má, myiwe wui eq zoshâng wui lé a nghap lhôm é za, yuqgè wui baú myi hkyîng yuq bo ri.

<sup>39</sup> Yesuq gi, byù hpûng lé ló nhang pyâm é htâng má, lhaî má wang ji mù, Magadan mau shut dap e ló bê nghut ri.

## 16

*Kumlhá Dung Kô É Hkyô*

*Mrk 8:11-13; Luk 12:54-56*

<sup>1</sup> Hparishe pé eq Saduke pé gi, Yesuq chyáng lé jé kômù, Yhang lé chyam wú é

dông, mauhkông mâ é kumlhá kut shit râ matú, dúng akô.

<sup>2</sup> Haú mù, Yhang gi, yhangmoq lé, "Nungmoq gi, myinhông jé jáng, 'Mau hpong râ nghut lhê, hkâsu mù gâ le, mauhkông ne ri.' ga le,

<sup>3</sup> napkyó lé nghut jáng, 'Hkû-nyí laidun lò râ nghut lhê, hkâsu mù gâ le, mauhkông nè mù, noq ri.' ga le, lhaq taí akô. Nungmoq gi, mauhkông é isâm lé wú mù sê gam hkoq yû kô é nghut kôhang, shí ipyat lhê é kumlhá lé gi, a sê gam hkoq yû kô nghut ri.

<sup>4</sup> Agè ashop é eq lhum a zuí é ipyat shí gi, limik kumlhá lé ho nyi akô; nghut kôhang, Yonaq é kumlhá mai lai luí, gotû haí le tân shit râ a nghut." ga taí ri. Hau htông, Yesuq gi, yhangmoq chyáng mai htoq ló bê nghut ri.

*Hparishe Pé Eq Saduke Pé É Múnchi*  
*Mrk 8:14-21*

<sup>5</sup> Yhangmoq, nhông hé hpoq shut gû dap ló kô é hkûn, haú chángzô pé gi, muk yu chông râ lé tô-myhí pyâm akô.

<sup>6</sup> Haú hkûn, Yesuq gi, "Hparishe pé eq Saduke pé é múnchi lé, sidiq luí, koi pyâm nyi keq." ga, yhangmoq lé taí kat ri.

<sup>7</sup> Yhangmoq gi, "Nga-nhúng, muk a yu chung é yanmai, haú su ga taí é nghut ri." ga luí, taí lhum bum akô nghut ri.

<sup>8</sup> Yhangmoq haú su taí lhûm nyi kô é lé Yesuq sé jáng, yhangmoq lé, "Lumjóng myit shaú é bang ê, muk a bo é hkyô lé, haí mù taí lhûm nyi akô lhú?"

<sup>9</sup> Ahkuí jé shoq, nungmoq gi, a sê gyo shi kó lhú? Muk ngo lông eq byù ngo hkyông lé byi tsô é htông, nungmoq hkâ-myhó mung wó dum guq tsing yù kô é lé le,

<sup>10</sup> muk nyhit lông eq byu myi hkyông lé byi tsô é htông, nungmoq hkâ-myhó mung wó dum guq tsing yù kô é lé le, nungmoq a myit bun kó lhú?

<sup>11</sup> Ngò gi, muk eq séng luí taí é a nghut é lé, nungmoq, hkâsu mù a sê gyo kô é lhú? Hparishe pé eq Saduke pé é múnchi lé koi pyâm keq nghut taí é ru nghut lhê." ga taí ri.

<sup>12</sup> Haú hkûn sheq, Yhang taí é gi, muk má chung é múnchi lé koi pyâm râ matú taí é a nghut e za, Hparishe pé eq Saduke pé é

mhoqshit hkyô lé koi pyâm râ matú taí é ru nghut é lé, yhangmoq sê gyô akô nghut ri.

*Yesuq Lé, Petruq Yín Yu É Hkyô*  
*Mrk 8:27-30; Luk 9:18-21*

<sup>13</sup> Yesuq gi, Kesare-Hpilipi wà mó nâm mâ é mau má jé é hkûn, Yhông é chángzô pé lé, "Haú Byu Yhangzo gi, ó yuq nghut lhê ga, byu pé taí akô lhú?" ga myí ri.

<sup>14</sup> Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotû myiqhtoi rayuq yuq nghut ri ga, taí akô." ga tû taí kôjáng,

<sup>15</sup> Yhang gi, "Haú jáng, nungmoq gi, Ngo lé ó yuq nghut lhê nghu akô lhú?" ga, yhangmoq lé xoq myí ri.

<sup>16</sup> Haú hkûn, Simun Petruq gi, "Nàng gi, rû dui nyi é Garai Gasông é Yhangzo, Hkrisduq nghut ri." ga tû taí ri.

<sup>17</sup> Haú mù, Yesuq tû taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haú hkyô tân shit é gi, byù mai a nghut, mauhkông htoq má nyi é Ngá é Íwa mai tân shit é ru nghut lhê.

<sup>18</sup> Ngò, nang lé taí lé, nàng gi, Petruq\* nghut luí, luggok shí má, Ngò, Ngá é noqkuq hpúng lé xuq to râ nghut mù, haú moming hkúmdong pé gi, hpúng haú lé wó ûng râ a nghut.

<sup>19</sup> Mauhkông mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuí to má tuí to lé, mauhkông htoq má le, tuí to râ nghut lhê; myigùng htoq má, nàng lhoq lhut má lhoq lhut lé, mauhkông htoq má le, lhoq lhut byi râ nghut lhê." gâ ri.

<sup>20</sup> Hau htông, Yhang Hkrisduq nghut é hkyô lé, ó lé le a taí kyo râ matú, Yhông é chángzô pé lé taí hkûm kat ri.

*Yesuq Gi, Yhang Shí Râ Lé Hí Te Taí É*  
*Hkyô*

*Mrk 8:31-9:1; Luk 9:22-27*

<sup>21</sup> Yesuq gi, Yhang Yerusalem wà mó má ló mù, suwún wuí, hkyangjong agyi pé eq tarâ sará pé é loq má, zing-rí é myo myo hui zo luí, sat pyâm é hui ra râ nghut kôle, sum nyí nghut râ buinyi má, lhoq toq yu é hui

\* **16:18** Grik dông *Petruq* gâ é gi, luggok lé gâ é nghut lhê.

râ nghut é hkyô lé, haú hkûn mai, Yhâng é chángzô pé lé taí kyo hi lô bê nghut ri.

<sup>22</sup> Haú mù, Petruq gi, Yhang lé rahkyam shut shuí htoq yú mù, "Yhumsîng ê, haú hkyô Náng chyáng hkâ-nhám le a dut sháng gaq." ga Yhang lé tân ri.

<sup>23</sup> Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri." ga taí ri.

<sup>24</sup> Hau htâng, Yhang gi, Yhâng é chángzô pé lé, "Ngá htâng cháng naú sù ó yuq nghut kôle, yhumsîng gùng yhumsîng hengik pyám mù, yhumsîng é tapzîng lé waq chûng luí, cháng ra râ nghut lhê.

<sup>25</sup> Hkâsu mù gâ le, yhumsîng é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsîng é asak sùm pyám é sù kúm gi, asak wó yú râ nghut lhê.

<sup>26</sup> Byù gi, mîngkan gón lé wó sing to kôlhang, yhumsîng é asak woi-nyí sùm byuq é nghut le gi, yhang é matú, hai akyú bò râ lhú? Byù gi, yhumsîng é asak woi-nyí lé, hai eq wó htaí yù râ lhú?

<sup>27</sup> Haú Byu Yhangzo gi, Yhâng Wâ é hpungwup shingkan bo é eq, Yhâng Wâ é maumang lagyô pé eq rahá jé lé lô râ nghut lhê; haú hkûn, Yhang gi, yuq hkangmó lé, yhumsîng kut lai bê eq rajung za akyú byi râ nghut lhê.

<sup>28</sup> Ngò, nungmoq lé teng za taí kôlé, ahkuí shí má yap to bang ra-am gi, haú Byu Yhangzo, Yhâng é mîngdán eq jé lé lo é lé, a myang é za shí kó râ a nghut." ga taí ri.

## 17

### *Yesuq, Isâm Htaí Lo É Hkyô*

*Mrk 9:2-13; Luk 9:28-36*

<sup>1</sup> Hkyuq nyí lai htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chûng mù, yhangmoq baú myhang é bùm ralhum má doq lô akô.

<sup>2</sup> Haú má, yhangmoq é myoq hí tê má, Yesuq é ihpyô isâm htaí byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri.

<sup>3</sup> Haú hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dâng nyo lhùm nyi akô.

<sup>4</sup> Haú mù, Petruq gi, Yesuq lé, "Yhumsîng ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhum, Mosheq é matú ralhum, Eliyaq é matú ralhum kut, ngò zúm sùm lhùm sai bá." ga taí ri.

<sup>5</sup> Petruq dang ru taí nyi ashí le, duqbó é mhut gi, yhangmoq lé htup zîng lô mù, mhut hkaú mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

<sup>6</sup> Haú su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri.

<sup>7</sup> Nghut kôlhang, Yesuq gi, yhangmoq chyáng jé lé lô mù, yhangmoq lé loq eq záng kat luí, "Toq keq, hkâgyuq kó." ga taí ri.

<sup>8</sup> Yhangmoq tu wú kat kô le, Yesuq mai lai luí, ó lé le a myàng lo kó nghut ri.

<sup>9</sup> Bùm mai taú gyó lô kô é hkûn, Yesuq gi, "Ahkuí nungmoq myang é hkyô lé, haú Byu Yhangzo shí é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkûm tô ri.

<sup>10</sup> Haú jáng, chángzô pé gi, "Eliyaq hí lé ra râ nghut lhê ga, tarâ sará pé haí mù taí kô é lhú?" ga, Yesuq lé myí akô.

<sup>11</sup> Haú hkûn, Yesuq gi, "Eliyaq hí lé luí, lhunglhang lé hen lajâng to râ gâ é gi, têng lhê.

<sup>12</sup> Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haú eq rajung za, haú Byu Yhangzo le, yhangmoq é loq má hpuzo râ nghut lhê." ga tû taí ri.

<sup>13</sup> Haú hkûn sheq, Yhang taí nyi é gi, Wui-myhup Sará Yohan eq sêng é hkyô nghut é lé, haú chángzô pé sê gyô akô nghut ri.

### *Nat Wang Júng Sù Lé Lhoq Gê Byí É Hkyô*

*Mrk 9:14-32; Luk 9:37-45*

<sup>14</sup> Yhangmoq, byù moq mó pè chyáng dum taú jé lô kô é hkûn, byù rayuq gi, Yesuq chyáng lé jé mù, hkyihput htup luí,

15 "Yhumsing ê, ngá é yuqzo lé shogyô yù laq; yhang gi, mhûngtuq tuq luî, gyai yhang jamjaú nyi ri. Myihkyóm má le, wui má le, anum num lêng wàng wàng dut nyi ri.

16 Yhang lé, Náng é chángzô pé chyáng shuí ê kôhang, yhangmoq a wó lhoq gê byi kó nghut ri." ga taí ri.

17 Haú mù, Yesuq gi, "Lumjínq myit a bo é eq agè ashop é amyû pé ê, Ngò gi, hkâmýháng jé shoq nungmoq eq rahá nyi mù, wó jân nyi râ lúhú? Yuqgè zo haú lé, Ngá chyáng shuí lé lô keq." ga tú taí kat ri.

18 Yesuq gi, nat gang lé tân kat jáng, nat gang haú gi, yuqgè zo haú yuq chyáng mai htoq ló byuq bê nghut mù, haú hkûn jáng, yuqgè zo haú gi, ge byuq bê nghut ri.

19 Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haí mù, nat haú lé a wó hkat htoq é lúhú?" ga, lé myi kôjáng,

20 Yhang gi, "Nungmoq é lumjínq myit shaú é yanmai nghut ri. Ngò, nungmoq lé teng za taí kôlé, nungmoq é lumjínq myit angshi cham í za hkâlháng bò kô é nghut le gi, bùm shí lé, 'Hé shut htot ló aq.' ga taí le, htot râ nghut lhê. Nungmoq a wó kut é haí lháng joq râ a nghut.

21 Shí jung gi, kyûdung é eq zoshuq gám é dông za a nghut jáng, a htoq ló é nghut lhê.\*" ga dum tú taí ri.

22 Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haú Byu Yhangzo gi, byu pé é loq má ap pyâm é hui zo râ nghut lhê.

23 Haú bang gi, Yhang lé sat pyám kó râ nghut lhê; nghut kôhang, Yhang gi, shi é htâng sum nyi nghû râ nyi má lhoq dui toq é hui râ nghut lhê." ga taí ri. Haú mù, haú chángzô pé gi, gyai yhang gyô yón nyi bekô nghut ri.

### *Noqkuq Yhûm Hkansê Kat É Hkyô*

24 Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyuí bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat lúhú?" ga myí akô.

25 Petruq gi, "Kat lhê." ga tú taí ri.

\* 17:21 Chyûmbun shí gi, chyûmding myo myo má a bo é nghut lhê.

Hau htâng, Petruq yhûmhkaú má wang ló le, Yesuq hí lhom taí é gi, "Simun ê, mingkan hkohkam pé gi, kang eq hkansê pé lé, ô pé chyáng mai guq yu akô lúhú? Yhumsing byu pé chyáng mai lúhú? Haú a nghut jáng, góbâng chyáng mai lúhú? Nàng, hkâsu wó myit lhê lúhú?" gâ ri.

26 Haú mù, Petruq gi, "Góbâng chyáng mai nghut ri." ga tú taí jáng, Yesuq gi, "Haú su nghut le gi, yhumsing byu pé gi, lut akô nghut ri.

27 Nghut kôhang, yhangmoq é i-myit a ngón a dut kó sháng gaq, nhông má é mù, ngo-nhe ê hkyó aq. Sâng-hi wó nhê yu é ngozô é nhut lé lêng há kat jáng, ngùn htingchap rachap lé myàng râ nghut lhê. Haú lé yù mù, Ngá é matú eq náng é matú, yhangmoq lé ló byi aq." ga taí ri.

## 18

### *Kô Dik Sû Gi, Ó Yuq Nghut Lhê Lúhú?*

*Mrk 9:33-37, 42-48; Luk 9:46-48; 17:1-2*

1 Haú hkûn, haú chángzô pé gi, Yesuq chyáng lé jé kômù, "Mauhkûng mingdán má, kô dik sû gi, ó yuq nghut lhê lúhú?" ga myí akô.

2 Yesuq gi, zoshâng zo rayuq lé wut yù mù, yhangmoq é gung gûng má shap to luî,

3 taí é gi, "Ngò, nungmoq lé teng za taí kôlé, nungmoq gi, myit htaí lhik luî, zoshâng zo wui su dut kô é za a nghut jáng, mauhkûng mingdán má hkâ-nhám le wó wâng kó râ a nghut.

4 Haú mù, zoshâng zo shí yuq su, yhum-sing é i-myit wó lhoq nyhum é sù ó yuq nghut kôle, mauhkûng mingdán má, kô dik sû nghut ri.

5 Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê.

6 Nghut kôhang, Ngo lé lumjínq é zoshâng wui mâ é rayuq yuq lé, mara kut shut nhang é sù gi, yhâng é lingzing má luqluí long mó tuí hut byi luî, nik é wuimau má, dú hkyô pyâm é hui é nghut le gi, yhâng é matú je gè râ nghut lhê.

7 Haú mingkan gi, byu pé lé mara kut shut nhâng jang joq é yanmai, dingnyé wó

ri. Haû mara kut shut nhâng hkyô gi, htoq lugù bê; nghut kôlhang, haú lé lhoq htoq sù gi, dingnyé wó ri.

<sup>8</sup> Náng é loq èq, a nghut jáng, náng é hkyi èq, nang lé mara kut shut nhang é nghut le gi, haú lé hpyit dú pyám aq. Ahtum abyuq é myi má, hkyi hkúm loq hkúm gû dú hkyô pyâm é hui rá htoq má, hkyi loq a hkúm é za, asak wó yu é nghut le gi, náng é matú je ge ri.

<sup>9</sup> Náng é myoqjí èq, nang lé mara kut shut nhang é nghut le gi, haú lé lap choq yû mù, dú pyám aq; myoqjí í jí dap gû ngaraî myi má dú hkyô pyâm é hui rá htoq má, myoq rají eq za, asak wó yu é nghut le gi, náng é matú je ge ri.

*Byuq Byuq É Sau  
Luk 15:3-7*

<sup>10</sup> Shî sù é zoshâng zo wuî mâ é rayuq lé lháng a wú tiq rá matú, sidiq nyi keq. Hkâsu mù gà le, Ngò, nungmoq lé taí kôlé, mauhkûng mâ é yhangmoq é maumang lagyô pé gi, mauhkûng htoq mâ é Ngá Wâ é myoqdong lé, hkâ-nhâm le myang nyi akô.

<sup>11</sup> (Hkâsu mù gà le, haû Byu Yhangzo gi, byuq byuq bê bang lé hkyi yû rá matú, jé lé é nghut lhê.)\*

<sup>12</sup> Byù rayuq gi, sau rashô du wó é nghû sháng, sau haú gû mâ é radu byuq byuq é nghut jáng, haú gaú xe gaú du lé, bùm pé má nyhi pyâm to luí, byuq byuq é sau lé a châng ho é nyi rá lhú? Haú lé, nungmoq hkâsu wó myit ngam akô lhú?

<sup>13</sup> Ngò, nungmoq lé teng za taí kôlé, yhang gi, haû byuq byuq é sau haú lé myang ho é hkûn, a lám byuq é sau gaú xe gaú dû é matú gabú é htoq má, haú dû matú je riyhang gabú ri.

<sup>14</sup> Haû eq rajung za, mauhkûng htoq mâ é nungmoq é Îwa gi, shî tiq bang mâ é rayuq htên byoq byuq rá lé lháng, ô nau é a nghut.

*Mara Kut Shut É Gumang Hpó Lé Hkâsu Kut Râ Hkyô*

<sup>15</sup> Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkûn, yhâng é mara lé tân shit aq. Yhang, náng é dang

lé gyô é nghut jáng, náng gi, gumang rayuq dum wó bê nghut ri.

<sup>16</sup> Nghut kôlhang, yhang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lòm jáng, wó lhoq teng sháng gaq.'\* gà tô é eq rajung za, náng, gotû byù ra-í yuq lé shuí chûng aq.

<sup>17</sup> Yhang gi, haú bâng é dang lé le a lhom yu é nghut jáng, haú hkyô lé, noqkuq hpúng má shit kyo aq; hpúng é dang lé le a gyô é nghut jáng, yhang lé, a lumjínng é byù rayuq dông le, kang guq sù rayuq dông le sôn pyám aq.

<sup>18</sup> Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkûng htoq má le, tuí to rá nghut lhê; myigùng htoq má, nungmoq lhoq lhut má lhoq lhut lé, mauhkûng htoq má le, lhoq lhut byi rá nghut lhê.

<sup>19</sup> Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haí lé dung kôlhang, mauhkûng htoq mâ é Ngá Wa gi, haú nhik lé gyo byi rá nghut lhê.

<sup>20</sup> Hkâsu mù gà le, Ngá myîng lé lang luí, í yuq sum yuq zup zîng é jang hkâmá nghut kôlhang, haú bâng é gyoro má Ngò nyi lhê." gà ri.

*Shogyo Nhikmyin A Sê É Jùn Hpô É Dangtú*

<sup>21</sup> Haú hkûn, Petruq gi, Yesuq chyáng huí ê mù, "Yhumsîng ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra rá lhú? Nyhit dâm jé shoq hkyut byi ra rá lhí?" ga myi ri.

<sup>22</sup> Haú jáng, Yesuq tû taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi rá lhê.

<sup>23</sup> Mauhkûng mingdán gi, yhumsîng é dui-nhâng zoshâng wui é jihpán lé jep nau é hkohkâm rayuq eq du ri.

<sup>24</sup> Yhang gi, jihpán lé jep hi lô é u lé, yhâng chyáng ngùn wan myo myo chyín dap to sù lé shuí lé lo akô.

<sup>25</sup> Haú yhumsîng hpó gi, haú yuq chyín a wó xap é yanmai, chyín wó yú rá matú,

\* 18:11 Bun zo shî gi, chyúmding myo myo má a bo é nghut lhê. ✧ 18:16 Tarâ Pun 19:15



yang lé le, yangmyi lé le, yangzo banshoq eq yang wó é zèhkoq banshoq lé le, ùng pyám rà hkunmó hkyô kat ri.

<sup>26</sup> Haû mù, dui-nhâng zoshâng haû yuq gi, yhâng é hí má hkyihput htuq luí, 'Ngo lé myit hîng byi shi laq; banshoq lé, ngò xap rà.' ga dũng tôngbán ri.

<sup>27</sup> Haû dui-nhâng zôshâng é yhumsîng hpó gi, haû yuq lé wú shogyo luí, chyîn banshoq lhut pyám byi mù, nhang kat ri.

<sup>28</sup> Nghut kôhang, dui-nhâng zoshâng haû gi, htoq ló mù, yang lé, denari<sup>†</sup> rashô chyîn dap tô é dui-nhâng zoshâng luzúm rayuq lé myàng jáng, haû yuq é lingzing má gyaq myhik zing to mù, 'Ngo lé dap tô é chyîn hân xap aq!' ga taí ri.

<sup>29</sup> Haû hkûn, yhâng é luzúm dui-nhâng zoshâng haû gi, yhâng é hí má hkyihput htuq luí, 'Ngo lé myit hîng byi shi laq; ngò xap rà.' ga dũng tôngbán ri.

<sup>30</sup> Nghut kôhang, yang gi, a gyo byí e za, yhâng é chyîn dum wó xap é hkûn jé shoq, haû yuq lé htóng hkyô pyám nhâng ri.

<sup>31</sup> Gotû dui-nhâng zoshâng wuì gi, haû hkyô lé myàng kôjáng, i-myit wú nô kôluí, yangmoq é yhumsîng hpó lé, haû hkyô banshoq ló taí kyô akô.

<sup>32</sup> Haû mù, haû yhumsîng hpó gi, dui-nhâng zoshâng haû lé wut hâng yù mù, 'Agè ashop é dui-nhâng zoshâng ê, nàng, ngo lé dũng tôngbán é yanmai, nàng, ngo lé dap é chyîn banshoq lé, ngò lhut pyám byi bê nghut lê mhaí.

<sup>33</sup> Haû su é nhîng, ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lê a nghut lú?" ga taí luí,

<sup>34</sup> yang gi, nhikjum yo mù, yhâng é chyîn ban xap é hkûn jé shoq, jamjau hui zo rà matú, yang lé, htóng suwún pê chyáng ap byí pyám bê nghut ri.

<sup>35</sup> Nungmoq é gumang wuì lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng mâ é Ngá Wa le, nungmoq lé haû đông kut rà nghut lê." ga ri.

## 19

### Myi Làng Gâng É Hkyô Mrk 10:1-12

<sup>1</sup> Yesuq gi, mhoqshit é dang haû pé lé ban taí jáng, Galile mau mai htoq ló mù, Yodan làng tũ tap mâ é Yuda mau má ê jé ri.

<sup>2</sup> Byù moq mó gi, Yhâng htâng cháng kô é nghut mù, Yang gi, haû bang mâ é nôhpyo hui bang lé, haû má lhoq gê byí ri.

<sup>3</sup> Haû hkûn, Hparishe pé ra-am gi, Yhâng chyáng lé jé kômù, Yang lé chyam wú é đông, "Byù rayuq gi, hai hkyô mai nghut nghut, yhumsîng é yangmyi lé lhoq kâng pyâm le, tarâ wang lê lú?" ga myí akô.

<sup>4</sup> Haû jáng, Yang tũ taí é gi, "A-nham sâng-hi lé, Hpân Sû, 'byu hpan é hkûn, yuqgè eq myiwe lé hpan é nghut lê.'<sup>✧</sup>

<sup>5</sup> 'Hau é yanmai, yuqgè gi, yhumsîng é înu îwâ chyáng mai htoq luí, yangmyi eq rahá rading ralhum za kut nyí mù, yangnhik gi, gungsho ralhum za dut byuq kó rà nghut lê.'<sup>✧</sup> ga kâ tô é lé, nungmoq a nghap wú kó lú?"

<sup>6</sup> Haû mù luí, yangnhik gi, í yuq a nghut lô e za, rayuq za dut bê nghut ri. Haû mù luí, Garai Gasang lhoq tsâm tô é lé, byù gi, a lhoq kang sháng gaq." gâ ri.

<sup>7</sup> Haû hkûn, yangmoq gi, "Haû lé nhîng, yuqgè rayuq gi, lhoq kang laiká za ká byi mù, yangmyi lé wó nhang pyâm lê ga, hai mù, Mosheq, hkunmó hkyô tô lê lú?" ga, Yang lé dum taú myí akô.

<sup>8</sup> Haû mù, Yesuq gi, "A-nham sâng-hi mai gi, haû đông a nghut. Nghut kôhang, nungmoq é myit nhikhum htân kô é yanmai, nungmoq é yangmyi pé lé lhoq kang rà ahkáng, Mosheq byí tô é ru nghut lê.

<sup>9</sup> Ngò, nungmoq lé taí kôlé, sulàng lú é za a nghut jáng, yhumsîng é yangmyi lé kâng pyám mù, myiwe gotû dum hâng yu é sũ ó yuq nghut kôle, su-myi lú é sũ dut bê." ga, yangmoq lé dum tũ taí ri.

<sup>10</sup> Haû hkûn, haû chángzô pé gi, "Myi làng hkyô má haû đông ru nghut le gi, a yu le lhang je ge nyo ri." ga taí akô.

<sup>11</sup> Haû mù, Yesuq gi, "Yuq hkgámó gi, dang haû lé wó hap yu é a nghut, wó hkâm

<sup>†</sup> 18:28 Denari rachap gi, ra-nyí lê é byù rayuq é zuihpau eq wuì ri. <sup>✧</sup> 19:4 Apûn 1:27 <sup>✧</sup> 19:5 Apûn 2:24

râ jeju wó é bang za sheq, wó hap yu é nghut lhê.

<sup>12</sup> Byù ra-am gi, înu unghkaû mai yhang, yuqgè a jé gû hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jáng, mauhkûng mingdán é matú, yuqgè a jé râ dông kut yu pyâm akô nghut ri. Shí hkyô lé wó hap yù sù gi, hap yù sháng gaq." ga dum taí ri.

*Zoshâng Wuì Eq Yesuq*

*Mrk 10:13-16; Luk 18:15-17*

<sup>13</sup> Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haû chángzô pé kúm gi, haû shuí lé lô bang lé lhom tân hkûm akô nghut ri.

<sup>14</sup> Nghut kôhang, Yesuq gi, "Haû zoshâng wui lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, mauhkûng mingdán gi, haû sù é bâng é mingdán ru nghut lhê." ga taí kat ri.

<sup>15</sup> Yhang gi, zoshâng wui htoq má loq ke shimân byi mù, haû jowò mai htoq lô bê nghut ri.

*Sùt Wó É Zorâm Rayuq É Hkyô*

*Mrk 10:17-31; Luk 18:18-30*

<sup>16</sup> Byù rayuq gi, Yesuq chyáng lé jé mù, "Sarà è, ahtum abyuq é asak wó yù râ matú, ge é muzó haí kut ra râ lhú?" ga myí ri.

<sup>17</sup> Haû jáng, Yesuq gi, "Ge é hkyô eq séng luí, haí mù Ngo lé myí lhê lhú? Ge é Sù gi, rayuq za nyi lhê. Nàng, asak dui é má wàng nau é nghut le gi, jep é tarâ pé lé cháng aq." ga tũ taí ri.

<sup>18</sup> Haû yuq gi, "Hká gû lé lhú?" ga dum myi jáng, Yesuq gi, "'Byù hkâsat, su-myi hkâlú, hkâhkau, a teng a mán é saksé hkâhkám,

<sup>19</sup> nángnu nánwa lé hkungga aq, ✧ ga le, 'náng gûng lé náng chyitdap e su, náng é chyangnâm mâ é bang lé le chyitdap aq. ✧ ga le bo tô ri." ga taí kat ri.

<sup>20</sup> Haû hkûn, zorâm hpó haû gi, "Haû pé banshoq lé, ngò cháng bê nghut lhê; haí kut râ ashí lhú?" ga dum taú myí ri.

<sup>21</sup> Yesuq gi, "Nàng, gumjup sù dut nau le gi, lô mù, náng wó é sutzè pé lé ûng pyám luí, myùng bang lé byí pyám aq; haû jáng, nàng,

mauhkûng htoq má sutzè wó râ nghut lhê; haû mù, Ngá htâng lé cháng aq." ga tũ taí ri.

<sup>22</sup> Zorâm hpó haû gi, sutzè gyai wó sù nghut é yanmai, dang haû lé wó gyo jáng, gyai yhang myit a ngón é èq ló byuq bê nghut ri.

<sup>23</sup> Hau htâng, Yesuq gi, Yhâng é chángzô pé lé, "Ngò, nungmoq lé teng za taí kôlé, sutzè wó bang gi, mauhkûng mingdán wó wâng râ gyai yhang wui ri.

<sup>24</sup> Hau htoq agó, Ngò, nungmoq lé taí kôlé, sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga taí ri.

<sup>25</sup> Haû chángzô pé gi, haû su gâ é lé wó gyo kôjáng, haû ru nghut le gi, ó yuq za hkyi yu é hui râ nghut lhê lhú?" ga Yhang lé myí akô nghut ri.

<sup>26</sup> Haû hkûn, Yesuq gi, yhangmoq lé wú kat mù, "Haû hkyô lé byù mai gi, wó kut râ a nghut; nghut kôhang, Garai Gasang gi, lhunglhang lé wó kut é Sù nghut lhê." ga taí ri.

<sup>27</sup> Haû hkûn, Petruq gi, Yhang lé, "Ng-amoq gi, wó é gû lhunglhang lé tô pyâm to luí, Náng htâng cháng bê nghut lhê. Ng-amoq, haí wá wó râ nghut lhê lhú?" ga myí kat ri.

<sup>28</sup> Haû mù, Yesuq tũ taí é gi, "Ngò, nungmoq lé teng za taí kôlé, lhunglhang lé asik dum saí dut nhang é má, haû Byu Yhangzo gi, Yhâng é hpungwup bo é hkohkâm-tanghkuq má zùng tô é hkûn, Ngá htâng châng é bang nungmoq le, hkohkâm-tanghkuq raxe í lhúm htoq má zùng to kômù, Israelaq amyû raxe í hú lé jéyáng kó râ nghut lhê.

<sup>29</sup> Ngá é yanmai, yhumsing é yhûm, nhiktâng wui, înu îwa, zo dù wui eq yò pé rajung jung lé tô pyâm tô é sù ó yuq nghut kôlé, rashô tú akyû myo jat shoq wó râ nghut é htoq agó, ahtum abyuq é asak le, wó yù râ nghut lhê.

<sup>30</sup> Nghut kôhang, hí nghut nyi é bang myo myo gi, htâng gyó byuq kó râ nghut mù, htâng gyó nyí bang yuq gi, hí bekô râ nghut lhê.

## 20

### *Tsibiyiq Hkyâm Mû Zui Bang Lé Dangtú Yu É Hkyô*

<sup>1</sup> Hkâsu mù gâ le, mauhkûng mingdân gi, yhumsing é tsibiyiq hkyâm má mû zui nhâng râ langchyáng ê lûng râ ga, napsûn noq le htoq e ló é hkyâm yhumsing eq du ri.

<sup>2</sup> Yhang gi, ra-nyí é matú denari rachap byi râ dông, haú bang eq myit huí yù mù, yhangmoq lé, yhâng é tsibiyiq hkyâm má nhang hâng kat ri.

<sup>3</sup> Napkyó gau hkyíng\* kô má, yhang gi, htoq e ló le, hai mû le a kut é za, gai má yap tô é bang ra-am lé ê myang ri.

<sup>4</sup> Haú mù, yhang gi, haú bang lé, 'Nungmoq le, ngá é hkyâm má mû ê zui keq; byi âng é ahpau, ngò, nungmoq lé byi râ nghut lhê.' ga taí jáng, yhangmoq gi, e ló bekô nghut ri.

<sup>5</sup> Hau htâng, yhang gi, raxe í hkyíng má le, myinhâng sum hkyíng kô má le, dum htoq é mù, haú eq rajung za langchyâng pé é lung kat ri.

<sup>6</sup> Myinhâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haú bang lé, 'Nungmoq gi, haí le a kut é za, ra-nyí buí haí mù shí má yap tô bum akô lhú?' ga myi jáng,

<sup>7</sup> haú bang gi, 'Ngamoq lé, ó yuq èq le a lûng kô é yanmai nghut lhê.' ga tû taí akô.

Haú hkûn, yhang gi, 'Nungmoq le, ngá é hkyâm má mû ê zui keq.' ga taí ri.

<sup>8</sup> Myinhâng jé jáng, tsibiyiq hkyâm yhumsing gi, yhâng é mù shuí u sù lé, 'Haú langchyâng pé lé ji yù mù, je htâng má lung yu é bang mai hí luí, sâng-hi lung yu é bang jé shoq, mû zui hpau byi aq.' ga taí ri.

<sup>9</sup> Myinhâng ngo hkyíng má mû wàng bang le, denari rachap chap wó yu bum akô.

<sup>10</sup> Haú mù, je hí má mû wàng bang gi, yhangmoq je myo wó nhô ngam akô. Nghut kôhang, yhangmoq le, rayuq denari rachap chap za wó akô nghut ri.

<sup>11</sup> Yhangmoq gi, haú myhó za wó yu bùm kô é yanmai, haú hkyâm yhumsing lé,

<sup>12</sup> 'Shí bang gi, je htâng má mû lé wâng mù, nayí rahkum za mû zui kôhang, nang gi, ra-nyí buigyùm chap buí htân yò má mû zui é bang ngamoq eq rajung za byí ri.' ga mara hún dang taí akô.

<sup>13</sup> Nghut kôhang, haú hkyâm yhumsing gi, haú bang má é rayuq lé, 'Buinùm hpó ê, ngò, nang lé a tarâ é dông kut é a nghut. Denari rachap byi râ nghú, nang eq ngò myit huí to bê a nghut lhú?

<sup>14</sup> Nang wó âng é lé yu chûng mù, ló aq. Je htâng má mû lé wang é sù lé le, nang lé byí é myhó, ngò byí nau ri.

<sup>15</sup> Ngá é ngùn lé, ngò kut nau é su a ge kut lhú? Ngò, ge é kut le, nang manôn ri lhú?' ga taí ri.

<sup>16</sup> Haú mù luí, htâng gyó nyí bang gi, hí bekô râ nghut mù, hí nghut nyí bang gi, htâng gyó byuq kó râ nghut lhê." gâ ri.

### *Yesuq Gi, Yhang Shí Râ Hkyô Lé Dum Taí Ri*

*Mrk 10:32-34; Luk 18:31-34*

<sup>17</sup> Ahkuí, Yesuq gi, Yerusalem wà mó shut doq ló nyi é u lé, haú chángzo raxe í yuq lé, gotû kut wut yù mù,

<sup>18</sup> "Nga-nhúng gi, Yerusalem wà mó shut doq ló nyi lhê; haú Byu Yhangzo gi, hkyangjong agyi pé eq tarâ sará pé é loq má ap byí pyâm é hui râ nghut lhê; haú bang gi, Yhang lé, shí râ mara byi kó râ nghut é htoq agó,

<sup>19</sup> jóng pyâm é, nhuq bat é eq tapzîng má jén sat pyâm é hui râ matú, haú tungbau pé é loq má ap pyám kó râ nghut lhê. Nghut kôhang, Yhang gi, sum nyí nghú râ buinyi má, lhoq dui toq é dum hui râ nghut lhê." ga taí ri.

### *Zô Nhik Matú Ênu Êq Dung Byí É Hkyô*

*Mrk 10:35-45*

<sup>20</sup> Hau htâng má, Zebedi é yhangzô nhik-tang é yhângnu gi, yhangzô nhik eq rahá jé lé lô kômù, rajung dung rá matú, Yesuq é hí má hkyihput htuoq nyi ri.

<sup>21</sup> Haú mù, Yesuq gi, "Nang, haí ô nau ri lhú?" ga yhang lé myi jáng, yhang gi, "Náng é mingdân má, shí ngá zô nhiktâng lé, Náng é loqyò hkyam má rayuq, loqpaí hkyam

\* **20:3** Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hi lhê.

má rayuq kut, zùng râ ahkáng byi laq." ga taí ri.

<sup>22</sup> Haú hkûn, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm† lé, nungnhik wó shuq kó râ lhú?" ga myi jáng, yhangnhik tâng gi, "Wó shuq lhê." ga tú taí akô nghut ri.

<sup>23</sup> Haú mù, Yesuq gi, yhangnhik lé, "Ngò shuq râ góm lé, nungnhik shuq ra kó râ za nghut lhê. Nghut kôlhang, Ngá é loqyô, loqpaí hkyam má zùng râ ahkáng lé gi, Ngò byi jung a nghut. Jowò haú pé gi, Ngá Wa hen to byi bâng é matú za ru nghut lhê." ga taí ri.

<sup>24</sup> Gotú chángzo raxê yuq gi, haú hkyô lé wó gyo kôjáng, haú nhiktâng lé nhik-yô akô nghut ri.

<sup>25</sup> Haú mù, Yesuq gi, yhangmoq banshoq bang lé wut tsing yù luí, "Tùngbaù pé lé uphkan é ga bang gi, tùngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê.

<sup>26</sup> Nungmoq chyáng gi, haú su a dut kó sháng gaq; haú Byu Yhangzo lháng gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shíhtaí gunglik hkungga dông, Yhâng é asak lé byi pyám râ matú sheq, jé lé é ru nghut é su,

<sup>27</sup> nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê.

<sup>28</sup> Hau htoq agó, nungmoq má ushuq dut naù sù ó yuq nghut kôle, nungmoq é jùn dut ra râ nghut lhê." ga taí ri.

*Myoqjit Í Yuq Myoq Dum Myang É Hkyô*  
*Mrk 10:46-52; Luk 18:35-43*

<sup>29</sup> Yesuq eq Yhâng é chángzô pé gi, Yerihko myuq mai htoq ló nyi kô é hkûn, byù moq mó gi, yhangmoq é htâng má châng e ló bum akô.

<sup>30</sup> Haú hkyô yàm má zung tô é myoqjit í yuq gi, Yesuq laí ló nyi é hkyô lé wó gyo kôjáng, "Dawiq é Yhangzo, Yhumsing ê, ngá-nhik lé shogyô yù laq ô!" ga, wut garú kat akô nghut ri.

<sup>31</sup> Byù moq mó gi, yhangnhik zím byuq râ matú tân hkúm kôlhang, yhangnhik gi, "Dawiq é Yhangzo, Yhumsing ê, ngá-nhik lé shogyô yù laq ô!" ga, je riyhang htê mó eq wut garú kat akô nghut ri.

<sup>32</sup> Haú mù, Yesuq gi, yap kat mù, "Ngò, nungnhik lé haí kut byi râ ô nau akô lhú?" ga, yhangnhik lé wut myí kat ri.

<sup>33</sup> Haú hkûn, yhangnhik gi, "Yhumsing ê, ngá-nhik myoq myàng nau ri." ga tú taí akô.

<sup>34</sup> Yesuq gi, yhangnhik lé wú shogyo luí, yhangnhik é myoqjí má é záng byi ri. Haú hkûn jáng, yhangnhik gi, myoq wó myàng kômù, Yhâng htâng cháng bekô nghut ri.

## 21

*Yesuq, Yerusalem Wà Mó Má Wang E Ló*  
*É Hkyô*

*Mrk 11:1-11; Luk 19:28-38; Yhn 12:12-19*

<sup>1</sup> Yesuq eq Yhâng é chángzô pé gi, Yerusalem wà mó eq chyáng lo nyi kô é hkûn, Tsanlun Bùm má é Bethpage wà má jé ló kôjáng, Yesuq gi, chángzo í yuq lé,

<sup>2</sup> "Nungnhik, hí mâ é wà má é keq; wà haú má, logúng zing radu lé, logúng zo eq rahá tuí to lán é lé, ê myàng kó râ nghut lhê; haú lé hpyi yù mù, Ngá chyáng she lò keq.

<sup>3</sup> Byù rayuq yuq, nungnhik lé rajung jung gâ lò jáng, 'Shí í du lé, haú Yhumsing chùng râ ri.' gâ nghú tú taí keq; haú jáng, yhang, radá dâm nhâng byi râ nghut lhê." ga Yesuq taí luí, nhang kat ri.

<sup>4</sup> Haú gi, myiqhtoi dang lhoq dik râ matú dut lo é nghut ri.

<sup>5</sup> Myiqhtoi dang haú gi, "Zi-un byizo\* lé, shí su nghú keq; 'Wú aq, náng é hkohkâm gi,

nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.'"☆

gâ ri.

<sup>6</sup> Haú chángzô nhik gi, e ló mù, Yesuq taí kat é eq rajung za ê kut bekô nghut ri.

<sup>7</sup> Yhangnhik gi, logúng me lé she lò mù, yhangnhik é buhîng pé lé, haú logúng mê é htoq má ke byi kôjáng, Yesuq gi, doq jí ri.

† 20:22 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê. \* 21:5 Zi-un byizo gâ é lichyúm gi, Yerusalem byu pé gâ é nghut lhê. ☆ 21:5 Zhk 9:9

<sup>8</sup> Byù moq mó mâ é myo myo gi, yhang-moq é buhîng lé, hkyô má hkyut hkang byî akô; ra-am gi, mhandíng pé lé zân hkyô yù mù, hkyô má hkang byî akô nghut ri.

<sup>9</sup> Yhâng é hí má htâng má châng sô nyi bum é bang gi,

"Dawiq é Yhangzo gi, hosana<sup>†</sup> nghut nyî sháng gaq ô!"

"Haû Yhumsing é myîng mai jé lé lô Sû gi, hkungsô wó nyî sháng gaq ô!"<sup>☆</sup>

"Htoq tsáng myhâng má, hosana nghut nyî sháng gaq ô!"

ga luî, taî garû bum akô nghut ri.

<sup>10</sup> Yesuq, Yerusalem wà mó má wang ló é hkûn, rawà gón é bang gi, gabyông lo bùm kômù, "Shí yuq gi, ó wá nghut lhê lhà?" ga luî, myi lhûm bum akô.

<sup>11</sup> Haû hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga taî akô nghut ri.

*Yesuq, Noqkuq Yhûm Lé Lhoq Sansêng Pyâm É Hkyô*

*Mrk 11:15-19; Luk 19:45-48; Yhn 2:13-22*

<sup>12</sup> Yesuq gi, noqkuq yhûm má wang ê mù, haû mâ é zè ung zè wuî kut nyi é bang banshoq lé, hkat htoq pyám luî, ngùn htaî zo bâng é siboi pé eq hpûngkyui ung zo bâng é tanghkuq pé lé, tu mhuy pyám byî ri.

<sup>13</sup> Haû hkûn, Yhang gi, "'Ngá yhûm gi, kyûdung yhûm ga râ nghut lhê.'<sup>☆</sup> ga kê to kôlhang, nungmoq gi, jowò shî lé 'damaq hkyûng'<sup>☆</sup> kut nyi akô." ga, yhangmoq lé taî ri.

<sup>14</sup> Yesuq, noqkuq yhûm má nyi tô é hkûn, myoqjit bang eq hkyî hten bang Yhâng chyáng lé lô kômù, Yhang gi, haû bang lé lhom lhoq gê byî ri.

<sup>15</sup> Nghut kôlhang, hkyangjong agyi pé eq tarâ sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhûm má zoshâng wuî garû nyi bùm kê é lé le, myàng kôjáng, wú nhik-yô bum akô nghut ri.

<sup>16</sup> Haû mù, yhangmoq gi, "Zoshâng shí bang haî taî nyi kê é lé, Nang wó gyô lhê lhú?" ga, Yesuq lé myi kôjáng, Yhang gi, "Wó gyô ri. Nungmoq gi,

'Zoshâng wuî eq nyheqnú pê é nhut mai hkyá-on kungtôn râ matú, nang lajâng to bê nghut ri.'<sup>☆</sup>

ga kê tô é lé, Chyúmdang má a nghap wú kó lhú?" ga yhangmoq lé taî ri.

<sup>17</sup> Hau htâng má, Yhang gi, haû bang lé nyhi to luî, wà hkaû mai htoq ló mù, Behtani wà má ê jé luî, haû myîn, haû má bíng yu ri.

*Maihpáng Gâm Nyhuî Kyuq Shi Byuq É Hkyô*

*Mrk 11:12-14, 20-24*

<sup>18</sup> Yhang gi, htang napkyó noq le, Yerusalem wà mó shut dum taû ló é hkûn, hkyô má zòmut hui bê nghut ri.

<sup>19</sup> Haû mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luî, haî lé le a myàng nghut ri. Haû mù, Yhang gi, shigâm haû lé, "Nang má, hkâ-nhám le ashi a zui sháng gaq." ga taî kat ri. Haû hkûn jáng, agàm haû gi, nyhuî kyuq shi ló byuq bê nghut ri.

<sup>20</sup> Haû chángzô pé gi, haû lé myàng kôjáng, maú byuq kômù, "Maihpáng gâm shí gi, haî mù haû-í hân nyhuî kyuq shi ló lhê lhà?" ga myî akô.

<sup>21</sup> Yesuq gi, "Ngò, nungmoq lé teng za taí kôlé, nungmoq, úng-âng é myit a bo é za, lumjîng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agó, bùm shî lé, 'Htot mù, wuimau má ló gyó wâng aq.' ga taî jáng, taî é eq rajung za dut râ nghut lhê.

<sup>22</sup> Nungmoq, lumjîng myit eq dung kê é nghut jáng, haî dung le le wó yù kó râ nghut lhê." ga tû taî ri.

*Yesuq É Ahkáng Ayá Lé Myî Chyam É Hkyô*

*Mrk 11:27-33; Luk 20:1-8*

<sup>23</sup> Yesuq gi, noqkuq yhûm wàng hkaû má wang ê mù, mhoqshit nyi é hkûn, hkyangjong agyi pé eq mingbyu é suwún wuî gi, Yhâng chyáng lé jé kômù, "Hai ahko ahkâng eq, Nang, shí pé lé kut nyi lhê lhú? Ahko ahkáng shî, Nang lé ó yuq byî é lhú?" ga myî akô.

<sup>†</sup> 21:9 Hebre dang má, *hosana* gâ é gi, "ahkuî hkyi yù laq" gâ é nghut lhê. Nghut kôlhang, bun zo 9 má gi, hkyá-on dang dông chung é nghut lhê. <sup>☆</sup> 21:9 Hkyá-on 118:26 <sup>☆</sup> 21:13 Esai 56:7 <sup>☆</sup> 21:13 Yer 7:11 <sup>☆</sup> 21:16 Hkyá-on 8:2

24 Haú hkûn, Yesuq gi, "Ngò le, nungmoq lé rajung myî wú kôlé, nungmoq wó tû taí kô é nghut jáng, hai ahko ahkâng èq, Ngò, shí pé kut é hkyô lé taí kyo rá nghut lhê.

25 Yohan byî é baptisma gi, ó yuq é ahko ahkáng mai nghut lhê lhú? Mauhkûng mai lhú? A nghut jáng, byu chyáng mai lhú?" ga taú myî kat ri.

Haú hkûn, yhangmoq, chôm hpyê lhum kô é gi, "'Mauhkûng mai nghut lhê.' nghû, nga-nhúng taí jáng le, 'Haú nghut le nhîng, haí mù, yhang lé a lumjîng kô é lhú?' ga rá nghut;

26 'Byu chyáng mai nghut lhê.' nghû jáng le, yhangmoq lhunglhâng bang gi, Yohan lé, myiqhtoi rayuq ga lumjîng bûm kô é nghut lhê yanmai, haú bang lé, nga-nhúng gyuq rá lhê nghut." gâ akô.

27 Haú mù, yhangmoq gi, Yesuq lé, "Ng-amoq a sé." ga tû taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

### *Yuqzô Nhiktâng Lé Dangtú Yu É Hkyô*

28 Yesuq xoq taí é gi, "Nungmoq hkâsu wó myit akô lhú? Byù rayuq gi, yuqzo í yuq wó ri. Yhang gi, ko sù yuq chyáng ê mù, 'Ngá zo ê, nàng, hkû-nyî tsibiyiq hkyâm má mù é zui aq.' ga taí jáng,

29 yuqzo haú gi, 'Ngò a kâm ê.' ga tû taí ri; nghut kôlhâng, htâng má, yhang gi, myit dum lhîng mù, ê bê nghut ri.

30 Hau htâng, yhângwa gi, yhang zo tiq sù yuq chyáng ê mù, rajung za ga ê dum taí jáng, yuqzo haú gi, 'Ê rá, âwa!' ga yín yû kôlhâng, a ê kut ri.

31 Haú nhiktâng mâ é hká yuq sheq, yhângwa ô nau é hkyô lé kut sù nghut ri lhú?" gâ ri.

Haú hkûn, yhangmoq gi, "Ko sù nghut ri." ga tû taí akô.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhî pé gi, Garai Gasâng é mingdán má, nungmoq a wàng shimá, wang ló nyi bûm kó rá nghut lhê.

32 Hkâsu mù gâ le, Yohan gi, nungmoq chyáng lé jé mù, dingmán hkyô lé tûn shit

kôlhâng, nungmoq gi, yhang lé a jîng kut akô nghut ri; nghut kôlhâng, haú kang guq bang eq shiwa myhî pé gi, yhâng dang lé jîng akô nghut ri. Nungmoq gi, haú hkyô lé myang é nghut kôlhâng, myit a lhîng kô é htoq agó, yhang lé a lumjîng shi kó nghut ri.

### *Tsibiyiq Hkyâm Sai Bang Lé Dangtú Yu É Hkyô*

*Mrk 12:1-12; Luk 20:9-19*

33 Gotû dangtú lé gyô wú shi keq; hkyâm yhumsîng rayuq gi, tsibiyiq hkyâm ralhum saí to mù, lhîng hkyuq kyâm to luí, tsibiyiq wing pyik htoq rá donghkong dù to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byî to mù, gó ming shut e ló byuq bê nghut ri.

34 Kyôshu yoq jé jáng, yhang gi, yhang eq sêng é tsibiyiq shi ê yû rá matú, yhâng é dui-nhâng zoshâng wuì lé, haú hkyâm saí zo bâng chyáng nhang kat ri.

35 Haú hkyâm saí zo bang gi, dui-nhâng zoshâng wuì lé, lhom chyup yû kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqgok èq lhom dù sat pyám, kut akô nghut ri.

36 Hau htâng má, yhang gi, hí dam lhê htoq je myo shoq gotû dui-nhâng zoshâng wuì lé dum nhang kat le le, haú hkyâm saí zo bang gi, hí lhê bang lé su lhom dum kut akô nghut ri.

37 Ló htâng má, yhang gi, 'Ngá zo lé gi, yhangmoq lhom hkungga kó rá nghut lhê.' ga, yhang zo lé, haú bâng chyáng nhang kat ri.

38 Nghut kôlhâng, haú hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yù rá sù nghut lhê; lé keq, yhang lé sat pyám mù, yhâng é silí wunlí lé yu pyám byi sháng.' ga, rayuq eq rayuq taí lhúm bum akô nghut ri.

39 Haú mù, yhangmoq gi, yhang lé, chyup yû luí, hkyâm shinggan shut dú htoq kômù, sat pyám bekô nghut ri.

40 Haú mù luí, tsibiyiq hkyâm yhumsîng lé jé é hkûn lé, haú hkyâm saí zo bang lé hkâsu kut nhô ngam akô lhú?" ga Yesuq myî ri.

41 Haú hkûn, haú hkyangjong agyi pé eq suwún wuì gi, "Haú agè ashop bang lé gi,

agè ashop é dông sat pyám râ nghut lhê. Haû tsibiyiq hkyâm lé gi, kyô shu yoq má, yhâng é gambùm lé byi râ bang lé, htot ngho byi pyám râ nghut lhê." ga, tû taí akô nghut ri.

<sup>42</sup> Haû jáng, Yesuq dum taí é gi, "Chyúmdang má,

'Yhúm saí bâng eq hkyin htoq pyâm é luqgok gi, htungchyûn má é ahkyak dik é luqgok dut bê.

Shí hkyô gi, haû Yhumsîng kut é nghut luí, nga-nhông é myoq hí má mauhpo dut bê nghut ri.'<sup>✧</sup>

ga bo tô é lé, nungmoq a nghap wú kó lúh?

<sup>43</sup> Haû mù, Ngò, nungmoq lé taí kôlé, Garai Gasâng é mingdán lé, nungmoq chyáng mai yù mù, hau é ashi wó zui râ byuhú lé byi pyám râ nghut lhê.

<sup>44</sup> Luqgok haû má gyó záng é sù gi, gyuî gyop byuq râ nghut lhê. Luqgok hau eq gyó nhê záng é sù le, nhê pyeq pyâm é hui râ nghut lhê." gâ ri.

<sup>45</sup> Hkyangjong agyi pé eq Hparishe pé gi, haû Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri.

<sup>46</sup> Haû mù, yhangmoq gi, Yhang lé chyup yû râ hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haû bang lé gyuq akô nghut ri.

## 22

### *Myiháng Poí Dangtú Pé*

#### *Luk 14:15-24*

<sup>1</sup> Yesuq, dangtú pé dông yhangmoq lé dum taí é gi,

<sup>2</sup> "Mauhkûng mingdán gi, yhumsing yhangzô é matú myiháng poí hen lajâng to byi é hkohkâm rayuq eq du ri.

<sup>3</sup> Hkohkâm hpó haû gi, yhang ji tô é bang, haû poí má lé lô râ matú, yhâng é dui-nhâng zoshâng wuì lé ê tsing taí nhang ri; nghut kôlhang, haû bang gi, a lé kut akô nghut ri.

<sup>4</sup> Hau htâng má, yhang gi, gotû dui-nhâng zoshâng wuì lé, 'Ngò haí le hen to bê; ngá é no eq xu-myum é gau-nyhaú pé lé sat mù, jung hkangmó rì rì nghut to bê. Myiháng

poí má lé lò keq hkoi nghû, haû ji tô é bang lé ê taí keq.' ga pyîng luí, nhang kat ri.

<sup>5</sup> Nghut kôlhang, haû ji to huí é bang gi, dang haú lé haí su a gyô ngàm kômù, rayuq gi, yohtung shut, rayuq gi, hpugá dinggá hkyô shut ê byuq bekô nghut ri.

<sup>6</sup> Ra-am dum nghut jáng, yhâng é dui-nhâng zoshâng wuì lé lhom chyup yû kômù, nhuq bat luí, sat pyám byi akô nghut ri.

<sup>7</sup> Haû mù, hkohkâm gi, nhikjum yo luí, yhâng é gyezô pé lé, haû byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

<sup>8</sup> Hau htâng má, yhang gi, yhâng é dui-nhâng zoshâng wuì lé, 'Myiháng poí gi, rì rì nghut to bê; nghut kôlhang, haû ji to huí é bang gi, lé râ a gingdán kó nghut ri.

<sup>9</sup> Haû mù, hkyô kang pé má é luí, myang é yuq hkangmó lé, poí má lé râ matú ê jî keq.' ga taí ri.

<sup>10</sup> Haû jáng, dui-nhâng zoshâng haû bang gi, hkyô kang pé má htoq ê luí, myang é byù gè byù gang lhunglhang lé ji tsing yù kô é nghut mù, myiháng poí gi, bíng pé zung byíng bùm bê nghut ri.

<sup>11</sup> Nghut kôlhang, bíng haú bang lé, hkohkâm hpó, lé wang wú é hkûn, myiháng poí wàng hking a wut tô é byù rayuq lé, yhang byu-myang ri.

<sup>12</sup> Haû mù, yhang gi, haû yuq lé, 'Buinùm hpó ê, nàng gi, myiháng poí wàng hking le a wut é nhîng, shí má hkâsu kut wang lo é lúh?' ga myi jáng, haû yuq gi, haí le a dat tû taí lo nghut ri.

<sup>13</sup> Haû hkûn, hkohkâm hpó gi, yhâng é dui-nhâng zoshâng wuì lé, 'Yhâng é hkyí loq má tui luí, haû ngaubyi ngaù nhap eq zui kyik kyik shoq hpuzô nyi râ nghut é shinggan mauchut hkaû má, dú htoq pyám keq.' gâ ri.

<sup>14</sup> Hkâsu mù gâ le, byù myo myo gi, ji yu é hui kôlhang, hkyin yù huí é bang gi, shaû ri." gâ ri.

### *Kehtaq Lé Kang Kat Byi É Hkyô*

#### *Mrk 12:13-17; Luk 20:20-26*

<sup>15</sup> Hau htâng má, Hparishe pé gi, htoq lô kômù, Yhâng é dang pé má mara chyup râ hpaqchyí dâ akô nghut ri.

16 Yhangmoq gi, Herut é byu pé eq rahá, yhangmoq é chângzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarà ê, Nàng gi, tengmán sù nghut é eq, Garai Gasâng é hkyô lé, tengmán é đông mhoqshit é sù nghut é lé le, Nàng gi, ó haí ga râlê le haí su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê.

17 Haú mù, hkoséng Kehtaq lé kang kat byi le gi, ge lhê lú? A gè lú? Nàng, hkâsu wó myit é hkyô taí kyô wú aq." ga taí akô nghut ri.

18 Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, haí mù, Ngo lé lé chyam wú akô lú?"

19 Kang kat râlê ngùn htingchap rachap, Ngo lé byi wú keq." ga taí kat ri. Haú hkûn, yhangmoq gi, denari rachap yù byi akô.

20 Haú mù, Yhang gi, yhangmoq lé, "Shí má, ó yuq é alhô eq masat laiká dap tô ri lú?" ga myi jáng,

21 yhangmoq gi, "Kehtaq é nghut ri." ga tû taí akô. Haú mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taí kat ri.

22 Haú su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

*Saduke Pé, Yesuq Lé Myi Chyam É Hkyô*  
*Mrk 12:18-27; Luk 20:27-40*

23 Haú nyí má yhang, haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myi akô.

24 Yhangmoq myi kô é gi, "Sarà ê, 'Myiwe wó é byu rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râlê matú, yhâng rhat lé chui gon ra râlê nghut lhê.' ga, nga-nhúng lé, Mosheq taí tô é nghut lhê.

25 Hí hpyang lé, ngamoq chyáng, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri.

26 Haú eq rajung za, Lanong, Lalaq mai Lahká jé shoq, chuimó haú lé gon luí, ó le

zo dù a dap é za shi ló byuq bùm bekô nghut ri.

27 Ló htáng má, myiwe myhí haú le châng shi ló byuq bê nghut ri.

28 Haú mù luí, haú dum dui toq é buinyi má, myiwe myhí haú gi, haú nhiktâng wui nyhit yuq mâ é hká yuq é yhangmyi nghut râlê? Hkâsu mù gâ le, yhang gi, haú nhiktâng wui banshoq bâng é yhangmyi dut wú bê sù nghut ri." gâ akô.

29 Haú hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri.

30 Haú dum dui toq é buinyi má gi, myi byi myi yù hkyô joq ló râlê a nghut; yhangmoq gi, mauhkûng htoq mâ é maumang lagyô pé su dut byuq kó râlê nghut lhê.

31 Shi é mai dum dui toq bang eq séng luí,

32 Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'\* ga, nungmoq lé taí tô é lé, nungmoq a nghap wú kó lú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga taí ri.

33 Byù moq mó gi, dang haú wó gyo kôjáng, Yhang mhoqshit é hkyô lé maú byuq bum akô nghut ri.

*Ahkyak Dik É Jep É Tarâ*

*Mrk 12:28-34; Luk 10:25-28*

34 Saduke pé lé, Yesuq lhoq zím pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zing lé bum akô.

35 Yhangmoq má bo é tarâ sará rayuq gi, Yesuq lé chyam wú é đông,

36 "Sarà ê, jep é tarâ má, hká lhum gi, je ahkyak dik lhê lú?" ga myi ri.

37 Haú mù, Yesuq gi, "'Haú Yhumsing náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq eq, chyitdap râlê.'\* gâ é nghut lhê.

38 Tarâ haú gi, je hí lhum eq je ahkyak dik é lhum nghut lhê.

39 Hau htang lhum le haú eq du é nghut mù, 'Náng gûng lé nàng chyitdap é su, náng



é chyangnâm mâ é bang lé le chyttdap aq. '☆  
gâ é nghut lhê.

40 Tarâ haû í lhum gi, jep é tarâ banshoq  
eq myiqhtoi laiká banshoq é dangchyûng  
nghut lhê." ga, yhang lé taî kat ri.

### *Hkrisduq Gi, Ô Yuq É Yhangzo?*

*Mrk 12:35-37; Luk 20:41-44*

41 Hparishe pé zup zîng to kô é hkûn,  
Yesuq gi, yhangmoq lé,

42 "Nungmoq gi, Hkrisduq eq séng luí  
hkâsu myit ngam akô lhú? Yhang gi, ó  
yuq é yhangzo nghut lhê lhú?" ga myi jáng,  
yhangmoq gi, "Dawiq é yhangzo nghut ri."  
ga tû taî akô.

43 Haû mù, Yhang gi, yhangmoq lé, "Haû  
hkûn, Dawiq gi, Woi-nyí dông mai, Yhang  
lé, 'Yhumsîng' ga, haî mù wut lhê lhú?  
Hkâsu mù gâ le, Dawiq taî é gi,

44 'Haû Yhumsîng Garai gi, ngá é Yhumsîng  
lé, "Ngò, náng é gumlau gye pé lé,  
náng é hkyiwa ô má tô pyâm é hkyíng  
jé shoq,

Ngá é loqyo hkyam shut zung nyi shi aq."  
ga taî ri. '☆

gâ ri.

45 Haû mù, Dawiq yhang lhang, Hkrisduq  
lé, 'Yhumsîng' gâ é nghut le gi, yhangzo za  
hkâsu ge nghut râ lhú?" ga taî ri.

46 Haû mù, ó yuq le, dang rahkun lhang a  
wó tû taí lo kô é nghut mù luí, haû nyí mai,  
ó yuq lhang Yhang lé dangmyi a wám myi  
lo kó nghut ri.

## 23

### *Tarâ Sará Pé Eq Hparishe Pé Lé Sidiq Râ Hkyô*

*Mrk 12:38-40; Luk 11:37-52; 20:45-47*

1 Hau htâng, Yesuq gi, byù moq mó eq  
Yhâng é chángzô pé lé taî é má,

2 "Tarâ sará pé eq Hparishe pé gi, Mosheq  
é tanghkuq má zung akô.

3 Haû mù, yhangmoq mhoqshit é hkyô  
chângjup lé, nungmoq châng kut ra kó râ  
nghut lhê. Nghut kôlhang, yhangmoq kut é  
dông gi, hkâkut kó; hkâsu mù gâ le, yhang-  
moq gi, yhangmoq taî é dông a kut kó nghut  
ri.

4 Yhangmoq gi, byu pé é goqsân má wòlai  
ke byi kôlhang, yhangmoq yhang gi, wò haû  
pé lé bo waq râ matú, loqnyhui lhang a kâm  
lhoq tuí kó nghut ri.

5 Yhangmoq kut é hkyô lhunglhang gi,  
byu pé myàng râ matú za kut shit é nghut  
akô; haû chyûmbun bo é showuî-htûng pé lé  
lhoq kô yù kômù, buhîng pé má é banbyaú  
pé lé lhoq hing yu akô nghut ri;

6 yhangmoq gi, poî pé má é réng é jowò pé  
eq tarajong pé má é ahkyak dik é zùng jang  
pé má, myang zùng râ lé ô nau nyi akô;

7 yhangmoq gi, gai pé má lhom shi-kyâm  
yù kó râ eq, byu pé mai, yhangmoq lé,  
'Rabai'\* ga lhom wut kó râ lé ô nau nyi bum  
akô.

8 Nungmoq kúm gi, 'Rabai' ga wut râ lé  
hkâ-ô nau kó; hkâsu mù gâ le, nungmoq  
gi, sará rayuq za wó lhê nghut é htoq agó,  
nungmoq banshoq bang gi, gumang chyat  
ru nghut lhê.

9 Haû mù, myidàm htoq má, ó yuq lé  
le, 'âwa' hkâ-nghû kó; hkâsu mù gâ le,  
mauhkûng htoq mâ é Îwa rayuq za, nung-  
moq é Îwa nghut lhê.

10 Hau htoq agó, 'sará' ga wut râ lé, hkâ-  
ô nau kó; hkâsu mù gâ le, Hkrisduq za,  
nungmoq é Sará nghut lhê.

11 Nungmoq mâ é je gyaú sù gi, nungmoq  
é dui-nhâng zoshâng dut râ nghut lhê.

12 Hkâsu mù gâ le, yhumsing gùng lé waq  
toq sù ó yuq nghut kôle, lhoq nyhum pyâm  
é hui râ nghut lhê, yhumsing gùng lé lhoq  
nyhûm sù kúm gi, waq toq é hui râ nghut  
lhê.

13 Gegùn labyoq nghut é, tarâ sará pé eq  
Hparishe pé é, nungmoq gi, dingnyé wó  
ri. Hkâsu mù gâ le, nungmoq gi, byu pé hí  
má, mauhkûng mingdán hkyô lé xaû tô akô;  
nungmoq yhang le a wàng kó, wàng nau nyi  
bang lé le a wàng nhâng kó nghut ri.

14 (Gegùn labyoq nghut é, tarâ sará pé eq  
Hparishe pé é, nungmoq gi, dingnyé wó ri.  
Hkâsu mù gâ le, nungmoq gi, chuimó pé é  
yhûm-yò pé lé hpoyô zo hpoyô shuq é eq  
kyû hîng hîng dîng shit mhaû é bang nghut  
akô; haû mù, dam byi é je myo hui zo kó râ  
nghut lhê.)†

☆ 22:44 Hkya-on 110:1 \* 23:7 Aramaik dang dông rabai gâ é gi, sará gâ é lichyûm nghut lhê. † 23:14 Chyûmding  
ra-am má gi, bun zo 14 shi a bo é nghut lhê.

15 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byù rayuq lé nungmoq é noqkuq htúng má wó lhoq lhik yû râ matú, myì hkyô, wui hkyô, châng jón wún kômù, wó lhoq lhik yu é sù lé gi, nungmoq su ngaraí byù í tú shuí dut akô nghut ri.

16 Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhùm lé lang luí dakam é sù gi, haí a ra; noqkuq yhùm mâ é hîng lé lang mù dakam é sù kúm gi, cháng ra bê.' ga lhaq taí akô.

17 Myoqjit é byù nâ pé ê! Haù hîng eq hîng lé lhoq yúnglhô é noqkuq yhùm gi, hká lhum je ahkyak lhê l hú?

18 Hau htoq agó, nungmoq gi, 'Haù hkungga gyap lé lang luí dakam é sù gi, haí a ra, nghut kôlhang, haù hkungga zè lé lang mù dakam é sù gi, cháng ra bê.' ga le, lhaq taí akô nghut ri.

19 Myoqjit pé ê! Haù hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê l hú?

20 Haù mù, haù hkungga gyap lé lang luí dakam é sù gi, haù hkungga gyap eq hau é ahtoq má ke tô é zè banshoq lé lang luí dakam é sù dut bê nghut ri.

21 Noqkuq yhùm lé lang luí dakam é sù gi, haù noqkuq yhùm eq haù má nyi é Sù lé lang luí dakam é sù dut bê nghut ri.

22 Hau htoq agó, mauhkúng lé lang luí dakam é sù gi, Garai Gasâng é tanghkuq eq haù má zung é Sù lé lang luí dakam é sù dut bê nghut ri.

23 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, xunmân nghut é gau-tsáng shingtón, bantsaí, hpakkyí pé mâ é xê gambùm ragambùm lé gi, byí nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akô nghut ri. Hí lhum lé kut é su, htang lhum lé le kut râ lhê.

24 Hkyô-u she é myoqjit pé ê! Nungmoq, pyup lé gi, jân pyám kômù, gola-uq lé gi, myui pyâm akô nghut ri.

25 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó

ri. Hkâsu mù gâ le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri.

26 Hparishe myoqjit pé ê! Zo hkoq shuq góm é ahte lé hí chí yúng pyám keq, haù jáng, ahtoq le sân-yúng râ nghut lhê.

27 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, but hpyu tô é lup pé eq du akô; haù pé gi, ahtoq má wú yúng kôlhang, ahkaù má gi, mâng bup showui pé eq achayut é chângjup byíng tô é nghut ri.

28 Haù eq rajung za, nungmoq gi, byu pé hí má, ahtoq pyâm dingmán é su kut shit kôlhang, ahkaù má gi, gegùn labyoq kut é eq agè ashop é hkyô pé byíng zan tô ri.

29 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, myiqhtoí pé é lup lé luptsuq tsuq kômù, dingmán bâng é lup pé lé mhón byi kôluí,

30 'Ngamoq gi, ngamoq é îchyí îwa pé é ipyat má nyi âng é ru nghut le gi, haù myiqhtoí pé é sui lhoq shun é bang má, ngamoq bo lòm râ a nghut.' ga lhaq taí akô.

31 Haù su mù, nungmoq gi, haù myiqhtoí pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akô nghut ri.

32 Haù mù, nungmoq é îchyí îwa pé hi tô é muzó lé, banshoq châng kut pán keq!

33 Lhangmuí pé ê, duq htân lhangmuí amyû pé ê! Ngaraí mîng é dam byi hkyô mai, hkâsu wó hpanq lut kó râ l hú?

34 Hau é yanmai, myiqhtoí pé, hpaqchyí bò bang eq chyúm sará pé lé, Ngò, nungmoq chyáng nhang kat râ nghut lhê. Haù bang mâ é ra-am lé gi, nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rí wún kó râ nghut lhê.

35 Hau é yanmai, haù dingmán sù Abelaq é sui mai hí luí, noqkuq yhùm eq hkungga gyap gyoro má nungmoq sat pyâm é, Berehkiq é yhangzo Zahkariq é sui jé shoq, myidàm htoq má shun pyâm é

dingmán bang banshoq é sui gi, nungmoq é ahtoq má jé lô râ nghut lhê.

<sup>36</sup> Ngò, nungmoq lé teng za taí kôlé, shí hkyô banshoq gi, ipyat shi é ahtoq má jé râ nghut lhê.

<sup>37</sup> Yerusalem ê, Yerusalem ê, myiqhtoi pé lé sat pyám pyám kut mù, náng chyáng nhang kat é bang lé luqgok eq dú sat sat kut é myuq nàng ê, woqzìng gi, yhangzô pé lé, yhâng é dùng hkaû má tsìng lhùng yu é su, nungzô pé lé, Ngò, hkâ-myhó dâm shuì tsìng yù nàu kôlhang, nàng a dóng nghut ri.

<sup>38</sup> Wú keq, nungmoq é yhùm gi, nungmoq é matú chamchyuiyui dut pyâm to berâ nghut lhê.

<sup>39</sup> Hkâsu mù gâ le, Ngò, nungmoq lé taí kôlé, 'Yhumsing é myìng mai jé lo é Sù gi, hkungsô wó nyí sháng gaq.'<sup>☆</sup> ga, nungmoq a taí taí gi, Ngo lé wó myáng kó râ a nghut lo." gâ ri.

## 24

### *Ló Htâng Buinyì Má Dut Lò Râ Hkyô*

#### *Mrk 13:1-31; Luk 21:5-33*

<sup>1</sup> Yesuq gi, noqkuq yhùm mai htoq e ló é u lé, Yhâng é chángzô pé gi, Yhâng é nàm má huì lé lô kômù, haù noqkuq yhum é loqmú pé lé tûn shit akô.

<sup>2</sup> Haù hkûn, Yesuq gi, yhangmoq lé, "Haù pé banshoq lé, nungmoq myang lhê a nghut kó lú? Ngò, nungmoq lé teng za taí kôlé, luqgok haù pé gi, rachâm htoq racham lhang a kê lhum loshoq, hpyoq hpyi pyâm é hui râ nghut lhê." ga taí ri.

<sup>3</sup> Yesuq gi, Tsanlun Bùm má zung tô é hkûn, haù chángzô pé gi, yhangmoq baú Yhâng chyáng lé jé kômù, "Haù hkyô pé gi, hkâ-nhám dut lò râ lú? Nàng gyó lé râ hkûn eq ló htâng buinyì má, hkasû é kumlhá htoq lô râ nghut lhê lú? Ngamoq lé taí kyô wú laq." ga, Yhang lé myí akô.

<sup>4</sup> Haù hkûn, Yesuq, yhangmoq lé tû taí é gi, "Nungmoq lé, ó yuq eq le a wó shuì nghoq sháng gaq, sidiq nyì keq.

<sup>5</sup> Hkâsu mù gâ le, 'Ngò gi, haù Hkrisduq nghut lhê.' ga, Ngá myìng lé lhang é byù myo myo pô htoq lô mù, byù myo myo lé hkyô shuì nghoq kó râ nghut lhê.

<sup>6</sup> Nungmoq gi, majan dut nyi é hkyô eq majan eq sêng é danglám pé lé, wó gyo kó râ nghut lhê; nghut kôlhang, hkâgyuq dàn kó. Haù hkyô pé gi, dut lò râ za nghut lhê; nghut kôlhang, ló htâng é buinyì gi, a nghut shi.

<sup>7</sup> Byù ra-myû eq ra-myû, mingdán ralhüm eq ralhüm majan zân lhùm lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê.

<sup>8</sup> Haù pé gi, wuìhke jamjau hkyo é apùn awang za ru nghut ashì.<sup>☆</sup>

<sup>9</sup> Haù hkûn, nungmoq gi, zing-rî é eq sat pyâm é hui zo râ matú, ap pyâm é hui kó râ nghut lhê. Byù myû lhunglhang bang gi, Ngá é yanmai, nungmoq lé a ngui kut kó râ nghut lhê.

<sup>10</sup> Haù u lé, byù myo myo gi, lumjìng myit lé tô pyám kômù, rayuq eq rayuq a ngui lhum dut é htoq agó, rayuq eq rayuq ap pyâm lhum kó râ nghut lhê.

<sup>11</sup> Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuì nghoq kó râ nghut lhê.

<sup>12</sup> Agè ashop é hkyô myô jat lo é yanmai, byù myo myô é chyitdap myit gi, kân lò byuq râ nghut lhê;

<sup>13</sup> nghut kôlhang, jìhtùm jé shoq wó hkam jân nyi é sù gi, hkyi yu é hui râ nghut lhê.

<sup>14</sup> Byù myû banshoq má saksé dut râ matú, haù mingdán eq sêng é gabú danglù lé, mingkan gón má hko kyo râ nghut lhê. Hau htâng má sheq, ló htum buinyì jé râ nghut lhê.

<sup>15</sup> Haù mù luì, myiqhtoi Danielaq dông mai taí tô é eq rajung za, 'haù lhoq hten lhoq hpyoq é achag achyut hkyô'<sup>☆</sup> gi, chyoiyúng jowò má shap tô é lé, nungmoq myàng kó râ nghut lhê. (Chyúmlaika ngaph sù gi, sê gyo sháng gaq).

<sup>16</sup> Haù hkûn, Yuda mau má nyi é bang gi, bùm pé shut hpang doq ló kó sháng gaq.

<sup>17</sup> Yhumhkûng htoq má nyi tô é sù gi, yhúmhaù mâ é zè haì lé le, a ló gyó wang yù lo sháng gaq.

<sup>18</sup> Yò má nyi tô é sù gi, yhâng é buhìng lé a ló taú yu nyi lo sháng gaq.

<sup>19</sup> Haù buinyì pé má, zogùng dut é myiwe eq naú huq ashì nghut é ìnu wuì gi, gyai

yhang wuîhke jamjau kó râ nghut lhê.

<sup>20</sup> Haû nungmoq hpâng râ buinyi gi, gy-oqmyò,\* a nghut jáng, Bánno buinyi má a ang râ matú, kyûdûng nyi keq.

<sup>21</sup> Hkâsu mù gâ le, mingkan lé joq é hkûn mai ahkuî jé shoq, hkâ-nhám le a dut wú shî é wuîhke jamjau mó gi, haû buinyi pé má dut lò râ nghut lhê; haû sù é hkyô gi, htângnùng má hkâ-nhám le dum dut lo râ a nghut.

<sup>22</sup> Buinyi haû pé lé lhoq shaû pyâm é za a nghut le gi, ó yuq le asak wó lut râ a nghut; nghut kôlhang, Garai Gasang èq hkyin yù hui bâng é matú gi, buinyi haû pé lé, lhoq shaû pyâm byi râ nghut lhê.

<sup>23</sup> Haû ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haû a nghut jáng, 'Wú keq, Yhang hê má nyi ri.' ga taí jáng, nungmoq hkâjíng kó.

<sup>24</sup> Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklai kumlhá pé lé kut shit kó râ nghut lhê.

<sup>25</sup> Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

<sup>26</sup> Haû mù, rayuq yuq èq, nungmoq lé, 'Yhang gi, yoso má nyi ri.' gâ jáng le, hkâ-é kó; 'Yhang gi, shí gok hkaû má lúng tô ri.' ga jáng le, hkâjíng kó.

<sup>27</sup> Hkâsu mù gâ le, bui htoq hkyam má lhap hpyat é gi, bui wang hkyam má lhang jé shoq duqbó é su, haû Byu Yhangzo jé lé é hkûn le, dut râ nghut lhê.

<sup>28</sup> Màng leq é jang má, langdâ pé, lé zîng bùm râ nghut lhê.

<sup>29</sup> Buinyi haû pé má é wuîhke jamjau lai eq yhang,

'Bui gi, noq byuq mù, lhamó gi, a tsô dut byuq râ nghut lhê;

kyî pé gi, mauhkûng mai byit gyó lo bùm mù, mauhkûng má é wum-o a-tsam pé gi, lhoq nhún é huî bùm kó râ nghut lhê.<sup>†</sup>

<sup>30</sup> Haû hkûn, haû Byu Yhangzô é kumlhá gi, mauhkûng má htoq shit lô râ nghut mù, myidàm htoq má é byù myû lhunglhang gi,

yón ngau bùm kó râ nghut lhê. Haû Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shíngkâng eq le, gyó lé lo é lé, yhangmoq byu-myàng kó râ nghut lhê.

<sup>31</sup> Hau htâng má, Yhang gi, Yhâng é mau-mang lagyô pé lé, tut htê mó èq nhang kat luî, yhangmoq gi, maumyî chyûn myi chyûn eq mauhkûng rahkyam mai, gó hkyam htum shoq má é, Yhang hkyin yu tô é bang lé shuí tsîng yù kó râ nghut lhê.

<sup>32</sup> Maihpáng gâm lé wú mù, mhoq yû keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê.

<sup>33</sup> Haû eq rajung za, shí hkyô ban-shoq<sup>‡</sup> lé, nungmoq myàng kôjáng, Yhang gi, chyâng bê nghut mù, hkúmdong má lhang nghut nyi bê hkyô lé, nungmoq sé lo keq.

<sup>34</sup> Ngò, nungmoq lé teng za taí kôlé, shí pyat má é byu pé a ban shi byuq shimá, haû hkyô pé<sup>‡</sup> banshoq dut byuq râ nghut lhê.

<sup>35</sup> Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyi râ nghut lhê.

### *Haû Buinyi Eq Ahkyíng Lé, Ó Le A Sé*

*Mrk 13:32-37; Luk 17:26-30, 34-36; 12:35-48*

<sup>36</sup> Buinyi eq ahkyíng haû lé gi, ó yuq le a sé; mauhkûng htoq má é maumang lagyô pé lhang a sé; haû Zo le a sé; haû Íwa za ru sê lhê.

<sup>37</sup> Noaq é tsîn pyat má dut é su, haû Byu Yhangzo lé lo é hkûn le, dut râ nghut lhê.

<sup>38</sup> Hkâsu mù gâ le, dowuî a dîng shî é buinyi pé má, byu pé gi, Noaq, wuî-sanghpo mó hkaû má wang é hkûn jé shoq, zo zo shuq shuq, myi byi myi yû, kut nyi bum akô nghut ri;

<sup>39</sup> yhangmoq gi, dowuî dîng lô mù, yhangmoq banshoq lé ûm sat pyâm é hkûn jé shoq, haî dut lò râ lé, a sé kó dut bùm é su, haû Byu Yhangzo lé lo é hkûn le, dut râ nghut lhê.

<sup>40</sup> Haû hkûn, yò má rahá nyi tô é byù í yuq má é rayuq gi, shuí yu é hui mù, rayuq gi, myit gyó to râ nghut lhê.

\* **24:20** Israelaq mau má gi, gyoqmyò lé hkyô htoq le gyai wuîhke é ahkyíng nghut lhê.    † **24:33** *Shí hkyô banshoq* gâ é gi, Yesuq jé lé râ hí má dut râ hkyô pé lé taí é nghut lhê.    ‡ **24:34** *Haû hkyô pé gâ é gi*, Yerusalem noqkuq yhûm htên byoq râ lé taí é nghut lhê.

<sup>41</sup> Luqluí chôm lêng nyi é myiwe í yuq mâ é rayuq gi, shuí yu é hui mù, rayuq gi, myit gyó pyám to râ nghut lhê.

<sup>42</sup> Haû su mù, haû nungmoq é Yhumsîng gi, hká nyi jé lé lô râ lé, nungmoq a sê kô é yanmai, sidiq machya nyi keq.

<sup>43</sup> Myín hká u má hkau sù jé lé lò râ lé, yhumsîng sê é ru nghut le gi, yhâng é yhùm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq.

<sup>44</sup> Haû mù, nungmoq le rì rì nghut nyi keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê.

<sup>45</sup> Yhumsîng hpô é dui-nhâng zoshâng wui lé, uphkâng râ eq ahkyíng jé jáng zoshuq gâm byi râ matú, yhumsîng hpô eq mù nhang tô é, lhumzui luí, hpaqchyí bo é dui-nhâng zoshâng gi, ó yuq nghut râ lú?

<sup>46</sup> Yhumsîng hpó dum taû lo é hkûn, haû su kut nyi lêng é dui-nhâng zoshâng gi, hkungsô wó nyi ri.

<sup>47</sup> Ngò, nungmoq lé teng za taí kôlé, yhumsîng hpó haû gi, yhâng é sutzè ban-shoq, dui-nhâng zoshâng haû yuq lé ap to râ nghut lhê.

<sup>48</sup> Nghut kôlhang, laq má mù, dui-nhâng zoshâng haû yuq gi, agè ashop sù nghut luí, 'Ngá é yhumsîng hpó jé lô râ gyai myáng ashî.' ga, yhâng é i-myt unghkaû má myit yù mù,

<sup>49</sup> gotú dui-nhâng zoshâng luzúm wui lé nhuq bat é htoq agó, í shuq wut bang eq rahá zo zo shuq shuq kut nyi é nghut le gi,

<sup>50</sup> dui-nhâng zoshâng hau é yhumsîng hpó gi, yhang a myitngam tô é buinyi eq yhang a sê tô é ahkyíng má jé lô mù,

<sup>51</sup> yhang lé jap pyám luí, gegùn labyoq kut bang hkâm zô é, ngaubyi ngaù nhap eq zuì kyik kyik shoq hpuzô nyi râ jowò má hkyô pyám râ nghut lhê.

## 25

### *Zomyi Raxê Yuq Lé Dangtú Yu É Hkyô*

<sup>1</sup> Haû hkûn, mauhkûng mingdán gi, myi-bung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê.

<sup>2</sup> Haû bang má, ngo yuq gi, nhik a gyíng kó; ngo yuq gi, nhik gyíng akô nghut ri.

<sup>3</sup> Haû nhik a gyíng é bang gi, myibung yu chûng kôlhang, xù a yu chûng kó nghut ri.

<sup>4</sup> Nghut kôlhang, haû nhik gyíng é bang kúm gi, yhangmoq é myibung lé le, xù bo é bòng lé le yu chung akô nghut ri.

<sup>5</sup> Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhî byuq bekô nghut ri.

<sup>6</sup> Myín gunggâm jé jáng, 'Lusik jé bê ô! Yhang lé te yù râ matú, htoq lé lô keq hkoi ô!' ga, garû é htê htoq lo ri.

<sup>7</sup> Haû hkûn, zomyi haû bang banshoq gi, toq lô mù, yhangmoq é myibung lé hen lajâng akô nghut ri.

<sup>8</sup> Haû nhik a gyíng bang gi, 'Ngamoq lé, xù ratsuí byi kó laq; hkâsu mù gâ le, ngamoq é myibung shi ló nyi ri.' ga, haû nhik gyíng bâng chyáng dúng akô.

<sup>9</sup> Haû hkûn, haû nhik gyíng bang gi, 'Nungmoq eq ngamoq é matú ga jáng, luq râ a nghut. Haû mù, nungmoq é matú, xù ung bâng chyáng é wui yù keq.' ga tû taí kat akô.

<sup>10</sup> Yhangmoq, xù wui e ló kô é hkûn, lusik gi, jé lé lô mù, haû rì rì hen tô é zomyi wui gi, yhang eq rahá myiháng poi má wang ló bekô. Hkum le myhî byuq bê nghut ri.

<sup>11</sup> Hau htâng má, hau htâng gyó tô é zomyi wui gi, tau jé lô kômù, 'Yhumsîng ê! Yhumsîng ê! Ngamoq lé, hkum hpóng byi laq ô!' ga taí akô.

<sup>12</sup> Nghut kôlhang, haû lusik gi, 'Ngò, nungmoq lé teng za taí kôlé, nungmoq lé ngò a sé.' ga tû taí kat ri.

<sup>13</sup> Haû mù luí, haû Byu Yhangzo jé lé râ buinyi eq ahkyíng lé, nungmoq a sé kô é yanmai, sidiq machya nyi keq.

### *Dui-nhâng Zoshâng Sum Yuq Lé, Dangtú Yu É Hkyô*

#### *Luk 19:11-27*

<sup>14</sup> Mauhkûng mingdán gi, byù rayuq byìn we htoq râ hen nyi é nghut mù, yhâng é dui-nhâng zoshâng wui lé wut yù luí, yhâng é sutzè lé ap byi to sù eq pung ashî nghut ri.

<sup>15</sup> Yhang gi, yhangmoq é a-tsam má cháng luí, rayuq lé gi, ngùn ngo joí, rayuq lé gi, í joí, htâng rayuq lé gi, rajoí kut byi to mù, byìn we shut htoq ló byuq bê nghut ri.

16 Ngùn ngo joi wó yû sù gi, haú hkûn jáng htoq lô mù, hpugá gá luí, ngùn ngo joi wó myat yù bê nghut ri.

17 Haú eq rajung za, ngùn í joi wó yû sù le, í joi wó myat yù bê nghut ri.

18 Nghut kôlhang, rajoí za wó yû sù gi, htoq e lô mù, myigùng má du luí, yhang yhumsing hpô é ngùn lé haq myhup tô ri.

19 Hau htang tsómra myáng jáng, dui-nhâng zoshâng haú bâng é yhumsing hpô gi, dum taú jé lô mù, yhangmoq é ngùn chyârâng lé, lo jep ri.

20 Ngùn ngo joi wó yû sù gi, amyat ngo joi lé le yu lé lô mù, 'Yhumsing ê, nàng, ngo lé, ngùn ngo joi ap tô é nghut lhê. Wú aq, amyat ngo joi wó ho jat yù bê.' ga taí ri.

21 Haú hkûn, haú yhumsing hpó gi, 'Arâ! Nghut bê. Nàng gi, kyet é eq lumging é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Nàng yhumsing hpô é gabú hkyô má bo wang lòm aq hkoí!' ga tû taí ri.

22 Haú eq rajung za, í joi wó yû sù le, lé lô mù, 'Yhumsing ê, nàng, ngo lé ngùn í joi ap tô é nghut lhê. Wú aq, amyat í joi wó ho jat yù bê.' ga, lé taí ri.

23 Haú hkûn, haú yhumsing hpó gi, 'Arâ! Nghut bê. Nàng gi, kyet é eq lumging é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi râ nghut lhê. Nàng yhumsing hpô é gabú hkyô má bo wang lòm aq hkoí!' ga tû taí ri.

24 Hau htang, rajoí wó yû sù le, lé lô mù, 'Yhumsing ê, nàng gi, byù wui nghut mù, yhumsing a hô tô é jang mâ é shù yù nau é htoq agó, yhumsing, kyôshi a sân hkyô tô é jang mâ é tsing yù nau sù nghut é lé, ngò sê lhê.

25 Haú mù, ngò gi, gyuq luí, htoq ê mù, nàng é ngùn lé, myigùng má ê haq myhup tô é nghut lhê. Wú aq, shí gi, nàng é ngùn nghut lhê.' ga taí ri.

26 Haú mù, yhumsing hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsing a hô tô é jang mâ é shù yù nau é eq, yhumsing, kyôshi a sân hkyô tô é jang mâ é tsing yù nau sù nghut é lé, nàng sê to gù nghut le nhing,

27 ngá é ngùn lé, ngò dum taú jé lô jáng, aráng eq amyat wó yù shoq, ngùn hpún kat jang má, haí mù a kat tô é lhú?

28 Haú mù, haú ngùn rajoí lé, nàng chyáng mai yù luí, raxê joi wó to sù lé, byi pyám nhâng râ nghut lhê.

29 Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lhê. A wó su chyáng mai kúm gi, yhang wó tô é lé lhang yu pyám byi shirá nghut lhê.

30 Haú mù, haú akyû a bo é dui-nhâng zoshâng lé gi, ngaubyi ngaù nhap eq zuí kyik kyik shoq hpuzô nyi râ jowò nghut é, shinggan mauchut hkaú má dú htoq pyám keq.' gâ ri.

### *Sau Eq Bainám*

31 Haú Byu Yhangzo gi, Yhâng é hpungwup shingkang mai, maumang lagyo lhunglhang bang eq rahá jé lé lo é hkûn, Yhâng é hpungwup shingkang bo é hkohkâm-tanghkuq htoq má zùng râ nghut lhê.

32 Haú hkûn, byù myû chângjup gi, Yhâng é hí má zing lé lo bùm kó râ nghut mù, Yhang gi, sau zúng sù mai, sau eq bainám lé gotû tû kut gam hkoq é su, byu pé lé gam hkoq pyám râ nghut lhê.

33 Yhang gi, sau pé lé, loqyo hkyam shut, bainám pé lé, loqpaí hkyam shut kut, nyhi to râ nghut lhê.

34 Hau htang má, haú Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muí mingdán má wang ló keq.

35 Hkâsu mù gâ le, Ngò zòmut é u lé, nungmoq, Ngo lé byi tso kô é nghut lhê; Ngò wuìshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê;

36 Ngò gùngchín dut é u lé, nungmoq, Ngo lé byi hut kô é nghut lhê; Ngò nòhpyo huí é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga taí râ nghut lhê.

37 Haú hkûn, haú dingmán bang gi, Yhang lé, 'Yhumsing ê, Nàng zòmut huí é lé,

ngamoq, hkâ-nhám myàng luí, byi tsô wú é lhú? Nàng wuìshit é lé, ngamoq, hkâ-nhám myàng luí, byi huq wú é lhú?

<sup>38</sup> Nàng bíng kut wún é lé, ngamoq, hkâ-nhám myàng luí, lhom hkulum wú é lhú? Nàng gùngchîn dut é hkûn, ngamoq, hkâ-nhám byi hut wú é lhú?

<sup>39</sup> Nàng nòhpyo huí é lé le, htóng lúng é lé le, ngamoq, hkâ-nhám myàng luí, lé gon lé kúm wú é lhú?' ga myi kó rà nghut lhê.

<sup>40</sup> Haú hkûn, haú hkohkâm gi, 'Ngò, nungmoq lé teng za taí kôlé, shí, Ngá gumang wuì má é je tiq sù lé, nungmoq kut byí é hkyô haí le, Ngo lé kut byí é nghut bê.' ga tû taí rà nghut lhê.

<sup>41</sup> Hau htàng má, Yhang gi, Yhâng é loqpaí hkyam shut má é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pè é matú hen tô é, ahtum abyuq é myi má wang ló keq.

<sup>42</sup> Hkâsu mù gâ le, Ngò zòmut é u lé, nungmoq, Ngo lé a byi tso kó; Ngò wuìshit é u lé, nungmoq, Ngo lé a byi huq kó;

<sup>43</sup> Ngò bíng kut wún é u lé, nungmoq, Ngo lé a lhom hkulum yù kó; Ngò gùngchîn dut é u lé, nungmoq, Ngo lé, mebu a byi hut kó; Ngò nòhpyo huí é eq htóng lúng é u lé, nungmoq, Ngo lé a gon kó nghut ri.' ga taí rà nghut lhê.

<sup>44</sup> Haú hkûn, yhangmoq gi, 'Yhumsîng ê, nàng zòmut wuìshit é, bíng kut wún é, gùngchîn dut é, nòhpyo huí é eq htóng lúng é lé, ngamoq, hkâ-nhám myàng luí, a wú gon kut wú é lhú?' ga taú myi kó rà nghut lhê.

<sup>45</sup> Haú hkûn, Yhang gi, 'Ngò, nungmoq lé teng za taí kôlé, shí bang má é je tiq sù lé, nungmoq, a kut byí é hkyô haí le, Ngo lé a kut byí é nghut bê.' ga, yhangmoq lé tû taí rà nghut lhê.

<sup>46</sup> Haú mù luí, haú bang gi, ahtum abyuq mara dam byí é má wang ló kó rà nghut lhê; haú dingmán bang kúm gi, ahtum abyuq é asak má wang ló kó rà nghut lhê." ga Yesuq taí ri.

## 26

*Yesuq Lé, Sat Râ Da Kô É Hkyô*

*Mrk 14:1-2; Luk 22:1-2; Yhn 11:45-53*

<sup>1</sup> Yesuq gi, haú hkyô pé lé ban taí é htàng má, Yhâng é chángzô pé lé,

<sup>2</sup> "Nungmoq sê tô é eq rajung za, í nyí lai é htàng má, Lhoqlhai Poí jé rà nghut mù, haú Byu Yhangzo gi, tapzîng má jén sat é hui rà matú, ap pyâm é hui rà nghut lhê." ga taí ri.

<sup>3</sup> Haú u lé, hkyangjong agyi pé eq suwún wuì gi, Kayahpaq gâ é hkyangjong mó rayuq é yhumwàng má zup zîng to kômù,

<sup>4</sup> Yesuq lé haq chyup yù rà eq sat pyám rà hkyô lé, hpyê lhùm bum akô nghut ri.

<sup>5</sup> Nghut kôlhang, yhangmoq gi, "Byu pé gabyông lò kó abe, poí gyoro má gi, a kut shi sháng." ga, taí lhùm akô nghut ri.

*Yesuq, Xû Hut Gyun Huí É Hkyô*

*Mrk 14:3-9; Yhn 12:1-8*

<sup>6</sup> Yesuq gi, Behtani wà má nyi é manggâm dap wú sù Simûn é yhùm má nyi tô é hkûn,

<sup>7</sup> myiwe myhí rayuq gi, gyai hpaú é namngón xû bo é luq hpyû bông yu lé lô mù, Yesuq zo shuq nyi é hkûn, namngón xû haú lé, Yhâng é ulhum má hut gyun byí ri.

<sup>8</sup> Haú hkyô lé, haú chángzô pé myàng kôjáng, wú nhik-yo kômù, "Haí mù luí, haú lé aha agó kut pyâm lhê lhú?

<sup>9</sup> Xû haú lé, ahpau myo myô eq ùng pyám mù, myùng bang lé byí le ge lhê mhai!" ga taí kat akô.

<sup>10</sup> Yesuq gi, haú hkyô lé sé luí, "Haí mù, myiwe zo haú lé, i-mytit lhoq myô nyi akô lhú? Yhang gi, Ngá é ahtoq má ge é hkyô kut bê nghut ri.

<sup>11</sup> Haú myùng bang gi, nungmoq eq rahá hkâ-nhám le nyi rà nghut lhê; nghut kôlhang, Ngò gi, nungmoq eq rahá ayang nyi nyi rà sù a nghut.

<sup>12</sup> Yhang, Ngá gûng má namngón xû hut gyûn é gi, Ngá gûng lé yhum rà matú, hen lajâng é hkyô nghut ri.

<sup>13</sup> Ngò, nungmoq lé teng za taí kôlé, haú gabú danglù lé, mingkan gón hko kyô é jowò hkangmó má, yhang lé myit bûn é dông, yhang kut é hkyô shí lé, taí kyo bekô rà nghut lhê." ga taí kyo ri.

*Yesuq Lé, Yudaq Èq Ung Zô Pyâm É Hkyô*

*Mrk 14:10-11; Luk 22:3-6*

<sup>14</sup> Hau htàng, haú chángzo raxe í yuq má bo é Yudaq Iskarut ga sù gi, hkyangjong agyi pé chyáng ê mù,

<sup>15</sup> "Ngò, Yesuq lé nungmoq é loq má ap byí é nghut jáng, nungmoq, ngo lé haí byi

kó rā lhu?" ga myi ri. Haû mù, yhangmoq gi, yhang lé ngùn denggá sum xê chap ng-hap byi akô.

16 Haû hkûn mai, Yudaq gi, Yesuq lé ap pyám rā hkyô ho nyi bê nghut ri.

### *Yhumsing É Myinzang*

*Mrk 14:12-26; Luk 22:7-23; Yhn 13:21-30*

17 Múnchi a kat é Muk Zo Poî sâng-hi nyi má, haû chángzô pé gi, Yesuq chyáng lé lô kômù, "Nàng zo rā Lhoqlhai Poî zoshuq lé, ngamoq hkâmá món to rā lhu?" ga myi akô.

18 Haû mù, Yhang gi, "Myuq hkaû shut wang ló mù, byù rayuq chyáng ê luî, haû yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhûm má Lhoqlhai Poî kut rā nghut lhê.' gâ Sará taî ri nghû, ê taî keq." ga pying kat ri.

19 Haû mù, haû chángzô pé gi, Yesuq pying kat é eq rajung za ê taî kômù, Lhoqlhai Poî lé món to bekô nghut ri.

20 Myinhâng jé lô jáng, Yesuq gi, haû chángzo raxe í yuq eq rahá, zohpoq má zung tô ri.

21 Yhangmoq zô nyi bùm kô é u lé, Yesuq gi, "Ngò, nungmoq lé teng za taî kôlé, nungmoq mâ é rayuq sù gi, Ngo lé ap pyám rā nghut lhê." ga taî ri.

22 Haû hkûn, yhangmoq gi, gyai gyô yón kômù, rayuq htâng rayuq, "Yhumsing ê, ngò a nghut hkaî?" ga, Yhang lé chôm myi akô.

23 Haû hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám rā sù nghut lhê.

24 Haû Byu Yhangzo gi, Yhang eq séng luî kê tô é eq rajung za, shî rā za nghut lhê. Nghut kôlhâng, haû Byu Yhangzo lé ap pyám é sù gi, dingnyé wó ri; haû yuq gi, a hku lé le lhang, je ge ri." ga dum taî kat ri.

25 Hau htâng, Yhang lé ap pyám rā sù, Yudaq gi, "Rabai ê, ngò a nghut hkaî?" ga myi jáng, Yesuq gi, "Nàng nghut ri." ga tû taî kat ri.

26 Yhangmoq zô nyi kô é u lé, Yesuq gi, muk lé yù mù, jeju hkyá-on luî, muk lé my-hik hpé mù, "Shî gi, Ngá é gungsho nghut lhê; yù mù zo keq." ga taî uchyang, Yhâng é chángzô pé lé gàm byi ri.

27 Hau htâng, Yhang gi, góm lé le, yù mù, jeju hkyá-on luî, yhangmoq lé byi mù, taî é gi, "Nungmoq banshoq bang, shuq keq.

28 Shî gi, yubak mara hkyut pyám byi rā, byù myo myô é matú htoq pyám é, dangshikaq eq séng é Ngá sui nghut lhê.

29 Ngò, nungmoq lé taî kôlé, ahkuî mai gi, Ngò, Ngá Wâ é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq rā a nghut lo." ga taî ri.

30 Yhangmoq gi, hkyá-on mahkôn ralhûm ban hkôn jáng, Tsanlun Bùm shut htoq e ló bekô nghut ri.

### *Petruq He-ngik Rā Lé, Te Taî É Hkyô*

*Mrk 14:27-31; Luk 22:31-34; Yhn 13:36-38*

31 Hau htâng má, Yesuq gi, yhangmoq lé, "Nungmoq lhunghâng bang gi, hkû-myîn yhang jáng, Ngá é yanmai, myit lingbat kó rā nghut lhê; hkâsu mù gâ le,

'Haû sau zúng sù lé, Ngò bat sat pyám mù, sau hpúng mâ é sau pé gi, lhoq pyo pyám é hui kó rā nghut lhê.' ✧

ga kê tô ri.

32 Nghut kôlhâng, Ngò gi, lhoq dui toq é huî htâng má, Galile mau shut, nungmoq é hí má e ló lánng rā nghut lhê." gâ ri.

33 Haû hkûn, Petruq gi, "Náng é yanmai, góbang banshoq myit lingbat kôlhâng, ngò gi, hkâ-nhám le myit lingbat rā a nghut." ga tû taî ri.

34 Yesuq gi, "Ngò, nang lé teng za taî lé, hkû-myîn yhang jáng, woq a tûn shimá, nàng, Ngo lé sum dâm he-ngik pyám rā nghut lhê." ga tû taî ri.

35 Nghut kôlhâng, Petruq gi, "Ngò, Nàng eq rahá shî rā dut kôlhâng, Nang lé ngò he-ngik pyám rā a nghut." ga saî taî ri. Haû chángzô pé góbang banshoq le, haû su ga châng taî bum akô nghut ri.

### *Get-samane Gâ É Jowò Má Kyûdûng É Hkyô*

*Mrk 14:32-42; Luk 22:39-46*

36 Hau htâng má, Yesuq gi, Yhâng é chángzô pé eq rahá Get-samane gâ é jowò má ê kômù, yhangmoq lé, "Ngò, hé má é



mù, kyûdûng nyi é u lé, nungmoq shí má zùng láng keq." ga taí ri.

<sup>37</sup> Yesuq gi, Petruq eq Zebedi yhangzô nhik lé shuí chûng ri. Yhang gi, myit gyai a ngón é eq myit wui nhik hkyik dut lò bê nghut ri.

<sup>38</sup> Hau htâng, Yhang gi, yhangmoq lé, "Ngò gi, shí râ í yhang myit yón nyi ri; nungmoq gi, Ngò su machyâ luí, shí má láng nyí keq." ga taí ri.

<sup>39</sup> Yesuq gi, haú mai ratsuí zo sô ê mù, myigùng má ngóm gop to luí, "Áwa ê, wó dut é nghut le gi, góm\* shí lé, Ngá chyáng mai lhai pyám byi laq. Nghut kôlhang, Ngò ô nau é đông a nghut, Nang ô nau é đông sheq nghut sháng gaq." ga kyûdûng ri.

<sup>40</sup> Hau htâng, Yhang gi, Yhâng é chángzô pê chyáng dum taú lo le, yhangmoq yhup myhî to kô é lé lo myàng ri. Haú mù, Yhang gi, Petruq lé, "Nungmoq gi, hkyíng hkum rahkum za lhang, Ngò eq rahá a wó machya nyi kó lhu?"

<sup>41</sup> Gunlaú é a hui sháng gaq, machyâ luí, kyûdûng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

<sup>42</sup> Yhang gi, radàm dum ê mù, "Áwa ê, góm shí lé, Ngò a shuq é a wó lai râ nghut jáng gi, Nang ô nau é đông nghut sháng gaq hkoi." ga kyû dum dúng ri.

<sup>43</sup> Yhang dum taú lo le, yhangmoq gi, myoqkuq lai kô é yanmai, yhup myhî to láng kô é lé, lo dum myàng ri.

<sup>44</sup> Haú mù, Yhang gi, yhangmoq lé tô pyâm to mù, sum dâm nghû râ dàm dum ê luí, hí lé dúng é dang lé roq ê dum dúng ri.

<sup>45</sup> Haú mù, Yhang gi, haú chángzô pê chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lhu? Wú keq! Haú ahkyíng gi, jé bê nghut luí, haú Byu Yhangzo gi, yubak dap bâng é loq má ap pyâm é hui râ nghut bê.

<sup>46</sup> Toq keq! Ló losháng hkoi! Ngo lé ap pyám râ sù gi, jé lé bê nghut ri." ga taí ri.

### *Yesuq, Chyup Yú Huí É Hkyô*

*Mrk 14:43-50; Luk 22:47-53; Yhn 18:3-12*

<sup>47</sup> Yesuq, dáng nyo nyi ashí u lé, haú chángzo raxe í yuq má bo é Yudaq gi, jé lé

lo ri; haú hkyangjong agyi pé eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byù moq mó le, yhang eq rahá nghut akô.

<sup>48</sup> Yesuq lé ap pyám râ sù gi, haú bang lé, "Ngò, bopuq puq é sù gi, haú yuq nghut bê; Yhang lé chyup yú keq." ga kumlhá byí tò ri.

<sup>49</sup> Yudaq gi, Yesuq chyáng hkyê za é mù, "Rabai ê, wángzán nyi lhê lhu?" ga taí luí, Yhang lé bopuq puq byí ri.

<sup>50</sup> Haú hkûn, Yesuq gi, "Buinùm hpó ê, nàng kut râ muzó lé kut aq hkoi." ga tú taí kat ri.

Hau htâng, yhangmoq gi, hí shut huí ê luí, Yesuq lé chôm zuí zing mù, chyup yú bekô nghut ri.

<sup>51</sup> Haú mù, Yesuq eq rahá nyi bang mâ é rayuq gi, shâm she htoq yú mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

<sup>52</sup> Haú jáng, Yesuq gi, haú yuq lé, "Náng é shâm lé, xâng pyám aq; hkâsu mù gâ le, shâm shê sù gi, ó yuq nghut kôle, sham eq shí râ nghut lhê.

<sup>53</sup> Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi râ nghut é lé, nungmoq a sé kó lhu?"

<sup>54</sup> Nghut kôlhang, haú su nghut é nghut jáng, shí hkyô dut lò râ nghut lhê ga Chyúmdang pé má bò tô é hkyô gi, hkâsu wó dik lò râ lhu?" ga taí kat ri.

<sup>55</sup> Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chûng mù, lé lo akô lhu? Ngò gi, nyí wui, noqkuq yhûm má zùng mù, mhoqshit nyí kôlhang, nungmoq, Ngo lé a chyup yú kô é nghut lhê.

<sup>56</sup> Nghut kôlhang, shí su dut é hkyô pé banshoq gi, haú myiqhtoí pé kê tô é hkyô pé lo dik râ matú dut é nghut ri." ga taí ri. Haú hkûn, haú chángzô pé banshoq gi, Yesuq lé tô pyâm to kôluí, hpang byo byuq bekô nghut ri.

\* 26:39 Góm gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

*Yudaq Byìn Tú Wapdoq Má Jep Huì É Hkyô*

*Mrk 14:53-65; Luk 22:54-55, 63-71; Yhn 18:13-14, 19-24*

<sup>57</sup> Yesuq lé chyup yu é bang gi, haù tarâ sará pé eq suwún wuì zup zîng nyi é jang, hkyangjong mó Kayahpaq é yhùm má, Yhang lé shuì e akô.

<sup>58</sup> Petruq gi, hkyangjong mó é yhumwàng hkaù má châng jé wâng shoq, we we mai Yesuq htâng châng tô ri. Yhang gi, hkâsu dut lò râ lé myàng naù luì, wâng hkaù má wang ê mù, zúng bang eq rahá zung tô ri.

<sup>59</sup> Haù hkyangjong agyi pé eq Yudaq byìn tú wapdoq mâ é góbang gi, Yesuq lé sat pyám nhâng râ matú, a têng é saksé ho nyi akô.

<sup>60</sup> A têng é saksé myo myo htoq lô kôlhang, wó sat râ í é saksé a myàng kó nghut ri.

Ló htáng má, byù í yuq gi, lé lô kômù,

<sup>61</sup> "Shí yuq gi, 'Ngò gi, haù Garai Gasâng é noqkuq yhùm lé lhoq hten pyám mù, sum nyí gyoro má dum wó saì lhê,' ga taì sù nghut ri." ga taì akô.

<sup>62</sup> Haù hkûn, haù hkyangjong mó gi, toq yap mù, "Nàng, haì le a tú taì luq? Shí bang, Nang lé mara hun nyi é saksé gi, hká dông nghut lhê lhú?" ga, Yesuq lé myì ri.

<sup>63</sup> Nghut kôlhang, Yesuq gi, jít le a ga nyi tô ri.

Haù mù, hkyangjong mó gi, Yhang lé, "Haù rû dui nyi é Garai Gasâng é myìng lé lang luì, ngò, Nang lé myì wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taì kyô wú aq." ga taì jáng,

<sup>64</sup> Yesuq gi, "Nàng taì é eq rajung za nghut lhê. Ngò, nungmoq banshoq lé taì kôlé, nungmoq gi, ahkuì mai htâng hpyang má, haù Byu Yhangzo gi, a-tsam bo dik Su é loqyo hkyam má zung tô é lé le, mhuthtui jì mù, mauhkûng mai lé lo é lé le, nungmoq myàng kó râ nghut lhê." ga taì ri.

<sup>65</sup> Haù hkûn, hkyangjong mó gi, yhang é bu lé lêng cheq pyám mù, "Yhang gi, Garai Gasang lé rhoì dang taì bê nghut ri! Nga-nhúng, hai saksé râ ashì lhú? Yhang, Garai Gasang lé rhoì dang taì é lé, nungmoq, ahkuì wó gyo bekô nghut lhê.

<sup>66</sup> Nungmoq hkâsu wó myit akô lhú?" ga myi jáng, yhangmoq gi, "Yhang gi, shì gíng sù nghut lhê." ga tú taì akô nghut ri.

<sup>67</sup> Hau htâng má, yhangmoq gi, Yesuq é myoqdong má sôkan byé gyun luì, loqtsup eq htui byì akô nghut ri. Góbang gi, Yhang lé bo-pyuq pyuq byi luì,

<sup>68</sup> "Hkrisduq Nàng, Nàng lé bat sù ó yuq nghut é lé, myiqhtoi htoì wú aq." ga taì akô.

*Yesuq Lé, Petruq He-ngik Pyâm É Hkyô*  
*Mrk 14:66-72; Luk 22:56-62; Yhn 18:15-18, 25-27*

<sup>69</sup> Petruq gi, wâng hkaù má nyi tô é u lé, dui-nhâng zoshâng myhí rayuq gi, yhang chyáng lé jé mù, "Nàng le, haù Galile byù Yesuq eq rahá nyi sù nghut ri." ga taì ri.

<sup>70</sup> Nghut kôlhang, Petruq gi, haù bang banshoq é hí má yhang, "Nàng haì taì nyi é lé, ngò a sé." ga he kat ri.

<sup>71</sup> Hau htâng, yhang gi, wâng hkúmdong shut htoq e ló le, haù jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haù má é bang lé taì kat ri.

<sup>72</sup> Haù hkûn, yhang gi, "Byù haù yuq lé, ngò a sé!" ga dakam é dông he pyâm ri.

<sup>73</sup> Hau htâng razup zo má, haù jowò má yap to bang gi, Petruq chyáng huì ê kômù, "Nàng le, haù bang má bò sù yhang nghut ri; náng é danghtê lé sê gyô ri." ga taì akô.

<sup>74</sup> Haù hkûn, yhang gi, yhanggùng yhang nhing luì, "Haù yuq lé, ngò a sé." ga dakâm dang taì ri.

Haù-u yhang, woq tân bê nghut ri.

<sup>75</sup> Haù mù, Petruq gi, "Woq a tân shi má, nàng, Ngo lé sum dâm he pyám râ nghut lhê." ga, Yesuq, yhang lé taì é dang lé, myit bûn kat mù, shinggan shut htoq é luì, gyai yhang é ngau ri.

## 27

*Yudaq Juìshi É Hkyô*

*Mrk 15:1; Luk 23:1-2; Yhn 18:28-32*

<sup>1</sup> Napsûn noq le, hkyangjong agyi pé banshoq bang eq mingbyu é suwún wuì gi, Yesuq lé sat pyám nhâng râ matú chôm myit hpyit yû bekô nghut ri.

<sup>2</sup> Haû mù, yhangmoq gi, Yhang lé tuí yù luí, shuí htoq ê kômù, mauzau Pilat chyáng ê ap byí akô nghut ri.

<sup>3</sup> Yesuq lé ap pyâm é sù Yudaq gi, Yesuq lé jéyáng doqđân é hkyô lé myang sé jáng, nungngham wó mù, haû ngùn sum xê chap lé, hkyangjong agyi pé eq suwún wui chyáng ló dum taû byí ri.

<sup>4</sup> Haû mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí jáng, yhangmoq gi, "Haú hkyô, ngamoq eq haí sêng lhê lú? Haû gi, nàng eq sheq ru sêng lhê." ga lhom taí kat akô nghut ri.

<sup>5</sup> Haû mù, Yudaq gi, ngùn haú lé, noqkuq yhúmhaú má dú pyâm to luí, htoq ló mù, yhang gûng yhang ê juíshi byuq bê nghut ri.

<sup>6</sup> Haú hkyangjong agyi pé gi, ngùn chap haú pé kui yù luí, "Shí gi, sui hpau ngùn nghut lhê yanmai, alu sidek má a ge kat." ga taí akô.

<sup>7</sup> Haû mù, yhangmoq gi, tûngbàu pè é lupdùng kut rá matú, au saí zo su é maumyí lé, ngùn hau èq wui hpyit yú rá dông, chòm myit hpyit to bekô nghut ri.

<sup>8</sup> Hau é yanmai, ahkuí jé shoq, haú jowò lé, sui myigùng ga myhîng tô akô nghut ri.

<sup>9</sup> Haû gi, "Haú Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haú Yhumsîng Garai, ngo lé pying tô é eq rajung za,

<sup>10</sup> haû au saí zo su é maumyí lé, yhangmoq wui yù bekô nghut ri." ga myiqhtoí Yeremiaq taí tô é dang lo dik é nghut ri.

*Yesuq Lé, Pilat Myí Jep Wú É Hkyô*

*Mrk 15:2-15; Luk 23:3-5, 13-26; Yhn 18:33-19:16*

<sup>11</sup> Haú u lé, Yesuq gi, mauzau hpô é hí má yap tô é nghut mù, haû mauzau hpó gi, Yhang lé, "Nàng gi, Yudaq byu pè é hkohkâm nghut lhê lú?" ga myí jáng, Yesuq gi, "Nàng taí é eq rajung za nghut lhê." ga tû taí ri.

<sup>12</sup> Haû hkyangjong agyi pé eq suwún wui gi, Yhang lé, mara hûn kôjáng, Yhang gi, haí le a tû taí nghut ri.

<sup>13</sup> Haú hkûn, Pilat gi, Yhang lé, "Yhangmoq, Nang lé mara hûn saksé haû-í hkâm nyí kô é lé, Nàng a wó gyo lú?" ga saí myí ri.

<sup>14</sup> Nghut kôlhang, Yesuq gi, dang rahkun lhang a tû taí é yanmai, haú mauzau hpó gi, gyai maú byuq bê nghut ri.

<sup>15</sup> Haû Lhoqlhai Poí u lé, mingbyû wui ô nau é má cháng luí, haû mauzau hpó gi, htóng byû rayuq yuq lé nhâng byí é htông joq ri.

<sup>16</sup> Haú u lé, a gè myìng htoq é htóng byû, Barabaq ga sù rayuq nyí ri.

<sup>17</sup> Haû mù, byù moq mó zup zîng lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lú? Barabaq luq? Haú a nghut jáng, Hkrisduq gâ é Yesuq lé luq?" ga myí ri.

<sup>18</sup> Yhang haû su ga myí é gi, yhangmoq, Yesuq lé manôn kôluí, yhâng chyáng lé ap byi kô é hkyô lé sê é yanmai nghut ri.

<sup>19</sup> Pilat gi, tarâ jéyáng tingnyâng htoq má zung tô ashí hkûn, yhangmyí gi, "Haú mara a bò Sù lé, haí le hkâkut; hkâsu mù gâ le, hkû-nyí za lhang, yhupmoq má, haú yuq é yanmai, ngò tsómra hpuzô pyám bê nghut lhê." ga, yhâng chyáng dang pying kat ri.

<sup>20</sup> Nghut kôlhang, haú hkyangjong agyi pé eq suwún wui gi, Barabaq lé dúng htoq yú rá eq Yesuq lé sat pyám nhâng rá matú, shiwa byu pé lé wum byi bekô nghut ri.

<sup>21</sup> Haú mauzau hpó gi, "Shí í yuq mâ é hká yuq lé, nhâng byi nhâng nau akô lú?" ga myí jáng, yhangmoq gi, "Barabaq!" ga tû taí akô nghut ri.

<sup>22</sup> Haû mù, Pilat gi, "Haú jáng gi, Hkrisduq gâ é Yesuq lé, ngò hkâsu kut rá lú?" ga dum myí kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tû taí akô nghut ri.

<sup>23</sup> Nghut kôlhang, yhang gi, "Haí mù luí lú? Yhang gi, haí mara kut shut bê lú?" ga dum myí jáng, yhangmoq gi, htê mó èq, "Yhang lé tapzîng má jén sat pyám aq!" ga je riyhang garû lo bum akô nghut ri.

<sup>24</sup> Pilat gi, hká dông le a dat kut lô é eq byu pé gabyông lò kó rá nghut é hkyô lé myàng luí, uchyam yù mù, shiwa byu pè hí má loq chí luí, taí é gi, "Shí yuq é sui gi, ngò eq haí a séng; nungmoq eq za ru sêng lhê." gâ ri.

<sup>25</sup> Haû shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshû pè htoq má joq nyí sháng gaq." ga, dum tû taí kat akô nghut ri.

26 Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byi kat bê nghut ri.

*Yesuq Lé, Gyezô Pé Rhoi É Hkyô*  
*Mrk 15:16-21; Yhn 19:2-3*

27 Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaú má shuí wang ló kômù, Yhâng é lnhngkhyuq má, gyedap gón lé ji tsíng tô akô.

28 Yhangmoq gi, Yesuq é mebu hkyut pyám byi kôluí, zam zam ne é buhîng hut byi kômù,

29 zujanmaú ralhum saí yù kôluí, Yhâng é ulhum má tsung byi akô nghut ri. Yhangmoq gi, jâm-yang rahkat lé, Yhâng é loqyo loq má kat byi kômù, Yhâng é hí má hkyihput htuq kôluí, "Yudaq byu pé é hkohkâm hpó ê! Chyung hîng xê hîng nyi sháng gaq ô!" ga, jihpoi dang taí akô.

30 Yhangmoq gi, Yhang lé sôkan byé gyun luí, Yhâng é loq mai jâm-yang lú yù mù, Yhâng é ulhum má dum bat bat kut akô nghut ri.

31 Yhangmoq gi, Yhang lé rhoi jihkyoi ban kut yù kôjáng, Yhang wut tô é buhîng lé hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

*Yesuq Lé Jén Pyâm É Hkyô*

*Mrk 15:22-32; Luk 23:27-43; Yhn 19:17-27*

32 Yhangmoq htoq e ló nyi le, Kuruni myuq byù nghut é Simun ga sù lé myàng kômù, yhang lé, zik luí tapzîng waq nhang akô nghut ri.

33 Yhangmoq gi, Golgahta gâ é jowò má jé e ló bekô nghut ri. Golgahta gâ é lichyúm gi, ugyap joq é jowò lé gâ é nghut lhê.

34 Haú má jé jáng, yhangmoq gi, Yesuq lé, hkô jung eq nyhò tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyâm ri.

35 Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é dông gam yu pyâm byi akô.

36 Hau htâng, yhangmoq gi, haú jowò má zung to mù, Yhang lé zúng nyi akô nghut ri.

✧ 27:46 Hkya-on 22:1

37 Yhâng é u htoq má, "SHÍ YUQ GI, YU-DAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kâ tap tô akô.

38 Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri.

39 Hkyô sô lai ló é bang gi, nyhap é dông u-ngut ngut mù, taí kô é gi,

40 "Noqkuq yhûm lé hpyoq pyám luí, sum nyi gyoro má dum wó sai lhê ga Sù ê! Nàng, Garai Gasâng é Yhangzo nghut le gi, Náng gûng nàng hkyi yù luí, tapzîng mai gyó lo wú aq mhai!" ga akô nghut ri.

41 Haú eq rajung za, hkyangjong agyi pé, tarâ sará pé eq suwún wuí le, Yhang lé rhoi jihkyoi kut mù, taí kô é gi,

42 "Shí yuq gi, góbang lé hkyi yù sù nghut kôlhang, Yhânggûng yhang gi, a wó hkyi yù nghut ri myhi-nhung! Yhang gi, Israelaq byu pé é hkohkâm nghut lhê lhâ! Ngamoq wó lumjîng râ matú, Yhang, tapzîng mai gyó lo wú sháng gaq.

43 Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri." ga bum akô nghut ri.

44 Haú eq rajung za, Yhang eq rahá tapzîng má jén to huí é damyaq í yuq le, Yhang lé rhoi dang taí akô nghut ri.

*Yesuq Soqkâng Byit É Hkyô*

*Mrk 15:33-41; Luk 23:44-49; Yhn 19:28-30*

45 Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri.

46 Myinhâng sum hkyíng kô má, Yesuq gi, "Eloi, Eloi, lama sabakhtani?" ga, htê mó eq garú kat ri. Hau é lichyúm gi, "Ngá Garai é, Ngá Garai é, Nàng, hai mù, Ngo lé tô pyâm tô lhê lhú?" gâ é nghut ri.✧

47 Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga taí akô.

48 Haú hkûn jáng, yhangmoq mâ é rayuq gi, din e ló mù, wuimaú lé ê yu ri. Yhang

gi, haú lé tsibiyiq wing chyîn má jum yù luí, jàm-yang má tuí tap mù, Yesuq shuq râ matú yhun byî ri.

<sup>49</sup> Góbang gi, "Yhang lé, Eliyaq, lé hkyi yu lhê laq, nga-nhúng chôm láng wú sháng." ga taí akô nghut ri.

<sup>50</sup> Haú hkûn, Yesuq gi, htê mó èq dum garú kat luí, Yhâng é soqkâng byit bê nghut ri.

<sup>51</sup> Haú u lé, haú noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri.

<sup>52</sup> Lup pé gi, bóng lô mù, shi byuq bê é chyoiyúng bang myo myo gi, lhoq dui é hui akô.

<sup>53</sup> Haú bang gi, Yesuq dum dui toq é htâng, lup mai htoq lô kômù, chyoiyúng myuq\* má wang ê luí, byù myo myô hí má htoq shit akô nghut ri.

<sup>54</sup> Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dân kômù, "Yhang gi, gè gè yhang, Garaí Gasâng é Yhangzo nghut ri-nhung!" ga taí akô nghut ri.

<sup>55</sup> Myiwe wui myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é bang nghut akô.

<sup>56</sup> Haú bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnu pé le bo akô nghut ri.

*Yesuq Lé, Myhup Pyâm É Hkyô*

*Mrk 15:42-47; Luk 23:50-56; Yhn 19:38-42*

<sup>57</sup> Myinhtâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri.

<sup>58</sup> Yhang gi, Pilat chyáng ê mù, Yesuq é gungsôm lé ê dung jáng, Pilat gi, yhang lé byi râ matú hkunmó hkyô kat bê nghut ri.

<sup>59</sup> Yosep gi, gungsôm lé yù mù, pán yúng eq htup yup luí,

<sup>60</sup> luqgok lé kyúng tô é, yhâng é lup sik hkaú má ê kat tô ri. Hau htâng, yhang gi, luphkum má, luqlông eq lhêng chí pyâm to luí, lô byuq bê nghut ri.

\* **27:53** Chyoiyúng myuq gâ é gi, Yerusalem wà mó lé gâ é nghut lhê.

<sup>61</sup> Magadalaq wà mâ é Mariq eq goyuq Mariq gi, lup hí má zung tô akô nghut ri.

*Lup Zúng É Hkyô*

<sup>62</sup> Haú Hên Lajang Buinyi lai é htâng nyí lé, hkyangjong agyi pé eq Hparishe pé gi, Pilat chyáng ê mù,

<sup>63</sup> "Yhumsing ê, Yhang, asak dui nyi ashí hkûn, 'Sum nyí nghû râ buinyi má, Ngò dum dui toq lô râ.' ga, haú byù mhaú taí é dang lé, ngamoq bún nyi lhê.

<sup>64</sup> Haú mù, haú sum nyí nghû râ buinyi jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaú yu lô mù, Yhang shi é mai dum dui toq lô bê ga, byu pé lé taí kó râ nghut lhê. Shí, lô htâng dân mhaú é hkyô gi, sâng-hi dân htoq je wui râ nghut lhê." ga, lé taí akô nghut ri.

<sup>65</sup> Haú hkûn, Pilat gi, "Nungmoq sê é dông, lup lé haí a dut loshoq, gyezô pé lé zúng nhang to keq." ga tû taí kat ri.

<sup>66</sup> Haú mù, yhangmoq gi, ê luí, lup lé gau shoq ga, luqgok má dizik htung mù, lup zúng byù nyi to bekô nghut ri.

## 28

*Dum Dui Toq Lo É Hkyô*

*Mrk 16:1-8; Luk 24:1-12; Yhn 20:1-10*

<sup>1</sup> Bánno buinyi lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má ê wú râ ga, e lô akô.

<sup>2</sup> Haú hkûn, layàng mó nún lo ri; hkâsu mù gâ le, Yhumsing Garaí é maumang lagyo rayuq gi, mauhkûng mai gyó lé lô mù, lup má ê luí, haú luqlong lé tu lheng mù, hau ahtoq má zung tô ri.

<sup>3</sup> Yhâng é isâm gi, lhap su duqbó mù, Yhâng é mebu gi, gyo su hpyu zan tô ri.

<sup>4</sup> Zúng nyi é bang gi, yhang lé lûm wú gyuq kômù, pyik pyik nán luí, shí gùng su dut bùm bekô nghut ri.

<sup>5</sup> Haú maumang lagyo gi, myiwe haú nhik lé, "Hkâgyuq kó! Haú tapzîng má jén sat huí é Yesuq lé, nungnhik ho nyi kô é lé, ngò sê lhê.

<sup>6</sup> Yhang gi, shí má a nyì lo; Yhang taí tô é eq rajung za, lhoq dui toq é hui bê nghut ri. Yhang lé lheq é jowò lé, lé wú keq.

<sup>7</sup> Haù mù, hân taù ló luí, Yhâng é chángzô pé lé, 'Yhang, shi é mai lhoq dui toq é hui bê nghut ri; nungmoq é hí má, Galile mau shut ló láng berâ. Nungmoq, Yhang lé, haù má ló myàng kó râ nghut lhê.' nghû ló taí kyo keq. Nungnhik lé, ngò taí é lé matsîng chûng keq." ga taí kat ri.

<sup>8</sup> Haù mù luí, myiwe myhí haù nhik gi, gyuq kôlhang, gyai gabú é myit eq lup mai hân taù ló mù, Yhâng é chángzô pé lé ló taí kyo râ matú, ðin ló bê nghut ri.

<sup>9</sup> Haù hkûn, Yesuq gi, radá ðâm yhangnhik lé lhom tê mù, "Wángzán nyí kó sháng gaq." ga taí ri. Haù mù, yhangnhik gi, huí é luí, Yhâng é hkyí má po zing to mù, Yhang lé noqkuq akô.

<sup>10</sup> Haù hkûn, Yesuq gi, yhangnhik lé, "Hkâgyuq kó. Ngá é gumang wuì lé, Galile mau shut e ló keq nghû ló taí kyo keq; haù má, yhangmoq, Ngo lé myàng kó râ nghut lhê." ga taí kat ri.

### *Zúng Nyi É Gyezô Pé Taí É Danglù*

<sup>11</sup> Myiwe haù nhik hkyô má ru nghut nyi ashí le, lup zúng é gyezô pé ra-am gi, myuq hkaù má wang ló mù, dut lai lo é hkyô banshoq lé, haù hkyangjong agyi pé lé ló taí kyo akô nghut ri.

<sup>12</sup> Haù hkyangjong agyi pé gi, suwún wuì eq huí lhum luí, hpyê lhûm é htâng má, haù gyezô pé lé, ngùn myo myo tsup byi mù,

<sup>13</sup> "'Myín lé, ngamoq yhup myhí tô é hkûn, Yhâng é chángzô pé lé lô mù, mâng lé, lé hkaù yu ló bekô nghut ri.' nghû taí keq.

<sup>14</sup> Shí hkyô lé, haù mauzau hpó wó gyô é nghut jáng, yhang myit ngón shoq, ngamoq taí râ nghut lhê; haù hkûn, nungmoq gi, hai manghkáng a htoq râ nghut lhê." ga taí kat ri.

<sup>15</sup> Haù mù, gyezô pé gi, ngùn haù pé lé yù luí, yhangmoq lé taí kat é eq rajung za kut bekô nghut ri. Haù su mù, haù hkyô gi, Yudaq byu pé má taí pyo myhín ló bê nghut mù, ahkuí jé shoq taí nyi bum akô nghut ri.

### *Chángzô Pé Kut Râ Sasana Muzó*

*Mrk 16:14-18; Luk 24:36-49; Yhn 20:19-23; Lagyo 1:6-8*

<sup>16</sup> Hau htâng má, haù chángzo raxe rayuq gi, yhangmoq lé, Yesuq é nhang tô é Galile mau má é bùm shut e ló bekô nghut ri.

<sup>17</sup> Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a ðé jíng kó nghut ri.

<sup>18</sup> Hau htâng, Yesuq gi, yhangmoq chyáng lé lô mù, "Mauhkûng eq myigùng htoq má é ahkáng ayá banshoq, Ngo lé byí to bê nghut lhê.

<sup>19</sup> Haù mù, nungmoq gi, htoq é luí, byù myù chângjup lé, Ngá é chángzô pé dut nhâng mù, haù Íwa, Yhangzo, Choyiyúng Woi-nyí é myìng lang luí, wui-myhup hkám byi mù,

<sup>20</sup> nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mîngkan pyat htûm é hkûn jé shoq lhang, nungmoq eq rahá ru nghut nyí râ nghut lhê." ga pying tô ri.

## MARKUQ é Gabú Danglù Laiká (The Gospel of Mark)

*Yesuq É Matú Hkyô Htong Byî É Hkyô  
Mht 3:1-12; Luk 3:1-18; Yhn 1:19-28*

<sup>1</sup> Haû Garai Gasâng é Yhangzo, Yesuq Hkrisduq eq sêng é gabú danglù hi é hkyô gi,

<sup>2</sup> haû myiqhtoi Esai-aq laiká má: "Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê."✠

ga luí le,

<sup>3</sup> "Haû yoso má, byù rayuq garû taí é htê gi, 'Haû Yhumsing é matú, hkyô hen to keq; Yhâng é matú hkyô lhoq nyhang to keq.'"✠

ga luí le, kê tô é eq rajung za nghut lhê.

<sup>4</sup> Haû mù, Wui-myhup Sará Yohan gi, yoso hkaû má jé lé luí, wui-myhup hkâm byî nyi é eq, yubak mara hkyut pyám byî é hui râ matú myit lhîng mù, wui-myhup hkâm yù râ hkyô lé, hko kyô nyi ri.

<sup>5</sup> Haû hkûn, Yuda mau jowò hkangmó mâ é bang eq Yerusalem wà mó mâ é banshoq bang gi, yhâng chyáng htoq e bum akô. Yhangmoq gi, yhumsing é mara lé yín yû kôluí, yhâng chyáng mai Yodan làng má wui-myhup hkâm yu bum akô nghut ri.

<sup>6</sup> Yohan gi, gola-uq shomaú èq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosô byo-î pé lé zo sù nghut ri.

<sup>7</sup> Yhang taí kyô é dang gi, "Ngá htoq má wum-o a-tsam je bo é sù rayuq, ngá htâng má jé lé râ nghut lhê; ngò gi, yhâng é hkyî-tsung tui lé hpyî râ lháng a gingdán é nghut lhê.

<sup>8</sup> Ngò gi, nungmoq lé, wui èq za wui-myhup wó hkâm byî lhê; nghut kôlhang, Yhang gi, Choyiyúng Woi-nyí má nungmoq lé wui-myhup hkâm byî râ nghut lhê." gâ ri.

*Yesuq, Wui-myhup Hkâm Yu É Hkyô Eq  
Gunglaú Huí É Hkyô  
Mht 3:13-17; 4:1-11; Luk 3:21-22; 4:1-13*

✠ 1:2 Mal 3:1 ✠ 1:3 Esai 40:3

<sup>9</sup> Haû yoq má, Yesuq gi, Galile mau Nazaret wà mai lé jé mù, Yohan chyáng Yodan làng má wui-myhup hkâm yu ri.

<sup>10</sup> Yesuq gi, wui mai htoq lo é u lé, mauhkûng bóng lo é lé le, Woi-nyí gi, hpûngkyui gunghkyâng sù é dông mai, Yhang ahtoq má gyó lé lo é lé le, Yhang myang kat ri.

<sup>11</sup> Haû hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtê htoq lo ri.

<sup>12</sup> Haû hkûn jáng, Woi-nyí gi, Yhang lé yoso shut wang e ló nhang ri.

<sup>13</sup> Haû mù, Yhang gi, yoso má myi xê nyí nyi luí, Tsadán èq gunglaú é huí ri; tân jung yosô zè pé le, Yhang eq rahá nghut nyi ri; maumang lagyo pé gi, Yhang lé, lé dojaú nyi akô nghut ri.

*Sâng-hi Lhê É Chángzô Pé*

*Mht 4:12-22; Luk 4:14-15; 5:1-11*

<sup>14</sup> Yohan htóng gyó é htâng má, Yesuq gi, Galile mau má ló jé mù,

<sup>15</sup> "Ahkyíng gi, jé bê; Garai Gasâng é mingdán gi, chyâng lò bê nghut ri; myit lhîng mù, haû gabú danglù lé lumjîng keq hkoí." ga luí, Garai Gasâng é gabú danglù lé hkô kyo wún ri.

<sup>16</sup> Yesuq gi, Galile nhông yàm mai sô laí ló le, Simun eq yhanggu Andre nhiktâng, nhông má gùn dú nyí kô é lé, myang ri; haû nhik gi, ngozo kóng zo su nhik nghut akô.

<sup>17</sup> Haû mù, Yesuq gi, haû nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri.

<sup>18</sup> Haû hkûn, yhangnhik gi, radá dâm, gùn pé lé tô pyám to luí, Yhang htâng cháng bekô nghut ri.

<sup>19</sup> Yesuq gi, radun zo dum sô e ló é hkûn, Zebedi é yhangzo, Yakuq eq yhanggu Yohan nhiktâng, lhaí hkaû má gùn hpo nyi kô é lé, myang ri.

<sup>20</sup> Haû hkûn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhângwa Zebedi eq langchyâng pé lé, lhaí hkaû má nyhi pyám to kôluí, Yhang htâng cháng bekô nghut ri.

*Nat Lé, Yesuq Hkat Htoq Pyâm É Hkyô  
Luk 4:31-37*

<sup>21</sup> Yhangmoq gi, Kaperna-um wà má e akô; Bánno buinyi nyí jé jáng, Yesuq gi, tarajong má wang ê mù, mhoqshit hi ló bê nghut ri.

<sup>22</sup> Shiwa byu pé kúm gi, Yhang mhoqshit é hkyô lé mauhong bum akô; hkâsu mù gâ le, Yhang gi, tarâ sará pé eq a pung é za, ahkáng ayá wó sù rayuq su, yhangmoq lé mhoqshit é yanmai nghut ri.

<sup>23</sup> Haú u lé, agè ashop é nat wang júng é byù rayuq tarajong má bo lom nyi luí, wut garú kat é gi,

<sup>24</sup> "Nazaret wà byù Yesuq ê, ngamoq gi, Nàng eq haí sêng lhê lú? Ngamoq lé lhoq hten râ matú, Nàng jé lé é nghut lhê lú? Nàng gi, Garai Gasâng é Chyoiyúng Sù nghut é lé, ngò sê lhê." gâ ri.

<sup>25</sup> Haú hkûn, Yesuq gi, "Hkâjop, yhâng chyáng mai htoq ló aq." ga yhang lé tân kat ri.

<sup>26</sup> Haú hkûn, agè ashop é nat haú gi, byù haú yuq lé wum kat langhtân nhâng luí, hte mó eq garu uchyang htoq ló byuq bê nghut ri.

<sup>27</sup> Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang wá nghut lhê lú? Ahko ahkáng bo é dông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lháng gyo byí akô nghut ri." ga luí, taí lhùm bum akô nghut ri.

<sup>28</sup> Yesuq eq sêng é ludang gi, Galile mau jam shoq, yang é dông byo myín ló bê nghut ri.

*Byù Myo Myo Lé, Yesuq Lhoq Gê Byí É Hkyô*

*Mht 8:14-17; Luk 4:38-41*

<sup>29</sup> Yhangmoq gi, tarajong mai htoq luí, haú hkûn jáng, Yakuq eq Yohan nhik le mù, Simun eq Andre nhiktâng é yhùm má wang e ló bekô nghut ri.

<sup>30</sup> Simûn é yhâng-aumó gi, gyai yhang nò leq tô é nghut mù luí, yhangmoq gi, Yesuq lé haú yuq no é hkyô lhom taí kyô akô nghut ri.

<sup>31</sup> Haú mù luí, Yesuq gi, yhâng chyáng huí é mù, yhâng é loq má zui luí tu tsung ri;

haú hkûn jáng, nò ge byuq luí, yhang gi, yhangmoq lé gaí tso gaí huq bê nghut ri.

<sup>32</sup> Haú nyí buiwang é htâng má, byu pé gi, no é bang eq nat gang wang júng nyí é bang banshoq lé, Yesuq chyáng shuí lé lo bum akô nghut ri.

<sup>33</sup> Rawa bang, hkúmdong nàm má lé zup zing tô akô.

<sup>34</sup> Haú mù, Yesuq gi, awáng nòhpyo ajung jung huí é bang myo myo lé lhoq gê byí ri; nat gang myo myo lé le, hkat htoq pyâm ri; nghut kôhang, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

<sup>35</sup> Yesuq gi, htang napkyó mau lháng a bó shimá, toq mù, gaú é jowò ralhum má htoq é luí, kyû é dúng ri.

<sup>36</sup> Simun eq yhâng é luzúm wuí kúm gi, Yhang lé châng hô kômù,

<sup>37</sup> Yhang lé myang hô kôjáng, "Yuq hkangmó gi, Nang lé châng hkat ho nyí akô." ga luí, taí kyô akô nghut ri.

<sup>38</sup> Haú hkûn, Yesuq gi, yhangmoq lé, "Awui ayàm mâ é wà pé má le, ngò, mungdang wó hkô râ matú é sháng, hau é matú ngò lé é ru nghut lhê." ga tú taí ri.

<sup>39</sup> Haú mù luí, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyám byí wún ri.

*Manggâm Dap Sù Lé, Yesuq Lhoq Gê Byí É Hkyô*

*Mht 8:1-4; Luk 5:12-16*

<sup>40</sup> Manggâm dap é byù rayuq gi, Yesuq chyáng lé mù, hkyihput htuq luí, "Nàng dóng é nghut le gi, ngò lé Nàng wó lhoq sân-yúng byí râ nghut lhê." ga dung wut ri.

<sup>41</sup> Haú hkûn, Yesuq gi, yhang lé wú shogyo luí, loq lhâm kat mù, haú yuq lé é záng luí, "Ngò dóng lhê, sân-yúng aq hkoí." ga taí ri.

<sup>42</sup> Haú hkûn jáng, manggâm ana byuq byuq luí, yhang gi, gè bê nghut ri.

<sup>43-44</sup> Yesuq gi, "Nàng, shí hkyô ó lé le hkâtaí kyo. Nghut kôhang, náng é gungdu lé, hkyangjong hpô chyáng ló tún shit mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga ló nhông byi aq." ga,



yang lé gyai yang sidiq byi mù, radá dâm nhang kat bê nghut ri.

<sup>45</sup> Nghut kôlhang, haú yuq gi, htoq ló mù, haú hkyô lé je taí pyo myhîn ló bê nghut ri. Hau é yanmai, Yesuq gi, wà hkaú má de de a ge wang ló lo mù, shinggan mâ é chamchuyiui dut é jowò má za nyi nyi ri. Nghut kôlhang, byu pé gi, jowò hkanmó mai Yhâng chyáng ru zîng lé nyi bum ashî kó nghut ri.

## 2

### *Gùngjum Shî Sû Lé, Yesuq Lhoq Gê Byi É Hkyô*

*Mht 9:1-8; Luk 5:17-26*

<sup>1</sup> Buinyi hkâ-myháng a myáng má, Yesuq gi, Kaperna-um wà má dum wang lò jáng, Yang yhâm dum taú jé lô bê gâ é hkyô lé, byu pé wó gyô bum akô nghut ri.

<sup>2</sup> Haú mù, byù myo myo zîng lé lô kôluí, yhúmhaú má jowò a joq lô é htoq agó, hkumtot má lháng a joq lo nghut ri; Yesuq gi, yangmoq lé mungdang hko kyô nyi ri.

<sup>3</sup> Haú hkûn, byù myi yuq gi, gùngjum shî sù rayuq lé chôm dang waq luí, Yhâng chyáng lé lo akô.

<sup>4</sup> Yangmoq gi, byù lûm myô chyîn chyap to mù, byù haú yuq lé Yesuq chyáng a wó shuí jé ê kô é yanmai, Yesuq é u htoq mâ é yhumhkûng lé dong htông yù luí, gùngjum shî sù lé taphkang eq roq hkyô kat akô nghut ri.

<sup>5</sup> Yesuq gi, yangmoq é lumjîng myit lé byu-myàng jáng, gùngjum shî sù lé, "Ngá zo é, náng é yubak mara lé hkyut pyám byi bê." ga taí ri.

<sup>6</sup> Haú hkûn, tarâ sará pé ra-am gi, haú má zung to kôluí, yangmoq é i-myit unghkaú má,

<sup>7</sup> "Byù shí yuq gi, haí mù luí haú su gâ lhê laq? Yang gi, Garai Gasang lé rhoi dang taí nyi ri; Garai Gasang mai lai luí, ó yuq wá mara wó hkyut byi rá lhú?" ga luí, myit sôn wuí nyi bum akô nghut ri.

<sup>8</sup> Yesuq gi, yangmoq é unghkaú má myit wú nyi kô é hkyô lé, radá dâm Yang é myit mai sé mù, "Nungmoq é i-myit hkaú má,

haí mù haú su nghû myit sôn wuí nyi bum akô lhú?

<sup>9</sup> Haú gùngjum shî sù lé, 'Náng é yubak mara lé hkyut pyám byi bê.' nghû taí é dang eq, 'Toq aq, náng é taphkang lé yù mù, hkyô so aq.' nghû taí rá má, hká hkun je taí lui lhê lhú?

<sup>10</sup> Nghut kôlhang, haú Byu Yhangzo\* gi, mingkan htoq má, mara hkyut byi rá ahkáng wó Sû nghut é lé, nungmoq lé sé nhâng nau lhê." ga, yangmoq lé taí kat ri.

<sup>11</sup> Hau htâng, Yang gi, haú gùngjum shî sù lé, "Ngò, nang lé taí bá, toq aq, náng é taphkang lé yu chûng luí, yhâm taú ló aq hkoi." ga taí ri.

<sup>12</sup> Haú yuq gi, toq mù, yhâng é taphkang lé yu chûng luí, yangmoq banshoq bang wú tsuq tô é myoq hí mai sô htoq ló byuq bê nghut ri. Hau é yanmai, yuq hkanmó gi, mauhong bùm kômù, "Isú é hkyô gi, hkâ-nhám lháng a myàng wú shi." ga, Garai Gasang lé hkya-on kungton bum akô nghut ri.

### *Lewiq (Mahte) Lé Wut Yu É Hkyô*

*Mht 9:9-13; Luk 5:27-32*

<sup>13</sup> Yesuq gi, nhông yàm má radàm dum htoq e ri. Haú hkûn, byù moq mó gi, Yhâng chyáng jé lé lo bùm kômù, Yang gi, haú bang lé lhom mhoqshit nyi ri.

<sup>14</sup> Yang gi, sô yông ló nyi é hkûn, kang guq zúm má zung tô é, Alhpe yangzo Lewiq lé myang kat luí, "Ngá htâng cháng aq." ga taí ri. Haú hkûn, Lewiq gi, toq luí, Yang htâng cháng bê nghut ri.

<sup>15</sup> Yesuq gi, Lewiq é yhâm má myinzang é zô nyi é hkûn, kang guq bang myo myo eq yubak dap bang le, Yang eq Yhâng é chángzô pé eq rahá zo shuq bum akô. Hkâsu mù gâ le, Yang htâng châng é bang gi, ajùm ayò nghut é yanmai nghut ri.

<sup>16</sup> Tarâ sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yang gi, haí mù luí, kang guq bang eq yubak dap bang eq rahá zo shuq nyi lhê lhú?" ga myi bum akô nghut ri.

\* **2:10** Byu Yhangzo gâ é gi, Yesuq Yhânggùng yang lé le taí é nghut lhê, Mesaia lé le taí é nghut lhê.

17 Haù su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chí sará a ra kó, nõhpyo hui bang za sheq ru rá lhê. Haù eq rajung za, Ngò gi, dingmán bang lé wut yù rá matú jé lé é a nghut, yubak dap bang lé ji yù rá matú sheq jé lé é ru nghut lhê." ga taí kat ri.

*Zoshuq Gám É Eq Sêng É Hkyô*  
*Mht 9:14-17; Luk 5:33-39*

18 Yohan é chángzô pé eq Hparishe pé gi, zoshuq gám nyi akò nghut ri. Haù mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pê é chángzô pé gi, zoshuq gám akò; nghut kôhang, náng é chángzô pé gi, haí mù a gám kô é lú?" ga luí, myí akò nghut ri.

19 Haù hkûn, Yesuq tû taí é gi, "Bíng pé gi, lusik eq rahá nghut nyi tô ashí hkûn, zoshuq hkâsu wó gám rá lú? Yhangmoq gi, lusik eq rahá nghut nyi é u lé, zoshuq gám kó rá a nghut.

20 Nghut kôhang, lusik lé yhangmoq chyáng mai shuí yu pyâm é hkyíng jé rá nghut lhê; haù buinyi pé má kúm gi, yhangmoq, zoshuq gám kó rá nghut lhê.

21 Ó yuq le, mebu xau má pán sik èq a lhaq hpo wú kó; haù su kut é nghut jáng, pán sik gi, kun byuq mù, mebu xau le je lhoq cheq pyám rá nghut lhê.

22 Haù eq rajung za, tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng luí, tsibiyiq wing eq shokuq htûng htên byuq rá nghut lhê. Haù mù, tsibiyiq wing asik gi, shokuq htûng sik má za ge kat é nghut lhê.

*Bánno Buinyi É Yhumsîng*  
*Mht 12:1-14; Luk 6:1-11*

23 Bánno buinyi ra-nyí má, Yesuq gi, Yhâng é chángzô pé eq rahá yò hkaù mai sô laí ló é hkûn, Yhâng é chángzô pé gi, kyôshi ratsuí langshap yu akò nghut ri.

24 Haù mù, Hparishe pé gi, Yesuq lé, "Wú aq, Bánno buinyi má a ge kut jung lé, haí mù, náng é chángzô pé kut nyi akò lú?" ga taí akò.

25 Haù hkûn, Yesuq gi, yhangmoq lé, "Dawiq lháng gi, yhâng htâng châng é bang

eq rahá zòmut hui luí, zoshuq rá tô é hkûn, hkâsu kut é hkyô lé, nungmoq hkâ-nhám le a nghap wú kó lú?"

26 Abiahta, hkyangjong mó kut nyi é u lé, Dawiq gi, Garai Gasâng é yhúmhkaù má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhang htâng châng é bang lé le ratsuí tsuí byi tso é nghut lhê." ga tû taí ri.

27 Hau htâng, Yhang gi, yhangmoq lé, "Bánno buinyi gi, byù é matú kut tô é nghut lhê; byù gi, Bánno buinyi é matú a nghut.

28 Haù mù, haù Byu Yhangzo gi, haù Bánno buinyi é Yhumsîng lháng nghut lhê." ga xoq taí ri.

### 3

1 Yesuq gi, tarajong má radàm dum wang e le, loq raloq ajum shi byuq é byù rayuq nyi to lánng ri.

2 Haù hkûn, haù má nyi tô é bang ra-am gi, Bánno buinyi má, Yesuq mai haù yuq lé lhoq gê byi rá lú ga, mara hún rá matú gyám wú nyi akò nghut ri.

3 Yesuq gi, haù loq jum shí sù lé, "Banshoq bâng é hí má, toq yap shit aq." ga taí kat ri.

4 Hau htâng, Yhang gi, haù má nyi tô é bang lé, "Bánno buinyi má, ge é muzó kut rá, a ge é muzó kut rá, byù asak hkyí rá eq byù sat rá hkyô pé má, hká lhum kut le sheq tará wang lhê lú?" ga myí kat jáng, yhangmoq kúm gi, jit le a ga kó nghut ri.

5 Haù mù, Yhang gi, nhik-yô nau é myit èq haù bang lé lhîng wú mù, yhangmoq myit htan é hkyô lé, wú yón luí, haù loq jum shí sù lé, "Náng é loq nyhang kat aq." ga taí kat jáng, haù yuq gi, loq nyhang kat luí, yhâng é loq gi, shoq za ge byuq bê nghut ri.

6 Hau htâng má, Hparishe pé gi, htoq ló kômù, Yesuq lé hkâsu kut wó sat pyám rá hkyô lé, Herut é byu pé eq chôm hpyê lhúm bum akò nghut ri.

*Byù Ajùm Ayò, Yesuq Htâng Cháng Kô É Hkyô*

7 Yesuq gi, Yhâng é chángzô pé eq rahá, nhông shut dum e ló le, Galile mau má é byù ajùm ayò gi, Yhang htâng châng e ló bum akò nghut ri.

8 Hau htoq agó, Yuda mau mâ é bang, Yerusalem wà mó mâ é bang, Idumia mau mâ é bang, Yodan làng hé hpoq mâ é bang, Turuq myuq eq Sidun myuq awui ayàm jé shoq mâ é bang, ajùm ayò gi, Yhang kut nyi é hkyô banshoq lé wó gyo kôjáng, Yhâng chyáng jé lé bum akô nghut ri.

9-10 Yesuq gi, byù myo myo lé lhoq gê byi é yanmai, nôhpyo hui to bang gi, Yhang lé wó záng shoq ga, chyîn chyap wang ló bum akô. Byù lùm myo luí, Yesuq gi, Yhang lé a nhê pyet pyám sháng gaq ga, Yhâng é chángzô pé lé lhai ralhum hen to nhang ri.

11 Agè ashop é nat pé gi, Yhang lé myàng hkangmó, Yhâng é hí má lêng ngop to luí, "Nàng gi, Garai Gasâng é Yhangzo nghut ri." ga luí, taí garú akô.

12 Nghut kôlhang, Yesuq gi, Yhang ó yuq nghut é hkyô lé a taí byông htoq rá matú, tân hkúm kat ri.

*Lagyo Kut Râ Byù Raxe Í Yuq Hkyin Yu É Hkyô*

*Mht 10:1-4; Luk 6:12-16*

13 Yesuq gi, bùm shut doq ló mù, Yhang ô nau é bang lé ji kat luí, haú bang gi, Yhâng chyáng jé lé lo bum akô nghut ri.

14 Haú hkûn, Yesuq gi, byù raxe í yuq lé hkyin yù luí, lagyo ayá byi ri; haú bang gi, Yhang eq rahá nyi rá matú le, mungdang hkô rá matú Yhang nhang htoq kat rá eq,

15 nat gâng pé lé hkat htoq rá ahko ahkáng wó rá matú le, nghut akô nghut ri.

16 Haú raxe í yuq gi, Simun (Yesuq mai Petruq ga myìng myhíng byi sù);

17 Zebedi é yhangzô nhiktâng Yakuq eq yhanggu Yohan (Yháng nhiktâng lé Yesuq mai Buanerga ga myìng myhíng byi ri; hau é lichyúm gi, maugum zô nhik gá é nghut lhê.);

18 Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelutuq\* dut é Simun eq,

19 Yhang lé ap pyám rá sù, Yudaq Iskarut pé nghut akô.

*Yesuq Eq Bezebulaq*

*Mht 12:22-32; Luk 11:14-23; 12:10*

20 Hau htâng, Yesuq gi, yhûm má wang ló le, byù ajùm ayò dum zìng lé lô kômù, Yhang eq Yhang é chángzô pé gi, zang zo hkyíng lháng a wó kó nghut ri.

21 Yhâng é yhumbyù wuì gi, haú hkyô lé wó gyo kôjáng, "Yhang, myit a gying lo nghut ri." ga luí, Yhang lé hung shuí yù rá matú, e akô nghut ri.

22 Yerusalem wà mó mai gyó lé lo é tarâ sará pé gi, "Shí yuq gi, Bezebulaq gâ é nat gâng pé é zau lúng sù nghut ri-nhung! Yhang gi, nat zaù é wum-o a-tsam èq za, nat gâng pé lé hkat htoq pyám é nghut ri." ga taí bum akô nghut ri.

23 Haú mù luí, Yesuq, yhangmoq lé wut yù mù, dangtú dong taí é gi, "Tsadán gi, Tsadán lé hkâsu kut wó hkat htoq rá lhú?"

24 Mingdán ralhum gi, ahkaú má byoq gâng lhûm nyi kô é nghut jáng, mingdán haú wó gíng nyi rá a nghut.

25 Yhumhtu ralhum má le, ikun byù yhangchang byoq gâng lhûm nyi é nghut le gi, yhumhtu haú wó gíng nyi rá a nghut.

26 Haú eq rajung za, Tsadán le, yhânggùng yhang lhoq hpyoq luí, gam hkoq nyi é nghut le gi, yhang wó nyi nyi rá a nghut, htûm byuq rá za nghut lhê.

27 Ó yuq nghut kôle, wum-o bò sù lé hí tui zing pyám é a nghut le gi, yhâng é yhûm má lú wâng mù, yhâng é sutzè lé wó lú yù rá a nghut: Haú yuq lé hí tuí zing pyám jáng sheq, yhâng é sutzè lé wó lú yù rá nghut lhê.

28 Ngò, nungmoq lé teng za taí kôlé, byu pé kut shut é mara banshoq eq rhoi dang taí pyám é pé lé gi, mara wó hkyut pyám byi lhê.

29 Nghut kôlhang, haú Chyoiyúng Woi-nyí lé rhoi dang taí pyám é sù gi, hkâ-nhám le, mara hkyut byi é wó hui rá a nghut; haú yuq gi, ahtum abyuq yubak wó sù nghut nyi ri." gâ ri.

30 Yhang haú su ga taí é gi, yhangmoq mai, "Yhang gi, agè ashop é nat wó sù nghut ri." ga kô é yanmai nghut ri.

*Yesuq É Yhângnu Eq Yhanggu Pé*

*Mht 12:46-50; Luk 8:19-21*

\* 3:18 Zelutuq gâ é lichyúm gi, yhumsing zui sai é hkyô má gyai yhang myit lòm shirong é sù lé gâ lhê. Haú u lé, Israelaq byu pé gi, mingdán luthkyô wó rá matú shikut nyi é hpúng bang lé, Zelutuq gâ lhê.

<sup>31</sup> Hau htâng, Yesuq é yhângnu eq yhanggu pé gi, jé lé mù, yhùm hkun má yap to kôluí, Yesuq htoq lô rá matú, byù rayuq lé wang taí nhang akô nghut ri.

<sup>32</sup> Byù ajùm ayò gi, Yhâng é lhîngkhyuq má zung tô akô; haú bang gi, Yhang lé, "Wú aq, náng nu eq nunggu pé gi, nang lé hui naú luí, shinggan má láng bum akô." ga taí kyô akô nghut ri.

<sup>33</sup> Haú hkûn, Yhang gi, "Ô pé gi, Ngá nu eq Ngá gu pé nghut akô lú?" ga myi kat ri.

<sup>34</sup> Hau htâng, Yhang gi, Yhâng é lhîngkhyuq má zung hkyuq tô é bang lé wú mù, taí é gi, "Shí bang gi, Ngá nu eq Ngá é gumang wui nghut bê!

<sup>35</sup> Garai Gasang ô nau é hkyô châng é sù ó yuq nghut kôle, Ngá gu, Ngá mang, Ngá nhá, Ngá nu chyat nghut bê." gâ ri.

## 4

### *Kyôshi Sân É Dangtú*

#### *Mht 13:1-23; Luk 8:4-15*

<sup>1</sup> Yesuq gi, nhông yàm má radàm dum mhoqshit hi ló bê nghut ri. Haú hkûn, Yhâng é lhîngkhyuq má byù moq mó lúm yán zîng lé lo bùm kô é yanmai, Yhang gi, nhông hkaú má é lhaí má wang zung tô ri; haú u lé, byù moq mó gi, nhông yàm gin-gau htoq má nyi míng bum akô nghut ri.

<sup>2</sup> Yhang gi, haú bang lé, dangtú pé dông myo myo mhoqshit byí nyi ri; Yhang mhoqshit é má,

<sup>3</sup> "Gyo wú keq! Kyô hkyó sù rayuq gi, kyôshi san râ gâ htoq e ló ri.

<sup>4</sup> Yhang, kyôshi sân kat é hkûn, ra-am gi, hkyô má gyó ang mù, nghoq pè èq lé hte zô pyám ri.

<sup>5</sup> Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq ló kôle,

<sup>6</sup> amyit a wó chin hing é nghut mù, bui htoq lô jáng, lhap kyuq pyám bê nghut ri.

<sup>7</sup> Dum ra-am gi, zugyóm hkaú má gyó ang luí, zubyap haú pé kô lò mù, wup pyám é yanmai, ashi a wó zui nghut ri.

<sup>8</sup> Nghut kôlháng, ra-am gi, myìhpún bo é jang má gyó âng é yanmai, yuq kô lò mù, ashi sum xê tú, hkyuq xê tú, rashô tú lhang, zui myô lo é nghut ri." gâ ri.

✧ 4:12 Esai 6:9-10

<sup>9</sup> Hau htâng, Yesuq dum taí é gi, "Gyo yù râ nohkyap dap sù gi, gyô yù sháng gaq." gâ ri.

<sup>10</sup> Yhang baú za nghut nyi é hkûn, haú lagyo raxe í yuq eq Yhang nàm má nyi tô é bang gi, dangtú haú eq sêng é hkyô lé, lé myí akô.

<sup>11</sup> Haú hkûn, Yhang, yhangmoq lé taí kyô é gi, "Garai Gasâng é mingdán eq sêng é sê gyo wuí é hkyô lé sé gyo râ ahko ahkáng, nungmoq lé byí to lugù nghut bê. Nghut kôlháng, góbâng é matú gi, jung hkangmó lé dangtú dông chyat taí é nghut lhê.

<sup>12</sup> Haú mù luí,  
"Yhangmoq gi, myang nyi kôlháng, a wú sé kó, gyô nyi kôlháng, a sê gyo kó; sé wú sê gyo kô é ru nghut le gi, lîng taú lò mù, mara hkyut pyám byí é hui kó râ nghut lhê!"<sup>✧</sup>  
gâ ri." ga tô ri.

<sup>13</sup> Hau htâng, Yhang, yhangmoq lé dum xoq taí é gi, "Nungmoq, dangtú shí lé a sê gyo kô é nghut le gi, gotú dangtú pé lé hkâsu kut ung sê gyo kó râ lú?"

<sup>14</sup> Yò mù zui sù san kat é kyôshi gi, mungdang nghut lhê.

<sup>15</sup> Byù ra-am gi, hkyô má gyó âng é kyôshi eq wuí akô; yhangmoq gi, mungdang lé wó gyô yu é hkûn yhang, Tsadán gi, lé mù, yhangmoq chyáng má é mungdang lé lé yù pyám byí ri.

<sup>16</sup> Ra-am gi, luqgok yò pé má gyó âng é kyôshi eq wuí akô; yhangmoq gi, mungdang lé wó gyo jáng, radá dâm gabú myit èq hap yù akô.

<sup>17</sup> Nghut kôlháng, yhangmoq gi, amyit a wó chin é yanmai, razup zo za yuq kômù, mungdang é yanmai, wúihke é eq zîng-rî é pé hui kôjáng, hân hân htak ló byuq kó râ nghut lhê.

<sup>18</sup> Dum ra-am nghut jáng, zugyóm hkaú má gyó âng é kyôshi eq wuí akô; yhangmoq gi, mungdang lé wó gyô yù kôlháng,

<sup>19</sup> shí ipyat lhê é myit wui myit hke hkyô, hkyô shuí nghoq jung ngùn hîng zèhkoq eq gotú zè pé lé ô nau é hkyô pé, yhangmoq chyáng wang lò jáng, haú mungdang lé hup pyám é yanmai, ashi a wó zui dut kó râ nghut lhê.

20 Ra-am kúm gi, myìhpún bo é jang má gyô âng é kyôshi eq wuí akô; yhangmoq gi, haû mungdang lé gyô yù mù, lhóm yù luí, sân kat é htoq sum xê tú, hkyuq xê tú, rashô tú lhang myo shoq ashi zuí lò kó râ nghut lhê." gâ ri.

*Myibung Htûn É Hkyô*

*Luk 8:16-18*

21 Yesuq, yhangmoq lé xoq taí é gi, "Nungmoq gi, myibung lé yù mù, tsung-jang má a tsung e za, mûng èq nghop tô é, a nghut jáng, yhupchong ô má tsung tô é, ó yuq wá kut wú akô lúhú?

22 Hkâsu mù gâ le, haq tô é zè haí jung le htoq ze lò râ eq, zaú tô é pé haí jung le byông htoq lô râ nghut lhê.

23 Gyô yù râ nohkyap dap sù ó yuq nghut kôle, gyô yù sháng gaq." gâ ri.

24 Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keq; nungmoq lik byí é bung èq, nungmoq lé dum lik byí râ nghut lhê; hau htoq lhang myo shoq wó kó râ nghut lhê.

25 Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhang yu pyám byi shirâ nghut lhê." gâ ri.

*Kyôshi Yuq Kô Lo É Dangtú*

26 Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri.

27 Byù haú yuq gi, myín lé yhup tô é nghut nghut, nyí lé toq lo é nghut nghut, kyôshi gi, zuí htoq lô mù, yuq kô lo nyi ri; nghut kôhang, yhang gi, hkâsu kut yuq lo nyi é hkyô lé a sé nghut ri.

28 Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù luí, ashi zui shoq kut é nghut lhê.

29 Kyôshi myhíng jáng, kyô shu yoq jé bê nghut é yanmai, yhang gi, zaiyik èq yâm yù râ nghut lhê." gâ ri.

*Angshi Cham Lé Dangtú Yu É Hkyô*

*Mht 13:31-32; Luk 13:18-19*

30 Yesuq dum xoq taí é gi, "Garai Gasâng é mingdán lé, hai èq lhoq whuí wú râ lúhú? Haí jung dangtú yù mù, shit wú râ lúhú?

31 Garai Gasâng é mingdán gi, angshi cham eq wuí ri. Angshi cham haú gi, myigùng má hô é kyômyui jí pé má je tiq é nghut lhê.

32 Nghut kôhang, ho mù, yuq kô lô jáng, xun hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq kô lò luí, hau é buishúm hkaú má, maulat nghoq zô pé lé wó zung nô nyi é nghut lhê." gâ ri.

33 Haú sù é dangtú myo myo dông mai, Yesuq gi, yhangmoq wó sê gyô é myhó, mungdang hko kyô nyi ri.

34 Yhang gi, yhangmoq lé, dangtú a bo é haí lhang a taí wú nghut ri; nghut kôhang, Yhang eq chángzô pé baú nghut nyi é hkùn kúm gi, jung hkangmó é lichyúm lé taí sân kyô ri.

*Laidun Mó Lé, Yesuq Lhoq Zim Pyâm É Hkyô*

*Mht 8:23-27; Luk 8:22-25*

35 Haú nyí, myinhtâng lé, Yesuq gi, Yhâng é chángzô pé lé, "Nga-nhúng nhông hé hpoq shut dap e ló sháng." ga taí ri.

36 Haú hkùn, chángzô pé gi, byù moq mó lé nyhi pyâm to luí, Yhang zung tô é lhaí mai yhang, Yhang lé shuí gû dap ló bekô; gotû lhaí pé le, yhangmoq eq rahá bo gû dap ló akô nghut ri.

37 Haú u lé, laidun mó jé lô mù, wuìlhêng hta toq lô luí, lhaí má lo bat hâng é yanmai, wuì byíng lô bê nghut ri.

38 Haú hkùn, Yesuq gi, lhaí htâng má uhkuq hkuq mù yhup myhí tô ri; haú chángzô pé gi, Yhang lé nhaú pun luí "Sarâ ê, nga-nhúng myup shi ló râ dut é lé, nàng a chiq byi lúhú?" ga taí akô nghut ri.

39 Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haú laidun num ló byuq luí, banshoq zim byuq bê nghut ri.

40 Hau htâng, Yhang gi, Yhâng é chángzô pé lé, "Haí mù, haú-í gyuq bum akô lúhú? Nungmoq gi, lumjíng myit a bò shi kó lúhú?" ga taí ri.

41 Yhangmoq gi, gyai yhang gyuq dan bùm kômù, "Shí yuq gi, hkasú é byù nghut lhê là? Lài eq wuìlhêng pé lhang gi, Yhâng

é dang lé gyo byi ri-nhung!" ga lui, rayuq eq rayuq myi lhum bum akô nghut ri.

## 5

### *Nat Gang Hkat Htoq Pyâm É Hkyô*

*Mht 8:28-34; Luk 8:26-39*

<sup>1</sup> Yhangmoq gi, nhông hé hpoq mâ é Gerase byu pê é mau má jé dap e ló akô.

<sup>2</sup> Yesuq lhai mai htoq ló é hkun, agè ashop é nat wang júng é byù rayuq gi, lupdùng mai htoq lé lô mù, Yhang lé lhom hui ri.

<sup>3</sup> Haú yuq gi, lupdùng má za nyi é sù nghut ri; yhang lé, ó yuq eq le, shamtoq-tui eq lhang a wó tui zing wú kó nghut ri.

<sup>4</sup> Hkâsu mù gâ le, adàm dàm, yhang é loq eq hkyi má shamtoq-tui eq tui tô wú kôlhang, yhang gi, loq mâ é shamtoq-tui pé lé lhang hpyit pyám pyám kut mù, hkyi má é shamtoq kyum lé lhoq hkyop pyám pyám kut ri. Yhang lé, ó yuq eq le a wó hkuq yù kó nghut ri.

<sup>5</sup> Yhang gi, nyi myin aga lupdùng eq bùm pé má puk garu uchyang, yhumsing gùng lé luqgok eq dùn cheq wun ri.

<sup>6</sup> Yhang gi, Yesuq lé, we mai myang kat jáng, din e ló mù, Yhang é hí má hkyihput htug ngop lui,

<sup>7</sup> htê mó eq, "Myhang htang é Garaí Yhangzo Yesuq ê! Nang gi, ngò eq hai sêng lhê lhu? Nang gi, ngo lé a zing-ri râ matú, Garaí Gasang hí má danggidiq byi laq." ga tai garu ri.

<sup>8</sup> Hai mù gâ le, Yesuq gi, yhang lé, "Agè ashop é nat nang ê, byù shí yuq chyáng mai htoq ló aq." ga tai kat é yanmai nghut ri.

<sup>9</sup> Hau htang, Yesuq gi, "Nang mying hai gâ lhê?" ga, yhang lé myi jáng, yhang gi, "Ngamoq gi, myo myo nghut é yanmai, Legio gâ lhê." ga tui tai ri.

<sup>10</sup> Hau htang, yhang gi, haú jowò mai yhangmoq lé a kôn pyám râ matú, Yesuq lé dum dung dung kut nyi ri.

<sup>11</sup> Haú u lé, waq rajum mó gi, bùm yàm má dù but zô nyi bum akô nghut ri.

<sup>12</sup> Haú mù lui, nat gang pé gi, "Ngamoq lé, waq pê chyáng nhang kat lui, yhangmoq chyáng wàng nhang laq." ga lui, Yesuq lé dung akô.

<sup>13</sup> Haú hkun, Yesuq gi, yhangmoq lé ahkang byi kat jáng, haú agè ashop é nat pé gi, haú yuq chyáng mai htoq ló kôlui, waq pê chyáng wang ló byuq bekô nghut ri. Haú mù, haú i hkying kô bo é waq hpung gi, gampyoq mai nhông hkaú shut rut din yán wang ló kôlui, myup shi byuq bekô nghut ri.

<sup>14</sup> Waq zung bang gi, hpanq din wang ló kômù, myuq hkaú mâ é bang eq awui ayàm mâ é bang lé, haú hkyô ló shit kyo kô é yanmai, byù haú bang gi, dut lai lò bê hkyô lé, ê htoq wú akô nghut ri.

<sup>15</sup> Yhangmoq gi, Yesuq chyáng jé lé kô é hkun, nat gang myo myo wang júng wú é sù, mebu wut lui, byù gè rayuq su zung to lóng é lé myang kômù, gyuq dan bùm bekô nghut ri.

<sup>16</sup> Haú hkyô lé myang é bang gi, nat gang pé wang júng sù eq waq pê chyáng hkâsu dut é hkyô, góbang lé tai kyo akô nghut ri.

<sup>17</sup> Hau htang, byu pé gi, Yesuq lé yhangmoq é mau mai htoq ló byuq râ matú, chom dung tongbán akô nghut ri.

<sup>18</sup> Yesuq lhai hkaú má wang ló é u lé, haú nat gang pé wang júng lai lò bê sù gi, Yesuq htang chang râ matú, Yesuq lé dung tongbán ri.

<sup>19</sup> Nghut kôlhang, Yesuq gi, yhang lé ahkang a byi e za, "Nang, yhum shut sheq ló mù, haú Yhumsing, nang lé hkâ-i kut byi bê hkyô eq hkâsu kut shogyo nhikmyin yu é hkyô lé, nang é yhumbyù buinùm ji-myi wui lé ló tai kyo aq." ga tai kat ri.

<sup>20</sup> Haú mù, byù haú yuq gi, ló lui, yhang lé Yesuq hkâ-i kut byi bê hkyô lé, Dekapoli\* mau bang lé ló tai kyô ri. Haú hkun, wó gyô é bang banshoq gi, mauhong bum akô nghut ri.

### *Shi Byuq Bê Myiwe Zo Eq No É Myiwe Myhi Rayuq É Hkyô*

*Mht 9:18-26; Luk 8:40-56*

<sup>21</sup> Yesuq gi, lhai ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajum ayò gi, Yhang é lhinghkyuq má lé zing bum akô nghut ri;

<sup>22</sup> haú hkun, Ya-irug gâ é, tarajong má up bang mâ é rayuq gi, haú má lé lui, Yesuq lé

\* 5:20 Dekapoli gâ é gi, Grik đông myuq raxê lé gâ lhê.

myang kat jáng, Yhâng é hkyî wang má pai gop to mù,

<sup>23</sup> "Ngá zo byizo gi, kâng byit ló nyi ri; yhang ge lò mù asak dum duì shi sháng gaq, nàng lé mù, yhâng é ahtoq má loq lé ke byi laq." ga, wum kat dúng tôngbán nyi ri.

<sup>24</sup> Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayàm má châng chyîn chyap wún bum akô.

<sup>25</sup> Haú hkûn, raxe í zân suí yui nyi é myiwe myhí rayuq le haú hpúng má bo tô ri.

<sup>26</sup> Yhang gi, chi sará myo myô pê chyáng yhang wó é ngunzè banshoq lhoq pán mù, nò hkâm luí yâ wú kôlhang, ge é hkyô a joq é htoq agó, je lhang wuîhke lò ri.

<sup>27</sup> Yhang gi, Yesuq é hkyô lé wó gyo jáng, byù hpúng mai Yesuq é nunghtáng má huí lé mù, Yhâng é bu má ê záng kat ri.

<sup>28</sup> Haí mù luí gâ le, yhang gi, "Ngò, Yhang é bu má za lhang ê wó záng é nghut le gi, ge byuq râ nghut lhê." ga wó myit é yanmai, haú su kut é nghut ri.

<sup>29</sup> Haú hkûn jáng, yhâng chyáng suí yui é kân byuq luí, yhang gi, hpuzô nyi é mai wó lut bê hkyô lé, yhânggùng má sê gyô kat bê nghut ri.

<sup>30</sup> Yesuq gi, Yhâng é gùng mai hpungwup a-tsam htoq ló é lé, radá dâm châng sê kat luí, byù moq mó shut lhing wú mù, "Ngá é bu má ó yuq záng bê lhú?" ga myi kat ri.

<sup>31</sup> Haú hkûn, Yhâng é chángzô pé gi, "Náng é lhingkyuq má byù ajùm ayò chyîn chyap nyi é lé, myang to luí nhîng, 'Ngo lé, ó yuq záng bê lhú?' nghû myi lhê lhú?" ga tú taí kat akô.

<sup>32</sup> Nghut kôlhang, Yesuq gi, Yhang lé lé záng sù lé myàng râ matú, ho lhing wú nyi ashî nghut ri.

<sup>33</sup> Haú hkûn, myiwe myhí haú gi, yhâng chyáng hkâsu dut laí lò bê hkyô lé sê é yanmai, Yesuq é hí má lé mù, gyuq nán é eq Yhang é hkyî wang má ngóm gop to luí, yhâng chyáng dut laí lò bê hkyô banshoq lé taí kyô ri.

<sup>34</sup> Haú mù, Yesuq gi, myiwe myhí haú lé, "Byizo ê, náng é lumjîng myit gi, nàng lé lhoq gê byi bê nghut ri; náng é nòhpyo ge byuq bê nghut ri; ngón za ló aq hko!" ga taí ri.

<sup>35</sup> Yesuq gi, dang ru taí nyi ashî hkûn, tarajong má up sù Ya-iruoq é yhûm mai byù ra-am jé lé mù, "Nang é byizo gi, shi byuq bê; haí mù luí, haú sará lé lhoq hkyik nyi lhê lhú?" ga luí, lé taí kat akô.

<sup>36</sup> Yesuq gi, haú bang taí é dang lé gyô lhaí pyám mù, "Hkâgyuq, za lumjîng aq." ga, haú tarajong má up sù lé taí kat ri.

<sup>37</sup> Hau htâng, Yhang gi, Petruq, Yakuq eq Yakuq é yhanggu Yohan pé mai lai luí, ó yuq lé le, Yhang htâng a cháng nhâng nghut ri.

<sup>38</sup> Yhangmoq, haú tarajong má up sù é yhûm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri.

<sup>39</sup> Yhang gi, yhúmhaú shut wang ló mù, haú bang lé, "Haí mù, yón ngau gabyông nyi bum akô lhú? Haú zoshâng gi, shi byuq é a nghut, yhup myhí tô é sheq ru nghut lhê." ga taí ri.

<sup>40</sup> Nghut kôlhang, yhangmoq gi, Yhang lé wuizui kut pyám byí akô.

Yhang kúm gi, haú bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui luí, zoshâng lé lhez tô é gok má wang e akô nghut ri.

<sup>41</sup> Yesuq gi, myiwe zo hau é loq má zuí to mù, "Talihta ku-mi" (haú é lichyúm gi, "Myiwe zo ê, ngò, nang lé taí bá, toq aq." gâ é nghut lhê.) ga taí ri.

<sup>42</sup> Myiwe zo haú gi, haú hkûn jáng, toq luí, sô wún ri (yhang gi, asak raxe í zân bò bê sù nghut ri.). Yhangmoq gi, haú sù dut é hkyô lé gyai yhang maú byuq bùm bekô nghut ri.

<sup>43</sup> Yhang gi, haú hkyô ó lé le a sé nhâng râ matú, yhangmoq lé taí hkúm kat luí, myiwe zo haú lé, zô jung byi tso râ matú le, yhangmoq lé taí ri.

## 6

*Yhumsing Wà Má Myoqdong A Wó É Hkyô*

*Mht 13:53-58; Luk 4:16-30*

<sup>1</sup> Yesuq gi, haú jowò mai htoq e ló mù, Yhâng é yhum mau shut taú ló ri; Yhâng é chángzô pé le, Yhang eq rahá bo châng ló akô nghut ri.

<sup>2</sup> Bánno buinyì jé jáng, Yhang gi, tarajong má mhoqshit hi ló ri; wó gyô é bang myo myo gi, gyô maú byuq kôluí, "Byù shí yuq gi, haú pé lé hkámá mhoq yu é lhà? Yhang wó yu é hpaqchyî byéng-yá gi, hkasû é wá nghut mù luí, laklaí kumlhá lé lhang kut lhê laq?"

<sup>3</sup> Shí yuq gi, Mariq é yhangzo, laksíma hpó nghut lhê, a nghut lhú? Yhang gi, Yakuq, Yose, Yudaq, Simun pé é yhang-mang nghut lhê, a nghut lhú? Yhâng nhammó pé le, nga-nhúng eq rahá nghut nyi lhê, a nghut kó lhú?" ga luí, Yhang lé myit a ngón dut bùm bekô nghut ri.

<sup>4</sup> Yesuq, yhangmoq lé taí é gi, "Myiqhtoi rayuq gi, yhumsing é yhum mau, yhâng é buinùm ji-myi wuè eq yhumsing é yhùm má za, myoqdong a lhaq wó wú é nghut lhê." gâ ri.

<sup>5</sup> Yhang gi, nò byù ra-am lé loq ke byi mù, lhoq gê byí é mai lai luí, gotû laklaí kumlhá haí le, haú má a wó kut shit nghut ri.

<sup>6</sup> Haú mù, Yesuq gi, yhangmoq lumjíng myit a bò kô é hkyô lé, maú nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

### *Lagyo Raxe Í Yuq Lé Nhang Htoq Kat É Hkyô*

*Mht 10:5-15; Luk 9:1-6*

<sup>7</sup> Yesuq gi, haú lagyo raxe í yuq lé wut yù mù, agè ashop é nat pé lé ûng râ a-tsam byi luí, í yuq yuq kut nhang htoq kat ri.

<sup>8</sup> Yhang, yhangmoq lé châng pying kat é dang gi, "Hkyowui é matú má, dumbáng mai lai luí, zoshuq le, etap le, ngùn le, gotû haí le, hkâyü chûng kó;

<sup>9</sup> hkyî-tsung kúm gi, tsûng chûng keq; nghut kôhang, bu í dung hkâwut chûng kó.

<sup>10</sup> Hká má nghut kôhang, rayhùm yhùm má nungmoq wang bíng kô é nghut le gi, haú wâ mai dum htoq ló é buinyì jé shoq, haú yhùm má za nyi nyi keq.

<sup>11</sup> Jowò rawò wò má é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyâm to mù, haú jowò mai htoq ló keq." gâ ri.

<sup>12</sup> Haú mù, yhangmoq gi, htoq e ló luí, myit lhîng râ é hkyô, byu pé lé hkô kyô akô.

<sup>13</sup> Hau htoq agó, yhangmoq gi, nat gâng pé myo myo lé hkat htoq pyám byi mù, no é bang myo myo lé le xû but byi luí, lhoq ge byí akô nghut ri.

### *Yohan, Ulhum Hpyit Huí é Hkyô*

*Mht 4:1-12; Luk 9:7-9*

<sup>14</sup> Yesuq é myìng hû lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, haú shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam haú pé lé wó kut é nghut ri." ga luí, taí bum akô nghut ri.

<sup>15</sup> Ra-am gi, "Yhang gi, Eliyaq nghut ri." ga taí akô nghut ri.

Dum, ra-am taí kô é gi, "Yhang gi, hí hpyang lhê é myiqhtoi pé su, myiqhtoi rayuq nghut ri." gâ ri.

<sup>16</sup> Herut kúm gi, haú lé wó gyo jáng, "Ngò, ulhum hpyit pyám byí é Yohan gi, shi é mai dum dui toq bu-nhung!" ga taí ri.

<sup>17</sup> Herut gi, yhanggu Hpilip é yhangmyi Herudiaq lé hâng yu pyâm é hkyô é yanmai, Yohan lé chyup tuí yù nhâng mù, htóng hkyô pyám nhang wú é sù nghut lhê.

<sup>18</sup> Hkâsu mù gâ le, Yohan gi, Herut lé, "Nàng, nunggu é yhangmyi lé hâng yu é gi, tarâ a wang é nghut lhê." ga luí, taí byí nyi é yanmai nghut ri.

<sup>19</sup> Haú mù, Herudiaq gi, Yohan lé gyai a jú dut byuq luí, sat pyám naú kôhang, a wó sat dut nyi ri.

<sup>20</sup> Haí mù gâ le, Herut gi, Yohan, dingmán chyoiyúng é sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhúng nhâng byuq kôhang, yhang taí é dang pé lé ru gyô nau nyi ashí nghut ri.

<sup>21</sup> Nghut kôhang, Herut gi, yhâng é hkû ladu hkyúm buinyì má, byù mó pé, gyezau pé, Galile mau suwún wui pé lé, ji yù mù zoshuq poí mó kut é yanmai, haú nyí gi, Herudiaq é matú, buinyì gè dut bê nghut ri.

<sup>22</sup> Herudiaq é yhangzo byizo gi, wang lé lô mù, gó shit é hkûn, Herut eq yhâng é bíng pé gi, myit ngón bum akô nghut ri.



Haû mù, hkohkâm gi, myiwe zo haû lé, "Nàng ô nau é haî nghut kôle, dung aq, ngò nàng lé byi râ nghut lhê." ga, dakam é danggidiq byi ri.

<sup>23</sup> Hau htoq agó, yhang gi, myiwe zo haû lé, "Nàng dung é haî nghut kôle, ngò byi râ; ngá é mîngdán rawuí gû lhang, byi râ nghut lhê." ga, dakam é danggidiq byi ri.

<sup>24</sup> Haú hkûn, myiwe zo haû gi, htoq lô mù, yhang nu lé, "Haî dúng le gè râ laq?" ga myi jáng, yhangnu gi, "Wui-myhup Sará Yohan é ulhum dung aq." ga tû taî kat ri.

<sup>25</sup> Myiwe zo haû gi, radá dâm hân hân wang lô mù, hkohkâm lé, "Ahkuî yhang, Wui-myhup Sará Yohan é ulhum lé, bó má kat mù byi laq." ga, dúng tôngbán ri.

<sup>26</sup> Haû su ga jáng, hkohkâm gi, myit gyai yhang a ngón dut byuq kôlhang, yhang dakam tô é danggidiq é yanmai le, bíng pè é myoqdong lé tê nau é yanmai le, myiwe zo haû taî é dang lé a kâm he pyám lo nghut ri.

<sup>27</sup> Haû mù, hkohkâm gi, zúng é gyezo rayuq lé, Yohan é ulhum é hpyit lô râ matú, radá dâm hkunmó hkyó mù nhang kat ri. Haû mù, haú yuq gi, htóng hkaû má é luí, Yohan é ulhum lé, é hpyit mù,

<sup>28</sup> bó má kat luí, myiwe zo haú lé lo byi ri; myiwe zo haû gi, ulhum haû lé, yhangnú chyáng yu lô byi ri.

<sup>29</sup> Yohan é chángzô pé gi, haú hkyô lé wó gyo kôjáng, yhang é mâng lé lé yû luí, lup má lô myhup pyám bekô nghut ri.

*Byù Ngo Hkyîng Lé Byi Tsô É Hkyô*

*Mht 14:13-21; Luk 9:10-17; Yhn 6:1-14*

<sup>30</sup> Lagyo pé gi, Yesuq chyáng dum jé zîng lò kômù, yhangmoq kut lai lo é hkyô pé eq mhoqshit bê hkyô pé banshoq, Yhang lé taî kyô akô nghut ri.

<sup>31</sup> Hau htâng, byù myo myo gi, yhangmoq chyáng htoq htoq wàng wàng kut nyi kô é yanmai, yhangmoq gi, zang zo ahkyîng lhang a wó kó nghut ri. Haû mù, Yesuq gi, chángzô pé lé, "Nga-nhúng, tsím tsâm é jowò ralhum má é mù, é nô yù sháng." ga taî ri.

<sup>32</sup> Haû mù, yhangmoq gi, yhangmoq baú lhaî racham má ji mù, tsím tsâm é jowò shut e lô akô nghut ri.

<sup>33</sup> Nghut kôlhang, yhangmoq e lô é lé châng myang é bang myo myo gi, yhangmoq lé wú sé kôluí, wà hkanmó mai hkyî hkyô châng din é kômù, yhangmoq é hí má jé to láng akô nghut ri.

<sup>34</sup> Yesuq gi, lhaî mai gyó dap lô é hkûn, byù moq mó nyi to láng lé myàng jáng, yhangmoq gi, zúng sù a nyi é sau pé su dut kô é yanmai, yhangmoq lé wú shogyo luí, myo myo mhoqshit byi hi lô bê nghut ri.

<sup>35</sup> Buì gyum lô yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsâm é jowò nghut é htoq agó, buì le gyum lô bê;

<sup>36</sup> yhangmoq gi, awui ayàm mâ é yhùm pé eq wà pé má, zoshuq lô ho wui zo kó sháng gaq, yhangmoq lé lô nhâng aq hkoî." ga taî akô nghut ri.

<sup>37</sup> Haú hkûn, Yhang gi, "Nungmoq, yhangmoq lé rajung jung byi tso keq." ga tû taî jáng, yhangmoq gi, "Shí myhó é bang zo râ matú, ngamoq gi, ê luí, denari\* í sho èq muk é wui byi ra râ luq?" ga dum taù myi akô nghut ri.

<sup>38</sup> Nghut kôlhang, Yhang gi, "Nungmoq chyáng muk hkâ-myhó wó akô? Ê wú wú keq." ga myi ri. Haû mù, yhangmoq gi, myang hô jáng, "Muk ngo long eq ngozo í du wó lhê." ga, dum tû taî akô nghut ri.

<sup>39</sup> Hau htâng, Yesuq gi, banshoq bang lé ahpúng hpúng kut wàhu yò má zúng nhâng râ matú, Yhang é chángzô pé lé taî kat ri.

<sup>40</sup> Haû mù, shiwa byu pé gi, rashô shô kut le, ngo xê xê kut le, ahpúng hpúng zung tô bùm bekô nghut ri.

<sup>41</sup> Yesuq gi, haû muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi râ matú, Yhang é chángzô pé lé byi ri. Ngozo í du lé le, Yhang yù mù, banshoq bang lé gàm byi ri.

<sup>42</sup> Yhangmoq banshoq bang gi, zô gyí bùm bekô nghut ri.

<sup>43</sup> Hau htâng, haú chángzô pé gi, zô myhit tô é muk eq ngozo lé, raxe í mung byíng shoq wó guq tsîng yu ashî kó nghut ri.

\* **6:37** Denari rachap gi, byù rayuq é ra-nyí lhê é zuihpau eq wui ri.

<sup>44</sup> Haú hkûn, zô é bang gi, yuqgè wuì baú lhang, byù du ngo hkyîng nghut ri.

*Yesuq, Wuì Htoq Má Sô É Hkyô*  
*Mht 14:22-33; Yhn 6:15-21*

<sup>45</sup> Yesuq gi, haú shiwa byu pé lé byo ló nhang nyi é hkûn jáng, Yhâng é chángzô pé lé lhai má wang ji nhâng mù, tû tap mâ é Bet-saida wà mó shut dap ló lhang nhang ri.

<sup>46</sup> Yhangmoq lé shi-kyâm kat é htâng, Yhang gi, kyûdung râ ga, Yhang baú bùm shut doq e ló bê nghut ri.

<sup>47</sup> Buigyum htâng, lhai gi, nhông gùng má jé tô é u lé, Yesuq gi, Yhang baú za myì htoq má nyi tô ashî nghut ri.

<sup>48</sup> Lài tau mut é yanmai, haú chángzô pé gi, lhai lhu wuîhkê nyi kô é lé, Yesuq myang ri. Napsûn maubó zó sum hkyîng eq hkyuq hkyîng gyoro má, Yesuq gi, nhông htoq má so mù, yhangmoq shut e ló luî, yhangmoq é nàm mai lai ló râ dâ ri.

<sup>49</sup> Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garû bum akô nghut ri.

<sup>50</sup> Hkâsu mù gà le, yhangmoq banshoq bang gi, Yhang lé myàng kôluî, gyuq dàn kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, "Hkâgyuq kó. Ngò ru nghut lhê; zim za nyi keq." gà ri.

<sup>51</sup> Hau htâng, Yhang gi, lhai htoq má yhangmoq eq rahá ê doq ji jáng, lai gi, zim byuq bê nghut ri; haú mù, yhangmoq gi, gyai yhang mauhong byuq bùm bekô nghut ri.

<sup>52</sup> Hkâsu mù gà lé, yhangmoq gi, muk gam é laklai kumlhá eq séng luî a sê gyo kô é htoq agó, myitbun a bóng kô é yanmai nghut ri.

<sup>53</sup> Yhangmoq gi, gû dap ló kômù, Gene-sarat mau má jé wang lò jáng, lhai lé haú má ló shap tô akô nghut ri.

<sup>54</sup> Yhangmoq lhai mai gyó é hkûn jáng, byu pé gi, Yesuq lé lhom wú sê akô nghut ri.

<sup>55</sup> Haú mù, yhangmoq gi, haú mau ramau gón má din jón mù, nò bang lé taphkang mai waq luî, Yesuq nyi rí gà é

jowò hkanmó má, shuî lé lo bum akô nghut ri.

<sup>56</sup> Yesuq jé é wà hkanmó, myuq hkanmó, awui ayâm mâ é wà hkanmó pé má, yhangmoq gi, nò byù lé gai pé má lé lheq to kôluî, Yhâng é bushi htâng má za lhang, haú bang lé byi záng nhâng râ matú, Yhang lé dúng tôngbán akô. Yhang lé záng é lhunglhang bang gi, lhoq gê byi é huì akô nghut ri.

## 7

*A Sanséng Dut Nhang É Hkyô Pé*  
*Mht 15:1-20*

<sup>1</sup> Haú Hparishe pé eq tarâ sará pé ram gi, Yerusalem wà mó mai jé lé lô kômù, Yesuq é nàm má lé zup zîng bum akô.

<sup>2</sup> Haú hkûn, Yhâng é chángzô pé ram gi, htungli dông a châ pyâm é, a sanséng é loq eq zo shuq nyi kô é lé, yhangmoq myang akô nghut ri.

<sup>3</sup> (Hparishe pé eq Yudaq byù banshoq bang gi, yhangmoq é îchyí îwâ pê é htungli lé châng é bang nghut lhê mù luî, loq hí a châ é gi, hai le a zô wú kó nghut ri.

<sup>4</sup> Yhangmoq gi, gai pé mai taû lò jáng le, gùng hí a châ pyâm é, zojung a zo kó nghut é htoq agó, góm pé, hkoq pé, gyi chôkon pé lé châ é htungli gotû pé lé le, châng akô nghut ri.)

<sup>5</sup> Haú mù, Hparishe pé eq tarâ sará pé gi, Yesuq lé, "Náng é chángzô pé gi, hai mù luî, îchyí îwâ pê é htungli lé a châng e za, a sanséng é loq eq zo shuq nyi akô lhu?" ga myì akô.

<sup>6</sup> Haú hkûn, Yesuq gi, yhangmoq lé, "Gegùn labyoq kut bang ê, nungmoq eq séng luî myiqhtoi Esai-aq htoî tô é dang má, 'Byù shí bang gi, nhut htoq mai za Ngo lé hkunggâ akô; yhangmoq é myit nhiklum gi, Ngò eq wê gâng nyi akô.

<sup>7</sup> Yhangmoq gi, akôm má za, Ngo lé noqkuq nyi akô; hkâsu mù gà le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri. ✧ ga kê tô é gi, têng ri.

8 Nungmoq gi, Garai Gasang tô tô é hkunmó lé tô pyám luí, byu é htungli lé za, myhik zing tô akô nghut ri." ga luí tû taí ri.

9 Hau htâng, Yhang xoq taí é gi, "Nungmoq gi, yhumsing é htungli lé za cháng râ matú, Garai Gasâng é hkunmó lé he-ngik pyâm é má, hpaqchyí gyaí bo akô nghut ri.

10 Hkâsu mù gâ le, Mosheq gi, 'Nungmoq é Ìnu Ìwa lé, hkungga keq.'\* ga le, 'Ìnu Ìwa lé, nhing é sù ó yuq nghut kôle, sat pyâm é hui râ lhê.'\* ga le, kâ tô é nghut lhê.

11 Nghut kôlhang, nungmoq taí é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi râ chyunghuq) nghut lhê gá nhang akô.

12 Haù mù, haù yuq lé, yhângnu yhângwâ é matú, haí a kut byi nhâng lô é đông dut bê nghut ri.

13 Haù đông mai, nungmoq gi, nungmoq chung gyó lo é htungli é yanmai, Garai Gasâng é mungdang lé he-ngik pyâm akô; haù sù é hkyô myo myo lé le, nungmoq kut akô nghut ri." gâ ri.

14 Yesuq gi, shiwa byu pé lé Yhâng chyáng dum wut yù mù, taí é gi, "Nungmoq ban-shoq bang, ngò taí é lé gyô yù mù, sé lo keq;

15 Shinggan mai wang lo é haí jung le, byù lé a sanséng dut nhang é a nghut, nghut kôlhang, byu é unghkaù mai htoq ló é zè kúm gi, byù lé a sanséng dut nhang lhê." gâ ri.

16 (Gyo râ nohkyap dap é sù gi, gyô yù sháng gaq.)" ga taí ri.\*

17 Yhang gi, byù moq mó mai htoq ló mù, yhúmhaù má jé wang ló é hkûn, Yhâng é chángzô pé gi, dangtú haù eq séng luí, Yhang lé lhom myí akô nghut ri.

18 Haù mù, Yhang gi, yhangmoq lé, "Nungmoq gi, haù-í yhang go akô luq? Shinggan mai wang lo é haí jung le, byù lé a sanséng nhâng wó dut râ a nghut é hkyô lé, a sé kó lúhú?

19 Hkâsu mù gâ lé, haù gi, byu é myit nhiklum hkaù má wang ló é a nghut e za, wamdau hkaù má sheq wang ló é nghut mù, shinggan shut dum lhoq htoq pyâm é nghut lhê." ga taí ri. (Yhang isu ga taí é

gi, zoshuq lhunglhang sansêng lhê gá nau é đông nghut ri.)

20 Hau htoq agó, Yhang xoq taí é gi, "Byù mai htoq ló é haí jung le, byù lé a sanséng nhâng wó dut é nghut lhê.

21 Hkâsu mù gâ lé, ahkaù mai htoq lo é gi, byu pé é myit mai htoq ló é nghut mù, agè ashop é đông myit é hkyô pé, ashop é đông gungsho zùm yap é hkyô, hkaù é hkyô, byù sat é hkyô, su-myi sulàng lú hkyô,

22 myoqnoq é hkyô, agè ashop é hkyô, mhaù zô é hkyô, achaq achyut zùm yap lhùm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê;

23 Agè ashop é hkyô shí pé banshoq gi, byu é unghkaù mai htoq lo é nghut mù, byù lé a sanséng dut nhang ri." gâ ri.

*Tungbaù Myiwe Myhí Rayuq É Lumjúng Myit*

*Mht 15:21-28*

24 Yesuq gi, haù jowò mai htoq ló mù, Turuq eq Sidun maukyo shut e ló luí, yhùm ralhum má wang ê ri; Yhang nyi é hkyô lé, ó yuq lé lé a sé nhâng naù kôlhang, a wó zaù to nghut ri.

25 Haù mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkûn jáng, Yhâng chyáng jé lé mù, Yhâng é hkyí wang má lé paí gop to luí,

26 yhang zô chyáng mai nat gang lé hkat htoq pyám byi râ matú, Yhang lé dúng tôngbán ri. Myiwe haù gi, Suru-Hpiniki mau mâ é Grik byuhú nghut ri.

27 Yesuq gi, "Zo wuít<sup>†</sup> hí zô gyi kó sháng gaq; haí mù gâ le, zô wui chyáng mâ é zoshuq lé yù mù, hkuí pé<sup>‡</sup> lé byi tsô é jung a nghut." ga yhang lé taí kyô ri.

28 Haù hkûn, yhang gi, "Yhumsîng ê! Haù kúm nghut ri; nghut kôlhang, siboí ô mâ é hkuí lhang, zô wui é zô myhit shuq htâng lé, ge zo lhê a nghut lúhú?" ga dum tû taí ri.

29 Haù mù, Yesuq gi, yhang lé, "Nàng tû taí é dang hau é yanmai, ló lo aq hkoí; haù nat gang gi, nung zô chyáng mai htoq ló byuq bê nghut ri." ga taí kat ri.

\* 7:10 Htoq Ló 20:12    \* 7:10 Htoq Ló 21:17    \* 7:16 Bun zo shí gi, Chyúmlaíká ra-am má bo lhê, ra-am má a bò.

† 7:27 Zo wuít gâ é gi, Yudaq byu pé lé gâ é nghut lhê.    ‡ 7:27 Hkuí pé gâ é gi, tungbaù pé lé gâ é nghut lhê.

<sup>30</sup> Myiwe myhí haû gi, yhûm má dum taû jé lo é hkûn, yhang zo chong htoq má leq to láng é lé le, nat gang htoq byuq bê nghut é lé le, lo myang ri.

*Nojit É Eq Dang A Hkyang É Sû Lé Lhoq Gê Byî É Hkyô*

<sup>31</sup> Yesuq gi, Turuq mau mai dum htoq lô mù, Sidun mai sô lai lô lui, Dekapoli mau hkaû đông lai byit mù, Galile nhông shut gyó jé lô ri.

<sup>32</sup> Haû hkûn, byù ra-am gi, nojit é eq dang a hkyang é byù rayuq lé, Yhâng chyáng shui lé lô kômù, haû yuq é ahtoq má loq ke byi ra matú, Yhang lé dúng tôngbán akô nghut ri.

<sup>33</sup> Yesuq gi, haû yuq lé baú za byù hpúng mai shui htoq yû mù, yhâng é nohkyûng má loqnyhui htaû háng byi lui, sôkan byé tik yû mù, haû yuq é shô má htau byi ri.

<sup>34</sup> Hau htâng, Yhang gi, mauhkûng shut tu wú mù, soq mó shê lui, "Ehpahta!" (Lichyúm gi, "Bông aq hko!") ga lui, haû yuq lé taí kat ri.

<sup>35</sup> Haû hkûn, haû yuq é nohkyap le bóng byuq lui, shô le nyhôm byuq mù, balang hkyâng hkyâng dang wó nyô bê nghut ri.

<sup>36</sup> Yesuq gi, haû hkyô ó lé le a taí kyo ra matú, yhangmoq lé hkúm kôhang, yhangmoq gi, je hkúm le, je taí pyo akô nghut ri.

<sup>37</sup> Byu pé gi, gyai yhang mauhong byuq bùm kôlui, "Yhang gi, haí lé le, ge é đông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga lui, taí bum akô nghut ri.

## 8

*Byù Myi Hkyîng Lé Byi Tsô É Hkyô Mht 15:32-39*

<sup>1</sup> Haû yoq má, gotû byù moq mó gi, lé zîng bum akô; haû bang zoshuq langhpyut to kô é yanmai, Yesuq gi, Yhâng é chángzô pé lé wut yù mù,

<sup>2</sup> "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyi bô bê, haí le a myàng zo kó nghut ri.

<sup>3</sup> Yhangmoq chyáng mâ é ra-am gi, mau we mai lé é bang nghut é yanmai, yhangmoq lé, zòmut gû yhûm shut nhang kat é

nghut le gi, hkyolat má mutyut yut é lô hui kô râ nghut lhê." ga taí ri.

<sup>4</sup> Haû hkûn, Yhâng é chángzô pé gi, Yhang lé, "Ísu é yoso má nhîng, shî myhông bang lé luq shoq byi tso râ zoshuq gi, hkâmá é yû râ lhu?" ga taí akô.

<sup>5</sup> Yesuq gi, "Nungmoq, muk hkâ-myhó long wó akô lhu?" ga taí myi jáng, yhangmoq gi, "Nyhit long." ga, dum tû taí akô nghut ri.

<sup>6</sup> Haû mù, Yhang gi, byù hpûng lé myigùng htoq má zùng nhang to lui, muk haû nyhit long lé yù mù, jeju ban hkyâ-on jáng, myhik hpé lui, haû bang lé gâm byi ra matú, Yhâng é chángzô pé lé byi kat ri; haû mù, yhangmoq gi, haû bang lé gâm byi akô nghut ri.

<sup>7</sup> Yhangmoq gi, ngo-nú zo ratsuí le wó akô nghut ri; haû mù, Yhang gi, ngozo haû pê é matú jeju hkyâ-on lui, chángzô pé lé dum gâm byi nhang ri.

<sup>8</sup> Yuq hkangmó zô gyi bùm kô é htâng má, haû chángzô pé gi, amyit htâng lé nyhit mung bying shoq wó guq tsing yu ashí kó nghut ri.

<sup>9</sup> Zô é bang gi, byù myi hkyîng kô nghut ri; Yesuq gi, haû bang lé, nhang kat lui,

<sup>10</sup> Yhâng é chángzô pé eq rahá, lhai má wang ji mù, Dalamauhta mau má é jé akô nghut ri.

<sup>11</sup> Hparishe pé gi, lé mù, Yesuq eq dang htîng htîng lhûm akô; hau htoq agó, yhangmoq gi, mauhkûng mâ é kumlhá lé dúng é đông, Yhang lé chyam wú akô nghut ri.

<sup>12</sup> Yesuq gi, myit nô-kying kying lui, yhangmoq lé taí é gi, "Haí mù lui, shí ipyat lhê é byu pé gi, limik kumlhá dúng akô lhu? Ngò teng za taí kôlé, shí ipyat mâ é bang lé, hai kumlhá le tûn shit râ a nghut." gâ ri.

<sup>13</sup> Hau htâng, Yhang gi, yhangmoq lé pyâm to mù, lhai má dum taû wang lô lui, tû tap shut gû dap e lô bê nghut ri.

*Hparishe Pé Eq Herut É Múnchi Mht 16:5-12*

<sup>14</sup> Haû chángzô pé gi, muk yu chûng râ lé tô-myhî pyâm kôlui, lhai hkaû má muk ralong za ru wó akô nghut ri.

\* 8:15 Shî má taí é múnchi gi, Hparishe pé eq Herut é mhoqshit hkyô lé, lhoq pyo é lé gâ lhê.

15 Yesuq gi, yhangmoq lé, "Nungmoq gi, Hparishe pé eq Herut é múnchi\* lé, sidiq luí, koi pyâm nyi keq." ga taí ri.

16 Haú hkûn, yhangmoq gi, "Nga-nhûng chyáng muk a bo é yanmai, haú su ga taí é nghut ri." ga luí, rayuq eq rayuq taí lhûm bum akô nghut ri.

17 Haú su ga taí lhûm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haí mù taí lhûm nyi akô lhú? Ahkuí jé shoq, nungmoq gi, a byu-myàng, a sê gyo shí kó lhú? Nungmoq é myit nhiklhum gi, ru htan nyi ashí kó lhú?"

18 Myoq dap to kôluí nhîng, a myàng kó lhú? Nohkyap dap to kôluí nhîng, a wó gyo kó lhú?

19 Ngò, muk ngo long lé myhik hpé mù, byù ngo hkyîng lé byi tsô é hkûn, zô myhit shuq htâng lé, nungmoq hkâ-myhó mung wó guq tsîng yu é lé, bun ashí kó lhú?" ga myi jáng, yhangmoq gi, "Raxe í mung." ga tû taí akô.

20 Dum, Yesuq gi, "Ngò, muk nyhit long lé myhik hpé mù, byù myi hkyîng lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsîng yu kô é lhú?" ga myi jáng, yhangmoq gi, "Nyhit mung." ga dum tû taí akô.

21 Haú hkûn, Yesuq gi, "Haú nghut le nhîng, ahkuí le, a sê gyo shi kó lhú?" ga, yhangmoq lé myi ri.

### *Myoqjit Sû Rayuq Lé Lhoq Gê Byî É Hkyô*

22 Yhangmoq gi, Bet-saida và mó má jé lò kô é hkûn, byù ra-am gi, myoqjit é byù rayuq lé, Yesuq chyáng shuí lé lô mù, haú yuq lé záng byi râ matú, dúng tôngbán akô.

23 Yesuq gi, myoqjit sù haú yuq é loq lé zui mù, và shinggan shut shuí htoq ló luí, yhâng é myoq má sôkan byé tik byi mù, loq ke byi luí, "Nàng, rajung jung lé myang ri lhú?" ga myi kat ri.

24 Haú jáng, yhang gi, tu wú kat luí, "Byu pé gi, sigâm su dut luí, hkyô sô wún é lé, ngò myang ri." ga taí ri.

25 Hau htâng, Yesuq gi, haú yuq é myoq má Yhâng é loq dum ke byi ri; haú hkûn, haú yuq é myoq gi, bóng lô mù, ge byuq luí, haí lé le san za myàng bê nghut ri.

26 Yesuq gi, haú yuq lé, "Wà hkaú má hkâwang ló lo." ga taí luí, yhâng é yhûm shut ló nhang kat bê nghut ri.

### *Hkrisduq Ga, Petruq Yín Yu É Hkyô*

*Mht 16:13-20; Luk 9:18-21*

27 Yesuq eq Yhâng é chángzô pé gi, Kesare-Hpilipi và mó awui ayàm mã é và pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akô lhú?" ga myi ri.

28 Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taí akô." ga, Yhang lé tû taí akô.

29 Yesuq gi, "Nungmoq gi, ngo lé ó yuq nghut lhê nghu akô lhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tû taí ri.

30 Yesuq gi, haú hkyô ó lé le a taí kyo râ matú, yhangmoq lé taí hkúm ri.

### *Byu Yhangzo Gi, Sat Pyâm É Hui Luí, Dum Dui Toq Râ Hkyô*

*Mht 16:21-28; Luk 9:22-27*

31 Hau htâng, Yhang gi, yhangmoq lé mhogshit é má, "Haú Byu Yhangzo gi, zing-rî é myo myo hui zo luí, suwún wuí, hkyangjong agyi pé, tará sará pé èq he-ngik pyâm é hui mù, sat pyâm é hui ra râ nghut lhê; nghut kôhang, sum nyi nghu râ buinyi má, dum dui toq râ nghut lhê." gâ ri.

32 Yesuq gi, haú hkyô lé san za dut shoq taí nyi é yanmai, Petruq gi, Yhang lé rahkyam shut shuí htoq yu mù, Yhang lé tân ri.

33 Nghut kôhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut ri." ga tân kat ri.

34 Hau htâng, Yhang gi, byù moq mó eq Yhâng é chángzô pé lé wut yu mù, taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyâm mù, yhumsing é tapzîng lé waq chûng luí, cháng ra râ nghut lhê.

† 8:29 Grik dong *Hkrisduq* gâ é gi, xû but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.

<sup>35</sup> Hkâsu mù gâ le, yhumsing é asak lé hkyi yù naù sù ó yuq nghut kôle, asak sum râ nghut lhê; nghut kôlhang, Ngá é yanmai le, haù gabú danglù é yanmai le, yhumsing é asak sùm pyâm é sù kúm gi, asak hkyi yu é hui râ nghut lhê.

<sup>36</sup> Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyû bò râ lhú?

<sup>37</sup> Byù gi, yhumsing é asak woi-nyí lé, hai èq wó htaí yù râ lhú?

<sup>38</sup> Yubak mara myô é eq su-myi sulàng shut é ipyat shî má, Ngò eq Ngá é dang lé hoq pyâm é sù ó yuq lé le, haù Byu Yhangzo gi, Yhâng Wâ é hpungwup shingkang bo é èq, haù chyoyúng maumang lagyô pé eq rahá jé lé é hkûn, hoq pyám râ nghut lhê. ✧ gâ ri.

## 9

<sup>1</sup> Hau htâng, Yesuq gi, yhangmoq lé, "Ngò, nungmoq lé teng za taí kôlé, shí má yap tô é bang ra-am gi, Garai Gasâng é mingdán, hpungwup a-tsâm èq jé lé lo é lé, a myang é za shî kó râ a nghut." ga taí ri.

*Yesuq É Ihpyô Isâm Htaí Lo É Hkyô  
Mht 17:1-13; Luk 9:28-36*

<sup>2</sup> Hkyuq nyí lai htâng má, Yesuq gi, Petruq lé le, Yakuq eq Yohan lé le, shuí chûng mù, yhangmoq baú myhang é bùm ralhum má doq ló akô; haù hkûn, yhangmoq é myoq hí tê má, Yesuq é ihpyô isâm htaí lo ri.

<sup>3</sup> Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haù-í hpyû shoq a wó xaù hpyu wú é nghut lhê.

<sup>4</sup> Eliyaq eq Mosheq gi, yhangmoq é hí má htoq shit mù, Yesuq eq dâng nyo lhùm nyi akô.

<sup>5</sup> Haù mù, Petruq gi, Yesuq lé, "Rabai é, shí jowò má nga-nhúng nyi le ge ri; haù mù, Náng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhùm saí nhâng laq." ga taí ri.

<sup>6</sup> Hkâsu mù gâ le, yhangmoq gi, gyai yhang gyuq dan bùm kô é yanmai, Petruq

gi, haí taí râ le a sé mù, haù su gâ é nghut ri.

<sup>7</sup> Hau htâng, mhut htoq lô luí, yhangmoq lé htup zing lô mù, mhut hkaù mai htoq lo é htê gi, "Shí yuq gi, Ngò chyitdap é Ngá Zo nghut lhê; Yhâng é dang gyo keq." gâ ri.

<sup>8</sup> Haù hkûn jáng, chángzô pé gi, lhinghkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

<sup>9</sup> Yhangmoq, bùm mai taù gyó lô kô é hkûn, Yesuq gi, haù Byu Yhangzo shi é mai a dum dui toq toq gi, yhangmoq myang é hkyô lé, ó lé le a taí kyo râ matú taí hkûm tô ri.

<sup>10</sup> Chángzô pé gi, dang haù lé myit má kat to kôluí, "Shi é mai dum dui toq râ." gâ é lichyúm lé, rayuq eq rayuq myí lhùm bum akô nghut ri.

<sup>11</sup> Hau htâng, yhangmoq gi, "Eliyaq hí lé ra râ nghut lhê ga, tarâ sará pé haí mù taí kô é lhú?" ga, Yesuq lé myí akô.

<sup>12</sup> Haù hkûn, Yesuq gi, "Eliyaq hí jé lé é gi, teng bê nghut luí, lhunglháng lé dum lajâng tô é nghut ri. Nghut kôlhang, haù Byu Yhangzo gi, myo myo hpuzo luí, he-ngik pyâm é hui ra nghut lhê ga le, Chyúmdang má kê to ashí, a nghut kó lhú?"

<sup>13</sup> Ngò, nungmoq lé taí kôlé, Eliyaq gi, jé lé bê nghut mù, yhang eq séng luí Chyúmdang má kê tô é eq rajung za, yhangmoq gi, ô nau é dông banshoq kut bekô nghut ri." ga tû taí ri.

*Nat Dap É Yuqgè Zo Rayuq Lé Lhoq Gê  
Byí É Hkyô*

*Mht 17:14-20, 22-23; Luk 9:37-45*

<sup>14</sup> Yhangmoq gi, chángzô pé chyáng dum taù jé lô kô é hkûn, haù bâng é lhinghkyuq má byù moq mó zing lé é lé le, tarâ sará pé, haù bang eq dang htíng htíng lhùm nyi kô é lé le, myang akô.

<sup>15</sup> Haù má nyi tô é lhunglhâng bang gi, Yesuq lé myang kat é eq, maú byuq kôluí, din é mù, é shi-kyâm akô nghut ri.

<sup>16</sup> Haù hkûn, Yesuq gi, yhangmoq lé, "Nungmoq gi, yhangmoq eq haí lé dang htíng htíng lhùm nyi akô lhú?" ga myí ri.

<sup>17</sup> Byù hpúng hkaù mâ é rayuq tû taí kat é gi, "Sarâ é! Nhut jit nhang é nat wang júng

tô é ngâ é yuqzo lé, Náng chyáng shuí lé lo lhê.

18 Nat haû gi, yhang chyáng wàng hkanmó, yhang lé myî htoq má lhoq leqbat nhang ri; haû mù, yhang gi, nhut mai guttsû htoq lhê, zuì kyik kyik lhê, langhtan lo lhê, dut ri; hau é yanmai, nat haû lé hkat htoq pyám byi râ matú, Náng é chángzô pé lé dũng wú kôhang, yhangmoq a wó dut kó nghut ri." gâ ri.

19 Haú hkûn, Yesuq gi, "Lumjín myit a bo é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haû lé, Ngá chyáng shuí lé lô keq." ga taî kat ri.

20 Haû mù, yhangmoq gi, yuqgè zo haû lé shuí lé lo akô; nat haû gi, Yesuq lé myang kat é eq yhang, yuqgè zo haû lé langhtân nhang ri; yuqgè zo haû gi, myigùng má lêng leq luî goleng leng mù, nhut mai tsû-myup htoq nyi ri.

21 Haú hkûn, Yesuq gi, yhangwa lé, "Yhang, isu dut é hkâ-myháng myáng bê lhú?" ga myi jáng, yhang wa gi, "Zoshâng hkûn mai nghut bê.

22 Nat haû gi, yhang lé lhoq sat pyám naû mù, myi má le, wui má le, anum num lêng wàng nhang wú bê nghut lhê; nghut kôhang, Nàng, rajung jung wó kut byî é nghut le gi, ngá hpe lé shogyo yù laq, garúm yù laq." ga taî taî ri.

23 Yesuq gi, "'Nàng, wó kut byî é nghut le gi,' nghú, haî mù taî lhê lhú? Lumjín myit bò su é matú gi, haî le wó dut lhê." ga, yhang lé taî ri.

24 Haû zôshang é yhangwa gi, radá dâm, "Ngò lumjín lhê; nghut kôhang, ngá é lumjín myit gi, shaû ashî nghut é yanmai garúm yù laq." ga taî garú ri.

25 Yesuq gi, byù hpúng din zîng lé lô kô é lé, myàng jáng, haû agè ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhang chyáng mai htoq lô aq; hkâ-nhám le, yhang chyáng hkâdum wàng lo." ga tân kat ri.

26 Haú hkûn, nat haû gi, garu mù, zoshâng haû lé wum kat langhtân nhâng luî, htoq lô byuq bê. Zoshâng haû gi, shî mâng gùng su dut byuq é yanmai, byù myo myo gi, "Yhang shî bê nghut ri." ga taî akô.

27 Nghut kôhang, Yesuq gi, zôshang é loq má zuì luî, tu toq kat ri; haû mù, zoshâng gi, yap to bê nghut ri.

28 Yesuq, yhúmhaû má wang ló é htâng, Yhâng é chángzô pé gi, "Ngamoq gi, haî mù, nat haû lé a wó hkat htoq é lhú?" ga, tsik za Yhang lé myî akô.

29 Yesuq gi, "Haú jung nat lé gi, kyûdũng é dõng za a nghut jáng, wó hkat htoq râ a nghut." ga, yhangmoq lé tâ taî ri.

30 Yhangmoq gi, haú jowò mai htoq ló mù, Galile mau mai laî ló akô; nghut kôhang, Yesuq gi, ó lé le a sé nhâng naû nghut ri.

31 Haî mù gâ le, Yhang gi, "Haú Byu Yhangzo gi, byu pé é loq má ap pyám é hui râ nghut lhê; haú bang gi, Yhang lé sat pyám kó râ nghut lhê; nghut kôhang, Yhang gi, shi é htâng sum nyi nghú râ nyi má, dum dui toq râ nghut lhê." ga, Yhâng é chángzô pé lé mhoqshit byî nyi é yanmai nghut ri.

32 Yhâng é chángzô pé gi, dang haú lé a sê gyo kôhang, Yhâng chyáng a wám myi kó nghut ri.

### *Kô Dik Sû Gi, Ó Yuq Nghut Lhê Lhú?*

*Mht 18:1-5; Luk 9:46-48*

33 Yhangmoq gi, Kaperna-um wà má jé e akô nghut ri. Yesuq gi, yhúmhaû má nyi tô é hkûn, chángzô pé lé, "Hkyô má, nungmoq, hai hkyô lé dang chyin chyin lhum kô é lhú?" ga myî ri.

34 Nghut kôhang, yhangmoq gi, zim za nyi tô akô; hkâsu mù gâ le, ko dik sû gi, ó yuq nghut lhê nghú é hkyô lé, hkyolat má, yhangmoq dang chyin chyin lhum kô é yanmai nghut ri.

35 Yesuq gi, zùng mù, haû chángzo raxe í yuq lé, wut yù luî, "Kô dik naû sû ó yuq nghut kôle, tiq dik sû eq banshoq bâng é dui-nhâng zoshâng dut ra râ nghut lhê." ga taî ri.

36 Hau htâng, Yhang gi, zoshâng rayuq lé shuí yù mù, yhangmoq é gung gung má shap to luî, dum bún yù mù, yhangmoq lé taî é gi,

37 "Shî sû é zoshâng lé, Ngá é mying mai hap yu é sû ó yuq nghut kôle, Ngo lé hap yu é sû nghut bê; Ngo lé hap yu é sû ó yuq nghut kôle, Ngo lé za hap yu é a nghut, Ngo

lé nhang kat é Sû lé hap yu é le nghut lhê." gâ ri.

*Nga-nhúng Lé Gyè A Kut É Sû Gi, Nga-nhúng É Hkyam Shut Nghut Lhê Gâ É Hkyô Luk 9:49-50*

<sup>38</sup> Haú hkûn, Yohan gi, "Sarâ ê! Náng é myîng lang luí, nat gâng pé lé hkat pyám byî wún é byù rayuq lé, ngamoq myang ri. Yhang gi, nga-nhúng chyáng a lòm sù nghut é yanmai, yhang lé ngamoq hkûm pyâm é nghut lhê." ga taí ri.

<sup>39</sup> Yesuq kúm gi, "Yhang lé hkâhkúm kó; Ngá myîng lé lang luí, laklaí kumlhá kut é sù gi, razup za má, Ngò eq séng luí, a ge é hkyô pé lé taí râ a nghut;

<sup>40</sup> Hkâsu mù gâ le, nga-nhúng lé gyè a kut é sù gi, nga-nhúng é hkyam shut nghut lhê.

<sup>41</sup> Ngò, nungmoq lé teng za taí kôle, nungmoq gi, Hkrisduq eq séng é bang nghut lhê gâ é yanmai, ngá é myîng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù râ za nghut lhê.

*Mara Shut Nhang É Hkyô Mht 18:6-9; Luk 17:1-2*

<sup>42</sup> Ngo lé lumjîng é zoshâng wuì mâ é rayuq lé, mara kut shut nhang é sù gi, yhang é lingzing má luqluí long mó tuí hut byi luí, wuimau má é dú hkyó pyâm é huí é nghut lé gi, yhang é matú je gè râ nghut lhê.

<sup>43</sup> Náng é loq èq, nang lé mara kut shut nhang é nghut le gi, haú lé hpyit dú pyám aq; loq í loq dap luí, hkâ-nhám le, myiduq a dat shum é ngaraí ming wàng râ htoq má, loq raloq eq za ahtum abyuq é asak wó râ shut wàng le gi, náng é matú je ge ri.

<sup>44</sup> (Haú ngaraí ming gi, 'yhangmoq lé hkê nyi é luq le a shî, myiduq le a shûm' é jowò nghut lhê.)\*

<sup>45</sup> Náng é hkyi èq, nang lé mara kut shut nhang é nghut le gi, haú lé hpyit dú pyám aq; hkyî í hkyî dap luí, hkâ-nhám le, myiduq a dat shum é ngaraí ming má dú hkyô pyâm é huí râ htoq má, hkyî rahkyî za dap luí, ahtum abyuq é asak wó râ shut wang le gi, náng é matú je ge ri.

<sup>46</sup> (Haú ngaraí ming gi, 'yhangmoq lé hkê nyi é luq le a shî, myiduq le a shûm' é jowò nghut lhê.)

<sup>47</sup> Náng é myoqjí èq, nang lé mara kut shut nhang é nghut le gi, haú lé lap choq pyám aq; myoqjí í jí dap gû, ngaraí ming má dú hkyó pyâm é huí râ htoq má, myoq rají eq za, Garai Gasâng é mingdán má wang le gi, náng é matú je ge ri.

<sup>48</sup> (Haú ngaraí ming gi, 'yhangmoq lé hkê nyi é luq le a shî, myiduq le a shûm' é jowò nghut lhê.)\*

<sup>49</sup> Hkâsu mù gâ le, hkungga sho lé xo kat luí lhoq sansêng é su, myi gi, yuq hkangmó lé lhoq sanséng râ nghut lhê.\*

<sup>50</sup> Xo gi, ge lhê. Nghut kôlhang, xomân kân byuq jáng gi, hkâsu kut dum wó lhoq ngam yù râ lú? Nungmoq gi, xo su ngam nyi mù, rayuq eq rayuq nguínón nyî keq." ga taí ri.

## 10

*Myi, Làng Gâng É Hkyô Mht 19:1-12; Luk 16:18*

<sup>1</sup> Hau htâng má, Yesuq gi, Kaperna-um mai htoq ló mù, Yuda mau mâ é maukyo má é jé luí, Yodan làng tû tap má dap ló bê nghut ri; byù myo myo gi, Yhâng chyáng dum zîng lé lô kôluí, Yesuq gi, Yhang lhaq kut nyi é eq rajung za, haú bang lé mhòqshit byî ri.

<sup>2</sup> Hparishe pé ra-am gi, lé jé kômù, "Byù rayuq, yhumsing é yhangmyi lé lhoq kâng pyâm le, tarâ wang lhê lú?" ga myî é dong, Yhang lé chyam wú akô.

<sup>3</sup> Yesuq gi, "Mosheq gi, nungmoq lé, hkâsu ga hkunmó hkyó tô é lú?" ga taú myî ri.

<sup>4</sup> Haú hkûn, yhangmoq gi, "Yuqgè rayuq gi, lhoq kang laiká ká mù, yhangmyi lé wó nhang pyâm lhê ga, Mosheq, ahkáng byî tô ri." ga tû taí akô.

<sup>5</sup> Yesuq dum tû taí é gi, "Nungmoq é myit nhikhum htân kô é yanmai, Mosheq gi, tarâ haú lé kâ tô é nghut lhê.

<sup>6</sup> Nghut kôlhang, mau htoq xâng hkun lé, Garai Gasang gi, 'yuqgè eq myiwe lé hpan é nghut lhê'.\*

\* **9:44** Bun zo 44, 46, gi, Chyúmlaika myo myo má a bo é nghut lhê. ✧ **9:48** Esai 66:24 ✧ **9:49** Nhung 2:13 ✧ **10:6** Apûn 1:27



7 'Hau é yanmai, yuqgè gi, yhumsing înu îwâ chyáng mai htoq luí, yhangmyi eq rahá rading ralhum za kut nyí mù,

8 yhangnhik gi, gungsho ralhum za dut byuq kó râ nghut lhê.\* Haú mù luí, yhangnhik gi, í yuq a nghut lo é za, rayuq za dut bê nghut ri.

9 Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

10 Yhumhkaú má, yhangmoq nyi tô é hkûn lé, chángzô pé gi, haú hkyô eq séng luí, Yhang lé dum saí myí akô.

11 Haú hkûn, Yhang gi, "Yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù dut bê nghut mù, yhangmyi lé shut é sù nghut bê.

12 Myiwe rayuq le, yhumsing é yhanglâng lé kâng pyám mù, yuqgè góyuq eq dum hâng é nghut le gi, sulâng lú é hkyô lé kut bê nghut ri." ga tâ ri.

### *Zoshâng Wuí Eq Yesuq É Hkyô*

*Mht 19:13-15; Luk 18:15-17*

13 Byu pé gi, zoshâng wuí lé Yesuq záng byi sháng gaq ga, Yesuq chyáng shuí lé lo akô; nghut kôlhang, chángzô pé gi, yhangmoq lé lhom tân hkûm akô nghut ri.

14 Haú lé Yesuq myàng jáng, Yhang gi, wú nhik-yo naú luí, "Haú zoshâng wuí lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haú su é bâng é mingdán ru nghut lhê.

15 Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haú má wó wâng râ a nghut." ga yhangmoq lé taí ri.

16 Hau htâng, Yesuq gi, zoshâng wuí lé bún yú mù, yhangmoq ahtoq má loq ke luí, shimân byí ri.

### *Sùt Wó É Zorâm Rayuq É Hkyô*

*Mht 19:16-30; Luk 18:18-30*

17 Yesuq gi, hkyô dum so xoq e ló é hkûn, byù rayuq gi, dín lé lô mù, Yhâng é hí má hkyihput htuq luí, "Ge é Sará ê, ahtum abyuq é asak wó yú râ matú, ngò haí kut ra râ lhú?" ga myí ri.

18 Haú mù, Yesuq gi, "Haí mù, Ngo lé ge é Sará nghu lhê lhú? Garai Gasang mai lai luí, ge é ó yuq le a nyí.

19 Jep e tarâ má, 'Byù hkâsat, su-myi sulâng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!\* ga bo tô é lé, nàng sê lhê." ga tâ ri.

20 Haú hkûn, haú yuq gi, "Sará ê, haú pé banshoq lé, ngò, zoshâng hkûn mai cháng bê nghut lhê." ga tâ ri.

21 Yesuq gi, haú yuq lé wú tsuq to mù, yhang lé chyitdap luí, taí é gi, "Nàng kut râ rajung râ tô ashí; ló mù, nàng wó miwó lé ùng pyám luí, myùng bang lé byí pyám aq; haú jáng, nàng, mauhkûng htoq má sutzè wó râ nghut lhê; haú mù, Ngá htâng lé cháng aq." gâ ri.

22 Haú yuq gi, dang haú lé wó gyo jáng, sutzè gyai wó sù nghut é yanmai, myoq-dong shum byuq mù, gyai yhang myit a ngón é eq ló byuq bê nghut ri.

23 Yesuq gi, lhíngkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng râ matú, haú-í yhang wuí ri-nhung!" ga tâ ri.

24 Chángzô pé gi, Yhang taí é dâng é yanmai, mauhong bum akô nghut ri. Nghut kôlhang, Yesuq dum xoq taí é gi, "Zo wuí ê, Garai Gasâng é mingdán má wàng râ matú, haú-í yhang wuí ri-nhung!" ga tâ ri.

25 Sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." gâ tâ ri.

26 Haú hkûn, chángzô pé gi, je riyhang maú byuq kô mù, rayuq eq rayuq, "Haú su ru nghut le gi, ó yuq za hkyi yu é hui râ nghut lhê lhú?" ga, taí lhûm bum akô nghut ri.

27 Haú hkûn, Yesuq gi, yhangmoq lé wú kat mù, "Haú hkyô lé, byù mai gi, wó kut râ a nghut; nghut kôlhang, Garai Gasang gi, wó dut lhê; hkâsu mù gâ le, Garai Gasang gi, lhunglhang lé wó kut é Sù nghut lhê." ga tâ ri.

28 Haú hkûn, Petruq gi, Yhang lé, "Ngamoq gi, wó é gú lhunglhang lé tô pyâm to

luî, Náng htâng cháng bê nghut lhê." ga tai ri.

<sup>29</sup> Haû mù, Yesuq tû tai é gi, "Ngò, nungmoq lé teng za tai kôlé, Ngá é yanmai le, gabú danglu é yanmai le, yhumsing é yhûm, gumang gu-nhá, înu îwa, zo dù wui eq yò pé lé tô pyâm tô é sù ó yuq nghut kôle,

<sup>30</sup> shí pyat lhê é yhûm pé, gumang gu-nhá wui, înu pé, zo dù wui eq yò pé lé, rashô tú wó hkam yù luî, zing-rî é hkyô pé lé le hui kó râ nghut é htoq agó, htang pyat má le, ahtum abyuq é asak wó yù râ nghut lhê.

<sup>31</sup> Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê." gâ ri.

*Yesuq, Yhang Shî Râ Hkyô Lé Dum Tai É Hkyô*

*Mht 20:17-19; Luk 18:31-34*

<sup>32</sup> Yhangmoq gi, Yerusalem wà mó shut doq ló nyi kô é u lé, Yesuq gi, yhangmoq é hí má sô tô ri; haû hkûn, htâng má sô é bang gi, gyuq nyi bùm kô é u lé, haû chángzô pé gi, maú byuq bum akô nghut ri; Yesuq gi, haû chángzo raxe í yuq lé gotû kut dum wut yù mù, Yhâng chyáng dut lò râ hkyô, yhangmoq lé tai kyô é gi,

<sup>33</sup> "Wú keq, nga-nhúng gi, Yerusalem wà mó shut doq ló nyi lhê; haû Byu Yhangzo gi, hkyangjong agyi pé eq tarâ sará pê é loq má ap byi pyâm é hui râ nghut lhê; haû bang gi, Yhang lé, shî râ mara byi luî, tûngbaù pê é loq má ap byi pyám kó râ nghut lhê.

<sup>34</sup> Haû bang gi, Yhang lé, wuizui kut pyâm é, sôkan byé gyûn é, nhuq bat é kut yû mù, sat pyám kó râ nghut lhê. Hau htâng sum nyí má, Yhang dum dui toq lô râ nghut lhê." gâ ri.

*Yakuq eq Yohan nhik dung é hkyô*

*Mht 20:20-28*

<sup>35</sup> Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ ê, ngá-nhik dúng é gû banshoq, Nang kut byi râ lé, ngá-nhik ô nau ri." ga tai akô.

<sup>36</sup> Haû hkûn, Yhang gi, "Ngò, nungnhik lé haî kut byi râ ô naù akô lhú?" ga myi ri.

<sup>37</sup> Yhangnhik gi, "Náng é hpungwup shingkang hkaû má, ngá-nhik tâng lé, Náng é loqyò hkyam má rayuq, loqpaî hkyam má rayuq kut, zùng nhâng laq." ga tû tai akô.

<sup>38</sup> Nghut kôlhang, Yesuq gi, "Nungnhik haî dúng nyi é lé, nungnhik a sé kó nghut ri. Ngò shuq râ góm\* lé, nungnhik wó shuq kó râ lhú? Ngò hkam yù râ baptisma lé, nungnhik wó hkam yù kó râ lhú?" ga yhangnhik lé tû tai ri.

<sup>39</sup> Haû hkûn, yhangnhik gi, "Nga-nhik wó dut lhê." ga tû tai kôjáng, Yesuq gi, "Ngò shuq râ góm lé, nungnhik shuq kó râ nghut lhê; ngò hkam yù râ baptisma lé le, nungnhik hkam yù kó râ nghut lhê.

<sup>40</sup> Nghut kôlhang, Ngá é loqyò, loqpaî hkyam má zùng râ ahkáng lé gi, Ngò byi jung a nghut. Jowò haû pé gi, hen to byi é hui bâng matú za nghut lhê." ga yhangnhik lé tai ri.

<sup>41</sup> Haû su gâ é hkyô lé, haû gotû chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akô nghut ri.

<sup>42</sup> Yesuq gi, yhangmoq banshoq bang lé wut tsing yù luî, "Tûngbaù pé lé uphkan é ga bang gi, tûngbaù pé lé up zô nyi kô é hkyô lé le, haû eq rajung za, yhangmoq é ming up suwún wui le, yhumsing é ahkáng ayá lé chûng mù, up zô nyi kô é hkyô lé le, nungmoq sê lhê.

<sup>43</sup> Nghut kôlhang, nungmoq chyáng gi, haû su a dut kó sháng gaq, nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê.

<sup>44</sup> Hau htoq agó, nungmoq má ushuq dut naù sù ó yuq nghut kôle, banshoq bâng é jùn dut ra râ nghut lhê.

<sup>45</sup> Hkâsu mù gâ le, haû Byu Yhangzo lháng gi, dojaú é lé hkam yù râ matú jé lé é a nghut e za, dojaú râ matú eq byù myo myô é matú, shîhtaî gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé tai ri.

*Myoqjit Sû Barateme, Myoq Dum Myang É Hkyô*

*Mht 20:29-34; Luk 18:35-43*

\* **10:38** Góm eq baptisma gâ é gi, jamjau hui râ eq shî râ lé, tai nau é nghut lhê.

46 Hau htâng, yhangmoq gi, Yeriho và má jé ló akô nghut ri. Yesuq eq Yhâng é chángzô pé gi, byù moq mó eq rahá, và mai htoq ló nyí kô é hkûn, Barateme (Teme é yhangzo) gâ é myoqjit sù rayuq gi, hkyô yàm má dung zô zung tô ri.

47 Yhang gi, Nazaret và byù Yesuq lai ló é lé wó gyo jáng, "Dawiq é Yhangzo Yesuq ê, ngo lé shogyo yù laq ô!" ga garú kat ri.

48 Haù mù, byù myo myo gi, zim za nyi râ matú yhang lé tân hkûm akô; nghut kôhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang garú kat ri.

49 Haù mù luí, Yesuq gi, yap nô kat mù, "Yhang lé ji kat keq." ga tai jáng, yhangmoq gi, "Myit ngón aq hkoi; Yhang, náng lé ji nyi ri; toq aq." ga myoqjit sù haù lé tai akô.

50 Haù hkûn, haù yuq gi, yhâng é buhîng lé hkyut pyám mù, byam chyu luí, Yesuq chyáng lé jé ri.

51 Yesuq gi, yhang lé, "Ngò, nang lé haì kut byi râ ô nau ri lú?" ga myi jáng, yhang gi, "Sarâ ê, ngò myoq myàng nau ri." ga tú tai ri.

52 Yesuq gi, "Ló aq hkoi, náng é lumjîng myit gi, náng lé lhoq gê byi bê nghut ri." ga tai kat é hkûn jáng, yhang gi, myoq wó myâng mù, Yesuq e ló é hkyô shut cháng e ló bê nghut ri.

## 11

*Yesuq, Yerusalem Và Mó Má Wang Ló É Hkyô*

*Mht 21:1-11; Luk 19:28-40; Yhn 12:12-19*

1 Yesuq eq Yhâng é chángzô pé gi, Yerusalem và mó eq chyâng lo nyi kô é hkûn, Tsanlun Bùm má é Bethpage và eq Behtani và má jé ló kôjáng, Yesuq gi, Yhâng é chángzo í yuq lé,

2 "Nungnhik, hí mâ é và má ê keq; và haù má wang é hkûn jáng, ó le a jî wú shî é logúng zo tuí to lánng é lé, ê myâng kó râ nghut lhê; haù lé hpyi yù mù, Ngá chyáng she lò keq.

3 Byù rayuq yuq mai, 'Haì mù, haù su kut nyi akô lú?' ga nungnhik lé lhom myi jáng, 'Shí du lé, haù Yhumsîng râ ri ga, razup má

dum taù dé byi râ nghut lhê.' nghu tú tai keq." ga pyîng luí, nhang kat ri.

4 Haù nhik gi, e ló mù, hkyô mó yâm mâ é hkumdong nàm má tuí tô é logúng zo radu lé, ê myâng kôluí, haù lé tuí hpyi nyi akô.

5 Haù hkûn, haù má yap tô é bang ra-am gi, "Haì mù, logúng tuí hpyi nyi akô lú?" ga myi akô.

6 Haù jáng, yhangnhik gi, Yesuq pying kat é eq rajung za tai kyo kôjáng, yhangmoq gi, she ló râ ahkáng byi kat akô nghut ri.

7 Yhangnhik, logúng zo haù lé Yesuq chyáng she jé lo é hkûn, logúng hau é gùng htoq má, yhangmoq é buhîng pé buí jáng, hau é ahtoq má, Yesuq doq jî ri.

8 Byù myo myo gi, yhangmoq é buhîng pé lé, hkyô má hkyut hkang byi akô; ra-am gi, yò pé má zân yu é mhandíng lé hkang byi akô nghut ri.

9 Hí má so bang eq htâng má châng é bang gi,

"Hosana!"

Haù Yhumsîng é myîng mai jé lé lô Sù gi, hkungsô wó nyi sháng gaq ô!

10 Jé lé lô râ nghut é, nga-nhûng é îwa Dawiq é mingdán gi, hkungsô wó nyi sháng gaq ô!

Htoq tsáng myhâng má hosana nghut sháng gaq ô!"\*

ga luí, tai garú bum akô nghut ri.

11 Yesuq gi, Yerusalem và mó má jé mù, noqkuq yhûm má wang ê luí, lhîngkhyuq mâ é jung hkangmó lé wú ri; nghut kôhang, bui gyum ló bê nghut é yanmai, Yhâng é chángzo raxe í yuq eq rahá, Behtani và shut htoq e ló bekô nghut ri.

*Maihpáng Gâm Ashi A Zui Râ Matú Tai É Hkyô*

*Mht 21:18-19*

12 Hau htang nyi, yhangmoq, Behtani và mai htoq ló kô é hkûn, Yesuq gi, zo mut bê nghut ri.

13 Yhang gi, ahaq wúm é maihpáng gâm ragàm lé, we we mai byu-myang kat jáng, agàm haù má ashì zui lhê laq ga ê jé wú le, ahaq mai lai luí, haì le a myàng nghut ri.

\* 11:9 Hebre dang má, *hosana* gâ é gi, "ahkuí hkyi yù laq" gâ é nghut lhê. Nghut kôhang, bun zo 9, 10 má gi, hkyá-on dang dông chung é nghut lhê. ✨ 11:10 Hkyá-on 118:25-26

Haî mù gâ le, maihpáng-shi zui yâm a nghut é yanmai nghut ri.

<sup>14</sup> Haû mù, Yesuq gi, shigâm haû lé, "Ahkuî mai gi, náng chyáng mâ é ashi, ó yuq le a myàng zo lo kó sháng gaq." ga taî ri. Yhâng é chángzô pé gi, haû su ga taî é dang lé wó gyô yu akô nghut ri.

*Yesuq, Noqkuq Yhûm Lé Lhoq Sansêng Pyâm É Hkyô*

*Mht 21:12-17; Luk 19:45-48; Yhn 2:13-22*

<sup>15</sup> Yhangmoq, Yerusalem wà mó má jé é hkûn, Yesuq gi, noqkuq yhûm má wang ê mù, haû mâ é zè ung zè wuî kut nyi é bang lé, hkat htoq pyám luî, ngùn htaî zo bâng é siboî pé eq hpûngkyui ung zo bâng é tanghkuq pé lé tu mhuq pyám byî ri.

<sup>16</sup> Hau htoq agó, Yhang gi, ó yuq lé nghut kôle, ung zè lé noqkuq yhûm mai a waq lai nhâng kut pyâm ri.

<sup>17</sup> Yesuq, yhangmoq lé mhoqshit é gi, "Ngá yhûm gi, byû myû lhunglhâng bâng é matú, kyûdung yhûm ga râ nghut lhê."\*

ga kâ tô é a nghut kó lhú? Nghut kôlhang, nungmoq gi, 'damaq hkyûng' kut pyám bekô nghut ri." gâ ri.\*

<sup>18</sup> Hkyangjong agyi pé eq tarâ sará pé gi, haû lé wó gyo kômù, Yhang lé hkâsu kut wó sat pyám râ hkyô ho nyi akô; nghut kôlhang, shiwa byu pé gi, Yhang mhoqshit é hkyô má, myit zing zuq bùm kô é yanmai, yhangmoq gi, Yhang lé gyuq bum akô nghut ri.

<sup>19</sup> Myinhâng jé jáng, Yesuq eq Yhâng é chángzô pé gi, wà hkaû mai htoq ló bekô nghut ri.

*Maihpáng Gâm Nyhuî Shi Byuq É Hkyô*

*Mht 21:20-22*

<sup>20</sup> Htang napkyó, yhangmoq sô lai ló le, maihpáng gâm gi, amyit mai yhang nyhuî kyuq shi byuq é lé myang akô.

<sup>21</sup> Petruq gi, myit bún kat luî, "Rabai ê, wú aq! Nàng nhîng pyâm é maihpáng gâm gi, nyhuî shi byuq bê nghut ri." ga luî, Yesuq lé taî ri.

<sup>22</sup> Haû hkûn, Yesuq gi, "Garai Gasang lé lumjîng keq.

<sup>23</sup> Ngò, nungmoq lé teng za taî kôlé, ó yuq nghut kôle, i-myit má úng-âng é hkyô a bo é

za, yhumsîng taî é hkyô gi, dut lò râ nghut lhê ga lumjîng kô é nghut le gi, bùm shî lé, 'Htot mù, wuimau má ló gyó wâng aq.' ga taî le lháng, haû hkyô dut byi râ nghut lhê.

<sup>24</sup> Haû mù luî, Ngò, nungmoq lé taî kôlé, nungmoq haî dúng le le wó yû râ nghut lhê nghû lumjîng kô é nghut le gi, wó yû kó râ za nghut lhê.

<sup>25</sup> Mauhkûng htoq mâ é nungmoq é Îwa gi, nungmoq é mara lé hkyut pyám byi sháng gaq, nungmoq gi, kyûdung yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyám byi keq;

<sup>26</sup> (Nghut kôlhang, nungmoq mai mara a hkyut pyám byi é nghut le gi, mauhkûng htoq mâ é nungmoq é Îwa le, nungmoq é mara lé hkyut pyám byi râ a nghut.)" ga tû taî ri.†

*Yesuq É Ahko Ahkáng Lé Myî Chyam É Hkyô*

*Mht 21:23-27; Luk 20:1-8*

<sup>27</sup> Yhangmoq, Yerusalem wà mó má dum jé mù, Yesuq gi, noqkuq yhûm wàng hkaû má sô yông wún é u lé, hkyangjong agyi pé, tarâ sará pé eq suwún wuî gi, Yhâng chyáng lé jé kômù,

<sup>28</sup> "Hai ahko ahkâng eq, Nàng, shí pé lé kut nyi lhê lhú? Haû su kut râ ahko ahkáng, Nang lé ó yuq byi é lhú?" ga myî akô.

<sup>29</sup> Haû jáng, Yesuq gi, "Ngò le, nungmoq lé rajung myî wú kôlé, tû taî wú keq; haû hkûn, hai ahko ahkâng eq, Ngò, shí pé kut é hkyô lé taî kyo râ nghut lhê.

<sup>30</sup> Yohan byi é baptyama gi, mauhkûng mai lhú? A nghut jáng, byu chyáng mai lhú? Taî wú keq!" ga taû myî kat ri.

<sup>31</sup> Haû hkûn, yhangmoq chôm hpyê lhum kô é gi, "Mauhkûng mai nghut lhê' nghû nga-nhúng taî jáng le, 'Haû nghut le nhîng, haî mù, yhang lé a lumjîng kô é lhú?' ga râ nghut;

<sup>32</sup> 'Byu chyáng mai nghut lhê.' nghû jáng le..." gâ ri. (Yohan gi, myiqhtoi rayuq gè gè nghut lhê ga, lhunglhâng bang lumjîng bùm kô é yanmai, yhangmoq gi, haû byu pé lé gyuq bum akô nghut ri.)

\* 11:17 Esai 56:7    \* 11:17 Yer 7:11    † 11:26 Bun zo shî gi, Chyúmlaika ra-am má za bo lhê.

<sup>33</sup> Haû mù, yhangmoq gi, Yesuq lé, "Ng-amoq a sé." ga taî akô.

Haú hkûn, Yesuq gi, "Haû jáng, Ngò le, hai ahko ahkâng eq shí pé kut é hkyô lé, nungmoq lé a taî kyo." ga, yhangmoq lé taî ri.

## 12

*Tsibiyiq Hkyâm Saí Bang Lé Dangtú Yu É Hkyô*

*Mht 21:33-46; Luk 20:9-19*

<sup>1</sup> Hau htâng, Yesuq, dangtú dông yhangmoq lé taî é gi, "Byù rayuq gi, tsibiyiq hkyâm rahkyam saí to mù, lînghkyuq kyâm to luî, tsibiyiq wing pyik htoq rà donghkong dû to mù, machya ralhum saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byî to mù, gó ming shut e ló byuq bê nghut ri.

<sup>2</sup> Kyôshu yoq jé jáng, yhang gi, yhang yù âng é tsibiyiq shi é yû rà matú, dui-nhâng zoshâng rayuq lé, hkyâm saí zo bâng chyáng nhang kat ri.

<sup>3</sup> Nghut kôlhang, haú bang gi, haú yuq lé lhom chyup bat luî, loq kôm taû nhang kat akô.

<sup>4</sup> Haû mù, yhang gi, gotû dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhom bat cheq byi kôluî, hoq lhoq hpû kat akô nghut ri.

<sup>5</sup> Hau htâng, rayuq lé dum nhang kat jáng, haú yuq lé gi, lhom sat pyâm akô; Yhang gi, góbang myo myo lé le, yhangmoq chyáng nhang kat ashî nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

<sup>6</sup> Ló htáng má, yhang gi, yhang chyitdap é zo lé nhang kat rà za ru nghut alô; haû mù, yhang gi, 'Ngá zo lé gi, yhangmoq lhom hkungga kó rà nghut lhê.' ga, yhangzo lé nhang kat ri.

<sup>7</sup> Nghut kôlhang, haú bang gi, 'Shí yuq gi, silí wunlí sing yù rà sù nghut lhê; lé keq, yhang lé sat pyám sháng, haû jáng sheq, silí wunlí pé lé nga-nhúng wó yù rà nghut lhê.' ga rayuq eq rayuq taî lhum bum akô.

<sup>8</sup> Haû mù, yhang lé chyup yû luî, sat pyám mù, hkyâm shinggan shut dú htoq pyâm akô nghut ri.

<sup>9</sup> Haû jáng, tsibiyiq hkyâm yhumsîng gi, yhangmoq lé hkâsu kut rà lhú? Yhang gi, é mù, haû hkyâm saí zo bang lé sat pyám luî, hkyâm haú lé, góbang lé htot ngho byî pyám rà nghut lhê.

<sup>10</sup> Chyúmdang má,

'Yhûm saí bâng eq hkyin htoq pyâm é luqgok gi, htungchyûn má é ahkyak dik é luqgok dut bê.

<sup>11</sup> Shí hkyô gi, haû Yhumsîng kut é nghut luî, nga-nhúng é myoq hí má mauhpo dut bê nghut ri.' ga bò tô é lé, nungmoq a nghap wú kó lhú?"<sup>☆</sup> gâ ri.

<sup>12</sup> Hau htâng, yhangmoq gi, dangtú haû, yhangmoq lé lhoq ang luî taî é hkyô lé, sé kô é yanmai, Yhang lé chyup yû rà matú hkyô ho nyi akô. Nghut kôlhang, yhangmoq gi, byù moq mó lé gyuq kô é yanmai, Yhang lé nyhi pyâm to luî, htoq ló byuq bekô nghut ri.

*Kehtaq\* Lé Kang Kat Byî É Hkyô*

*Mht 22:15-22; Luk 20:20-26*

<sup>13</sup> Hau htâng má, yhangmoq gi, Yesuq é dang má mara hô luî Yhang lé chyup yû rà matú, Hparishe pé ra-am eq Herut é byu pé ra-am lé, Yesuq chyáng nhang kat akô.

<sup>14</sup> Haú bang gi, Yhâng chyáng lé jé kômù, "Sarâ ê, Nàng gi, tengmán sù nghut é lé, ngamoq sê lhê. Nàng gi, ó haî ga rà lé le haî su a ngàm sù nghut é yanmai, ó yuq é myoqdong lé le a tê byî é za, Garai Gasâng é hkyô lé, tengmán é dông mhogshit é sù nghut ri. Haû mù, Kehtaq lé kang kat byî le gi, ge lhê lhú?

<sup>15</sup> Ngamoq kat ra rà lhú? A kat ra rà lhú?" ga Yhang lé taî akô.

Yesuq kúm gi, yhangmoq, gegùn labyoq kut nyî kô é lé sé mù, "Nungmoq gi, haî mù, Ngo lé lé chyam wú akô lhú? Denari ngùn rachap yu lé keq, ngò wú wú bá." ga taî kat ri.

<sup>16</sup> Haú hkûn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lhú?" ga myî ri.

<sup>☆</sup> 12:11 Hkya-on 118:22-23 \* 12:12 Kehtaq gâ é gi, "hkoséng" gâ é nghut lhê.

Yhangmoq gi, "Kehtaq é nghut ri." ga tâ taí akô.

<sup>17</sup> Haû mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasang é lé gi, Garai Gasang lé byi keq." ga taí jáng, yhangmoq gi, maú byuq bùm bekô nghut ri.

*Saduke Pé, Yesuq Lé Myî Chyam É Hkyô  
Mht 22:23-33; Luk 20:27-40*

<sup>18</sup> Haû dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô.

<sup>19</sup> Yhangmoq myi kô é gi, "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi râ matú, yhang rhat lé chui gon ra râ nghut lhê ga, nga-nhúng lé, Mosheq kê to byi ri.

<sup>20</sup> Hí hpyang lé, gumang nhiktâng wui nyhit yuq nyi akô. Lagám yuq gi, myiwe yù luî, zo dù a dap é za shi ló byuq bê nghut ri.

<sup>21</sup> Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haû eq rajung za dut byuq bê nghut ri.

<sup>22</sup> Haú nhiktâng wui nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myhí haû le châng shi ló byuq bê nghut ri.

<sup>23</sup> Haû mù luî, haû dum dui toq é buinyi má, myiwe myhí haû gi, hká yuq é yhangmyi nghut râ lhú? Hkâsu mù gâ le, yhang gi, haú nyhit yuq é yhangmyi dut wú bê sù nghut ri." gâ akô.

<sup>24</sup> Yesuq gi, yhangmoq lé, "Nungmoq hkyô ngoq é gi, Chyúmdang eq Garai Gasang é wum-o a-tsam lé, a sé kô é yanmai nghut lhê, a nghut kó lhú?

<sup>25</sup> Haû shi byuq bê bang dum dui toq é hkûn gi, myi byi myi yû hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê.

<sup>26</sup> Shi é mai dum lhoq dui toq é hkyô eq séng luî, Mosheq kê tô é laiká má lháng, haû nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup

é Garai Gasang nghut lhê.'\* ga kê tô é lé, nungmoq a nghap wú kó lhú?

<sup>27</sup> Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga taí ri.

*Ahkyak Dik É Jep É Tarâ  
Mht 22:34-40; Luk 10:25-28*

<sup>28</sup> Tarâ sarâ rayuq gi, lé lô mù, yhangmoq taí htíng lhum nyi kô é lé, lé wó gyô ri. Yhang gi, haú bang lé, Yesuq rago tâ taí nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lhú?" ga myî ri.

<sup>29</sup> Haû jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nga-nhúng é Yhumsîng Garai Gasang za, Garai Gasang nghut lhê.

<sup>30</sup> Haû Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, náng myit é hkyô banshoq, náng é wum-o banshoq èq, chyitdap râ lhê.\* gâ é nghut lhê.

<sup>31</sup> Hau htang lhum gi, 'Náng gûng lé náng chyitdap é su, náng é chyangnâm mâ é bang lé le chyitdap aq.\* gâ é nghut lhê. Shí í lhûm htoq kô é tarâ gotû a joq lo." ga yhangmoq lé tâ taí ri.

<sup>32</sup> Haú hkûn, tarâ sarâ haú yuq gi, "Gyo naû bê, Sarâ ê! Garai Gasang rayuq za nghut lhê, gotû a nyi lo ga náng taí é gi, têng ri.

<sup>33</sup> Garai Gasang lé, náng é myit nhiklhum banshoq èq le, náng é sê gyo é nyan banshoq èq le, náng é wum-o banshoq èq le, chyitdap râ lhê gâ é eq, náng gûng lé náng chyitdap é su, náng é chyangnâm mâ é bang lé le chyitdap râ lhê gâ é gi, myi nyhé hkungga eq gotû hkungga pé banshoq htoq má, je ahkyak lhê." ga taí ri.

<sup>34</sup> Yesuq gi, yhang hpaqchyî bo é dông tâ taí nyi é lé myàng jáng, "Náng gi, Garai Gasang é mingdán eq a we lo nghut ri." ga yhang lé taí kat ri. Haú hkûn mai gi, ó yuq le, Yhang lé dangmyi a wám myi lo kó nghut ri.

*Hkrisduq Gi, Ó Yuq É Yhangzo?  
Mht 22:41-46; Luk 20:41-44*

<sup>35</sup> Yesuq, noqkuq yhûm má mhoqshit nyi é hkûn lé taî é dang gi, "Haî mù, haû tarâ sará pé gi, Hkrisduq lé, Dawiq é yhangzo za nghut lhê gâ akô lhú?"

<sup>36</sup> Dawiq gi, Chyoiyúng Woi-nyí èq taí nhang é má,

'Haû Yhumsîng Garai gi, ngá é Yhumsîng lé, "Ngò, náng é gumlau gye pé lé,

náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga taî ri. <sup>✠</sup>

gâ ri.

<sup>37</sup> Haû mù, Dawiq yhang lháng, Hkrisduq lé, Yhumsîng gâ é nghut le gi, yhangzo za hkâsu ge nghut râ lhú?" gâ ri.

Byù hpûng mó gi, Yhâng é dang lé, gabú myít èq gyô nyi bum akô nghut ri.

<sup>38</sup> Yesuq gi, mhoqshit uchyang taî é má, "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gâi pé má lhom shi-kyâm yù râ lé le,

<sup>39</sup> tarajong pé mâ é ahkyak dik é zûng jang pé eq poí pé mâ é réng é zûng jowò pé má myang zûng râ lé le, ô nau nyi bum akô.

<sup>40</sup> Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hîng hîng dûng shit mhaú é bang nghut akô. Haû su é bang gi, dam byí é je riyhang hui zo kó râ nghut lhê." gâ ri.

### *Chuimó Myhí Kat É Alu Ngùn*

#### *Luk 21:1-4*

<sup>41</sup> Yesuq gi, alu sidek nàm má zung to mù, noqkuq yhûm mâ é alu sidek haû má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô.

<sup>42</sup> Haû hkûn, myung é chuimó myhí rayuq gi, lé mù, gyi htîngchap ngùn zo í chap lé kat ri.

<sup>43</sup> Yesuq gi, Yhâng é chángzô pé lé wut yù mù, "Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri.

<sup>44</sup> Haû góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhâng é asak

lé baú râ ngùn banshoq lé, kat bê nghut ri." ga taî ri.

## 13

### *Ló Htâng Buinyí Má Dut Lò Râ Hkyô*

#### *Mht 24:1-21, 29-35; Luk 21:5-33*

<sup>1</sup> Yesuq, noqkuq yhûm mai htoq ló é hkûn, Yhâng é chángzo rayuq gi, "Sarâ ê, wú aq; hkâ-í ko é luqgok pé! Hkâ-í hkik é yhûm pé!" ga Yhang lé taî kat ri.

<sup>2</sup> Haû hkûn, Yesuq gi, "Nàng, yhûm mó shí pé lé myàng lhê a nghut lhú? Luqgok shí pé gi, rachâm htoq racham lháng a kê lhum lohoq, hpyoq hpyi pyâm é hui râ nghut lhê." gâ tû taî ri.

<sup>3</sup> Yesuq gi, Tsanlun Bùm má, noqkuq yhûm shut hû mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù,

<sup>4</sup> "Haû hkyô pé gi, hkâ-nhám dut lò râ lhú? Haû dut lò râ hkûn, hkasû é kumlhá htoq lô râ nghut lhê lhú? Ngamoq lé taí kyô wú laq." ga Yhang lé baú myí akô nghut ri.

<sup>5</sup> Haû mù, Yesuq gi, yhangmoq lé, "Nungmoq lé, ó yuq èq le a wó shuí nghoq sháng gaq, sidiq nyi keq.

<sup>6</sup> Hkâsu mù gâ le, 'Ngò gi, haû yuq\* nghut lhê.' ga, Ngá myíng lé lîng é byù myo myo pô htoq lô mù, byù myo myo lé shuí nghoq kó râ nghut lhê.

<sup>7</sup> Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dàn kó. Haû hkyô pé gi, dut lò râ za nghut lhê; nghut kôlhang, ló htâng é buinyí gi, a nghut shí.

<sup>8</sup> Byù ra-myû eq ra-myû, mingdán ralhûm eq ralhûm majan zân lhûm lò kó râ nghut lhê. Jowò myo myo má, layàng nún é, mutmó gyó é pé dut lò râ nghut lhê. Haû pé gi, wuîhke jamjau hkyo é apûn awang za ru nghut ashí.

<sup>9</sup> Nungmoq gùng nungmoq sidiq nyi keq. Hkâsu mù gâ le, yhangmoq gi, nungmoq lé, tarâ rûng pé má é ap pyám kó râ nghut é htoq agó, tarajong pé má nungmoq lé nhuq bat kó râ nghut lhê. Hau htoq agó, nungmoq gi, Ngá myíng é yanmai, mauzau

<sup>✠</sup> 12:36 Hkya-on 110:1 \* 13:6 Haû yuq gâ é gi, Hkrisduq lé gâ é nghut lhê.

wuì eq hkohkam pé é hí má, saksé dông yap ra kó râ nghut lhê.

10 Haú gabú danglù gi, amyû banshoq lé hí hko kyo ra râ nghut lhê.

11 Nungmoq gi, chyup yu é hui luî, jep huî é hkûn, haî taí râ lé, hkâ-myt chiq kó. Ahkyíng jé jáng, nang lé myit htoq lô nhang é dong za taí aq; hkâsu mù gâ le, dang haú pé gi, nungmoq taí é a nghut, haú Chyoiyúng Woi-nyí èq taí nhang é ru nghut lhê.

12 Nhiktâng gi, nhiktâng yhangchang, îwa gi, yhangzo lé, shí shoq ap pyâm lhum kó râ nghut lhê; zo wuî gi, mó wuî lé gumlau toq mù, sat pyám nhâng kó râ nghut lhê.

13 Byù lhunglhâng bang gi, Ngá é yanmai, nungmoq lé a nguì kut kó râ nghut lhê; nghut kôlhâng, jìhtûm jé shoq wó hkam jân nyí é sù gi, hkyi yu é hui râ nghut lhê.

14 'Haú lhoq hten lhoq hpyoq é achayut hkyô'☆ gi, yhang a nyí âng é jowò má yap tô é lé, nungmoq myàng kôjáng (laiká nghap é sù gi, sê gyo sháng gaq), Yuda mau má nyí é bang gi, bùm pé shut hpang doq lô kó sháng gaq.

15 Yhumhkûng htoq má nyí tô é sù gi, yhúmhaû mâ é zè haî lé le, a ló gyó wang yù lo sháng gaq.

16 Yò má nyí tô é sù gi, yhâng é buhîng lé a ló taû yu nyí lo sháng gaq.

17 Haú buinyì pé má, zogùng dut é myiwe wuì eq naú huq ashî nghut é înu wuì gi, hkâ-í yhang wuîhke bekó nghut ri myhi-nhung.

18 Haú hkyô gi, gyoqmyò má a dut sháng gaq, kyûdûng nyí keq.

19 Hkâsu mù gâ le, Garai Gasang, mingkan lé hpan tô é hkûn mai ahkuí jé shoq, hkâ-nhám le a dut wú shí é wuîhke jamjau mó gi, haú buinyì pé má dut lò râ nghut lhê; haú su é hkyô gi, htàngnùng má hkâ-nhám le dum dut lo râ a nghut.

20 Buinyì haú pé lé, haú Yhumsîng Garai mai a lhoq shaú é nghut le gi, ó yuq le asak wó lut râ a nghut. Nghut kôlhâng, Yhang hkyin yù bê nghut é, hkyin yù hui bâng é matú gi, buinyì haú pé lé, Yhang lhoq shaú pyám byi bê nghut ri.

21 Haú ahkyíng má, byù rayuq yuq mai, nungmoq lé, 'Wú keq, shí má Hkrisduq nyí ri.' ga le, 'Wú keq, Yhang hê má nyí ri.' ga le, taí jáng, nungmoq hkâjîng kó.

22 Hkâsu mù gâ le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lháng, wó lhoq nghoq shoq ga, kumlhá pé eq laklaí kumlhá pé lé kut shit kó râ nghut lhê.

23 Haú mù, nungmoq sidiq nyí keq; ahkyíng a jé shi mai, ngò, nungmoq lé, jung hkangmó taí kyô nyí gù nghut lhê.

24 Buinyì haú pé má, wuîhke jamjau haú pé laí é htâng,

'Bùi gi, noq byuq mù, lhamó gi, a tsô dut byuq râ nghut lhê;

25 kyî pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huî bùm kó râ nghut lhê.'☆

26 Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shingkaq eq le, gyó lé lo é lé, byu pé byu-myàng kó râ nghut lhê.

27 Hau htâng má, Yhang gi, Yhâng é mau-mang lagyô pé lé nhang kat mù, maumyî chyûn hkangmó eq myigùng htum shoq, mauhkûng htáng shoq mai, Yhang hkyin yu tô é bang lé shuî tsîng yù nhâng râ nghut lhê.

28 Maihpáng gâm lé wú mù, mhooq yû keq; agâm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê.

29 Haú eq rajung za, shí hkyô pé dut nyí é lé, nungmoq myàng kôjáng, Yhang gi, chyáng bê nghut mù, hkúmdong má lháng nghut nyí bê hkyô lé, nungmoq sé lo keq.

30 Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq râ nghut lhê.

31 Mauhkûng eq myigùng gi, a joq lo dut byuq râ nghut lhê; nghut kôlhâng, Ngá é dang gi, ru joq nyí râ nghut lhê.

*Haú Buinyì Eq Ahkyíng Lé, Ó Le A Sé  
Mht 24:36-44*

32 Buinyì eq ahkyíng haú lé gi, ó yuq le a sé; mauhkûng htoq mâ é maumang lagyô



pé lhang a sé; haû Zo le a sé; haû Îwa za ru sê lhê.

<sup>33</sup> Haû mù, nungmoq gi, ahkyíng haû hkâ-nhám jé râ lé, a sé kô é yanmai, sidiq nyi keq! Machya nyi keq!

<sup>34</sup> Haû gi, byù rayuq, yhang é dui-nhang zoshâng wui lé, ó le ó eq sêng é mù lé gàm byi to mù, hkum zúng sù lé le, machya nyi râ matú pying to lui, yhang yhûm lé, haû dui-nhang zoshâng wui chyáng ap pyâm to mù, byìn we shut htoq lô byuq é sù eq pung ri.

<sup>35</sup> Haû mù, haû Yhumsíng hpó gi, myin-htâng laq, myín gunggàm laq, woqtûn hkun laq, maubó zó laq, hkâ-nhám jé lô râ lé nungmoq a sé kô é yanmai, sidiq machya nyi keq.

<sup>36</sup> Haû a nghut jáng, Yhang, dàn loq tung tau jé lo é hkûn, nungmoq yhup myhî tô é lé, lo myang pyám râ nghut lhê.

<sup>37</sup> Ngò, nungmoq lé, 'sidiq machya nyi keq,' nghû taí é eq rajung za, yuq hkangmó lé le, taí é nghut lhê." ga taí ri.

## 14

*Yesuq, Xû But Byi Huí É Hkyô*

*Mht 26:1-16; Luk 22:1-6; Yhn 11:45-53; 12:1-8*

<sup>1</sup> Ahkuí, haû Lhoqlhai Poí eq múnchi a kat é Muk Zo Poí jé râ í nyi za ru ra alò hkûn, hkyangjong agyi pé eq tarâ sará pé gi, Yesuq lé hkâsu kut wó haq chyup yû mù, sat pyám râ matú, hkyô ho nyi akô nghut ri.

<sup>2</sup> Nghut kôlhang, yhangmoq gi, "Byu pé gabyông lô kó abe, poí gyoro má gi, a kut shi sháng." ga taí akô.

<sup>3</sup> Yesuq gi, Behtani wà má nyi é manggâm dap wú sù Simûn é yhûm, siboí má nghe zung tô é hkûn, myiwe myhí rayuq gi, nardu amyit mai za saí yu é, gyai hpaú é namngón xû bo é alabasta (luq hpyû) bông yu lé lô mù, bông haú lé lêng hkyui lui, namngón xû haú lé Yesuq é ulhum má hut gyun byi ri.

<sup>4</sup> Haú má nyi tô é bang ra-am gi, wú nhik-yô é myit eq, rayuq eq rayuq taí lhum kô é gi, "Haí mù, namngón xû lé aha agó kut pyâm lhê laq?

<sup>5</sup> Haû namngón xû lé, denari\* sùm sho eq ung lui, myùng bang lé byi le ge lhê mhai!" gâ akô. Yhangmoq gi, myiwe myhí hau lé le, gyai chôm tân akô.

<sup>6</sup> Nghut kôlhang, Yesuq gi, yhangmoq lé, "Myiwe zo haú lé, hkâtân nyi kó; haí mù, yhang lé i-myit lhoq myo nhang nyi akô lhu? Yhang gi, Ngá é ahtoq má ge é hkyô kut bê nghut ri.

<sup>7</sup> Haû myùng bang gi, nungmoq eq rahá hkâ-nhám le nyi râ nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shi má nungmoq eq rahá ayang nyi nyi râ sù a nghut.

<sup>8</sup> Yhang gi, yhang wó dut é í kut bê nghut ri. Yhang, Ngá gûng má, namngón xû hut gyûn é gi, Ngá gûng lé yhum râ matú, hí hen lajâng tô é ru nghut lhê.

<sup>9</sup> Ngò, nungmoq lé teng za taí kôlé, haû gabú danglù lé mingkan gón hko kyô é jowò hkangmó má, yhang lé myit bún é đông, yhang kut é hkyô shi lé, taí kyo bekô râ nghut lhê." ga taí kyo ri.

<sup>10</sup> Hau htâng, haû chángzo raxe í yuq má bo é Yudaq Iskarut gi, Yesuq lé ap pyám râ ga, hkyangjong agyi pê chyáng e ri.

<sup>11</sup> Haú bang gi, haú hkyô lé lhom wó gyo kôjáng, gyô gabú lui, yhang lé ngùn byi râ ga, danggidiq byi akô. Haú mù, yhang gi, Yesuq lé ap pyám râ hkyô ho nyi bê nghut ri.

*Yhumsing É Myinzang*

*Mht 26:17-30; Luk 22:7-23; Yhn 13:21-30*

<sup>12</sup> Haû htûngli joq é eq rajung za, Lhoqlhai Poí hkungga sauzo jáu byi é, múnchi a kat é Muk Zo Poí sâng-hi nyi má, Yesuq é chángzô pé gi, Yesuq lé, "Nàng zo râ Lhoqlhai Poí lé, ngamoq hkâmá ê món to râ lhu?" ga myi akô.

<sup>13</sup> Haú mù, Yhang gi, chángzo í yuq lé, "Nungnhik, myuq hkaú shut wang lô keq, wui yambú waq é byù rayuq lhom hui râ nghut lhê; haú hkûn, nungnhik gi, yhang htâng cháng keq.

<sup>14</sup> Haú yuq, wang lô é yhûm mâ é yhumsíng lé, 'Ngò, Ngá é chángzô pé eq rahá, Lhoqlhai Poí lé zo râ bíng wap hkâmá

\* **14:5** Denari rachap gi, byù rayuq é ra-nyí lhê é zuihpau eq wui ri.

nghut lhê lhu ga, Sará myí nhang kat ri.'  
nghu taí keq.

<sup>15</sup> Haú hkûn, hen to gû nghut é, ahtoq má é wap mó lé lhom tún shit râ nghut lhê. Wap haú má, nga-nhûng é matú ê hen to keq." ga taí luí, nhang kat ri.

<sup>16</sup> Chángzo haú nhik gi, htoq e ló mù, myuq hkaú má wang e ló le, Yesuq taí kat é eq roq za é myâng kômù luí, Lhoqlhai Poí lé, món to bekô nghut ri.

<sup>17</sup> Myinhâng jé lô jáng, Yesuq gi, haú chángzo raxe í yuq eq rahá, haú má lé jé bekô nghut ri.

<sup>18</sup> Yhangmoq gi, siboí má nghê mù, zô nyi bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyi é bang nungmoq má é rayuq sù gi, Ngo lé ap pyám râ nghut lhê." ga taí ri.

<sup>19</sup> Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akô.

<sup>20</sup> Haú hkûn, Yhang gi, "Haú yuq gi, haú raxe í yuq má é rayuq nghut lhê. Ngò eq rahá, hkoq shí má muk jùmzo sù nghut lhê.

<sup>21</sup> Haú Byu Yhangzo gi, Yhang eq séng luí kô tô é eq rajung za, shí râ za nghut lhê. Nghut kôlhâng, haú Byu Yhangzo lé ap pyám é sù gi, dingnyé wó ri; haú yuq gi, a hku lé le lhang, je ge ri.

<sup>22</sup> Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byí ri.

<sup>23</sup> Haú htâng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq banshoq bang gi, haú lé yù shuq akô nghut ri.

<sup>24</sup> Yesuq gi, yhangmoq lé, "Shí gi, byù myo myô é matú htoq pyám é, dangshikaq eq séng é Ngá sui nghut lhê.

<sup>25</sup> Ngò, nungmoq lé teng za taí kôlé, Ngò, Garai Gasâng é mingdán má, tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga taí ri.

<sup>26</sup> Yhangmoq gi, hkya-on mahkôn ralhūm ban hkôn jáng, Tsanlun Bùm shut htoq e ló bekô nghut ri.

*Petruq He-ngik Râ Hkyô Lé, Te Tai É Hkyô*

*Mht 26:31-35; Luk 22:31-34; Yhn 13:36-38*

<sup>27</sup> Yesuq gi, yhangmoq lé, "Nungmoq lhunghâng bang gi, myit lingbat kó râ nghut lhê; hkâsu mù ga le,

'Haú sau zúng sù lé, Ngò bat sat pyám mù, sau pé gi, lhoq pyo pyám é hui kó râ nghut lhê.'<sup>☆</sup>

ga kâ tô ri.

<sup>28</sup> Nghut kôlhâng, Ngò gi, lhoq dui toq é huí htâng má, Galile mau shut, nungmoq é hí má e ló lánng râ nghut lhê." ga taí ri.

<sup>29</sup> Haú hkûn, Petruq gi, "Góbang banshoq myit lingbat kôlhâng, ngò gi, myit lingbat râ a nghut." ga taí kat ri.

<sup>30</sup> Haú mù, Yesuq gi, "Ngò, nàng lé teng za taí lé, hkû-nyí, hkû-myín yhang jáng, woq í dâm a tún shimá, nàng, Ngo lé sum dâm he-ngik pyám râ nghut lhê." ga tû taí ri.

<sup>31</sup> Nghut kôlhâng, Petruq gi, "Ngò, Nàng eq rahá shí râ dut kôlhâng, Nang lé ngò he-ngik pyám râ a nghut." ga zuq zuq taí ri. Góbang banshoq le, haú su ga châng taí bum akô nghut ri.

*Get-samane Gâ é Jowò Má Kyûdûng É Hkyô*

*Mht 26:36-46; Luk 22:39-46*

<sup>32</sup> Yhangmoq gi, Get-samane gâ é jowò má jé ló kômù, Yesuq gi, Yhâng é chángzô pé lé, "Ngò, kyû ê dũng nyi é u lé, shí má zùng lánng keq." ga taí ri.

<sup>33</sup> Yesuq gi, Yhang eq rahá Petruq, Yakuq, Yohan pé lé, shuí chũng ri. Haú hkûn, Yhang gi, myit gyai a ngón é eq myit wuîhke é hui mù,

<sup>34</sup> yhangmoq lé, "Ngò gi, shí râ í yhang myit yón nyi ri; nungmoq gi, machyâ luí, shí má lánng nyí keq." ga taí ri.

<sup>35</sup> Yesuq gi, haú mai ratsuí zo sô ê mù, myigùng má gop byên to luí, ahkyíng haú lé ge lhoq lhai pyám byí le gi, Yhâng chyáng mai lhoq lhai pyám byi râ matú,

<sup>36</sup> "Aba,<sup>†</sup> Áwa ê, Nàng gi, haí le wó dut é Sù nghut lhê. Góm<sup>‡</sup> shí lé, Ngá chyáng mai yu pyám byi laq. Nghut kôlhâng, Ngò ô nau é

<sup>☆</sup> 14:27 Zhk 13:7 † 14:36 *Aba* gâ é gi, Aramaik dang dòng "Áwa" gâ é lichyúm nghut lhê. ‡ 14:36 *Góm* gâ é gi, Yesuq, jamjau hui râ hkyô eq shí râ hkyô lé, taí nau é nghut lhê.

đông a nghut, Nàng ô nau é đông sheq nghut sháng gaq." ga kyûdûng ri.

<sup>37</sup> Hau htâng, Yhang gi, Yhâng é chángzô pê chyáng dum taû lo le, yhangmoq yhup myhî to kô é lé lo myang ri. Haû mù, Yhang gi, Petruq lé, "Simun, nàng yhup ngón nyi lhê lú? Razup za lháng a wó machya nyi lú?"

<sup>38</sup> Gunglaú é a hui sháng gaq, machyâ luí, kyûdûng nyi keq. Haû woi-nyí gi, kâm nyi kôhang, gungsho gi, wum nyhôm nyi ri." ga taí ri.

<sup>39</sup> Yesuq gi, radàm dum ê mù, hí lé dũng é dang lé za, ê dung ri.

<sup>40</sup> Yhang dum taû lo le, yhangmoq gi, myoqkuq lai kô é yanmai, yhup myhî to lánng kô é lé, lo dum myang ri. Yhangmoq gi, Yhang lé haí taí râ a sé dut byuq akô nghut ri.

<sup>41</sup> Yesuq gi, sum dâm nghû râ lĩng má, yhangmoq chyáng dum taû jé lô mù, yhangmoq lé, "Nungmoq gi, ahkuí jé shoq yhup ngón nyi ashî kó lú? Gé bê! Haû ahkyíng gi, jé bê nghut luí, haû Byu Yhangzo gi, yubak dap bãng é loq má ap pyâm é hui râ nghut bê.

<sup>42</sup> Toq keq! Ló losháng hkoi! Ngo lé ap pyám râ sũ gi, jé lé lô bê nghut ri." ga taí ri.

### *Yesuq, Chyup Yû Huí É Hkyô*

*Mht 26:47-56; Luk 22:47-53; Yhn 18:3-12*

<sup>43</sup> Yesuq, dáng nyo nyi ashî u lé, haû chángzo raxe í yuq má bo é Yudaq gi, haû hkyangjong agyi pé, tarâ sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

<sup>44</sup> Yesuq lé ap pyâm râ sũ gi, yhangmoq lé, "Ngò bopuq puq é sũ gi, haû yuq nghut bê; Yhang lé chyup yû mù, zúng shuí ló keq." ga kumlhá byí to bê nghut ri.

<sup>45</sup> Yudaq gi, Yesuq chyáng hkyê za ê mù, "Rabai ê." ga taí luí, Yhang lé bopuq puq byí ri.

<sup>46</sup> Haû hkûn, yhangmoq gi, Yesuq lé chôm zuí zìng mù, chyup yû bekô nghut ri.

<sup>47</sup> Haû mù, nàm má yap tô é byù rayuq gi, yhâng é shâm lé she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

<sup>48</sup> Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chũng mù, lé lo akô lú?"

<sup>49</sup> Ngò gi, nyí wui, nungmoq eq rahá nyi luí, noqkuq yhûm má mhoqshit byí nyi kôhang, nungmoq, Ngo lé a chyup yû kô é nghut lhê. Nghut kôhang, Chyúmdang pé gi, dik ra râ nghut lhê." ga taí ri.

<sup>50</sup> Haû hkûn, haû chángzô pé gi, Yesuq lé tô pyâm to kôluí, hpang byo byuq bekô nghut ri.

<sup>51</sup> Buhĩng za wut é zorâm rayuq gi, Yesuq htâng cháng wún ri. Yhangmoq gi, haû yuq lé, wó kyaq zui kô é hkûn,

<sup>52</sup> yhang gi, buhĩng lé hkyut hkyô pyâm to mù, gũngchĩn hpang ló byuq bê nghut ri.

### *Yudaq Byĩn Tú Wapdoq Má Jéyáng Huí É Hkyô*

*Mht 26:57-68; Luk 22:54-55, 63-71; Yhn 18:13-14, 19-24*

<sup>53</sup> Yhangmoq gi, Yesuq lé, hkyangjong mó chyáng shuí e akô; haû hkyangjong agyi pé lhunglhâng bang, suwún wui eq tarâ sará pé le, lé zup zĩng bum akô.

<sup>54</sup> Petruq gi, hkyangjong mó é yhumwàng hkaú má châng jé wàng shoq, we we mai Yesuq htâng châng tô ri. Yhang gi, haû má, zúng bang eq rahá, myihkyóm yâm má gyoq gang zung tô ri.

<sup>55</sup> Haû hkyangjong agyi pé eq Yudaq byĩn tú wapdoq gón gi, Yesuq lé sat râ saksé hô kôhang, haí le a myàng kó nghut ri.

<sup>56</sup> Byù myo myo gi, a têng é saksé hkám kôhang, yhangmoq é dang gi, a tsũng lhum kó nghut ri.

<sup>57</sup> Hau htâng, ra-am gi, toq yap mù, a têng é saksé hkám kô é gi,

<sup>58</sup> "Yhang gi, 'Byu loq èq saí é noqkuq yhûm shí lé, Ngò hpoyô hpyi pyám mù, sum nyí gyoro má, byu loq èq a saí é, gotú ralhum dum saí râ nghut lhê.' ga taí é lé, ngamoq wó gyô ri." ga akô.

<sup>59</sup> Nghut kôhang, yhangmoq é saksé gi, a tsũng lhum kó nghut ri.

<sup>60</sup> Hau htâng má, hkyangjong mó gi, yhangmoq é hí má toq yap mù, "Nàng, haí le a tú taí luq? Shí bang, Nàng lé mara hun nyi é saksé gi, hká đông nghut lhê lú?" ga luí, Yesuq lé myí ri.

<sup>61</sup> Nghut kôlhang, Yesuq gi, jit le a ga nyi tô ri.

Haû mù, hkyangjong mó gi, Yesuq lé, "Nàng gi, hkungsô wó Su é yhangzo, Hkrisduq nghut lê lú?" ga dum myî ri.

<sup>62</sup> Haû hkûn, Yesuq gi, "Nghut lê; haû ngò Byu Yhangzo gi, a-tsam bo dik Su é loqyo hkyam<sup>§</sup> má zung tô é lé le, mhuthtui ji mù, mauhkûng mai lé lo é\* lé le, nungmoq myàng kó râ nghut lê." ga taî ri.

<sup>63</sup> Haû hkûn, hkyangjong mó gi, yhang é bu lé lâng cheq pyám mù, "Nga-nhung, hai saksé râ ashî lú?"

<sup>64</sup> Yhang, Garai Gasang lé rhoi dang taî é lé nungmoq wó gyo bê nghut lê. Nungmoq hkâsu wó myit akô lú?" ga myî ri; yhangmoq banshoq bang gi, shî gíng sù nghut ri ga, chôm myit huí akô.

<sup>65</sup> Haû mù, ra-am gi, Yhang lé sôkan byé gyun é eq, myoq má nghop pyám byi luí, loqtsup eq htui byi lê kut mù, "Nang lé ó yuq htui é, myiqhtoi htoî wú aq." ga taî akô. Haû zúng bang gi, Yhang lé shuî yù mù, nhuq bat akô nghut ri.

*Yesuq Lé, Petruq He-ngik Pyâm É Hkyô*  
*Mht 26:69-75; Luk 22:56-62; Yhn 18:1-18, 25-27*

<sup>66</sup> Petruq gi, wàng hkaû má nyi tô é u lé, haû hkyangjong mó é dui-nhâng zoshâng myhí rayuq jé lé lo ri.

<sup>67</sup> Haû yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wà byù Yesuq eq rahá nyi sù nghut ri." ga taî ri.

<sup>68</sup> Nghut kôlhang, yhang gi, "Nàng taî é hkyô lé, ngò, sé le a sé, gyo le a sê gyo." ga he pyám luí, wâng hkúmdong shut htoq e lô bê nghut ri.†

<sup>69</sup> Dui-nhâng zoshâng myhí haû gi, Petruq lé, haû má dum myàng jáng, awui ayám má yap tô é bang lé, "Shí yuq le, haû hpúng má lom é sù rayuq nghut ri." ga dum taî ri.

<sup>70</sup> Petruq gi, radàm dum he pyâm ri; hau htâng razup zo má, haû nàm má yap tô é bang gi, Petruq lé, "Nàng gi, Galile byù

rayuq nghut é yanmai, haû hpúng má é byù rayuq hkyak nghut lê." ga taî akô.

<sup>71</sup> Haû hkûn, yhang gi, yhanggùng yhang nhing luí, "Haû nungmoq taî é byù lé, ngò a sé." ga dakam ri.

<sup>72</sup> Haû u yhang, woq radàm dum tun kat bê nghut ri. Haû mù, Petruq gi, "Woq í dâm a tún shimá, nàng, Ngo lé sum dâm he-ngik pyám râ nghut lê." ga, Yesuq, yhang lé taî é dang lé, myit bûn kat mù, wum kat ngau ri.

## 15

*Pilat Hí Má Yesuq Jé Nyi É Hkyô*  
*Mht 27:1-2, 11-26; Luk 23:1-5, 13-25; Yhn 18:28-19:16*

<sup>1</sup> Haû napkyó noq za má, hkyangjong agyi pé gi, suwún wuî, tarâ sará pé, Yudaq byin tú wapdoq gón bang eq rahá kut, chôm bóng yú kômù, Yesuq lé tuí yú luí, shuî htoq é kômù, mauzau Pilat chyáng é ap byi akô nghut ri.

<sup>2</sup> Pilat gi, Yesuq lé, "Nàng gi, Yudaq byu pé é hkohkâm nghut lê lú?" ga myi jáng, Yesuq gi, "Nàng taî é eq rajung za nghut lê." ga, tú taî ri.

<sup>3</sup> Haû hkyangjong agyi pé gi, Yhang lé mara gyai myo shoq chôm hun akô.

<sup>4</sup> Haû mù, Pilat gi, Yesuq lé, "Wú aq, yhangmoq, nàng lé mara haû myhó hun nyi le, nàng, haî le a tú taî lú?" ga myî ri.

<sup>5</sup> Nghut kôlhang, Yesuq gi, haî le a tú taî kut jáng, Pilat gi, maú byuq bê nghut ri.

<sup>6</sup> Haû Lhoqlhai Poí u lé, mingbyû wuî dúng é htóng byù rayuq yuq lé, mauzau mai lhaq lhoq htoq byi byi kut é htung joq ri.

<sup>7</sup> Haû hkûn, Barabaq gâ é byù rayuq gi, gumlau gabyông é hkûn, byù sat é gumlau bang eq rahá, htóng gyó tô ri.

<sup>8</sup> Byù hpúng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi râ matú, dúng akô.

<sup>9</sup> Haû mù, yhang gi, "Yudaq byu pé é hkohkâm lé nhang htoq kat byi râ lé, nungmoq ô nau akô lú?" ga myî ri.

<sup>10</sup> Pilat, haû su ga myî é gi, haû hkyangjong agyi pé, Yesuq lé manôn kôluí,

§ 14:62 Loqyo hkyam gâ é gi, ahko ahkáng wó é jowò lé gâ é nghut lê. \* 14:62 Mhuthtui ji mù, mauhkûng mai lé lo é gâ é gi, Danielaq 7:14 má bò lê. † 14:68 Chyúmding ra-am má Haû hkûn jáng, woq tún bê nghut ri gâ é le bo ri.

yhâng chyáng lé ap byi kô é hkyô lé sê é yanmai nghut ri.

11 Nghut kôlhang, haû hkyangjong agyi pé gi, Barabaq lé sheq nhâng byi râ matú, Pilat chyáng dung kó sháng gaq ga, haû byù moq mó lé i-myt lhoq toq byi akô.

12 Pilat gi, "Haû jáng, nungmoq mai Yudaq byu pé é hkohkâm ga sù yuq lé, ngò hkâsu kut râ lú?" ga yhangmoq lé myi ri.

13 Haû hkûn, yhangmoq gi, "Yhang lé tapzîng má jén sat pyám aq." ga chôm garu akô.

14 Haû jáng, Pilat gi, "Haî mù luí lú? Yhang haî kut shut bê lú?" ga dum myi jáng, yhangmoq gi, htê mó èq, "Yhang lé tapzîng má jén sat pyám aq." ga je riyhang garû lo bum akô nghut ri.

15 Pilat gi, haû byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzîng má jén sat pyám râ matú, ap byi kat bê nghut ri.

*Gyezô Pé Gi, Yesuq Lé Rhoi É Hkyô  
Mht 27:27-30; Yhn 19:2-3*

16 Gyezô pé gi, Yesuq lé, Pretori yhumwàng (mauzau hpô é yhumwàng) mó hkaû má shuí wang ló kômù, gyedap gón lé ji tsîng yu akô.

17 Hau htâng, yhangmoq gi, Yesuq lé buhîng nè radung hut byi mù, zujanmaú saí yù kôluí, Yhâng é ulhum má tsung byi akô.

18 Hau htâng, yhangmoq gi, "Yudaq byu pé é hkohkâm hpó ê! Chyung hîng xê hing nyi sháng gaq ô!" ga wut garû akô.

19 Hau htoq agó, yhangmoq gi, Yhâng é ulhum má dumbáng èq adàm dàm bat kômù, sôkan byé gyun luí, Yhâng hí má hkyihput htuq mù, paí mhaû akô nghut ri.

20 Yhangmoq gi, Yhang lé rhoi jihkyoi ban kut yù kôjáng, Yhang wut tô é buhîng nè lé hkyut yù kômù, Yhâng é mebu lé dum hut byi luí, tapzîng má jén sat pyám râ matú, Yhang lé shuí htoq e ló bekô nghut ri.

*Yesuq Lé Jén Pyám É Hkyô*

*Mht 27:31-44; Luk 23:27-43; Yhn 19:17-27*

\* 15:23 Mura gi, chi wó kut jung xù nghut lhê. ☆ 15:28 Esai 53:12 † 15:28 Bun zo shí gi, chyúmding axau ra-am pé má za bo é nghut lhê.

21 Alesander eq Ruhpu nhiktang é yhângwa, Kuruni myuq byù nghut é Simun ga sù gi, yosô wà mai lò mù, haû jowò mai laí ló ri. Haû hkûn, gyezô pé gi, yhang lé, tapzîng waq nhang akô nghut ri.

22 Yhangmoq gi, Yesuq lé, Golgahta gâ é jowò má shuí e akô (Golgahta gâ é gi, ugyap joq é jowò lé gâ é nghut ri).

23 Hau htâng, yhangmoq gi, Yhang lé, mura\* eq nyhò tô é tsibiyiq wing huq akô; nghut kôlhang, Yhang gi, a lhom shuq byi nghut ri.

24 Hau htâng má, yhangmoq gi, Yhang lé tapzîng má jén tap to kôluí, Yhâng é mebu pé lé, hkyin shosé shê mù, âng é dông gam yu pyám byi akô nghut ri.

25 Yhangmoq, Yesuq lé tapzîng má jén tap pyám é hkûn gi, napkyó gau hkyíng nghut bê nghut ri.

26 Hau htoq agó, Yhang lé mara hun é dông kê tap to kô é gi, "YUDAQ BYU PÊ É HKOHKÂM" gâ ri.

27 Yhangmoq gi, damyaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzîng htoq má jén tap tô akô nghut ri.

28 (Haû gi, "Yhang gi, yubak dap bâng chyáng nghap lhôm é hui bê nghut ri."\* gâ é Chyúmdang lé lhoq dik é nghut ri.)†

29 Hkyô sô laí ló é bang gi, nyhap é dông u-ngut ngut mù, taí kô é gi, "Noqkuq yhûm lé hpyoq pyám luí, sum nyí gyoro má dum wó saí lhê ga Sû ê!

30 Náng gùng nàng hkyi yù luí, tapzîng mai gyó lò wú aq mhaí!" ga akô nghut ri.

31 Haû eq rajung za, hkyangjong agyi pé eq tarâ sará pé le, yhangmoq hkaû má, "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung!

32 Nga-nhúng wó myâng mù, lumjîng râ matú, shí, Israelaq byu pé é hkohkâm, Hkrisduq gi, tapzîng mai gyó lo wú sháng gaq." ga, Yhang lé rhoi dang taí akô. Yhang eq rahá tapzîng má jén tap to huí é su nhik le, Yhang lé rhoi dang taí akô nghut ri.

*Yesuq, Shi É Hkyô*

*Mht 27:45-56; Luk 23:44-49; Yhn 19:28-30*

<sup>33</sup> Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri.

<sup>34</sup> Myinhâng sum hkyíng jé é hkûn, Yesuq gi, "Eloi, Eloi, lama sabakhtani."\* ga, htê mó èq garû kat ri. Haú é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyâm tô lhê lú?" ga é nghut ri.

<sup>35</sup> Haú nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taí akô.

<sup>36</sup> Haú hkûn, byù rayuq gi, din e ló mù, wuimau lé tsibiyiq wing chyín má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nga-nhúng chôm láng wú sháng." ga taí ri.

<sup>37</sup> Yesuq gi, htê mó èq garû kat luí, kâng byit byuq bê nghut ri.

<sup>38</sup> Noqkuq yhûm mâ é pán-gyang gi, ahtoq mai a-ô í hkyam byáng dut byuq bê nghut ri.

<sup>39</sup> Yesuq é hí má yap tô é shô up gyezau hpó gi, Yesuq é garu htê lé wó gyo mù, Yhang hkâsu kut shi é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga taí ri.

<sup>40</sup> Myiwe wui ra-am gi, we we mai wú nyi bum akô. Haú bang má, Magadalaq wà mâ é Mariq, Yakuq tiq sù yuq eq Yose nhiktang é yhangnu Mariq eq Salome pé le bo akô nghut ri.

<sup>41</sup> Haú bang sum yuq gi, Galile mau má, Yesuq htâng cháng mù, Yhâng râ é hkyô pé lé châng kut byi é bang nghut akô. Yesuq eq rahá, Yerusalem wà mó má doq lé lo é myiwe wui, góbang myo myo le haú má nyi tô bum akô nghut ri.

*Yesuq Lé, Myhup Pyâm É Hkyô*

*Mht 27:57-61; Luk 23:50-56; Yhn 19:38-42*

<sup>42</sup> Haú nyí gi, Hên Lajang Buinyi (Bánno buinyi é hí nyi) nghut ri. Haú mù, myinhâng jé lô jáng,

\* 15:34 Hkya-on 22:1

<sup>43</sup> Yudaq uphkâng hpúng má bo é, aróng wó é, Garai Gasâng é mingdán lé láng nyi é sù, Aramahti wà byù Yosep gi, myit wum lhoq kíng yù mù, Pilat chyáng wàng luí, Yesuq é gungsôm lé è dúng ri.

<sup>44</sup> Pilat gi, Yesuq shi bê gâ é hkyô lé wó gyo jáng, mau byuq ri; haú mù, yhang gi, shô up gyezau lé wut yù mù, Yesuq shi teng bê lú ga myi ri.

<sup>45</sup> Shi teng bê hkyô lé, shô up gyezaú chyáng mai wó sê yù jáng, Pilat gi, Yesuq é gungsôm lé yù râ ahkáng, Yosep lé byi kat ri.

<sup>46</sup> Haú mù, Yosep gi, pán yúng lé wui yù luí, gungsôm lé yu hkyó mù, htup yup luí, luqgok lé kyúng tô é lup hkaú má è kat tô ri. Hau htâng, yhang gi, luphkum má, luqlông èq lhêng chí pyâm tô ri.

<sup>47</sup> Magadalaq wà mâ é Mariq eq Yose é yhangnu Mariq gi, Yesuq lé, hkâmá lheq tô é lé, é myang akô nghut ri.

**16***Dum Dui Toq Lo É Hkyô*

*Mht 28:1-8; Luk 24:1-12; Yhn 20:1-10*

<sup>1</sup> Bánno buinyi lai jáng, Magadalaq wà mâ é Mariq, Yakuq é yhangnu Mariq eq Salome pé gi, Yesuq é gùng má, è but byi râ matú namngón jung è wui akô.

<sup>2</sup> Bánno buinyi htang napkyó bui htoq lo é hkûn yhang, yhangmoq gi, lup shut e ló akô.

<sup>3</sup> Yhangmoq gi, "Luphkum mâ é luqgok lé, ó yuq chyún lhêng pyám byi râ lú?" ga, rayuq eq rayuq taí lhum akô.

<sup>4</sup> Nghut kôlhang, yhangmoq tu wú kat kô é hkûn, luqlong haú gi, lhoq lhêng to láng é lé, myàng akô nghut ri; luqlong haú gi, gyai kô é nghut lhê.

<sup>5</sup> Yhangmoq gi, lup hkaú má wang è kô é hkûn, hpyu é buhíng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

<sup>6</sup> Haú hkûn, haú yuq gi, "Hkâgyuq dàn kó! Nungmoq gi, haú tapzîng má jén sat huí é, Nazaret wà byù Yesuq lé ho akô, a nghut lú? Yhang dui toq ló bê! Yhang gi, shí má a nyi lo. Yhang lé, lheq tô é jowò lé wú wú keq.

<sup>7</sup> Ahkuî, nungmoq gi, ló mù, 'Yesuq gi, nungmoq hí má, Galile mau shut so láng râ nghut lhê. Nungmoq lé, Yhang taî tô é eq rajung za, nungmoq gi, Yhang lé haú má ló myâng kó râ nghut lhê.' nghû, Yhâng é chángzô pé eq Petruq lé ló taî kyo keq." ga lhom taî kat ri.

<sup>8</sup> Haú mù, myiwe myhí haú bang gi, byòdàn gyuq nán é eq, lup mai hpanq htoq ló akô; yhangmoq gi, lûm gyuq byuq kô é yanmai, ó yuq lé lé, haí le a taí kó nghut ri.

(Bun zo 9 mai 20 jé shoq gi, chyúmding axau ra-am pé má a bo é nghut lhê.)

### *Yesuq Htoq Shit É Hkyô*

*Mht 28:9-10, 16-20; Luk 24:13-53; Yhn 20:11-23; Lagyo 1:6-11*

<sup>9</sup> Yesuq gi, Bánno buinyì htang napsûn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mâ é Mariq lé hí htoq shit ri.

<sup>10</sup> Mariq haú gi, ló mù, haú Yesuq eq nyi laí lò bê bang, yón ngau nyì kô é hkûn, haú hkyô lé ló taî kyô ri.

<sup>11</sup> Yhangmoq gi, Yesuq dum dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlhang, a jing kó nghut ri.

<sup>12</sup> Hau htâng má, Yesuq gi, yosô wà shut htoq e ló nyi é chángzo í yuq lé, gotû gunghkyâng dong htoq shit ri.

<sup>13</sup> Haú nhik gi, taú lò mù, gotû chángzô pé lé haú hkyô lò shit kyo akô; nghut kôlhang, yhangmoq gi, haú lé le a jing byi kó nghut ri.

<sup>14</sup> Hau htâng má, Yesuq gi, haú chángzo raxe rayuq baú za zang zô nyì kô é hkûn, yhangmoq chyáng lé htoq shit ri. Yhangmoq chyáng lumjing myit a bò kô é yanmai le, Yhang dui toq é htâng má, Yhang lé myang é bang taî kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

<sup>15</sup> Hau htoq agó, Yesuq gi, yhangmoq lé, "Mingkan jam shoq htoq é mù, waxâng zo wuí lhungháng lé, haú gabú danglù hko kyo keq.

<sup>16</sup> Lumjing mù, wui-myhup hkâm yu é sù ó yuq nghut kôle, hkyi yu é hui râ nghut lhê.

Nghut kôlhang, a lumjing é sù ó yuq nghut kôle, mara byi é hui râ nghut lhê.

<sup>17</sup> Lumjing é bang wó kut shit râ kumlhá pé gi, Ngá é mying lé lang luí, nat gâng pé lé wó hkat htoq kó râ eq laklaí é mying pé lé dat nyò kó râ nghut lhê;

<sup>18</sup> yhangmoq gi, lhangmuì pé lé le, wó kui zui kó râ nghut lhê; muí shi jung duq lé, shuq kôlhang, haí dut kó râ a nghut. Nò bâng é htoq má, yhangmoq é loq ke byi jáng, nò bang ge byuq kó râ nghut lhê." ga taí ri.

<sup>19</sup> Haú Yhumsîng Yesuq gi, yhangmoq lé dang ban taí é htâng má, mauhkûng shut shuí toq yu é hui luí, Garai Gasâng é loqyo hkyam má zung to bê nghut ri.

<sup>20</sup> Hau htâng, haú chángzô pé gi, htoq é mù, jowò hkangmó má mungdang ê hko kyô akô nghut ri; haú Yhumsîng gi, yhangmoq eq rahá nghut nyì mù luí, Yhâng é mungdang têng é hkyô lé tân shit râ matú, yhangmoq lé, kumlhá pé wó kut é a-tsam byi é nghut ri. Amen.

## LUKAQ é Gabú Danglù Laiká (The Gospel of Luke)

<sup>1</sup> Aróng wó dik é sù Htohpilug ê, ngamoq chyáng dut lai lò bê hkyô pé lé, sâng-hi mai yhumsing myoq eq yhang, myang é bang eq, mungdang wùn waq é bang mai shap kyô gyó lô mù luí,

<sup>2</sup> byù myo myo gi, shikut luí kê to bekô nghut ri.

<sup>3-4</sup> Ngò le haú pé banshoq lé awang mai ahpyo hpyot jihkúm nuqguq ho myí yù luí, nàng wó sê yu to bê hkyô pé gi, je lhoq gîng é dut sháng gaq nghû, nàng é matú banshoq tok za kê kat byi râ lé, ngò wó myit ri.

*Wui-myhup Sará Yohan Hku Lé Lô Râ Gà É Hkyô*

<sup>5</sup> Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myí gi, Arun amyû mâ é, Elizabet ga sù nghut ri.

<sup>6</sup> Haú nhik gi, Yhumsing Garaí é jep é tarâ eq htúngtarâ banshoq lé, rago za cháng mù, Garaí Gasâng é hí má dingmán é su nhik nghut akô.

<sup>7</sup> Nghut kôlhang, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko bekô nghut ri.

<sup>8</sup> Ahkuí, Zahkariq gi, dum lhing hkyuq lo é hkyangjong mù lé, yhâng é hpúng eq rahá, Garaí Gasâng é hí má lé zui le,

<sup>9</sup> haú Yhumsing é noqkuq yhûm ahkaú má namngón hkungga ê wang nyhé râ matú, hká yuq nghut râ lé hkyangjong pé é htúngli eq rajung za byù hkyîn shosé she wú é hkûn, yhâng chyáng âng ri.

<sup>10</sup> Haú mù yhang namngón hkungga lé nyhé é u lé, shiwa byù banshoq gi, yhumpán má, kyûdûng nyi akô.

<sup>11</sup> Haú hkûn, Yhumsing Garaí é mau-mang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri.

<sup>12</sup> Zahkariq gi, maumang lagyo haú lé myàng jáng, dan gyuq nyi ri.

<sup>13</sup> Nghut kôlhang, maumang lagyo gi, "Zahkariq ê, hkâgyuq, nàng é kyûdung dang lé Garaí Gasang gyo byi bê. Haú mù luí, nàng é yhumsing myhí Elizabet gi, nàng é matú yuqzo rayuq bau byi berâ nghut lhê; nàng gi, yhang lé Yohan nghû myhíng byi ra râ nghut lhê.

<sup>14</sup> Yhang gi, nàng é matú gabú hpo eq nguingón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê.

<sup>15</sup> Hkâsu mù gâ le, yhang gi, haú Yhumsing Garaí é hí má ahko ahkáng wó mù luí, byù mó dut râ sù nghut lhê. Yhang gi, tsibiyiq wing eq íhpe lé ge shuq râ sù a nghut; yhâng nû é unghkaú mai yhang, Choyiyúng Woi-nyí eq byíng nyí râ sù nghut lhê.

<sup>16</sup> Yhang gi, Israelaq yhangzo yhangshû pé myo myo lé, Yhumsing yhangmoq é Garaí Gasâng chyáng lhing lò nhâng râ sù nghut lhê.

<sup>17</sup> Íwâ pê é myit nihklhum lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luí, haú Yhumsing jé lé râ matú hen tô é byù myû dut nhâng râ matú, Yohan gi, Eliyaq é woi-nyí wum-o wó é eq, Yhumsing é hí má e ló râ nghut lhê." ga luí, yhang lé taí ri.

<sup>18</sup> Haú hkûn, Zahkariq gi, "Haú hkyô lé ngò hkâsu kut wó sé râ lhú? Ngò le mang byuq bê, ngâ é yhumsing myhí le asak ipyat ko bê." ga luí, maumang lagyo lé tû taí ri.

<sup>19</sup> Maumang lagyo haú gi, "Ngò gi, Garaí Gasang eq rahá nyi é sù Gabrielaq nghut lhê. Nang lé gabú danglù shí taí kyo aq ga luí, Yhang, ngo lé nhang kat é nghut lhê.

<sup>20</sup> Ahkyíng jé jáng, ngá dang gi, gè gè dut lò râ nghut lhê. Dang shí pé lé nàng a lumjíng é yanmai, mú haú dut lo é buinyí jé shoq, nàng gi, nhut jit byuq râ nghut lhê." ga luí, yhang lé tû taí ri.

<sup>21</sup> Haú u, shiwa byu pé gi, Zahkariq noqkuq yhûm ahkaú má haú-í myáng shoq lúng byuq é hkyô lé lánng máu nyi akô.

<sup>22</sup> Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haú mù luí, yhangmoq gi, noqkuq yhûm ahkaú má yhang myoqwup



shing-rán rajung jung myàng ang bê lé, wú sê yu akô nghut ri.

<sup>23</sup> Ahkuí, Zahkariq gi, hkyangjong jong âng é buinyi ngap jáng, yhûm shut dum taû ló byuq bê.

<sup>24</sup> Hau htâng má, yhâng é yhumsing myhí Elizabet gi, zogûng dut lò mù luí, hká le a htoq e za lhamó ngo hkyap yhúmkaû má lúng byuq ri.

<sup>25</sup> Haú hkûn, yhang gi, "Byu pê hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é dông mai huí sêng pyám byi é buinyi má, Yhang ge é hkyô lé, ngo lé tân shit bê nghut ri." ga taí ri.

### *Yesuq Hku Lé Lô Berâ Gâ É Hkyô*

<sup>26</sup> Ahkuí, Elizabet zogûng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wà má nyi é, zomyi gyíng rayuq chyáng nhang kat ri.

<sup>27</sup> Zomyi hau é mying gi, Mariq gâ ri; yhang gi, Dawiq amyû má é Yosep gá su èq dúng tô é zomyi nghut ri.

<sup>28</sup> Maumang haú gi, Mariq chyáng jé jáng, "Mariq ê, nguingón nyi sháng gaq; Nàng, hkungsô wó nyi ri; Haú Yhumsing Garai gi, nàng eq rahá nyi nyi ri ò!" ga taí ri.

<sup>29</sup> Mariq gi, dang haú lé gyo sing nán mù, shí su gâ é dang gi, haí jung gá naú é nghut lhê lhú ga luí, myit máu nyi ri.

<sup>30</sup> Haú hkûn, haú maumang lagyo gi, "Mariq ê, hkâgyuq, nàng gi, Garai Gasang é hí má myoqdong wó bê nghut ri.

<sup>31</sup> Wú aq, nàng zogûng dut lò mù luí, yuqzo rayuq bau râ nghut lhê. Yhâng é mying lé gi, 'Yesuq' nghu luí, nàng myhing byi ra râ nghut lhê.

<sup>32</sup> Yhang gi, hpung bô sù dut râ nghut mù, Myhang htáng htúm Su é Yhangzo gâ é hui râ nghut lhê. Yhumsing Garai Gasang gi, yhang lé, yhâng é ichyí îwa Dawiq é hkohkâm tanghkuq lé, byi râ nghut mù luí,

<sup>33</sup> Yhang gi, Yakup yhûm\* lé hkâ-nhám le ru-up nyi râ nghut lhê. Yhâng é mingdán le htum nghu é joq râ a nghut." ga luí, yhang lé taí ri.

\* **1:33** Yakup yhûm nghu e gi, Israelaq amyû lé gâ lhê.

<sup>34</sup> Haú hkûn, Mariq gi, "Ngò gi, zomyi gyíng ru nghut ashí, haú gi, hkâsu wó dut râ lhú?" ga luí, maumang lagyo lé tâ taí ri.

<sup>35</sup> Haú maumang lagyo gi, "Chyoiyung Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haú baú lò râ Chyoiyung sù le gi, Garai Gasang é Yhangzo ga kó râ nghut lhê.

<sup>36</sup> Hau htoq agó, wú aq, náng é amyû suisho baùdung myhí Elizabet lháng, mang bê le yuqgè zo wun to bê. Ahkuí, zogûng dut é lhamó hkyuq hkyap wàng bê nghut ri.

<sup>37</sup> Hkâsu mù gâ le, Garai Gasang a wó kut é haí le a joq." ga luí, yhang lé tâ taí ri.

<sup>38</sup> Haú hkûn, Mariq gi, "Yhumsing é jùnmyhí ngò nghut nyi lhê; náng é dang eq rajung za ngá chyáng dut lò sháng gaq." ga tâ taí ri. Hau htâng, maumang lagyo gi, yhâng chyáng mai ló byuq bê.

### *Elizabet Lé Mariq Ê Huí É Hkyô*

<sup>39</sup> Hau htâng hkâ-í a myáng má, Mariq gi, Yuda mau bum mau má é wà rawà shut hân hân e ló luí,

<sup>40</sup> Zahkariq é yhûm má wàng mù, Elizabet eq huí nyo lhûm ri.

<sup>41</sup> Mariq é danghtê lé Elizabet wó gyo jáng, yhâng é unghkaû má é zoshâng gi, byam chyû lo ri.

<sup>42</sup> Elizabet le, Chyoiyung Woi-nyí bying to mù luí, Mariq lé htê mó èq taí é gi, "Myiwe banshoq má, nàng gi, hkungsô wó dik sù nghut ri. Náng é unghkaû má é zoshâng le hkungsô wó nyi ri ô!

<sup>43</sup> Ngá Yhumsing é yhângnu ngá chyáng jé lé é jeju gi, hai é yanmai nghut bê lhú?

<sup>44</sup> Wú aq, náng danghtê lé wó gyo kat jáng, ngá unghkaû má é zoshâng gi, gabú luí byam chyû nyi ri.

<sup>45</sup> Haú Yhumsing taí é dang gi, gè gè dik lò râ nghut lhê ga luí, lumjing é myiwe gi, hkungsô wó nyi ri." gâ ri.

### *Mariq É Hkya-on Dang*

<sup>46</sup> Haú hkûn, Mariq gi, "Ngá é i-myt mai haú Yhumsing lé hkya-on nyi lhê,

- 47 ngá é woi-nyí le, Garai Gasang ngá é hkyi yù Sû má gabú nyi lhê.
- 48 Ngò Yhâng é jùnmyhí myit nyhum nyi é lé, Yhang myàng byi bê nghut ri.
- Wú aq, ahkuí mai ipyat dedu má, ngo lé gi, hkungsô wó nyí sù, gâ nyi bekô râ nghut lhê.
- 49 hkâsu mù gâ le, Wum-o Bo Dik é Garai Gasang gi, ngo lé mauhpo mù mó kut byi bê nghut ri, Yhâng é myìng gi, chyoiyúng nyi ri ô.
- 50 Yhang lé gyuq hoq nyí bâng é ahtoq má, Yhang shogyo nhikmyîn é hkyô gi, pyat bán hkangmó jé shoq hkâ-nhám le joq nyi râ nghut lhê.
- 51 Yhâng é wum-o bo é loq èq mauhpo mù mó pé lé tún shit bê. Yhumsing myit é hkyô má nghutbùn nyi é bang lé, Yhang lhoq pyo pyám bê.
- 52 Zaugun suwún wuî lé gi, zau zûng tanghkuq mai lhoq hkyô pyám mù, i-myit nyhùm bang lé gi, lhoq myhâng bê nghut ri.
- 53 Zòmút hui bang lé gi, ge é zoshuq gyi shoq byi tso mù, sutzè wó bang lé gi, akôm nhang kat bê nghut ri.
- 54-55 Nga-nhûng é îchýí îwâ pé lé taí tô é dang eq rajung za, Abraham eq yhangzo yhangshu pé lé, hkâ-nhám le shogyo nhikmyîn nyi râ gâ e lé myit bún nyi é yanmai, Yhâng é dui-nhâng zoshâng Israelaq byu pé lé hku baú nyi ri." ga luí, taí ri.
- 56 Mariq gi, Elizabet chyáng lhamó sum hkyap kô nyi mù luí, yhùm shut dum taú lò byuq bê.

### *Wui-myhup Sará Yohan Baú É Hkyô*

- 57 Hau htâng, Elizabet gi, zoshâng bau râ buinyi jé mù, yuqgè zo bau bê.
- 58 Yhang lé haú-í kô é jeju Yhumsing tún shit é hkyô lé, yhâng é yhumkyo buinùm wuî eq mung moq gumang wuî wó gyo kojáng, yhang eq rahá gabú nyi akô.
- 59 Ahkuí shit nyí jé jáng, yhangmoq gi, zoshâng haú lé ahpyo-kuq hpyit byi râ

matú lé kôluí, yhâng wâ é myìng eq rajung za, Zahkariq ga myhíng byi râ dâ akô.

60 Nghut kôlhang, yhâng nu gi, "A nghut, Yohan nghû sheq myhíng râ nghut lhê." ga tú taí ri.

61 Yhangmoq gi, "Náng é amyû suisho má le, haú su gâ é myìng rayuq le a bo wú shi." ga luí, yhang lé taí akô.

62 Haú hkûn, zoshâng haú lé hkâsu nghû myhíng nau lhê laq ga, yhâng wa lé loq lik lik shit mù myí akô.

63 Zahkariq gi, kâ jung longpá dúng yù mù, "Yhâng é myìng gi, Yohan nghut lhê." ga kâ shit ri. Haú mù, lhunglhâng bang gi, maú byuq bum akô.

64 Haú hkûn jáng, Zahkariq gi, nhut hkum bóng lô mù, dang wó nyô lui, Garai Gasang lé hkya-ôn nyi ri.

65 Haú su dut é hkyô lé, wó gyô é awui ayàm lhíngkyuq mâ é lhunglhâng bang gi, gyuq maú byuq bùm kômù, Yuda mau bum mau ramau gón taí pyo ló bum akô.

66 Wó gyô é lhunglhâng bang gi, haú hkyô lé yhumsing é i-myit unghkaú má kat to mù, "Zoshâng shí gi, hkâsu dut lò râ sù nghut lhê lhú?" ga myit wú nyi akô. Haí mù gâ le, haú Yhumsing é loq gi, yhang eq rahá nghut nyi é yanmai nghut ri.

### *Zahkariq É Myiqhtoi Dang*

67 Haú hkûn, zôshang é yhângwa Zahkariq gi, Chyoiyúng Woi-nyí byíng lô mù, myiqhtoi dang dong taí é gi,

68 "Haú Yhumsing, Israelaq é Garai Gasang lé hkya-on sháng ô!

Haí mù gâ le, Yhang gi, Yhâng é amyû lé, lé kûm wú mù luí, lé hkyi yù bê nghut ri.

69 Garai Gasang gi, Yhâng é dui-nhâng zoshâng, Dawiq é amyû mai nga-nhûng é matú wum-o bo é hkyi yu é hkyuú† lé, yuq htoq lô nhâng bê.

70 Shí hkyô gi, a-nham pyat mai yhâng é chyoiyúng myiqhtoi pê é nhut mai taí tô é eq rajung za nghut ri.

71 Haú hkyuú gi, nga-nhûng lé nga-nhûng é gye pê chyáng mai le, a nguì a nau

† 1:69 Hkyi yu é hkyuú gi, Yhumsing Yesuq lé taí é nghut ri.

bang banshoq é loq mai le, hkyi yù râ nghut lhê.

72 Îwa Garai gi, nga-nhông é îchyí îwa pé lé shogyo nhikmyin hkyô lé tân shit râ matú, Yhang byí tô é chyoiyúng dangshikaq lé a tô-myhí nghut ri.

73 Haû gi, nga-nhông é chyiké Abraham lé byi tô é danggidiq nghut lhê.

74-75 Nga-nhông lé gye pê loq mai hkyi yù râ eq, nga-nhông asak dui tô é buinyi banshoq má,

Yhâng é hí má a gyuq a kyum é za, chyoiyúng é eq dîngmán é hkyô mai, Yhang lé wó dojaú nyí nhâng râ matú, Yhang jé lé é nghut lhê.

76 Ngá zo ê, nàng gi, Yhumsing é hí má, e ló mù luí, Yhâng é hkyô lé hen lajang byi râ sù nghut é yanmai, nang lé Myhang htáng htúm Su é myiqhtoi ga kó râ nghut lhê.

77 Nàng gi, Garai Gasâng é byu pé lé, yhangmoq é yubak mara hkyut pyám byí é dong,

hkyi yu é hui râ hkyô lé taí kyo râ sù nghut lhê.

78 Haí mù gà le, Garai Gasâng é shogyo nhikmyin é yanmai, napsûn bui† gi, mauhkông mai nga-nhông chyáng htoq lé lô râ nghut lhê.

79 Yhang gi, mauchut hkaû§ eq shí wup hkaû má lúng to bang lé builoq su duqbó byi râ eq,

nga-nhông lé nuingón simsaq é hkyô shut shuí e ló râ sù nghut lhê." ga ri.

80 Zoshâng haû gi, kô lò mù, woi-nyí wum-o bo lò luí, Israelaq byu pê chyáng htoq shit lo é buinyi jé shoq, yoso pé má nyi nyi ri.

## 2

*Betlehem Wà Mó Má Yesuq Hku Lo É Hkyô*

*Mht 1:18-25*

1 Buinyi haû pé má, Romaq hkoséng ming banshoq má é byù lhunglhang bang

gi, myìng jihpán kat râ matú, hkoséng Ketaq Augustuq chyáng mai mungdang htoq ri.

2 Jihpán haû lé sâng-hi dàm guq hi é gi, Kuireni ga sù Suriq mau má mauzau kut nyi é hkûn nghut ri.

3 Haû hkûn, byù du jup gi, myìng jihpán kat râ matú, ó le ô é wà shut ló bum akô.

4 Haû mù, Yosep le Dawiq é awut ashín nghut é yanmai, Galile mau Nazaret wà mai, Yuda mau mâ é Betlehem gà é Dawiq é wà shut,

5 yhang dúng tô é myiwe Mariq eq rahá myìng kat lhom râ matú jé doq ló akô; Mariq kúm gi, gungloq laí to bê nghut ri.

6 Haû Betlehem má nyi tô ashí le, Mariq gi, zo hkû râ buinyi jé mù, zomún yuqzo lé bau bê.

7 Yhang gi, zoshâng haû lé panchoq eq htup mù no tso langhkang má lheq tô ri; haí mù gà le, bíng yhúm má yhangmoq nyi râ jowò a joq lo é yanmai nghut ri.

*Sau Zúng Bang Yesuq Chyáng Jé Lé É Hkyô*

8 Ahkuí, haû ginwáng mâ é sau zúng zo bang gi, sau zúng jang má yhangmoq é sau hpúng lé, myín lé zúng nyi akô.

9 Haû hkûn, Yhumsing é maumang lagyo gi, yhangmoq é hí má lé htoq yap shit to mù, Yhumsing é hpungwup shíngkang gi, awui ayàm má duqbang lò luí, yhangmoq gyai gyuq bum akô.

10 Maumang lagyo gi, "Hkâgyuq kó, byù lhunglhang bâng é matú, gyai yhang gabú é danglù, ngò nungmoq chyáng wun lé lo lhê.

11 Hkû-nyí lhê buinyi má, Hkrisduq\* nghu é Yhumsing nghut é hkyi yù Sù gi, Dawiq é wà má nungmoq é matú hku to bê.

12 Nungmoq é matú kumlhá gi, zoshâng nyheqnú rayuq panchoq eq htup mù, no tso langhkang má lheq to láng ra nghut lhê." ga luí, yhangmoq lé taí ri.

13 Haû hkûn jáng yhang, mauhkông bang rajùm rayò htoq lò mù, maumang lagyo haû eq rahá Garai Gasang lé hkya-ôn é dang gi,

† 1:78 Napsûn bui gà é gi, Yesuq lé taí é nghut lhê. § 1:79 Mauchut hkaû gà é gi, Garai lé a sé mù woi-nyí má shi tô é bang lé gà lhê. \* 2:11 Grik dong Hkrisduq gà é gi, xù but hui Sù gà é lichyúm nghut mù, Hebre dong "Mesaia" gà é eq rajung za nghut lhê.

14 "Htoq tsáng myhâng má, Garai Gasang gi, hpungwup shingkang bo nyi sháng gaq ô!

Myigùng htoq má le, Yhang ô nau é byu pé má, nguingón é gi, hkâ-nhám le joq nyi sháng gaq ô!"  
gâ akô.

15 Maumang lagyô pé, yhangmoq chyáng mai, mauhkûng shut dum ló byuq jáng, sau zúng bang gi, "Sà! Betlehem wà mó má jé shoq yhang, nga-nhúng ê mù, ahkuí za Yhumsing nga-nhúng lé lé shit kyô lai ló bê hkyô lé é gôn wú sháng." ga luí, rayuq eq rayuq tái lhûm akô.

16 Hau htâng, yhangmoq gi, hân hân ê luí, Mariq eq Yosep lé le, no tso langhkang má lheq tô é zoshâng nyheqnú lé le, ê myàng akô.

17 Zoshâng haû lé, yhangmoq myàng kôjáng, zoshâng haû eq séng luí yhangmoq lé, lé tái kyô é dang lé, tái pyô kat bekô.

18 Wó gyô é bang banshoq gi, haû sau zúng bang tái kyô é dang lé, maú byuq bum akô.

19 Mariq kúm gi, dut lo é hkyô pé eq wó gyô é dang banshoq lé unghkaû má matsing yù mù luí, nik nik myit wú nyi ri.

20 Sau zúng bang gi, yhangmoq lé maumang lagyo tái kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum tái ló bekô nghut ri.

### *Yesuq Lé, Noqkuq Yhûm Má Shuí E Ê Hkyô*

21 Zoshâng haû, shit nyí jé mù ahpyo-kuq hpyit byi rá buinyí má, yhang unghkaû má a lúng shi mai maumang lagyo myhâng tô é mying eq rajung za, yhang lé, "Yesuq" ga luí, myhíng byí akô.

22 Mosheq é tarâ eq rajung za, yhangmoq é lhoq san lhoq sêng é buinyi byíng jáng, Yhumsing é tarâ má, "Zomún yuqzo hkangmó gi, haû Yhumsing é hí má chyoiyúng sù wó nghú rá matú, Yhumsing chyáng é ap byi rá lhê." ✧ gâ é eq,

23 "Hpûngkyui razúm, haû a nghut jáng, nghoqmyhú zo í du," ✧ hkungga byi rá lhê ga kâ tô é eq rajung za,

24 Mariq eq Yosep gi, zoshâng haû lé shui mù Yerusalem wà mó shut ê akô.

25 Haû hkûn, Simeon gâ é mangzo rayuq, Yerusalem wà mó má nyi ri. Haû yuq gi, dingmán é eq tarâ cháng sù nghut mù, Israelaq lé nhik lhoq títg rá ahkyíng lé láng nyí sù nghut ri; haû Chyoiyúng Woi-nyí le, yhâng é ahtog má nyi nyi ri.

26 Yhang gi, haû Yhumsing Hkrisduq lé a myang é za, shí rá a nghut, ga Chyoiyúng Woi-nyí eq tân shit tô é hui sù nghut lhê.

27 Yhang gi, Chyoiyúng Woi-nyí eq shui mù, noqkuq yhúmhaû má ê jé nyi tô é hkûn lé, Mariq eq Yosep gi, zoshâng Yesuq lé htung tarâ eq rajung za kut byi rá matú, noqkuq yhúmhaû má shuí wang ló kôjáng,

28 Simeon gi, zoshâng lé loq eq lhom bún yù mù, Garai Gasang lé hkya-on é dang gi,

29 "Yhumsing ê, náng é danggidiq gi, dik bê nghut ri; hkû-nyí náng é jùn ngò gi, nguingón é eq wó shi ló berâ nghut lhê.

30 Haî mù gâ le, byù lhunglhâng bâng é matú, nàng lajang tô é hkyi yù hkyô lé, ngá myoq eq yhang wó myàng bê.

31 Haû gi, byù myú chângjup wó myàng rá matú, nàng lajang to byí é nghut mù,

32 tûngbàu pé lé, tengmán hkyô má bui su duqbó mù hpông shit rá matú le, náng é amyú Israelaq é hpungwup shingkang matú le nghut nyi ri."

gâ ri.

33 Yhângnu eq yhângwâ nhik gi, zoshâng Yesuq é hkyô lé Simeon tái é yanmai, maú byuq akô.

34 Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shí gi, Israelaq ming má é byù myo myô é matú lingbat jowò eq myo myô é matú kô lò myhang lò rá hkyô le, byù myo myo tái he pyám rá kumhá matú le, hkyin tô é hui sù nghut ri.

35 Haû mù, byù myo myô é unghkaû má, myit mi-myit lé lhoq htoq shit rá nghut lhê. Náng é myit nhiklum má, shâm chûn eq htaû kyâng kat é su gâ é lé, nàng hui zo rá nghut lhê." ga tái ri.

36 Ashe amyú má é Hpanuelaq é yhangzo, Annaq gâ é myiqhtoí myhí rayuq

nyi ri; yhang gi, ipyat gyai ko bê. Yhang gi, zomyi pyat mai, yhanglâng eq nyhit zân za nyi luí, shit xe myi zân jé shoq chuimó mó nyi to sù nghut ri.

<sup>37</sup> Myiwe haú gi, noqkuq yhúm mai a htoq ê za, nyí myín a ga noqkuq dojaú nyi mù, zoshuq gám luí kyûdûng nyi ri.

<sup>38</sup> Simeon dang ban taí jáng, Annaq gi, hui lé lô mù, Garai Gasâng jeju lé hkya-on luí, Yerusalem wà mó lé Garai Gasang hkyi yù râ gâ é lé, myit lum to bang lhungháng lé, zoshâng hau é hkyô taí kyô ri.

<sup>39</sup> Yosep eq Mariq gi, kut râ pé lé haú Yhumsing é tarâ joq é dông ban kut jáng, Galile mau mâ é yhangmoq wà Nazaret shut dum taú lô bekô.

<sup>40</sup> Zoshâng haú gi, kô lò mù, wum-o bò lo é eq, hpaqchyí byéng-yá le byíng nyi ri. Garai Gasâng jeju le, Yhâng é ahtoq má joq nyi ri.

### *Noqkuq Yhúmhaú Má Zoshâng Yesuq Jé Nyi É Hkyô*

<sup>41</sup> Yhângnu yhângwâ nhik gi, Lhoqlhai Poí jé hkangmó, zàn wui Yerusalem wà mó má ê ê kut akô.

<sup>42</sup> Yesuq raxe í zân jé jáng, poí haú, ê bo lòm ra htungli joq é eq rajung za, yhangme wui yhanghpe wui doq lô akô.

<sup>43</sup> Haú poí buinyi lai luí, dum taú lo é hkûn, zoshâng Yesuq gi, Yerusalem wà mó má nyi gyó tô ri; nghut kôhang, yhângnu yhângwâ nhik gi, a sé kó.

<sup>44</sup> Yesuq lé rahá lo é luzúm wui chyáng bò râ su ngàm kômù luí, Yosep eq Mariq gi, raní buigyùm chap sô lô bé htâng má, mung moq wui eq, sê lhúm é buinùm ji-myi wui chyáng Yhang lé châng ho akô.

<sup>45</sup> Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taú jé e lô bekô.

<sup>46</sup> Ahkuí, sum nyí nghû râ nyí sheq, noqkuq yhúmhaú má, tarâ sará pé é gung gûng má zùng to mù, yhangmoq é dang lé gyo yù luí, dum taú myi myi kut nyi é lé, yhangnhik é myàng akô.

<sup>47</sup> Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tû taí é dang lé le, maú nyi akô.

<sup>48</sup> Yhang lé myàng jáng, yhangnhik maú byuq kômù luí, yhângnu gi, "Ngá zo ê, haí mù luí ngá-nhik lé isu kut lhê lhú? Wú aq, náng wa eq ngá-nhik gi, myit myo myit chiq é eq, nàng lé jaq châng ho pyám bê." ga luí, Yhang lé taí ri.

<sup>49</sup> Yhang gi, "Haí mù luí, ngo lé châng ho akô lhú? mauhkûng mâ é ngá Wâ é yhúm má ngò nyi râ lhê le gi, nungnhik a sé kó lhú?" ga luí, yhangnhik lé tû taí ri.

<sup>50</sup> Nghut kôhang, yhangnhik gi, Yesuq taí é dang lichyúm lé, a sé gyo kó.

<sup>51</sup> Yesuq kúm gi, yhangnhik eq rahá Nazaret wà shut taú jé gyó lô luí, yhangnhik nyo é dang lé gyo mù nyi tô ri. Yhângnu Mariq gi, dut lai lò bê hkyô pé banshoq lé, yhâng é myit nhiklum má matsing tô ri.

<sup>52</sup> Yesuq gi, hpaqchyí byéng-yá kûng zet lo é eq, gunghkyâng kô myhang lò mù, Garai Gasâng é hí má le, byu hí má le, myoqdong wó lo nyi ri.

## 3

### *Wui-myhup Sará Yohan Mhoqshit É Hkyô*

*Mht 3:1-12; Mrk 1:1-8; Yhn 1:19-28*

<sup>1</sup> Romaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má;

<sup>2</sup> Anna eq Kayahpaq gi, hkyangjong mó mù má, kut nyi akô. Haú hkûn, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri.

<sup>3</sup> Haú mù, yhang gi, Yodan làng yàm jowò hkangmó má, sô jón wún luí, yubak mara hkyut pyám byí é hui râ matú myit lhîng mù, wui-myhup hkâm\* yù râ hkyô lé, hko kyô nyi ri.

<sup>4</sup> Haú gi, myiqhtoi Esai-aq laiká má, "Haú yoso má, byù rayuq garú taí é htê gi, 'Haú Yhumsing é matú, hkyô hen to keq, Yhâng é matú hkyô lhoq nyhang to keq;

\* 3:3 Wui-myhup hkâm gâ é gi, baptisma lé gâ é nghut lhê.

5 wuìhkung langhkop hkanmó lé lhoq pyíng ra râ nghut lhê;  
bùm eq wingkáng hkanmó lé hpyit pyám ra râ nghut lhê;

agoí aguq é hkyô hkat hkanmó lé lhoq nyhâng ra râ nghut lhê;  
ahkung ahkop dut é hkyô hkat hkanmó lé lhoq rhá ra râ nghut lhê.

6 Haú hkûn, byù banshoq gi, Garai Gasâng é hkyi yù hkyô lé myàng râ nghut lhê."<sup>☆</sup>  
ga luí, kê tô é eq rajung za nghut ri.

7 Shiwa byù rajùm rayò gi, Yohan é loq má wui-myhup hkâm yù râ ga luí htoq lé lô kôjáng, Yohan taí é gi, "Duq htan é lhangmuí amyû pé<sup>†</sup> ê, jé lô râ yubak dam mai wó hfang lut kó sháng gaq ga, nungmoq lé ó yuq taí pûn é lhú?"

8 Myit lhîng hkyô eq gingdán é ashi zui keq. 'Nga-nhúng gi, Abraham é yhangzo yhangshû pé nghut lhê.<sup>‡</sup> nghû luí, yhum-sing é i-myit unghkaú má hkâtaí kó. Hkâsu mù gâ le, ngò, nungmoq lé taí kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê.

9 Ahkuí lháng, Garai Gasang gi, Yhâng é wazung lé haú siggâm wang pé má tô to bê nghut ri; haú mù, ge é ashi a zui é agàm hkanmó lé gi, htuoq lhêng pyám mù, myi má dú kat pyám râ nghut lhê." gâ ri. §

10 Haú hkûn, shiwa byu pé gi, "Haú nghut le gi, ngamoq hkâsu kut le gè râ lhú?" ga luí, yhang lé myí akô.

11 Yhang gi, "Bu í dung wó sù gi, bu a wó sù lé, gàm byi sháng gaq; zo shuq wó sù le, a wó sù lé, gàm byi sháng gaq." ga luí, yhangmoq lé tú taí kat ri.

12 Kang guq bang le, wui-myhup hkâm yù râ ga lé lô mù, "Sarâ ê, ngamoq gi, hkâsu kut le ge râ lhú?" ga luí, yhang lé myí akô.

13 Yhang gi, "Nungmoq hkyui yù râ masat tô é htoq lai shoq hkâyû kó." ga luí, yhangmoq lé taí ri.

14 Gyezô pé ra-am le, "Ngamoq gi, hkâsu kut le gè râ lhú?" ga luí, yhang lé lé myí akô.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e ahpaú eq gé bûn nyi keq." ga luí, yhangmoq lé taí ri.

15 Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haú yuq nghut lhê laq ga yhum-sing é i-myit unghkaú má myit wú nyi bum akô.

16 Haú hkûn, banshoq bang lé Yohan taí é gi, "Ngò gi, nungmoq lé, wui eq za wui-myhup hkâm byi lhê; nghut kôlhâng, ngá htoq má wum-o a-tsam je bo é sù rayuq jé lé lô râ nghut lhê. Ngò gi, yhâng é hkyi-tsung tui lé hpyi râ lháng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkâm byi râ nghut lhê.

17 Yhang gi, loq má byò chung to mù, guq chyarâng má é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí eq nyhê hkyô pyám râ nghut lhê." gâ ri.\*

18 Haú mù, Yohan gi, byù haú bang lé gotû dang myo myo eq lhoq pun lhoq kying mù, gabú danglù lé hko kyô nyi ri.

19 Nghut kôlhâng, hkâ-myháng a myáng má mauzau Herut gi, yhanggû é yhangmyi Herudiaq lé lú yu é hkyô eq, yhang kut shut é gotû a ge é mú banshoq é yanmai, Yohan gi, yhang lé tân mhoqshit bê nghut ri.

20 Mara haú pê htoq agó, Herut dum kut jat yu é mara gi, Yohan lé htóng má lhûng kat é nghut ri.

### *Yesuq, Wui-myhup Hkâm Yu É Hkyô Mht 3:13-17; Mrk 1:9-11*

21 Yohan lé htóng má a lhûng kat shimá, byù myo myo gi, wui-myhup hkâm yu nyi kô é hkûn, Yesuq le Yohan chyáng wui-myhup hkâm yù mù, kyûdúng nyi le, mauhkûng bóng lô mù,

22 haú Chyoiyúng Woi-nyí gi, hpûngkyui gunghkyâng sù é dông mai Yhâng ahtoq má

☆ 3:6 Esai 40:3-5 † 3:7 Lhangmuí amyû pé gâ é gi, Lukaq 3:7-10 má bo é Hparishe eq Saduke pé lé taí é nghut ri.

‡ 3:8 Nga-nhúng gi, Abraham é yhangzo yhangshû pé nghut lhê gâ é gi, Abraham é yhangzo yhangshu nghut é yanmai, Garai Gasang jéyáng é lé a hui râ ga, myit yu é hkyô nghut ri. § 3:9 Bun zo shí lhûm é lichyúm gi, myit a lhîng bang

lé, Garai Gasang jéyáng é buinyi jé râ nghut lhê ga naú é nghut ri. \* 3:17 Haú eq rajung za, Hkrisduq gi, a ge é byu pé eq ge é byu pé lé gam hkoq pyám râ nghut lhê.

lé gyó nô ri. Haú hkûn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkûng mai danghtë htoq lo ri.

*Yesuq É Byù Xik Shap Kyô É Hkyô*  
*Mht 1:1-17*

<sup>23</sup> Yesuq gi, Yhang mû zuî hi é hkûn, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo,

<sup>24</sup> Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo,

<sup>25</sup> Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo,

<sup>26</sup> Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo,

<sup>27</sup> Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo,

<sup>28</sup> Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo,

<sup>29</sup> Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo,

<sup>30</sup> Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo,

<sup>31</sup> Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo,

<sup>32</sup> Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo,

<sup>33</sup> Nashon gi, Aminada é yhangzo, Aminada gi, Arni é yhangzo, Arni gi, Hesrun

é yhangzo, Hesrun gi, Hparet é yhangzo, Hparet gi, Yudaq é yhangzo,

<sup>34</sup> Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo,

<sup>35</sup> Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo,

<sup>36</sup> Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo,

<sup>37</sup> Lamek gi, Mehtusela é yhangzo, Mehtusela gi, Enuq é yhangzo, Enuq gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo,

<sup>38</sup> Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

## 4

*Yesuq Lé Tsadán Gunglaú É Hkyô*  
*Mht 4:1-11; Mrk 1:12-13*

<sup>1</sup> Yesuq gi, Chyoiyúng Woi-nyí èq byíng mù, Yodan làng mai dum taû lo é hkûn, Chyoiyúng Woi-nyí gi, Yhang lé yoso shut shuí e ri.

<sup>2</sup> Haú má, Yesuq gi, buinyi myi xê nyí jé shoq, nat Tsadán èq gunglaú é huí ri. Buinyi haú gyoro má, Yesuq gi, haí le a zô é yanmai, zòmut hui bê nghut ri.

<sup>3</sup> Haú mù luí, nat Tsadán gi, "Nàng, Garai Gasâng é Yhangzo nghut le gi, luqgok shí lé muk dut nhâng aq." ga luí, Yhang lé taí ri.

<sup>4</sup> Haú hkûn, Yesuq gi, "Byù gi, muk èq za asak dù rà a nghut." ga luí, Chyúmdang má kê tô ri."\* ga yhang lé tû taí ri.

<sup>5</sup> Hau htâng, nat Tsadán gi, Yesuq lé, gyai yhang myhang é bùm htoq má shuí doq lô mù, mingkan má joq é mingdán pé ban-shoq lé razup má za tûn shit luí,

<sup>6</sup> "Shí ahkáng ayá banshoq eq haú mingdán é hkikhkâm hkyô banshoq, ngò nang lé wó byí lhê; hkâsu mù gâ le, haú pé banshoq gi, ngo lé ap byí to bê nghut mù, ngò byí nau é sù ó yuq lé nghut kôhang, byí rà nghut lhê.

7 Haû mù, Nàng, ngo lé noq é nghut jáng, shí pé banshoq Nàng é dut râ nghut lhê." ga, Yesuq lé taí ri.

8 Haú hkûn, Yesuq gi, "'Haû Yhumsîng náng é Garai Gasang lé za, nàng noqkuq dojaú ra râ nghut lhê.'\* ga luí, Chyúmdang má kâ tô ri." ga luí, yhang lé tú taí ri.

9 Nat Tsadán gi, Yesuq lé Yerusalem và mó má shuí ê mù, noqkuq yhum je myhang é shúhtâng htoq má yap nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq.

10 Hkâsu mù gâ le,

'Nang lé upzúng byí nyí râ matú, Garai Gasang gi, Yhâng é maumang lagyó pé lé taí to râ nghut mù,

11 luqgok má náng é hkyî a ló htung shoq, yhangmoq é loq èq Nang lé lhom bún yú kó râ nghut lhê.'\*

ga luí, Chyúmdang má kâ tô ri." ga taí ri.

12 Nghut kôhang, Yesuq gi, "'Haû Yhumsîng, nungmoq é Garai Gasang lé, wó chyam wú râ a nghut.'\* ga luí, Chyúmdang má bo tô ri." ga, yhang lé tú taí ri.

13 Nat Tsadán gi, gunlaú é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

### *Yesuq Lé Nazaret Và Bang He-ngik Pyâm É Hkyô*

*Mht 4:12-17; 13:53-58; Mrk 1:14-15; 6:1-6*

14 Yesuq kúm gi, Chyoiyúng Woi-nyí wum-o byíng é èq Galile mau shut dum taú lo ri. Haú mau jowò hkanmó má, Yhâng é hkyô lé taí pyo ló bum bekô.

15 Yhangmoq é tarajong pé má, Yesuq mhoqshit byi mù, lhunghâng bang gi, Yhang lé taí hkya-ôn nyi bum akô.

16 Hau htâng má, Yhang nyi kô lo é Nazaret và má dum taú jé ló bê; Yhang gi, hkâ-nhám le kut nyi é eq rajung za, Bánno buinyì\* lé tarajong má wang ê mù, laiká nghap râ ga toq yap é hkûn,

17 Yhang lé myiqhtoi Esai-aq chyúmding byi kôjáng, Yhang chyúmding haú lé hpông kat le,

18 "Yhumsîng é Woi-nyí gi, ngá é ahtoq má nyi nyi ri;

hkâsu mù gâ le, asho awuí é bang lé gabú danglù hkô kyo râ matú, Yhang ngo lé hkyin yù bê.

Htóng lúng bang lé lhoq htoq râ hkyô eq, myoqjit bang lé myoq dum myàng nhâng râ hkyô hkô kyo râ matú le, zik zo huí é bang lé nhang kat nhâng râ eq,

19 Yhumsîng, Yhâng é byu pé lé hkyi yù râ ahkyíng zanwut lé hkô kyo râ matú le, Yhang, ngo lé nhang kat bê nghut ri."\*

ga luí, kâ tô é jowò lé myang záng mù nghap ri.

20 Hau htâng, Yesuq gi, chyúmding haú lé ding mù, shuí-u sù lé tau byí pyám luí, dum zung tô ri; tarajong mâ é byù lhunghâng bang gi, Yesuq lé chôm wú tô é hkûn,

21 Yesuq gi, "Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê." ga luí, yhangmoq lé taí hi kat ri.

22 Lhunghâng bang gi, Yhang ge é hkyô lé saksé hkám byi kômù, Yhâng é nhut mai htoq é jeju bo é dang lé le, máu kôluí, "Shí yuq gi, Yosep é yhangzo a nghut lhú?" ga taí bum akô.

23 Haú mù luí, Yesuq gi, "Nungmoq gè gè yhang, 'Chi sará ê, yhumsing gùng lé lhoq ge yù aq.'† gâ é sanghkyang èq le, 'Nàng, Kaperna-um và má kut shit wú é hkyô ngamoq wó gyo bê, haú eq rajung za, nàng, náng é yhum mau má le, kut shit wú aq.' ga luí le, ngo lé taí kó râ nghut lhê." ga taí ri.

24 Yhang dum xoq taí é gi, "Ngò, nungmoq lé teng za taí kôlé, myiqhtoi ó yuq le yhumsing é yhum mau má myoqdong wó wú é a nghut.

25 Ngò, nungmoq lé teng za taí kôlé, Eliyaq é pyat lé, Israelaq ming má chuimó myo myo nyi bum akô.

\* 4:8 Tarâ Pun 6:13 \* 4:11 Hkya-on 91:11-12 \* 4:12 Tarâ Pun 6:16 \* 4:16 Bánno buinyì gâ é gi, Yudaq byu pé nòmu é buinyì lé gâ lhê. Ahkui lhê é dông ga jáng, Bánno buinyì gi, bat htoq hkyuq nyí lé âng ri. \* 4:19 Esai 61:1-2 † 4:23 Chi sará ê, yhumsing gùng lé lhoq ge yù aq gâ é sanghkyang gi, "Mesaia nghut le gi, mauho mú wó tún shit râ nghut lhê." gâ é nghut lhê.



<sup>26</sup> Nghut kôlhang, haú ming má súm zan eq lhamó hkyuq hkyap yhang, mau a wò dut byuq mù, mutmó gyó tô é hkûn, Garai Gasang gi, yhangmoq má é rayuq chyáng le, Eliyaq lé a nhang kat é za, Sidun mau Zarephta wà má é, chuimó myhí rayuq chyáng sheq nhang kat byî é nghut lhê.

<sup>27</sup> Myiqhtoi Elisha é pyat má le, Israelaq ming má, manggâm dap é byù myo myo nyi kôlhang, yhangmoq chyáng má é rayuq le wó sâ-n-yúng yù kô é a nghut; Suriq byù Naman ga sù tûngbaù hpó za sheq wó sâ-n-yúng é nghut lhê." ga taí ri.

<sup>28</sup> Tarajong hkaû má é lhunglhang bang gi, haú hkyô lé wó gyo kôjáng, gyai yhang nhik-yo nau bùm kômù,

<sup>29</sup> toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq má é gampyoq má, ê chyûn hpyit hkyô pyám râ ga shuí e ló akô.

<sup>30</sup> Nghut kôlhang, Yesuq kúm gi, byù hpûng haú mai so hkoq htoq ló byuq bê nghut ri.

### *Agè Ashop É Nat Lé Yesuq Hkat Htoq É Hkyô*

#### *Mrk 1:21-28*

<sup>31</sup> Hau htàng, Yesuq gi, Galile mau má é Kaperna-um wà má jé é mù, Bánno buinyi má byu pé lé mhoqshit hi ló bê nghut ri.

<sup>32</sup> Yhangmoq gi, Yhang mhoqshit é hkyô lé mauhong nyi akô; hkâsu mù gâ le, Yhang gi, ahko ahkáng bo é dang dông taí nyi é yanmai nghut ri.

<sup>33</sup> Yesuq, tarajong hkaû má mhoqshit byî nyi é hkûn, nat gang wang júng é byù rayuq htê mó o mó èq taí é gi,

<sup>34</sup> "Ê, Nazaret wà byù Yesuq ê, ngamoq gi, Nang eq haí sêng lhê lhú? Ngamoq lé lhoq hten râ matú, Nang jé lé é nghut lhê lhú? Nang gi, Garai Gasâng é Chyoiyúng Sù nghut é lé, ngò sê lhê." gâ ri.

<sup>35</sup> Haú hkûn, Yesuq gi, "Hkâjop, yhang chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gûng má lhoq lheq to mù, a nô nhang é za, yhang chyáng mai htoq ló byuq ri.

<sup>36</sup> Haú mù luí, shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasû é dang

wá nghut lhê lhú? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyó jáng, haú bang htoq ló byuq akô." ga taí lhùm bum akô.

<sup>37</sup> Haú hkûn, haú mau má é awui ayàm jowò hkangmó má jàm shoq, Yhâng é hkyô lé taí pyo hù ló bùm bekô nghut ri.

### *Yesuq Nòhpyo Lhoq Gê Byî É Hkyô*

#### *Mht 8:14-17; Mrk 1:29-34*

<sup>38</sup> Yesuq gi, haú tarajong mai toq ló mù, Simun é yhùm má wang ló ri. Simun é yhâng-aumó gi, ali gyai nyé no nyi é nghut mù luí, lhoq gê byî râ matú, Yesuq lé garúm dung byî akô.

<sup>39</sup> Yesuq gi, Simun é yhâng-aumó nàm má yap to mù, nòhpyo haú lé tân kat jáng, Simun é yhâng-aumó gi, ge ló byuq bê; haú hkûn jáng, yhang gi, toq mù, yhangmoq lé gaí tso gaí huq bê nghut ri.

<sup>40</sup> Bui wang ló jáng, nòhpyo hui bang eq awáng nòhpyo ajung jung dap é bang lhunglhang lé, Yesuq chyáng shuí lé lô kômù, yhangmoq rayuq htàng rayuq é ah-toq má Yesuq gi, loq ke byi luí, lhoq gê byî ri.

<sup>41</sup> Nat gâng pé gi, Yesuq lé, "Nàng gi, Garai Gasâng é Yhangzo nghut ri." ga luí, wut taí mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó taí loshoq, Yesuq tân pyâm ri.

<sup>42</sup> Maubó lô jáng, Yesuq gi, htoq ló mù, gaú é jowò yoso hkaû má é nyi tô ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a ló byuq râ matú châng hkùm wú akô.

<sup>43</sup> Nghut kôlhang, Yesuq gi, "Garai Gasâng é mingdán é gabú danglù lé, gó wâ pé má le ngò hko kyo râ râ ashî, haú é matú, Garai Gasang gi, ngo lé nhang kat bê nghut lhê." ga luí, yhangmoq lé taí ri.

<sup>44</sup> Haú mù, Yesuq gi, Yuda mau má é tarajong pé má, hko kyô wún nyi ri.

## 5

### *Sâng-hi Ji Yù Huí É Chángzô Pé*

#### *Mht 4:18-22; Mrk 1:16-20*

<sup>1</sup> Radàm má lé, Yesuq gi, Genesarat nhông yàm má yap tô le, Garai Gasâng é mung-dang gyo râ ga, shiwa byu pé, Yhâng chyáng chyîn chyap wang lé lô kô é hkûn,

<sup>2</sup> nhông gin-gau yàm má lhaî razúm joq tô é lé, Yhang myang kat ri. Ngogûn dú bang kúm gi, lhaî mai htoq mù, yhangmoq é gùn pé lé chí nyi akô.

<sup>3</sup> Yesuq gi, Simûn é lhaî má wàng mù gin-gau mai rachyit lhoq kang nhâng luî, haû lhaî htoq má zung to mù, shiwa byu pé lé mhòqshít taî kyô nyi ri.

<sup>4</sup> Dang ban taí jáng, Yesuq gi, Simun lé, "Wuî nik é shut hui luî, ngozo wó kông yù râ matú, nungmoq é gùn pé lé dú hkyô kat keq." ga taí ri.

<sup>5</sup> Simun gi, "Yhumsîng ê, ngamoq amàn ra-myin mau shikut wú kôlhang, haî le a wó; nghut kôlhang, náng dang é yanmai, ngò gùn dú hkyô kat râ nghut lhê." ga tû taí ri.

<sup>6</sup> Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq lô râ su dut é yanmai,

<sup>7</sup> lhaî gó lhum mâ é luzúm wuî lé, lé garúm yù râ matú loq lik lik kat kôjáng, haû bang lé lô mù, haû lhaî í lhum aluq myup lô shoq ngozo lé kat pyíng bekô.

<sup>8</sup> Simun Petruq gi, haû lé myàng jáng, Yesuq é hkyî wang má hkyihput htuq mù, "Yhumsîng ê, ngá chyáng mai lô byuq aq, haî mù gâ le, ngò gi, yubak dap é byù nghut nyi lhê." ga taí ri.

<sup>9</sup> Haî mù luî gâ le, Simun le, yhang eq nyi tô é lhunglhang bang le, haû su ngozo wó yu é yanmai, maú nyi bùm kômù nghut ri.

<sup>10</sup> Simûn é luzúm nhik, Zebedi é yhangzo Yakuq eq Yohan le, haû su chôm maú byuq akô.

Hau htâng, Yesuq gi, "Hkâgyuq, ahkuî mai nàng gi, byù lé châng kóng sù dut râ nghut lhê." ga luî, Simun lé taí ri.

<sup>11</sup> Yhangmoq gi, wuiyàm má jé jáng, lhaî pé eq yhangmoq é zè banshoq lé tô pyâm to luî, Yesuq htâng châng bekô nghut ri.

*Manggâm Dap Bang Lé Yesuq Lhoq Gê Byî É Hkyô*

*Mht 8:1-4; Mrk 1:40-45*

<sup>12</sup> Radàm lé, Yesuq gi, wà rawà má nyi tô lé, ragùngdû é manggâm dap é byù rayuq

lé lo ri; haû yuq gi, Yesuq lé myàng jáng, hkyihput htuq luî, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga dúng wut ri.

<sup>13</sup> Yesuq gi, loq lhâm kat mù, haû yuq lé ê záng luî, "Ngò dóng lhê, sân-yúng aq hkoi." ga taí ri; haû hkûn jáng, haû yuq é manggâm gi, ge byuq bê nghut ri.

<sup>14</sup> Yesuq gi, "Nàng, shí hkyô ó lé le hkâtaî kyo. Nghut kôlhang, náng é gungdu lé, hkyangjong hpô chyáng lô tûn shít mù, nàng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga lô nhông byi aq." ga, yhang lé taí hkûn kat ri.

<sup>15</sup> Nghut kôlhang, Yesuq é hkyô gi, je riy-hang taí pyo hû jam lô mù luî, shiwa byù rajùm rayò gi, Yhâng é dang gyo râ matú le, yhangmoq é nòhpyo lhoq gê byî nhâng râ matú le, lé zup míng tô akô.

<sup>16</sup> Yesuq kúm gi, Yhang baú tsik za yoso shut htoq é mù, kyû é dung dung kut ri.

*Gùngjum Shî Sû Lé, Yesuq Lhoq Gê Byî É Hkyô*

*Mht 9:1-8; Mrk 2:1-12*

<sup>17</sup> Ra-nyí lé, Yesuq mhòqshit nyi é hkûn, Hparishe pé eq tarâ sará pé le, Yesuq nâm má zung tô akô; haû bang gi, Galile mau wà hkyap hkangmó mâ é bang eq Yuda mau, Yerusalem wà mó mâ é bang nghut akô. Yhumsîng Garai é wum-o a-tsam le nòhpyo lhoq gê râ matú Yesuq eq rahá nghut nyi ri.

<sup>18</sup> Haû hkûn, byù ra-am gi, gùngjum shî sù rayuq lé taphkang mai waq lé lô kômù, haû yuq lé, yhúmkaû má nyi tô é Yesuq é hí má, wó lheq byi shoq ga hkyô ho nyi akô.

<sup>19</sup> Byù lùm myô chyîn chyap to mù, haû nò sù lé hká dông le a wó shuí wàng kôluî, haû yhumhkûng htoq shut waq doq lô mù, haû yuq lé taphkang eq roq, shiwa hpong gung gûng, Yesuq é hí ang ang má hkyô hang kat akô.

<sup>20</sup> Yesuq gi, yhangmoq é lumjîng myit lé byu myàng jáng, "Byù nàng ê! Náng é yubak mara lé hkyut pyâm byi bê." ga taí ri.

<sup>21</sup> Haû hkûn, Hparishe pé eq tarâ sará pé gi, "Shî su ga luî, Garai Gasang lé rhoî dang taí é sù gi, ó yuq wá nghut lhê lhú? Garai Gasang za a nghut jáng, yubak mara wó

hkyut pyám byi sù gi, ó yuq wá nghut lhê lú?" ga luí, myit sòn wuí nyi bum akô.

<sup>22</sup> Yesuq gi, yhangmoq myit sòn wuí nyi é hkyô lé sé mù, "Nungmoq é i-myit hkaû má, haí mù shí pé lé myit sòn wuí nyi akô lú?"

<sup>23</sup> 'Náng é yubak mara lé hkyut pyám byi bê.' nghû taí rá eq, 'Toq luí, hkyô so aq.' nghû taí rá má, hká hkun je taí lui lhê lú?"

<sup>24</sup> Nghut kôlhang, haû Byu Yhangzo\* gi, mingkan htoq má, mara hkyut byi rá ahkáng wó Sù nghut é lé, nungmoq lé sé nhâng nau lhê." ga mù, haû gùngjum shí sù lé, "Ngò, nàng lé taí bá, toq aq, náng é taphkang yu chûng luí, yhûm taû ló aq hkoí." ga taí ri.

<sup>25</sup> Haú hkûn jáng, yhang gi, yhangmoq é hí má toq yap mù, yhâng é taphkang waq chûng luí, yhâng é yhûm shut Garai Gasang lé hkya-on kungtôn uchyang ló byuq bê.

<sup>26</sup> Byù banshoq bang gi, gyai maú byuq kômù luí, Garai Gasang lé hkya-on kungton akô nghut ri. Yhangmoq gyai gyuq maú dik é èq le, "Hkû-nyí, nga-nhúng, mauhpo amû pé lé myàng bê." ga taí nyi akô.

*Yesuq Gi, Lewiq É Yhûm Má Yubak Dap  
Bang Eq Rahá Zo Shuq É Hkyô  
Mht 9:9-13; Mrk 2:13-17*

<sup>27</sup> Hau htâng má, Yesuq sô e ló le, Lewiq gâ é kang guq sù rayuq yhâng é kang guq zúm má zung tô é lé ê myàng mù, haú yuq lé, "Ngá htâng cháng aq." ga taí ri.

<sup>28</sup> Lewiq gi, haú má é zè banshoq lé tô pyâm to mù, toq luí, Yhâng htâng cháng bê nghut ri.

<sup>29</sup> Hau htâng, Lewiq gi, yhâng é yhûm má Yesuq é matú zoshuq poí mó kut byí ri; poí haú má kang guq bang myo myo eq byù góbang le, yhangmoq eq rahá za zô zung nyi bum akô.

<sup>30</sup> Haú mù luí, Hparishe pé eq yhangmoq hpúng má é tarâ sará pé kúm gi, "Nungmoq gi, haí mù luí kang guq bang eq yubak dap bang eq rahá zo shuq nyi akô lú?" ga, Yhâng é chángzô pé lé mara hûn dang taí akô.

\* **5:24** Byu Yhangzo gâ é gi, Yesuq Yhânggùng yhang lé le taí e nghut lhê, Mesaia lé le taí é nghut lhê. † **5:35** Lusik gâ é gi, Yesuq lé taí nau é nghut lhê.

<sup>31</sup> Yesuq gi, yhangmoq lé, "Wángzán bang chi sará a ra kó, nòhpyo hui bang za sheq ru rá lhê.

<sup>32</sup> Ngò gi, dingmán bang lé wut yù rá matú jé lé é a nghut, yubak dap bang myit lhîng rá matú sheq jé lé é ru nghut lhê." ga tû taí ri.

*Zoshuq Gám Hkyô Eq Séng Luí, Yesuq Taí É Hkyô*

*Mht 9:14-17; Mrk 2:18-22*

<sup>33</sup> Dum, yhangmoq gi, "Yohan é chángzô pé gi, zoshuq gám mù kyûdung dung kut akô; Hparishe pé é chángzô pé le, haú su kut akô; nghut kôlhang, náng é chángzô pé gi, haí mù zô nyi shuq nyi akô lú?" ga Yesuq lé taí akô.

<sup>34</sup> Yesuq, yhangmoq lé tû taí é gi, "Bíng pé gi, lusik eq rahá nghut nyi to ashí hkûn, yhangmoq lé zo shuq wó gám nhâng rá lú?"

<sup>35</sup> Nghut kôlhang, lusik† lé yhangmoq chyáng mai shuí yu pyâm é hkyíng jé rá nghut lhê; haú buinyi pé má kúm gi, yhangmoq, zoshuq gám kó rá nghut lhê." gâ ri.

<sup>36</sup> Dangtú dông mai le, Yesuq, yhangmoq lé taí é gi, "Mebu sik mâ é lîng cheq yù mù, mebu xau má hpo é gi, ó a kut wú kó; haú su kut é nghut jáng, mebu sik lé le lîng cheq pyâm é dut mù, pán jap sik le mebu xau eq du lhum rá a nghut.

<sup>37</sup> Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik gi, htûng lé lhoq buq goq nhâng mù, tsibiyiq wing le yui shun byuq, htûng le htên byuq, dut rá nghut lhê.

<sup>38</sup> Haú su a dut shoq gi, tsibiyiq wing asik lé, shokuq htûng asik má kat ra rá nghut lhê.

<sup>39</sup> Tsibiyiq wing axau shuq nyi bê sù gi, asik lé a shuq nau nghut rá; hkâsu mù gâ le, 'Axau sheq je nghâm ri.' ga taí rá." gâ ri.

## 6

*Bánno Buinyi Má, Yesuq É Chángzô Pé Kyôshi Shap Zô É Hkyô*

*Mht 12:1-8; Mrk 2:23-28*

<sup>1</sup> Bánno buinyi ra-nyí má, Yesuq gi, Yhâng é chángzô pé eq yò hkaû mai sô lai ló é

hkûn, Yhâng é chángzô pé gi, kyôshi ratsuí langshap yû mù, loq èq nè hpuq zô akô.

<sup>2</sup> Haú mù luí, Hparishe pé ra-am gi, "Bánno buinyì má a ge kut jung lé, nungmoq gi, haí mù luí haú su kut akô lú?" ga taí akô.

<sup>3</sup> Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut huí é hkûn, hkâsu kut é hkyô lé, nungmoq a nghap wú kó lú?"

<sup>4</sup> Dawiq gi, Garai Gasâng é yhûm\* hkaú má wang ê mù, hkyangjông pé mai lai luí, ó le a ge zô é, kyâng tô é muk lé yù zo mù, yhâng htâng châng é bang lé le, byi tsô é a nghut kó lú?" ga tû taí ri.

<sup>5</sup> Hau htâng, Yhang gi, "Haú Byu Yhangzo gi, haú Bánno buinyì é Yhumsîng nghut lhê." ga yhangmoq lé taí ri.

*Loq Jum Shî Sû Lé Yesuq Lhoq Gê Byî É Hkyô*

*Mht 12:9-14; Mrk 3:1-6*

<sup>6</sup> Gotû Bánno buinyì má le, Yesuq gi, tara-jong má wàng mù mhòqshit nyi é hkûn, loqyo loq ajum shi byuq é byù rayuq haú má nyi tô ri.

<sup>7</sup> Haú hkûn, tarâ sará pé eq Hparishe pé gi, Bánno buinyì má nõhpyo lhoq gê byi râ lú ga luí, Yhang lé mara wó hûn shoq ga gyám wú nyi akô.

<sup>8</sup> Yesuq kúm gi, yhangmoq é i-myt lé sé sù nghut luí, loq jum shî sù lé, "Toq mù, banshoq bâng é hí má, yap shit aq." ga taí kat ri. Haú yuq le, toq mù yap tô ri.

<sup>9</sup> Haú hkûn, Yesuq gi, "Ngò nungmoq lé myî wú kôlé, Bánno buinyì má, ge é muzó kut râ, a ge é muzó kut râ, byù asak hkyî râ eq lhoq hten râ pé má hká lhum kut le sheq tarâ wang lhê lú?" ga luí, yhangmoq lé taí ri.

<sup>10</sup> Hau htâng má, yhangmoq banshoq lé lhing wú mù, haú loq jum shî sù lé "Náng é loq nyhang kat aq." ga taí kat é hkûn lé, yhang le loq nyhang kat luí, yhâng é loq gi, shoq za ge byuq bê nghut ri.

<sup>11</sup> Nghut kôlháng, yhangmoq gi, myoq chum nhô chik yhang nhik-yo naú kômû

luí, "Yesuq lé hkâsu wá kut pyám râ lú?" ga luí, rayuq eq rayuq taí lhûm nyi akô.

*Raxe Í Yuq Lé Lagyo Ga Myhîng Yu É Hkyô*

*Mht 10:1-4; Mrk 3:13-19*

<sup>12</sup> Haú yoq ra-nyí má, Yesuq gi, kyûdung râ ga bùm shut htoq e ló luí, ra-myin mau Garai Gasang lé kyûdûng nyi ri.

<sup>13</sup> Maubó jáng Yhâng é chángzô pé lé wut yù mù, yhangmoq chyáng mâ é raxe í yuq lé hkyin yù luí, lagyo pé ga myhîng to byî ri.

<sup>14</sup> Haú bang gi, Yesuq eq Petruq ga myîng myhîng byî é Simun eq, yhanggu Andre, Yakuq eq Yohan, Hpilip eq Barhtolume,

<sup>15</sup> Mahte eq Htomaq, Alhpe é yhangzo Yakuq eq Zelutuq† dut é Simun,

<sup>16</sup> Yakuq é yhangzo Yudaq eq, Yesuq lé ap pyám râ sù Yudaq Iskarut pé nghut akô.

*Hkungsô Wó É Hkyô Eq Dingnyé Wó É Hkyô*

*Mht 4:23-25; 5:1-12*

<sup>17</sup> Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq mâ é bang, Yerusalem wà mó mâ é bang, wuîshuq lung-aû ayàm mâ é Turuq myuq eq Sidun myuq mâ é bang, rajùm rayò gi,

<sup>18</sup> Yhâng é dang gyô yù râ eq yhangmoq é nõhpyo lhoq gê nhâng râ matú, rahá za zup míng tô akô. Agè ashop é nat èq zing-ri huí é bang le ge byuq akô.

<sup>19</sup> Yhâng é gùng mai htoq é wum-ô èq byù banshoq lé lhoq gê byî nyi é yanmai shiwa byu pé le Yhang lé wó záng shoq ga, ho nyi akô.

<sup>20</sup> Haú hkûn, Yesuq gi, Yhâng é chángzô pé lé wú kat luí taí é gi,

"Myùng bang nungmoq gi, hkungsô wó nyi ri, hkâsu mù gâ le, Garai Gasâng é mingdán‡ gi, nungmoq é mingdán nghut nyi ri.

<sup>21</sup> Ahkuí, zòmut wuîshit huí nyi é bang nungmoq gi, hkungsô wó nyi ri, hkâsu mù gâ le, nungmoq nhik dik shoq myàng zo kó râ nghut lhê.

\* **6:4** Garai Gasâng é yhûm nghu é gi, Yerusalem wà mó má joq é saksé zúm lé gâ é nghut lhê. † **6:15** Zelutuq gâ é lichyúm gi, yhumsîng zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê. ‡ **6:20** Garai Gasâng é mingdán gâ é gi, Garai Gasang up é lé gâ lhê.

Ahkuî, ngau nyi bang nungmoq gi, hkungsô wó nyi ri, hkâsu mù gâ le, nungmoq myang wui kó râ nghut lhê.

<sup>22</sup> Haû Byu Yhangzô é yanmai nungmoq lé su eq a nguî é, lhoq hpyoq lhoq kâng é, hoq hpu nhang é, agè ashop nghut é dong jihpoi gamhkuî huî é hkûn, nungmoq gi, hkungsô wó nyi ri.

<sup>23</sup> Haû hkûn lé, gabú byam chyû nyi keq, hkâsu mù gâ le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé taî lhê, hkâsu mù gâ le, yhangmoq é îchyí îwa pé le myiqhtoî pé\$ lé haû su kut wú bekô."

<sup>24</sup> Nghut kôlhang, sùt wó bang nungmoq gi, dingnyé wó râ, hkâsu mù gâ le, nungmoq gi, yhumsing gùng má nhik shî nhik dik é hkyô lé huî yù bekô.

<sup>25</sup> Ahkuî, gyi gyi dau dau myàng zo myàng shuq nyi é bang nungmoq gi, dingnyé wó râ, hkâsu mù gâ le, nungmoq zòmut wuîshit é hui kó râ nghut lhê.

Ahkuî, wui nyi é bang nungmoq gi, dingnyé wó râ, hkâsu mù gâ le, iyon yôn é eq ngaubyi ngau-nhap htoq é hui kó râ nghut lhê.

<sup>26</sup> Byù banshoq bang, nungmoq lé ge é byù ga kôjáng, nungmoq gi, dingnyé wó râ, hkâsu mù gâ le, yhangmoq é îchyí îwâ pé le, myiqhtoî pyoq pé\* lé, haû su ga taî wú bekô.

### *Gye Pé Lé Chyitdap Râ Hkyô*

*Mht 5:38-48; 7:12*

<sup>27</sup> Hau htoq agó, ngá dang gyô nyi bang nungmoq lé ngò taî kôlé, nungmoq é gye pé lé chyitdap nyi keq; nungmoq lé a naù a wôm é bang lé ge é hkyô kut keq;

<sup>28</sup> nungmoq lé nhîng é bang lé, shimân byi keq; nungmoq lé rhoi é bang lé kyûdung byi keq.

<sup>29</sup> Nang lé bo-pyuq rahkyam shut pyuq byi sù lé, rahkyam dum hkâm byi shi aq;

náng bumó hkyut yu é sù lé, buzo le dum hkyut byi shi aq;

<sup>30</sup> nang lé rajung jung dúng é sù lé le, byí pyám aq; náng zè yu pyám byí é su chyáng mai le, hkâdúng yù lo.

<sup>31</sup> Nungmoq ô nau é dông supé lé kut nhâng nau é su, yhangmoq lé le kut byi keq.

<sup>32</sup> Nungmoq lé chyitdap é bang lé za chyitdap kô le gi, nungmoq é matú hai akyû bò kó râ lhú? Yubak dap bang le, yhumsing lé chyitdap é bang lé gi, chyitdap nyi akô.

<sup>33</sup> Nungmoq lé ge é dông kut nyi é bang lé za, ge é dông kut nyi kô le gi, nungmoq é matú hai akyû bò kó râ lhú? Yubak dap bang le haû su kut nyi akô.

<sup>34</sup> Supé lé zè chyí byí le, dum wó tau byi râ su dut é bang lé za, chyí byí le gi, nungmoq é matú hai akyû bò kó râ lhú? Yubak dap bang lháng chyí byí é myhó dum wó yù shoq, yubak dap é bang lé chyí byí akô.

<sup>35</sup> Nghut kôlhang, nungmoq gi, nungmoq é gye pé lé chyitdap mù, ge é dông kut byí nyi keq. Dum wó taû yù râ lé myoq a byu é za, chyí ngho byi keq; haû su kut jáng, nungmoq wó é chyunghuq ko râ eq, Myhang htáng htúm Su é yhangzô pé dut râ nghut lhê; hkâsu mù gâ le, Yhang gi, jeju a dat bun bang eq agè ashop é bang lé ge é kut nyi ri.

<sup>36</sup> Nungmoq é Îwa Garai Gasang shogyo nhikmyin sê é su, nungmoq le shogyo nhikmyin nyi keq.

### *A Jéyáng Râ Hkyô*

*Mht 7:1-5*

<sup>37</sup> A jéyáng é za nyi keq; haû jáng, nungmoq le jéyáng é a hui kó râ nghut lhê. A doqdân é za nyi keq; haû jáng, nungmoq le doqdân é a hui kó râ nghut lhê. Mara hkyut byi keq; haû jáng, nungmoq le mara hkyut byí é hui kó râ nghut lhê.

<sup>38</sup> Byi keq, haû jáng, nungmoq le dum byí é hui kó râ nghut lhê. Mán é búng mai byíng mui shûn shoq nhûn chyîng, dùn chyîng kat mù, nungmoq é tanghkoî hkaû má lik kat byí é hui kó râ. Hkâsu mù gâ le, nungmoq

\$ 6:23 Myiqhtoî pé le zing-ri huî é yanmai, yhangmoq chyunghuq wó nyi akô. Haû eq rajung za, jamjau huî é bang nga-nhúng le chyunghuq wó râ nghut lhê. \* 6:26 Myiqhtoî pyoq pé gi, Garai Gasang jéyáng é hui râ.

lik byi é bung eq, nungmoq lé dum lik byi râ nghut lhê." gâ ri.

<sup>39</sup> Hau htoq agó, Yhang dangtú ralhum dông yhangmoq lé dum tai é gi, "Myoqjit sù gi, myoqjit sù lé hkyô wó tân shit lhê lú? Yhangnhik í yuq é dongkong má byit gyó kó râ nghut lhê, a nghut kó lú?"

<sup>40</sup> Jongzo gi, sará htoq gyaú râ a nghut; nghut kôhang, gúm shoq mhoq yú bê sù ó nghut kôhang, yhumsing é sará su dut râ nghut lhê.

<sup>41</sup> Yhumsing myoq hkaú má lúng tô é siktúm† lé lhang a myit wú é nhing, haí mù luí, nunggu nungmang é myoqwàng‡ lé myang lhê lú?

<sup>42</sup> Yhumsing é myoq má lúng tô é siktúm lé lhang a myàng sù nhing, 'Gumang hpó é, náng myoq má lúng tô é myoqwàng lé, ngò choq pyám byi lé.' nghu luí, náng é gumang hpó lé hkâsu wó tai râ lú? Gegùn labyoq kut sù é, náng é myoq má lúng tô é siktúm lé hí choq pyám aq. Haú jáng sheq, nunggu nungmang é myoq má wang tô é myoqwàng lé choq pyám byi râ matú, náng san za myàng râ nghut lhê.

### *Agàm Eq Ashi*

*Mht 7:17-20; 12:34-35*

<sup>43</sup> A ge é ashí zuí é, ge é shigâm hkâmá le a joq. Ge é ashí zuí é, a ge é shigâm le a joq.

<sup>44</sup> Haú mù luí, shigâm hkangmó lé, zuí é ashí lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibiyiq shi a wó hpyoq yu wú.

<sup>45</sup> Ge é sù gi, yhumsing é i-myit unghkaú mâ é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaú mâ é agè ashop é sutdò mai, agè ashop é zè pé lé lhoq htoq shit lhê. Haí mù gâ le, yhang é i-myit unghkaú má byíng mui tô é lé za, yhang é nhut mai tai htoq lo é nghut lhê.

*Luqhtân Htoq Má Yhûm Saí Sù Eq Myi Chîn Dum Má Yhûm Saí Su É Hkyô*

*Mht 7:24-27*

<sup>46</sup> Ngò tai é eq rajung za lhang a wó châng kut kô é nhing, haí mù luí, nungmoq Ngo

lé 'Yhumsing é, Yhumsing é.' nghu nyi akô lú?

<sup>47</sup> Ngá chyáng lé mù, ngá dang gyô yù luí, châng kut é sù ó nghut kôle, hkasú é sù eq wuí é lé ngò nungmoq lé shit kyo kôle.

<sup>48</sup> Haú yuq gi, wahpang yhûm saí le, nik nik du luí a dui é lunghtân htoq má apûn awang hi é sù eq wuí lhê. Wuí jê lò luí wuibaù pé eq yhûm haú lé lo gùn kôhang, ging ging títng títng saí to bê nghut luí, haú lé a wó gun nhún.

<sup>49</sup> Ngá dang gyô yù mù, a châng sù gi, apûn awang a saí é za myi chîn dum má wahpang yhûm saí sù eq wuí nyi ri. Wuibaù pé eq yhûm haú lé lo gun kat é eq, haú hkûn jáng, lêng gyop byuq ri. Yhûm haú byoq hten byuq é gi, yù whuí a bò loshoq dut byuq râ nghut lhê." gâ ri.

## 7

### *Romaq Gyezau Rayuq É Lumjîng Myit Mht 8:5-13; Yhn 4:43-54*

<sup>1</sup> Yesuq gi, shiwa byu pé lé ban mhoqshit é htâng má, Kaperna-um wà shut wang ló ri.

<sup>2</sup> Haú hkûn, Romaq gyezau rayuq é chyit-dap dui-nhâng zoshâng gi, shî-nò no nyi ri.

<sup>3</sup> Haú u lé, gyezau hpó gi, Yesuq é hkyô lé wó gyo jáng, yhang é dui-nhâng zoshâng lé lhoq gê byi râ matú, Yesuq lé é ji lò keq ga, Yudaq suwún wuí lé nhang kat ri.

<sup>4</sup> Haú bang gi, Yesuq chyáng jé é kô é hkûn, "Yhang gi, náng shí hkyô kut byi râ matú gingdán é sù, yhang nghut nyi ri;

<sup>5</sup> hkâsu mù gâ le, yhang gi, nga-nhûng amyû lé chyitdap é eq, ngamoq matú tara-jong le kut byi sù nghut ri." ga luí, Yhang lé zuq zuq dúng wut nyi akô.

<sup>6</sup> Haú mù luí, Yesuq gi, yhangmoq eq rahá za e ló ri.

Haú yhûm eq hká hé a wê é má jé jáng, Romaq gyezau hpó, yhang é luzúm wuí lé tai nhang kat é gi, "Yhumsing Yesuq é, náng gûng lé hkâlhoq hkyik lo. Náng, ngá é laishîn-htâng má, lé nang râ lhang ngò má a gingdán.

<sup>7</sup> Haú mù, ngò, náng chyáng jé lé râ matú gingdán é sù a nghut; Náng, dang rahkun

† 6:41 Siktúm nghu e gi, yubak mara kô é lé tai lhê. ‡ 6:41 Myoqwàng nghu e gi, yubak mara atiq azo lé tai é nghut lhê.

za taí kat laq, haú hkûn, ngá é dui-nhâng zoshâng ge ló râ nghut lhê.

<sup>8</sup> Hkâsu mù gâ le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jûn lé le, 'Shî kut aq!' nghu le, yhang kut lhê." gâ ri.

<sup>9</sup> Yesuq gi, dang haú lé wó gyo jáng, haú yuq é hkyô lé maú byuq luí, Yhang htâng châng é shiwa byu pé lé lhing wú mù, "Ngò, nungmoq lé taí kôlé, Israelaq amyû má lháng, shî í lumjîng é sù lé, Ngò a myang wú." ga taí ri.

<sup>10</sup> Nhang kat é bang yhûm má dum taú jé jáng, no nyi é dui-nhâng zoshâng gi, ge to láng é lé ló myang akô.

### *Shî Sû Lé Dum Lhoq Tui É Hkyô*

<sup>11</sup> Hau htâng hkâ-myháng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gâ é wà shut e ló akô.

<sup>12</sup> Haú wà wàng hkum má jé lo é hkûn lé, chuimó myhî é yuqzo te gi, shî mù, yhâng é mâng lé waq htoq lé lo akô. Wà byù myo myo le, chuimó myhî haú eq rahá châng lé lo akô.

<sup>13</sup> Yhumsîng gi, haú chuimó myhî lé myàng jáng, yhang lé wú shogyo luí, "Hkâ-ngaú." ga taí ri.

<sup>14</sup> Yesuq gi, gung shut huí ê mù, loq èq é záng kat ri. Haú hkûn, waq tô é bang le jáng yap to byí akô. Yhang gi, "Zorâm ê, ngò, nang lé taí lhê, toq aq." ga taí ri.

<sup>15</sup> Haú hkûn, shî bê sù gi, toq zûng mù dang taí lo ri. Yesuq gi, zorâm haú lé yhângnû chyáng dum ap byí ri.

<sup>16</sup> Byù lhunglhâng bang gyuq maú bùm kôluí, Garai Gasang lé hkya-ôn é dang gi, "Myiqhtoi mó, nga-nhûng chyáng lé pô htoq bê nghut ri. Garai Gasang gi, Yhâng é amyû lé garúm râ ga lé kûm wú nyi ri." ga taí nyi akô.

<sup>17</sup> Haú Yesuq é hkyô eq sêng é ludang lé, Yuda mau eq haú mau awui ayàm jowò hkangmó má taí pyo myhîn ló bum akô.

### *Yesuq Eq Wui-myhup Sará Yohan É Hkyô Mht 11:1-19*

<sup>18</sup> Haú hkûn, wui-myhup sará Yohan é chángzô pé gi, haú hkyô banshoq yhang lé lo taí kyô akô.

<sup>19</sup> Haú mù luí, Yohan gi, yhâng é chángzo í yuq lé ji yù mù, haú Yhumsîng chyáng nhang kat luí, "Nàng gi, haú jé lé lô râ Sû nghut lhê lhú? Haú a nghut jáng, ngamoq, góyuq lé láng ra shirâ lhú?" ga, myí nhang kat ri.

<sup>20</sup> Haú nhik gi, Yesuq chyáng jé jáng, "Nàng gi, haú jé lé lô râ sù nghut lhê lhú? Haú a nghut jáng, ngamoq góyuq lé myoqbyu láng nyí ra shirâ lhú?" ga luí, Wui-myhup Sará Yohan gi, ngá-nhik lé náng chyáng myí nhang kat ri." ga taí akô.

<sup>21</sup> Haú u yhang, Yesuq gi, nò zo hpyo zo, noli nojàng huí é bang eq agè ashop é nat dap jun dap é byù myo myo lé le, myoq dum myàng nhang ri.

<sup>22</sup> Haú hkûn, Yesuq gi, yhangnhik lé, "Myàng mi-myàng, wó gyo má wó gyo, Yohan lé ló taí kyo keq; myoqjit bang, myoq wó myàng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shî bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê.

<sup>23</sup> Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

<sup>24</sup> Yohan é chángzô nhik ló byuq é htâng má, Yesuq gi, Yohan eq séng luí, byù moq mó lé taí é gi, "Nungmoq gi, haí lé hpuq wú râ matú, haú yoso shut e akô lhú? Lai èq hik nhûn é jamgàm lé wú râ matú nghut akô lhú?

<sup>25</sup> Haú a nghut jáng, haí lé wú râ matú e akô lhú? Nú-nhâm é mebu wut sù lé wú râ matú e akô lhú? A nghut! Wú keq, gyaí hpaú é mebu wut luí agùn agó wó bang gi, hkohkâm-wâng pé má sheq ru nyi lhê.

<sup>26</sup> Haú nghut le gi, haí lé wú râ matú ê kô é lhú? Myiqhtoi rayuq lé lhú? Haú kúm nghut ri. Ngò, nungmoq lé taí kôlé, Yohan gi, myiqhtoi htoq lháng gyaú sù nghut lhê.

<sup>27</sup> Haú yuq é hkyô lé, Chyúmdang má kâ tô é gi,

'Wú aq, Náng é hkyô lajang lángrâ matú, Ngá é lagyo lé, Náng é hí má Ngò nhang kat râ nghut lhê.\*

gâ ri.

<sup>28</sup> Ngò, nungmoq lé taí kôlé, myiwe wui mai hku kat é bang má, Yohan htoq je kô é rayuq lhang a nyi, nghut kôlhang, Garai Gasâng é mingdán má je tiq dik sù gi, Yohan htoq je kô lhê." gâ ri.

<sup>29</sup> Mingbyû lhunglhang bang eq kang guq bang gi, dang haú pé lé wó gyo kôjáng, Yohan byî é bapisma lé hkâm yù kô é nghut mù luí, Garai Gasâng é dingmán é hkyô lé sê gyô yu akô.

<sup>30</sup> Hparishe pé eq tarâ sará pé kúm gi, Yohan byî é bapisma a hkâm yù kô mù luí, Garai Gasang hen lajang é hkyô lé yhumsing gung é matú he-ngik pyâm akô.

<sup>31</sup> Yesuq dum taí é gi, "Haú mù luí, byù myû shí lé, Ngò, hai èq taí kê wú râ lhú? Yhangmoq hai eq wuí akô lhú?"

<sup>32</sup> Yhangmoq gi, 'Nungmoq é matú, ngamoq sampyí mut byi kôlhang, nungmoq gi, a gó kó, ngamoq ngaù hkyangsâng kôlhang, nungmoq gi, a ngaù kó.'

ga luí, gài pé má zùng uchyang rayuq eq rayuq wut taí lhùm nyi é zoshâng wuí eq wuí akô.

<sup>33</sup> Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luí, nungmoq taí akô.

<sup>34</sup> Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akô.

<sup>35</sup> Nghut kôlhang, hpaqchyî byéng-yá é yhangzô pé gi, hpaqchyî byéng-yá tengmán é hkyô lé saksé hkâm byi nyi akô.\* gâ ri.

### *Yubak Dap É Myiwe Rayuq, Yesuq Lé Xú But Byî É Hkyô*

<sup>36</sup> Hparishe rayuq gi, Yesuq lé yhang chyáng zang zo râ matú ji kat ri. Haú mù, Yesuq gi, haú Hparishe é yhùm má wàng luí zo râ matú zung tô ri.

<sup>37</sup> Haú hkûn, wú keq, haú wâ mâ é yubak dap é myiwe rayuq gi, Yesuq haú Hparishe é yhùm má zô zung tô é lé sé jáng, gyai hpau dap é namngón xú bo é luq hpyû bông yu lé luí,

<sup>38</sup> Yesuq é nunghtáng hkyî wàng má ngau yap to mù, Yhâng é hkyî má ngaubyî èq záng lhoq teq byi jáng, ûxam èq but sut pyám byi ri. Dum nghut jáng, nhut èq puq luí mura lé but byi ri.

<sup>39</sup> Yesuq lé ji é Hparishe wá gi, haú lé myàng jáng, "Shí yuq myiqhtoi nghut le gi, Yhang lé záng htung é sù, ó yuq nghut é eq hkâsù é yubak dap é myiwe nghut é lé, Yhang sé râ nghut lhê." ga luí, yhâng é unghkaú má myit nyi ri.

<sup>40</sup> Yesuq gi, "Simun ê, Ngò, nang lé taí râ rajung joq ri." ga taí ri.

Simun le, "Sará ê, taí aq." ga taí kat ri.

<sup>41</sup> Haú hkûn, Yesuq gi, "Ngùn chyî zo sù rayuq chyáng, chyîn dap é byù í yuq nyi ri. Rayuq gi, denari† ngo shô chap, rayuq gi, ngo xê chap dap ri.

<sup>42</sup> Haú nhik gi, chyîn xap râ ngùn a wó kôluí, chyîn yhumsing gi, yhangnhik lé xap a ra lò gâ pyâm ri. Haú mù luí, haú nhik mâ é hká yuq gi, yhang lé je chyitdap râ lhú?" ga myi ri.

<sup>43</sup> Simun gi, "Je myo lhoq lhut hui sù, nghut râ su ngam ri." ga tû taí ri.

Yesuq gi, "Nàng myit e dông jô ri." ga taí ri.

<sup>44</sup> Haú hkûn, Yesuq, myiwe zo haú lé lhing wú luí, Simun lé, "Nàng myiwe zo shí lé myang lhê lhú? Ngò, nàng é yhùm má wang le, hkyî chi râ uchyam, nàng a byi, yhang kúm gi, ngaubyî èq ngá hkyî lé tik byi luí, yhâng é xam èq sut pyám byi bê.

<sup>45</sup> Nàng gi, ngo lé nhut èq a puq nghut ri; yhang kúm gi, ngò yhùmkaú má wang é mai ngá hkyî má a no loshoq puq nyi râ.

<sup>46</sup> Nàng gi, ngá ulhum má xú a but byi wú, yhang kúm gi, ngá é hkyî má nàm ngón é mura but byi bê nghut ri.

<sup>47</sup> Haú su mù, ngò, nàng lé taí lé, haú myiwe gi, je chyitdap luí, yhang wó é yubak myo myo lé hkyut pyám byi é hui bê. Shau

\* **7:35** Nghut kôlhang, Garai Gasâng é hpaqchyî byéng-yá lé lhom hap yu é banshoq bang gi, Garai Gasâng é hpaqchyî byéng-yá haú, tengmán ri ga saksé hkâm nyi akô. † **7:41** Denari rachap gi, ra-nyí lhê é byù rayuq é zuihpau eq wuí ri.



za mara hkyut pyám byí é hui sù gi, shau za chyitdap sù nghut ri." ga taí ri.

<sup>48</sup> Yesuq gi, myiwe haú lé le, "Ngò, náng é yubak mara hkyut pyám byi bê." ga taí ri.

<sup>49</sup> Rahá zung tô é bang gi, "Yubak mara lháng wó hkyut pyám byi sù, shí yuq gi, ó wá nghut lhê lhú?" ga luí, myit nyi bum akô.

<sup>50</sup> Yesuq gi, "Náng é lumjínng myit èq nang lé hkyi yù bê, ngón za ló aq hkoi." ga luí, myiwe haú lé taí kat ri.

## 8

### *Yesuq Htâng Châng É Myiwe Wui*

<sup>1</sup> Hau htâng hkâ-myháng a myáng má, Yesuq gi, Garai Gasâng é mingdán hkyô eq sêng é gabú danglù lé taí kyo uchyang, Yhâng é lagyo raxe í yuq eq rahá za, rawa htâng rawà jé e ló ri.

<sup>2</sup> Hau htoq agó, nat gang dap é mai le, nõhpyo mai le Yesuq èq lhoq ge yu é myiwe wui, nat nyhit nat lhoq htoq pyám byi hui é, Magadalaq wà mà é Mariq le,

<sup>3</sup> Herut é ikun zum sù Kuza é yhumsîng myhí Yoanaq le, Susannaq le, gotû myiwe wui myo myo le, Yesuq eq rahá nghut akô. Haú bang gi, yhumsîng wó du é í Yesuq eq lagyo pé lé byi zo byi huq nyi akô.

### *Kyôshi Sân É Hkyô*

#### *Mht 13:1-23; Mrk 4:1-20*

<sup>4</sup> Wà hkanq wà mó mà é bang gi, Yesuq chyáng zup zîng lé lo bùm kômù shiwa byù moq mó zup míng tô é hkûn, Yesuq dangtú dông taí kyô é gi,

<sup>5</sup> "Kyô hkyó sù rayuq gi, kyôshi san râ ga htoq e ló ri. Yhang, kyôshi sân kat é hkûn, ra-am gi, hkyô má gyó ang mù, byu èq záng nâng pyeq pyâm lhê, maulat nghoq pê èq hte zo pyâm lhê dut ri.

<sup>6</sup> Ra-am gi, luqgok yò má gyó ang mù, yuq htoq lo é hkûn, myigùng a teq é yanmai nyhuí shi byuq akô.

<sup>7</sup> Ra-am gi, zugyóm hkaú má gyó ang luí, zubyap eq rahá yuq htoq lô mù, wup pyâm é hui bê nghut ri.

<sup>8</sup> Nghut kôlháng, ra-am gi, myìhpún bo é jang má gyó ang mù, yuq kô lò jáng, rashô tú myô jat lo ri." ga taí ri.

Yhang haú su ga taí nyi é hkûn, "Gyô yù râ nohkyap dap sù gi, gyô yù sháng gaq!" ga le, htê mó èq taí kat ri.

<sup>9</sup> Haú hkûn, Yhâng é chángzô pé gi, dangtú shí hai lichyúm nghut lhê lhú ga, Yhang lé myí akô.

<sup>10</sup> Yhang gi, "Garai Gasâng é mingdán eq sêng é sê gyo wui é hkyô pé lé sê gyo râ ahko ahkáng, nungmoq lé byí to bê. Nghut kôlháng, góbâng matú gi,

'Wú to kôlháng, a myàng kó sháng, gyô nyi kôlháng, a sê gyo kó sháng.'\* nghú, ngò dangtú dông taí lhê.

<sup>11</sup> Ahkui lhê é dangtú shi é lichyúm gi, îsu nghut ri: kyôshi gi, Garai Gasâng é mungdang nghut nyi lhê.

<sup>12</sup> Hkyô má gyó âng é kyôshi gi, haí eq wui lhê lhú gâ le, haú mungdang lé byu pé wó gyô é htâng má, lumjínng é má le, hkyi yu é má le, a jé kó sháng gaq ga luí, yhangmoq é i-myt hkaú mai nat Tsadán èq mungdang haú lé, lé yu pyâm é hui bang eq wui lhê.

<sup>13</sup> Luqgok yò pé má gyó âng é kyôshi gi, haí eq wui lhê lhú gâ le, haú mungdang lé wó gyo jáng, gabú myit èq hap yù kôlháng, amyit a wó chín mù, rayoq rabun za lumjínng luí, gungláu huí é nyí má, dum htak ló byuq é bang eq wui lhê.

<sup>14</sup> Zugyóm má gyó âng é kyôshi gi, haí eq wui lhê lhú gâ le, haú mungdang lé gyô yù luí, yhumsîng é asak dui e ló é hkyô má, shí ipyat lhê é myit wui myit hke hkyô, ngùn zè sutgan eq mingkan ngón hkyô má myup byuq luí, mo é ashi a zuí é bang eq wui lhê.

<sup>15</sup> Hpún bo é myigùng má gyó é kyôshi kúm gi, haí eq wui lhê lhú gâ le, haú mungdang lé lhumzui luí ge é i-myt èq ban gyô yù mù, ging tíng shoq zuí zìng luí, wó jân é i-myt èq ashi zuí é bang eq wui lhê.

### *Myibung Htûn É Hkyô*

#### *Mrk 4:21-25*

<sup>16</sup> Myibung lé tap mù, aù èq nghop tô é le, yhupchong ô má tô tô é le, ó a kut wú kó. Nghut kôlháng, wang lé lô bang myoq wó myâng râ matú kúm gi, tsungjang má tsung to to chyat kut akô.

<sup>17</sup> Hkâsu mù gâ le, a htoqzê loshoq haq tô é zè haí le a joq, a sé a byông htoq loshoq wó zaú tô é zè le haí a joq nghut ri.

\* 8:10 Esai 6:9

18 Haù mù luí, nungmoq hkâsu wó gyô yu é hkyô lé sidiq nyi keq, haí mù gâ le, wó to sù lé gi, jat byi shirâ, a wó su chyáng mai kúm gi, yhang wó to bún é mâ é lé lháng, yu pyám byi shirâ nghut lhê." ga taí ri.

*Yesuq É Yhângnu Eq Yhanggu Pé  
Mht 12:46-50; Mrk 3:31-35*

19 Haù hkûn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lûm chyûn chyap to kômù, Yhâng chyáng a wó wang ê kô nghut ri.

20 Haù hkûn, Yhang lé, "Náng nu eq nunggu pé gi, nang lé hui naù luí, shinggan má láng yap bum akô." ga taí kyo akô.

21 Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gû pé nghut akô." ga luí, yhangmoq lé tû taí kat ri.

*Laidun Mó Lé Yesuq Lhoq Zim É Hkyô  
Mht 8:23-27; Mrk 4:35-41*

22 Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e lô sháng." ga taí luí, lhaí má wàng mù gû dap e lô akô.

23 Yhangmoq gû dap e lô é hkûn lé, Yesuq gi, yhup myhî tô ri. Haù u lé, nhông haù má laidun mó lò luí, lhaí má wui byíng lô mù, yhangmoq myup shî râ su dut lò nyi bekô nghut ri.

24 Haù mù, yhangmoq gi, Yesuq chyáng hui é luí, Yhang lé nhaù pun mù, "Yhumsîng ê, Yhumsîng ê, nga-nhúng myup lô nyi ri." ga taí akô.

Haù hkûn, Yhang toq luí, laidun eq wuìlhêng pé lé tân kat jáng, haù pé gi, zim za dut lò byuq bê.

25 Haù mù, Yesuq gi, "Nungmoq é lumjíng myit gi, hkâmá nghut akô lhú?" ga luí, yhangmoq lé myí ri.

Yhangmoq kúm gi, gyuq maú byuq bùm kôluí, "Shí yuq gi, hkasú é byù nghut lhê là? Yhang hkunmó hkyó jáng, lài eq wuìlhêng pé lháng gyo byi ri-nhung!" ga luí, rayuq eq rayuq myí lhùm bum akô nghut ri.

*Nat Lé Hkat Htoq Byí É Hkyô  
Mht 8:28-34; Mrk 5:1-20*

26 Hau htâng, yhangmoq gi, Galile mau tû tap mâ é Gerase byu pé é mau má jé dap e lô bekô.

27 Yesuq kong shut doq lô le, haù wâ mâ é nat gang dap é sù rayuq gi, Yhang lé hui ri. Haù yuq gi, yhùm má le a nyi é za, mebu a dap é, lupdùng má myáng myáng nyi nyi sù nghut ri.

28 Haù yuq gi, Yesuq lé myàng jáng, wut garu luí, yhâng é hkyí wang má paí gop to mù, "Myhang htâng é Garaí Yhangzo Yesuq ê, Nang gi, ngò eq haí séng lhê lhú? Ngo lé a zing-ri râ matú, ngò nang lé dúng nyi lhê." ga luí, htê mó eq taí garû nyi ri.

29 Hkâsu mù gâ le, Yesuq gi, agè ashop é nat lé haù yuq gùng mai htoq lô râ matú, tân pyâm é yanmai nghut ri. Byù haù yuq lé nat gâng eq adàm dàm wang júng hkanmó, loq eq hkyí má toqjâng tuí eq tuí shung, kyum xâng tô é eq, zúng tô é nghut kôlháng, lêng hpyit pyám pyám kut é htoq ago, nat gâng eq yhang lé yoso hkaù shut lêngmhap yù yù kut nyi ri.

30 Yesuq gi, yhang lé, "Náng myíng haí gâ lhê?" ga myí kat é hkûn, yhang gi, "Legio\* gâ lhê." ga tû taí ri. Haí mù gâ le, yhâng chyáng nat gang myo myo wang lúng tô é yanmai nghut ri.

31 Nat jùm gi, yhangmoq lé nik dik htâm é Lasang-dong shut a kôn kat râ matú, Yesuq lé chôm dúng nyi bum akô.

32 Haù u lé, waq rajùm mó gi, bùm yàm má dû but zô nyi bum akô nghut ri. Haù mù, yhangmoq gi, waq pé chyáng wàng nhâng laq ga, Yesuq lé ahkáng dum dung kut kojáng, Yesuq gi, yhangmoq lé ahkáng byi kat ri.

33 Haù mù luí, nat gang jùm gi, byù haù yuq chyáng mai htoq lô kôluí, waq pé chyáng wàng byuq bekô nghut ri. Haù hkûn, waq haù jùm gi, gampyoq mai nhông hkaù shut rut din yán wang lô kôluí, myup shi byuq bekô nghut ri.

34 Waq zúng bang gi, haù su dut é lé myàng jáng, hpang din lô kômù, myuq hkaù mâ é bang eq awui ayàm mâ é bang lé lô taí kyô akô nghut ri.

35 Haù mù, wó gyô é bang gi, haù hkyô lé wú râ matú htoq lé lo akô. Yhangmoq gi,

\* 8:30 Legio gâ é lichyúm gi, gyezo 4000 eq 6000 gyoro bo é gyedap lé taí ri.

Yesuq chyáng jé lé kô é hkûn, nat gang htoq byuq huí sù, Yesuq é hkyî wang má mebu wut to luí, byù gè rayuq su zùng to lánng é lé myàng kômù, gyuq dan bùm bekô nghut ri.

<sup>36</sup> Nat dap sù lé hkâsu kut luí lhoq ge yu é hkyô lé myang é bang gi, góbang lé taí kyô akô nghut ri.

<sup>37</sup> Haú hkûn, Gerase byu pé é mau má é lhunglhâng bang gi, gyuq dan dik kôluí, Yesuq lé yhangmoq é mau mai htoq ló byuq râ matú, chôm dúng tóngbán akô. Haú mù luí, Yesuq gi, taú ló byuq râ matú lhai má wàng bê nghut ri.

<sup>38</sup> Nat htoq byuq huí é sù gi, Yesuq htâng cháng râ matú, Yesuq lé dúng tóngbán ri.

<sup>39</sup> Nghut kôlhang, Yesuq gi, "Nàng, yhûm shut sheq ló mù, Garai Gasang, nang lé hkâ-í kut byi bê hkyô lé, ló taí kyo aq." ga luí, yhang lé ló nhâng bê nghut ri. Haú hkûn, yhang htoq ló mù, Yesuq yhang lé hkâ-í kut byi bê hkyô lé, haú wà rawà bang lé ló taí kyô ri.

*Ya-iruaq É Yhangzo Byzô É Hkyô Eq, Yesuq É Bu Lé Lé Záng É Myiwe Rayuq É Hkyô*

*Mht 9:18-26; Mrk 5:21-43*

<sup>40</sup> Ahkuí, Galile byu pé gi, Yesuq dum taú lò râ lé lánng nyí kô é nghut mù, Yhang dum taú gû dap lo é hkûn gabú myit eq lhom te yu akô.

<sup>41</sup> Haú hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyî wang má hkyihput htuq luí, yhâng yhûm má lé râ matú ji nyi ri.

<sup>42</sup> Hkâsu mù gâ le, raxe í zân bò bê é, yhangzo byizo te gi, shi ló nyi é yanmai nghut ri.

Haú mù, Yesuq cháng e ló le, shiwa byu pé gi, Yhang lé záng htung lo bum akô.

<sup>43</sup> Haú u lé, raxe í zân sui yuí luí ngunzè lhunglháng ban pyám shoq chi sará pè chyáng yâ wú kôlhang, hká yuq le a wó yâ gè byi é† myiwe myhí rayuq le haú hkaú má bo tô ri.

<sup>44</sup> Myiwe haú gi, Yesuq é nunghtáng má huí lé mù, Yhâng é bushi htâng má é záng kat eq, suí yui é ana gi, ge byuq bê nghut ri.

† 8:43 Ngunzè lhunglháng ban pyám shoq chi sará pè chyáng yâ wú kôlhang, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bò.

<sup>45</sup> Haú hkûn, Yesuq gi, "Ngo lé, ó yuq záng bê lhu?" ga luí myi jáng, lhunglhâng bang gi, a sé ga he nyi bùm kô é hkûn lé, Petruq gi, "Yhumsing ê, shiwa byu pé gi, náng é lhinghkyuq mai náng chyáng chyin chyap wang lo bùm kô é yanmai, nang lé záng bekô râ nghut lhê?" ga taí ri.

<sup>46</sup> Yesuq gi, "Byù rayuq ngo lé lé záng mù, ngá chyáng má é hpungwup a-tsam htoq ló é lé, ngò châng sé kat ri." ga taí ri.

<sup>47</sup> Haú jáng, myiwe myhí haú gi, yhang a wó haq zaú to lô é hkyô lé sé jáng, req req nán lé lô mù, Yesuq é hkyî wang má ngóm gop kat luí, haí mù Yhang lé záng é hkyô eq, hká dông ge ló byuq é hkyô pé lé, shiwa byù banshoq bâng é hí má Yesuq lé taí kyô nyi ri.

<sup>48</sup> Yesuq gi, "Ngá zo ê, náng é lumjínng myit gi, nang lé lhoq gè byi bê nghut ri, ngón za ló aq hko!" ga luí, myiwe haú lé taí kat ri.

<sup>49</sup> Yesuq gi, dang ru taí nyi ashî hkûn, tarajong má up sù Ya-iruaq é yhûm mai byù rayuq jé lé lô luí, "Nung zo gi, shi byuq bê, haú sará lé hkâlhoq hkyik nyí lo." ga luí, Ya-iruaq lé taí kyô ri.

<sup>50</sup> Yesuq gi, dang haú lé wó gyo jáng, "Hkâgyuq, za lumjínng aq, haú jáng, yhang ge byuq râ nghut lhê." ga luí, Ya-iruaq lé taí ri.

<sup>51</sup> Yesuq gi, Ya-iruaq é yhûm má jé é hkûn lé, Petruq, Yohan, Yakuq, eq haú myiwe zô é yhângnu eq yhângwa mai lai luí, yhûm haú má, ó lé le a wàng nhâng kut ri.

<sup>52</sup> Haú u lé, lhunglhâng bang zoshâng hau é yanmai, ngaubyi ngau-nhap eq yón nyi akô. Yesuq kúm gi, "Hkâ-ngaú kó, yhang shi byuq é a nghut, yhup myhí tô é sheq ru nghut lhê." ga luí, yhangmoq lé taí ri.

<sup>53</sup> Zoshâng gi, shi byuq bê lé yhangmoq sé kôluí, yhangmoq gi, Yesuq lé wuizui kut pyám byí akô.

<sup>54</sup> Yhang kúm gi, myiwe zo hau é loq má zuí to mù, "Zoshâng ê, toq aq." ga taí kat ri.

<sup>55</sup> Haú mù luí, yhâng woi-nyí dum taú wàng mù, haú hkûn jáng toq yap ri. Haú jáng, Yesuq gi, zoshâng haú lé zôjung byi keq, ga yhangmoq lé taí kat ri.

<sup>56</sup> Haú myiwe zô é yhângnu eq yhângwa nhik gi, gyai maú byuq akô. Nghut kôlhang,

Yesuq gi, haú dut é hkyô ó lé le a taí kyo râ matú, yhangnhik lé taí hkûm tô ri.

## 9

*Lagyo Raxe Í Yuq Lé Nhang Htoq Kat É Hkyô*

*Mht 10:5-15; Mrk 6:7-13*

<sup>1</sup> Yesuq gi, haú lagyo raxe í yuq lé wut yù mù, nat gang banshoq lé wó hkat htoq pyám râ matú eq, noli nojàng wó lhoq gê râ matú, yhangmoq lé wum-o a-tsam eq ahko ahkáng byî ri.

<sup>2</sup> Hau htâng má, Garai Gasâng é mingdán hkyô hko kyo râ eq, nõhpyo lhoq gê byi râ matú nhang htoq kat ri.

<sup>3</sup> Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lhang hkâwûn hkâchûng kó.

<sup>4</sup> Nungmoq hká yhûm má wàng kôlhang, haú wá mai dum htoq lô é buinyi jé shoq, haú yhûm má za nyi nyi keq.

<sup>5</sup> Nungmoq lé a lhom hap yu é bang lé gi, yhangmoq é wá mai htoq lô é hkûn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaú lé yhangmoq é myoq hí má ko hkyô pyâm to keq." ga taí kat ri.

<sup>6</sup> Haú mù, yhangmoq gi, htoq e lô luí, wá hkang wá mó má haú gabú danglù hko kyo uchyang, hká jé hkâmá nõhpyo lhoq gê byi wún akô.

*Herut Maú Úng-âng É Hkyô*

*Mht 14:1-12; Mrk 6:14-29*

<sup>7</sup> Haú su dut é hkyô banshoq lé, mauzau Herut wó gyô yù luí myit wui nyi ri. Hkâsu mù gê le, ra-am gi, Yohan shi é mai dum dui toq lô bê ga,

<sup>8</sup> ra-am gi, Eliyaq dum pô htoq lo ri ga, haú mai, ra-am gi, hí hpyang lhê é myiqh-toi rayuq yuq dum dui toq lô bê ga luí, taí bùm kô é yanmai nghut ri.

<sup>9</sup> Herut gi, "Yohan é ulhum lé, ngò hpyit pyám nhâng bê, nghut kôlhang, shi í wá taí byông bùm kô é gi, ó wá nghut lhê lú?" ga luí, Yesuq lé myàng shoq ga ho nyi ri.

*Byù Ngo Hkyîng Lé Yesuq Zoshuq Byi Tsô É Hkyô*

*Mht 14:13-21; Mrk 6:30-44; Yhn 6:1-14*

<sup>10</sup> Lagyo pé dum taú lo é hkûn, yhangmoq kut lai lo é hkyô pé, Yesuq lé taí kyô akô. Haú hkûn, Yesuq gi, yhangmoq lé shuí chûng mù, Bet-saida gê é wá mó shut tsik za e lô byuq ri.

<sup>11</sup> Shiwa byu pé gi, haú hkyô lé châng sé kômù, Yhâng htâng châng e lô akô. Yesuq le yhangmoq lé lhom hap yù mù, Garai Gasâng é mingdán hkyô lé taí kyo luí, nõhpyo gê naù bang lé, lhoq gê byi ri.

<sup>12</sup> Buigyùm zó má, lagyo raxe í yuq gi, Yhâng chyáng huí é mù, "Haú shiwa byu pé lé, awui ayâm má é yhûm pé eq wá pé má lô mù, zoshuq hô zo luí lô yhup kó sháng gaq, lô nhâng aq. Hkâsu mù gê le, ahkuí nga-nhúng gi, yoso má nghut nyi ri." ga luí, Yhang lé taí akô.

<sup>13</sup> Haú hkûn, Yesuq gi, "Nungmoq, yhangmoq lé rajung jung byi tso keq." ga tû taí ri.

Yhangmoq gi, "Shi myhô bang lé tso râ zoshuq a é wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut ri." ga taí akô. (Hkâsu mù gê le, yuqgè wui baú lhang ngo hkyîng kô nghut ri.)

<sup>14</sup> Nghut kôlhang, Yesuq gi, "Shi bang lé rahpúng má ngo xê xê kô kut luí, zùng nhang to keq." ga luí, Yhâng e chángzô pé lé taí ri.

<sup>15</sup> Yhangmoq lé Yesuq taí é eq rajung za, banshoq bang lé zùng nhang to bekô.

<sup>16</sup> Haú hkûn, Yesuq gi, haú muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, haú lé ajap jap hpé luí, shiwa byu pé lé, châng to byi râ matú, Yhâng é chángzô pé lé byi kat ri.

<sup>17</sup> Haú hkûn, yhangmoq banshoq bang zô gyi bùm kô é htâng má, haú chángzô pé gi, zô myhit tô é pé lé, raxe í mung byíng shoq wó guq tsîng yu ashî kô nghut ri.

*Yesuq Gi, Hkrisduq Nghut Lhê Ga Petruq Taí É Hkyô*

*Mht 16:13-28; Mrk 8:27-9:1*

<sup>18</sup> Radàm lé, Yesuq gi, Yhang baú kyûdûng nyi é hkûn, chángzô pé le, Yhang eq rahá nghut akô. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, taí akô lú?" ga myi ri.

19 "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq lo é nghut ri ga, taí akô." ga luí, yhangmoq tú taí akô.

20 Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhê nghu akô lhú?" ga myí ri.

Haú hkûn, Petruq gi, "Nàng gi, Garai Gasang nhâng byí é Hkrisduq nghut ri." ga tú taí ri.

21 Shí hkyô ó lé le a taí kyo sháng gaq ga, Yesuq, yhangmoq lé taí hkûm pyâm ri.

22 Haú mù, Yhang gi, "Haú Byu Yhangzo gi, zing-rî é myo myo hui zo luí, suwún wuí, hkyangjong agyi pé, tarâ sará pê èq he-ngik pyâm é hui mù, sat pyâm é hui ra râ nghut lhê, hau htâng sum nyí nghû râ buinyí má, lhoq toq yu é hui râ nghut lhê." ga taí ri.

23 Hau htâng, banshoq bang lé Yhang dum xoq taí é gi, "Ngá htâng cháng naú sù ó yuq nghut kôle, yhumsing gùng yhumsing he-ngik pyâm mù, nyí wuí yhumsing é tapzîng lé waq chûng\* luí, cháng ra râ nghut lhê.

24 Hkâsu mù gâ le, yhumsing é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsing é asak sum pyâm é sù kúm gi, asak hkyi yu é hui râ nghut lhê.

25 Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, haí akyû bò râ lhú?

26 Ngò eq Ngá é dang lé, lhom hap yù râ lé hoq é sù ó yuq lé le, haú Byu Yhangzo gi, yhumsing é hpungwup shingkang eq, Yhâng Wâ é hpungwup shingkang, haú chyoiyúng maumang lagyô pê é hpungwup shingkang èq jé lé é hkûn, hoq pyâm râ nghut lhê.

27 Ngò, nungmoq lé teng za taí kôlé, shi má yap tô é bang ra-am gi, Garai Gasang é mingdán lé a myang é za shí kó râ a nghut." gâ ri.

*Mosheq Eq Eliyaq Yesuq Lé Hui Nyo É Hkyô*

*Mht 17:1-8; Mrk 9:2-8*

28 Dang haú taí é htâng, shit nyí kô nghut jáng, Yhang gi, kyûdung râ ga Petruq, Yohan, Yakuq pé lé shuí chûng mù, bùm shut doq ló ri.

29 Kyû dúng nyí le, Yesuq é myoqdong gi, ihpyô isâm htaí lò mù, Yhâng é mebu gi, lhap su duq bang lo ri.

30 Haú hkûn, wú keq, Mosheq eq Eliyaq gi, hpungwup shingkang eq htoq lé lô luí, Yesuq eq dang nyo lhûm nyi akô.

31 Yhangmoq gi, Garai Gasang myit tô é hkyô Yerusalem và mó má Yesuq shí hkâm é dông mai dik lò râ nghut é hkyô lé taí lhûm nyi akô.

32 Petruq eq yhâng luzúm nhik gi, yhup mui nyi akô; nghut kôlhang, yhangmoq bùm lo é hkûn lé, Yesuq é hpungwup shingkang lé le, Yhang eq rahá yap to su nhik lé le, myang kat akô.

33 Haú nhik Yesuq chyáng mai gâng ló nyi é hkûn, Petruq gi, Yesuq lé, "Yhumsing ê, shí jowò má nga-nhúng nyi le ge ri, haú mù, Nàng é matú ralhum, Mosheq é matú ralhum, Eliyaq é matú ralhum kut, ngamoq lé, zúm sùm lhum saí nhâng laq." ga taí kat kôlhang, yhang haí taí nyi é lé, yhang a sé.

34 Petruq dang taí nyi ashí hkûn lé, mhut jé mù, yhangmoq lé htup zing lo nyi ri. Mhut haú htup lo nyi é yanmai, yhangmoq gi, gyuq byuq akô.

35 Haú mhut hkaú mai htoq lo é htê gi, "Shí yuq gi, Ngá zo nghut lhê; Ngò hkyin yu é Sù le nghut lhê; Yhâng é dang gyo keq." gâ ri.

36 Dang htê haú zim jáng, Yesuq yhang baú nyi tô é lé, yhangmoq myang akô. Yhangmoq myang é hkyô lé, buinyí haú bun haú yoq má, ó lé le a taí kyô é zim za nyi byuq akô.

*Nat Gang Dap É Yuqgè Zo Rayuq Lé Lhoq Gê Byí É Hkyô*

*Mht 17:14-18; Mrk 9:14-27*

37 Hau htâng nyí, yhangmoq bùm haú mai gyó ló kô le, byù moq mó gi, Yesuq lé lhom te yu akô.

38 Haú hkûn, byù hpúng haú mâ é byù rayuq wut garû htoq ló é gi,

\* 9:23 Tapzîng lé waq chûng nghu é gi, Yesuq é yanmai jamjau hui é lé taí é nghut lhê.

39 "Sarâ ê, wú aq, ngá é zo te yuqzo gi, nat wang júng mù dân so dân loq garû lo lhê, guttsû gi, agut gut dut shoq langhtân nhang lo lhê kut mù, nat gi, yhang lé gyai myáng shoq zing-rî yù yù kut nyi ri.

40 Nat haû lé hkat pyám byi kó laq nghû luí, Náng é chángzô pé lé ngò dúng wú kôlhang, yhangmoq a wó hkat pyám byi kó. Haû mù, ngá zo lé lhoq gê byi râ matú, ngò gi, nang lé gyai myit lum é eq dúng kat lhê." gâ ri.

41 Haû mù luí, Yesuq gi, "Lumjúng myit a bo é eq agè ashop é amyú pé ê, Ngò gi, hkâm-yháng jé shoq nungmoq eq rahá nyi mù, wó jân nyi râ lúhú? Nung zo lé, shí shut shuí lé lô aq." ga tû taí ri.

42 Zoshâng haû, lé lo nyi le lhang, nat gang gi, yhang lé lhoq lhêng to mù langhtân nhang ashî. Yesuq kúm gi, haû agè ashop é nat lé tân kat luí, zoshâng haû lé lhoq gê byi mù, yhang wa lé dum ap byi ri.

43 Nyi mi-nyì gi, Garai Gasâng é kô dik é hpungwup a-tsam lé maú hong nyi bum akô.

Lhunglhang bang gi, Yesuq kut é muzó haû lé maú nyi bum kô le, Yesuq gi,

44 "Haû Byu Yhangzo gi, byu pé é loq má ap pyám é hui zo râ nghut lhê. Dang shí hkun lé nungmoq é no má rago gyô wun to keq." ga luí, chángzô pé lé taí ri.

45 Yhangmoq kúm gi, dang haû lé a sê gyo kó, hkâsu mù ga le, haû gi, yhangmoq é matú a sê gyo sháng gaq ga luí, nghop tô ashî yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

### *Ó Yuq Gi, Kô Dik Sû Nghut Râ Lúhú?*

*Mht 18:1-5; Mrk 9:33-40*

46 Hau htâng, lagyô pé gi, hká yuq sheq, kô dik sù nghut lhê lúhú ga, rayuq eq rayuq taí myíng myô lhum nyi akô.

47 Yesuq kúm gi, yhangmoq é unghkaû má myit nyi é hkyô lé sé byi luí, zoshâng rayuq lé shuí yù mù, Yhâng nàm má shap to luí,

48 "Shí zoshâng lé Ngá é myíng mai hap sù ó yuq nghut kôle, Ngo lé hap yu é sù nghut bê; Ngo lé hap yù sù ó yuq nghut kôle, haû Ngo lé nhang kat é Sù lé hap yu é le nghut lhê. Haû mù luí, nungmoq banshoq

má, je tiq sù gi, je ko sù nghut lhê." ga luí, yhangmoq lé taí ri.

49 Haû hkûn, Yohan gi, "Yhumsíng ê, Náng é myíng lánq luí, nat gâng pé lé hkat pyám byi wún é byù rayuq lé, ngamoq myang ri. Yhang gi, ngamoq chyáng a lóm sù nghut é yanmai, yhang lé ngamoq hkûm pyám é nghut lhê." ga taí ri.

50 Yesuq kúm gi, "Yhang lé hkâhkúm kó, nungmoq é gyè hkyam shut a nyi sù gi, nungmoq é hkyam shut nyi sù nghut lhê." ga luí, yhang lé taí ri.

### *Samariq Wà Bang Yesuq Lé A Lhom Hap Yu É Hkyô*

51 Ahkuí, Yesuq gi, Yhang lé mauhkûng shut shuí toq yù râ buinyì chyâng lò bê nghut mù, Yerusalem wà mó shut ê râ lé myit hpyit to luí, Yhâng é hí má lagyô nhang kat ri.

52 Lagyô haû bang gi, Yhâng matú râ é hkyô lajang lánq râ ga, Samariq wà rawà má wang ló akô.

53 Nghut kôlhang, Yesuq gi, Yerusalem wà mó shut laí e ló é sù nghut é yanmai, haû wâ bang gi, Yhang lé a lhom hap yù kó.

54 Haû hkûn, lagyô Yakuq eq Yohan nhik gi, haû lé myàng jáng, "Yhumsíng ê, yhangmoq lé lhoq htên pyám râ matú, ngá-nhik mauhkûng mai myi wut hkyó le, a gè lúhú?" ga luí, Yesuq lé myi akô.

55 Yhang kúm gi, lhing wú luí yhangnhik lé, tân pyám ri,

56 haû mù luí, yhangmoq gi, gó wâ shut e ló byuq akô.

### *Yesuq É Htâng, Hkâsu Kut Cháng Râ Hkyô Mht 8:19-22*

57 Yhangmoq haû hkyô má e ló kô le, byù rayuq gi, "Nàng hká e le hká ngò cháng râ." ga luí, Yesuq lé taí ri.

58 Yesuq gi, haû yuq lé, "Wamhkuí pé gi, hkyûng wó akô, nghoq pé le, nghoqsut wó akô. Nghut kôlhang, haû Byu Yhangzo gi, ulhum to jang lhang a wó é nghut ri." ga taí pyám ri.

59 Dum rayuq lé, "Ngá htâng cháng aq." ga taí jáng, haû yuq gi, "Yhumsíng ê, ngá wa lé, ló yhúm pyám râ ahkáng hí byi shi laq." ga taí ri.

<sup>60</sup> Yesuq gi, yhang lé, "Shî bê bang† gi, shî bê bang yhangchang yhûm lhûm kó sháng gaq; nghut kôlhang, nàng gi, Garai Gasâng é mingdán hkyô lé, ê hko kyo aq." ga taî ri.

<sup>61</sup> Byù rayuq dum, Yhang lé, "Yhumsîng ê, ngò le náng htâng cháng rà, nghut kôlhang, ngá yhumbyù lé hí hkyang ló shit to rà ahkáng byi shi laq." ga taî ri.

<sup>62</sup> Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai Gasâng é mingdán eq a gingdán." ga luí, yhang lé taî ri.

## 10

### *Yesuq, Chángzô Pé Nyhit Xê Yuq Lé, Nhang Htoq Kat É Hkyô*

<sup>1</sup> Hau htâng má, Yhumsîng gi, gotû chángzô pé nyhit xê yuq\* lé hkyin yù mù, Yhang e ló rà wà eq jowò hkanmó shut í yuq razúm zúm kut luí, Yhâng é hí má é nhang kat ri.

<sup>2</sup> Yesuq gi, yhangmoq lé, "Kyô† shû yù rà myo shoq joq kôlhang, mù zui rà byù gi, shaú nyi ri. Haú mù, haú kyô Yhumsîng lé, Yhâng é kyô yò má, kyô shu byù‡ myo myo nhâng byi rà matú, dung keq.

<sup>3</sup> Nungmoq e ló keq! Wamhkuí hpúng má nhang hâng kat é sau zô pé lé su, Ngò, nungmoq lé nhang kat é nghut lhê.

<sup>4</sup> Ngùn htùng eq, etap, hkyî-tsung pé hkâyú chùng kó, hkyô má ó lé le hkâshichyên kûn nyi kó.

<sup>5</sup> Nungmoq gi, hká yhûm má wàng e ló kô le, 'Shî yhûm nguingón nyi sháng gaq.' nghû luí, hí taí keq.

<sup>6</sup> Haú yhûm má nguingón hkyô eq gingdán sù nyi é nghut le gi, nguingón hkyô haú gi, haú yuq é ahtoq má joq to rà nghut lhê. Haú a nghut jáng, nguingón hkyô haú gi, nungmoq chyáng dum taú lo byuq rà nghut lhê.

<sup>7</sup> Haú yhûm má nyi to mù, yhangmoq haí byi le haí zo haí shuq keq; hkâsu mù gâ le, mù zui sù gi, zuihpau wó yù gíng lhê;

haú mù, nungmoq rayhum htâng rayhûm hkâhtot nyi wún kó.

<sup>8</sup> Nungmoq hká wà má wang ló kôlhang, yhangmoq lhóm hap yù kô é nghut le gi, nungmoq é hí má yhangmoq htung to byi é zoshuq lé, zo keq, shuq keq.

<sup>9</sup> Haú mâ é nò bang lé lhoq gê byi mù, 'Garai Gasâng é mingdán gi, nungmoq eq chyâng lò bê nghut ri.' nghû luí, yhangmoq lé taí kyo keq.

<sup>10</sup> Nghut kôlhang, nungmoq hká wà má wang ló kô le, yhangmoq a lhóm hap yu é nghut le gi, haú wâ mâ é hkyô mó má htoq ê mù,

<sup>11</sup> 'Ngamoq é hkyî má dap tô é nungmoq wà mâ é hpuilhaú lhang, nungmoq lé hkyang pû tsô nyi rà matú ngamoq ko hkyô pyâm to byi bê. Nghut kôlhang, Garai Gasâng é mingdán gi, chyâng lò bê hkyô lé, sé to keq.' nghû luí taí keq.

<sup>12</sup> Ngò, nungmoq lé taí kôlé, haú buinyi§ lé, haú wâ gi, Sodom wà htoq má je hpuzo rà nghut lhê.

<sup>13</sup> Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhing mù, jimê tú wut lhê, myiwap kyaq gyûn lhê kut zung ngûng to bekô rà nghut lhê.

<sup>14</sup> Haú mù, tarâ jéyáng é nyí jé jáng, nungnhik gi, Turuq myuq eq Sidun myuq htoq má je hpuzo\* kó rà nghut lhê.

<sup>15</sup> Dum mù, Kaperna-um wà nàng ê, nàng gi, mauhkûng jé shoq waq toq é hui rà lhú? A nghut, mosumhkung má sheq gyó rà nghut lhê." ga taî ri.

<sup>16</sup> Hau htâng má, chángzô pé lé dum xoq taí é gi, "Nungmoq é dang gyo sù gi, ngá é dang gyo sù le nghut bê; nungmoq lé he-ngik é sù gi, ngo lé le he-ngik é sù nghut bê; ngo lé he-ngik é sù gi, ngo lé nhang kat sù lé le, he-ngik é sù nghut bê." gâ ri.

† 9:60 Shî bê bang gâ é gi, woi-nyí má shi to bang lé gâ lhê. ga le kâ tô ri.

† 10:2 Kyô nghû é gi, Yesuq lé lumjîng naù kôlhang taí kyo rà bang a nyi luí láng tô é bang nghut ri.

‡ 10:2 Kyô shu byù nghu é gi, Yesuq é hkyô gabú danglù lé taí kyo bang nghut ri. § 10:12 Haú buinyi gâ é gi, Garai Gasâng tarâ jéyáng é buinyi lé gâ lhê.

\* 10:14 Nungnhik je hpuzô é hkyô gi, mauhpo kumlhá myo myo myang é nghut kôlhang, myit a lhing kô é yanmai nghut ri.

### Nyhit Xê Yuq Dum Taû Jé Lo É Hkyô

17 Hau htâng, haû chángzo nyhit xê yuq gi, gabú myit èq dum taû lò mù, "Yhumsîng ê, náng é myîng lé lang jáng, nat gâng pé lhang ngamoq é dang lé gyô bum akô." ga taî akô.

18 Haû su ga taî kôjáng, Yesuq tû taî é gi, "Tsdán gi, mauhkûng htoq mai lhap hpyat é su byit gyó lo é lé ngò myang kat bê.

19 Wú keq! Ngò gi, nungmoq lé, lhang-muì eq gogok pé lé wó nang râ eq gumlau gyè pé é wum-o a-tsam banshoq lé wó ûng râ ahko ahkáng lé byi bê nghut mù luí, hai èq le nungmoq lé wó lhoq hten râ a nghut lo.

20 Nghut kôlhang, nat pé nungmoq é dang gyô é lé za hkâgabú nyî kó, mauhkûng htoq mâ é asak jihpán laiká buk má nungmoq é myîng bo to bê lé sheq gabú nyî keq." ga taî ri.

21 Haû u lé, Yesuq gi, Chyoiyúng Woi-nyí má gabú é myit byíng lô mù, "Mauhkûng eq myigung é Yhumsîng, Áwa ê, Nàng gi, haû pé lé, hpaqchyî byéng-yá bò bang eq myit hpaqchyî sé bâng é hí mai haq nghop to luí, zoshâng wuì lé tûn shit bê nghut é yanmai, Ngò, Nang lé hkya-ôn lhê ô. Nghut bê, Áwa ê, haû gi, Nàng ô nau é hkyô nghut ri.

22 Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai luí ó le a sé; Áwa ó nghut é lé le, haû Zo eq haû Zo mai sé nhâng râ matú hkyin yu é bang mai lai luí, ó a sé." ga taî ri.

23 Hau htâng má, Yhâng é chángzô pé shut lhing wú luí, yhangmoq lé baú za haq taî kat é gi, "Nungmoq byu-myàng é hkyô pé lé, myang é myoq pé gi, hkungsô wó nyi ri.

24 Hkâsu mù gâ le, Ngò, nungmoq lé taî kôlé, nungmoq wó myàng, wó gyô é pé lé, myiqhtoí pé eq hkohkam pé myo myo gi, myàng nau gyo nau kôlhang, a wó myàng, a wó gyo kó nghut ri." ga taî ri.

### Gè É Samariq Byû

25 Haû hkûn, wú keq, tarâ sará rayuq gi, toq luí, Yesuq lé, "Sarâ ê, ahtum abyuq é asak lé wó yû shoq, ngò hkâsu kut râ râ lhê lhú?" ga luí, Yhang lé myî chyam wú ri.

26 Yesuq gi, "Mosheq é tarâ má hkâsu ga kê tô ri lhú? Nàng haû lé hkâsu nghap yu nyi lhê lhú?" ga luí, yhang lé myî ri.

27 Haû yuq gi, "Haû Yhumsîng náng é Garai Gasang lé, náng é myit nhikhum banshoq, náng é asak woi-nyí lhum gón, náng é wum-o banshoq, náng myit é hkyô banshoq èq, chyitdap râ lhê; \* náng gûng lé nàng chyitdap é su, náng é chyangnâm mâ é bang lé le chyitdap aq. \* ga tû taî ri.

28 Yesuq gi, "Nàng tû taî é dang jô ri; haû su yhang kut aq, haû jáng nàng gi, asak duì râ nghut lhê." ga yhang lé taî ri.

29 Nghut kôlhang, haû yuq gi, yhâng gungdu dingmán é lé, tûn shit nau luí, "Ngá é chyangnâm mâ é sù gi, ó yuq nghut lhê lhú?" ga luí, Yesuq lé myî ri.

30 Yesuq tû taî é gi, "Byù rayuq gi, Yerusalem wà mó mai Yeriho wà shut gyó ló le, damyaq eq htûng huì ri. Damyaq haû bang gi, yhâng é mebu pé lé hkyut shang pyám byi kôluí, rayúm gyut shoq bat nha mù, aluq shoí shí jáng sheq tô pyâm to kôluí ló byuq bekô.

31 Haû u lé, hkyangjong rayuq gi, haû hkyô mai lai âng ló le, haû damyaq hui sù lé myàng jáng, koi lai ló byuq ri.

32 Haû eq rajung za, Lewiq rayuq le, haû mai lai ló é hkûn, haû yuq lé myàng jáng, koi lai ló byuq ri.

33 Nghut kôlhang, Samariq byù rayuq le, haû mai lai ló é hkûn, haû yuq leq tô é lé myàng jáng, wú shogyo luí yhâng chyáng huì é mù,

34 yhâng é dàm má, xû eq tsibiyiq wing shoq gyun luí, rago za htup byi mù, yhâng é logúng má, haû yuq lé bún ke luí, bing-yhûm ralhum má jé shoq shuí ló mù, gôn lajang byî ri.

35 Htang nyí lé, yhang gi, haû bing-yhûm yhumsîng lé ngùn Denari í chap shê byi mù, taî é gi, 'Shí yuq lé wú lajang byi laq, yhâng gùng má nàng myo chung záng é banshoq lé ngò dum taû lò jáng, lo xap râ.' gâ ri." gâ ri.

36 Hau htâng, tarâ sará lé, "Nàng gi, byù haû bang sum yuq má damyaq hui sù é chyangnâm mâ é đông nghut sù gi, hká yuq



nghut râ su ngam ri lú?" ga luí, Yesuq myí ri.

<sup>37</sup> Haú tarâ sará gi, "Haú yuq lé shogyo sù nghut ri." ga taí ri.

Yesuq gi, "Nàng le haú dông ló kut aq." ga luí, yhang lé taí kat ri.

### *Mariq Eq Mahtaq Nhik Chyáng Yesuq Ê Jé É Hkyô*

<sup>38</sup> Ahkuí, Yesuq eq Yhâng é chángzô pé hkyô xoq sô e ló kô le, wà rawà má jé wang ló é hkûn, Mahtaq gâ é myiwe rayuq gi, Yesuq lé yhâng yhûm má lhom te yu ri.

<sup>39</sup> Mahtaq gi, Mariq gâ é yhanggu myiwe zo rayuq wó ri. Mariq haú gi, Yhumsîng Yesuq é hkyî wang má zung to mù, Yhang mhoqshit é dang lé gyô nyi ri.

<sup>40</sup> Mahtaq kúm gi, saí tso saí huq é amû myo luí, gyin bûn nyi ri. Haú mù luí, yhang huí ê mù, "Yhumsîng ê, ngá gu gi, saí tso saí huq é amû má, ngo lé baú za rap kut tô é lé, nàng a bo myàng byi lú? Ngo lé, lé garúm sháng gaq, yhang lé taí byi laq." ga luí, Yesuq lé taí ri.

<sup>41</sup> Haú hkûn, Yhumsîng gi, "Mahtaq, Mahtaq, nàng gi, muzó lé za ma nyi mù, myit myo myit chiq é huí nyi ri.

<sup>42</sup> Nghut kôlhang, je ahkyak é hkyô gi, rahkat za nghut lhê. Mariq kúm gi, haú je ge é hkyô lé hkyin yù bê nghut ri. Haú lé yhâng chyáng mai wó yu pyám byi râ a nghut." ga luí, yhang lé tû taí ri.

## 11

### *Yesuq Mhoqshit É Kyûdung Dang*

#### *Mht 6:9-13; 7:7-11*

<sup>1</sup> Ra-nyí lé, Yesuq gi, jowò rawò má kyûdung nyi ri. Yhang kyû ban dung jáng, Yhâng é chángzo rayuq gi, "Yhumsîng ê, Yohan gi, yhâng é chángzô pé lé kyûdung râ hkyô mhoq byí é su, ngamoq lé le mhoq byi laq." ga Yhang lé taí ri.

<sup>2</sup> Haú hkûn, Yhang gi, "Nungmoq kyûdung le,

'Mauhkûng htoq tsáng myhâng mâ é ngamoq é Áwa ê,

Náng é myìng gi, chyoiyúng nyí sháng gaq.

Náng é mingdán jé lô sháng gaq.

<sup>3</sup> Ngamoq nyí wuí râ é zoshuq lé, ngamoq lé nyí wuí byi laq.

<sup>4</sup> Ngamoq lé shut é byù banshoq bâng é mara lé, ngamoq hkyut pyám byí é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwâng nhâng.'

ngû keq." ga luí, yhangmoq lé mhoqshit ri.

<sup>5</sup> Yesuq yhangmoq lé dum taí é gi, "Dangké, nungmoq chyáng mâ é rayuq sù gi, buinùm wó é ngû sháng, yhang gi, gunggàm yoq má haú yuq chyáng ê luí, 'Buinùm hpó ê, ngo lé muk sùm long byam chyí byí kat laq,

<sup>6</sup> haí mù gâ le, ngá buinùm rayuq byin we mai ngá chyáng jé nyi tô ri. Ngò gi, yhang lé byi tso râ haí le a joq byam dut tô ri.' ga taí é hkûn,

<sup>7</sup> yhúmkaú shut mâ é sù gi, 'Ngo lé, hkâlê lhoq hkyik lo, hkum le myhî pyám bê, ngá zoshâng wuì le ngò eq rahá yhupjang má yhup to bekô. Ngò, nang lé haí le a wó toq yù byi lo.' ga tu kat ri.

<sup>8</sup> Ngò, nungmoq lé taí kôlé, buinùm nghut é yanmai za gi, muk a kâm toq byi lo kôlhang, zuq zuq dúng nyi é yanmai, haú yuq lé, yhang ra châ é banshoq toq yù byi râ nghut lhê.

<sup>9</sup> Haú mù, ngò, nungmoq lé dum taí kôlé, dung keq, haú jáng, nungmoq lé byi râ nghut lhê; hô keq, haú jáng, nungmoq myàng kó râ nghut lhê; hkum má kok keq, haú jáng, nungmoq lé hpóng byi râ nghut lhê.

<sup>10</sup> Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

<sup>11</sup> Nungmoq íwâ pé má, ó yuq wá, yhum-sing yhangzo muk dúng le, luqgok byi kó râ lú? Ngozo dúng le, lhangmui byi kó râ lú?

<sup>12</sup> Woq-ú dúng le, gogok byi kó râ lú?

<sup>13</sup> Agè ashop é bang nungmoq lhang gi, nungmoq é zo wuì lé, ge é chyunghuq dat byi kô le nhîng, mauhkûng htoq tsáng myhâng mâ é nungmoq é Íwa gi, Yhang lé dúng é bang lé, je riyhang haú Chyoiyúng Woi-nyí byi râ nghut lhê." ga taí ri.

*Mara Hûn É Dang Lé Yesuq Tû Taí É Hkyô  
Mht 12:22-30, 43-45; Mrk 3:20-27*

14 Radàm lé, Yesuq gi, byù rayuq lé dang a wó nyô shoq kut tô é nat gang lé, haú yuq chyáng mai hkat htoq pyâm ri. Nat haú htoq lô byuq é htâng má, dang a wó nyô sù gi, dang wó nyo nyi é yanmai, byù moq mó gi, chôm maú byuq bum akô.

15 Nghut kôlhang, yhangmoq chyáng mâ é ra-am gi, "Yhang gi, nat gâng pé é zau Bezebulaq é wum-o a-tsam eq za, nat gâng pé lé wó hkat pyâm é nghut ri." ga taí bum akô nghut ri.

16 Ra-am le, Yhang lé, mauhkûng mâ é kumlhá tún shit wú laq ga dúng chyam wú akô.\*

17 Yesuq kúm yhangmoq myit nyi é hkyô lé sé mù taí é gi, "Ikun byoq é mingdán hká lhum nghut kôle, hten byuq râ za nghut lhê; haú eq rajung za, ikun byù yhangchang rayuq eq rayuq byoq lhùm é yhùm htu gi, byoq gâng lhum râ za nghut lhê.

18 Nat pé le yhangmoq yhangchang byoq gâng lhùm nyi kô é nghut le gi, Tsadán é mingdán gi, hkâsu kut wó gîng to râ lúh? Ngò isu nghu taí é gi, nungmoq ngo lé Bezebulaq é wum-o a-tsâm eq za, nat gâng pé lé hkat pyâm ri ga kô é yanmai nghut lhê.

19 Ngò gi, Bezebulaq é wum-ô eq za, nat gâng pé lé hkat htoq é nghut jáng, nungmoq é chángzô pé gi, ó yuq é wum-o a-tsâm eq za, nat gâng pé lé hkat pyâm kô é nghut lhê lúh? Haú mù luí, yhangmoq gi, nungmoq lé jéyáng é bang dut bekô râ nghut lhê.

20 Nghut kôlhang, Ngò gi, Garai Gasâng é wum-ô eq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

21 Wum-o bo é sù rayuq gi, yhâng é yhùm lé, shâm, lhâm chûng luí zúng tô é nghut jáng, yhâng é sutzè pé gi, rago za wó joq to râ nghut lhê.

22 Nghut kôlhang, yhâng htoq wum je bo é sù lé luí, haú yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyám byi luí, yhâng é sutzè pé lé, gam yu pyám byi râ nghut lhê.‡

\* **11:16** Byu pé gi, Yesuq lé Garai Gasang nhang kat é hkyô lé saksé myàng nau luí, mauhpo kumlhá dúng nyi akô.

† **11:20** *Garai Gasâng é mingdán* gâ é gi, byù htoq má le, nat htoq má le, Garai Gasâng yhang uphkan é lé gâ é nghut lhê. ‡ **11:22** Haú eq rajung za, Yesuq gi, Tsadán lé zân ûng bê nghut é yanmai, agè ashop é nat pé lé byu pé chyáng mai, wó hkat pyám bê nghut ri.

§ **11:30** Kumlhá gi, Yonaq, ngozô wam dau má sum nyí lúng é su, Yesuq le, shí bê mai sum nyí nghu râ nyí má, dum dui toq lô râ hkyô lé taí nau é nghut ri.

23 Ngá hkyam shut a dap sù gi, Ngo lé gye kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.

24 Haú agè ashop é nat gi, byù rayuq chyáng mai htoq lô mù, kyuq huí é jowò pé má sô yông e lô luí, no râ jowò hkat ho wú le, a myang hô nghut ri. Haú hkûn, yhang gi, 'Ngò nyi lai lo é yhùm má dum taú lô wú râ.' ga taí ri.

25 Yhang dum taú jé lô wú le, yhùm haú gi, shum pyám mù san za rago dut to láng é lé lô myang ri.

26 Haú jáng, yhang gi, dum taú ê mù, yhâng htoq je wuí é nat nyhit nat lé shuí lò luí, haú má lo wàng nyi to bekô. Haú mù, haú yuq é nyi yap sâmlai gi, hí lhê htoq má je wuí lò bê nghut ri." ga taí ri.

27 Haú su ga, Yesuq taí nyi é hkûn, haú shiwa hpong mâ é, myiwe zo rayuq htê mó o mó eq Yhang lé taí é gi, "Nang lé wun é ûng wam eq nàng shuq é nauwang gi, hkungsô wó nyi ri ô!" gâ ri.

28 Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó râ nghut lhê." ga taí ri.

*Mauhpo Kumlhá Lé Dung Kô É Hkyô  
Mht 12:38-42; Mrk 8:12*

29 Shiwa byu pé jat myô zup zîng lo é hkûn lé, Yesuq taí é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dúng nyi bùm kôlhang, Yonaq é kumlhá mai lai luí, gotú haí le tún shit râ a nghut.

30 Yonaq gi, Ninewe wà byù pé hí má kumlhá§ dut é su, haú Byu Yhangzo gi, shí pyat lhê é byu pé hí má, kumlhá dut râ nghut lhê.

31 Maupyî mâ é hkohkâm myhí gi, maumyî lô htâng é mai lé lô mù, Sholumon é hpaqchyî dang lé, lé gyô yù bê nghut mù, haú tará jéyáng é buinyi má, shí ipyat mâ é byu pé eq rahá toq lô luí, yhangmoq lé mara hùn râ nghut lhê. Wú keq, Sholumon htoq ko sù gi, ahkuí shí má jé nyi to bê.

<sup>32</sup> Ninewe wà byu pé gi, Yonaq, mungdang hko kyô é hkûn myit lhîng kô é nghut mù, tarâ jéyáng é buinyi má, shí ipyat eq rahá toq lô luî, yhangmoq lé mara hûn kô râ nghut lhê. Wú keq, Yonaq htoq ko sù gi, ahkuî shí má jé nyi to bê.

*Myibung Su Duqbó Râ Hkyô*  
*Mht 5:15; 6:22-23*

<sup>33</sup> Myibung lé tuq mù go pyâm é jowò má tô tô é le, mûng eq nghop tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô.

<sup>34</sup> Náng é myoq gi, náng gungdû é myibung\* nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi râ nghut lhê.

<sup>35</sup> Haû mù, náng chyáng bo é maubó gi, mauchut byuq é, a chut byuq é lé wú nyi aq. Nang lumjîng é hkyô eq nang myit é hkyô gi, mauchut tuq a dut sháng gaq, sidiq nyi aq.

<sup>36</sup> Náng é ragùngdu gón má duqbó é nghut le gi, rawò má le mauchut é jowò a joq é za, myibung nang lé duqbó byí nyi é su, náng gungdu gón má duqbó nyi râ nghut lhê." ga taî ri.

*Hparishe Pé Eq Tarâ Sará Pé Lé, Yesuq*  
*Mara Hun É Hkyô*

*Mht 23:1-36; Mrk 12:38-40; Luk 20:45-47*

<sup>37</sup> Yesuq haû su ga ban taî é htâng má, Hparishe rayuq gi, yhang eq zang rahá zo râ matú, Yesuq lé ji ri. Haû mù, Yesuq gi, haû yhûm má wang ê mù zang zo râ ga siboî nàm má zung tô ri.

<sup>38</sup> Nghut kôlhang, Hparishe wá gi, zang zo râ hí má Yesuq loq a chî é lé, myàng luî maú nyi ri.†

<sup>39</sup> Haû mù luî, Yhumsîng Yesuq yhang lé taî é gi, "Nungmoq Hparishe pé gi, góm eq zanghkoq lé ahtoq shut za chî yúng nyi kômù, nungmoq é unghkaû má gi, lú zo lú shuq é eq agè ashop é hkyô pé byíng zan tô ri.

<sup>40</sup> Byù bâm pé ê, ahte‡ lé le, ahtoq§ lé le, saí sù gi, Garai Gasang rayuq za nghut é lé, a sé kó lhú?

<sup>41</sup> Nghut kôlhang, ahte má bo é zè pé lé, ra châ é bang lé byí pyám keq; haû hkûn, nungmoq é matú banshoq gi, sân-yúng lô râ nghut lhê.

<sup>42</sup> Hparishe pé ê, nungmoq gi, dingnyé wó ri, hkâsu mù gâ le, nungmoq gi, gau-tsáng, shingtón pé eq zangxun mhan-haq ajù jù mâ é, xê gambùm ragambùm lé gi, Garai Gasang lé byi nyi kômù, tarâ dingmán é hkyô eq Garai Gasang chyitdap é hkyô lé gi, lhaí pyâm tô akô. Xê gambùm ragambùm byí é lé le cháng luî, tarâ dingmán é hkyô eq Garai Gasang lé chyitdap é hkyô lé le, kut nyi râ lhê.

<sup>43</sup> Hparishe pé ê, nungmoq gi, dingnyé wó ri, hkâsu mù gâ le, tarajong pé mâ é ahkyak dik é zùng jang pé lé le, gai pé má hkunggâ é eq shichyên é dang lé le, nungmoq ô nau nyi bum akô.

<sup>44</sup> Nungmoq gi, dingnyé wó ri, hkâsu mù gâ le, nungmoq gi, ahkô a dong lo mù, byu pé a sé luî, ahtoq mai sô laî é lupdùng eq du akô." ga taî ri.

<sup>45</sup> Haû hkûn, tarâ sará rayuq gi, "Sará ê, nang haû su gâ é gi, ngamoq lé le rhoi lhôm nyi é nghut bê." ga Yhang lé tû taî ri.

<sup>46</sup> Haû su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gâ le, nungmoq gi, byu pé lé, wùn waq râ wuî é noqkuq htûng tarâ wòlai lé wùn nhâng luî, yhumsîng yhang gi, wò haû lé loqnyhuî eq lháng, a bo záng wú kó nghut ri.

<sup>47</sup> Nungmoq gi, dingnyé wó ri, hkâsu mù gâ le, nungmoq gi, nungmoq é îchyí îwâ pé sat pyâm é myiqhtoî pé é lup lé luptsuq tsuq akô.

<sup>48</sup> Haû mù luî, nungmoq gi, nungmoq é îchyí îwâ pé é muzó lé, myit bo huî é bang nghut nyi akô. Hkâsu mù gâ le, yhangmoq gi, myiqhtoî pé lé sat pyám mù, nungmoq gi, lup haû pé lé luptsuq tsuq akô.

<sup>49</sup> Haû mù luî, Garai Gasang, Yhâng é hpaqchyí byéng-yá mai taî é gi, 'Myiqhtoî pé eq lagyô pé lé, ngò yhangmoq chyáng

\* **11:34** Myibung gâ é gi, tengmán é mungdang lé wó sê yu é a-tsam lé, taî é nghut ri. † **11:38** Yudaq htûng tarâ má gi, zang a zo shi má loq chi râ lhê. ‡ **11:40** Ahte gâ é gi, i-myit unghkaû lé taî ri. § **11:40** Ahtoq gâ é gi, gungdu lé taî ri.

nhang kat râ nghut lhê; haú bang mâ é ram lé gi, yhangmoq lhom sat pyâm mù, ram lé gi, zing-ri kó râ nghut lhê.' gâ ri.

<sup>50</sup> Haú su mù luí, mau htoq xâng hkûn lhê é, Abelaq é sui mai, hkungga gyap eq noqkuq yhùm gyoro má sat pyám huí é Zahkariq é sui jé shoq, shun pyâm é myiqh-toí pê é sui banshoq bâng é manglat gi, shí pyat má é byu pé lé hûn râ nghut lhê.

<sup>51</sup> Ngò, nungmoq lé taí kôlé, manglat haú pé lé gi, shí pyat má é byu pé lé, gè gè yhang hûn râ nghut lhê.

<sup>52</sup> Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zoqshi lé yu pyám byi kômù, yhumsîng yhang le a sé, sé naú bang lé le, hkûm zing tô akò nghut ri." ga taí ri.

<sup>53-54</sup> Yesuq haú mai htoq ló é hkûn, tarâ sará pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wuí é dangmyi myo myo myi luí, gyám wú nyi akò nghut ri.

## 12

### *Gegùn Labyoq Kut É Bang Lé Sidiq Râ Hkyô*

*Mht 10:28-33; 12:32; 10:19-20*

<sup>1</sup> Haú u, byù hkyîng mun zup zîng lò mù, rayuq eq rayuq lháng záng nâng lhum shoq dut nyi é hkûn, Yesuq, Yhâng é chángzô pé lé taí hí é gi, "Gegùn labyoq kut é Hparishe pé é múmchi lé koi sidiq pyám keq.

<sup>2</sup> A byông htoq loshoq wó zaú nghop tô é, haí le a joq râ nghut lhê; a sé loshoq wó haq tô é le, haí a joq râ nghut lhê.

<sup>3</sup> Haú mù luí, nungmoq, mauchut hkaú má haq taí é dang banshoq lé, myoq myàng maubó má wó gyô bùm kó râ nghut lhê. Gok hkaú má, dangsoq soq é lé le, yhumhkûng htoq mai taí pyo bùm bekô râ nghut lhê.

<sup>4</sup> Ngá buinùm wuì ê, Ngò, nungmoq lé taí kôlé, gungdu lé za wó sat pyám mù, woi-nyí lé haí le a wó kut é bang lé, hkâgyuq kó.

<sup>5</sup> Nghut kôlhang, nungmoq ó lé za gyuq râ é lé gi, Ngò, nungmoq lé taí kyo kôlé, gungdu lé sat pyâm é htâng má, woi-nyí lé ngaraí ming shut wó hkyô kat pyâm é atsam wó sù lé kúm gi, gyuq keq. Nghut bê,

Ngò, nungmoq lé taí kôlé, haú yuq lé za, gyuq nyi keq.

<sup>6</sup> Johkyáng ngo du lé, gyi htingchap í chap èq wó ûng pyâm lhê a nghut kó lhú? Haú johkyáng radu lé lháng, Garai Gasang gi, tô-myhí pyâm é a nghut.

<sup>7</sup> Garai Gasang gi, nungmoq é ulhum mâ é xâm banshoq lé lháng, nghap to gù nghut lhê. Haú mù, hkâgyuq kó; nungmoq gi, haú johkyáng myo myô htoq má lháng gù je bo é bang nghut lhê.

<sup>8</sup> Ngò, nungmoq lé taí kôlé, byu pé hí má Ngo lé lhom yín yu é sù ó yuq nghut kôle, Garai Gasâng é maumang lagyô pé é hí má, haú Byu Yhangzo gi, haú yuq lé lhom yín yú râ nghut lhê.

<sup>9</sup> Nghut kôlhang, byu pé é hí má Ngo lé he-ngik pyâm é sù lé chyaú gi, Garai Gasâng é maumang lagyô pé é hí má, he-ngik pyâm râ nghut lhê.

<sup>10</sup> Haú Byu Yhangzo lé dang dông shut é sù gi, mara hkyut byí é wó hui ra nghut lhê; nghut kôlhang, haú Chyoiyúng Woi-nyí lé rhoi dang taí pyâm é sù gi, mara hkyut byí é hui râ a nghut.

<sup>11</sup> Byu pé nungmoq lé jéyáng râ matú tarajong pé má le, agyì suwún wuì eq ahkáng ayá wó bâng é hí má le, shuí e ló kó é hkûn, hkâsu kut râ lé le, hkâsu nghu tú taí râ lé le, hkâ-myit chiq kó.

<sup>12</sup> Hkâsu mù gâ le, haú u lé yhang, Chyoiyúng Woi-nyí gi, nungmoq hkâsu taí râ hkyô lé mhoqshit byi râ nghut lhê." ga taí ri.

### *Hpaqchyí A Bo É Sahtê Hpó Lé Dangtú Yu É Hkyô*

<sup>13</sup> Haú hkûn, shiwa hpúng hkaú mai, byù rayuq gi, "Sará ê, ngá-nhik tâng wó é muizè pé lé chôm gam lhum râ matú, ngá mang lé bo taí byi laq." ga luí, Yesuq lé taí ri.

<sup>14</sup> Yesuq gi, "Byù nàng ê, nungnhik tang ahtoq má tarâ agyì kut luí, ikun zè gàm byi râ gi, ngo lé ó hkyin tô é lhú?" ga luí, yhang lé tú taí ri.

<sup>15</sup> Yesuq yhangmoq lé taí é gi, "Myoqnoq é hkyô banshoq mai, nungmoq é i-myit lé hkûm zîng luí, koi sidiq nyi keq. Hkâsu mù gâ le, byu é asak gi, agùn agó é sutzè má bo é a nghut." gâ ri.

16 Dangtú ralhum dông mai le, yhang-moq lé Yesuq taí é gi, "Sahtê rayuq gi, yhang é yò pé má guqzo muilhum gyaí já ri.

17 Haú mù luí, yhang é unghkaú má myit é gi, 'Ngò hkâsu kut wú râ lhi? Ngá é guqzo muilhum pé lé kat to râ jowò a wó lo dut to bê.' gâ ri.

18 Dum nghut jáng, yhang gi, 'Ngò îsu kut wú râ abe, ngá é chyí xau pé lé hpyoq pyám luí, je kô é chyí pé lé saí râ nghut lhê. Chyí haú pé má ngá é guqzo muilhum pé eq sutzè banshoq lé, tsing kat to luí,

19 ngá é i-myit lé îsu nghû taí râ, "I-myit ê, zanwut myáng myáng é matú, zè gè myo myo ngò tsing to bê. I-myit nàng zim za kut nyi aq hkoi. Zo mù, shuq mù, ngón ngón nyi aq." ga' gâ ri.

20 Nghut kôlhang, Garai Gasang gi, 'Byù gò ê, náng é asak lé, hkû-myîn yhang, wup yu pyám byî é nghut jáng, nàng tsing hkong tô é zè pé gi, ó yuq é matú dut râ lú?' ga luí, yhang lé taí ri.

21 Haú eq rajung za, yhumsing é matú sutzè hkong to mù luí, Garai Gasang é hí má myung nyi sù gi, haú yuq su nghut râ nghut lhê." gâ ri.

### *Myit A Chiq É Za Garai Lé Lumjínq Râ Hkyô*

#### *Mht 6:25-34, 19-21*

22 Yesuq, Yhang é chángzô pé lé dum taí é gi, "Haú mù luí, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myit chiq kó.

23 Asak gi, zoshuq htoq má, gungdu gi, mebû htoq má, je ahkyak lhê.

24 Nghonoq pê é hkyô lé myit wú keq; yhangmoq gi, kyô hkyó kyô shu a kut kó; guqchyí eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó lú?

25 Nungmoq má, ó yuq wá, myit chiq é eq, yhumsing é asak lé radúng kô wó jat yù kó râ lú?

\* 12:27 Htutbó ban gi, yúng dik é yosô ban nghut lhê.

26 Haú su mù luí, tiq dik é hkyô lé lhang, nungmoq a wó kut kô é nhing, haí mù luí gotú hkyô pé lé, myit myô nyi akô lú?

27 Htutbó ban\* pé hkâsu kut kô lo é lé, myit wú keq. Haú pé gi, mù le a zui, hkying le a duí kó nghut ri. Nghut kôlhang, Ngò, nungmoq lé taí kyo kôlé, Hkohlâm Sholumon hpúng kô dik u lé wut é mebu lhang, ban haú rabó lé a hkyit nghut ri.

28 Lumjínq myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haú su kut hut é nghut le gi, nungmoq lé, je riyhang hut râ a nghut kó lú?

29 Nungmoq gi, haí zo haí shuq râ lé hkâho nyi kó; haú eq séng luí lé hkâ-myit chiq nyí kó.

30 Hkâsu mù gâ le, Garai Gasang lé a sé bang gi, haú hkyô banshoq lé châng hkat ho nyi akô; nghut kôlhang, nungmoq é Îwa Garai Gasang gi, haú pé lé nungmoq râ é hkyô, sé byi nyi lhê.

31 Nungmoq kúm gi, Yhang é mingdán lé ho nyi keq, haú jáng, haú pé, nungmoq lé puq byi râ nghut lhê.

32 Sau hpúng zô pé ê, hkâgyuq ko, hkâsu mù gâ le, nungmoq é Îwa Garai Gasang gi, Yhang é mingdán nungmoq lé byí nau nyi ri.

33 Nungmoq wó é zè pé lé ûng pyám luí, myùng bang lé byi keq, yhumsing é matú a dat xau a dat wôm é ngunhtung saí luí, hkau sù lé a jé, manot eq le a wó zô é sutzè lé mauhkûng htoq má hkong to keq.

34 Hkâsu mù gâ le, náng é sutzè joq jang má, náng é i-myit le jé nyí râ nghut lhê.

### *Yesuq Dum Jé Lé Lô Râ Hkyínq Lé Machya Nyi Râ Hkyô*

#### *Mht 24:45-51*

35 Nungmoq gi, hpyihit hit luí, (mù zui râ matú rì rì kut to keq); nungmoq é myibung lé tuq to mù,

36 myiháng poí mai dum taú lò luí, hkúm lo kok é, yhumsing hpó lé radá dâm hkum lhom wó hpông hâng yù shoq, láng tô é dui-nhâng zoshâng wui su kut nyí keq.

<sup>37</sup> Haù yhumsîng jé lo le, machya nyi láng é dui-nhâng zoshâng wuî gi, hkungsô wó nyi râ. Hkâsu mù gâ le, ngò, nungmoq lé teng za taí kôlé, haù yhumsîng hpó gi, yhangmoq lé yuq zung to nhâng luî, yhang gi, dui-nhâng zoshâng su hpyihit hit mù, saí tso saí huq râ nghut lhê.

<sup>38</sup> Gunggàm yoq lé nghut kôlhang, woq tân hkûn lé nghut kôlhang, haù su kut machya nyi é lé, yhumsîng hpó lo myang é nghut le gi, dui-nhâng zoshâng haù bang hkungsô wó nyi ri.

<sup>39</sup> Yhumsîng hpó rayuq, hká u má hkau sù lé lô râ lé, sê tô é ru nghut le gi, yhang machya nyi luî, yhang yhûm lé a wó hput htong nhâng râ nghut é lé, bûn sê nyi keq.

<sup>40</sup> Haù mù, nungmoq le rì rì nghut nyi keq; hkâsu mù gâ le, haù Byu Yhangzo gi, a bûn nùng má jé lé lô râ nghut lhê." gâ ri.

<sup>41</sup> Haù hkûn, Petruq gi, "Yhumsîng ê, dangtú shí gi, ngamoq lé za, taí é nghut lhê lú? Haù a nghut jáng, lunglhang bang lé taí é dông nghut lhê lú?" ga myî ri.

<sup>42</sup> Haù jáng, Yesuq gi, "Lumgíng é eq hpaqchyî bo é sùt zum sù gi, hká yuq nghut lhê lú? Haù yuq gi, yhang yhumsîng é dui-nhâng zoshâng wuî lé ahkyíng jé jáng zoshuq gâm byi râ matú, yhumsîng hpô éq hkyin to sù dut râ nghut lhê.

<sup>43</sup> Yhumsîng hpó dum taù lo é hkûn, haù su kut nyi láng é dui-nhâng zoshâng gi, hkungsô wó nyi ri.

<sup>44</sup> Ngò, nungmoq lé teng za taí kôlé, yhumsîng hpó haù gi, yhang é sutzè ban-shoq, dui-nhâng zoshâng haù lé ap to râ nghut lhê.

<sup>45</sup> Nghut kôlhang, dui-nhâng zoshâng haù gi, yhang é i-myt unghkau má, 'Ngá é yhumsîng hpó jé lô râ gyai myáng ashî.' ga myit pyám mù, dui-nhâng zoshâng luzúm wuî myiwe, yuqgè lé nhuq bat é eq, zo yê shuq yê î shuq wut nyi é nghut jáng,

<sup>46</sup> dui-nhâng zoshâng hau é yhumsîng hpó gi, yhang a myitbyu tô é buinyi eq yhang a sé tô é ahkyíng má jé lô mù, yhang lé jap pyám luî a lumjîng bang eq rahá nyi pyám râ nghut lhê.

<sup>47</sup> Yhumsîng hpô é i-myt lé sê to kôlhang,

yhang ô nau é dông a cháng, rì rì le a hen tô é dui-nhâng zoshâng gi, yhang yhumsîng èq nhuq bat é lé, myo myo hui zo râ nghut lhê.

<sup>48</sup> Nghut kôlhang, a sé mù kut shut sù kúm gi, shau za bat é hui râ nghut lhê. Haù eq rajung za, Garai Gasang gi, myo shoq wó yù su chyáng mai, myo shoq dúng yù râ nghut lhê. Myo myo ap byî tô é hui su chyáng mai, je myo shoq dum dúng yù râ nghut lhê.

*Nguingón Nhâng Râ A Nghut, Lhoq Kang Nhâng Râ Ru Nghut Lhê*

*Mht 10:34-36*

<sup>49</sup> Ngò jé lé é gi, myigùng htoq má, myi nyé nhâng râ matú nghut lhê. Myi haù dap to láng é nghut le gi, ngò ô nau é hkyô jup byíng bê.

<sup>50</sup> Nghut kôlhang, ngò hkam yù râ é baptisma† rajung joq ashî, haù a hkam yù yù gi, ngò gyai yhang hkâm zo wuî nyi ri.

<sup>51</sup> Ngò jé lé é gi, myidàm htoq má simsaq hkyô byi râ matú nghut nhô ngam akô lú? Haù dông a nghut, Ngò, nungmoq lé taí kôlé, byu pé lé lhoq pyô lhoq kang râ matú sheq ru nghut lhê.

<sup>52</sup> Haù su mù, ahkuî mai rayhûm za mâ é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô râ nghut lhê.

<sup>53</sup> Yhângwa gi, yhang é yuqzo eq, yuqzo gi, yhângwa eq, yhângnu gi, yhang é byizo eq, byizo gi, yhângnu eq, yhangmhoí gi, yhang dumó eq, yhang dumó gi, yhangmhoí eq kut, ngá é yanmai, rayuq eq rayuq byoq gâng lhum bùm bekô râ nghut lhê." ga taí ri.

*Dut Lò Râ Hkyo É Kumhá Lé Sê Gam Hkoq Râ Lhê*

*Mht 16:2-3; 5:25-26*

<sup>54</sup> Hau htâng shiwa byu pé lé, Yhang taí é gi, "Nungmoq gi, buiwàng hkyam shut mhut htup é lé myàng jáng, 'Maú wo lò berâ.' ga radá dâm lhaq taí taí mu akô, haù eq rajung za le, dut lò lò mu ri.

<sup>55</sup> Dum nghut jáng, maupyî shut mâ é lài lo le, 'Buì htân berâ.' ga lhaq taí taí mu akô, haù eq rajung za le dut lò lò mu ri.

<sup>56</sup> Gegùn labyoq kut bang ê, nungmoq gi, myigùng eq mauhkung é kumhá lé, sê gam

† 12:50 Shí má é baptisma gi, Yesuq, ajung jung hpuzo mù shí hkâm é hkyô lé taí é nghut lhê.

hkoq yu nyi akô. Haû su nghut kô le nhîng, haî mù luî, shí ipyat mâ é kumlhá lé gi, a sê gam hkoq dut tô akô lúhú?

<sup>57</sup> Haû eq rajung za, haî mù haû dingmán é hkyô lé yhumsîng yhang yhang a wó do-  
qdân yù kô é lúhú?

<sup>58</sup> Dangké, nang lé yui tsuq sù eq rahá, tarâ agyî wá chyáng e ló le, hkyô má yhang eq ngón shoq byî hpyé huî yù aq. Haû a nghut jáng, yui yhumsîng gi, nang lé tarâ agyî chyáng ê dé pyám luî, tarâ agyî gi, htóng hkyó su chyáng, nang lé ap pyám luî, yhang gi, nang lé htóng má lhûng pyám râ nghut lhê.

<sup>59</sup> Ngò, nang lé taí lé, yuichyîn haû a ban xap xap gi, htóng haû mai nàng wó htoq ló râ a nghut." ga taí ri.

## 13

### *Myit A Lhîng Jáng Shi Hten Byuq Râ*

<sup>1</sup> Haú hkûn, haú má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaú é hkungga lé nyhò pyám é hkyô, Yesuq lé lé taí kyô akô.

<sup>2</sup> Yesuq gi, "Galile byù haú bang haû su kut hui zo kô é yanmai, yhangmoq gi, gotû Galile byu pé banshoq htoq má, yubak je myô akô nghû, nungmoq myit ngam akô lúhú?

<sup>3</sup> Haû su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haû eq rajung za shi hten byuq kó râ nghut lhê.

<sup>4</sup> Haû htoq agó, Siloam wà mâ é machya gyop gyó luî, nhê sat huî é byù raxe shit yuq gi, Yerusalem wà mó mâ é byù banshoq bang htoq má mara je kô akô nghû, nungmoq myit ngam nyi akô lúhú?

<sup>5</sup> Haû su a nghut! Ngò, nungmoq lé taí kôlé, nungmoq le, myit a lhîng kô é nghut le gi, banshoq bang haû eq rajung za shi hten byuq kó râ nghut lhê." ga taí ri.

<sup>6</sup> Yesuq dangtú dông dum taí é gi, "Byù rayuq gi, yhâng é tsibiyiq hkyâm má, maihpáng gâm ragàm hô tô ri. Yhang agàm haú má, ashî é ho wú le, zui tô é a myàng nghut ri.

<sup>7</sup> Haú hkûn, yhang gi, 'Wú aq, ngò sum zân tup maihpáng gâm haú má ashî é ho wú

le, a myàng nghut ri; haû lé htuq pyám aq. Haî mù, maumyî aha agó kut yuq nhang tô lhê lúhú?' ga luî, tsibiyiq hkyâm zúng sù lé taí ri.

<sup>8</sup> Hkyâm zúng sù gi, 'Yhumsîng ê, hkûzân za gi, yuq tô wú shi sháng gaq, shigâm hau é lhîngkyuq má ngò du lhîng to mù, myìhpún kat luî bóm byi wú shirâ.

<sup>9</sup> Htang zàn má ashî zui é nghut le gi, yuq to sháng gaq, ashî a zui é nghut le kúm gi, htuq pyám râ nghut lhê.' ga luî, hkyâm yhumsîng lé tû taí ri." gâ ri.

### *Bánno Buinyî Má Gùng Loq Hten Sù Lé, Lhoq Gê Byî É Hkyô*

<sup>10</sup> Bánno buinyî lé, Yesuq gi, tarajong ralhûm má, mhoqshit nyi ri.

<sup>11</sup> Haú hkûn, haú má raxe shit zân tup nat dap luî, gùng loq lhoq hten huî é myiwe rayuq le nyi tô ri. Yhang gi, dàngngóm luî, gungdu ratsuí lháng a wó lhoq nyhâng lô é sù nghut ri.

<sup>12</sup> Yesuq gi, myiwe haû lé myàng jáng, yhâng chyáng wut yù mù, "Myiwe myhí ê, nàng, nòhpyo mai gè berâ." ga luî,

<sup>13</sup> yhâng é ahtoq má loq ke byî ri. Haú hkûn jáng, myiwe haû gi, nyàng za dum wó yap luî, Garai Gasang lé hkya-ôn nyi ri.

<sup>14</sup> Haû mù, Bánno buinyî lé, Yesuq nòhpyo lhoq gê byî é yanmai, tarajong má up sù gi, wú nhik-yo luî, "Mù wó zui é buinyî hkyuq nyí joq tô le, buinyî haú pé má, lé wó lhoq ge yù lhê. Haû mù, Bánno buinyî má gi, hkâkut kó." ga luî, shiwa byu pé lé taí kat ri.

<sup>15</sup> Haú hkûn, Yhumsîng Yesuq gi, "Gegùn labyoq kut bang ê, nungmoq yuq hkangmó gi, Bánno buinyî lé, yhumsîng é no, logúng pé lé, hkup mai hpông htoq yù mù uchyam byi huq huq kut akô a nghut lúhú?

<sup>16</sup> Haû nghut le gi, raxe shit zân gón Tsadán èq tuî to huî é, Abraham é yhangzo yhangshu myiwe zo shî lé, Bánno buinyî má Tsadán loq mai, hkyut byi a gíng râ lúhú?" ga tû taí ri.

<sup>17</sup> Haû su ga taí jáng, Yhang eq i-myit shai lhum é bang banshoq gi, hoq hpú byuq bum akô. Shiwa byù banshoq bang kúm gi, Yhang kut é mauhpo amû banshoq é yanmai, gabú nyi bum bekô nghut ri.

*Angshi Cham Eq Munchi Dangké*  
*Mht 13:31-33; Mrk 4:30-32*

<sup>18</sup> Haú hkûn, Yesuq taí é gi, "Garai Gasâng é mingdán gi, hai eq wuí lhê lhú? Ngò hai eq taí kê wú râ lhú?"

<sup>19</sup> Haú gi, byù rayuq mai, yhâng é hkyâm má hô tô é angshi cham eq wuí ri. Angshi cham haú gi, yuq kê lò mù agàm mó dut lò jáng, hau é akoq pé má, maulat nghoq zô pé wó zung nô yu akô." gâ ri.

<sup>20</sup> Yhang dum xoq taí é gi, "Garai Gasâng é mingdán lé, ngò hai eq taí kê wú râ lhú?"

<sup>21</sup> Haú gi, myiwe zo rayuq eq sungso mún sum bûng má yu nyhó luí, haú pé banshoq lé wó lhoq daú nhang é múnchi eq wuí ri." gâ ri.

*Chyap É Hkúmdong*  
*Mht 7:13-14, 21-23*

<sup>22</sup> Hau htâng, Yesuq gi, Yerusalem wà mó shut lai e ló uchyang, rawà bàn rawà má wàng mù, mhoqshit byi ri.

<sup>23</sup> Haú hkûn, byù rayuq gi, "Yhumsîng ê, hkyi yu é hui râ bang gi, shau za nghut râ lhú?" ga luí, Yesuq lé myi ri.

<sup>24</sup> Yesuq gi, "Chyap é hkúmdong mai, Garai Gasâng é mingdán má wó wâng shoq shikut keq. Hkâsu mù gâ le, ngò, nungmoq lé taí kôlé, byù myo myo gi, wó wâng shoq ga shikut wú kó râ. Nghut kôlhâng, a wó wâng kó râ nghut lhê.

<sup>25</sup> Yhumsîng hpó,\* hkum toq myhî pyâm é htâng má sheq, nungmoq gi, hkúmdong hí má yap to mù, hkum lé kok uchyang, 'Yhumsîng ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tú taí râ nghut lhê.

<sup>26</sup> Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byi wú bê nghut lhê.' ga taí bekô râ.

<sup>27</sup> Nghut kôlhâng, yhumsîng hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut

é bang banshoq ê, ngá chyáng mai gâng ló byuq keq.' ga tú taí kat râ nghut lhê.

<sup>28</sup> Garai Gasâng é mingdán má, Abraham, Isak, Yakup pé eq myiqhtoí pé banshoq bang nyi tô kê é lé, nungmoq wó myâng kôlhâng, nungmoq gi, shinggan shut hkat pyâm é hui luí, haú jowò má ngaubyi ngaú nhap eq zui kyik kyik shoq hpuzô nyi bùm bekô râ nghut lhê.

<sup>29</sup> Hau hkûn, buihtoq, buiwàng, maupyí, mautsûng má é mingdán myo myo mai byu pé lé luí, Garai Gasâng é mingdán zoshuq poí má myang zùng kó râ nghut lhê.

<sup>30</sup> Haú hkûn, ahkuí htâng gyó nyi bang gi, hí bekô râ; ahkuí hí to bang gi, htâng gyó bekô râ." ga luí, yhangmoq lé taí ri.

*Yerusalem Wà Mó Eq Séng Luí, Yesuq Taí É Hkyô*

<sup>31</sup> Haú u lé, Hparishe pé ra-am gi, Yesuq chyáng lé luí, "Shí jowò mai htoq ló byuq aq. Hkâsu mù gâ le, Herut gi, nang lé sat râ hen nyi ri." ga luí, Yhang lé taí akô.

<sup>32</sup> Haú jáng, Yesuq gi, "Hkû-nyí, napmá,† ngò nat gang hkat pyám luí, nô zo hpyo zo lhoq gê byi râ nghut lhê; sum nyi nghú râ buinyi‡ má sheq, ngá mù bàn râ nghut lhê.' nghú luí, agè ashop é wamhkui haú lé ló taí kyo keq.

<sup>33</sup> Haí wá dut kôlhâng, hkû-nyí, napmá, sânghe nyí, ngò gi, e ló râ dut ashî. Hkâsu mù gâ le, myiqhtoí pé gi, Yerusalem wà mó mai lai luí gotù jowò má a shi wú kó nghut ri.

<sup>34</sup> Yerusalem ê, Yerusalem ê, myiqhtoí pé lé sat pyám pyám kut mù, náng chyáng nhang kat é bang lé, luqgok eq dú sat sat kut é myuq nàng ê, woqzing gi, yhangzô pé lé, yhâng é dùng hkaú má tsîng lhûng yu é su, nungzô pé lé, Ngò hkâ-myhó dâm shui tsîng yù nàu kôlhâng, nàng a dóng nghut ri.

<sup>35</sup> Wú keq, nungmoq é yhûm gi, nungmoq é matú chamchyuiyui dut pyâm to berâ nghut lhê; Ngò, nungmoq lé taí kôlé; 'Yhumsîng é myîng mai jé lé lo é Sû gi,

\* **13:25** Yhumsîng hpó gi, Garai nghut lhê. Yhûm gi, Garaí é mingdán lé taí é nghut lhê. † **13:32** Hkû-nyí, napmá gâ é gi, Yesuq mingkan htoq má mù zui râ ahkýing lé taí é nghut lhê. ‡ **13:32** Sum nyi nghú râ buinyi gâ é gi, Yesuq mingkan htoq má mù ban zui é buinyi lé taí é nghut lhê. ✧ **13:35** Hkya-on 118:26



hkungsô wó nyi sháng gaq. ✠ nghû, nungmoq a taí taí gi, Ngo lé wó myàng kó rà a nghut lo." ga luí, yhangmoq lé taí ri.

## 14

### *Hparishe Rayuq É Yhûm Má Yesuq Jé Nyi É Hkyô*

<sup>1</sup> Bánno buinyi ra-nyí má, Yesuq gi, zang zo rà ga Hparishe suwún rayuq é yhûm má, ê wang nyi tô le, haú má é bang gi, Yhang lé gyui gyui chôm wú nyi bum akô.

<sup>2</sup> Haú u lé, wui wam ana dut sù rayuq gi, Yesuq é hí má jé nyi tô ri.

<sup>3</sup> Haú mù, Yesuq gi, "Bánno buinyi má nõhpyo lé lhoq gê byi é gi, tarâ wang lhê lú, a wang é lú?" ga luí, tarâ sará pé eq Hparishe pé lé myi kat ri.

<sup>4</sup> Nghut kôhang, yhangmoq gi, zim za dut byuq akô. Haú hkûn, Yesuq gi, nõhpyo hui sù lé, zuí to mù, lhoq gê byi luí, nhang kat ri.

<sup>5</sup> Hau htâng, Yesuq gi, yhangmoq lé, "Nungmoq chyáng má é rayuq yuq gi, yhumsing é yhangzo rayuq yuq, haú a nghut jáng, no myang radu du, Bánno buinyi má, wuihtung má byit gyó le, haú hkûn jáng, a xe htoq yu é za, wó nyi kó rà nghut lhê lú?" ga myi kat ri.

<sup>6</sup> Yhangmoq kúm gi, dang haú hkun lé, haí le a wó tû taí kó nghut ri.

<sup>7</sup> Haú hkûn, Yesuq gi, jì tô é bang jé réng é zùng jowò pé hkyin yu nyi kô é lé myàng jáng, yhangmoq lé dangtú dông taí é gi,

<sup>8</sup> "Byù rayuq yuq nang lé, myiháng poi má jì é nghut jáng, je réng é jowò má hkâ-ê zùng. Hkâsu mù gâ le, náng htoq je aróng wó sù lé le, jì to shirâ abe.

<sup>9</sup> Jì tô é nghut jáng gi, nungnhik lé jì tô é yhumsing hpó lé lô mù, 'Shí yuq lé jowò hui byi aq.' ga luí, náng lé lé taí jáng, náng hoq hpu luí, hkyi htâng shut huí zùng ra rà nghut lhê.

<sup>10</sup> Haú mù luí, supé nang lé jì le, hkyi htâng má ê zùng aq; haú hkûn, nang lé jì sù lé mù luí, 'Buinum hpó ê, shí je réng é jowò má huí doq zùng aq.' ga luí, nang lé taí jáng, náng eq rahá zung tô é bíng lhunglhâng bâng é hí má, náng gi, myoqdong wó rà nghut lhê.

<sup>11</sup> Hkâsu mù gâ le, yhumsing gùng lé waq toq é sù ó yuq nghut kôle, lhoq nyhum pyâm é hui rà nghut lhê; yhumsing gùng lé, lhoq nyhum é sù kúm gi, waq toq é hui rà nghut lhê." ga taí ri.

<sup>12</sup> Hau htâng, Yesuq yhang lé jì é yhumsing hpó lé taí é gi, "Napzang, a nghut jáng, myinxûn lé náng byi tso nau le gi, náng é buinum wui, âgu âmâng pé, mungmoq wui, sùt wó é yhumkyo chang pé lé hkâjì tso. Haú bang lé jì tsô é nghut jáng gi, yhangmoq nang lé dum jì tsô é èq, jeju dum tau kó rà nghut lhê.

<sup>13</sup> Nghut kôhang, náng poi kut mù, byi tso byi huq nau é nghut le gi, myùng bang, hkyi gyui loq hten bang eq myoqjìt é bang lé, jì tso aq.

<sup>14</sup> Haú su kut jáng, náng hkungsô wó nyi rà nghut lhê. Yhangmoq nang lé jeju a wó tau kôhang, dingmán bang dum dui toq lo é buinyi má, hau é akyû lé, náng wó hkam yù rà nghut lhê." gâ ri.

### *Zoshuq Poi Mó Lé Dangtú Yu É Hkyô Mht 22:1-10*

<sup>15</sup> Yesuq eq rahá zô zung tô é byù rayuq gi, dang haú wó gyo jáng, "Garai Gasâng é mingdán má é zoshuq poi má wó zo rà sù gi, hkungsô wó nyi sù nghut rà." ga luí, Yesuq lé taí ri.

<sup>16</sup> Yesuq haú yuq lé tû taí é gi, "Byù rayuq gi, myinzang byi tso rà ga, zoshuq poi mó ralhum hen to mù, byù myo myo lé jì tô ri.

<sup>17</sup> Zang byi tso rà yàm jé jáng, yhâng é dui-nhâng zoshâng lé, jì tô é bâng chyáng 'Lé keq hkoi, zoshuq jin to bê.' ga ê châng wut nhang ri.

<sup>18</sup> Nghut kôhang, haú bang banshoq gi, zoshuq poi má a ê rà dông chyat he pyâm akô. Rayuq sù gi, 'Ngò yohtung rahkyang wui tô lhê; haú lé ê wú rà dut ri. Haú mù, ngo lé ahkáng byi shi laq.' ga yhang lé taí ri.

<sup>19</sup> Dum rayuq le, 'Ngò, nohtó ngo zúm wui tô lhê; haú pé lé dui nhang chyam wú rà dut ri; ngo lé ahkáng byi shi laq.' ga taí wô ho ri.

<sup>20</sup> Dum rayuq le, 'Ngò myiwe hâng tô é a myáng shi mù, a wó lé.' ga taí wô ho ri.

<sup>21</sup> Haú jáng, dui-nhâng zoshâng taù lò mù, yhâng é yhumsing lé haú hkyô banshoq lò taí kyô ri. Haú hkûn, yhumsing hpó gi,

nhikmó gyô yo mù, 'Wà mâ é hkyô mó hkyô zo hkat hkangmó má hân hân ê mù luí, myùng bang, hkyí gyui loq hten bang eq myoqjit bang lé, ê ji lò aq.' ga luí, yhâng é dui-nhâng zoshâng lé nhang kat ri.

<sup>22</sup> Hau htâng má, dui-nhâng zoshâng gi, 'Yhumsing ê, nang nhang é eq rajung za ban kut bê; nghut kôlhang, zùng rã jowò gi, mân tô ashí.' ga taí ri.

<sup>23</sup> Haú su ga jáng, yhumsing hpó gi, 'Ngá yhúm byíng rã matú, wà yàm hkyô pé eq hkyâm yàm hkyô pé má htoq ê mù, myang é bang lé a wó le wó shoq ê tsing shuí lò aq.

<sup>24</sup> Nang lé ngò taí lé, hí lé ji to huí é bang rayuq lhang, ngá é zoshuq poí lé wó chyim wú rã a nghut.' ga luí, yhâng é dui-nhâng zoshâng lé taí ri." gã ri.

*Yesuq É Chángzo Wó Dut Rã Matú*  
*Mht 10:37-38; 5:13; Mrk 9:50*

<sup>25</sup> Byù hpùng mó Yesuq eq rahá e ló kô é hkùn, Yesuq gi, haú bang lé lhing wú luí,

<sup>26</sup> "Ngá chyáng lé sù ó yuq nghut kôle, yhumsing é ìnu, ìwa, yhangmyi, yhangzo eq, yhanggu, yhangmang, yhâng nhammó pé lé le, haú htoq agó, yhumsing é asak lé le, ngo lé chytidap é htoq má je chytidap sù gi, ngá é chángzo a wó dut.

<sup>27</sup> Yhumsing é tapzìng lé a waq é za, Ngá htâng châng é sù ó yuq nghut kôle, Ngá é chángzo a wó dut.

<sup>28</sup> Dangké, nungmoq chyáng mâ é byù rayuq yuq, tsehtung yhúm ralhum saí nau le, yhang gi, yhúm haú ban saí rã matú, ngùn hkâ-myhó bàn rã eq yhang wó tô é ngùn luq a luq é lé, zùng mù luí, hí a sôn wú é byù nyi kó rã lhu?

<sup>29</sup> Laq má mù, apùn awang gi, saí hi to mù luí, a wó lhoq pân é nghut jáng,

<sup>30</sup> myàng é bang banshoq èq, 'Shí yuq gi, apùn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô rã nghut lhu.

<sup>31</sup> Dangké, hkohkâm rayuq gi, gyè zan rã hen le, gyezo í mun eq lé sù hkohkâm lé, gyezo ramùn eq za lhom wó zân ùng rã, a wó zân ùng rã lé, zùng mù luí, hí a myit wú é nyi rã lhu?

<sup>32</sup> A ùng rã dut le gi, gyè pé we we má nyi tô ashí hkùn lé, lagyo suwún pé lé nhang

kat luí, simsaq rã matú htingram pyám ra rã nghut lhu.

<sup>33</sup> Haú eq rajung za, nungmoq chyáng mâ é ó yuq nghut kôlhang, yhumsing wó é zè banshoq lé, a pyâm to sù gi, ngá é chángzo wó dut rã a nghut.

<sup>34</sup> Xo gi, gè lhu. Nghut kôlhang, xomân kân byuq jáng gi, haú lé hai èq dum wó lhoq ngam yù rã lhu?

<sup>35</sup> Haú gi, myigung matú le, myìhpùn kut rã matú le, akyù a bò lo. Haú mù luí, shinggan shut kúm gi, dú pyám sè akô.

Gyo rã nohkyap dap sù gi, gyô yù sháng gaq." ga taí ri.

## 15

*Byuq Byuq É Sau*  
*Mht 18:12-14*

<sup>1</sup> Ra-nyí lé, Yesuq é dang gyo kó rã ga, kang guq bang eq yubak dap bang gi, Yhâng chyáng lé zìng bum akô.

<sup>2</sup> Haú hkùn, Hparishe pé eq tarã sarã pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga taí put nyi bum akô.

<sup>3</sup> Haú mù, Yesuq yhangmoq lé dangtú đông taí é gi,

<sup>4</sup> "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyhi pyâm to mù, byuq byuq é sau haú lé, myàng shoq a châng ho yu é, ó yuq wá nyi kó rã lhu?

<sup>5</sup> Byuq byuq é sau haú lé myang hô jáng, gyaí gau é ì-myt èq goqsân htoq má bún kê chùng mù,

<sup>6</sup> yhúm má jé jáng, yhâng é buinùm ji-myi wuì eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chôm gabú sháng.' ga taí rã nghut lhu.

<sup>7</sup> Haú eq rajung za, Ngò, nungmoq lé taí kôlé, myit lhing a rã é dingmán bang gaú xe gau yuq lé gabú é htoq, myit lhing é yubak dap sù rayuq é yanmai, mauhkung htoq má, je riyhang gabú jowò dut rã nghut lhu.

*Byuq Byuq É Ngùn Chap*

<sup>8</sup> Dum nghut jáng, dangtú ralhum gi, myiwe rayuq, ngùn raxê chap wó é má,

rachap byuq byuq é nghut le, yhang gi, my-ibung tap mù rayhum ê shum luí, myang yù shoq rago za, ho wú rã a nghut lú?

<sup>9</sup> Haú lé ho myàng jáng le, yhang é buinùm ji-myi wuì eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chòm gabú sháng.' ga taí rã nghut lhê.

<sup>10</sup> Haú eq rajung za, Ngò, nungmoq lé taí kôlé, myit lhing é yubak dap sù rayuq é yanmai, Garai Gasang é maumang lagyô pé hí má, gabú jowò dut rã nghut lhê." gã ri.

### *Byuq Byuq É Yuqzo*

<sup>11</sup> Yesuq xoq taí é gi, "Byù rayuq gi, yuqzo í yuq wó ri.

<sup>12</sup> Haú nhik mã é tiq sù yuq gi, yhang wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhang wa le yhangnhik tâng lé sutzè gàm byi kat ri.

<sup>13</sup> Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chùng mù, mau we shut ê luí, haú jowò má, mingkan ngón hkyô châng é má yhang wó é ngunzè banshoq lé langsâ pyám bê.

<sup>14</sup> Haú su kut ngunzè wó mi-wó lé ban langsâ pyám é htâng mã, haú mau má mutmó gyo é yanmai, yhang gi, asho awui dut lo nyi bê nghut ri.

<sup>15</sup> Haú mù, haú mau mã é byù rayuq chyáng, langchyáng ê kut le, haú yuq gi, yhang lé waq rém jang shut nhang kat mù, waq lé lhom zúng nhang ri.

<sup>16</sup> Haú hkùn, yhang gi, waq jùm zô é shigyang cham pé lé lháng, zo naú shoq dut kôlháng, ó yuq le a byi zo kó nghut ri.

<sup>17</sup> Haú mù, yhang myit bûn lo é gi, 'Ngá wã chyáng nyi é langchyáng pé gi, agùn agó myàng zô nyi kó rã nghut lhê. Nghut kôlháng, ngò gi, shí jowò má, zo mut wuìshit é eq shí ló rã dut bê.

<sup>18</sup> Ahkuí, ngò toq mù, ngá wã chyáng taú ló luí, "Áwa ê, ngò gi, Garai Gasang lé le, nang lé le, shut bê.

<sup>19</sup> Ahkuí mai ngò gi, nung zo nghû rã a gíng lo, hau é yanmai, náng é langchyáng rayuq dông za ngo lé nyi nhâng laq." nghû luí, ló taí rã." gã ri.

<sup>20</sup> Hau htâng, yhang toq luí, yhang wã chyáng ló le, yhang we we má ru nghut ashí hkùn mai, yhang wa gi, yhang lé lhom myàng jáng, wú shogyo luí, din é mù, yhangzô é lingzing má é po pyik dap to luí, bopuq puq byi ri.

<sup>21</sup> Haú hkùn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghû rã a gíng lo.' ga luí, yhang wa lé dung tôngbán ri.

<sup>22</sup> Yhângwa kúm gi, yhang é langchyáng pé lé, 'Réng dik é mebu hân hân yu lé mù, yhang lé hut byi keq; yhang é loq má, lo-qchyop chyop byi keq; hkyi má le hkyi-tsung tsung byi keq.

<sup>23</sup> Tsô myum tô é nojùng zo le yu sat keq. Haú mù, nga-nhúng gi, zoshuq poí kut mù chòm ngón sháng.

<sup>24</sup> Haú mù gã le, ngá zo shí yuq gi, shi byuq é mai, ahkuí dum duì bê; byuq byuq é mai le, ahkuí dum myàng bê.' ga taí ri. Haú mù, yhangmoq gi, ngón ngón zo shuq ló bekô.

<sup>25</sup> Haú u lé, yhangzo ko sù yuq kúm gi, yò má nyi tô ri. Yhang gi, yò mai yhùm shut jé lo nyi é hkùn, zing út bat luí gó nyi é htê lé lò wó gyô ri.

<sup>26</sup> Haú mù, langchyáng rayuq lé wut yù luí, haú hkyô lé yhang myí wú le,

<sup>27</sup> langchyáng haú gi, 'Nung gu dum taú jé lô bê. Haú mù, náng wa gi, nung gu wáng wáng zán zán dum taú jé lo é lé lhom myàng luí, tsô myum tô é nojùng zo lé sat bê nghut ri.' ga taí kyô ri.

<sup>28</sup> Dang haú lé wó gyo jáng, yhang gi, gyô nhik-yo luí, yhúmhaú shut a wàng lo kut ri. Haú mù, yhang wa htoq ê luí, yhang lé é chyug ri.

<sup>29</sup> Yhangzo kúm gi, 'Wú aq, ngò, shí-myháng shílo náng é jùn dông kut luí, hkâ-nhám le náng dang lé a lu laí wú. Nghut kôlháng, ngò ngá é luzúm wuì eq ngón kún rã matú, bainám zo radu lháng radàm le nàng a byi wú shi.

<sup>30</sup> Shiwa myhí pé eq zum yap wún luí, náng é sutzè lé lhoq pân pyám é sù nung zo haú dum taú jé lô jáng kúm gi, tsô myum tô é nojùng zo lé, yhang é matú nàng sat byi bu-nhung!' ga luí, yhang wa lé tũ taí ri.

<sup>31</sup> Yhângwa gi, 'Ngá zo ê, nàng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, náng é chyat nghut lhê.

<sup>32</sup> Nghut kôlhang, shî nung gu gi, shi byuq é mai ahkuí dum duì bê; byuq byuq é mai le, dum myàng bê. Haû mù, gabú hpo nghut bê.' ga luí, yhang lé taí ri." gâ ri.

## 16

### *Hpaqchyî Ge Dâ É Sùt Zum Sû*

<sup>1</sup> Yesuq, Yhâng é chángzô pé lé taí é gi, "Sahtê rayuq chyáng sùt zum sû rayuq nyi ri. Haû yuq gi, yhâng yhumsing é sutzè pé lé jai hpyuq pyám ri ga, yhâng yhumsing é hí má, yhang lé mara lé hun akô.

<sup>2</sup> Haû hkûn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haû gi, hkâsu lú? Nàng sùt zûm é eq séng luí kut tô é jihpán laiká lé lò shit wú aq. Hkâsu mù gâ le, ahkuí mai nàng gi, sùt zum sû wó kut lo rá a nghut lo.' ga taí ri.

<sup>3</sup> Haû jáng, sùt zum sû gi, 'Ahkuí, ngò hkâsu kut lo rá lú? Ngá é yhumsing gi, ngo lé sùt zum ayá mai lhoq hkyô pyám bê. Myi du myi hkop zo rá le ngò wum a bò; dung zo dung shuq rá le ngò hoq ri.

<sup>4</sup> Ngo lé sùt zûm é ayá mai hkyô pyám htâng má, supé ngo lé yhangmoq é yhûm má lhom hap yù rá matú, hkâsu kut rá hkyô lé ngò sé bê.' ga wó myit rot jáng,

<sup>5</sup> yhang gi, yhâng yhumsing hpó lé chyîn dap tô é bang rayuq htâng rayuq lé wut yù mù, sâng-hî yuq lé, 'Ngá yhumsing hpô chyáng nàng chyîn hkâ-myhó dap tô lhê lú?' ga myi jáng,

<sup>6</sup> haû yuq gi, 'Xú rashô pûng dap lhê.' ga tû taí ri.

Haû jáng, sùt zum sû gi, 'Náng é jihpán yù luí, hân zùng mù, ngo xê pûng kut kê to aq.' ga yhang lé taí ri.

<sup>7</sup> Dum rayuq lé, 'Nàng hkâ-myhó dap tô lhê lú?' ga myi jáng, haû yuq gi, 'Sungsô rashô bûng dap lhê.' ga tû taí ri. Sutzum sû gi, haû yuq lé, 'Náng é jihpán má shit xê bûng kut kê to aq.' ga taí ri.

<sup>8</sup> Haû a dingmán é sùt zum sû lé, yhumsing hpó gi, hpaqchyî ge da sû nghut

ri ga hkyâ-ôn ri. Ngò shî lé taí é gi, mingkan zo wuí gi, yhangmoq é mingkan eq séng é hkyô pé má, maubó gung é yhangzo pé\* htoq hpaqchyî je bò kô é yanmai nghut lhê.

<sup>9</sup> Haû mù luí, Ngò nungmoq lé taí kyo kôle, a tara é sutzè pé eq buinùm ho nyi keq, haû mù, sutzè haû htûm byuq jáng, nungmoq lé, ahtum abyuq joq tô é yhûm má, lhom hap yu é hui kó rá nghut lhê.

<sup>10</sup> Tiq é mù má wó lum é sù ó yuq nghut kôlhang, mù mó má le wó lûm rá nghut lhê. Tiq é mù má lhum a zuí é sù ó yuq nghut kôlhang, mù mó má le lhumzui rá a nghut.

<sup>11</sup> Haû mù, mingkan sutzè má lhang nungmoq lé a wó lûm kô é nghut le gi, haû tengmán é sutzè lé, nungmoq chyáng ó yuq wá kâm ap byi rá lú?

<sup>12</sup> Supé é sutzè má, nungmoq lé a wó lûm kô é nghut le gi, nungmoq sîng âng é sutzè lé, nungmoq chyáng ó yuq wá kâm ap byi rá lú?

<sup>13</sup> Dui-nhâng zoshâng ó yuq nghut kôlhang, yhumsing í yuq lé wó dojaú rá a nghut. Hkâsu mù gâ le, yhang gi, rayuq lé a jú kut mù, rayuq lé, chyitdap rá nghut lhê; haû a nghut jáng, rayuq lé gi, lhumzui mù, rayuq lé gi, hpau a tap kut rá nghut lhê. Nungmoq gi, Garai Gasang lé le, ngunzè lé le, radá dâm wó dojaú kó rá a nghut." ga taí ri.

<sup>14</sup> Ngùn myoqnoq é Hparishe pé gi, dang haû banshoq lé wó gyo kôjáng, Yesuq lé wuizui kut pyám byi akô.

<sup>15</sup> Haû mù luí, Yesuq gi, yhangmoq lé, "Nungmoq gi, byu pé hí má yhumsing gùng lé yhumsing dingmán bang su kut shit mhaû é bang nghut akô; nghut kôlhang, Garai Gasang gi, nungmoq é i-myit unghkaú lé sé sù nghut lhê. Byù é hí má hpaudap é pé gi, Garai Gasang é hí má achay achyut é nghut nyi ri.

<sup>16</sup> Jep é tarâ† eq myiqhtoí pé é dang, ahko ahkáng wó tô é ahkyíng gi, wui-myhup sará Yohan jé lé é buinyi jé shoq nghut bê. Haû hkyíng mai gi, Garai Gasang é mingdán hkyô gabú danglù lé, hko kyô nyi mù, yuq du jup gi, haû hkyô má htûng chying wang ló bum akô.

\* **16:8** *Maubó gung é yhangzô pé* nghu é gi, Garai Gasang é yhangzô pé lé taí é nghut lhê. † **16:16** *Jep é tarâ* gâ é gi, Garai Gasang, Mosheq mai nga-nhúng lé byi tô é tarâ lé gâ lhê.

17 Jep é tarâ mâ é tiq dik é dangjí eq myihkyet zo ralhum lé wó lhoq hten râ htoq, mauhkûng eq myigùng hten râ gi, je lui râ nghut lhê.

18 Dangké, yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù nghut bê; yhumsing é yhanglâng eq gang bê myiwe lé hâng yu é sù le, su-myi lú é sù dut bê nghut ri." ga taí ri.

### *Sahtê Hpó Eq Lazaruq*

19 Yesuq dum xoq taí é gi, "Radàm lé, sahtê rayuq gi, nè é eq nú-nhâm é mebu wut mù lui, nyí nyí bui bui zo ngón shuq ngón nyi ri.

20 Yhâng é hkúmdong má gi, ragùngdû é jeq byi tô é Lazaruq gâ é dung zo sù rayuq lé, lé nyhi tô akô.

21 Haú yuq gi, sahtê wá é siboí mai gyó é agyó ahtâng lé, wú zô nau nyi ri. Hkui pé le yhâng é dàm pé má, lé yoq byi nyi akô.

22 Htâng má, haú dung zo sù shi byuq jáng, maumang lagyô pé gi, mauhkûng má nyi é Abraham é tanghkoí má yhang lé shuí ló byi akô. Sahtê wá le shi byuq lui, yhâm pyám bekô nghut ri.

23 Sahtê wá gi, ngaraí ming má dik shoq hpuzô nyi mù lui, tu wú kat le, we we má Abraham lé le, yhâng é tanghkoí mâ é Lazaruq lé le, myàng kat ri.

24 Haú mù, yhang gi, 'Áwa Abraham ê, ngo lé shogyo yù laq ô. Ngò gi, shí myi htum má achýí aku nyé é hui zô nyi ri. Haú mù, Lazaruq gi, yhâng é loqnyhui û èq wui má tik yù mù, ngá é shô má wui ra-poq zo hkâlhang lé tik cham byi sháng gaq, yhang lé ngá chyáng nhang kat byi laq ô!' ga lui, dúng wut nyi ri.

25 Haú hkûn, Abraham gi, 'Ngá zo ê, asak dui tô é u lé, nàng nyi ngón yuqyo tô é hkûn, Lazaruq gi, asho awui dut é lé, bûn nyi aq. Ahkuí, yhang kúm gi, shí má lo nyi byán to bê; nàng chyaú gi, jamjau hui zô nyi bê.

26 Haú mai gotû gi, shí mai nungmoq chyáng dap lé nau bang a wó dap shoq le, haú mai ngamoq chyáng ó a wó dap lé râ matú le, ngamoq eq nungmoq é gyoro má, nik dik é langhkung mó èq kyo pyâm to bê nghut ri.' ga tú taí ri.

27 Sahtê wá gi, 'Áwa ê, haú nghut le gi, ngò, nang lé dúng nau ri. Ngá gû pé ngo yuq nyi ashí; yhangmoq le ísu hpuzô é jowò má a jé sháng gaq,

28 yhangmoq myit lhíng shoq ló taí pun râ matú, Lazaruq lé ngá wá yhâm shut nhang kat byi laq ô!' ga lui, dúng wut ngau nyi ri.

29 Abraham gi, 'Yhangmoq chyáng, Mosheq eq myiqhtoí pé nyi lhê; haú bâng dang lé gyô yù kó sháng gaq.' ga taí ri.

30 Sahtê wá gi, 'Áwa Abraham ê, haú su a nghut. Shi byuq é bang mâ é rayuq yuq yhangmoq chyáng dum taú lo é nghut le kúm gi, yhangmoq myit lhíng kó râ nghut lhê.' ga taí ri.

31 Abraham gi, 'Mosheq eq myiqhtoí pé é dang lé yhangmoq a gyo kô é nghut le gi, shi byuq é bang mâ é rayuq yuq dum dui toq ló mù, ló taí kyo kôhang, kâm gyo kó râ a nghut.' ga lui, yhang lé tú taí ri." gâ ri.

## 17

### *Mara Hkyut É Hkyô Eq Lumjúng Myit Mht 18:6-7, 21-22; Mrk 9:42*

1 Yesuq, Yhâng chángzô pé lé taí é gi, "Byu pé lé mara kut shut nhang é hkyô gi, joq htoq lô râ za nghut lhê. Nghut kôhang, mara kut shut nhang é hkyô lé lhoq htoq é sù gi, dingnyé wó râ.

2 Zoshâng shí bang mâ é rayuq lé, mara kut shut nhang é sù gi, yhâng é lingzing má luqluí long mó tuí hut byi lui, wuimau má ê dú hkyô pyâm é hui é nghut le gi, yhang é matú je gè râ nghut lhê.

3 Nungmoq gi, yhumsing gùng yhumsing sidiq keq.

Nunggu nungmang nàng lé mara kut shut é nghut le gi, yhang lé tan lui, mho-qshit aq; yhang myit lhíng é nghut le gi, yhang lé mara hkyut pyám byi aq.

4 Ra-nyí má za, yhang nang lé nyhit dàm shut mù, 'Ngò myit lhíng bê.' ga lui, nang lé nyhit dàm dum tôngbán le, tôngbán hkangmó, nàng, yhâng é mara lé hkyut pyám byi aq." gâ ri.

5 Haú hkûn, lagyô pé gi, "Ngamoq é lumjúng myit lé lhoq ko byi laq." ga Yhumsing lé dúng akô.

6 Haú jáng, Yhumsing gi, "Nungmoq é lumjúng myit angshi cham í za hkâlhang bò

kô é nghut le gi, shî hangwâ gàm lé, 'Sikgâm ê, amyit eq roq bún luí, wuìshuq lung-aû má, ê yuq to aq ô.' gâ le, nungmoq é dang lé sikgâm haû gyo byi râ nghut lhê.

<sup>7</sup> Dangké, nungmoq mâ é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng haû yohtung pá mai jé lo é hkûn, yhang lé, 'Hân zúng mù zang zo aq.' ga luí, ó yuq wá taí kó râ lhú?

<sup>8</sup> Haû dui-nhâng zoshâng lé sheq, 'Ngò zo râ myinzang lajang aq. Ngò bàn zo shoq hpyidum má hpyihit hit mù, xun zang wú nyi aq. Ngò bàn zo jáng sheq nàng wó zo râ nghut lhê.' ga luí, taí râ a nghut kó lhú?

<sup>9</sup> Taí mitaí banshoq lé, dui-nhâng zoshâng ban zui saí byi é nghut kôlhang, yhang lé jeju bún é dang ó yuq wá taí wú akô lhú?

<sup>10</sup> Haû eq rajung za, nungmoq gi, taí mitaí ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut râ é mù lé za lhoq pân é bang nghut lhê.' nghû taí keq." ga taí ri.

### *Manggâm Dap Bang Raxê Yuq Lé, Yesuq Lhoq Gê Byi Ê Hkyô*

<sup>11</sup> Ahkuí, Yesuq gi, Yerusalem wà mó shut e ló nyi le, Samariq mau eq Galile mau gyoro mai laí e ló ri.

<sup>12</sup> Yhang, wà rawà shut wang ló é hkûn, manggâm dap é byù raxê yuq eq huí ri. Haû bang gi, we mai yap to mù, Yesuq lé,

<sup>13</sup> "Yesuq, Zau ê, ngamoq lé shogyô yù laq ô." ga luí, wut garû bum akô.

<sup>14</sup> Yesuq gi, yhangmoq lé myàng jáng, "Nungmoq é gungdu lé, hkyangjông pé chyáng ló tún shit keq." ga yhangmoq lé taí ri. Yhangmoq gi, hkyô má ru sô nyi ashî le lháng, sân-yúng ló byuq bekô.

<sup>15</sup> Yhangmoq chyáng mâ é rayuq gi, yhumsing gungdu ge byuq é lé myàng jáng, Yesuq chyáng dum taû é mù, htê mó eq Garai Gasang lé hkya-ôn é eq,

<sup>16</sup> Yesuq é hkyi wang má paí gop to luí, Yhang lé jeju hkya-ôn nyi ri. Haû yuq gi, Samariq byù nghut ri.

<sup>17</sup> Haû mù, Yesuq gi, "Sân-yúng byuq é gi, raxê yuq a nghut lhú? Gau yuq gi, hká ló byuq bekô?

<sup>18</sup> Shî tûngbaù rayuq mai lai luí, dum taû lé mù Garai Gasang lé hkya-ôn é byù, rayuq le a nyi lo kó lhú?" ga taí ri.

<sup>19</sup> Hau htâng, Yesuq gi, haû yuq lé, "Toq mù ló aq, náng é lumjng myit gi, nang lé lhoq sân-yúng byi bê nghut ri." ga taí ri.

### *Garai Gasâng É Mingdán Jé Lô Râ Hkyô Mht 24:23-28, 37-41*

<sup>20</sup> Radàm lé, Hparishe pé gi, Garai Gasâng é mingdán hkâ-nhám jé râ hkyô, Yesuq lé myi akô. Haû jáng, Yesuq gi, "Garai Gasâng é mingdán jé lé râ gi, myoq eq wú luí myàng râ a nghut.

<sup>21</sup> Garai Gasâng é mingdán gi, nungmoq yuq jup é ahkaû má nghut nyi é yanmai, 'Wú keq, shí má joq ri, mhó má joq ri.' ga luí le, byu pé gi, wó taí kó râ a nghut." ga luí, yhangmoq lé tû taí ri.

<sup>22</sup> Chángzô pé lé le Yesuq taí é gi, "Haû Byu Yhangzô é buinyi ra-nyí lé, nungmoq myàng nau dik é ahkying jé râ. Nghut kôlhang, nungmoq gi, Byu Yhangzo lé wó myàng kó râ a nghut.

<sup>23</sup> Haû buinyi má, byu pé gi, nungmoq lé, 'Yhang shí má nyi ri.' haû a nghut jáng, 'Yhang hê má nyi ri.' ga taí kó râ nghut lhê. Nghut kôlhang, hkâ-ê; hkácháng kó.

<sup>24</sup> Hkâsu mù gâ le, maumyî rahkyam má hpyat é maulhap gi, maumyî gó hkyam jé shoq duqbó é su, haû Byu Yhangzo dum jé lé é buinyi má le dut râ nghut lhê.

<sup>25</sup> Nghut kôlhang, haû su a dut htoq shimá, Yhang gi, zing-rî é myo myo lé le, ipyat shi mâ é byu pé eq he-ngik pyâm é lé le, hui shirâ nghut lhê.

<sup>26</sup> Noaq é tsîn pyat má dut é su, haû Byu Yhangzo jé lé é buinyi má le dut râ nghut lhê.

<sup>27</sup> Byu pé gi, Noaq, wuì-sanghpo mó hkaû má wang é hkûn jé shoq, zo zo shuq shuq, myi byi myi yû, myiháng kut luí, nyi nyi bum akô. Haû hkûn, dowuí dítg lô mù, yhangmoq banshoq lé lo lhoq htên pyám bê nghut ri.

<sup>28</sup> Haû eq rajung za, Lot é pyat má le, byu pé gi, zo mù, shuq mù, ung zo wuì zo, ho zo ho shuq, yhûm kut luí nyi nyi akô.

<sup>29</sup> Nghut kôlhang, Sodom wà mai Lot htoq ló é buinyi má, mauhkûng mai, myi eq

hang gi, mau su wò gyó lô luí, lhungháng lé lhoq htên pyám bê nghut ri.

<sup>30</sup> Haú Byu Yhangzo, lé htoq shit é buinyi má le, haú eq rajung za dut râ nghut lhê.

<sup>31</sup> Haú buinyi má, yhumhkûng\* htoq má nyi tô é sù gi, yhúmkaû mâ é zè lé, a ló gyó wang yù lo sháng gaq. Yò má nyi tô é sù gi, haú eq rajung za, yhúm shut a taú ló lo sháng gaq.

<sup>32</sup> Lot é yhangmyi† lé bún nyi keq.

<sup>33</sup> Yhumsing é asak duì hkyô hô sù ó yuq nghut kôle, asak sum râ nghut lhê; asak sum pyâm é sù kúm gi, asak wó duì râ nghut lhê.

<sup>34</sup> Ngò, nungmoq lé taí kyo kôlé, haú myîn lé, yhupjang ralhú má byù í yuq nyi to kô le, rayuq gi, shuí yu é hui mù, rayuq gi, myit gyó to râ nghut lhê.

<sup>35</sup> Myiwe í yuq luí má rahá za chòm luí nyi tô le; rayuq gi, shuí yu é hui mù, rayuq gi, myit gyó pyám to râ nghut lhê.

<sup>36</sup> Yohtung má byù í yuq nyi to le, rayuq gi, shuí yu é hui luí, rayuq gi, myit gyó pyám to berâ nghut lhê." gâ ri.

<sup>37</sup> Haú hkûn, chángzô pé gi, "Yhumsing Yesuq é, haú gi, hká gyo má dut râ lhú?" ga luí, Yesuq lé myi kôjáng, Yhang gi, "Màng leq é jang má, langdâ pé, lé zîng bùm râ nghut lhê." ga luí, yhangmoq lé tû taí ri.

## 18

### *Chuimó Myhí Eq Tarâ Agyi É Hkyô Lé Dangtú Yù É Hkyô*

<sup>1</sup> Yesuq, Yhâng é chángzô pé lé, myit wum a gyuí é za, hkâ-nhám le kyûdung nyi râ hkyô lé, dangtú dông mhoqshit é gi,

<sup>2</sup> "Wà rawà má, Garai Gasang lé le a gyuq hoq, byù lé le haí su a ngàm é tarâ agyi rayuq nyi ri.

<sup>3</sup> Haú wâ má chuimó myhí rayuq le nyi ri. Yhang gi, haú tarâ agyi wá chyáng é luí, 'Ngò eq amû htoq sù lé, yhâng é mara eq rajung za, jéyáng byi laq.' ga luí, ê dum taí taí kut nyi ri.

<sup>4</sup> Nghut kôlhang, tarâ agyi wá gi, ahkyíng rayoq zo jé shoq tarâ a jéyáng byi é tô tô ri.

Hau htàng má, yhang gi, 'Ngò, Garai Gasang lé le a gyuq a hoq, byù lé le haí su a ngàm,

<sup>5</sup> nghut kôlhang, chuimó myhí shí yuq é amû lé, ngò a jéyáng a doqdan byi é nghut le gi, yhang dum lé lé kut mù, ngo lé myit hpêbù nhâng râ dut ri. Haú mù, ngò yhâng é amû lé jéyáng byi râ.' ga, yhâng é unghkaû má myit yu ri." gâ ri.

<sup>6</sup> Haú mù luí, Yhumsing Yesuq gi, "A ding a mán é tarâ agyi wá taí é dang mai mhoq yù keq.

<sup>7</sup> Garai Gasang gi, Yhang lé nyi myín wut dúng nyi é, Yhang hkyin yu to bê bang lé, tarâ é dông a kut byi é gi, myáng myáng nyi to râ lhú?

<sup>8</sup> Ngò, nungmoq lé taí kôlé, Garai Gasang gi, yhangmoq lé hân yhang tengmán é dông jéyáng byi berâ nghut lhê. Nghut kôlhang, haú Byu Yhangzo jé lé é buinyi má, lumjîng hkyô lé gi, mîngkan htoq má myang wú shirâ lhú?" ga taí ri.

### *Hparishe Eq Kang Guq Sù Kyûdung É Hkyô*

<sup>9</sup> Yhumsing gùng lé dingmán bun luí, byù góbang lé wú tiq é bang ra-am lé, Yesuq dangtú dông taí é gi,

<sup>10</sup> "Byù í yuq kyûdung kó râ ga, noqkuq yhúm má doq e akô. Rayuq gi, Hparishe, rayuq gi, kang guq sù nghut ri.

<sup>11</sup> Hparishe hpó gi, yap to luí, 'Garai Gasang é, ngò gi, byù góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agó, shî kang guq sù su le, a nghut é yanmai, ngò nàng lé jeju bún lhê ô!

<sup>12</sup> Ngò gi, rabat má zoshuq í dâm gám nyi lhê; ngò wó yu é gû mâ é xê gambùm ragambùm le kat nyi lhê.' ga luí, yhang baú yhang gotû kut dúng nyi ri.

<sup>13</sup> Kang guq sù kúm gi, we we má yap to mù, mauhkûng shut lháng a wám tu wú é za, wànggàng bat luí, 'Garai Gasang é, shî yubak dap sù ngo lé, shogyô yù laq ò!' ga dúng ri.

<sup>14</sup> Ngò, nungmoq lé taí kôlé, kang guq sù kúm gi, Garai Gasang é hí má mara hkyut san byi é lé wó yù luí, yhúm shut dum taú

\* **17:31** Yudaq byu pé é yhumhkûng gi, rá é nghut lhê mù, nyi kún jang kut akô. † **17:32** Lot é yhangmyi gi, Sodom và shut dum taú lhing wú é yanmai, Garai Gasang lhoq hten pyám é hui sù nghut lhê.

ló bê; nghut kôlhang, Hparishe wá gi, a wó nghut ri. Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê; yhumsing gùng lé lhoq nyhum é sù kúm gi, waq toq é hui râ nghut lhê." ga taí ri.

*Zoshâng Wuí Lé Yesuq Shimân Byí É Hkyô*

*Mht 19:13-15; Mrk 10:13-16*

<sup>15</sup> Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akô. Chángzô pé gi, haú lé myàng jáng, lhom tân hkûm akô nghut ri.

<sup>16</sup> Nghut kôlhang, Yesuq gi, zoshâng wuí lé, wut yù luí, "Haú zoshâng wuí lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, Garai Gasâng é mingdán gi, haú sù é bâng é mingdán ru nghut lhê.

<sup>17</sup> Ngò, nungmoq lé teng za taí kôlé, Garai Gasâng é mingdán lé, zoshâng su kut a lhom hap yu é nghut le gi, mingdán haú má gè gè yhang wó wâng râ a nghut." ga taí ri.

*Ayá Wó É Sahtê Hpó*

*Mht 19:16-30; Mrk 10:17-31*

<sup>18</sup> Ayá wó é byù rayuq le, Yesuq lé, "Ge é Sará ê, ahtum abyuq é asak wó yù râ matú, ngò haí kut ra râ lhú?" ga myí ri.

<sup>19</sup> Yesuq gi, "Haí mù, Ngo lé ge é Sará nghu lhê lhú? Garai Gasang mai lai luí, ge é ó yuq le a nyì.

<sup>20</sup> Jep é tará má, 'Su-myi sulàng hkâlu, byù hkâsat, hkâhkau, a teng a mán é saksé hkâhkám, nángnu nángwa lé hkungga aq.'<sup>✧</sup> gâ é dang pé lé, nàng sé gû bê." ga luí, yhang lé tú taí ri.

<sup>21</sup> Haú yuq gi, "Haú pé banshoq lé, ngò, zoshâng hkûn mai cháng bê nghut lhê." ga taí ri.

<sup>22</sup> Yesuq gi, dang haú lé wó gyo jáng, "Nàng kut râ rajung râ tô ashí; nàng wó miwó lé ùng pyám luí, myùng bang lé byí pyám aq; haú jáng, nàng, mauhkûng htoq má sutzè wó râ nghut lhê; haú mù, Ngá htâng lé cháng aq." ga luí, yhang lé taí ri.

<sup>23</sup> Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri.

<sup>24</sup> Yesuq gi, haú yuq lé wú luí, "Sutzè wó bang gi, Garai Gasâng é mingdán má wàng râ matú, haú-í yhang wuí ri-nhung!

<sup>25</sup> Sutzè wó sù rayuq, Garai Gasâng é mingdán má wó wàng râ htoq, gola-uq radu âpno mai wó wang lai râ gi, je lui râ nghut lhê." ga taí ri.

<sup>26</sup> Dang haú lé wó gyô é bang gi, "Haú su ru nghut le gi, ó yuq za hkyi yu é hui râ nghut lhê lhú?" ga myí bum akô nghut ri.

<sup>27</sup> Haú hkûn, Yesuq gi, "Byù a wó kut é hkyô lé, Garai Gasang gi, wó kut lhê." ga taí kyô ri.

<sup>28</sup> Haú hkûn, Petruq gi, Yesuq lé, "Wú aq, ngamoq gi, wó miwó tô pyâm to luí, Náng htâng cháng bê nghut lhê." ga taí jáng,

<sup>29</sup> Yesuq gi, "Ngò, nungmoq lé teng za taí kôlé, Garai Gasâng é mingdán é yanmai, yhumsing é yhûm, yhumsing é yhangmyi, yhumsing é âgu âmang, yhumsing é ìnu íwa, yhumsing é yhangzô pé lé, pyâm to sù ó yuq nghut kôle,

<sup>30</sup> shí pyat má, akyû myo myo wó hkam yù râ htoq agó, htang pyat má le, ahtum abyuq é asak a wó yu é gi, a nyì râ nghut lhê." ga luí, yhangmoq lé taí ri.

*Yesuq, Yhang Shí Hkám Râ Lé Dum Taí É Hkyô*

*Mht 20:29-34; Mrk 10:46-52*

<sup>31</sup> Yesuq gi, Yhâng é lagyô pé raxe í yuq lé gotú kut wut yù mù, "Gyô wú keq, ngan-húng gi, Yerusalem wà mó shut doq ló nyi é nghut lhê. Haú má jé jáng, haú Byu Yhangzo eq séng luí, myiqhtoí pé kê tô é banshoq gi, dik lò berâ nghut lhê.

<sup>32</sup> Hkâsu mù gâ le, Byu Yhangzo gi, tûngbaù pé é loq má ap pyâm é hui luí, haú bâng eq Yhang lé, wuizui kut pyâm é, rhoí rip e, sôkan byé gyûn é, nhuq bat é kut yù mù, sat pyám kó râ nghut lhê.

<sup>33</sup> Hau htâng sum nyí nghû râ buinyi má, Yhang gi, dum dui toq lô râ nghut lhê." ga luí, yhangmoq lé taí ri.

<sup>34</sup> Lagyo pé gi, dang haú pé rahkun lé lháng a sê gyo kó; dang hau é lichyúm gi, yhangmoq é hí má zaú nghop tô é nghut é yanmai, Yhang haí taí nyi é hkyô pé lé yhangmoq a sé kó nghut ri.

✧ 18:20 Htoq Ló 20:12-16



*Dung Zo É Myoqjit Sû Lé, Yesuq, Myoq Dum Myàng Nhang É Hkyô*

<sup>35</sup> Ahkuî, Yesuq Yerihko wà mà má jé lo nyi le, myoqjit é byù rayuq gi, hkyô yàm má zùng mù, dung zô nyi ri.

<sup>36</sup> Yhang gi, byù rajùm rayò sô lai lô é htê lé wó gyo jáng, haù haì dut nyi é hkyô lé, myi kat ri.

<sup>37</sup> Haù hkûn, yhangmoq gi, "Nazaret wà byù Yesuq lai lô ri." ga luî, yhang lé taì kyo akô.

<sup>38</sup> Haù su gà é lé wó gyo jáng, yhang gi, "Dawiq é Yhangzo Yesuq ê, ngo lé shogyo yù laq ô!" ga wut dúng kat ri.

<sup>39</sup> Hí mà lai lô é bang gi, zim za nyi râ matú yhang lé tân hkùm akô; nghut kôhang, yhang gi, "Dawiq é Yhangzo ê, ngo lé shogyo yù laq ô!" ga, je riyhang htê mó o mó èq wut dúng kat ri.

<sup>40</sup> Haù mù, Yesuq gi, yap kat mù, byù haù yuq lé Yhâng chyáng shuí lé lô nhang kat ri. Myoqjit sù Yhâng nàm mà má jé lé jáng, Yesuq gi,

<sup>41</sup> "Ngò, nàng lé haì kut byi râ ô nau ri lhú?" ga, yhang lé myi kat ri.

Haù yuq gi, "Yhumsîng ê, ngò myoq myàng nau ri." ga tũ taì ri.

<sup>42</sup> Hau hkûn, Yesuq gi, "Náng myoq myàng sháng gaq! Náng é lumjîng myit gi, nang lé lhoq gè byi bê nghut ri." ga, yhang lé taì ri.

<sup>43</sup> Haù yuq gi, haù hkûn jáng, yhang myoq wó myâng mù, Garai Gasang lé hkya-on uchyang Yesuq htâng cháng bê. Lhunglhang bang haù lé myàng kôjáng, Garai Gasang lé hkya-ôn nyi bum akô.

## 19

*Yesuq Eq Zake*

<sup>1</sup> Yesuq gi, Yerihko wà mà wàng mù, sô lai lô nyi ri.

<sup>2</sup> Haù hkûn, haù wà mà, Zake gà é kang guq agyì rayuq nyi ri; haù yuq gi, sutzè wó sù nghut ri.

<sup>3</sup> Yhang gi, Yesuq hká yuq nghut é lé myàng nau kôhang, nyhùm sù nghut é htoq agó, byù rajùm rayò chýn chyap tô é yanmai, a wó myâng nghut ri.

<sup>4</sup> Haù mù, yhang gi, Yesuq lé wó myâng shoq ga, Yesuq lai lô râ hkyô hí shut din é mù, hkohùm gâm htoq má é doq zung tô ri.

<sup>5</sup> Yesuq gi, haù jowò mà má jé jáng, tu wú kat luî, "Zake ê, hân gyó lô aq; hkû-nyí ngò náng yhùm má bíng râ nghut lhê." ga taì ri.

<sup>6</sup> Haù jáng, Zake gi, hân hân gyó lô mù, gabú dik é èq Yesuq lé lhom hkulum yu ri.

<sup>7</sup> Haù mà nyi bang banshoq gi, haù lé myàng jáng, "Yhang gi, yubak dap sù rayuq chyáng bíng kut râ ga wang e lô bê." ga luî, mara hùn dang taì nyi bum akô.

<sup>8</sup> Zake kúm gi, toq yap mù, "Yhumsîng Yesuq ê, ngò wó é sutzè rawuí gũ myùng bang lé gàm byi pyám râ; ngò záng mop zô pyâm é byù rayuq yuq nyi le gi, myi tú dum tau byi râ." ga Yhumsîng Yesuq lé taì ri.

<sup>9</sup> Haù hkûn, Yesuq gi, "Shí yuq le, Abraham é yhangzo\* rayuq nghut é yanmai, hkû-nyí shí yhùm mà hkyi yù hkyô jé bê,

<sup>10</sup> hkâsu mù gà le, haù Byu Yhangzo gi, byuq byuq bê bang lé, hkat hô mù hkyi yù râ matú, jé lé sù nghut lhê." ga luî, Zake lé taì ri.

*Hkohkam É Dui-nhâng Zoshâng Raxê Yuq Mht 25:14-30*

<sup>11</sup> Haù hkyô lé, yhangmoq gyô nyi bùm kô é hkûn, Yesuq gi, Yerusalem wà mó mà jé râ chyâng lò bê nghut é yanmai le, Garai Gasâng é mingdán gi, radá dâm htoq shit lô berá ga, byu pé myit ngam tô bùm kô é yanmai le, dangtú ralhum dòng dum taì jat é gi,

<sup>12</sup> "Aróng wó sù byù rayuq gi, hkohkâm ayá é hkam yù luî, dum taù lò râ ga, wê é ming shut ê râ matú hen nyi ri.

<sup>13</sup> Haù mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoí joí ap byi luî, 'Ngò dum taù jé lô shoq, shi èq hpugá gá nyí láng keq.' ga luî, yhangmoq lé pying tô ri.

<sup>14</sup> Yhâng é mingbyú wuì kúm gi, yhang lé a ngui bum é nghut mù luî, yhang e lô é htâng má, 'Shí yuq ngamoq ahtoq má up nyi râ lé, ngamoq a ô nau.' ga luî, ê taì râ matú lagyo châng nhang kat akô.

<sup>15</sup> Nghut kôhang, yhang kúm gi, hkohkâm ayá wó hkam yù luî, dum taù jé lô jáng,

\* **19:9** Abraham é yhangzo nghú é lichyúm gi, Abraham su Garai Gasang lé lumjîng é sù lé gà lhê.

yangh ngùn ap byî tô é dui-nhâng zoshâng wuî lé, hpugá gá luî, amyat hkâ-myhó wó ho jat bê hkyô lé sé naû luî, yangmoq lé wut nhang kat ri.

16 Haú hkûn, sâng-hî yuq gi, lé mù luî, 'Yhumsîng ê, ngò, náng é ngùn rajoí mai, amyat raxê joí wó ho jat yù bê.' ga taí ri.

17 Haú hkûn, yhumsîng hpó gi, 'Arâ! Nghut bê, kyet é dui-nhâng zoshâng ê, nang gi, je tiq é mù má lhang wó lum é sù nghut é yanmai, wà raxê lé upzo lo aq hkoi.' ga luî, yangh lé taí ri.

18 Htang yuq le, lé mù luî, 'Yhumsîng ê, ngò, náng é ngùn rajoí mai, amyat ngo joí wó ho jat yù bê.' gâ ri.

19 Yhumsîng gi, haú yuq lé, 'Nàng gi, wà ngo wâ lé up lo aq hkoi.' ga taí ri.

20 Dum rayuq le, lé mù luî, 'Yhumsîng ê, náng é ngùn rajoí lé a byuq shoq, ngò panchoq eq htup tô lhê; wú aq, shî nghut lhê.

21 Nàng gi, yhumsîng yangh a tô tô é zè pé lé yù nau é eq, yhumsîng yangh a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga taí ri.

22 Haú hkûn, yhumsîng gi, 'Agè ashop é dui-nhâng zoshâng ê, náng nhut mâ é dang eq rajung za, ngò, nang lé jéyang râ nghut lhê. Ngò gi, yhumsîng yangh a tô tô é zè pé lé yù nau é eq, yhumsîng yangh a hô tô é yò mai yâm yù nau é sù, byù wui nghut é hkyô lé, nang sê to gù nghut le nhîng,

23 ngá ngûn lé, ngò dum taû jé lô jáng, aráng eq amyat wó yù shoq, ngùn hpún kat jang má, haí mù a kat tô é lhu?' ga yangh lé taí ri.

24 Hau htâng, yhumsîng hpó gi, ayâm má yap tô é bang lé, 'Haú ngùn rajoí lé yhâng chyáng mai taû yù luî, raxê joí wó sù lé jat byi keq.' ga taí ri.

25 Haú bang gi, 'Yhumsîng ê, yangh gi, raxê joí wó to bê lé nhîng.' ga akô.

26 Haú jáng, yangh gi, 'Ngò, nungmoq lé taí kôlé, wó sù† ó yuq le, jat byî é hui shirâ nghut lhê; a wó su chyáng mai kúm gi, yangh wó tô é lé lhang, yu pyám byi shirâ nghut lhê.

27 Ahkuî, yangmoq ahtoq má ngò hkohkâm kut râ lé a ô nau é, ngá é gyè pé

lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

*Yesuq Logúng Ji Mù, Yerusalem Wà Mó Shut Wang E Ló É Hkyô*

*Mht 21:1-11; Mrk 11:1-11; Yhn 12:12-19*

28 Yesuq gi, shí hkyô pé lé ban taí jáng, hí má so luî, Yerusalem wà mó shut doq ló nyi ri.

29 Yesuq gi, Yhâng é chángzô pé eq Tsanlun Bùm mâ é Bethpage wà eq Behtani wà má jé ló kojáng, Yhâng é chángzo í yuq lé,

30 "Nungnhik, hí mâ é wà má é keq; wà haú má wang é hkûn jáng, ó le a jî wú shî é logúng zo tuî tô lánng é lé, ê myáng kó râ nghut lhê; haú lé hpyi yù mù, Ngá chyáng she lò keq.

31 Byù rayuq yuq mai, 'Haú haí mù hpyi nyi akô?' ga nungnhik lé myi kôjáng, 'Shí du lé, haú Yhumsîng râ ri gâ.' nghú tu taí keq." ga pyîng luî, nhang kat ri.

32 Nhang kat é sù nhik ê jé lé, Yesuq taí kat é dông yangh, dut to lánng é lé ê myang akô.

33 Yhangnhik logúng zo haú lé hpyi nyi kô é hkûn, yhumsîng wuî gi, "Haú logúng zo lé, haí mù hpyi nyi akô lhu?" ga luî, yhangnhik lé myi akô.

34 Haú jáng, yhangnhik gi, "Shí du lé haú Yhumsîng râ ri gâ." ga taí akô.

35 Yhangnhik gi, haú logúng zo lé Yesuq chyáng she lò mù, yangmoq é buhîng pé lé logúng ahtoq má buí luî, Yesuq lé doq ji nhang akô.

36 Haú su kut, Yhang ji e ló nyi le, byu pé gi, yangmoq é buhîng pé lé hkyô má hkang byi akô.

37 Ahkuî, Tsanlun Bùm hkêgyó gyó ló é jowò eq chyáng lo é mai gi, chángzô pé banshoq bang, yangmoq myang é laklaí kumlhá pê é yanmai, gabú myit mai htê mó o mó eq Garai Gasang lé hkya-on kô é dang gi,

38 "Haú Yhumsîng é myîng mai jé lé lo é hkohkâm gi, hkungsô wó nyi sháng gaq ô!✱ Mauhkûng htoq má, ngu-ingón nyi sháng gaq ô!

† 19:26 Wó sù nghu é gi, yhumsîng a-tsam lé rago dat chûng sù lé taí é nghut lhê. ✱ 19:38 Hkya-on 118:26

Htoq tsáng myhâng má, Garai Gasang gi, hpungwup shing kang bo nyi shâng gaq ô!"

gâ akô.

<sup>39</sup> Haû mù luí, haû byù hpûng hkaû má bo é Hparishe pé ra-am gi, "Sarâ ê, náng é chángzô pé lé tân pyám aq." ga luí, Yesuq lé tai akô.

<sup>40</sup> Haú hkûn, Yesuq gi, "Ngò, nungmoq lé tai kôlé, shí bang zim za nyi kó é nghut le gi, luqgok pé garû lô râ nghut lhê." ga tû tai ri.

<sup>41</sup> Ahkuí, Yesuq, Yerusalem wà mó eq chyâng lò luí, wà mó haû lé myàng jáng, haû wà mó é matú ngaù mù, tai é gi,

<sup>42</sup> "Wà nàng ê! Hkû-nyí lhê é buinyi má, nguóngón é hkyô lé nàng bûn sé tô é nghut le gi, gè râ wá! Ahkuí kúm gi, haú hkyô lé nghop to bê nghut mù luí, nàng a sé lo nghut ri.

<sup>43</sup> Hkâsu mù gâ le, náng chyáng Garai Gasang lé kúm jé é hkûn, nàng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhîng hkyuq mai nang lé lom tô é buinyi jé lô râ nghut lhê.

<sup>44</sup> Haú hkûn, nang lé lhoq htên pyám luí, nung zo pé lé le, haú ahkaû má yhang dún nhê pyet sat pyám bekô râ; nàng gi, luqgok racham htoq má racham lháng a kê lhum loshoq, dut byuq râ nghut lhê." gâ ri.

*Yesuq, Noqkuq Yhûm Lé Sêng Pyâm É Hkyô*

*Mht 21:12-17; Mrk 11:15-19; Yhn 2:13-22*

<sup>45</sup> Ahkuí, Yesuq gi, Yerusalem noqkuq yhûm má wàng mù, ung zo ung shuq é bang lé, "Ngá yhûm gi, kyûdung yhûm dut râ nghut lhê."\* ga kâ to kôlhang,

<sup>46</sup> nungmoq gi, jowò shí lé 'damaq hkyûng'\* kut akô." ga tai uchyang, hkat htoq pyâm ri.

<sup>47</sup> Yhang gi, nyí wuî noqkuq yhûm má mhoqshit nyi ri. Hkyangjong agyi pé, tarâ sarâ pé eq, byu pé é suwún wuî kúm gi, Yhang lé wó sat pyám râ hkyô ho nyi akô.

<sup>48</sup> Nghut kôlhang, byù banshoq bang gi, Yhâng mhoqshit é dang lé gyo nau nyi kó é yanmai, wó sat râ hkyô lé, a myang hô kó nghut ri.

\* 19:45 Esai 56:7 \* 19:46 Yer 7:11

## 20

*Yesuq É Ahko Ahkáng Lé Myî Chyam Wú É Hkyô*

*Mht 21:23-27; Mrk 11:27-33*

<sup>1</sup> Ra-nyí lé, Yesuq gi, noqkuq yhûm wàng hkaû má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sarâ pé, suwún wuî eq rahá kut, Yhâng chyáng lé jé kômù,

<sup>2</sup> "Hai ahko ahkáng eq Nàng shí pé lé kut nyi lhê lhú? Ahko ahkáng shí, Nang lé ó yuq byí é lhú? Ngamoq lé tai kyô wú aq." ga Yhang lé myî akô.

<sup>3</sup> Haú hkûn, Yhang gi, "Ngò le, nungmoq lé rajung myî wú kôlé;

<sup>4</sup> Yohan byí é baptisma gi, mauhkûng mai lhú? A nghut jáng, byu chyáng mai lhú? Ngo lé tai kyô wú keq?" ga yhangmoq lé myî ri.

<sup>5</sup> Haú hkûn, yhangmoq chòm hpyé lhum kô é gi, "'Mauhkûng mai nghut lhê.', nghû nga-nhúng tai jáng le, 'Haí mù, yhang lé a lumjîng kô é lhú?' ga râ nghut;

<sup>6</sup> 'Byu chyáng mai nghut lhê.' nghû jáng le, shiwa byù banshoq gi, Yohan lé, my-iqhtoi rayuq ga lumjîng to kô é yanmai, yhangmoq, nga-nhúng lé luqgok eq dú sat kó râ nghut." ga akô.

<sup>7</sup> Haû mù, yhangmoq gi, "Hkâmai nghut é lé, ngamoq a sé." ga tû tai akô.

<sup>8</sup> Yesuq gi, "Haû jáng, Ngò le, hai ahko ahkáng eq shí pé kut é hkyô lé, nungmoq lé a tai kyo." ga, yhangmoq lé tai ri.

*Tsibiyiq Hkyâm Yhumsîng Eq Hkyâm Saí Zo Bang*

*Mht 21:3-46; Mrk 12:1-12*

<sup>9</sup> Byu pé lé, Yesuq dangtú dông xoq tai kyô é gi, "Byù rayuq gi, tsibiyiq hkyâm ralhum saí to mù, hkyâm saí zo bâng chyáng ngho byí to luí, gó ming shut myáng myáng é nyi byuq ri.

<sup>10</sup> Kyôshu yoq jé jáng, yhang gi, hkyâm saí zo bâng eq, hkyâm mâ é tsibiyiq shi pé lé lhom byí kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhang, hkyâm saí zo bang gi, haú yuq lé lhom bat mù, loq kôm taû nhang kat akô.

11 Gotû dui-nhâng zoshâng rayuq lé, yhangmoq chyáng dum nhang kat ri. Nghut kôlhâng, yhangmoq gi, haú yuq lé le, lhom bat mù, hoq lhoq hpu luí, loq kôm dum taú nhang kat akô.

12 Sum yuq nghû râ dui-nhâng zoshâng lé dum nhang kat ri. Yhangmoq gi, haú yuq lé le bat cheq luí, hkyâm mai hkat htoq kat akô.

13 Haú hkûn, tsibiyiq hkyâm yhumsîng gi, 'Ngò hkâsu kut wú râ lúhú? Ngò chytidap é ngá zo lé, nhang kat wú râ nghut ri. Yhang lé kúm gi, yhangmoq lhom hkungga kó abe.' ga taí ri.

14 Hkyâm saí zo bang gi, yhumsîng hpô é yhangzo lé myàng kôjáng, 'Shí yuq gi, silí wunlí sing yù râ sù nghut lhê; nga-nhúng, silí wunlí haú pé wó yú shoq, yhang lé sat pyám sháng.' ga rayuq eq rayuq taí lhùm bum akô.

15 Haú mù, yhang lé hkyâm shinggan shut dú htoq kômù, sat pyâm akô.

Haú su kut kôjáng, tsibiyiq hkyâm yhumsîng gi, yhangmoq lé hkâsu kut râ lúhú?

16 Yhang gi, ê mù, haú hkyâm saí zo bang lé sat pyám luí, hkyâm haú lé góbang lé htot ngho byí pyám râ nghut lhê." gâ ri.

Dang haú lé wó gyo bang gi, "Haú su gi, hkâ-nhám le a dut sháng gaq ô!" gâ akô.

17 Hau htâng, Yesuq gi, yhangmoq lé byu wú luí, "Haú jáng gi,

'Yhùm saí bâng èq hkyin htoq pyâm é luqgok gi, htungchyûn mã é ahkyak dik é luqgok dut bê.'\*

ga Chyúmdang má kê tô é gi, haí gá nau é nghut lhê lúhú?

18 Luqgok\* haú má gyó záng é sù ó yuq nghut kôle, gyûi gyop byuq râ nghut lhê. Luqgok hau èq gyó nhê záng é sù le, nhê pyeq pyâm é hui râ nghut lhê." ga taí ri.

19 Tarâ sará pé eq hkyangjong agyi pé gi, dangtú shí gi, yhangmoq lé lhoq ang luí taí é hkyô lé, sé kê é yanmai, haú hkûn jáng lháng Yhang lé chyup yú râ matú hkyô ho nyi akô. Nghut kôlhâng, byu pé lé gyuq mù a chyup shi kó nghut ri.

*Kang Kat É Hkyô Eq Séng Luí Myi É Dang Mht 22:15-22; Mrk 12:13-17*

20 Haú mù, yhangmoq gi, Yesuq é dang má mara wó chyup yú shoq ga, gegùn labyoq kut bang lé jowú nhang nyi akô. Haú gi, ahkáng ayá wó é mauzaú chyáng Yhang lé wó ap pyám râ matú nghut ri.

21 Haú jowú bang gi, "Sarâ ê, nàng gi, dîng dîng mán mán taí mhoqshit é eq, byu é myoqdong lé a tê byí é za, Garai Gasâng é hkyô lé, tengmán é dông mhoqshit é sù nghut é lé, ngamoq sê lhê.

22 Hkoséng Kehtaq lé, ngamoq kang kat râ gi, tarâ wang lhê lúhú? A wang é lúhú?" ga luí, Yhang lé myí wú akô.

23 Nghut kôlhâng, Yesuq gi, haú bâng é myit goí é hkyô lé sé mù luí, yhangmoq lé,

24 "Ngo lé, ngùn rachap tûn shit wú keq. Ó yuq é alhô eq masat laiká dap tô ri lúhú?" ga myi jáng,

25 yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé taí ri.

26 Yhangmoq gi, byu pé hí má, Yhâng é dang má mara a wó ho myang é eq, Yhang tû taí é dâng é yanmai, maú hong byuq kôluí, zim byuq akô.

*Dum Dui Toq Lô Râ Hkyô Eq Séng Luí Myi É Dang*

*Mht 22:23-33; Mrk 12:18-27*

27 Haú hkûn, haú dum dui toq hkyô a joq gâ é Saduke pé ra-am gi, Yesuq chyáng lé jé kômù,

28 "Sarâ ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê ga, nga-nhúng lé, Mosheq kê to byí ri.

29 Hí hpyang lé, gumang nhiktâng wui nyhit yuq nyi akô. Lagám yuq gi, myiwe yù luí, zo dù a dap é za shi lô byuq bê nghut ri.

30 Lanong yuq le, yhangmang mó é chui lé gon mù, zo dù a dap é za shi lô byuq bê.

31 Hau htâng, Lalaq yuq mai Lahká yuq jé shoq, chuimó haú lé rayuq htâng rayuq

\* 20:17 Hkya-on 118:22 \* 20:18 Luqgok nghu é gi, Yesuq lé taí ri.

dum gon gon kut kôlhang, zo dù a dap é chyat shi lô byuq bùm bekô nghut ri.

<sup>32</sup> Lô htàng má, myiwe myhí haû le châng shi lô byuq bê nghut ri.

<sup>33</sup> Haû mù luí, haû dum dui toq é buinyi má, myiwe myhí haû gi, haú nhiktâng wui mâ é hká yuq é yhangmyi nghut râ lú? Hkâsu mù gâ le, yhang gi, haû nyhit yuq é yhangmyi dut wú bê sù nghut ri." ga luí, Yhang lé myí wú akô.

<sup>34</sup> Haú hkûn, Yesuq gi, "Shí mingkan htoq mâ é byu pé gi, ikun kut é eq myi byi myi yú kut nyi bum akô.

<sup>35</sup> Shi é mai dum dui toq râ eq, haú pyat má nyi râ gíng bâng é matú gi, ikun kut é eq myi byi myi yú hkyô joq lo rá a nghut.

<sup>36</sup> Haú bang gi, maumang lagyô pé su dut byuq luí, a dat shí lo kô râ nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasâng é yhangzô pé nghut bekô.

<sup>37</sup> Haû nyé duq nyi é mhanpúng eq séng luí, Mosheq èq kâ tô é má lhang, Yhumsîng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.✠ ga bo tô é yanmai, shi é bang dum dui toq lô râ hkyô lé tûn shit to bê nghut ri.

<sup>38</sup> Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lunglhang bang gi, Garai Gasâng é hí má dui nyi é bang chyat nghut akô." ga yhangmoq lé tû taí ri.

<sup>39</sup> Haú hkûn, tarâ sará pé ra-am gi, "Sarâ é, nàng taí é jô ri." ga akô.

<sup>40</sup> Haû mù, yhangmoq gi, Yhang lé haí le a wám myí jat lo kó nghut ri.

### *Hkrisduq Gi, Ó Yuq É Yhangzo?*

*Mht 22:41-46; Mrk 12:35-37*

<sup>41</sup> Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù taí akô lú?

<sup>42-43</sup> Dawiq yhang yhang lhang gi, Hkya-on Kungtôn Laiká má,

'Haû Yhumsîng Garai gi, ngá é Yhumsîng lé, "Ngò, nàng é gyè pé lé,

nàng é hkyí nang tanghkuq kut pyám byí é hkyíng jé shoq, Ngá é loqyo hkyam‡ shut zung nyi shi aq." gâ ri.✠

ga kâ tô ri.

<sup>44</sup> Haû mù, Dawiq yhang lhang, Hkrisduq lé, Yhumsîng gâ é nghut le gi, Hkrisduq gi, yhangzo za hkâsu ge nghut râ lú?" ga taí ri.

### *Tarâ Sará Pé Lé Sidiq Râ Hkyô*

*Mht 23:1-36; Mrk 12:38-40; Luk 11:37-54*

<sup>45</sup> Byù banshoq gyô nyi é u lé, Yesuq, Yhang é chângzô pé lé taí é gi,

<sup>46</sup> "Tarâ sará pé lé sidiq nyi keq. Yhangmoq gi, réng é buhîng wut chûng mù, sô yông wún luí, gài pé má hkunggâ é èq shichyen râ lé le, tarajong pé mâ é ahkyak dik é zùng jang pé eq poí pé mâ é je réng é zùng jowò pé má myang zùng râ lé le, ô nau nyi bum akô.

<sup>47</sup> Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hîng hîng dîng shit mhaû é bang nghut akô. Haû sù é bang gi, je riyhang htan é dông dam byí é hui zo kó râ nghut lhê." gâ ri.

## 21

### *Chuimó Myhí Kat É Alu*

*Mrk 12:41-44*

<sup>1</sup> Yesuq tu wú kat é hkûn lé, noqkuq yhûm mâ é alu sidek má, wó bang alu kat nyi bùm kô é lé myang ri.

<sup>2</sup> Dum nghut jáng, gyi htingchap ngùn zo í chap za kat é, myung é chuimó myhí rayuq lé le myang ri.

<sup>3</sup> Haû mù, Yhang gi, "Ngò, nungmoq lé teng za taí kôlé, shí myung é chuimó myhí gi, góbang banshoq htoq má je myo kat bê nghut ri.

<sup>4</sup> Hkâsu mù gâ le, haû góbang banshoq gi, yhumsîng agùn agó wó é mâ é lé, lé kat akô; yhang kúm gi, myùng sù nghut kôle, yhang asak lé baú ra ngùn lunglhang lé kat bê nghut ri." ga taí ri.

### *Ló Htûm Buinyi Má Dut Lò Râ Hkyô*

*Mht 24:1-21, 29-35; Mrk 13:1-19, 24-31*

<sup>5</sup> Noqkuq yhûm lé, yúng é luqgok pé èq le, alu chyunghuq pé èq le, mhôn tô ri

† 20:36 Dum dui toq lô su é yhangzô pé gâ é gi, Yesuq lé lumjîng luí, shi é htàng má dum dui toq lo é bang lé gâ lhê.

✠ 20:37 Htoq Lô 3:6 ‡ 20:42-43 Loqyo hkyam nghu é gi, ahko ahkáng wó é jowò nghut lhê. ✠ 20:42-43 Hkya-on 110:1

ga, chángzô pé ra-am hkya-ôn bùm kôjáng, Yesuq gi,

<sup>6</sup> "Nungmoq myang nyi é shí pé gi, luq-gok rachâm htoq racham lháng a kê lhum loshoq, hpyoq hpyi pyâm é buinyi jé rá nghut lhê." ga taí ri.

<sup>7</sup> Haú su ga jáng, yhangmoq gi, "Sarâ ê, haú nghut le gi, haú hkyô pé gi, hkâ-nhám dut lô rá lú? Haú dut rá chyâng lò jáng, hkasû é kumlhá htoq lô rá nghut lhê lú?" ga, Yhang lé myi akô.

<sup>8</sup> Haú hkûn, Yhang gi, "Nungmoq gi, hkyô shuí nghoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé láng é byù myo myo pô htoq lô kó rá nghut lhê. Nghut kôlhang, nungmoq gi, yhangmoq htâng hkâcháng kó.

<sup>9</sup> Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haú hkyô pé hí dut lò rá nghut lhê. Nghut kôlhang, ló htâng é buinyi gi, haú hkûn jáng dut rá a nghut shi." ga taí ri.

<sup>10</sup> Hau htâng, Yhang, yhangmoq lé dum taí é gi, "Ra-myû eq ra-myû, mingdán ralhum eq ralhum majan zân lhûm lò kó rá nghut lhê.

<sup>11</sup> Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò rá nghut lhê; gyuq chiq jung pé eq kumlhá mó le, mauhkûng htoq mai htoq shit lô rá nghut lhê.

<sup>12</sup> Nghut kôlhang, haú hkyô banshoq a dut shimá, Ngá myíng é yanmai, byu pé gi, nungmoq lé chyup yû luí, zing-rí yù mù, tarajong pé eq htóng pé má ap pyám kó rá nghut lhê, hau htoq agó, nungmoq gi, hkohkam pé eq zau pé chyáng ê ap byi é le, hui kó rá nghut lhê.

<sup>13</sup> Haú su é pé mai, nungmoq gi, ngò eq séng luí, saksé wó hkám rá hkyô htoq lò berá nghut lhê.

<sup>14</sup> Nghut kôlhang, hkâsu nghû lhom tú taí rá hkyô lé, hí mai a myit wuí nyi rá lé, nungmoq myit hpyit to keq.

<sup>15</sup> Hkâsu mù gâ le, nungmoq é gye pé lhunglhang bang, haí le a wó lhom tú taí loshoq, ngò, nungmoq lé dang eq hpaqchyí byi rá nghut lhê.

<sup>16</sup> Nghut kôlhang, nungmoq gi, înu îwâ pé, âgu âmâng pé, mungmoq eq buinùm ji-myi wui eq lháng, ap pyâm é hui kó rá nghut lhê. Yhangmoq gi, nungmoq chyáng má é ra-am lé lháng, sat pyám kó rá nghut lhê.

<sup>17</sup> Byù lhunglhang bang gi, Ngá é yanmai, nungmoq lé a nguì kut kó rá nghut lhê.

<sup>18</sup> Nghut kôlhang, nungmoq é xâm rahkat lháng wó htên byuq rá a nghut.\*

<sup>19</sup> Nungmoq gi, wó jân é hkyô mai, asak lé wó yû kô rá nghut lhê.

<sup>20</sup> Yerusalem wà mó lé gye hpúng mó eq lóm tô é lé, nungmoq myàng jáng, wà mó haú htên byuq rá ahkyíng chyâng lò bê lé, bûn sê nyi keq.

<sup>21</sup> Haú hkûn lé, Yuda mau má nyi é bang gi, bùm pé shut hfang doq ló kó sháng gaq; haú wà hkaú má nyi é bang le, hfang htoq kó sháng gaq; wà tiq wà zo pé má nyi é bang le, wà hkaú shut a wàng kó sháng gaq.

<sup>22</sup> Hkâsu mù gâ le, Chyúmdang má kâ to má kâ to banshoq dik lò rá matú, buinyi haú pé gi, mara dam byi é buinyi pé dut rá nghut lhê.

<sup>23</sup> Haú buinyi pé má, zogûng dut é myiwe wui eq naú huq ashí nghut é înu wui gi, gyai yhang wuîhke kô rá nghut lhê; hkâsu mù gâ le, shí ming ahtoq má wuîhke mó eq, shí amyû ahtoq má Garai Gasang nhikmó-yô é jé lô rá nghut lhê.

<sup>24</sup> Yhangmoq gi, shâm lhâm eq sat pyám hui lhê eq, ming hkang ming mó má chyup shuí ló é le hui kó rá nghut lhê. Tungbaù pé lé byi tô é buinyi ahkyíng htáng shoq, Yerusalem wà mó gi, tungbaù pé eq nâng zik tô é hui rá nghut lhê.

<sup>25</sup> Haú hkûn, bui, kyí, lhamó pé má, kumlhá htoq shit rá nghut lhê. Wuishuq lung-aú má é wuîlhêng pé é mying é hté mó é yanmai, myigùng htoq má, byù myû chângjup gi, hkâsu kut rá a sé loshoq maú é eq myit wui myit hkê é hui bekô rá nghut lhê.

<sup>26</sup> Byu pé gi, mingkan htoq má dut lò rá é hkyô pé lé, a jé shi mai myit gyuq kô é yanmai, moq byuq ló bùm kó rá nghut lhê; hkâsu mù gâ le, mauhkûng má é wum-o a-tsam pé gi, lhoq nhûn é huí bùm kô rá nghut lhê.

\* 21:18 Shí má gi, asak woi-nyí a shí rá hkyô lé taí é nghut lhê.

<sup>27</sup> Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shing kang mó eq le, gyó lé lo é lé, yhangmoq byu-myàng kó rá nghut lhê.

<sup>28</sup> Haú hkyô pé dut hi lò jáng, ulhum tú mù wú kat keq, hkâsu mù gâ le, nungmoq lé hkyi yù rá buinyi gi, chyáng lò bê nghut ri." gâ ri.

<sup>29</sup> Yhang, yhangmoq lé dangtú dông xoq taí é gi, "Maihpáng gâm eq sigâm banshoq lé wú wú keq.

<sup>30</sup> Sikbu nyún lo é lé myàng jáng, bui nyé nám chyáng lò bê ga luí, nungmoq yhang dat wú sê akô.

<sup>31</sup> Haú eq rajung za, haú hkyô pé dut nyi é lé, nungmoq myàng kôjáng, Garai Gasâng é mingdán gi, chyáng bê nghut é hkyô lé, nungmoq sé lo keq.

<sup>32</sup> Ngò, nungmoq lé teng za taí kôlé, shí pyat mâ é byu pé a ban shi byuq shimá, haú hkyô pé banshoq dut byuq rá nghut lhê.

<sup>33</sup> Mauhkûng eq myigùng gi, a joq lo dut byuq rá nghut lhê; nghut kôlhang, Ngá é dang gi, ru joq nyí rá nghut lhê.

<sup>34</sup> "Nghut kôlhang, zo myo shuq myô é, î shuq wut é, mingkan htoq mâ é myit wui myit hkê é pê èq, nungmoq é i-myt wò lai nyi luí, haú ngò jé lé é buinyi gi, lhai bik lo é su, nungmoq ahtoq má byodán tung a jé lò sháng gaq, sidiq nyi keq.

<sup>35</sup> Hkâsu mù gâ le, buinyi haú gi, mingkan htoq má nyi é byù banshoq bâng é ahtoq má, haú su jé lô rá nghut lhê.

<sup>36</sup> Haú mù luí, haú dut lò rá hkyô banshoq mai, nungmoq wó lut lai mù, haú Byu Yhangzô é hí má, wó yap gîng é bang dut sháng gaq, hkâ-nhám le kyûdung luí, ahkyíng hkangmó má machya nyi keq." gâ ri.

<sup>37</sup> Yesuq gi, nyí wuî noqkuq yhûm má mhoqshit nyí luí, myìn wuî Tsanlun Bùm gâ é bùm shut htoq ê mù, ê nyi to to kut ri.

<sup>38</sup> Byù banshoq bang gi, Yhang mhoqshit é dang gyo rá ga, napsûn noq noq mai noqkuq yhûm má jé lé bum akô nghut ri.

## 22

*Yesuq Lé, Yudaq Èq Ung Zô É Hkyô*

*Mht 26:1-5,14,16; Mrk 14:1-2, 10-11; Yhn 11:45-53*

<sup>1</sup> Ahkuí, Lhoqlhai Poí gâ é Azuma (múnchi a kat é Muk Zo Poí) jé rá chyáng lò bê.

<sup>2</sup> Haú mù, hkyangjong agyi pé eq tará sará pé gi, Yesuq lé hkâsu kut wó sat pyám rá hkyô, ho nyi akô; hkâsu mù gâ le, yhangmoq gi, mingbyû wuî lé gyuq bùm kô é yanmai nghut ri.

<sup>3</sup> Haú hkûn, lagyo raxe í yuq má bo é Iskarut gâ é Yudaq chyáng Tsadán wàng mù luí,

<sup>4</sup> yhang gi, htoq ê mù Yesuq lé hkâsu kut ap pyám rá hkyô lé hkyangjong agyi pé, noqkuq yhûm zúng é gyezau pé eq, ê hpyê ri.

<sup>5</sup> Haú mù, yhangmoq gi, gyô nguì luí, Yudaq lé ngùn byi rá hkyô myit hui bekô.

<sup>6</sup> Yudaq le hap yù luí, byù hpúng má a nghut é hkûn, Yesuq lé ap pyám rá hkyô ho nyi bê nghut ri.

*Lhoqlhai Poí Lé Món É Hkyô*

*Mht 26:17-30; Mrk 14:12-26; Yhn 13:21-30*

<sup>7</sup> Ahkuí, haú Lhoqlhai Poí mâ é sauzo shigu hkungga sat nhông byi rá é Azuma buinyi jé bê.

<sup>8</sup> Haú hkûn, Yesuq gi, Petruq eq Yohan lé, "Nga-nhúng zo rá matú Lhoqlhai Poí ê món lánng keq." ga luí, nhang kat ri.

<sup>9</sup> Haú nhik gi, "Hkâmá ê món to nhâng nau ri l hú?" ga luí, Yhang lé myí akô.

<sup>10</sup> Haú hkûn, Yesuq gi, "Nungnhik, myuq hkaú shut wang e ló le wuî yambú waq é byù rayuq lhom hui rá nghut lhê; haú yuq chyáng châng ló luí, yhang wang ló é yhûm má châng wàng mù,

<sup>11</sup> yhumsîng lé, 'Ngò Ngá é chángzô pé eq rahá, Lhoqlhai Poí zo rá bíng wap hkâmá nghut lhê l hú ga, Sará myí nhang kat ri.' nghû taí keq.

<sup>12</sup> Haú hkûn, hen tô é ahtoq mâ é wap mó lé, nungnhik lé lhom tân shit rá nghut lhê; wap haú má é món to keq." ga taí kat ri.

<sup>13</sup> Haú chángzo nhik htoq e ló le, Yesuq taí kat é eq roq za ê myâng kômù, Lhoqlhai Poí lé món to bekô nghut ri.

*Yhumsing É Myinzang*

<sup>14</sup> Ahkuí, ahkyíng jé jáng, Yesuq eq Yhâng é chángzô pé rahá za zohpoq má zung tô akô.

15 Haú hkûn, Yesuq gi, "Ngò wuîhke jamjau hpuzô é a hui shî má, Lhoqlhai Poî shî lé nungmoq eq rahá zo râ lé, Ngò gyai ô nau nyi lhê.

16 Hkâsu mù gà le, ngò, nungmoq lé tai kôlé, Garai Gasâng é mingdán má poi shî a ló dik dik gi, ngò haú lé dum zo râ a nghut ló." ga luî, yhangmoq lé tai ri.

17 Hau htâng, Yesuq gi, góm lé yù mù jeju ban hkya-on jáng, "Góm shî lé yù luî, nungmoq yhangchang gàm shuq lhum keq.

18 Ngò, nungmoq lé tai kôlé, ahkuî mai gi, Ngò, Garai Gasâng é mingdán a jé jé tsibiyiq wíng lé dum shuq râ a nghut lo." ga tai ri.

19 Hau htâng, Yhang gi, muk lé yù mù, jeju hkya-on luî, muk lé myhik hpé mù, yhangmoq lé byi uchyang, "Shî gi, nungmoq é matú byí pyâm é, Ngá é gungdu nghut lhê; Ngo lé bûn nyi râ matú, shî su kut nyí keq." ga tai ri.

20 Haú eq rajung za, myinzang ban zo jáng, góm lé le yù mù, "Góm shî gi, nungmoq é matú htoq pyâm é, Ngá é sui má xuq tô é dangshikaq asik nghut lhê.

21 Nghut kôlhang, wú keq, Ngo lé ap pyám râ sù gi, zang bó shî má ngò eq rahá nyi tô ri.

22 Haú Byu Yhangzo gi, hkyin to huî é eq rajung za shî râ nghut lhê; nghut kôlhang, Yhang lé ap pyâm é sù gi, dingnyé wó ri." ga tai ri.

23 Haú su ga jáng, lagyô pé gi, yhangmoq má shí hkyô kut râ sù gi, hká yuq nghut râ lhú ga, rayuq eq rayuq myí lhum bum akô.

24 Haú htoq agó, yhangmoq mâ é hká yuq sheq je kô lhê lhú ga le, rayuq eq rayuq tai htîng lhûm bum akô.

25 Haú mù luî, Yesuq gi, "Tûngbaù pé é hkohkam pé gi, yhangmoq byù myû pé é ahtoq má up zô nyi kô é nghut luî, byu pé gi, ahkáng ayá wó é bang lé jeju yhumsing pé ga luî, tai hkungga nyi bum akô.

26 Nungmoq kúm gi, haú su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq.

27 Hká yuq sheq je kô lhê lhú? Zô zung nyi sù lhú? Haú a nghut jáng, saí tsô é sù

lhú? Zô zung nyi é sù sheq nghut ri. Nghut kôlhang, ngò gi, nungmoq mâ é saí tso sù su za nghut nyi lhê.

28 Nungmoq kúm gi, Ngò jamjau huî nyi le, Ngò eq rahá nyi nyi é bang nghut nyi akô.

29 Haú su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi râ nghut lhê.

30 Haú mù, Ngá é mingdán mâ é, Ngá é zangbó má, nungmoq wó zo kó râ nghut lhê; nungmoq le hkohkâm-tanghkuq má zung to mù, Israelaq amyû raxe í hú lé jéyáng kó râ nghut lhê.

*Yesuq Lé, Petruq (Simun) He-ngik Pyâm Râ Hkyô*

*Mht 26:31-35; Mrk 14:27-31; Yhn 13:36-38*

31 Simun, Simun é, wú aq, sungso cham lé shaí é su, nungmoq lé wó shaí shoq ga, Tsadán wá gi, ahkáng dung bê.

32 Nghut kôlhang, náng é lumjîng myit a hten sháng gaq nghû, Ngò, náng é matú kyûdung byi bê; nàng dum lhing bûn lò jáng, nung gu nung mâng pé lé wum-o lhoq ging byi aq." ga tai ri.

33 Haú hkûn, Simun gi, "Yhumsîng é, htóng wâng kôlhang, shî kôlhang, ngò gi, nàng eq rahá cháng râ matú myit hpyit to bê." ga tú tai ri.

34 Yesuq gi, "Petruq é, nang lé Ngò tai lé, hkû-nyí\* lháng woq a tûn shi má, nàng, Ngo lé a sé ga luî sum dâm he-ngik pyám râ nghut lhê." ga tai ri.

35 Hau htâng, Yesuq, yhangmoq lé tai é gi, "Ngò, nungmoq lé ngunhtûng, jîhtûng, hkyî-tsung a wùn a chûng nhang é za, nhang kat é nghut hkûn, nungmoq chyáng hai ra akô lhú?" ga myi jáng, yhangmoq gi, "Hai le a ra lo." ga tai akô.

36 Haú hkûn, Yhang gi, "Ahkuî kúm gi, ngunhtûng wó sù gi, yù wun sháng gaq, jîhtûng wó sù le, yù wùn sháng gaq, shâm a wó sù gi, bumó ung luî wui sháng gaq.

37 Hkâsu mù gà le, Ngò, nungmoq lé tai kôlé, Ngò eq séng luî Chyúmdang má kê tô é gi, dut lò berâ nghut lhê; 'Haú yuq gi, yubak mara wó bang má nghap lhôm to bê.'<sup>☆</sup> ga

\* 22:34 Yudaq byu pé é ra-nyí gi, myinhtâng bui wang é mai, htang nyi bui wang é jé shoq nghut lhê. Shî mâ é hkû-nyí gi, nga-nhûng é matú myín âng ri. ☆ 22:37 Esai 53:12



kâ tô é dang gi, Ngá chyáng dik lò râ nghut lhê." ga luí, yhangmoq lé taí ri.

38 Haú mù, lagyô pé gi, "Yhumsîng ê, wú aq, shí má shâm í hkyam joq tô ri." ga taí kôjáng, Yesuq gi, "Gé bê." ga luí, yhangmoq lé taí ri.

*Tsanlun Bùm Má Yesuq Kyûdûng É Hkyô  
Mht 26:36-46; Mrk 14:32-42*

39 Ahkuí, Yesuq gi, htoq luí, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htâng châng e ló akô.

40 Haú jowò má jé jáng, Yhang gi, "Nungmoq, gunglaú é a hui sháng gaq, kyûdûng nyi keq." ga luí, yhangmoq lé taí to mù,

41 chángzô pé nyi é mai luqgok radú we kô gâng e ló luí, hkyihput htuq mù,

42 "Áwa ê, Náng ô nau é nghut le gi, góm† shí lé Ngá chyáng mai lhai pyám byi laq. Nghut kôhang, Ngò ô nau é dông a nghut, Náng ô é dông sheq nghut sháng gaq." ga kyûdûng ri.

43 Haú hkûn, mauhkûng mai maumang lagyo rayuq htoq lé luí, Yhang lé i-myit nhik lé taí tîng ri.

44 I-myit hkaú má dik shoq hkâm zo wuí é yanmai, Yhang je riyhang kyûdung wum kat nyi ri; Yhâng é buibù le, sui hkyí sui pat su myigùng má yui gyó ri.

45 Haú mù, kyû ban dung jáng, Yhang toq luí, chángzô pé chyáng ló wú le, yhangmoq gi, myit yón mù luí, yhup myhî to kô é lé ló myâng mù,

46 "Haí mù yhup nyi akô lhú? Toq keq! Gunglaú é a hui sháng gaq, kyûdûng nyi keq." ga luí, yhangmoq lé taí ri.

*Yesuq Lé Chyup É Hkyô*

*Mht 26:47-56; Mrk 14:43-50; Yhn 18:3-11*

47 Haú su ga, ru taí nyi ashî le, wú keq, haú chángzo raxe í yuq má bo é Yudaq gi, hkyô hí mù byù rajùm rayò lé shuí lé lô luí, yhang gi, Yesuq lé bopuq puq râ ga huí lé lo ri.

48 Haú mù luí, Yesuq gi, "Yudaq ê, nàng gi, haú Byu Yhangzo lé bopuq puq é èq gyè pé chyáng ap pyâm lhê lhú?" ga luí, yhang lé lhom myî ri.

49 Haú hkûn, Yesuq htâng cháng bang gi, haí dut lò râ lé bún sé kô é yanmai, "Yhumsîng ê, ngamoq gi, sham èq zân le, gè râ lhú?" ga myí akô.

50 Yhangmoq chyáng mâ é rayuq gi, hkyangjong mó é dui-nhâng zoshâng lé zân kat luí, yhâng é loqyo nohkyap byit byuq bê nghut ri.

51 Yesuq kúm gi, "Gé bê. Yhangmoq ô nau é su nghut kó sháng gaq." ga tù taí mù, haú yuq é nohkyap lé ê záng luí lhoq gê byí ri.

52 Yesuq gi, Yhang lé chyup râ ga jé lé é hkyangjong agyi pé, noqkuq yhûm zúng é zau pé eq agyi suwún wuí lé, "Nungmoq gi, damyaq rayuq lé chyup é su, shâm, dumbáng eq kut luí, lé lo akô lhú?"

53 Ngò gi, nyí wuí, noqkuq yhûm má nungmoq eq rahá nyi kôhang, nungmoq Ngo lé chyup yû râ ga a hen wú kó; ahkuí gi, mauchut èq up‡ nyi bê yanmai, nungmoq é ahkyíng nghut nyi ri." ga taí ri.

*Yesuq Lé, Petruq Èq He-ngik Pyâm É Hkyô  
Mht 26:57-58, 67-75; Mrk 14:53-54, 66-72; Yhn 18:12-18, 25-27*

54 Haú hkûn, yhangmoq gi, Yhang lé chyup yû mù she ló luí, hkyangjong mó é yhûm shut shuí wang ló akô. Petruq le we we mai châng tô ri.

55 Ahkuí, yhangmoq gi, wàng hkaú má myi mut yû luí zung tô bum é hkûn, Petruq le yhangmoq é ahkaú má bo tô ri.

56 Langchyáng myhí rayuq gi, myihkyom yâm má Petruq zung tô é lé, myang kat mù, yhang lé rago wú tsuq to luí, "Shí yuq le Yesuq eq rahá nyi sù nghut ri." ga taí ri.

57 Haú hkûn, Petruq gi, "Myiwe myhí ê, nàng taí é sù lé, ngò a sé." ga he pyâm ri.

58 Hau htâng hkâ-myháng a myáng má, byù rayuq gi, yhang lé dum myàng luí, "Nàng le yhangmoq chyáng bo nyi sù nghut ri." ga taí kat jáng, Petruq gi, "Byù hpó ê, ngò a nghut." ga tù taí ri.

59 Hkyíng hkum rahkum kô myáng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; haí mù gâ le, yhang gi, Galile byù le nghut ri." ga zuq zuq taí ri.

† 22:42 góm gâ é gi, Yesuq jamjau hui râ hkyô eq shî râ hkyô lé, taí nau é nghut lhê. ‡ 22:53 Mauchut èq up gâ é gi, Tsadán èq up é lé gâ ri.

<sup>60</sup> Petruq gi, "Byù hpó ê, nàng taí nyi é hkyô lé, ngò a sé." ga tú taí ri. Haù su ga ru taí nyi ashí le, woq tún bê nghut ri.

<sup>61</sup> Haù hkûn, Yesuq gi, lhîng luí, Petruq lé wú kat ri. Haù mù, Petruq gi, "Hkû-nyí lháng, woq a tún shi má, nàng Ngo lé sum dâm he pyám râ nghut lhê." ga luí, Yhumsîng yhang lé taí é dang lé bûn kat ri.

<sup>62</sup> Haù mù, yhang gi, shinggan shut htoq ê luí, gyai yhang ê ngau nyi ri.

### *Gyezô Pé Yesuq Lé Rhoi É Hkyô*

<sup>63</sup> Yesuq lé zúng nyi é bang gi, Yhang lé rhoi luí nghap myíng nghap htê mu nyi akô.

<sup>64</sup> Yhangmoq gi, Yhâng é myoqdong nghop pyám byi luí, "Nang lé bat sù gi, ó yuq nghut ri lúh? Myiqhtoi htoí wú aq." ga myí akô.

<sup>65</sup> Yhangmoq gi, Yhang lé nyhap é dang ajung jung dông taí rhoi nyi akô.

### *Suwún Wui É Hí Má Yesuq Jé Nyi É Hkyô*

*Mht 26:59-66; Mrk 14:55-64; Yhn 18:19-24*

<sup>66</sup> Napkyó myoqmyàng jáng, ming-byû wui é suwún hpúng bang eq rahá, hkyangjong agyi pé, tará sará pé, zup hpong kut nyi é má, Yesuq lé shuí ê mù,

<sup>67</sup> "Nàng Hkrisduq nghut é têng le gi, ngamoq lé taí kyo laq." gâ akô.

Yesuq gi, "Ngò gi, Hkrisduq nghut lhê nghû taí kôlhang, nungmoq jîng kó râ a nghut.

<sup>68</sup> Ngò, nungmoq lé myi kôlhang, nungmoq gi, tú taí kó râ a nghut.

<sup>69</sup> Nghut kôlhang, ahkuí mai haù Byu Yhangzo gi, a-tsam bo dik é Garai Gasâng é loqyò hkyam má wó zung nyi berâ nghut lhê." ga luí, yhangmoq lé taí ri.

<sup>70</sup> Haù hkûn, yhangmoq banshoq bang gi, "Haù nghut le gi, Nàng, Garai Gasâng é Yhangzo nghut lhê lúh?" ga myí akô.

Yesuq gi, "Nungmoq taí é eq rajung za Ngò nghut lhê." ga luí, yhangmoq lé tú taí ri.

<sup>71</sup> Haù hkûn, yhangmoq gi, "Nga-nhúng haí jung saksé wá râ nyi ashí lúh? Yhâng é nhut mai yhang, taí htoq kat é dang lé, nga-nhúng wó gyo bê nghut lhê." ga akô.

## 23

### *Yesuq Lé Mara Hun É Hkyô*

*Mht 27:1-2, 11-14; Mrk 15:1-5; Yhn 18:28-38*

<sup>1</sup> Haù hkûn, zup zîng tô é bang banshoq gi, htoq mù, Yesuq lé mauzau Pilat chyáng shuí wang ê luí,

<sup>2</sup> "Shí yuq gi, mingbyû wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to luí, Yhânggùng yhang gi, haù Hkrisduq nghû é hkohkâm nghut lhê ga luí, taí nyi é lé ngamoq myang ri." ga luí, Yhang lé mara hun akô.

<sup>3</sup> Haù hkûn, Pilat gi, Yesuq lé, "Nàng gi, Yudaq byu pê é hkohkâm nghut lhê lúh?" ga myí jáng, Yesuq gi, "Nàng taí é eq rajung za nghut lhê." ga tú taí ri.

<sup>4</sup> Pilat gi, "Shí yuq lé hûn râ mara ngò a myàng." ga luí, hkyangjong agyi pé eq shiwa byu pé lé taí ri.

<sup>5</sup> Nghut kôlhang, haù bang gi, "Shí yuq gi, Yuda mau gón má yhang mhoqshit é dông mai, mingbyû wui é i-myt lé shuí gabyông ri. Haù gi, Galile mau mai ahkuí shí má jé shoq nghut bê nghut ri." ga zuq zuq taí bum akô.

<sup>6</sup> Pilat gi, haù su ga kô é lé wó gyo jáng, Yesuq Galile byù nghut é, a nghut é hkyô lé myí wú ri.

<sup>7</sup> Yesuq gi, Herut up é mau mâ é byù nghut é lé Pilat sé jáng, haù u lé Yerusalem wà mó má nyi tô é Herut chyáng, ê dé kat nhang ri.

<sup>8</sup> Herut gi, Yesuq lé myàng jáng, gyai yhang gabú pyâm ri. Hkâsu mù gâ le, Yhâng é hkyô lé wó gyô wú mù, Yhang laklaí kumlhá ralhûm lhûm kut shit râ lé, wó myâng shoq ga, myit myoqbyu nyi é nghut luí, Yhang lé myàng nau é gyai yhang myáng bê nghut ri.

<sup>9</sup> Haù mù, yhang gi, Yesuq lé dangmyi myo myô èq myí wú kôlhang, Yesuq gi, dang rahkun lháng a tú taí byi nghut ri.

<sup>10</sup> Hkyangjong agyi pé eq tará sará pé gi, yap to mù, Yhang lé mara gyai yhang chôm hun akô.

<sup>11</sup> Herut eq yhâng é gyezô pé gi, Yesuq lé rhoi jihkyoí kut mù, atam é dông taí hpoí kô luí, réng é mebu hut byi mù, Pilat chyáng dum taú dé nhang kat akô.

12 Haû nyí jáng, hí hpyang gyè dut lhùm é Herut eq Pilat gi, buinùm dut byuq bekô nghut ri.

*Yesuq Lé Sat Râ Matú Doqđân É Hkyô*

*Mht 27:15-26; Mrk 15:6-15; Yhn 18:39–19:16*

13 Haú hkûn, Pilat gi, hkyangjong agyi pé eq zau suwún wuî, mingbyû wuî lé wut tsíng to mù,

14 "Shí yuq gi, mingbyû wuî lé hkyô shuí nghoq ri ga, Yhang lé nungmoq ngá chyáng shuí lé lô bekô. Ahkuî, wú keq, nungmoq é hí má, Yhang lé ngò myí wú le, Yhang má nungmoq hun é mara lé ngò a myàng nghut ri.

15 Hau htoq agó, Herut le, hai mara le a myàng mù, shí yuq lé nga-nhông chyáng dum dé kat byi bê nghut ri; haû mù luî, wú keq, shí yuq gi, shí gíng é mara haî le a kut shut nghut ri.

16 Haû mù, ngò, Yhang lé dam byi luî, nhang pyám rã." ga luî, yhangmoq lé taî ri.

17 Nghut kôhang, Lhoqlhai Poî hkangmó má, Pilat gi, mingbyû wuî lé htongbyû rayuq yuq nhang kat byi byi kut é yanmai,

18 yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luî, chôm wut garu bum akô.

19 Barabaq gi, wà htum má gumlau kut é eq byù sat é yanmai, htóng gyó nyí sù nghut ri.

20 Pilat gi, Yesuq lé nhang pyám nau é nghut mù luî, yhangmoq lé dum puq taî ri.

21 Nghut kôhang, yhangmoq gi, "Yhang lé tapzîng má jén tap pyám aq, jén tap pyám aq!" ga luî, wut taî garu nyi bum akô.

22 Haû mù luî, sum dâm nghû rã hkûn, Pilat dum taî é gi, "Haî mù luî lhú? Yhang gi, hai mara kut shut bê lhú? Yhang má shí gíng é mara lé ngò a myàng, haû mù, ngò, Yhang lé bat, nhuq, mhoqshit luî, nhang pyám rã." ga luî, yhangmoq lé taî ri.

23 Yhangmoq gi, Yesuq lé tapzîng má wó jén sat pyám shoq ga, zuq zuq htê mó o mó èq dúng wut nyi akô nghut é yanmai, wó taî ung yù bekô nghut ri.

24 Haû mù luî, Pilat gi, yhangmoq dúng é eq rajung za myit hpyit doqđan byí ri.

25 Haû su mù, yhang gi, yhangmoq dúng é eq rajung za, wà htum má gumlau kut é eq byù sat é mai, htóng gyó nyí sù lé nhang kat byi luî; Yesuq lé gi, yhangmoq ô nau é dúng ap byi kat bê nghut ri.

*Yesuq Lé Tapzîng Htoq Má Jén Tap É Hkyô*

*Mht 27:31-44; Mrk 15:21-32; Yhn 19:17-27*

26 Yhangmoq gi, Yesuq lé shuí htoq ló kô é hkûn, yosô wà mai lo é, Kuruni myuq byû nghut é Simun ga sù lé, chyup yù mù, tapzîng waq nhâng luî, Yesuq htâng má cháng nhang akô.

27 Byù rajùm rayò gi, Yhang htâng má châng e ló bum akô. Yhang é yanmai ngaubyi ngaù nhap eq iyon yôn é myiwe zo wuî le haú má bo tô ri.

28 Yesuq gi, yhangmoq shut lhîng wú luî, "Yerusalem byizo wuî ê, Ngá é yanmai hkàngau nyi kó, nungmoq gi, yhumsing gùng eq yhumsing é zo dù wuî é matú sheq ngau nyi keq.

29 Hkâsu mù gâ le, 'Zogúng a dut wú é eq naú a huq wú é baùdung myhí pé gi, hkungsô wó nyi ri.' ga luî, taî é buinyi gi, jé lô rã nghut lhê.

30 Haú buinyi má, byu pé gi, bùm pé lé, 'Ngamoq ahtoq má byoq nhé aq!'

ga luî le, kong pé lé,

'Ngamoq ahtoq má nghop aq!'

ga luî le, wut taî bùm bekô rã nghut lhê.

31 Byu pé gi, sikgâm jùm tô ashî le isu kut kô é nghut le gi, màn jáng gi, hkâsu wá dut lò rã lhú?" ga taî ri.

32 Haú hkûn, damyaq í yuq lé le, sat pyám rã ga, Yesuq eq rahá shuí htoq ló akô.

33 Ahkuî, Ugyap nghu é kong má jé jáng, Yesuq lé tapzîng htoq má jén tap tô é hkûn, damyaq í yuq lé le, loqpai loqyò shut kut luî tapzîng má jén tap tô akô.

34 Haú hkûn, Yesuq gi, "Áwa ê, yhangmoq lé mara hkyut pyám byi laq; hkâsu mù gâ le, yhangmoq kut é hkyô lé yhangmoq a sé kó nghut ri." ga taî ri. Gyezô pé gi, Yhâng é mebu pé lé lháng, hkyîn shosé she é dúng gam yu pyám byí akô.

35 Mingbyû wuî gi, yap to mù tu wú nyi akô. Zau suwún wuî Yhang lé nyhap é gi, "Yhang gi, byù góbang lé hkyi yu é sù nghut

ri. Yhang gi, Garai Gasang hkyin yu é sù Hkrisduq nghut le gi; Yhânggùng yhang le hkyi yu wú sháng gaq." ga akô.

<sup>36</sup> Gyezô pé le, huí ê mù, rhoi nyaú nyaú akô. Yhangmoq gi, chyin wing lé yhun byi kôluí,

<sup>37</sup> "Nàng gi, Yudaq byu pé é hkohkâm nghut é nghut le gi, Náng gùng yhang nàng, hkyi yu wú aq." ga Yhang lé taí akô.

<sup>38</sup> Yhâng é ulhum ahtoq má le, (Grik đông le, Latin đông le, Hebre đông le) "SHÍ YUQ GI, YUDAQ BYU PÊ É HKOHKÂM." gâ é laiká kâ tap tô akô.

<sup>39</sup> Tapzîng htoq má bat tap lhâng to huí é damyaq rayuq gi, "Nàng gi, Hkrisduq nghut lhê, a nghut lúhú? Haú Náng gùng nàng le, ngá-nhik lé le, hkyi yu aq." ga luí, Yhang lé rhoi ri.

<sup>40</sup> Damyaq góyuq sù kúm gi, "Nàng le shí yuq eq rajung za jén tô é huí luí nhîng, Garai Gasang lé a gyuq lúhú?

<sup>41</sup> Nga-nhik gi, yhumsîng kut shut é mara eq rajung za, jéyáng huí zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haú yuq lé tân kat ri.

<sup>42</sup> Hau htâng, yhang Yesuq lé taí é gi, "Yesuq ê, Nàng, Náng é mingdán má jé ló jáng, ngo lé myit bun laq ô." gâ ri.

<sup>43</sup> Haú hkûn, Yesuq gi, "Ngò, nang lé teng za taí lé, hkû-nyí yhang nàng Ngò eq rahá hparadisu\* má nyi râ nghut lhê." ga luí, yhang lé tân kat ri.

### *Yesuq Soqkang Byit É Hkyô*

*Mht 27:45-56; Mrk 15:33-41; Yhn 19:28-30*

<sup>44</sup> Haú ahkyíng gi, nyí káng raxe í hkyíng nghut luí, myinhâng sum hkyíng jé shoq ramau gón mauchut tuq dut byuq bê nghut ri;†

<sup>45</sup> hkâsu mù gâ le, builoq shum byuq é yanmai nghut ri. Noqkuq yhûm mâ é pán-gyang le, í hkyam byáng dut byuq bê nghut ri.

<sup>46</sup> Haú hkûn, Yesuq gi, "Âwa ê, Ngò, Ngá é woi-nyí náng é loq má ap byí lhê." ga htê mó

eq garû kat ri. Haú su ga ban taí eq, Yhang kâng byit bê nghut ri.

<sup>47</sup> Shô up gyezau hpó gi, haú su dut é lé myàng jáng, "Shí yuq gi, gè gè yhang, dingmán sù nghut ri." ga luí, Garai Gasang lé hkya-on kungton ri.

<sup>48</sup> Haú hkyô lé wú râ ga, lé zîng tô é byù lhunghâng bang le, haú su dut é hkyô pé lé myàng kôjáng, myit yón kôluí, wànggàng bat mù, dum taú ló byuq bekô.

<sup>49</sup> Nghut kôlhang, Yhang lé sê é bang eq Galile mau mai Yhang htâng châng é myiwe wuì gi, we we má yap to mù, haú hkyô pé lé byu wú nyi akô.

### *Yesuq É Màng Lé Lup Hkaú Má Kat É Hkyô*

*Mht 27:57-61; Mrk 15:42-47; Yhn 19:38-42*

<sup>50</sup> Haú hkûn, Yuda mau Aramahti gâ é myuq má, Yosep gâ é sù rayuq nyi ri. Haú yuq gi, nhik bo é sù eq dingmán é sù nghut é htoq agó, Garai Gasâng é mingdán jé râ hkyô lé myit myoqbyu to sù le, nghut mù luí,

<sup>51</sup> yhang gi, Yudaq uphkâng hpúng mâ é rayuq nghut kôlhang, hpýé lhûm é hkyô má le, zuí saí é hkyô má le, myit a bo huí lom é sù nghut ri.

<sup>52</sup> Yhang gi, Pilat chyáng wàng luí, Yesuq é gungsôm lé dúng yu ri.

<sup>53</sup> Haú mù, gungsôm haú lé tapzîng mai hkyut hkyô yu luí, pán yúng eq htup yup mù, ó lé lhang a kat wú shí é, luqgok lé kyûng tô é luqgok lup hkaú má kat tô ri.

<sup>54</sup> Haú nyí gi, Hên Lajang Buinyi nghut luí, Bánno buinyi jé râ za nghut bê.

<sup>55</sup> Galile mau mai Yesuq eq rahá htoq lé lo é myiwe zo wuì le, Yosep htâng má châng ê luí, lup haú lé le, Yesuq é gungsôm lé le, hkâsu kut tô tô é lé, ê myang akô.

<sup>56</sup> Hau htâng, yhangmoq gi, yhûm shut taú lò mù, Yesuq é gùng sôm lé but byi râ matú, namngón é jung eq mura xû lé hen tô akô. Bánno buinyi má kúm gi, tarâ joq é eq rajung za, yhangmoq yuban bân nyi bum akô nghut ri.

\* **23:43** Hparadisu nghu é gi, mauhkûng mingdán lé taí ri. † **23:44** Nga-nhûng é nyí káng raxe í hkyíng gi, Yudaq byu pé é napkyó hkyuq hkyíng nghut lhê; yhangmoq é gau hkyíng gi, nga-nhûng é myinhâng sum hkyíng nghut bê.

## 24

*Yesuq, Dum Dui Toq É Hkyô*  
*Mht 28:1-10; Mrk 16:1-8; Yhn 20:1-10*

<sup>1</sup> Bánno buinyi htang napsûn noq le, myiwe wui gi, yhangmoq hen tô é namngón jung pé lé yu chûng mù, lup shut e ló akô.

<sup>2</sup> Yhangmoq gi, lup mâ é luqhkum lêng búng to lánq é lé, ê myâng kômù,

<sup>3</sup> wang e wú kô le, haú Yhumsîng Yesuq é gungsôm lé, a myàng lo kó nghut ri.

<sup>4</sup> Yhangmoq maú úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nam má yap tô akô.

<sup>5</sup> Haú mù, myiwe haú bang gi, gyuq dan bum kôluî, myigùng shut myoqdong ngóm gop tô bum é u lé, haú nhik gi, "Nungmoq gi, duì sù lé, shi to bâng chyáng haí mù ho nyi akô lhú?"

<sup>6</sup> Yesuq gi, shí má a nyi lo; Yhang dui toq lo bê! Yhang gi, nungmoq eq rahá Galile mau má nyi tô ashî hkûn lé,

<sup>7</sup> 'Haú Byu Yhangzo gi, yubak dap bâng é loq má ap pyâm é hui luî, tapzîng má jén sat to huî é htâng, sum nyi nghû é buinyi má lhoq dui toq yu é hui râ nghut lhê.' ga nungmoq lé taí tô é dang lé myit bun keq." ga luî, yhangmoq lé taí ri.

<sup>8</sup> Haú hkûn, yhangmoq gi, Yesuq é dang lé bûn kat bekô nghut ri.

<sup>9</sup> Yhangmoq gi, lup mai dum taú lò mù, lagyo raxe rayuq eq gotú lhunglhâng bang lé, haú hkyô banshoq lo taí kyô akô.

<sup>10</sup> Lagyo pé lé lo taí kyo bang gi, Magadalaq wà mâ é Mariq, Yoanaq, Yakuq é yhângnu Mariq eq, yhangmoq eq rahá nyi é myiwe góbang le nghut akô.

<sup>11</sup> Lagyo pé kúm gi, yhangmoq é dang lé dangsôm su ngam pyám kôluî, a jîng byi kó nghut ri.

<sup>12</sup> Nghut kôlhâng, Petruq gi, toq luî lup má din jé é mù ngóm wú kat le, mâng htup é pán leq tô é lé za myàng mù luî, haú su dut é hkyô lé maú é èq, yhûm shut dum taú lò byuq bê nghut ri.

*Chángzo Í Yuq Lé Yesuq Htoq Shit É Hkyô*  
*Mrk 16:12-13*

<sup>13</sup> Haú ra-nyí má za, Yesuq é chángzô pé mâ é í yuq gi, Yerusalem wà mó mai nyhit déng kô wê é Ema-u gâ é wà shut e ló akô.

<sup>14</sup> Yhangnhik gi, dut laí ló é hkyô pé banshoq lé, rayuq eq rayuq taí lhûm nyi akô.

<sup>15</sup> Yhangnhik gi, haú hkyô pé lé rayuq eq rayuq taí hpyê lhûm e ló kô le, Yesuq gi, yhangnhik chyáng jé lé lô mù, yhangnhik eq rahá sô nyi ri.

<sup>16</sup> Nghut kôlhâng, yhangnhik gi, myoq hpuq hpuq pyám byî é hui kômù, Yhang lé a sê wú byuq kó nghut ri.

<sup>17</sup> Hau hkûn, Yesuq gi, yhangnhik lé, "Nungnhik hkyô so uchyang taí lhûm lé lo é gi, haí jung wá nghut akô lhú?" ga myi kat jáng, yhangnhik gi, myoqdong shûm kut luî, hkyîng yap tô akô.

<sup>18</sup> Yhangnhik mâ é Hklupa gâ é sù gi, "Nàng gi, Yerusalem wà mó má lé bíng nyî luî nhîng, shí gyoro lé haú wà má dut lo é hkyô pé lé, a sê é bíng gi, Nàng baú za wá nghut lhê lhú?" ga myi kat ri.

<sup>19</sup> Yhang gi, "Haí jung lhú?" ga dum myî é hkûn lé, yhangnhik gi, "Nazaret wà byù Yesuq é hkyô nghut lhê; haú yuq gi, Garai Gasâng é hí má le, byù lhunglhâng bâng é hí má le, nhut shô hpaqchyî a-tsam eq hkyî loq a-tsam má wum-o bo é sù myiqhtoi nghut ri.

<sup>20</sup> Nghut kôlhâng, hkyangjong agyi pé eq ngamoq é zau suwún wui èq haú yuq lé sat pyám rá matú ap byî pyám kômù, yhangmoq gi, Yhang lé tapzîng má jén sat pyám bekô nghut ri.

<sup>21</sup> Ngamoq kúm gi, haú yuq lé, Israelaq byù myû lé hkyi yù râ sù nghut lhê nghû luî, myit myoqbyu nyi bum lhê. Nghut kôlhâng, haú su dut laí ló é gi, hkû-nyí sum nyi lháng bò bê.

<sup>22</sup> Hau htoq agó, hkû-nap noq le, lup má ê wú é, ngamoq hpúng mâ é myiwe wui ra-am gi, ngamoq lé, lo lhoq maú akô.

<sup>23</sup> Yhangmoq gi, Yesuq é gungsôm lé a myàng jáng dum taú lò mù, 'Haú Yhumsîng dui nyi ri.' ga luî, taí kyô é maumang lagyo htoq shit é shing-rán lé, myang é hkyô lé lo taí kyô akô.

<sup>24</sup> Haú mù, ngamoq é luzúm wui ra-am gi, lup má ê wú kô le, myiwe wui taí é eq

rajung za, dut to láng é lé ê myàng akô. Nghut kôlhang, haú yuq lé gi, yhangmoq a myàng kó gâ." ga luí, Yhang lé taí kyô akô.

<sup>25</sup> Haú hkûn, Yhang gi, "Myiqhtoí pé taí é dang banshoq lé lumjîng râ matú, hpaqchyí a bo é eq ngha é sú nhik ê,

<sup>26</sup> Hkrisduq gi, haú su é wuîhke jamjau hkâm zô yu é htâng má sheq, Yhâng é hpungwup shingkang má wó wang nyi to râ, a nghut kó lúhú?" ga luí, yhangnhik lé myî ri.

<sup>27</sup> Yhang gi, yhangnhik lé, Mosheq kê tô é eq myiqhtoí pé banshoq bang kê tô é Chyúmdang pé mai, Yhang má âng é dang banshoq é lichyúm lé, taí hpông kyô ri.

<sup>28</sup> Ahkuí, yhangmoq, haú nhik e ló é wà má chyâng lò kôjáng, Yesuq gi, lai ló râ su kut ri.

<sup>29</sup> Haú hkûn, yhangnhik gi, "Nga-nhik eq rahá wang bíng sháng; hkâsu mù gâ le, buigyùm bê mù, mau le chut lô bê nghut ri." ga luí, Yhang lé wum kat chôm lung nyi akô. Haú mù luí, Yesuq gi, yhangnhik eq rahá wang bíng bê nghut ri.

<sup>30</sup> Yesuq gi, zang zo râ ga, yhangnhik eq rahá zung tô é hkûn, muk lé yù luí, jeju hkya-on mù, myhik hpé luí, yhangnhik lé gàm byî ri.

<sup>31</sup> Haú hkûn, yhangnhik é myoq bóng lô luí, Yesuq nghut é lé bún sé kat bekô. Yesuq kúm gi, yhangnhik chyáng mai byuq byuq bê nghut ri.

<sup>32</sup> Haú mù, yhangnhik gi, "Yhang gi, hkyô má ngá-nhik eq dang nyo lhum é eq Chyúmdang é lichyúm taí hpóng shit é hkûn, ngá-nhik gi, i-myt unghkaú má, achyí aku dut bê a nghut lúhú?" ga luí, yhangnhik yhangchang taí lhum akô.

<sup>33</sup> Yhangnhik gi, toq mù, radá dâm Yerusalem wà mó shut dum taú ló kê le, lagyo raxe rayuq eq, yhangmoq eq rahá nyi é bang zup míng to kê é lé ló myang akô.

<sup>34</sup> Haú bang gi, "Haú Yhumsîng gi, teng za yhang dum dui toq ló bê; Simun lé lhang htoq shit bê nghut ri." ga taí lhum nyi bum akô.

<sup>35</sup> Haú hkûn, yhangnhik gi, hkyô má dut lai ló é hkyô pé eq, muk hpê é hkûn má Yesuq lé bún sé kat é hkyô lé, taí kyô akô nghut ri.

*Chángzô Pé Lé Yesuq Htoq Shit É Hkyô Mht 28:16-20; Mrk 16:14-18; Yhn 20:19-23; Lagyo 1:6-8*

<sup>36</sup> Yhangmoq haú hkyô lé chôm taí nyi tô bum ashí le, Yesuq gi, Yhang gûng yhang, yhangmoq é agùng má yap to luí, "Nungmoq nguingón yuqyo nyi sháng gaq." ga luí, yhangmoq lé taí ri.

<sup>37</sup> Yhangmoq kúm gi, gyuq dan byuq bùm kômù, sobyô lé myàng bê ga myit yu pyâm bum akô.

<sup>38</sup> Haú mù luí, Yhang gi, "Nungmoq gi, haí mù dan nyi bum akô lúhú? Haí mù nungmoq é i-myt unghkaú má úng-âng nyi bum akô lúhú?"

<sup>39</sup> Ngá é loq eq Ngá é hkyí lé wú wú keq. Ngò yhang nghut nyi lhê. Ngo lé sop wú keq. Sobyô nghú é gi, ngo lé nungmoq myang é su, sho eq showui showang bo é a nghut." ga luí, yhangmoq lé taí kyô ri.

<sup>40</sup> Yhang gi, haú su ga taí mù, Yhâng é hkyí loq lé tún shit ri.

<sup>41</sup> Yhangmoq gi, gabú é eq maú nyi bùm kômù, a wó jîng shi dut tô é hkûn lé, Yesuq gi, "Nungmoq shí má zôhpo rajung jung wó akô lúhú?" ga luí, yhangmoq lé myi kat ri.

<sup>42</sup> Haú hkûn, yhangmoq gi, nyhîn nyhoq tô é ngozo rahtung lé, byî akô.

<sup>43</sup> Yhang gi, haú lé yù mù, yhangmoq é hí má zô shit ri.

<sup>44</sup> Hau htâng, Yhang, yhangmoq lé taí é gi, "Mosheq é tarâ eq, myiqhtoi laiká pé má le, Hkya-on Kungtôn Laiká pé má le, Ngò èq séng luí kê to má kê to banshoq gi, dik râ chyat nghut lhê nghú luí, nungmoq eq rahá nyi to ashí hkûn lé, Ngò, nungmoq lé taí kyô tô é pé gi, shí nghut bê." ga taí ri.

<sup>45</sup> Hau htâng, Yhang gi, Chyúmdang pé lé sê gyo shoq ga, yhangmoq é i-myt hkum hpóng byî ri.

<sup>46</sup> Haú mù, Yhang gi, "Hkrisduq gi, wuîhke jamjau hui zo mù, sum nyí nghú râ buinyi má, shi é mai dum dui toq lô râ hkyô lé le,

<sup>47</sup> Yerusalem wà mó mai hí luí, byù myú chângjup lé, Yhâng é myîng lé lang luí yubak mara hkyut pyám byi râ hkyô eq myit lîng râ hkyô lé le, hko kyo râ hkyô lé, kê to bê nghut ri.

<sup>48</sup> Nungmoq gi, shí pé é saksé pé nghut nyi akô.

<sup>49</sup> Ngá Wa byî tô é danggidiq\* lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyì jé shoq, Yerusalem wà mó má láng nyî keq." ga luî, yhangmoq lé taî ri.

*Yesuq Mauhkûng Shut Shuî Toq Yu Huî É Hkyô*

*Mrk 16:19-20; Lagyo 1:9-11*

<sup>50</sup> Hau htâng, Yhang gi, yhangmoq lé Beh-tani wà yàm shut shuî htoq ê mù, Yhâng é loq tu toq luî, shimân byî ri.

<sup>51</sup> Haû su kut shimân byî nyi ashî le, Yhang gi, yhangmoq chyáng mai gâng ló byuq luî, mauhkûng shut shuî toq yu é hui bê nghut ri.

<sup>52</sup> Yhangmoq kúm gi, Yhang lé noqkuq kômù luî, gyai gabú é myit èq Yerusalem wà mó shut dum taû ló akô.

<sup>53</sup> Yhangmoq gi, noqkuq yhûm má nyi to mù, Garai Gasang lé hkya-on kungton nyi bum akô nghut ri.

---

\* **24:49** Ngá Wâ byî tô é danggidiq nghu é gi, Chyoiyúng é Woi-nyî lé taî ri.

## YOHAN é Gabú Danglù Laiká (The Gospel of John)

### *Haù Mungdang, Xângzo Byù Gùng Lé Dut É Hkyô*

<sup>1</sup> A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri.

<sup>2</sup> Yhang gi, a-nham sâng-hi má, Garai Gasang eq rahá nghut nyi ri.

<sup>3</sup> Nyi mì-nyì, joq mijoq gi, Yhang đông mai hpan tô é chyat nghut lhê; Yhang đông mai a hpan é gi, haí lháng a joq nghut ri.

<sup>4</sup> Asak chyungxe gi, Yhang má nghut lhê mù, asak haù gi, byu pê é matú maubó nghut ri.

<sup>5</sup> Haù maubó gi, mauchut má duqbó byì nyì kôlhang, mauchut gi, haù lé a hap yù nghut ri.

<sup>6</sup> Garai Gasang mai nhang kat é, Yohan gâ é byù rayuq jé lé ri.

<sup>7</sup> Yhang gi, maubó haù eq sêng é hkyô lé, saksé hkám byi luí, yhang é yanmai byù lhunglhâng bang wó lumjíng kó sháng gaq ga, saksé rayuq đông jé lé é sù nghut ri.

<sup>8</sup> Yhang gi, haù maubó a nghut; maubó haù lé saksé hkám byi râ matú za sheq jé lé é ru nghut lhê.

<sup>9</sup> Byù yuq jup lé duqbó byi é, maubó akying haù gi, mingkan htoq má jé nyi to bê.

<sup>10</sup> Yhang gi, mingkan htoq má nyi to bê nghut ri; mingkan lé gi, Yhang đông mai hpan tô é nghut kôlhang, mingkan haù gi, Yhang lé a wú sé nghut ri.

<sup>11</sup> Yhang gi, yhumsíng mau má jé lé kôlhang, Yhâng é amyù pé gi, Yhang lé a lhom hap yù kó nghut ri.

<sup>12</sup> Nghut kôlhang, Yhang gi, Yhang lé lhom hap yù luí, Yhâng é myíng lé lumjíng é bang lhunglháng lé, Garai Gasâng é yhangzô pé dut râ ahkáng byi bê nghut ri.

<sup>13</sup> Haù bang gi, sui sho đông hku kat é le a nghut, byù ô nau é đông hku kat é le a

nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

<sup>14</sup> Haù Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô byíng tô é, Yhang é hpungwup shíngkang lé myang wú bê nghut lhê; haù gi, haù Íwâ é zote rayuq đông, Yhang wó yu é hpungwup shíngkang nghut ri.

<sup>15</sup> Wui-myhup Sará Yohan gi, Yhang eq sêng é hkyô lé saksé hkâm é hkûn, garù taí é gi, "'Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri.' nghú, ngò taí é sù gi, shí yuq nghut bê." gâ ri.

<sup>16</sup> Yhâng é gumjup é jeju ahkaù mai, nga-nhúng banshoq bang gi, shimân jeju lé ralhùm htoq ralhùm myang yu nyi bê nghut lhê.

<sup>17</sup> Hkâsu mù gâ lé, haù jep é tarâ gi, Mosheq é loq đông mai byì é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê.

<sup>18</sup> Garai Gasang lé, ó yuq eq le a myang wú wú é nghut lhê; nghut kôlhang, haù Íwâ é tanghkoí má lúng tô é, Yhang Zo zote gi, Garai Gasâng é gùng lé lhoq htoq shit bê nghut ri.

### *Wui-myhup Sará Yohan Hko Kyô É Hkyô Mht 3:1-12; Mrk 1:1-8; Luk 3:15-17*

<sup>19</sup> Yerusalem wà mó mâ é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kô é hkûn, Yohan saksé hkâm é gi, a-ô mâ é hkyô pé nghut ri.

<sup>20</sup> Yhang gi, a hê a zaú tô e za, "Ngò gi, Hkrisduq\* a nghut." ga lhom taí kyô ri.

<sup>21</sup> Haù hkûn, yhangmoq gi, "Haù nghut jáng, nàng gi, ó yuq nghut lhê lú? Nàng gi, Eliyaq lú?" ga myi kôjáng, yhang gi, "A nghut." ga taí ri; "Nàng gi, haù Myiqhtoi nghut lhê lú?" ga dum myi kôjáng, yhang gi, "A nghut." ga tú taí ri.

<sup>22</sup> Haù mù, yhangmoq gi, "Ngamoq lé nhang kat bâng chyáng ló wó taí kyo râ matú, nàng gi, ó yuq nghut lhê lú? Náng

\* **1:20** Grik dong *Hkrisduq* gâ é gi, xù but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.



gûng lé nàng hkâsu nghû lhê lú? Taî kyô wú laq." ga dum myî akô.

<sup>23</sup> Haú hkûn, Yohan gi, myiqhtoi Esai- aq é dang eq rajung za, "Ngò gi, haú yoso má, 'Yhumsing é matú hkyô lhoq nyhang to keq.' gâ é htê lé, garû taî é sù nghut lhê."☆ ga tû taî ri.

<sup>24</sup> Hparishe pé mai nhang kat é bang ram gi, yhang lé,

<sup>25</sup> "Nàng gi, haú Hkrisduq le a nghut, Eliyaq le a nghut, Myiqhtoi le a nghut é nhing, haî mù luî, wui-myhup hkám byi nyi lhê lú?" ga dangmyi myî akô.

<sup>26</sup> Haú hkûn, Yohan tû taî é gi, "Ngò gi, wui èq za wui-myhup hkám byi lhê; nghut kôlhang, nungmoq a sê é sù rayuq nungmoq chyáng yap tô ri.

<sup>27</sup> Yhang gi, ngá htâng má lé é sù yuq nghut bê; ngò gi, Yhâng é hkyî-tsung tui lé hpýî râ lhang a gingdán é nghut ri." gâ ri.

<sup>28</sup> Shí pé banshoq gi, Yohan wui-myhup hkám byi nyi é, Yodan làng hé hpoq mâ é Behtani wà má dut é hkyô pé chyat nghut ri.

### *Yesuq Gi, Garai Gasâng É Sauzo Nghut É Hkyô*

<sup>29</sup> Hau htang nyí, Yohan gi, yhâng chyáng Yesuq lé lo nyi é lé myàng luî, taî é gi, "Míngkan byu pé é yubak mara lé yu pyám byi é Garai Gasâng é Sauzo lé, wú keq!

<sup>30</sup> Shí yuq gi, 'Ngá é htâng má jé lé é Sù gi, ngá é hí má nyi bê sù nghut é yanmai, ngá htoq je gyaú Sù nghut ri.' nghû, ngò taî é sù yhang nghut bê.

<sup>31</sup> Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israe- laq byu pé wó sé kó sháng gaq nghû, ngò lé jé mù, wui èq wui-myhup hkám byi nyi é nghut lhê." gâ ri.

<sup>32</sup> Hau htâng, Yohan saksé hkâm é gi, "Haú Woi-nyí gi, mauhkûng mai hpûngkyui gunghkyâng sù é dông mai gyó lé mù, Yhâng chyáng lé nô tô é lé, ngò myàng ri.

<sup>33</sup> Ngò gi, Yhang ó yuq nghut é lé a sê é nghut kôlhang, wui èq wui-myhup hkám byi râ matú, ngo lé nhang kat é Sù, ngo lé taî kyô é gi, 'Haú Woi-nyí gyó lé lô mù, ó yuq

chyáng lé nô tô é lé, nàng myàng jáng, haú yuq gi, haú Chyoiyúng Woi-nyí má wui-myhup hkám byi râ sù nghut lhê.' gâ ri.

<sup>34</sup> Haú eq rajung za ngò myàng bê nghut luî, shí yuq gi, Garai Gasâng é Yhangzo nghut lhê nghû, ngò saksé hkâm lhê." gâ ri.

### *Sâng-hi Lhê É Chángzô Pé*

<sup>35</sup> Hau htang nyí, Yohan gi, yhâng é chángzo í yuq eq rahá, haú má dum nyi tô akô.

<sup>36</sup> Haú hkûn, yhang gi, Yesuq laî ló nyi é lé myang kat jáng, "Hê, Garai Gasâng é sauzo lé, wú keq!" ga taî kat ri.

<sup>37</sup> Chángzo haú í yuq gi, yhang haú su gâ é lé wó gyo kôjáng, Yesuq é htâng cháng bekô nghut ri.

<sup>38</sup> Yesuq gi, lhing wú kat le, yhangnhik châng tô é lé myàng luî, "Nungnhik haî o akô lú?" ga myi jáng, yhangnhik gi, "Rabai ê, Nàng hkâmá nyi lhê lú?" ga taú myî kat akô nghut ri. (Rabai gâ é gi, Sará gâ é lichyúm nghut lhê.)

<sup>39</sup> Haú hkûn, Yhang gi, "Lé keq, haú jáng, nungnhik myàng kó râ nghut lhê." ga tû taî ri.

(Haú-u gi, raxê hkyíng† kô nghut ri.) Haú mù luî, yhangnhik gi, châng ê mù, Yhang hkâmá nyi é lé, ê myàng kôluî, haú nyi buigyùm shoq, Yhang eq rahá ê nyi nyi akô nghut ri.

<sup>40</sup> Yohan taî é dang lé wó gyo luî, Yesuq htâng châng é su nhik mâ é rayuq gi, Simun Petruq é yhanggu Andre nghut ri.

<sup>41</sup> Andre gi, yhangmang Simun lé hí myàng luî, "Nga-nhik gi, Mesaia lé myàng bê." ga yhang lé taî kyô ri. (Mesaia gâ é lichyúm gi, Hkrisduq gâ é nghut lhê.)

<sup>42</sup> Hau htâng, yhang gi, yhangmang lé Yesuq chyáng shuî e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa‡ gâ é mying lé, nàng wó yû râ nghut lhê." ga taî ri. (Kehpa gâ é lichyúm gi, Petruq gâ é nghut lhê.)

### *Hpilip Eq Nahtanelaq Lé Hkyin Yu É Hkyô*

☆ 1:23 Esai 40:3 † 1:39 Raxê hkyíng gi, myinhâng myi hkyíng záng ri. ‡ 1:42 Aramaik dang dông Kehpa gâ é eq Grik dang dông "Petruq" gâ é lichyúm gi, luqgok gâ é nghut lhê.

<sup>43</sup> Hau htang nyí, Yesuq gi, Galile mau shut ê râ matú, myit hpyit yû bê nghut ri. Yhang gi, Hpilip lé myàng jáng, "Ngá htàng cháng aq." ga taí ri.

<sup>44</sup> Hpilip gi, Andre eq Petruq nhik nyi é Bet-sáida wà mó mâ é byù nghut ri.

<sup>45</sup> Yhang gi, Nahtanelaq lé myàng jáng, "Mosheq mai tarâ laiká má kê tô é eq my-ightoí pé mai le lhoq ang luí kê tô é sù, Yosep é yhangzo, Nazaret wà byù Yesuq lé, ngamoq myàng bê." ga yhang lé taí kyô ri.

<sup>46</sup> Haú hkûn, Nahtanelaq gi, "Nazaret wà ô! Haú mai, ge é jung haí wa wó htoq lhê lú?" ga myi jáng, Hpilip gi, "Ru lé wú aq." ga yhang lé taí ri.

<sup>47</sup> Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang luí, "Wú keq, shí yuq gi, mhaú é myit a bo é sù, Israelaq byù akying rayuq nghut ri." ga taí ri.

<sup>48</sup> Haú hkûn, Nahtanelaq gi, "Nàng, ngo lé hkâsu kut sê é lú?" ga myi jáng, Yesuq gi, "Nang lé, Hpilip eq a wut yù shimá, nàng, maihpáng gâm ô má ru nyi tô ashî hkûn, Ngò, nang lé myàng bê nghut lhê." ga tû taí ri.

<sup>49</sup> Haú mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkohkâm le nghut ri." ga taí ri.

<sup>50</sup> Haú hkûn, Yesuq gi, "Ngò, nang lé, maihpáng gâm ô má myang é nghû taí kyô é yanmai, nàng lumjíng lhê a nghut lú? Hau htoq je kê é muzó pé lé, nàng myàng rá nghut lhê." ga taí ri.

<sup>51</sup> Hau htàng, Yesuq xoq taí é gi, "Ngò, nungmoq lé teng za taí kôlé, mauhkûng bóng lô luí, haú Byu Yhangzô ahtoq má, Garai Gasâng é maumang lagyô pé doq lô gyó lô kut nyí kê é lé, nungmoq myàng kô rá nghut lhê." gâ ri.

## 2

### *Wuì Lé Tsibiyiq Wing Dut Nhang É Hkyô*

<sup>1</sup> Hau htàng, í nyí nghû râ nyí má, Galile mau mâ é Hkanaq wà mó má, myiháng poí ralhum joq ri. Haú má Yesuq é yhângnu le, bo lom ri.

<sup>2</sup> Yesuq eq Yhâng é chángzô pé lé le, myiháng poí haú má jì akô nghut ri.

<sup>3</sup> Tsibiyiq wing jaú tûm to kê é hkûn, Yesuq é yhângnu gi, "Yhangmoq, tsibiyiq wing a wó lo kô nghut ri." ga, Yesuq lé taí ri.

<sup>4</sup> Haú hkûn, Yesuq gi, "Ânu ê,\* haú, nàng gi, Ngò eq haí sêng lhê lú? Ngá é ahkyíng a jé shi é nghut lhê." ga tû taí ri.

<sup>5</sup> Nghut kôhang, Yhâng nu gi, haú dui-nhâng zoshâng wuì lé, "Yhang haí taí le, haí kut keq." ga taí ri.

<sup>6</sup> Haú nàm má, í sum xê galan kê wang é luqgok wúng hkyuq cham joq tô ri; haú gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

<sup>7</sup> Yesuq gi, haú dui-nhâng zoshâng wuì lé, "Wúng haú pé má wuì lhoq pyíng keq." ga taí ri; haú mù, yhangmoq gi, wúng haú pé má byíng shoq shoq lhoq pyíng bekô nghut ri.

<sup>8</sup> Hau htàng, Yhang gi, yhangmoq lé, "Ahkuí, ratsuí hkû yù mù, poí-up lé yu ló byi keq." ga taí jáng, yhangmoq gi, yu ló byi akô nghut ri.

<sup>9</sup> Poí-up hpó gi, wuì mai dut é tsibiyiq wing haú lé, shuq chyam wú ri; wuì hkam é dui-nhâng zoshâng wuì gi, tsibiyiq wing haú hkâmai lo é hkyô lé sê to kôhang, yhang gi, a sé nghut ri. Haú mù, yhang gi, lusik lé, jì yù luí,

<sup>10</sup> "Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyàng lé ru yu htoq lhê; nghut kôhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!" ga taí ri.

<sup>11</sup> Galile mau mâ é Hkanaq wà mó má, Yesuq tûn shit é limik kumlhá gi, Yhang kut é limik kumlhá pé mâ é sâng-hi dàm nghut ri. Yhang gi, Yhâng é hpungwup shíngkang lé, haú dõng lhoq htoq shit é nghut mù luí, Yhâng é chángzô pé gi, Yhang lé lumjíng bum akô nghut ri.

### *Noqkuq Yhûm Lé Lhoq Sansêng Pyâm É Hkyô*

*Mht 21:12-13; Mrk 11:15-17; Luk 19:45-46*

\* **2:4** Ânu ê gâ é lé, Grik dõng gi, "Myiwe myhi ê" ga bo tô é nghut lhê.

12 Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haú má buinyi myi ngò nyi nyi akô nghut ri.

13 Yudaq byu pé é Lhoqlhai Poî jé râ nghut é hkûn, Yesuq gi, Yerusalem wà mó má doq ló ri.

14 Haú hkûn, noqkuq yhûm wàng má, nojûng, sau, hpûngkyui pé lé ûng nyi é bang lé le, siboî má ngùn htaí zô zung nyi é bang lé le, Yhang ló myàng ri.

15 Haú mù, Yhang gi, tui lé, nhuq râ wase saí yù mù, banshoq bang lé le, sau eq nojûng lé le, haú noqkuq yhûm wàng mai hkat htoq luî, ngùn htaí zo bâng é ngùn htingchap lé gi, tû hut pyám byi mù, yhangmoq é siboî lé gi, tu mhuaq pyám byi ri;

16 haú hpûngkyui ung zô é bang lé le, "Zè shi pé lé yu htoq ló keq! Ngá Wâ é yhûm lé, hpugá jowò hkâkut kó!" ga luî nhik-yô ri.

17 Haú mù, Yhâng é chángzô pé gi, "Ngò, Náng é yhûm lé chyitdap kâng tui é hkyô gi, Ngo lé myi su nyhê jôm pyám râ nghut lhê."\* ga kê tô é lé, myit bûn kat akô nghut ri.

18 Yudaq byu pé gi, Yhang lé, "Nàng, shí pé kut râ ahko ahkáng wó é hkyô lé saksé tân shit râ matú, ngamoq lé, haí jung limik kumlhá wó tân shit râ lhú?" ga chôm myi akô nghut ri.

19 Haú hkûn, Yesuq gi, "Noqkuq yhûm shí lé nungmoq hpyoq pyám keq, sum nyi gyoro má, Ngò, haú lé dum tu shap râ nghut lhê." ga, yhangmoq lé tû taí ri.

20 Haú Yudaq byu pé gi, "Noqkuq yhûm shí lé, myi xe hkyuq zân tup saí é ru nghut lhê; sum nyi gyoro má za, Nàng wó tu shap râ lhú?" ga tu myi akô nghut ri.

21 Nghut kôlhang, Yesuq taí é noqkuq yhûm gi, Yhâng é gùng lé lhoq ang luî taí é nghut ri.

22 Haú mù, Yhang, shi é mai lhoq dui toq huí é hkûn sheq, Yhâng é chángzô pé gi, Yhang haú su ga taí é dang lé myit bun kômù, Chyúmdang lé le, Yesuq taí é dang pé lé le, lumjínng akô nghut ri.

23 Haú Lhoqlhai Poî nghut é u lé, Yerusalem wà mó má Yesuq nyi nyi é hkûn, byù myo myo gi, Yhang kut shit é limik kumlhá pé lé myàng kômù, Yhang lé lumjínng bum akô nghut ri.

24 Nghut kôlhang, Yesuq gi, byù lhunglhang bâng é myit lé sê é yanmai, yhangmoq chyáng, Yhânggùng lé a ap to nghut ri.

25 Yhang gi, byu é i-myt unghkaú má haí lúng tô é lé sê é yanmai, byù yhangchang saksé hkám byi é a ra nghut ri.

### 3

#### *Nikodimu Lé, Yesuq Mhoqshit É Hkyô*

1 Nikodimu gâ é Hparishe rayuq nyi ri; yhang gi, Yudaq byu pé é byìn tú wapdoq má bo é sù nghut ri.

2 Yhang gi, myín lé, Yesuq chyáng lé mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gâ le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut râ a nghut." ga taí ri.

3 Haú hkûn, Yesuq gi, yhang lé, "Ngò, nàng lé teng za taí kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng râ a nghut." ga tû taí ri.

4 Haú jáng, Nikodimu gi, "Ipyat kó bê é byù gi, dum hkû é hkâsu kut wó hui râ lhú? Ínû é unghkaú má dum wàng mù, dum hku é hui râ gi, gè gè yhang wó dut râ a nghut!" ga taí ri.

5 Haú hkûn, Yesuq gi, "Ngò, nàng lé teng za taí kyo lé, ó yuq nghut kôle, wuì eq Woi-nyí mai hku kat é hui sù za a nghut le gi, Garai Gasâng é mingdán má wó wâng râ a nghut.

6 Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri.

7 Nungmoq gi, dum hku é hui râ lhê' nghû Ngò taí é dang lé, nàng hkâmaú nyi.

8 Haú, laì gi, yhang nau é shut ló lhê. Laì lò htê lé nàng wó gyo kôlhang, laì hkâmai lo é eq, hká shut ló é lé, nàng sé râ a nghut; haú Woi-nyí mai hku kat huí é sù, ó yuq nghut

kôle, haû eq rajung za nghut lhê." ga tû tai ri.

<sup>9</sup> Haû hkûn, Nikodimu gi, "Haû gi, hkâsu wó dut râ lú?" ga myî ri.

<sup>10</sup> Yesuq tû tai é gi, "Nàng gi, Israelaq byu pé é sará rayuq nghut to luî nhîng, haû hkyô pé lé a sê gyo lú?"

<sup>11</sup> Ngò, nang lé teng za tai kyo lé, ngamoq gi, ngamoq sê é hkyô lé tai mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri.

<sup>12</sup> Ngò gi, nungmoq lé, mingkan eq sêng é hkyô lé tai kyô le lhang, a lumjîng kô é nghut le gi, mauhkûng mingdán eq sêng é hkyô lé tai kyô é nghut le gi, hkâsu kut wó lumjîng kó râ lú?"

<sup>13</sup> Mauhkûng mingdán mai gyó lo é sù, haû Byu Yhangzo mai lai luî, mauhkûng mingdán má ó yuq lhang wó doq ló wú é a nghut.

<sup>14</sup> Mosheq gi, yoso má lhangmuì lé tu shap tô é su, haû Byu Yhangzo le tu shap tô é hui ra râ nghut lhê.

<sup>15</sup> Haû mù, haû Byu Yhangzo lé lumjîng é yuq hkangmó gi, ahtum abyuq é asak wó yù râ nghut lhê.

<sup>16</sup> Hkâsu mù gâ le, Garai Gasang gi, mingkan lé gyai yhang chyitdap é yanmai, Yhang Zo lé lumjîng é sù ó yuq nghut kôle, htên byoq é a huì e za, ahtum abyuq é asak wó yù sháng gaq ga, rayuq za é Yhâng é Zote lé byî pyám bê nghut ri.

<sup>17</sup> Hkâsu mù gâ le, Garai Gasang gi, mingkan lé mara byi râ matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui râ matú sheq nhang kat é ru nghut lhê.

<sup>18</sup> Yhang lé lumjîng é sù gi, mara byî é hui râ a nghut; nghut kôlhang, Yhang lé a lumjîng é sù kúm gi, Garai Gasang é Yhangzo zote lé a lumjîng é sù nghut é yanmai, mara byî é huì to gù bê nghut ri.

<sup>19</sup> Maubó gi, mingkan htoq má lé jé to bê; nghut kôlhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit râ malaî, mauchut lé chyit akô nghut ri; haû gi, mara byî é hui râ hkyô yhang nghut ri.

<sup>20</sup> Agè ashop hkyô kut é sù ó yuq nghut kôle, maubó lé a nguì nghut ri; haû yuq gi, yhang kut é hkyô lhoq byông htoq kat râ lé gyuq é yanmai, haû maubó shut lé lô râ a nghut.

<sup>21</sup> Nghut kôlhang, haû tengmán hkyô dông asak dui é sù ó yuq le, yhumsîng kut é hkyô gi, Garai Gasang lom é hkyô lé, san za byu-myàng sháng gaq ga, haû maubó shut lé lo ri." gâ ri.

*Yesuq Eq Séng Luî, Wui-myhup Sará Yohan Saksé Hkâm É Hkyô*

<sup>22</sup> Hau htâng má, Yesuq gi, Yhâng é chángzô pé eq rahá, Yuda mau shut wang ló mù, haû má rayoq zo nyi luî, wui-myhup hkâm byî ri.

<sup>23</sup> Haû u lé, Yohan gi, Salim nàm mâ é E-nun gâ é jowò má, wui gyai myo joq é yanmai, wui-myhup hkâm byî nyi ri; byu pé gi, abyit alan lé lò kômù, wui-myhup lé hkâm yu nyi bum akô nghut ri.

<sup>24</sup> (Haû gi, Yohan lé htóng a lhoq hkyó shí é hkun lhê é hkyô nghut ri.)

<sup>25</sup> Haû hkûn, Yohan é chángzô pé ra-am eq Yudaq byù rayuq gi, lhoq san lhoq yúng hking eq séng luî, dang htîng htîng lhum bum akô nghut ri.

<sup>26</sup> Hau htâng, yhangmoq gi, Yohan chyáng lé luî, "Rabai ê, Yodan làng hé hpoq shut nàng eq rahá nyi luî, nàng èq saksé hkâm byî é Sù gi, ahkuî, wui-myhup hkâm byî nyi é nghut mù, yuq hkangmó gi, Yhâng chyáng e bum akô nghut ri mhaî." ga, yhang lé tai akô.

<sup>27</sup> Haû eq séng luî, Yohan tû tai é gi, "Byù rayuq gi, mauhkûng mai byî é za a nghut jáng, haî le wó hap yù râ a nghut.

<sup>28</sup> 'Ngò gi, Hkrisduq a nghut, Yhang é hí má nhang kat huì é sù za nghut lhê.' nguì, ngò tai é lé, nungmoq yhang saksé nghut bum akô.

<sup>29</sup> Myisik wó é sù gi, lusik nghut ri. Lusik lé, lánng yap tô é luzúm hpó gi, lusik é htê lé wó gyô é yanmai, gyai yhang gabú nyi ri. Haû sù é gabú hkyô gi, ngá é gabú hkyô nghut mù, ngò má byíng jup nyi bê nghut ri.

<sup>30</sup> Yhang gi, kô jat lò ra râ nghut lhê; ngò gi, yom ló ra râ nghut lhê.

<sup>31</sup> Ahtoq mai lé é Sû gi, lhunglhâng é ahtoq má nghut ri; myigùng htoq mâ é sù kúm gi, myigùng htoq eq sêng é nghut luí, myigùng htoq eq sêng é đông za taí ri; mauhkùng mai lé é Sû gi, lhunglháng é ahtoq má nghut ri.

<sup>32</sup> Yhang gi, wó myâng wó gyô é hkyô lé, saksé hkám kôlhâng, Yhang hkám é saksé lé, ó yuq le a hap yù kó nghut ri.

<sup>33</sup> Yhâng é saksé lé hap yu é sù kúm gi, haù Garai Gasang gi, tengmán sù nghut ri ga, saksé shit é sù nghut bê.

<sup>34</sup> Garai Gasâng eq nhang kat é hui Sù gi, Garai Gasâng é mungdang lé taí ri; hkâsu mù gâ le, Garai Gasang gi, haù Woi-nyí lé, laké a kat e za byí é yanmai nghut ri.

<sup>35</sup> Haù Íwa gi, Zo lé chyitdap luí, jung hkanmó lé Yhâng é loq má ap byi bê nghut ri.

<sup>36</sup> Haù Zo lé lumjín é sù ó yuq nghut kôle, ahtum abyuq é asak wó lhê; nghut kôlhâng, haù Zo lé he-ngik pyâm é sù ó yuq nghut kôle, asak haù lé myàng râ a nghut; hkâsu mù gâ le, Garai Gasâng é nhikmo-yo hkyô gi, yhâng chyáng ru joq nyi ri." gâ ri.

## 4

### *Yesuq Eq Samariq Myhí Huí É Hkyô*

<sup>1</sup> Yesuq gi, Yohan htoq má, chángzo je lhoq myô é eq wui-myhup hkám byí nyi ri gâ é hkyô lé, haù Hparishe pé wó gyô akô nghut ri.

<sup>2</sup> (Nghut kôlhâng, gè gè ga jáng, Yesuq gi, Yhang wui-myhup hkám byí é a nghut, Yhâng é chángzô pé sheq ru nghut akô.)

<sup>3</sup> Haù hkyô lé, Yesuq sé jáng, Yhang gi, Yuda mau mai htoq mù, Galile mau shut dum taù ló bê nghut ri.

<sup>4</sup> Ahkuí, Yesuq gi, Samariq mau mai sô lai ló râ dut bê nghut ri.

<sup>5</sup> Haù mù, Yhang gi, Yakup mai yhang zo Yosep lé byí é maumyí rajap eq chyâng lhúm é, Suhka ga myhíng é, Samariq mau mâ é wà mó ralhúm má lo jé ri.

<sup>6</sup> Haù má, Yakup é wuìhtung le joq to luí, Yesuq gi, hkyô sô nú é yanmai, wuìhtung hau é nàm má zung gyó tô ri. Haù u gi, nyí-káng raxe í hkyíng\* nghut bê nghut ri.

<sup>7</sup> Haù hkùn, Samariq myiwe myhí rayuq wuì lé hkam ri; Yesuq gi, yhang lé, "Ngo lé wuì byi shuq laq." ga taí ri.

<sup>8</sup> (Haù u gi, Yhâng é chángzô pé, zoshuq wuì râ matú wà hkaù shut e byuq kô é ahkyíng nghut ri.)

<sup>9</sup> Haù Samariq myiwe myhí gi, Yhang lé, "Nàng gi, Yudaq byù rayuq nghut to luí nhíng, ngò Samariq myiwe myhí chyáng, haì mù shuq wuì dúng lhê lú?" ga taí ri. (Hkâsu mù gâ le, Yudaq byu pé gi, Samariq byu pé eq a zùm yap kó nghut ri.)

<sup>10</sup> Haù hkùn, Yesuq gi, yhang lé, "Nàng gi, haù Garai Gasâng é chyunghuq lé le, nang lé wuì dung sù ó yuq nghut é lé le, sê é nghut le gi, noq mai Yhang lé dúng tôngbán luí, Yhang gi, nang lé asak-wuì byi berâ nghut lhê." ga tũ taí ri.

<sup>11</sup> Myiwe myhí haù gi, "Yhumsíng ê, Nàng gi, wuì hkâm râ zè haì le a wó, wuìhtung le nik ri; haù asak-wuì lé, Nàng hkâmâ é wó yũ râ lú?"

<sup>12</sup> Ngamoq é íwa Yakup gi, ngamoq lé wuìhtung shí byí to bê nghut lhê; yhang yhang le, yhang zo pé le, yhang rém é dusak pé le, wuìhtung shí mâ é wuì shuq bekô nghut ri; Nàng gi, Yakup htoq je kô lhê lú?" ga Yhang lé taí ri.

<sup>13</sup> Yesuq gi, "Wuì shí lé shuq é sù ó yuq le, wuìshit é dum hui râ nghut lhê.

<sup>14</sup> Nghut kôlhâng, Ngò byí é wuì lé shuq é sù ó yuq nghut kôle, wuìshit é hkâ-nhám a hui lo râ nghut lhê. Ngò byí é wuì haù gi, haù yuq má, ahtum abyuq é asak matú wuìbúm dut râ nghut lhê." ga yhang lé tũ taí ri.

<sup>15</sup> Myiwe myhí haù gi, Yhang lé, "Yhumsíng ê, ngò gi, wuì le a shit lo, shí má wuì hkâm le a lé ra lo sháng gaq, wuì haù ngo lé byi laq." ga taí ri.

<sup>16</sup> Haù hkùn, Yesuq gi, "Ló mù, nung làng lé ló wut lò aq." ga, yhang lé taí ri.

<sup>17</sup> Yhang gi, "Ngò, làng a wó." ga taí jáng, Yesuq gi, yhang lé, "Nàng, làng a wó gâ é gi, têng ri.

<sup>18</sup> Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuí wó tô é yuqgè le nung làng a nghut. Nàng gi, têng é dang taí bê nghut ri." ga taí ri.

\* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri.

19 Haú hkûn, myiwe myhí haú gi, "Yhumsîng ê, Nàng gi, myiqhtoi rayuq nghut é hkyô lé, ngò wú sé bê.

20 Ngamoq é îchyí îwâ pé gi, bùm shí má noqkuq kô é nghut lhê; nghut kôlhang, nungmoq Yudaq byu pé gi, Yerusalem wà mó za noqkuq jowò nghut lhê ga taí akô nghut ri." ga taí ri.

21 Haú hkûn, Yesuq taí é gi, "Myiwe myhí ê, Ngo lé jîng aq; bùm shí má le a nghut, Yerusalem wà mó má le a nghut e za, haú Îwa lé noqkuq râ ahkyíng, jé lò nyì bê nghut ri.

22 Nungmoq Samariq byu pé gi, yhumsîng lhang a sê é lé, noqkuq akô; ngamoq kúm gi, ngamoq sê é lé noqkuq lhê; hkâsu mù gà le, hkyi yù hkyô gi, Yudaq amyú mai lo é nghut lhê.†

23 Nghut kôlhang, haú têng é dông noqkuq é bang gi, woi-nyí mai le, tengmán hkyô mai le, haú Îwa lé noqkuq râ ahkyíng gi, jé lo nyì bê nghut luí, ahkuí lhang jé to bê nghut ri; hkâsu mù gà le, haú Îwa gi, haú su kut noqkuq é bang lé ô nau ri.

24 Garai Gasang gi, woi-nyí nghut lhê; haú mù, Yhang lé noqkuq é bang gi, woi-nyí mai le, tengmán hkyô mai le, noqkuq ra râ nghut lhê." ga taí ri.

25 Myiwe myhí haú gi, "Hkrisduq gà é Mesaia jé lé râ nghut é lé gi, ngò sê lhê. Yhang jé lé jâng, nga-nhúng lé banshoq taí sân kyo râ nghut lhê." ga taí ri.

26 Hau htâng, Yesuq gi, "Nàng eq dang nyo nyi é sù ngò gi, haú yuq nghut lhê." ga taí ri.

### *Haú Chángzô Pé Dum Taú Jé Lo É Hkûn Lhê Hkyô*

27 Haú u lé, Yhâng é chángzô pé gi, dum taú jé lo bum akô; yhangmoq gi, Yesuq, myiwe rayuq eq dáng nyo nyi é lé lo myàng luí, maú byuq bum akô. Nghut kôlhang, "Nàng, haí ô ri lú?" ga le, "Haí mù Yhang eq dáng nyo nyi lhê lú?" ga le, Yhang lé ó yuq a myi kó nghut ri.

28 Hau htâng, myiwe myhí haú gi, yhâng é wuì yambú lé tô pyâm to luí, wà shut taú wang ló mù, wà byù wuì lé ló taí kyô é gi,

29 "Ngò kut laí lò bê hkyô pé lhunglhang lé, taí kyô é byù rayuq lé, lé wú keq! Yhang gi, Hkrisduq nghut lhê abe?" gà ri.

30 Haú mù, yhangmoq gi, wà mai htoq lé luí, Yesuq chyáng lé lo bum akô nghut ri.

31 Haú u lé, Yhâng é chángzô pé gi, Yhang lé, "Rabai ê, zoshuq zo aq." ga chòm taí akô.

32 Haú hkûn, Yhang gi, yhangmoq lé, "Nungmoq a sê é jung zoshuq zo râ Ngò wó lhê." ga tú taí ri.

33 Haú mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq taí lhum bum akô.

34 Haú hkûn, Yesuq taí é gi, "Ngo lé nhang kat Sù ô nau é hkyô lé kut râ eq Yhâng é muzó jizó lé lhoq pán râ hkyô gi, Ngá é zoshuq nghut bê.

35 'Kyôshu yoq jé râ gi, lhamó myi hkyap râ ashí.' ga, nungmoq lhaq taí lhê a nghut kó lú? Ngò, nungmoq lé taí kôlé, nungmoq é myoq hpóng luí, haú yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri.

36 Haú kyô hkyó sù eq kyô shu sù gi, rahá wó gabú kó sháng gaq ga, ahkuí lhang, haú kyô shu sù gi, yhâng é zuihpau lé myang yù luí, ahtum abyuq é asak é matú, kyôshi shù tsîng to bê nghut ri.

37 Haú su mù, 'Rayuq gi, sân hkyó, góyuq gi, shù yù.' gà é sanghkyang gi, têng ri.

38 Nungmoq a zui saí tô é jang mâ é shù yù râ matú, nungmoq lé Ngò nhang kat bê nghut lhê. Góbang gi, haú má wum kat zui saí to bê nghut mù, nungmoq gi, haú bang zui saí é akyú lé shu yù bekô nghut ri." gà ri.

### *Samariq Byù Myo Myo Lumjîng Kô É Hkyô*

39 "Yhang gi, ngò kut laí lò bê hkyô lhunglhang lé, taí kyô ri." ga luí, myiwe myhí haú saksé hkâm é yanmai, haú wâ mâ é Samariq byù myo myo gi, Yesuq lé lumjîng bùm bekô nghut ri.

40 Haú mù, Samariq byu pé gi, Yesuq chyáng lé jé kômù, yhangmoq eq nyi râ matú, Yhang lé lung kô é yanmai, Yhang gi, í nyi bo nyi bê nghut ri.

† 4:22 Bun zo shí má, Yesuq taí nau é gi, hkyi yù hkyô lé, Garai Gasang gi, Yudaq byu pé dông danggidiq byi to é nghut é lé taí nau é nghut ri.

41 Yhâng é dang pê é yanmai, byù myo myo gi, lumjúng bang dut jat lò bekô nghut ri.

42 Yhangmoq gi, myiwe myhí haù lé, "Ahkuí, ngamoq lumjúng é gi, nàng taí é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sù nghut é lé, ngamoq sé bê nghut é yanmai nghut lhê." ga chòm taí akô nghut ri.

*Mingsuwún Hpó É Yhangzo Lé Lhoq Gê Byí É Hkyô*

*Mht 8:5-13; Luk 7:1-10*

43 Í nyí lai jáng, Yesuq gi, haù mai Galile mau shut htoq e ló bê nghut ri.

44 "Myiqhtoí gi, yhumsing é mau má myoqdong a wó wú é nghut lhê." ga, Yesuq yhang saksé hkâm é nghut lhê.

45 Yesuq gi, Galile mau má jé é hkûn, Galile byu pé gi, Yhang lé lhom hkulum yu akô; yhangmoq gi, Yerusalem wà mó má, Lhoqlhai Poí ê lóm kô é nghut é yanmai, poí u lé, Yesuq kut é hkyô lhunglhang lé, myàng kô é bang nghut ri.

46 Yesuq gi, Yhang mai haù wuì lé tsibiyiq wing dut nhang é, Galile mau mâ é Hkanaq wà mó má, ê dum kûm ri. Haù ming suwún rayuq é yhangzo yuqzo gi, Kaperna-um wà má no nyi ri.

47 Yesuq gi, Yuda mau mai Galile mau má jé lé bê gâ é hkyô lé, ming suwún haù wó gyo jáng, yhang gi, Yesuq chyáng ê mù, shí-nò no nyi é yhangzo lé, lé lhoq gê byi râ matú, Yhang lé dúng tôngbán ri.

48 Haù hkûn, Yesuq gi, yhang lé, "Byù nungmoq gi, limik kumlhá pé eq mauhpo muzó pé lé za a myàng kô é nghut le gi, hkâ-nhám lé lumjúng kó râ a nghut." ga taí ri.

49 Mingsuwún haù gi, "Yhumsing ê, ngá zo a shí shimá gyó lé laq." ga taí ri.

50 Haù hkûn, Yesuq gi, "Nàng wó ló bê; nung zo byùn râ nghut lhê." ga tû taí ri.

Suwún haù gi, Yesuq taí é dang haù lé gyô júng luí, tau ló bê nghut ri.

51 Yhang gi, hkyô má ru nghut nyi ashí hkûn, yhâng é dui-nhâng zoshâng wuì gi, yhang lé lé hui luí, zoshâng haù gè byuq é hkyô, lé taí kyô akô nghut ri.

52 Yhang gi, yhang zo hkâ-nhám gè byuq é ahkyíng lé myi wú é hkûn, yhangmoq gi, "A-nyí nap nyí hkyuí rahkyíng má, gùng nyé é chám ló byuq bê nghut ri." ga taí kyô akô.

53 Haù hkûn, ahkyíng haù gi, "Nung zo byùn râ nghut lhê." ga, yhang lé, Yesuq taí é ahkyíng nghut é lé, haù yhângwa bûn sé bê nghut ri. Haù mù, yhang eq yhâng yhumbyù banshoq bang gi, lumjúng bekô nghut ri.

54 Haù gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

## 5

*Wuìhtum Yàm Má, Nòhpyo Lhoq Gê Byí É Hkyô*

1 Hau htâng a myáng má, Yudaq byu pê é poí ralthum joq é yanmai, Yesuq gi, Yerusalem wà mó má doq ló ri.

2 Ahkuí, haù Yerusalem wà mó é Sau Hkúmdong nàm má, Hebre myíng dông gi, Betzahta ga myhíng é wuìhtum ralthum joq ri; hau é lhíngkyuq má, jiropp ngo lhum joq tô ri.

3 Jiropp haù pé má, myoqjit bang, hkyí hten bang, gùngjum shí bang ajùm ayò leq tô bum akô. (Haù bang gi, wuì dui nún râ lé láng tô é bang nghut akô.)

4 Hkâsu mù gâ le, haù Yhumsing é mau-mang lagyo gyó lé lé kut mù, wuì lé, lé lhu nhún jáng, wuìhtum haù má hí wó wang é sù gi, hai jung ana wa dap to kôlhang, ge byuq é huì é yanmai nghut ri.)\*

5 Súm xe shit zân tup no nyi é byù rayuq le, haù má bo tô ri.

6 Yesuq gi, haù yuq no leq tô é lé myàng mù, haù su no nyi é gyai myáng bê nghut é hkyô lé sé jáng, yhang lé, "Nàng, gè nau ri lhú?" ga myí ri.

7 Nò sù haù yuq gi, "Yhumsing ê, wuì dui nún lo é hkûn, wuìhtum má wàng râ matú, ngo lé garúm râ byù ó a nyi; ngò wàng râ nghû jáng, góyuq hí, ngá hí má wàng wàng dut ri." ga tû taí ri.

8 Hau htâng, Yesuq gi, yhang lé, "Toq aq! Náng é taphkang yu chùng luí, sô ló aq." ga taí ri.

\* 5:4 Bun zo 3 lhum má é ahtang tím eq bun zo 4 lhum gi, chyúmding myo má a bo é nghut lhê.

<sup>9</sup> Haú yuq gi, radá dâm nò ge byuq bê nghut luí, yhang é taphkang yù mù, sô lô bê nghut ri.

Haú nyí gi, Bánno buinyì nghut ri.

<sup>10</sup> Haú mù, Yudaq byu pé gi, haú nò ge byuq é hui sù lé, "Hkû-nyí gi, Bánno buinyì nyí nghut é yanmai, nàng, taphkang waq é gi, tarâ lu lai bê nghut ri." ga taí akô.

<sup>11</sup> Nghut kôlhang, yhang tû taí é gi, "Haú ngo lé lhoq gê byi sù gi, ngo lé, 'Náng é taphkang yu chûng mù, sô lô aq.' ga taí é nghut lhê." gâ ri.

<sup>12</sup> Haú mù, yhangmoq gi, "'Náng é taphkang yu chûng mù sô lô aq.' ga, nang lé taí é sù gi, ó yuq wá nghut ri lú?" ga myí akô.

<sup>13</sup> Nghut kôlhang, haú ó yuq nghut é lé, nò ge byuq é hui sù gi, a châng sê kat nghut ri; hkâsu mù gâ le, Yesuq gi, haú mâ é byù moq mó má wang nyó lô byuq é yanmai nghut ri.

<sup>14</sup> Htâng má, Yesuq gi, haú yuq lé no-qkuq yhûm má myàng jáng, "Wú aq, nàng wángzán bê nghut ri; hí lhê htoq má je wuîhke é hkyô a hui zo sháng gaq, mara hkâkut shut lo." ga luí, yhang lé taí ri.

<sup>15</sup> Haú yuq gi, htoq lô mù, yhang lé lhoq gê byi é sù gi, Yesuq nghut ri ga, Yudaq byu pé lé taí kyô ri.

### *Asak Wó Yû Râ Hkyô*

<sup>16</sup> Haú mù, Yudaq byu pé gi, Bánno buinyì nyí má, Yesuq, haú hkyô kut é yanmai, Yhang lé gunjang lo akô nghut ri.

<sup>17</sup> Haú hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mù zú nyi é nghut mù, Ngò le mù zú nyi lhê." ga taí ri.

<sup>18</sup> Haú mù luí, Yesuq gi, Bánno buinyì lé lhoq htên é htoq agó, Garai Gasang lé lháng, Yhâng Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akô nghut ri.

<sup>19</sup> Yesuq, yhangmoq lé tû taí é gi, "Ngò, nungmoq lé teng za taí kôlé, haú Zo gi, yhumsing é myit dông haí le a wó kut; Yhâng Wa kut é hkyô lé myang é gù za wó kut é nghut lhê; hkâsu mù gâ le, haú Íwa kut é hkyô lé za, haú Zo châng kut é yanmai nghut lhê.

<sup>20</sup> Hkâsu mù gâ le, haú Íwa gi, Zo lé chyitdap é nghut luí, Yhang kut é hkyô lhunglháng, haú Zo lé tûn shit ri; nungmoq maú hông shoq, shí pé htoq je ko é hkyô pé lé lháng, haú Zo lé tûn shit shirâ nghut lhê.

<sup>21</sup> Haú Íwa gi, shí bê bang lé lhoq dui toq mù, yhangmoq lé asak byi é eq rajung za, haú Zo le, Yhang byi nau é bang lé, asak byi râ nghut lhê.

<sup>22</sup> Hau htoq agó, haú Íwa lé hkunggâ é eq rajung za, haú Zo lé le, lhunglhâng bang hkungga kó sháng gaq ga, haú Íwa gi, ó yuq lé le a jéyáng e za, jéyáng é hkyô lhunglháng, haú Zo lé lum to bê nghut ri.

<sup>23</sup> Haú Zo lé a hkunggâ é sù gi, haú Yhang lé nhang kat é sù Íwa lé le, a hkunggâ é sù nghut ri.

<sup>24</sup> Ngò, nungmoq lé teng za taí kôlé, Ngá dang lé gyo luí, Ngo lé nhang kat é Sù lé lumjíng é sù, ó yuq nghut kôle, mara byi é a hui e za, ahtum abyuq é asak wó é nghut lhê; haú yuq gi, shi é mai lut luí, asak dui bê sù nghut ri.

<sup>25</sup> Ngò, nungmoq lé teng za taí kôlé, haú Garai Gasang é Yhangzô é htê lé, shi byuq bê bang wó gyo râ ahkyíng gi, jé lo nyi bê nghut ri; ahkuí lháng jé to bê nghut ri. Htê haú lé gyô é bang gi, asak dui kó râ nghut lhê.

<sup>26</sup> Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri.

<sup>27</sup> Hau htoq agó, Yhang gi, haú Byu Yhangzo nghut é yanmai, Garai Gasang gi, tarâ jéyáng râ ahko ahkáng, Yhang lé byi bê nghut ri.

<sup>28</sup> Shí hkyô lé hkâ-maú hong nyi kó: lup pé má lúng tô é bang banshoq gi, Yhâng é htê lé wó gyo kôluí, htoq lô râ ahkyíng jé lò râ nghut lhê.

<sup>29</sup> Ge é hkyô kut é bang gi, asak dui râ matú, dui toq kó râ nghut lhê; agè ashop hkyô kut é bang gi, mara byi é hui zo râ matú, dui toq kó râ nghut lhê.

<sup>30</sup> Ngò gi, Ngá myit dông mai haí le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é dông châng é a nghut e za,



Ngo lé nhang kat é Sû ô nau é đông châng é sheq ru nghut lhê.

*Yesuq Eq Séng Luí, Saksé Hkâm É Hkyô*

<sup>31</sup> Ngá gũng lé ngò saksé hkâm é nghut jáng, ngò za saksé hkâm é hkyô gi, teng râ a nghut.

<sup>32</sup> Ngá é hkyô lé saksé hkâm byi é Sû (Ngá Wa) góyuq nyi lhê; Ngò eq séng luí, haú yuq hkâm é saksé gi, têng é hkyô lé, Ngò sê lhê.

<sup>33</sup> Nungmoq gi, Yohan† chyáng byù nhang kat wú bekô nghut ri; yhang gi, haú tengmán hkyô lé saksé hkâm byi bê nghut lhê.

<sup>34</sup> Ngò gi, xângzo byu pé mai saksé hkâm byi râ lé, ra luí a nghut, nghut kôhang, nungmoq hkyi yu é wó hui râ matú sheq, haú su nghu taí é ru nghut lhê.

<sup>35</sup> Yohan gi, duq nyi é myibung su duqbó byi é nghut mù luí, nungmoq gi, haú duqbó é hkaú má, rayoq zo ngón nau nyi akô nghut ri.

<sup>36</sup> Nghut kôhang, Ngò wó é saksé gi, Yohan byi é saksé htoq je kô lhê; hkâsu mù gâ le, ahkuí Ngò zui saí nyi é muzó gi, Ngò lhoq pán râ matú, haú Íwa, Ngo lé ap byi tô é nghut luí, haú Íwa, Ngo lé nhang kat é hkyô lé, saksé hkâm byi nyi ri.

<sup>37</sup> Hau htoq agó, haú Ngo lé nhang kat é sù Íwa le, Ngò eq séng luí saksé hkâm byi ri; nungmoq gi, Yhâng é htê lé le, a wó gyô wú kó; Yhâng é gunghkyâng lé le, a myang wú kó;

<sup>38</sup> haú Yhâng é mungdang le, nungmoq chyáng a bò kó nghut ri; hkâsu mù gâ le, nungmoq gi, Yhang nhang kat é Sû lé a lumjínng kô é yanmai nghut ri.

<sup>39</sup> Nungmoq gi, haú Chyúmdang mai ah-tum abyuq é asak wó yû râ nghut lhê ga myit yù kô é yanmai, haú Chyúmdang má ho wú akô nghut ri; nghut kôhang, Chyúmdang haú gi, Ngò eq séng luí saksé hkâm byi ri;

<sup>40</sup> nghut kôhang, asak wó yû râ matú, nungmoq gi, Ngá chyáng a kâm lé kó nghut ri.

<sup>41</sup> Ngò gi, byu eq hkya-ôn é lé a lhom yu é nghut lhê.

<sup>42</sup> Nghut kôhang, nungmoq lé gi, Ngò sê lhê; nungmoq é i-myt hkaú má, Garai Gasang lé chyitdap é myit a bò kó nghut ri.

<sup>43</sup> Ngò gi, Ngá Wá é mying mai jé lé é sù nghut kôhang, nungmoq gi, Ngo lé a lhom hap yù kó; yhâng mying yhang lang é byù, gotû rayuq jé lé é ru nghut le gi, haú yuq lé, nungmoq lhom hap yù kó râ nghut lhê.

<sup>44</sup> Nungmoq gi, rayuq eq rayuq hkya-ôn lhûm é lé za hap yù luí, rayuq za nghut é Garai Gasâng chyáng mai lo é hkya-ôn hkyô lé gi, a hô kô é bang nhîng, hkâsu kut wó lumjínng kó râ lhú?

<sup>45</sup> Nghut kôhang, haú Íwâ é hí má, Ngò, nungmoq lé mara hûn nhô hkâ-ngâm kó; nungmoq lé mara hun é sù gi, haú nungmoq mai myit myoqbyu tô é Mosheq ru nghut lhê.

<sup>46</sup> Mosheq lé nungmoq gè gè yhang lumjínng kô é ru nghut le gi, Ngo lé le lumjínng kó râ nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri.

<sup>47</sup> Nghut kôhang, nungmoq gi, yhang kâ tô é pé lé lháng a lumjínng kô é nhîng, Ngá dang lé, hkâsu kut wó lumjínng kó râ lhú?" gâ ri.

## 6

*Byù Ngo Hkyîng Lé Zoshuq Byi Tsô É Hkyô*

*Mht 14:13-21; Mrk 6:30-44; Luk 9:10-17*

<sup>1</sup> Hau htâng a myáng má, Yesuq gi, Tiberi nhông le gâ é, Galile nhông he hpoq shut gû dap lô bê nghut ri.

<sup>2</sup> Haú hkûn, byù ajùm ayò gi, haú nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e lô bum akô nghut ri.

<sup>3</sup> Yesuq gi, bùm shut doq lô mù, Yhâng é chángzô pé eq rahá zung tô ri.

<sup>4</sup> Yudaq byu pê é Lhoqlhai Poí gi, chyâng lo nyi bê nghut ri.

<sup>5</sup> Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo râ muk, nga-nhúng, hkâmá é wó wui râ lhú?" ga taí ri.

<sup>6</sup> Yesuq, haú su ga taí é gi, yhang lé chyam wú râ matú za nghut ri; hkâsu mù gâ le,

† 5:33 Yohan shí yuq gi, Wui-myhup Sará Yohan nghut lhê.

hkâsu kut râ hkyô gi, Yhâng é myit má bo to gù bê nghut ri.

<sup>7</sup> Hpilip gi, Yhang lé, "Denari\* í sho èq muk wui le lhang, rayuq ratsuí tsuí ngap râ a nghut." ga tâ taí ri.

<sup>8</sup> Haú hkûn, Yhâng é chángzo nghut é, Simun Petruq é yhanggu Andre gi, Yhang lé,

<sup>9</sup> "Muk-yo muk ngo long eq ngozo í du wó é yuqgè zo rayuq, shî má nyi ri; nghut kôlhang, byù shî myhô bang lé luq shoq, hkâsu kut wó gâm byi râ lhu?" ga tâ htoq kat ri.

<sup>10</sup> Yesuq gi, "Haú shiwa byu pé lé, zùng nhâng keq." ga tâ ri. Jowò haú gi, mhán htu é jang nghut mù, yuqgè wui baú lhang, ngo hkyîng kô zung tô bùm bekô nghut ri;

<sup>11</sup> hau htâng, Yesuq gi, muk long pé lé yù mù, jeju hkya-on luí, zung tô é bang lé, yhangmoq o é myhó tsing gâm byi ri. Haú eq rajung za, ngozo lé le haú su kut ri.

<sup>12</sup> Yhangmoq banshoq bang zô gyí bùm kô é htâng má Yhang gi, Yhâng é chángzô pé lé, "Myit gyó tô é ajap azo pé lé châng guq tsing yù keq. Haí le a langsâ pyám sháng gaq." ga tâ ri.

<sup>13</sup> Haú mù, yhangmoq gi, zô myhit tô é muk-yo muk ngo long mâ é ajap azo pé lé châng guq tsing le, raxe í mung bying shoq wó guq tsing yu akô nghut ri.

<sup>14</sup> Haú shiwa byu pé gi, Yesuq kut é limik kumlhá lé myàng kô é hkûn, "Shí yuq gi, mingkan htoq má jé lé lô râ gâ é, Myiqhtoi yhang nghut ri-nhung!" ga tâ bum akô.

<sup>15</sup> Yesuq gi, yhangmoq lé mù, Yhang lé hkohkâm zik kut nhâng kó râ dâ é hkyô lé, sê é yanmai, Yhang baú tsik za bùm shut dum haq doq lô bê nghut ri.

*Yesuq, Wui Htoq Má Sô É Hkyô  
Mht 14:22-27; Mrk 6:45-52*

<sup>16</sup> Buigyum htâng, Yhâng é chángzô pé gi, haú nhông shut gyó lô mù,

<sup>17</sup> lhaí má wang ji luí, nhông hé hpoq mâ é Kaperna-um wà shut gû e lô akô; haú hkûn, mauchut bê nghut kôlhang, Yesuq gi, yhangmoq chyáng a jé gyó lo shi nghut ri.

<sup>18</sup> Haú u lé, laidun htan lo é yanmai, wuìlhêng toq lô bê nghut ri.

<sup>19</sup> Yhangmoq gi, sum myi déng kô lhaí kôn e lô kô é hkûn, Yesuq gi, nhông htoq má so luí, haú lhaí shut chyáng lé lo nyi é lé myàng kômù, gyuq dan bùm bekô nghut ri.

<sup>20</sup> Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé tâ ri.

<sup>21</sup> Haú mù, yhangmoq gi, Yesuq lé gabú myit èq lhaí hkaú má shuí hâng yù nau akô. Haú hkûn, lhaí haú gi, radá dâm yhangmoq jé nau é jang wuiyàm má jé bê nghut ri.

<sup>22</sup> Nhông hé hpoq má nyi tô é byù moq mó gi, haú má lhaí racham za joq lai lo é hkyô eq, lhaí haú má Yesuq a bo doq jî e za, chángzô pé baú ji htoq lô kô é hkyô lé, hau htang nyi, bùm sê kat akô nghut ri.

<sup>23</sup> Haú hkûn, haú Yhumsîng, jeju hkya-ôn é htâng, byu pé muk zô é jowò nàm má, Tiberi myuq mâ é lhaí pé jé lé bum ri.

<sup>24</sup> Haú byù moq mó gi, Yesuq eq Yhâng é chángzô pé, haú má a nyi lo kô é hkyô lé sé kô é yanmai, Yesuq lé châng hô râ matú lhaí haú pé má wang ji mù, Kaperna-um wà shut e lô akô nghut ri.

*Yesuq, Asak Muk Nghut É Hkyô*

<sup>25</sup> Yhangmoq gi, nhông hé hpoq má Yesuq lé myàng kôjáng, "Rabai é, Nang gi, shî má hkâ-nhám jé lé é lhu?" ga, Yhang lé myi akô.

<sup>26</sup> Haú hkûn, Yesuq gi, "Ngò, nungmoq lé teng za taí kôlé, nungmoq gi, limik kumlhá pé lé myàng kô é yanmai, Ngo lé hô kô é a nghut, muk gyi shoq myàng zo kô é yanmai sheq, hô kô é ru nghut lhê.

<sup>27</sup> Htên byuq sê é zoshuq é matú, hkâshikut kó; haú Byu Yhangzo byi râ nghut é ahtum abyuq é asak é matú, ru gîng nyi é zoshuq wó yù râ lé sheq shikut nyi keq. Yhâng chyáng gi, haú Îwa Garai Gasang mai Yhâng é saksé dizik tap to bê nghut lhê." ga tâ taí ri.

<sup>28</sup> Haú mù, yhangmoq gi, "Garai Gasang ô nau é muzó pé zui saí râ matú, ngamoq haí kut ra râ lhu?" ga Yhang lé myi akô.

<sup>29</sup> Haú hkûn, Yesuq gi, "Garai Gasang nhang kat é Sû lé, lumjîng é gi, Garai Gasang ô nau é muzó nghut bê." ga tâ taí ri.

\* 6:7 Denari rachap gi, byù rayuq é ra-nyí é zuihpau eq wui é nghut lhê.

30 Haû mù luî, yhangmoq gi, Yhang lé, "Ngamoq myoq eq wó myâng luî, Nàng lé lumjîng râ matú, Nàng, haí jung limik kumlhá kut shit râ lhú? Nàng, haí jung kut shit râ lhú?"

31 Haû Chyúmdang má, 'Yhang gi, yhangmoq zo râ matú, mauhkûng mai muk byî ri.' ✧ ga kê tô é eq rajung za, ngamoq é îchyí îwa pé gi, haû yoso hkaû má mannaq muk zo bekô nghut lhê." ga taí akô.

32 Haú hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkûng mai muk byî é Sû gi, Mosheq a nghut, haû Ngá Wa sheq, nungmoq lé mauhkûng mai tengmán é muk byî é Sû ru nghut lhê.

33 Hkâsu mù gâ le, Garai Gasang byî é muk gi, mauhkûng mai gyó lé luî, haû mingkan lé asak byî é Sû nghut lhê." ga taí ri.

34 Yhangmoq gi, "Yhumsîng ê, ahkuî mai, ngamoq lé muk haû hkâ-nhám le byî nyi laq." ga chôm taí bum akô.

35 Haû mù, Yesuq taí kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zòmut é hui râ a nghut; Ngo lé lumjîng é sù le, hkâ-nhám le wuîshit é hui râ a nghut.

36 Nghut kôlhang, Ngò, nungmoq lé taí wú bê eq rajung za, nungmoq gi, Ngo lé myang wú é nghut kôlhang, a lumjîng shi kó nghut ri.

37 Haû Îwa mai Ngo lé ap byî tô é byù lunglhang bang gi, Ngá chyáng lé kó râ nghut luî, Ngá chyáng lé é sù ó yuq lé le, Ngò gi, hkâ-nhám lé hkat htoq pyám râ a nghut.

38 Hkâsu mù gâ le, Ngò, mauhkûng mai gyó lé é gi, Ngò ô nau é hkyô lé kut râ matú a nghut e za, Ngo lé nhang kat Sû ô nau é hkyô lé kut râ matú ru nghut lhê.

39 Haû Ngo lé nhang kat Sû ô nau é hkyô gi, Yhang mai Ngo lé ap byî tô é bang mâ é rayuq lé lhang, Ngò, a lhoq hpyuq pyâm e za, jihtûm buinyi má yhangmoq lé dum lhoq dui toq yû râ matú ru nghut lhê.

40 Hkâsu mù gâ le, Ngá Wa ô nau é hkyô gi, haû Zo lé wú mù, Yhang lé lumjîng é sù yuq hkangmó, ahtum abyuq é asak lé wó yû râ matú nghut lhê; Ngò le, jihtûm buinyi

má haú bang lé lhoq dui toq râ nghut lhê." gâ ri.

41 Haû mù, "Ngò gi, mauhkûng mai gyó lé é muk nghut lhê." ga, Yesuq taí é yanmai, Yhang eq séng luî, Yudaq byu pé taí put kô é gi,

42 "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lhú? Haû sù é nhîng, ahkuî, 'Ngò gi, mauhkûng mai gyó lé é nghut lhê.' ga, Yhang hkâsu kut wó taí lhê lhú?" gâ bum akô.

43 Haú hkûn, Yesuq gi, "Nungmoq ahkaû má hkâtaí put nyi kó.

44 Haû Ngo lé nhang kat é sù Îwa mai shuî jé é sù za a nghut jáng, ó yuq le Ngá chyáng wó jé lé râ a nghut; jé lé é sù lé gi, jihtûm buinyi má, Ngò lhoq dui toq râ nghut lhê.

45 Myiqhtoi laiká pé má, 'Yhangmoq lunglhang bang gi, Garai Gasâng eq mhoq byî é hui kó râ nghut lhê.' ✧ ga kê tô é eq rajung za, haû Îwâ chyáng mai gyo yù, mhoq yu é bang yuq hkangmó gi, Ngá chyáng lé kó râ nghut lhê.

46 Haû gi, rayuq yuq mai, haû Îwa lé myang wú bê nghû nau é a nghut; Garai Gasâng chyáng mâ é Sû za sheq, haû Îwa lé myang wú é Sû nghut lhê.

47 Ngò, nungmoq lé teng za taí kôlé, lumjîng é sù gi, ahtum abyuq é asak wó lhê.

48 Ngò gi, asak muk nghut lhê.

49 Nungmoq é îchyí îwâ pé gi, haû yoso hkaû má mannaq muk zo bekô nghut lhê; nghut kôle, shi byuq bekô nghut ri.

50 Nghut kôlhang, shî gi, mauhkûng mai gyó lé lo é muk nghut lhê; haû lé zô é sù gi, a shî lo râ nghut lhê.

51 Ngò gi, mauhkûng mai gyó lé lo é, haû asak dui é muk nghut lhê; rayuq yuq, muk shî lé zô é nghut le gi, ahtum abyuq dui nyi râ nghut lhê; muk shî gi, mingkan zô wui é asak matú, Ngò byi râ nghut é Ngá gungsho nghut lhê." ga tû taí ri.

52 Haû mù, haû Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso râ lhú?" ga, yhangmoq yhangchang dang htíng htíng lhûm bum akô.

53 Haú hkûn, Yesuq gi, yhangmoq lé, "Ngò, nungmoq lé teng za taí kôlé, haú Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó râ a nghut.

54 Ngá é gungsho lé zô é eq Ngá é sui lé shuq é sù, ó yuq nghut kôle, ahtum abyuq é asak wó é nghut lhê; Ngò gi, jhtúm buinyi má, haú yuq lé lhoq dui toq yû râ nghut lhê.

55 Hkâsu mù gâ le, Ngá é gungsho gi, zojung yhang nghut lhê; Ngá é sui gi, shujjung yhang nghut lhê.

56 Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyi luí, Ngò le haú yuq má nghut nyi bê nghut lhê.

57 Haú rû dui nyi é Îwa gi, Ngo lé nhang kat luí, Ngò gi, haú Îwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi râ nghut lhê.

58 Shî gi, mauhkûng mai gyó lé lo é muk nghut lhê. Nungmoq é îchyí îwâ pé gi, mannaq muk zo kôle, shi byuq bekô nghut ri; nghut kôlhang, muk shî lé zô é sù gi, ahtum abyuq dui nyi râ nghut lhê." ga taí ri.

59 Dang haú pé gi, Yesuq, Kaperna-um wà mâ é tarajong má mhoqshit nyi é u lé, taí é dang nghut ri.

### *Chángzô Pé Myo Myo, Yesuq Lé Kâng Pyâm To Kô É Hkyô*

60 Yhâng é chángzô pé myo myo gi, haú lé wó gyo kôjáng, "Dang shî gi, gyai wuî ri. Ó yuq wá wó cháng râ lhú?" ga taí bum akô.

61 Yesuq gi, haú eq séng luí, Yhâng é chángzô pé taí put nyi bùm kô é lé Yhâng é myit má sé luí, yhangmoq lé, "Dang shî é yanmai, nungmoq myit htên bum akô lhú?"

62 Haú Byu Yhangzo gi, Yhang nyi laí lò bê jowò shut taú doq ló é lé, nungmoq myàng kô é nghut le gi, hkâsu nghû kó râ lhú?

63 Haú Woi-nyí gi, asak byi lhê; gungsho kúm gi, haí le a wó dut nghut ri. Nungmoq lé, Ngò taí é dang pé gi, Woi-nyí le nghut lhê, asak le nghut lhê.

64 Nghut kôle, nungmoq chyáng mâ é ram gi, a lumjínng kó nghut ri." ga taí ri. Hkâsu mù gâ le, ô pé gi, a lumjínng kó râ eq,

ó yuq gi, Yhang lé ap pyám râ nghut é hkyô lé, Yesuq gi, sâng-hi mai sê to gù bê nghut ri.

65 Yhang xoq taí é gi, "Haú su mù, haú Îwâ èq ahkáng byi é sù za a nghut le gi, ó yuq le Ngá chyáng wó lé râ a nghut nghû, Ngò, nungmoq lé taí kyo wú bê nghut lhê." gâ ri.

66 Haú dàm mai, Yhâng é chángzô pé myo myo gi, Yhâng htâng a cháng lo kô e za, taú ló byuq bùm bekô nghut ri.

67 Haú su mù, Yesuq gi, haú chángzo raxe í yuq lé, "Nungmoq le, ló byuq nau akô, a nghut lhú?" ga myí ri.

68 Haú hkûn, Simun Petruq gi, "Yhumsíng ê, Nàng gi, ahtum abyuq é asak mungdang wó Sù nghut to bê lé nhíng, ngamoq gi, ó yuq chyáng ê shirâ lhú?"

69 Nàng gi, Garai Gasâng é Chyoiyúng Sù nghut é lé, ngamoq, lumjínng lhê, sê nyi lhê." ga, Yhang lé tû taí ri.

70 Haú hkûn, Yesuq gi, "Nungmoq raxe í yuq lé, Ngò hkyin yù bê a nghut kó lhú? Nghut kôle, nungmoq mâ é rayuq gi, nat nghut ri." ga tû taí ri.

71 (Yhang gi, haú Simun Iskarut é yhangzo, Yudaq lé taí nau é nghut ri; haú yuq gi, chángzo raxe í yuq má bò sù nghut kôle, htâng má, Yhang lé ap pyám râ sù nghut ri.)

## 7

### *Yesuq Eq Yhâng É Gumang Wuî*

1 Hau htâng má, Yesuq gi, Yhang lé sat râ matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri.

2 Nghut kôlhang, haú Yudaq byu pé é Saksé Zúm Poí chyâng lo nyi é hkûn,

3 Yesuq é yhanggu yuqzô pé gi, Yhang lé, "Náng é chángzô pé gi, Nàng kut é laklaí kumlhá pé lé myàng kó sháng gaq, Nàng, shî mai htoq ló luí, Yuda mau shut e ló aq.

4 Myíng hu nau é sù gi, hkaú zaú luí haí le a kut wú é nghut lhê. Nàng gi, haú pé lé kut nyi bê nghut é yanmai, mingkan lé, Náng gûng tún shit aq." ga taí akô.

5 Hkâsu mù gâ le, yhanggu síng yuqzô pé lháng, Yhang lé a lumjínng kó nghut ri.

<sup>6</sup> Haû mù luí, Yesuq gi, yhangmoq lé, "Ngá é ahkyíng gi, a jé shí nghut ri; nungmoq é ahkyíng kúm gi, hká hkûn le joq nyi ri.

<sup>7</sup> Haû mingkan gi, nungmoq lé a jú a wó kut kó nghut ri; nghut kôlhang, Ngo lé gi, a jú kó; haî mù gâ le, yhang kut é hkyô gi, agè ashop é nghut é lé, Ngò, saksé tân shit é yanmai nghut ri.

<sup>8</sup> Nungmoq gi, poí haú shut doq ló keq. Ngò kúm gi, Ngá é ahkyíng a jé shí nghut é yanmai, poí haú shut a doq ló shirâ nghut lhê." ga taí ri.

<sup>9</sup> Haû su ga taí luí, Yhang gi, Galile mau má nyi gyó to bê nghut ri.

<sup>10</sup> Nghut kôlhang, Yhang gu pé, haû poí shut doq ló byuq é htâng má, Yhang gi, de de a nghut é dông, tsik za châng doq ló bê nghut ri.

<sup>11</sup> Yudaq byu pé gi, haû poí má, Yhang lé châng hô kômù, "Haú yuq gi, hkâmá nghut lhê lhú?" ga, myi wún akô nghut ri.

<sup>12</sup> Haû byù hpûng hkaû má, Yhang eq séng luí taí lhùm bùm kô é má, ra-am gi, "Yhang gi, byù gè nghut ri." ga taí kôjáng, ra-am gi, "A nghut, Yhang gi, byu pé lé hkyô shuí ngoq sù nghut ri." ga tú taí akô.

<sup>13</sup> Nghut kôlhang, haû Yudaq suwún wuî lé gyuq kô é yanmai, ó yuq le, Yhang eq séng é hkyô lé de de a wám taí kó nghut ri.

#### *Haû Poí Má, Yesuq Mhoqshit É Hkyô*

<sup>14</sup> Haû poí rawuî nghut ló é hkûn, Yesuq gi, noqkuq yhùm má doq ê luí, mhoqshit hí ló bê nghut ri.

<sup>15</sup> Haú hkûn, Yudaq byu pé gi, gyô mau byuq kômù, "Shí yuq gi, mhoq yu é hkyô le a joq wú é wá, haû-í hkâsu mù sê lhê laq?" ga myi bum akô.

<sup>16</sup> Haû mù, Yesuq tú taí é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê.

<sup>17</sup> Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasang chyáng má é nghut a nghut é eq, Ngá é myit dông taí é dang nghut a nghut é lé, yhang sê gàm hkoq yú râ nghut lhê.

<sup>18</sup> Yhumsing é myit dông taí é sù gi, yhumsing é matú aróng hô sù nghut ri; nghut kôlhang, yhumsing lé nhang kat su

é matú, aróng ho é sù gi, tengmán é byù nghut ri; yhang má, a tengmán é hkyô haî le a bò nghut ri.

<sup>19</sup> Mosheq gi, nungmoq lé jep é tarâ byí to bê, a nghut kó lhú? Nghut kôlhang, nungmoq ó yuq le, jep é tarâ haû lé a châng kó nghut ri. Haî mù luí, Ngo lé sat nau nyi akô lhú?" gâ ri.

<sup>20</sup> Haú hkûn, haû byù hpûng gi, "Nàng gi, nat gang wang to sù nghut ri-nhung! Nang lé, ó yuq wá sat nau nyi ri lhú?" ga tú taí akô.

<sup>21</sup> Yesuq gi, yhangmoq lé, "Ngò, laklaí kumlhá ralhùm kut jáng, nungmoq ban-shoq bang gi, mau byuq bum akô.

<sup>22</sup> Nghut kôlhang, nungmoq gi, ahpyo-kuq hpyit byí é hkyô lé, Mosheq byí é nghut lhê ga luí, Bánno buinyì má, zoshâng lé ahpyo-kuq hpyit byí akô (gè gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchýí îwâ pê chyáng mai lo é ru nghut lhê.).

<sup>23</sup> Haû, Mosheq é jep é tarâ lé a lhoq htên pyám sháng gaq nghû, Bánno buinyì má, zoshâng lé ahpyo-kuq hpyit byí é nghut le gi, haî mù luí, Bánno buinyì má, byù rayuq é gùng gón lé, Ngò lhoq gè byí é yanmai, Ngo lé nhikjum yô akô lhú?

<sup>24</sup> Byù du lé wú luí hkâjéyáng kó; tengmán é dông sheq jéyáng keq." ga taí ri.

#### *Yesuq Gi, Hkrisduq Nghut Lhê Lhú?*

<sup>25</sup> Haû mù luí, Yerusalem wà mó mâ é byu pé ra-am gi, "Haû yhangmoq sat pyám nau nyi é sù gi, shí yuq a nghut lhi?

<sup>26</sup> Yhang gi, shí má de de dáng nyo nyi le, yhangmoq gi, Yhang lé, haî le a ga kó myihin-hung! Yhang gi, Hkrisduq nghut lhê ga, haû ahkáng ayá wó bang gi, gè gè yhang, sê akô abe?

<sup>27</sup> Haû Hkrisduq jé lé é hkûn gi, Yhang hkâmai lé lo é lé, ó yuq lhang sé râ a nghut." ga taí bum akô. Nghut kôlhang, shí yuq gi, hkâmá é sù nghut é lé, nga-nhung sê lhê;

<sup>28</sup> Haû mù, Yesuq gi, noqkuq yhùm wàng má mhoqshit uchyang, htê mó èq taí kat é gi, "Nungmoq gi, Ngo lé sê é htoq agó, Ngò, hkâmai lé é sù nghut é lé le, sê akô nghut ri. Ngò gi, Ngá myit dông shí má lé nyi tô é sù a nghut kôlhang, Ngo lé nhang kat é Sù

gi, tengmán lhê; nungmoq gi, Yhang lé a sé kôlhang,

<sup>29</sup> Ngò gi, Yhang lé sê lhê; hkâsu mù gà le, Ngò gi, Yhâng chyáng mai lé é sù eq Yhang mai nhang kat é sù nghut lhê." gà ri.

<sup>30</sup> Haû mù, yhangmoq gi, Yhang lé chyup râ dô akô; nghut kôlhang, Yhâng é ahkyíng a jé shi é yanmai, Yhang lé chyup râ matú, ó yuq le loq a jé kó nghut ri.

<sup>31</sup> Nghut kôlhang, byù hpûng hkaû mâ é bang myo myo gi, Yhang lé lumjíng bûm kôluí, "Haû Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit râ lú?" ga taí bum akô nghut ri.

<sup>32</sup> Haû Hparishe pé gi, haû byù hpûng hkaû má, Yesuq eq sêng é hkyô lé, haû su ga dangsoq soq lhûm nyi kô é hkyô lé wó gyô yu akô. Haû mù, haû hkyangjong agyi pé eq Hparishe pé gi, Yhang lé é chyup râ matú, noqkuq yhûm zúng é bang lé nhang kat akô.

<sup>33</sup> Haû hkûn, Yesuq gi, "Ngò gi, nungmoq eq rahá rayoq zo za nyi râ nghut lhê; hau htâng, Ngo lé nhang kat Su chyáng taû lô râ nghut lhê.

<sup>34</sup> Haû hkûn, nungmoq gi, Ngo lé hô kôlhang, myang hô kó râ a nghut; Ngò nyi é jang má, nungmoq wó jé kó râ a nghut." ga taí ri.

<sup>35</sup> Hau é yanmai, Yudaq byu pé, rayuq eq rayuq taí lhum kô é gi, "Shí yuq gi, Yhang lé nga-nhúng a myang hô loshoq, hká shut e byuq râ dô lhê lú? Yhang gi, Grik byu pé má nyi byo myín tô é nga-nhúng é byu pé nyi é jowò má é mù, Grik byu pé lé, é mhogshit râ dô lhê lú?"

<sup>36</sup> 'Nungmoq gi, Ngo lé hô kôlhang, myang hô kó râ a nghut.' gà é eq, 'Ngò nyi é jang má, nungmoq wó jé kó râ a nghut.' gà é, Yhang taí é dang gi, haí jung wá gá naû é nghut lhê lú?" gà akô.

<sup>37</sup> Haû lô htâng é eq je ahkyak é Poí buinyi má, Yesuq toq yap luí, htê mó eq taí é gi, "Wuì shit sù gi, Ngá chyáng lé mù, shuq sháng gaq.

<sup>38</sup> Ngo lé lumjíng é sù ó yuq nghut kôle, haû Chyúmdang má taí tô é eq rajung za, 'Yhâng chyáng mai asak uchyâm é wuìlàng yui htoq lô râ nghut lhê.'" gà ri.

<sup>39</sup> Yhang haû su gà é gi, Yhang lé lumjíng é bang myang hap yù râ nghut é, haû Woi-nyí lé taí é nghut ri. Haû hkûn jé shoq, haû Woi-nyí lé a byi kat shi nghut ri. Hkâsu mù gà le, Yesuq gi, hpungwup shingkang dan hû é a hui nhâng shi é yanmai nghut ri.

<sup>40</sup> Yhâng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haû nghut ri." ga taí akô.

<sup>41</sup> Ra-am gi, "Shí yuq gi, Hkrisduq nghut ri." ga taí akô. Góbang nghut jáng, "Hkrisduq wá Galile mau mai htoq lé râ nghut lhê lú?"

<sup>42</sup> Haû Chyúmdang má, Hkrisduq gi, Dawiq é awut ashín mâ é nghut luí, Dawiq nyi laí lo é Betlehem wá mai htoq lô râ nghut lhê gà é, a nghut lú?" ga myí bum akô nghut ri.

<sup>43</sup> Haû mù luí, Yesuq é yanmai, shiwa byu pé gi, gàm hkoq lò byuq bekô nghut ri.

<sup>44</sup> Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

### *Yudaq Byu Pé Lé Shuí U É Bang A Lumjíng Kô É Hkyô*

<sup>45</sup> Hau htâng má, haû noqkuq yhûm zúng bang gi, haû hkyangjong agyi pé eq Hparishe pé chyáng taû lô kô é hkûn, haû bang gi, yhangmoq lé, "Nungmoq, haí mù luí, Yhang lé a shuí lo kô é lú?" ga lhom myí akô.

<sup>46</sup> Haû hkûn, haû noqkuq yhûm zúng bang gi, "Shí yuq su ga taí é byù gi, ó le a nyi wú é nghut lhê." ga taí kyô akô.

<sup>47</sup> Haû mù, haû Hparishe pé gi, "Nungmoq lé le, Yhang eq mhoq hpyoq yù bekô lú?"

<sup>48</sup> Haû zaú wui chyáng le, Hparishe pé chyáng le, Yhang lé lumjíng é byù bò akô lú?"

<sup>49</sup> A bò! Nghut kôlhang, haû jep é tarâ lé a sê é byù moq mó shí gi, nhing pyâm é hui bekô nghut ri." ga nhik-yô é dông tú taí kat akô nghut ri.

<sup>50</sup> Nghut kôlhang, yhangmoq hpúng má bo é, hí hkûn Yesuq chyáng e wú bê sù nghut é, Nikodimu gi,

<sup>51</sup> "Nga-nhúng é tarâ gi, byù rayuq lé, yhâng é dang hí a gyô wú é eq, yhang haí kut é lé a sê e za, mara byi lhê lú?" ga, yhangmoq lé myí ri.

<sup>52</sup> Haú hkûn, yhangmoq gi, "Nàng le, Galile mau byù nghut lhê lú? Galile mau mai myiqhtoí rayuq lhang a htoq é hkyô lé, nàng gon wú aq, haú jang sé râ nghut lhê." ga tũ taí akô.

<sup>53</sup> Hau htâng, yuq hkgámó gi, ó le ô yhûm shut taú ló byuq bùm bekô nghut ri.\*

## 8

### *Yesuq Lé, Lé Myí Chyam Wú Kô É Hkyô*

<sup>1</sup> Yesuq kúm gi, Tsanlun Bùm shut e ló bê nghut ri.

<sup>2</sup> Htang napkyó napsûn noq le, Yesuq gi, noqkuq yhûm wàng hkaú má dum ê luí, byu pé lhunglhang gi, Yhâng é lhungkyuq má lé zîng bum akô; haú mù, Yhang gi, zung to luí, yhangmoq lé mhoqshit ri.

<sup>3</sup> Haú hkûn, haú tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gûng má shap to kôluí,

<sup>4</sup> Yesuq lé, "Sarâ ê, myiwe myhí shí lé, sulàng shut nyi é má myang chyup yu é nghut lhê.

<sup>5</sup> Haú Mosheq é tarâ má gi, shí su é myiwe lé, luqgok eq dú sat pyám keq ga, nga-nhúng lé hkunmó hkyô tô ri. Ahkuí, Nàng gi, hkâsu nghú râ lú?" ga myí akô.

<sup>6</sup> Yhangmoq haú su ga myí é hkyô gi, Yhang lé mara wó hûn shoq ga, chyam wú râ matú nghut ri.

Nghut kôlhang, Yesuq gi, ngóm mù, myigùng má loqnyhuí eq htaú kâ nyi ri.

<sup>7</sup> Yhang lé, yhangmoq ru jang myí nyi kô é hkûn, Yhang gi, yap nyhang kat mù, yhangmoq lé, "Nungmoq má é mara a wó é sũ hí, myiwe myhí shí yuq lé luqgok eq dú sháng gaq." ga taí ri.

<sup>8</sup> Hau htâng, Yhang gi, dum ngóm luí, myigùng má kâ nyi ri.

<sup>9</sup> Yhangmoq gi, haú su gâ é lé wó gyo kôjáng, je mang bang mai hí luí, rayuq htâng rayuq ló byuq bekô nghut luí, Yesuq baú za myit gyó tô é eq, myiwe myhí haú jâng yap nân tô ri.

<sup>10</sup> Yesuq gi, yap nyhang kat luí, yhang lé, "Myiwe myhí ê, yhangmoq hká ló bekô

lú? Ó yuq eq le, nàng lé mara a byi kó lú?" ga myí ri.

<sup>11</sup> Yhang gi, "Yhumsîng ê, ó yuq le mara a byi kó nghut ri." ga tũ taí ri.

Haú hkûn, Yesuq gi, "Ngò le, nàng lé mara a byi, ló aq hkoí, ahkuí mai mara hkâdum kut shut lo." ga taí kat ri.

### *Yesuq, Mingkân É Maubó*

<sup>12</sup> Yesuq gi, shiwa byu pé lé dum nyo é hkûn, "Ngò gi, mingkân é maubó nghut lhê; Ngá htâng châng é sũ ó yuq nghut kôle, mauchut hkaú má hkâ-nhám le so râ a nghut, asak maubó lé wó râ nghut lhê." ga taí ri.

<sup>13</sup> Haú mù, haú Hparishe pé gi, "Wú aq, Nàng gûng Nàng saksé hkâm yu é nghut ri; Nàng é saksé gi, teng râ a nghut." ga taí akô.

<sup>14</sup> Haú hkûn, Yesuq gi, "Ngá gûng Ngò saksé hkâm kôlhang, Ngá é saksé gi, têng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri.

<sup>15</sup> Nungmoq gi, byù hkyam dông za jéyáng akô; Ngò gi, ó yuq lé le a jéyáng é nghut lhê.

<sup>16</sup> Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gâ le, Ngò gi, Ngò baú a nghut, haú Ngo lé nhang kat é sũ Íwa eq rahá nghut nyi lhê.

<sup>17</sup> Haú nungmoq é tarâ má yhang le, í yuq mai hkâm é saksé gi, têng lhê ga kâ tô ri.

<sup>18</sup> Ngò gi, Ngá é matú saksé hkâm yù sũ nghut lhê; hau htoq agó, haú Ngo lé nhang kat é sũ Íwa le, Ngá é matú saksé hkâm byí é nghut lhê." ga tũ taí ri.

<sup>19</sup> Haú mù, yhangmoq gi, Yhang lé, "Náng Wa gi, hkâmá lú?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kô é nghut le gi, Ngá Wa lé le, sé kó râ nghut lhê." ga tũ taí ri.

<sup>20</sup> Dang haú pé gi, haú noqkuq yhûm wàng hkaú má é alu kat jang nâm má, Yhang mhoqshit nyi é u lé taí é dang nghut ri. Nghut kôlhang, Yhang lé, ó yuq le a

\* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

chyup kó; hkâsu mù gâ le, Yhâng é ahkyíng a jé shi é yanmai nghut ri.

21 Haû mù luí, Yesuq gi, yhangmoq lé, "Ngò gi, ló byuq râ nghut lhê, haú hkûn, nungmoq Ngo lé hô kó râ, yhumsing é mara má le shî kó râ nghut lhê. Ngò ló é jang má, nungmoq wó jé kó râ a nghut." ga, radàm dum puq taí ri.

22 Hau é yanmai, haû Yudaq byu pé gi, "'Ngò ló é jang má, nungmoq wó jé kó râ a nghut.' gâ é gi, Yhânggùng yhang sat shî râ gâ é nghut lhê lú?" ga myi bum akô.

23 Nghut kôhang, Yesuq xox taí é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shî eq sêng é bang nghut akô; Ngò kúm gi, mingkan shî eq sêng é sù a nghut.

24 Haû mù, nungmoq gi, yhumsing é mara má shî kó râ nghut lhê nghû, Ngò taí é nghut lhê. Ngò gi, haú Yuq nghut lhê nghû taí é lé, nungmoq a lumjíng kô é nghut jáng, nungmoq gi, gè gè yhang, yhumsing é mara má shî kó râ nghut lhê." gâ ri.

25 Haú hkûn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le taí nyi bê nghut lhê.

26 Ngò gi, nungmoq eq séng luí, taí râ hkyô eq jéyáng râ hkyô, myo myo joq lhê. Nghut kôhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyô yu é gû lé, Ngò, mingkan lé taí kyô lhê." ga tû taí ri.

27 Yesuq gi, yhangmoq lé, Yhâng Wa eq séng é hkyô taí kyô nyi é lé, yhangmoq gi, a sê gyo kó nghut ri.

28 Haû mù luí, Yesuq gi, "Haû Byu Yhangzo lé nungmoq tu shap\* kat é hkûn sheq, Ngò gi, haú Yuq nghut é hkyô lé le, yhumsing myit dông haí le a kut e za, haú Íwa mhoq byí é dông za taí é hkyô lé le, nungmoq sé kó râ nghut lhê.

29 Haû Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit gôn nhang é hkyô chyat kut é yanmai, Yhang gi, Ngo lé baú za a tô pyâm to nghut ri." ga taí ri.

30 Yhang, haû su taí nyi é u lé lhang, byu myo myo gi, Yhang lé lumjíng bùm bekô nghut ri.

### *Abraham É Awut Ashín Pé Hkyô*

31 Haû mù, Yesuq gi, Yhang lé lumjíng é Yudaq byu pé lé, "Ngò mhoqshit é hkyô lé châng kut nyi bekô nghut jáng, nungmoq gi, gè gè yhang, Ngá é chángzô pé nghut bekô.

32 Nungmoq gi, haû tengmán hkyô lé sé kó râ nghut luí, haû tengmán hkyô gi, nungmoq lé lhoq lhut kat râ nghut lhê." ga taí ri.

33 Haú hkûn, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haû mù, 'nungmoq lé lhoq lhut kat râ' nghû Nàng hkâsu kut wó taí lhê lú?" ga tû taí akô.

34 Yesuq dum tû taí é gi, "Ngò, nungmoq lé teng za taí kôlé, mara kut shut é sù gi, mará é jùn nghut lhê.

35 Jùn gi, yhúm ikun eq hkâ-nhám le séng nyi râ a nghut; zo kúm gi, ikun eq ahtum abyuq séng lhê.

36 Haû mù luí, haû Zo gi, nungmoq lé lhoq lhut kat é nghut jáng, nungmoq gi, gè gè yhang, lut berá nghut lhê.

37 Nungmoq gi, Abraham é awut ashín pé nghut é lé, Ngò sê lhê. Nghut kôhang, nungmoq gi, Ngá é dang lé a lhom yù kô é yanmai, Ngo lé sat râ dâ akô nghut ri.

38 Ngò gi, Ngá Wâ chyáng mai myang yu é eq rajung za, nungmoq lé taí kyô nyi lhê; nungmoq le, nungmoq é íwa chyáng mai wó gyô yu é eq rajung za kut nyi akô nghut ri." gâ ri.

39 Haú hkûn, yhangmoq gi, "Ngamoq é íwa gi, Abraham nghut lhê." ga tû taí kôjáng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó râ nghut lhê.

40 Nghut kôhang, nungmoq gi, haû Garai Gasâng chyáng mai wó gyô yu é tengmán hkyô lé taí kyo sù nghut é Ngo lé, sat pyám nau akô nghut ri. Haû sù é hkyô gi, Abraham a kut é nghut lhê.

41 Nungmoq gi, nungmoq é íwa kut é muzó lé yhang, kut nyi akô." ga taí ri.

\* 8:28 Tu shap gâ é lichyúm gi, tapzìng htoq má jén sat pyám râ gâ é nghut lhê.



Haú hkûn, yhangmoq gi, "Ngamoq gi, dezo amyû a nghut; ngamoq gi, Íwa rayuq za wó lhê; haú gi, Garai Gasang nghut lhê." ga taí he akô nghut ri.

### *Zô Wui É A-kyang Gi, Mó Ó Nghut É Hkyô Shit*

<sup>42</sup> Yesuq gi, yhangmoq lé, "Garai Gasang gi, nungmoq é Íwa nghut é nghut jáng, nungmoq gi, Ngo lé chyttdap kó râ nghut lhê; hkâsu mù gâ le, Ngò gi, Garai Gasang chyáng mai lé jé luí, ahkuí, shí má nyi tô é nghut lhê. Ngò gi, Ngá myit dông lé lo é a nghut, Yhang sheq Ngo lé nhang kat é ru nghut lhê.

<sup>43</sup> Nungmoq gi, haí mù Ngá é dang lé a sê gyo kô é lhú gâ le, Ngò taí é dang lé, nungmoq a wó lhom yù kô é yanmai nghut ri.

<sup>44</sup> Nungmoq gi, haú nungmoq é íwa nghut é nat Tsadán eq sêng é bang nghut luí, nungmoq é íwa ô nau é hkyô lé kut nau bum akô. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haú tengmán hkyô má a yap gíng nyi nghut ri. Yhang gi, mhaú é hkûn, yhâng é myit má bo é dông taí ri; hkâsu mù gâ le, Yhang gi, byù mhaú nghut luí, mhaú hkyô pê é íwa nghut ri.

<sup>45</sup> Haú su mù, Ngò, nungmoq lé, haú tengmán hkyô taí kyô é yanmai, nungmoq gi, Ngo lé a lumjínng kó nghut ri.

<sup>46</sup> Nungmoq mâ é ó yuq wá, Ngo lé mara bo lhê nghû saksé wó tân shit akô lhú? Ngò gi, haú tengmán hkyô lé taí nyi é nghut le nhíng, nungmoq, Ngo lé haí mù a lumjínng kô é lhú?

<sup>47</sup> Garai Gasang eq sêng é sù gi, Garai Gasang taí é dang lé gyô lhê. Nungmoq a gyo kô é gi, nungmoq, Garai Gasang eq a séng kô é yanmai nghut ri." ga taí ri.

### *Yesuq Eq Abraham*

<sup>48</sup> Haú hkûn, haú Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghû, ngamoq taí é dang gi, jô lhê a nghut lhú?" ga myí akô.

<sup>49</sup> Yesuq gi, "Ngò gi, nat gang wang júng é hui sù a nghut; Ngò gi, Ngá Wa lé sheq

hkunggâ é ru nghut lhê; nungmoq kúm gi, Ngo lé taí hpoí nyi akô nghut ri.

<sup>50</sup> Ngò gi, Ngá é matú aróng ho nyi é a nghut; nghut kôlhang, hô byi Sù rayuq nyi lhê, haú yuq jéyáng sháng gaq.

<sup>51</sup> Ngò, nungmoq lé teng za taí kôlé, Ngá dang lé châng é sù gi, hkâ-nhám le, shí rá a nghut." ga taí ri.

<sup>52</sup> Hau é yanmai, haú Yudaq byu pé gi, "Nàng gi, nat gang wang júng to sù nghut é lé, ahkuí, ngamoq sé bê! Abraham gi, shi byuq bê; haú myiqhtoí pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shí rá a nghut.' ga taí ri.

<sup>53</sup> Nàng gi, ngamoq é íwa Abraham htoq hkik lhê lhú? Yhang gi, shi byuq bê; haú myiqhtoí pé le, shi byuq bekô nghut ri. Náng gûng nàng ó yuq su ngàm lhê lhú?" ga taí akô.

<sup>54</sup> Yesuq gi, "Ngá gûng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haú nungmoq é Garai Gasang nghut lhê ga nungmoq taí é sù, Ngá Wa gi, Ngo lé lhoq gyaú é sù ru nghut lhê.

<sup>55</sup> Nungmoq gi, Yhang lé a sé kó nghut ri; nghut kôlhang, Ngò gi, sê lhê. Yhang lé a sé nghû Ngò taí é ru nghut le gi, Ngò le nungmoq su byù mhaú dut râ nghut lhê; nghut kôlhang, Ngò gi, Yhang lé sé luí, Yhâng é dang gyo sù nghut lhê.

<sup>56</sup> Nungmoq é íwa Abraham gi, Ngo lé râ buinyi lé myoqbyu gabú nyi é nghut luí, myàng mù, gabú bê nghut ri." ga tú taí ri.

<sup>57</sup> Haú hkûn, haú Yudaq byu pé gi, Yhang lé, "Nàng gi, asak ngo xê zàn lháng a nghut shí é nhíng, Abraham lé myàng wú é nghut lhê lhú?" ga taí akô.

<sup>58</sup> Yesuq gi, "Ngò, nungmoq lé teng za taí kôlé, Abraham lháng a hkû shi má, Ngò nyi gù bê nghut lhê."\* ga tú taí ri.†

<sup>59</sup> Haú mù luí, yhangmoq gi, Yesuq lé, dú râ ga luqgok kui yu akô; nghut kôlhang, Yesuq gi, haú noqquq yhûm mai haq htoq ló byuq bê nghut ri.

\* 8:58 Htoq Ló 3:14 † 8:58 Bun zo shí má, Yesuq gi, Yhânggùng yhang Garai Gasang nghut lhê gâ nyi nghut ri.

## 9

*Myoqjit Sû Lé Lhoq Gê Byî É Hkyô*

<sup>1</sup> Yesuq gi, sô yông ló nyi é u lé, hku lé é mai myoqjit to gû nghut é byù rayuq lé myang ri.

<sup>2</sup> Haú hkûn, Yhâng é chángzô pé gi, Yhang lé, "Rabai ê, shí yuq, myoqjit gû hku lé é gi, ó yuq kut shut é yubak é yanmai nghut lhê lhú? Yhang kut shut é lhú? A nghut jáng, yhâng nu yhâng wa kut shut é lhú?" ga myî akô.

<sup>3</sup> Yesuq tû taí é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasâng é muzó lé, yhang má wó lhoq htoq shit râ matú, haú dut é ru nghut lhê.

<sup>4</sup> Nga-nhúng gi, haú Ngo lé nhang kat Su é muzó lé, nyí nghut tô ashí hkûn, zui saí nyi ra râ dut lhê; myín jé jáng gi, ó yuq le, mú wó zui saí râ a nghut.

<sup>5</sup> Ngò gi, mingkan htoq má nyi tô é u lé, mingkân é maubó nghut lhê." gâ ri.

<sup>6</sup> Yhang gi, haú su ga taí luí, myigùng má sôkan byé hkyó mù, tse-nyhaq saí yù luí, haú yuq é myoqjí má but byî ri.

<sup>7</sup> Hau htâng, haú yuq lé, "Haú Siloam wuhtum má ê chí pyám aq." ga taí ri. (Siloam gâ é gi, nhang é gâ é lichyúm nghut lhê.). Haú mù, haú yuq gi, ê chí mù, myoq myàng luí, yhùm shut ló bê nghut ri.

<sup>8</sup> Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó lhú?" ga myî bum akô.

<sup>9</sup> Ra-am gi, "Haú yuq nghut lhê." gâ bum akô.

Góbang gi, "A nghut, haú yuq su dut e za ru nghut lhê." ga taí akô.

Nghut kôlhang, yhang gi, "Ngò, haú yuq yhang nghut lhê." ga taí ri.

<sup>10</sup> Haú hkûn, yhangmoq gi, "Haú nghut le gi, náng myoq hkâsu kut wó myang é lhú?" ga myî akô.

<sup>11</sup> Yhang gi, "Haú Yesuq gâ é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuhtum má ê chí pyám aq.' ga ngo lé taí ri; haú mù, ngò ê chí pyâm é htâng má, ngá myoq wó myang é nghut lhê." ga tû taí ri.

<sup>12</sup> Haú hkûn, yhangmoq gi, "Byù haú yuq gi, hkâmá nyi ri lhú?" ga, yhang lé myî akô. Yhang gi, "Ngò a sé." ga taí ri.

*Myoq Dum Myang Byuq É Hkyô Lé, Hparishe Pé Gôn Wú É Hkyô*

<sup>13</sup> Yhangmoq gi, haú myoqjit wú bê sù lé, Hparishe pé chyáng shuí lé akô.

<sup>14</sup> Yesuq, tse-nyhaq saí yù mù, haú yuq é myoq lé lhoq myâng byî é buinyi gi, Bánno buinyi nghut ri.

<sup>15</sup> Haú mù, yhang, myoq hkâsu kut wó myang é hkyô lé, haú Hparishe pé le dum myî akô. Haú jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, ê chí pyám jáng, ngá myoq myàng bê nghut lhê." ga tû taí ri.

<sup>16</sup> Haú Hparishe pé ra-am gi, "Shí yuq gi, Bánno buinyi é tará lé a châng é sù nghut é yanmai, Garai Gasâng chyáng mai lé é sù a nghut." ga taí akô.

Nghut kôlhang, ra-am gi, "Yubak dap sù rayuq gi, haú su é limik kumlhá pé lé, hkâsu wó kut htoq râ lhú?" ga myî akô. Haú mù, yhangmoq gi, myit a huí lhùm bùm lò kó nghut ri.

<sup>17</sup> Haú mù, yhangmoq gi, haú myoqjit wú sù shut lhíng mù, "Nang lé myoq lhoq myâng byî é sù gi, hkasú é byù nghut lhê nghú, nàng taí râ lhú?" ga dum myi kôjáng, "Yhang gi, myiqhtoi rayuq nghut ri." ga, yhang tû taí ri.

<sup>18</sup> Haú Yudaq byu pé gi, haú yuq myoqjit wú é hkyô lé le, ahkuí myoq dum myàng bê nghut é hkyô lé le, haú yhâng nu eq yhâng wa lé, ê ji lò nhang é hkûn jé shoq, a lumjínng kó nghut ri.

<sup>19</sup> Haú mù, Yhangmoq gi, haú yhâng nu eq yhâng wa lé, "Shí yuq gi, nungnhik é yhangzo nghut lhê lhú? Hku lé é hkûn mai, myoqjit gù nghut lhê lhú? Yhang, ahkuí, hkâsu kut wó myang é lhú?" ga myî akô.

<sup>20</sup> Haú hkûn, yhâng nu eq yhâng wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê.

<sup>21</sup> Nghut kôlhang, yhang, ahkuí hkâsu kut wó myang é hkyô lé le, yhâng é myoq lé ó yuq eq lhoq myâng byî é hkyô lé le, ngá-nhik a sé. Yhang, asak wáng bê, yhang lé myî wú

keq, yhanggùng yhang dat taí kyo râ nghut lhê." ga tũ taí akô.

22 Haú yhang nu eq yhang wâ nhik gi, Yudaq byu pé lé gyuq kô é yanmai, haú su ga taí kô é nghut ri; hkâsu mù gâ le, Yesuq gi, haú Hkrisduq nghut lhê ga yín yu é sũ, ó yuq lé nghut kôle, haú tarajong mai lhoq htoq pyâm râ nghut lhê ga, haú Yudaq suwún wuít chôm myit hpyit to bekô nghut é yanmai nghut ri.

23 Hau é yanmai, yhang nu eq yhang wâ nhik gi, "Yhang, asak wáng bê, yhang lé myí wú keq." ga taí kô é nghut ri.

24 Haú Hparishe pé gi, myoqjit wú bê sũ haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sũ rayuq nghut é lé ngamoq sê lhê." ga taí akô.

25 Haú hkûn, yhang tũ taí é gi, "Yhang gi, yubak dap sũ rayuq nghut lhê luq, a nghut é luq, ngò a sé. Ngò gi, hí lé myoqjit sũ nghut kôle, ahkuí wó myâng bê nghut é lé za, ngò ru sê lhê." gâ ri.

26 Hau htâng, yhangmoq gi, "Yhang, nang lé haí kut byí ri lhú? Náng é myoq lé, yhang, hkâsu kut lhoq myâng byí ri lhú?" ga, yhang lé myí akô.

27 Haú hkûn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhîng! Nungmoq gi, haí mù dum gyô nau akô lhú? Nungmoq le, Yhang é chángzô pé dut nau akô lhú?" ga tũ myí ri.

28 Haú mù, yhangmoq gi, yhang lé gyaí rhoí é dông mai, "Nàng gi, haú yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê!

29 Garai Gasang gi, Mosheq lé dáng nyo é hkyô lé, ngamoq sê lhê; nghut kôlhang, haú yuq eq séng luí, Yhang gi, hkâmai lé é sũ nghut é lé lhang, ngamoq a sé." ga taí akô.

30 Haú hkûn, haú yuq gi, "Yhang, ngo lé myoq wó lhoq myang byi kôlhang, Yhang gi, hkâmai lé é sũ nghut é lé, nungmoq a sé kô é gi, mauhpo yhang nghut bê!

31 Garai Gasang gi, yubak dap bâng é dang lé a gyo byí é hkyô lé, nga-nhúng sê lhê. Garai Gasang gi, Yhang lé noqkuq luí, Yhang ô nau é hkyô lé, kut é sũ é dang lé kúm gyo byí lhê.

32 Hku lé é hkûn mai myoqjit gù nghut é byù lé, ó yuq èq myoq lhoq myâng byí é gâ é hkyô lé, mingkan lé joq é hkûn mai, ó yuq le a wó gyô wú é nghut lhê.

33 Haú yuq gi, Garai Gasang chyáng mai lé é sũ za a nghut le gi, haí le wó kut râ a nghut." ga tũ taí ri.

34 Haú su ga jáng, yhangmoq gi, "Nàng gi, yubak htui má hku lé é sũ nghut to luí nhîng, ngamoq lé wám mhòqshit lhê lhú?" ga tũ taí kôluí, yhang lé hkat htoq pyâm akô nghut ri.

### *Woi-nyí Má Myoqjit É Hkyô*

35 Yesuq gi, haú yuq lé yhangmoq hkat htoq pyâm é hkyô lé wó gyo luí, yhang lé myàng hui jáng, "Nàng gi, haú Byu Yhangzo lé lumjîng lhê lhú?" ga myí ri.

36 Haú hkûn, haú yuq gi, "Yhumsîng ê, haú gi, ó yuq nghut lhê lhú? Yhang lé, ngò wó lumjîng sháng gaq, taí kyo laq." ga myí ri.

37 Yesuq gi, "Nàng, haú yuq lé myàng wú bê nghut lhê; ahkuí, nàng eq dáng nyo nyi é sũ gi, haú yuq yhang nghut lhê." ga taí ri.

38 Haú mù, haú yuq gi, "Yhumsîng ê, ngò lumjîng lhê!" ga taí luí, Yhang lé noqkuq ri.

39 Haú hkûn, Yesuq gi, "Haú myoqjit bang myoq myàng kó râ hkyô eq myoq myàng bang myoqjit kó râ hkyô lé, tarâ jéyáng râ matú, mingkan shí má Ngò jé lé é nghut lhê." ga taí ri.

40 Yhang eq rahá nghut nyi é Hparishe pé ra-am gi, Yhang haú su ga taí é lé wó gyo kôjáng, "Hkâsu htà? Ngamoq gi, myoqjit bang dut bê lhú?" ga myí akô.

41 Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kó râ nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashí kó nghut ri.

## 10

### *Sau Zúng Sũ Eq Sau Hpúng*

1 Ngò, nungmoq lé teng za taí kôlé, haú sau hkup má, hkúmdong mai a wang e za, gó hkyô dông doq lut wang é sũ gi, hkau sũ eq damyaq nghut ri.

<sup>2</sup> Haû hkúmdong mai wang é sù kúm gi, sau zúng sù nghut ri.

<sup>3</sup> Haû hkum zúng sù gi, yhang lé hkum hpóng byî é htoq agó, haû sau pé gi, yhang é htê lé gyo byî akô. Yhang gi, yhang é sau pé lé, myìng lang luî wut yù mù, yhangmoq lé shuí htoq htoq kut nyi ri.

<sup>4</sup> Yhang é sau pé banshoq lé hpông htoq yù mù, yhang gi, hí má sô ri; sau pé gi, yhang é htê lé sê gyo kô é yanmai, yhang é htâng má châng akô nghut ri.

<sup>5</sup> Nghut kôlhang, yhangmoq gi, byù bíng é htâng má, hkâ-nhám lháng cháng kó râ a nghut e za, yhang chyáng mai kúm h pang byuq kó râ nghut lhê; hkâsu mù gâ le, haû byù bíng é htê lé, yhangmoq a sê gyo kô é yanmai nghut ri." ga taí ri.

<sup>6</sup> Yesuq gi, dangtú haû lé yù mù, yhangmoq lé taí kyô ri; nghut kôlhang, yhangmoq gi, Yhang haí taí kyô nyi é lé, a sê gyo kó nghut ri.

<sup>7</sup> Haû mù, Yesuq dum taí é gi, "Ngò, nungmoq lé teng za taí kôlé, Ngò gi, haû sau pé wang é hkúmdong nghut lhê.

<sup>8</sup> Ngá é hí má lé é lhunglhâng bang gi, hkau bang eq damyaq pé nghut akô; haû sau pé kúm gi, yhangmoq é dang lé a lhom gyo byi kó nghut ri.

<sup>9</sup> Ngò gi, hkúmdong nghut lhê; Ngò mai wang é sù ó yuq nghut kôle, hkyi yu é hui râ nghut lhê. Haú yuq gi, htoq htoq wàng wàng wó kut râ eq mhan-yô myang hô râ nghut lhê.

<sup>10</sup> Haû hkau sù gi, hkau râ, sat râ eq lhoq htên pyám râ matú, lé e za nghut lhê. Ngo lé é gi, yhangmoq, asak wó yù râ eq byíngjup é asak lé wó yù râ matú sheq nghut lhê.

<sup>11</sup> Ngò gi, ge é sau zúng sù nghut lhê; haû ge é sau zúng sù gi, sau pé é matú, yhumsing é asak lé ap byi pyâm é nghut lhê.

<sup>12</sup> Haû langchyáng kut sù gi, sau pé lé sing é sau zúng sù a nghut; haû mù, yhang gi, haû wamhkui lé lo é lé myàng jáng, saû pé lé pyâm to mù h pang ló byuq râ nghut lhê; haú hkûn, wamhkui gi, sau hpúng lé é htim luî, lhoq pyo pyám râ nghut lhê.

<sup>13</sup> Yhang gi, langchyáng hpó nghut luî, haû sau pé é matú haí le a myit chiq byî é

yanmai, h pang é nghut ri.

<sup>14</sup> Ngò gi, haû ge é sau zúng sù nghut lhê; haû Îwa gi, Ngo lé sê é nghut luî, Ngò le, haû Îwa lé sê é eq rajung za,

<sup>15</sup> Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haû sau pé é matú, yhumsing é asak lé ap byi pyâm é nghut lhê.

<sup>16</sup> Ngò gi, sau hkup shî mâ é a nghut é gotú sau pé wó ashî; sau haú pé lé le, Ngò, shuí yù ra râ nghut lhê; sau haú pé le, Ngá é htê lé gyo kó râ nghut lhê; haú hkûn, sau hpúng rahpúng za dut luî, sau zúng sù le rayuq za, nghut râ nghut lhê.\*

<sup>17</sup> Ngò gi, Ngá é asak lé dum wó taû yù sháng gaq nghû, yhumsing é asak lé ap byi pyâm é yanmai, Ngá Wa gi, Ngo lé chyitdap é nghut lhê.

<sup>18</sup> Ngá é asak lé, ó yuq eq le wó yu pyâm é a nghut, Ngá é myit đông byi pyâm é ru nghut lhê. Ngò gi, yhumsing asak lé ap byi pyám râ ahko ahkáng eq haû lé dum taû yù râ ahko ahkáng wó sù nghut lhê. Haû gi, Ngá Wâ chyáng mai Ngò wó yu é hkunmó nghut lhê." gâ ri.

<sup>19</sup> Dang haú pé é yanmai, haû Yudaq byu pé gi, myit a huî lhum dum dut byuq bekô nghut ri.

<sup>20</sup> Haú mâ é bang myo myo gi, "Yhang gi, nat gang wang júng to luî, nâ byuq bê nghut ri. Yhang é dang lé, haí mù gyô nyi akô lú?" ga taí bum akô.

<sup>21</sup> Nghut kôlhang, góbang gi, "Dang shi pé gi, nat gang wang júng tô é byù taí é dang a nghut. Nat gang gi, myoqjit sù lé, myoq wó lhoq myâng nhâng râ lú?" ga taí bum akô nghut ri.

### *Yudaq Byu Pé A Lumjìng Kô É Hkyô*

<sup>22</sup> Yerusalem wà mó má, Ap Nóng Poi\* jé bê nghut ri. Haû gi, gyoqmyò nám nghut ri.

<sup>23</sup> Haú hkûn, Yesuq gi, haû noqkuq yhùm wàng mâ é, Sholumon é Jirop má sô yông wún ri.

<sup>24</sup> Haú u lé, haû Yudaq byu pé gi, Yhang é lhìngghkyuq má lé zìng bùm kômù, "Nàng gi, ngamoq lé hkâ-myháng jé shoq úng-áng nhang nyi râ lú? Nàng, Hkrisduq nghut le

\* 10:16 Esai 56:8 \* 10:22 Ap Nóng Poi gâ é gi, Garai Gasâng é yhùm lé ap nóng lé gâ lhê.

gi, ngamoq lé san za taí kyô pyám laq." ga taí akô.

<sup>25</sup> Yesuq gi, "Ngò, nungmoq lé taí kyo bê nghut lhê; nghut kôlhang, nungmoq a lumjîng kó nghut ri. Ngá Wâ é myîng mai, Ngò kut é laklaí kumlhá haú pé gi, Ngá é matú saksé hkám byî nyi ri.

<sup>26</sup> Nghut kôlhang, nungmoq gi, Ngá é sau a nghut kô é yanmai, a lumjîng kó nghut ri.

<sup>27</sup> Ngá é sau pé gi, Ngá é htê lé dat gyô akô; Ngò gi, yhangmoq lé sê lhê; yhangmoq le, Ngá htâng châng akô nghut ri.

<sup>28</sup> Ngò gi, yhangmoq lé, ahtum abyuq é asak byî é nghut mù, yhangmoq gi, hkânám le htên byoq kó râ a nghut; ó yuq èq le, yhangmoq lé, Ngá é loq mai wó lú yû râ a nghut.

<sup>29</sup> Yhangmoq lé, Ngá é loq má ap byi tô é sù, haú Ngá Wâ gi, lunglhang htoq má je gyaú Sù nghut lhê; ó yuq èq le, yhangmoq lé, Ngá Wâ é loq mai wó lú yû râ a nghut.

<sup>30</sup> Ngò eq haú Íwa gi, rayuq za nghut lhê." ga tû taí ri.

<sup>31</sup> Haú hkûn, haú Yudaq byu pé gi, Yesuq lé, dú râ matú luqgok dum kui akô.

<sup>32</sup> Nghut kôlhang, Yesuq gi, yhangmoq lé, "Haú Íwâ chyáng mâ é laklaí kumlhá mó pé myo myo, Ngò, nungmoq lé tûn shit bê nghut lhê. Nungmoq, Ngo lé dú râ gi, hká lhûm é yanmai nghut akô lhú?" ga myî ri.

<sup>33</sup> Haú Yudaq byu pé gi, "Ngamoq, Nang lé dú râ gi, haú pé hká lhûm é yanmai le a nghut; Nang gi, byù rayuq nghut to luí, Garai Gasang nghut é dông taí whuí luí, Yhang lé rhoi dang taí é yanmai, dú râ nghut lhê." ga tû taí akô.

<sup>34</sup> Haú hkûn, Yesuq gi, yhangmoq lé, "'Nungmoq gi, garaí pé nghut akô nghut, Ngò taí bê nghut lhê.'<sup>✧</sup> ga nungmoq é tarâ má kê to lhê a nghut kó lhú?"

<sup>35</sup> Chyúmdang haú lé gi, a ge lhoq hpyoq pyâm é nghut luí, haú Garai Gasâng é mungdang lé wó yu é bang lé, 'garaí pé' gâ é nghut le gi,

<sup>36</sup> haú Íwa mai, Yhang é matú hkyin htoq yû luí, mingkan má nhang é Sù eq séng luí gi, hká dông nghut kó râ lhú? 'Ngò gi, Garai Gasâng é Yhangzo nghut lhê.' nghut taí é yanmai, Ngò gi, Garaí Gasang lé taí hpoi ri

ngut, nungmoq, haú mù Ngo lé mara hùn akô lhú?

<sup>37</sup> Ngá Wâ é muzó pé lé, Ngò kut é a nghut jáng, Ngo lé hkâlumjîng kó.

<sup>38</sup> Nghut kôlhang, Ngò, haú pé lé kut é nghut le gi, nungmoq, Ngo lé a lumjîng kôlhang, haú muzó pé lé lumjîng keq; haú hkûn, haú Íwa gi, Ngò má nghut nyi é hkyô lé le, Ngò gi, haú Íwa má nghut nyi é hkyô lé le, nungmoq wó sé luí, sê gyo kó râ nghut lhê." ga tû taí ri.

<sup>39</sup> Yhangmoq gi, Yhang lé chyup râ dum hen akô; nghut kôlhang, Yhang gi, yhangmoq é loq mai wó lut ló bê nghut ri.

<sup>40</sup> Hau htâng, Yesuq gi, haú Yodan làng he hpoq mâ é, Yohan, wui-myhup hkám byî hi é jowò má ló jé ri. Haú má, Yhang nyi nyi é nghut luí,

<sup>41</sup> byù myo myo gi, Yhâng chyáng lé jé bum akô. Yhangmoq gi, "Yohan gi, limik kumlhá a kut wú é nghut kôlhang, shí yuq eq séng luí, Yohan taí é hkyô lunglhang gi, têng ri." ga taí bum akô.

<sup>42</sup> Haú jowò má, byù myo myo gi, Yesuq lé lumjîng bùm bekô nghut ri.

## 11

### *Lazaruq Shi Byuq É Hkyô*

<sup>1</sup> Ahkuí, Lazaruq gâ é byù rayuq gi, no nyi ri. Yhang gi, haú Mariq eq yhângnhá Mahtaq nhik nyi é Behtani wà mâ é sù nghut lhê.

<sup>2</sup> Mariq haú gi, Yhumsîng lé namngón-xù hut gyun luí, hkyî má yhâng xam èq sùt byî é sù nghut ri; yhang gi, haú no nyi é Lazaruq é yhângnhá nghut ri.

<sup>3</sup> Haú mù, haú yhângnhá nhik gi, "Yhumsîng ê, Nang chyitdap é sù gi, no nyi ri." ga, Yesuq chyáng é taí nhang akô.

<sup>4</sup> Yesuq gi, dang haú lé wó gyo jáng, "Nòhpyo haú gi, shî-nò a nghut. Haú Garaí Gasâng é Yhangzo gi, hau é yanmai, hpungwup shingkang wó dan hù é hui sháng gaq ga, Garaí Gasâng é hpungwup shingkang é matú dut é ru nghut lhê.

<sup>5</sup> Yesuq gi, Mahtaq eq yhanggu Mariq lé le, Lazaruq lé le, chyitdap ri.

<sup>6</sup> Haû su mù, Yhang gi, haû Lazaruq no nyi ri gâ é lé, wó gyô é hkûn, haû Yhang nyi é jowò má, í nyí nyi tô ashî nghut ri.

<sup>7</sup> Hau htâng, Yhang gi, Yhâng é chángzô pé lé, "Nga-nhúng gi, Yuda mau shut dum taû ló sháng." ga taî ri.

<sup>8</sup> Haú hkûn, yhangmoq gi, "Rabai ê, hkû-yoq za, haû Yudaq byu pé, Nang lé luqgok èq dú sat râ da kô é nghut le nhîng, ahkuî, haú shut dum taû ló râ lú?" ga Yhang lé myî akô.

<sup>9</sup> Yesuq gi, "Nyí gi, hkyíng hkum raxe í hkum bo lhê a nghut kó lú?"\* Nyí má hkyô sô é sù gi, mingkan shi é maubó é yanmai myoq myàng luí, lengbat râ a nghut.

<sup>10</sup> Myín lé hkyô sô é sù kúm gi, maubó lé a wó é yanmai, lengbat lhê." ga tû taî ri.

<sup>11</sup> Haû su ga taî é htâng má, Yhang, yhangmoq lé xoq taî kyô é gi, "Nga-nhúng é luzúm Lazaruq yhup myhí byuq bê nghut ri; nghut kôlháng, Ngò gi, yhang lé ê nhaû toq râ nghut lhê." gâ ri.

<sup>12</sup> Haú hkûn, Yhâng é chángzô pé gi, "Yhumsîng ê, yhang yhup myhí tô é nghut le gi, ge lò râ nghut lhê." gâ taî akô.

<sup>13</sup> Yesuq gi, Lazaruq shi byuq bê hkyô lé taî é nghut ri; nghut kôlháng, Yhâng é chángzô pé gi, gè gè yhup myhí tô é lé taî é su ngam pyâm akô nghut ri.

<sup>14</sup> Haû mù luí, Yesuq, yhangmoq lé san za jáng taî kyô é gi, "Lazaruq gi, shi byuq bê nghut lhê.

<sup>15</sup> Ngò haú má a nyi záng é gi, nungmoq wó lumjîng râ matú nghut luí, nungmoq é matú Ngò gabú byî ri; yhâng chyáng e ló sháng hkoi." gâ ri.

<sup>16</sup> Haû mù, haû Zozûm le gâ é Htomaq gi, gotú chángzô pé lé, "Nga-nhúng le, Yhang eq rahá shî sháng gaq, châng e ló sháng." ga taî ri.

### *Haû Ê-nhâ Nhik Lé, Yesuq Nhik Tîng Ê Hkyô*

<sup>17</sup> Yesuq gi, jé e é hkûn, haû Lazaruq lé lup má kat pyâm é myi nyí nghut bê hkyô lé, lhom taî kyô akô.

<sup>18</sup> Behtani wà gi, Yerusalem wà mó eq í déng kô za wê lhum ri.

<sup>19</sup> Haû mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik tîng byi kó râ ga lé jé nyí bum akô nghut ri.

<sup>20</sup> Mahtaq gi, Yesuq jé lé lo é hkyô lé wó gyo jáng, htoq ê mù, Yhang lé ê huí ri; nghut kôlháng, Mariq gi, yhûm má nyi tô ri.

<sup>21</sup> Mahtaq gi, Yesuq lé, "Yhumsîng ê, Nàng, shî má nyi tô é ru nghut le gi, ngá gu shi byuq râ a nghut.

<sup>22</sup> Nghut kôlháng, ahkuî le, Garai Gasâng chyáng Nàng haî dung kôlháng, Yhang byi râ nghut é lé, ngò sê lhê." ga taî ri.

<sup>23</sup> Yesuq gi, yhang lé, "Nung gu, dum dui toq râ nghut lhê." ga taî ri.

<sup>24</sup> Haú hkûn, Mahtaq gi, "Haû jhtâm buinyi má dum dui toq é hkûn, yhang le dum dui toq râ nghut é lé, ngò sê lhê." ga tû taî ri.

<sup>25</sup> Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjîng é sù gi, shi byuq kôlháng, dum dui râ nghut lhê.

<sup>26</sup> Asak dui nyi luí, Ngo lé lumjîng é sù ó yuq nghut kôle, hkâ-nhám le shi é hui râ a nghut. Nàng gi, dang shî lé lumjîng lhê lú?" ga taî ri.

<sup>27</sup> Haú hkûn, yhang gi, "Yhumsîng ê, ngò lumjîng lhê. Nàng gi, haû mingkan má jé lé lô râ nghut é, Garai Gasâng é Yhangzo, Hkrisduq† nghut é lé, ngò lumjîng lhê." ga, Yhang lé taî kyô ri.

<sup>28</sup> Yhang gi, haû su ga taî é htâng má, taû ló mù, yhanggu Mariq lé, tsik za wut yù luí, "Haû Sará jé tô ri; Yhang gi, nang lé myî nyi ri." ga taî kyô ri.

<sup>29</sup> Mariq gi, haû lé wó gyo jáng, hân za toq mù, Yesuq chyáng ê bê nghut ri.

<sup>30</sup> Haú u lé, Yesuq gi, haú wâ hkaû má a wang ló shî e za, Mahtaq eq huí é jowò má ru nyi tô ashî nghut ri.

<sup>31</sup> Haû yhúmhaû má, Mariq lé nhik tîng nyi é Yudaq byu pé gi, yhang hân za toq luí, htoq ló é lé myàng kôjáng, yhang, lup má é ngáu râ dâ lhê abe ga, myit yù kômù, yhang htâng châng e ló bum akô nghut ri.

<sup>32</sup> Mariq gi, Yesuq nyi tô é jang má jé mù, Yhang lé myàng jáng, Yhâng é hkyí wang

\* **11:9** Nyí gi, hkyíng hkum raxe í hkum bo lhê a nghut kó lú? gâ é gi, ahkyíng a jé shimá, muzò nô é gi, a ge é nghut lhê gâ é nghut ri. † **11:27** Hkrisduq lé Mesaia le gâ lhê.

má ngóm gop to luí, "Yhumsing ê, Nàng, shí má nyi tô é ru nghut le gi, ngá gu shi byuq râ a nghut." ga taí ri.

<sup>33</sup> Yesuq gi, Mariq ngaù nyi é lé le, haù yhang eq rahá lé lo é Yudaq byu pé ngau nyi kô é lé le, myàng jáng, Yhâng é myit má gyai yhang hkâm zo wuî é eq myit wui myit hke dut nyi ri.

<sup>34</sup> Haù mù, Yhang gi, "Yhang lé, hkâmá tô tô akô lhú?" ga myi jáng, yhangmoq gi, "Yhumsing ê, lé wú wú aq." ga tû taí akô.

<sup>35</sup> Yesuq gi, ngaù bê nghut ri.

<sup>36</sup> Haù mù, haù Yudaq byu pé gi, "Wú keq, Yhang gi, Lazaruq lé, haù-í yhang chyit ri-nhung!" ga taí akô.

<sup>37</sup> Nghut kôhang, ra-am gi, "Haù myoqjit sù lé, myoq wó lhoq myâng byí é Sù gi, shí yuq lé le, a shí lo shoq a wó kut é lhú?" ga taí bum akô nghut ri.

### *Lazaruq Lé Lhoq Dui Toq É Hkyô*

<sup>38</sup> Yesuq gi, Yhâng é myit má radàm dum gyai yhang hkâm zo wuî é eq, lup má lé jé ri. Lup haù gi, luqhkyûng dong nghut luí, luqgok rachâm eq chí tô akô.

<sup>39</sup> Haù mù, Yhang gi, "Luqgok haù lé yu pyám keq." ga taí ri.

Haù hkûn, haù shi byuq su é yhângnhá Mahtaq gi, "Yhumsing ê, yhang lé, haù má tô tô é myi nyí lhang nghut bê yanmai, ahkuí gi, bup nàm berá nghut lhê." ga taí ri.

<sup>40</sup> Haù mù, Yesuq gi, "Nàng, lumjîng é nghut le gi, haù Garai Gasâng é hpungwup shing kang lé, wó myâng râ nghut lhê nghú, Ngò, nang lé taí kyô wú bê a nghut lhú?" ga taí ri.

<sup>41</sup> Haù mù luí, yhangmoq gi, luqgok haù lé yu pyám akô. Hau htâng, Yesuq gi, mauhkûng shut tu wú luí, "Áwa ê, Nàng, Ngá é dang lé gyo byí é yanmai, Ngò, Nang lé jeju hkya-ôn lhê.

<sup>42</sup> Nàng gi, hkâ-nhám le, Ngá é dang lé gyo byí nyi é lé, Ngò sê lhê; nghut kôhang, Nàng, Ngo lé nhang kat é hkyô lé, shí má yap tô é bang lumjîng kó sháng gaq nghú, yhangmoq é matú, Ngò, isu nghú taí é nghut lhê." ga taí ri.

<sup>43</sup> Yhang gi, haù su ga taí luí, "Lazaruq ê, htoq lô aq." ga htê mó eq wut kat ri.

<sup>44</sup> Haù hkûn, haù shi byuq bê sù gi, yhâng é loq hkyî pé má pân eq htup yup to gù eq, yhâng é myoqdong má hpajet eq htup to gù htoq lo ri.

Haù mù, Yesuq gi, yhangmoq lé, "Yhang lé hpyi pyám byi mù, nhang kat keq." ga taí ri.

### *Yesuq Lé Sat Pyám Râ Haq Dâ É Hkyô* *Mht 26:1-5; Mrk 14:1-2; Luk 22:1-2*

<sup>45</sup> Haù mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjîng bùm bekô nghut ri.

<sup>46</sup> Nghut kôhang, yhangmoq chyáng má é ra-am gi, haù Hparishe pè chyáng ló mù, Yesuq kut é hkyô lé, ló taí kyô akô.

<sup>47</sup> Haù mù, haù hkyangjong agyi pé eq Hparishe pé gi, Yudaq byin tú wapdoq‡ zuphpong lé ji tsing to mù, "Byù shí yuq gi, limik kumlhá myo myo kut shit nyi ri. Nga-nhung, hkâsu kut le gè râ lhú?

<sup>48</sup> Nga-nhung, Yhang lé haù su ru kut nyi nhang é nghut jáng, yuq hkangmó gi, Yhang lé lumjîng kó râ nghut lhê; haù hkûn, Romaq byu pé gi, jé lé mù, nga-nhung é jowò eq nga-nhung é byuhú lé, lé lhoq htên pyám kó râ nghut lhê." ga taí akô nghut ri.

<sup>49</sup> Haù hkûn, yhangmoq chyáng má é, haù zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haí lhang a sé kó nghut ri-nhung!

<sup>50</sup> Haù byuhú gón htên byoq byuq râ htoq má, byuhú hau é matú, byù rayuq shí hkâm byi le gi, nungmoq é matú je gè râ hkyô lé, nungmoq, a myit jé kó nghut ri." ga taí kat ri.

<sup>51</sup> Yhang haù su ga taí é gi, yhumsing myit dông a nghut e za, haù zân má, yhang gi, hkyangjong mó nghut é eq rajung za, haù Yudaq byuhú é matú, Yesuq shí hkâm byi râ nghut é hkyô lé le,

<sup>52</sup> byuhú hau é matú baú a nghut e za, haù byo myín tô é, Garai Gasâng é yhangzô pé lé, shuí tsing yù mù, rading ralhum za dut nhâng râ matú, shí hkâm byi râ nghut é hkyô lé le, myiqhtoi dang taí é ru nghut lhê.

<sup>53</sup> Haù nyí mai, yhangmoq gi, Yesuq lé sat râ matú chôm da bekô nghut ri.

‡ 11:47 Yudaq byin tú wapdoq lé Grik dông gi, San-hedrin gà lhê.

<sup>54</sup> Hau é yanmai, Yesuq gi, Yudaq byu pé gyoro má, de de a sô shit wún e za, haú mai htoq luí, haú yoso eq chyâng lhúm é mau má é, Ehprim gâ é wà má ê mù, Yhâng é chángzô pé eq rahá nyi nyi ri.

<sup>55</sup> Haú Yudaq byu pé é Lhoqlhai Poí jé râ za nghut é hkûn, byù myo myo gi, Lhoqlhai Poí a jé shi má, lhoq san lhoq yúng hking dông yhumsing gùng lé lhoq sân-yúng yû râ matú, yosô wà pé mai, Yerusalem wà mó shut doq ló bum akô.

<sup>56</sup> Haú mù, yhangmoq gi, Yesuq lé ho nyi kô é nghut luí, haú noqkuq yhúm wàng má yap to uchyang, rayuq eq rayuq, "Nungmoq, hkâsu wó myit akô lú? Yhang gi, Poí má a lé lô râ gâ lhê là?" ga myi lhúm bum akô.

<sup>57</sup> Nghut kôhang, haú hkyangjong agyi pé eq Hparishe pé gi, Yesuq lé wó chyup yû râ matú, Yesuq hkâmá nyi é lé, sê é sù ó yuq nghut kôle, yhangmoq lé lo shit kyo râ lhê ga dangmó hkyô tô akô nghut ri.

## 12

### *Yesuq, Namngón-xû But Byi Huí É Hkyô Mht 26:6-13; Mrk 14:3-9*

<sup>1</sup> Haú Lhoqlhai Poí jé râ hkyuq nyi râ ashí hkûn, Yesuq gi, Yhâng èq shi é mai lhoq dui toq yu é sù, Lazaruq nyi é Behtani wà má ló jé ri.

<sup>2</sup> Haú má, Yesuq lé hkunggâ é dông myinzang byi tsô akô; Mahtaq gi, zoshuq jaú ri; Lazaruq gi, haú Yesuq eq rahá siboí má zô zung nyi bang má é rayuq nghut ri.

<sup>3</sup> Haú hkûn, Mariq gi, haú nardu amyit mai za saí yu é, gyai hpaú é namngón-xû raxe í rûng kô yu lé mù, Yesuq é hkyi má hut gyun byi luí, yhâng é uxam èq sùt byi ri. Haú mù, yhúm haú gi, namngón-xû shôm byíng to bê nghut ri.

<sup>4</sup> Nghut kôhang, Yesuq lé ap pyám râ nghut é, Yhâng é chángzo rayuq nghut sù, Yudaq Iskarut gi,

<sup>5</sup> "Haú myùng bang lé byi pyám râ matú, haú namngón-xû lé denari sum sho èq haí mù a úng pyám é lú?" ga taí ri.

<sup>6</sup> Yhang haú su ga taí é gi, myùng bang lé chiq byi é yanmai taí é a nghut, yhang gi, ngùn htùng chùng sù nghut luí, haú má kat tô é ngùn lé, yhumsing é matú lhaq yu chùng chùng kut é, hkau sù nghut é yanmai taí é nghut ri.

<sup>7</sup> Yesuq gi, "Nghut shang gaq; yhang gi, Ngo lé myhup yhum râ buinyi é matú, namngón-xû shí lé hkong to byi é nghut lhê.

<sup>8</sup> Haú myùng bang gi, nungmoq eq rahá hkâ-nhám le nyi râ nghut lhê; nghut kôhang, Ngò gi, nungmoq eq rahá ayang nyi nyi râ sù a nghut." ga tú taí ri.

<sup>9</sup> Haú u lé, Yudaq byu pé ajùm ayò gi, haú má Yesuq nyi é lé sé kôluí, lé lo akô; haú bang gi, Yesuq é yanmai za lé kô é a nghut, haú Yhâng èq shi bê mai lhoq dui toq yu é Lazaruq lé, lé myâng nau kô é yanmai le nghut ri.

<sup>10</sup> Haú mù, haú hkyangjong agyi pé gi, Lazaruq lé le, sat pyám râ matú chôm hpyé lhúm akô.

<sup>11</sup> Hkâsu mù gâ le, yhâng é yanmai, haú Yudaq byu pé myo myo gi, Yesuq chyáng lhing ló kômù, Yhang lé lumjíng bùm kô é yanmai nghut ri.

### *Yesuq, Yerusalem Wà Mó Má Wang E Ló É Hkyô*

*Mht 21:1-11; Mrk 11:1-11; Luk 19:28-40*

<sup>12</sup> Hau htang nyi, haú Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyô bum akô.

<sup>13</sup> Haú mù, yhangmoq gi, byùm-haq pé yu chùng mù, Yhang lé ê tê uchyang,

"Hosana!"

Haú Yhumsing é myìng mai jé lé lô Sù gi, hkungsô wó nyi sháng gaq ô!

Haú Israelaq byu pé é Hkohkâm gi, hkungsô wó nyi sháng gaq!"<sup>☆</sup>

ga, taí garù bum akô nghut ri.

<sup>14</sup> Haú hkûn, Yesuq gi, logúng zo radu lé myàng luí, doq jî ri;

<sup>15</sup> haú gi, "Zi-un byizo<sup>†</sup> ê, hkâgyuq; wú keq, nungmoq é hkohkâm gi, logúng zo má jì mù lé lo nyi ri."<sup>☆</sup>

ga, kâ tô é eq rajung za nghut ri.

\* **12:13** Hebre dang má, *hosana* gâ é gi, "ahkuí hkyi yù aq" gâ é nghut lhê. Nghut kôhang, bun zo shí má gi, hkyá-on dang dông chung é nghut lhê. ☆ **12:13** Hkyá-on 118:25-26 † **12:15** Hebre myíng dông *Zi-un byizo* gâ é gi, Yerusalem má é byu pé lé gâ é nghut lhê. ☆ **12:15** Zhk 9:9



16 Haú pé banshoq lé, Yhâng é chángzô pé gi, sâng-hi lé a sê gyo kó; nghut kôlhang, Yesuq gi, hpungwup shingkang dan hu huí é htâng má za sheq, haú pé gi, Yhang eq séng luí kâ tô é hkyô lé le, haú eq rajung za, Yhang lé, yhangmoq mai kut bê hkyô lé le, bûn sê kat akô nghut ri.

17 Haú Yesuq gi, lup hkaú mâ é Lazaruq lé wut luí, shi é mai lhoq dui toq yu é hkûn, Yhang eq rahá nghut é shiwa hpúng gi, haú hkyô lé, saksé hkám byî nyi akô.

18 Haú mù, byù myo myo gi, Yesuq tân shit é limik kumlhá hau é hkyô lé, wó gyo kô é yanmai, Yhang lé hui râ matú htoq e akô.

19 Hau é yanmai, haú Hparishe pé gi, "Wú keq, nga-nhúng, hkâsu yhang a ge kut lo nhung! Haú mingkan gón gi, Yhâng htâng châng bùm bekô." ga, rayuq eq rayuq taí lhum bum akô nghut ri.

### *Yesuq, Yhang Shî Râ Hkyô Lé Te Taí É Hkyô*

20 Haú hkûn, noqkuq râ matú Poí má doq ló é bang má, Grik pé ra-am le bo tô akô.

21 Yhangmoq gi, Galile mau, Bet-saida wà mó mâ é Hpilip chyáng lé jé kômù, "Âhkaú ê, ngamoq gi, Yesuq lé myàng nau ri." ga, dung tôngbán akô.

22 Haú mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

23 Haú mù, Yesuq gi, "Haú Byu Yhangzo gi, hpungwup shingkang dan hû é hui râ matú, ahkyíng jé bê nghut ri.

24 Ngò, nungmoq lé teng za taí kôlé, sungso racham gi, myigùng má gyó luí, shi byuq e za a nghut jáng, acham roq za dut nyi râ nghut lhê. Nghut kôlhang, shi byuq é nghut le gi, ashî myo myo lhoq htoq râ nghut lhê.

25 Haú yhumsing é asak lé chyitdap é sù gi, asak sùm byuq râ nghut lhê. Mingkan shî má, haú yhumsing é asak lé a jú é sù kúm gi, ahtum abyuq é asak matú, yhum-sing é asak lé wó sing to râ nghut lhê.

26 Ngo lé dojaú é sù ó yuq nghut kôle, Ngá htâng châng râ lhê; Ngò, hkâmá nyi le, Ngá é dui-nhâng zoshâng le nyi râ nghut lhê. Ngá

Wa gi, haú Ngo lé dojaú é sù lé, shigyaú râ nghut lhê.

27 Ahkuí, Ngò, myit wuîhke nyi ri; Ngò hkâsu nghû taí râ lhi? 'Áwa ê, ahkyíng shî mai Ngo lé lhoq lhut yù laq.' nghû taí râ lhu? Nghut kôle, Ngò gi, ahkyíng shi é matú za sheq jé lé é ru nghut lhê.

28 Áwa ê, Náng é myìng lé hpungwup shingkang dan hu nhâng aq hkoi!" ga taí ri.

Haú hkûn, "Ngò gi, Ngá é myìng lé hpung-wup shingkang dan hu nhâng bê nghut luí, dum dan hu nhâng shirâ nghut lhê." gâ é htê, mauhkûng mai htoq lo ri.

29 Haú má nyi tô é byù moq mó gi, haú lé wó gyo kôjáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga taí bum akô nghut ri.

30 Haú hkûn, Yesuq gi, "Danghtê shî gi, Ngá é matú a nghut, nungmoq é matú ru nghut lhê.

31 Ahkuí gi, mingkan shî lé jéyáng râ ahkyíng nghut bê; mingkan shi é zau gi, ahkuí hkat htoq pyâm é hui râ nghut lhê.

32 Nghut kôlhang, Ngò gi, myigùng mai tu shap kat é huí é hkûn, byù lunglhang bang lé, Ngá chyáng shê yù râ nghut lhê." ga taí ri.

33 Yhang haú su ga taí é gi, Yhang hkâsu kut shî râ nghut é hkyô lé shit é nghut ri.

34 Haú hkûn, haú byù moq mó gi, "Haú tarâ laiká má, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhîng, 'Haú Byu Yhangzo gi, tu shap é hui ra râ nghut lhê.' nghû, Nàng hkâsu kut wó taí lhê lhu? Haú Byu Yhangzo gi, ó yuq nghut lhê lhu?" ga, myí akô.

35 Haú mù, Yesuq gi, yhangmoq lé, "Nungmoq chyáng, haú maubó joq nyi râ ahkyíng gi, a lûm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haú maubó joq nyi ashî hkûn sô nyi keq; hkâsu mù gâ le, haú mauchut má sô nyi é sù gi, yhang hká shut e ló nyi é lé, a sé nghut ri.

36 Nungmoq gi, maubó é yhangzô pé wó dut kó sháng gaq, haú maubó joq nyi ashî hkûn, haú lé lumjîng keq." ga taí ri. Yesuq gi, dang haú ban taí jáng, yhangmoq chyáng mai htoq ló luí, haq byuq bê nghut ri.

*Yudaq Byu Pé, A Lumjínq Ru Dut Nyî Kô É Hkyô*

<sup>37</sup> Yesuq gi, yhangmoq é hí má, limik kumlhá haú pé banshoq kut shit kôlhang, yhangmoq gi, Yhang lé a lumjínq shi kó nghut ri.

<sup>38</sup> Haú gi,  
"Yhumsîng ê, nga-nhûng é danglù lé, ó yuq wá lumjínq byî wú é lhú? Haú Yhumsîng é loq‡ gi, ó yuq lé htoq shit wú é lhú?"<sup>☆</sup>  
ga, myiqhtoi Esai-aq taí tô é dang lo dik é nghut ri.

<sup>39</sup> Yhangmoq a wó lumjínq kô é hkyô gi, Esai-aq taí é dang má,

<sup>40</sup> "Yhang gi, yhangmoq é myoqjí lé lhoq chit byi luí, yhangmoq é i-myit lé lhoq htan to byi bê nghut ri;

haú mù, yhangmoq gi, myoqjí èq a wó myáng, i-myit èq a wó sê gyo, Ngò, yhangmoq lé yâ ge byi râ matú, a wó lhing taú lò kó dut râ nghut lhê."<sup>☆</sup>  
ga le bo tô é yanmai nghut lhê.

<sup>41</sup> Esai-aq gi, Yesuq é hpungwup shingkang lé myang é yanmai, Yhang eq sêng é hkyô lé, haú su ga taí é nghut ri.

<sup>42</sup> Nghut kôlhang, haú uphkâng bang myo myo lhang gi, haú u má, Yesuq lé lumjínq bum akô. Nghut kôle, yhangmoq gi, Hparishe pé èq tarajong mai lhoq htoq pyâm é hui râ lé, gyuq kô é yanmai, yhangmoq lumjínq bê hkyô lé a yín yu bùm kó nghut ri.

<sup>43</sup> Hkâsu mù gâ le, yhangmoq gi, Garai Gasâng chyáng mâ é aróng lé, ô nau é htoq má, byu pé chyáng mâ é aróng lé, je ô nau kô é yanmai nghut ri.

<sup>44</sup> Haú mù, Yesuq, htê mó èq taí é gi, "Ngò lé lumjínq é sù gi, Ngò lé baú lumjínq é a nghut; haú Ngò lé nhang kat é Sù lé le, lumjínq é nghut lhê.

<sup>45</sup> Ngò lé myang é sù gi, haú Ngò lé nhang kat é Sù lé le myang é nghut lhê.

<sup>46</sup> Ngò gi, Ngò lé lumjínq é sù ó yuq le, mauchut hkaú má a nyî sháng gaq nghû, maubó đông mingkan má lé jé é nghut lhê.

<sup>47</sup> Ngò gi, Ngá é dang lé wó gyo luí, a châng é sù ó yuq lé le, jéyáng râ a nghut;

hkâsu mù gâ le, Ngò gi, mingkan lé jéyáng râ matú jé lé é a nghut; haú mingkan lé hkyi yù râ matú sheq, jé lé é ru nghut lhê.

<sup>48</sup> Ngò lé he-ngik luí Ngá é dang lé a hap yu é sù lé, jéyáng râ Sù rayuq nyi lhê; Ngò taí é danghkun haú gi, haú jihtûm buinyi má, haú yuq lé mara byi râ nghut lhê.

<sup>49</sup> Hkâsu mù gâ le, Ngò gi, Ngá é myit đông taí é a nghut; nghut kôlhang, Ngò haí taí râ eq hkâsu nghû taí râ lé gi, haú Ngò lé nhang kat é sù Îwa mai, Ngò lé hkunmó hkyô to bê nghut lhê.

<sup>50</sup> Haú Yhâng é hkunmó gi, ahtum abyuq é asak nghut é lé, Ngò sê lhê. Haú mù luí, Ngò, haí taí kôlé, haú Îwa mai Ngò lé taí kyô é lé za, taí é nghut lhê." gâ ri.

## 13

*Chángzô Pé É Hkyî Chi Byî É Hkyô*

<sup>1</sup> Haú Lhoqlhai Poî jé râ hí má za, Yesuq gi, Yhang, mingkan shî mai Yhâng Wâ chyáng htot ló râ ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut luí, jihtûm jé shoq Yhâng é chyitdap myit lé shit râ nghut lhê.

<sup>2</sup> Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám râ myit kat byî to gû nghut ri.

<sup>3</sup> Yesuq gi, haú lhunglhang lé Îwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taú ló râ sù nghut é lé le, sê ri.

<sup>4</sup> Haú mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhûm èq hpyihit hit tô ri.

<sup>5</sup> Hau htâng, Yhang gi, jirung má uchyam hut kat mù, Yhâng é chángzô pé é hkyî chi byi luí, haú Yhâng é hpyidum má hit tô é hpajet èq sut huí byî ri.

<sup>6</sup> Yhang gi, Simun Petruq chyáng jé jáng, Simun Petruq gi, "Yhumsîng ê, Nang gi, ngá hkyî lé chi byi râ nghut lhê lhú?" ga myî ri.

<sup>7</sup> Haú hkûn, Yesuq gi, "Ngò, haí kut nyi é hkyô lé, ahkuí, nang sê gyo râ a nghut;

‡ 12:38 Yhumsîng é loq gâ é gi, Yhumsîng é hpungwup a-tsam lé gâ é nghut lhê. ☆ 12:38 Esai 53:1 ☆ 12:40 Esai 6:10

nghut kôlhang, htâng má sê gyo râ nghut lhê." ga tû taí ri.

8 Petruq gi, "Ngá hkyî lé, Nàng, hkâ-nhám le wó chi byi râ a nghut." ga taí jáng, Yesuq gi, "Nang lé, Ngò a chi byi é nghut jáng, nàng gi, Ngò eq séng râ a nghut." ga tû taí ri.

9 Haú hkûn, Simun Petruq gi, "Yhumsîng ê, haú su nghut jáng gi, ngá é hkyî lé baú za a nghut, ngá é loq eq ulhum lé le chi byi laq!" ga tû taí ri.

10 Yesuq gi, "Gùng chi bê sù gi, hkyî za chi jáng, ragùngdû é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tû taí ri.

11 Hkâsu mù gâ le, Yhang gi, Yhang lé ap pyám râ sù ó yuq nghut é lé, sê é yanmai, "Nungmoq gi, sanséng é bang chyat a nghut." ga taí é nghut ri.

12 Yesuq gi, yhangmoq é hkyî lé ban chi byi jáng, Yhâng é bumó lé wut mù, Yhâng é jowò má ló dum zùng luí, yhangmoq lé myi é gi, "Nungmoq gi, ahkuí, ngò kut byi é hkyô lé, sê gyo akô lú?"

13 Nungmoq, Ngo lé, 'Sarâ' ga le, 'Yhumsîng' ga le, wut kô é gi, a shut; hkâsu mù gâ le, Ngò gi, haú yuq yhang nghut lhê.

14 Ngò, nungmoq é Sarâ eq Yhumsîng nghut sù lhang, nungmoq é hkyî lé chi byi é nghut le gi, nungmoq le, rayuq eq rayuq é hkyî lé chi byi lhum râ dut lhê.

15 Nungmoq gi, Ngò, nungmoq lé kut byi é su kut kó sháng gaq nghû, Ngò, nungmoq lé alik kut shit tô é nghut lhê.

16 Ngò, nungmoq lé teng za taí kôlé, dui-nhâng zoshâng gi, yhumsîng htoq je kô é a nghut; lagyo gi, nhang kat é sù htoq je kô é a nghut.

17 Ahkuí, nungmoq gi, haú pé lé sé bekô nghut luí, châng kut kô é nghut jáng, hkungsô wó kó râ nghut lhê.

### *Yesuq Lé Ap Pyám Râ Lé, Te Taí É Hkyô*

18 Ngò gi, nungmoq banshoq bang lé lhoq ang luí taí é a nghut; Ngò hkyin yu é bang lé gi, Ngò sê lhê. Nghut kôlhang, 'Haú ngá é muk lé bo zô é sù gi, ngo lé, yhâng é hkyihtáng la-nhik eq nâng htíng râ nghut

lhê.✱ gâ é Chyúmdang lé, lhoq dik râ matú ru nghut lhê.

19 Haú a dut htoq shimá, Ngò, nungmoq lé taí kyô nyi é gi, haú dut é hkûn, Ngò gi, haú Yuq\* nghut é lé, nungmoq wó lumjîng kó râ matú nghut lhê.

20 Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bê; Ngo lé hap yu é sù ó yuq nghut kôle, haú Ngo lé nhang kat é Sù lé hap yu é nghut bê." gâ ri.

21 Yesuq gi, haú su ga taí é htâng má, myit wuîhke nyi mù, saksé hkâm é gi, "Ngò, nungmoq lé teng za taí kôlé, nungmoq mâ é rayuq sù gi, Ngo lé ap pyám râ nghut lhê." gâ ri.

22 Haú mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhûm bum akô nghut ri.

23 Haú Yesuq chyitdap é chángzo rayuq gi, Yesuq é tanghkoí nâm má leq nge zung tô ri.

24 Haú mù, Simun Petruq gi, chángzo haú yuq lé, loq lik kat mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

25 Haú mù, chángzo haú gi, Yesuq é tanghkoí má saí leq nge zung mù, "Yhumsîng ê, haú gi, ó yuq nghut lhê lú?" ga, Yhang lé myi ri.

26 Yesuq gi, "Ngò, muk jap zo shí lé jum yù mù, byi é sù gi, haú yuq nghut lhê." ga tû taí luí, muk jap zo haú lé jum yù mù, Simun é yhangzo Yudaq Iskarut lé byi ri.

27 Yudaq gi, muk haú lé yù zo kat é eq, Tsadán gi, yhâng chyáng wàng bê nghut ri.

Haú mù, Yesuq gi, "Nàng kut râ é hkyô lé, hân kut aq hkoi." ga yhang lé taí kat ri.

28 Nghut kôlhang, yhang lé, Yesuq haú su ga haí mù taí é hkyô lé, zohpoq haú má nyi tô é bang gi, rayuq lhang a sê gyo kó nghut ri.

29 Haú Yudaq gi, ngùn zum sù nghut é yanmai, ra-am gi, haú Poí má râ é hkyô lé, è wuî râ matú, Yesuq taí ri ga luí le, myùng bang lé rajung jung byi nhang ri ga luí le, myit yu bum akô nghut ri.

✱ 13:18 Hkya-on 41:9 \* 13:19 Haú Yuq gâ é gi, Hkrisduq lé gâ é nghut lhê.

<sup>30</sup> Yudaq gi, muk haû lé lhom yù eq, htoq ló byuq bê nghut ri. Haû u gi, mauchut bê nghut ri.

*Petruq He-ngik Pyám Râ Lé, Yesuq Te Tai É Hkyô*

*Mht 26:31-35; Mrk 14:27-31; Luk 22:31-34*

<sup>31</sup> Haú yuq htoq ló byuq jáng, Yesuq taí é gi, "Ahkuí, haû Byu Yhangzo gi, hpungwup shingkang dan hû é nghut luí, Garai Gasang gi, haû Byu Yhangzô é yanmai, hpungwup shingkang dan hu bê nghut ri.

<sup>32</sup> Garai Gasang gi, haû Byu Yhangzô é yanmai, hpungwup shingkang dan hû é nghut jáng, Yhang le, Yhang má haû Zo lé hpungwup shingkang dan hu nhâng râ nghut lhê; radá dâm dan hu nhâng râ nghut lhê.

<sup>33</sup> Ngá zo pé ê, Ngò, nungmoq eq rahá nyi râ gi, razup za ru nghut alô. Nungmoq gi, Ngo lé hô kó râ nghut lhê; nghut kôlhang, 'Ngò ló é jang má, nungmoq wó jé kó râ a nghut.' nghû, haû Yudaq byu pé lé, Ngò taí é eq rajung za, ahkuí, nungmoq lé le, Ngò taí lhê.

<sup>34</sup> Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum râ dut lhê.

<sup>35</sup> Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lhunglhang bang sé kó râ nghut lhê." gâ ri.

<sup>36</sup> Haú hkûn, Simun Petruq gi, "Yhumsîng ê, Nàng, hká shut ló râ lhú?" ga, Yhang lé myi jáng, Yhang gi, "Ngò ló é jang má, nungmoq, ahkuí a wó châng kó râ nghut lhê. Nghut kôlhang, htâng má gi, nungmoq cháng ra kó râ nghut lhê." ga tú taí ri.

<sup>37</sup> Petruq gi, "Yhumsîng ê, haí mù luí, ahkuí ngò Nàng htâng a wó châng é lhú? Ngò gi, Nàng é matú, shí hkám râ rì rì nghut lhê." ga taí ri.

<sup>38</sup> Haú mù, Yesuq taí é gi, "Nàng gi, gè gè yhang, Ngá é matú shí hkám râ lhú? Ngò, nàng lé teng za taí lé, woq a tûn shimá, nàng, Ngò lé sum dâm he-ngik pyám râ nghut lhê.

## 14

*Yesuq, Yhâng É Chángzô Pé Lé Nhik Tîng É Hkyô*

<sup>1</sup> Nungmoq é i-myt nhiklhum lé, myit wui myit hkê hkâdut nhâng kó. Garai Gasang lé lùm keq; Ngo lé le lùm keq.

<sup>2</sup> Ngá Wâ é yhûm má, nyi jowò myo myo joq lhê; a joq é ru nghut le gi, noq mai, Ngò, nungmoq lé taí kyo râ nghut lhê. Ngò, haú má ló é gi, nungmoq é nyi jowò ló hên lánng râ matú ru nghut lhê.

<sup>3</sup> Ngò gi, ló mù, nungmoq é matú nyi jowò ló hên é nghut jáng, Ngò nyi é jang má nungmoq le wó nyi shoq, Ngò eq rahá nyi râ matú, Ngò dum taú lé mù, nungmoq lé, lé shuí yù râ nghut lhê.

<sup>4</sup> Ngò ló é jang má jé é hkyô lé, nungmoq sê lhê." gâ ri.

*Yesuq Za Hkyô*

<sup>5</sup> Haú hkûn, Htomaq gi, Yhang lé, "Yhumsîng ê, Nàng hká shut ló é lé lhang, ngamoq a sê le nhîng, hkyô haû lé, ngamoq hkâsu kut wó sé râ lhú?" ga myi ri.

<sup>6</sup> Yesuq gi, "Ngò gi, hkyô nghut lhê; haú tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut.

<sup>7</sup> Nungmoq, gè gè yhang, Ngo lé sé kô é nghut le gi, Ngá Wâ lé le, nungmoq sé kó râ nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekô nghut lhê." ga tú taí ri.

<sup>8</sup> Haú hkûn, Hpilip gi, "Yhumsîng ê, ngamoq lé, haú Íwâ tûn shit laq, haú hkûn, ngamoq nhik shí râ nghut lhê." ga taí ri.

<sup>9</sup> Yesuq tú taí é gi, "Hpilip ê, Ngò, nungmoq eq shí myáng lhang nyi lò bê le nhîng, nàng, Ngo lé a sé lhú? Ngo lé myang é sù gi, haú Íwâ lé myàng bê nghut ri; haú nghut le nhîng, 'Ngamoq lé, haú Íwâ tûn shit laq.' nghû, nàng hkâsu wó taí lhê lhú?

<sup>10</sup> Ngò gi, haú Íwâ má nghut nyi luí, haú Íwâ gi, Ngò má nghut nyi é hkyô lé, nàng a lumjîng lhú? Ngò, nungmoq lé taí é dang haú pé gi, Ngá é myit mai taí é a nghut; haú Ngò má lûng nyi é Íwâ sheq, Yhâng é mù zuí nyi é ru nghut lhê.

11 Ngò gi, haù Íwa má nghut nyí luí, haù Íwa gi, Ngò má nghut nyí lhê nghû é lé lumjǐng keq; haù a nghut jáng, kut shit é limik kumlhá pé dông za lháng, lumjǐng keq.

12 Ngò, nungmoq lé teng za taí kôlé, Ngo lé lumjǐng é sù gi, Ngò kut é muzó lé kut râ nghut lhê. Ngò gi, haù Íwa chyáng ló râ nghut é yanmai, haù yuq gi, hau htoq je kô é muzó pé lé lháng kut râ nghut lhê.

13 Haù Yhangzô é yanmai, Íwa é hpungwup shingkang wó hù ló shoq, Ngá é myǐng lé lang luí, nungmoq haí jung dung kôlhang, Ngò gyo byi râ nghut lhê.

14 Nungmoq gi, Ngá é myǐng lé lang luí, haù dung kôlhang, Ngò gyo byi râ nghut lhê.

### *Chyoiyúng Woi-nyí Byi Râ Danggidid*

15 Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó râ nghut lhê.

16 Haù Íwa gi, nungmoq eq ahtum abyuq nyi nyi râ nghut é, hpaqchyí byi Sù gotú rayuq, nungmoq lé byi râ matú, Ngò gi, haù Íwa lé dung râ nghut lhê.

17 Haù yuq gi, tengmán é Woi-nyí nghut lhê. Haù mingkan gi, Woi-nyí haù lé a myàng a sê é yanmai, Yhang lé a wó hap yu é nghut lhê. Nghut kôlhang, Yhang gi, nungmoq eq rahá nyi nyi é nghut luí, nungmoq má nyi to râ Sù nghut é yanmai, nungmoq gi, Yhang lé sê akô.

18 Ngò gi, nungmoq lé, chuizô pé dông pyâm to râ a nghut; nungmoq chyáng Ngò dum jé lé râ nghut lhê.

19 Adê myáng má, haù mingkan gi, Ngo lé a myàng lo râ nghut lhê; nghut kôlhang, nungmoq gi, Ngo lé myàng kó râ nghut lhê. Hkâsu mù gâ le, Ngò gi, asak dui nyi é nghut mù, nungmoq le dui kó râ nghut lhê.

20 Ngò gi, Ngá Wâ chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haù buinyi má, nungmoq sé kó râ nghut lhê.

21 Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap râ nghut lhê; Ngò le, haù yuq lé chyitdap luí, Ngá gǔng lé yhang, yhang lé shit râ nghut lhê." gâ ri.

22 Hau htâng, (Yudaq Iskarut a nghut sù) Yudaq gi, "Yhumsǐng ê, Nàng gi, haù mingkan lé Náng gǔng a shit e za, ngamoq lé shit râ nghut é gi, haù mù nghut lhê lú?" ga myí ri.

23 Haù hkûn, Yesuq tú taí gi, "Rayuq yuq, Ngo lé chyitdap é nghut le gi, Ngá dang lé gyo râ nghut lhê. Ngá Wa le, haù yuq lé chyitdap râ nghut luí, Ngá hpe gi, haù yuq chyáng lé mù, yhang eq rahá nyi râ nghut lhê.

24 Ngo lé a chyitdap é sù gi, Ngá dang lé gyo râ a nghut. Nàng wó gyô é dang shí pé gi, Ngá myit mai taí é a nghut; dang haù pé gi, Ngo lé nhang kat é Sù, haù Íwa é ru nghut lhê.

25 Ngò gi, shí pé banshoq lé, nungmoq eq rahá nyi tô ashí u lé taí bê nghut lhê.

26 Nghut kôlhang, Ngá é myǐng dông, haù Íwa nhang kat râ nghut é, hpaqchyí byi Sù nghû é, haù Chyoiyúng Woi-nyí gi, nungmoq lé, jung hkangmó mhoq byi râ eq, Ngò, nungmoq lé taí kyo bê hkyô lhunglháng, nungmoq lé lhoq pun râ nghut lhê.

27 Ngò gi, nungmoq chyáng, nguingón hkyô tô to byi bê; Ngá é nguingón hkyô, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-myit nhiklhum lé, myit wui myit hke é eq gyuq kyûm é hkâdut nhâng kó.

28 'Ngò gi, ló byuq luí, nungmoq chyáng dum taù lé râ nghut lhê.' nghû, Ngò taí é lé, nungmoq wó gyô yù bê nghut lhê. Nungmoq, Ngo lé chyitdap kô é nghut le gi, haù Íwa chyáng Ngò ló râ nghut é hkyô lé, nungmoq gabú kó râ nghut lhê; hkâsu mù gâ le, haù Íwa gi, Ngá htoq je ko Sù nghut lhê.

29 Haù dut é hkûn, nungmoq lumjǐng kó sháng gaq nghû, ahkuí, haù a dut shimá, Ngò, nungmoq lé taí kyô é nghut lhê.

30 Ahkuí mai, Ngò gi, nungmoq lé, dang myo myo wó nyô râ a nghut lo; hkâsu mù gâ le, mingkan shi é zau gi, jé lé lo nyi bê nghut ri. Haù yuq gi, Ngo lé up râ ahkáng haí a wó é sù nghut ri.

31 Nghut kôlhang, haù Íwa lé Ngò chyitdap é hkyô, mingkan sé sháng gaq nghû, Ngò gi,

Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

## 15

### *Tsibiyiq Nuî Eq Akoq Pê É Hkyô*

<sup>1</sup> Ngò gi, haû tsibiyiq nuî akyîng nghut lhê; Ngá Wa gi, tsibiyiq hkyâm yhumsîng nghut lhê.

<sup>2</sup> Yhang gi, ashi a zuî é akoq hkangmó lé, Ngá chyáng mai kyik pyám luî, ashi zuî é akoq hkangmó lé kúm gi, ashi je myo zui sháng gaq ga, shang pyám byî ri.

<sup>3</sup> Nungmoq gi, Ngò, nungmoq lé taî é mungdang hau é yanmai, sanséng gû nghut bekô nghut ri.

<sup>4</sup> Ngò má nyi nyi keq; Ngò le, nungmoq má nyi nyi rá nghut lhê. Akoq hkangmó gi, tsibiyiq nuî má nuî nyi é za a nghut jáng, yhang baú ashi wó zuî é a nghut. Haû eq rajung za, nungmoq le, Ngò má nyi nyi e za a nghut jang, ashi wó zui kó rá a nghut.

<sup>5</sup> Ngò gi, tsibiyiq nuî nghut lhê; nungmoq gi, akoq pé nghut akô. Byù rayuq yuq, Ngò má nyi nyi é nghut luî, Ngò gi, yhang má nyi nyi é nghut jáng, haú yuq gi, ashi myo myo zui rá nghut lhê; hkâsu mù gâ le, Ngò mai gang jáng, nungmoq gi, haî le a wó kut kô é nghut lhê.

<sup>6</sup> Ngò má a nyi nyi é sù gi, haû dú pyâm é hui luî, kyuq shi byuq é akoq eq wuî ri; haû sù é akoq pé gi, byu pé èq guq yù mù, myihkyóm má dú kat pyâm é hui luî, nyé gyó byuq rá nghut lhê.

<sup>7</sup> Nungmoq gi, Ngò má nyi nyi luî, Ngá é dang pé gi, nungmoq má bo nyi é nghut le gi, nungmoq ô nau é haî nghut kôlhang, dung keq; haú hkûn, nungmoq lé byi rá nghut lhê.

<sup>8</sup> Nungmoq gi, haû ashi ga-myhó zuî é dông, Ngá Wâ é hpungwup shingkang lé lhoq htoq shit é nghut luî, Ngá é chángzô pé nghut é hkyô lé tûn shit nyî bekô nghut ri.

<sup>9</sup> Haû Îwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuî, Ngá é chyitdap myit má gîng nyi keq.

<sup>10</sup> Ngò gi, Ngá Wâ é hkunmó lé châng é nghut luî, Yhâng é chyitdap myit má gîng nyi é su, Ngá é hkunmó lé, nungmoq châng

nyi kô é nghut jáng, nungmoq gi, Ngá é chyitdap myit má gîng nyi kó rá nghut lhê.

<sup>11</sup> Nungmoq má Ngá é gabú hkyô joq nyi rá eq, nungmoq é gabú hkyô wó byîng jup rá matú, Ngò, nungmoq lé, dang shí pé taî é nghut lhê.

<sup>12</sup> Ngò, nungmoq lé chyitdap é su, nungmoq yhangchang chyitdap lhum keq; haû gi, Ngá é hkunmó nghut lhê.

<sup>13</sup> Haû yhumsîng é luzúm wui é matú, yhumsîng é asak ap byî pyâm é chyitdap myit htoq kô é, chyitdap myit gi, ó yuq chyáng le a bò nghut ri.

<sup>14</sup> Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wuî nghut bekô.

<sup>15</sup> Ngò gi, Ngá Wâ chyáng mai Ngò wó gyô yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wuî nghû, a wut lô e za, luzúm wuî nghû wut é nghut lhê; hkâsu mù gâ le, dui-nhâng zoshâng gi, yhâng yhumsîng hpô é muzó lé a châng sé nghut ri.

<sup>16</sup> Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gîng nyi é ashi zui rá matú hkyin masat tô é ru nghut lhê. Hau hkûn sheq, Ngá é myîng lé lang mù, haû Îwâ chyáng nungmoq haî jung dung kôle, Yhang byi rá nghut lhê.

<sup>17</sup> Nungmoq yhangchang chyitdap lhum keq; haû gi, Ngá é hkunmó nghut lhê.

### *Haû Mingkan Gi, Chángzô Pé Lé A Jú É Hkyô*

<sup>18</sup> Haû mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq.

<sup>19</sup> Nungmoq gi, haû mingkan eq sêng é bang nghut é nghut jáng, haû mingkan gi, yhang eq sêng é bang nungmoq lé chyitdap rá nghut lhê. Nghut kôlhang, nungmoq lé gi, Ngò, haû mingkan mai hkyin htoq yû bê nghut luî, nungmoq gi, haû mingkan eq a sêng lo kô é yanmai, mingkan gi, nungmoq lé a jú é nghut ri.

<sup>20</sup> 'Dui-nhâng zoshâng gi, yhâng é yhumsîng htoq je kô é a nghut.' nghû, Ngò, nungmoq lé taî é dang pé lé bûn nyi keq. Ngo lé lhang, yhangmoq zing-rî yù bekô nghut le

gi, nungmoq lé le, zing-ri kó râ nghut lhê. Ngò mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó râ nghut lhê.

<sup>21</sup> Nghut kôlhang, yhangmoq gi, Ngá é mying é yanmai, nungmoq lé haû su kut kó râ nghut lhê; hkâsu mù gâ le, haû Ngo lé nhang kat é Sû lé, yhangmoq a sé kôluî nghut ri.

<sup>22</sup> Yhangmoq lé, Ngò a lé nyo wú é nghut le gi, yhangmoq mara bò kó râ a nghut; nghut kôlhang, ahkuî gi, yhangmoq mara wó taî hkyut râ a nghut lo.

<sup>23</sup> Ngo lé a jú é sù gi, Ngá Wa lé le a jú é sù nghut ri.

<sup>24</sup> Haû ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó râ a nghut; ahkuî kúm gi, laklaí kumlhá haû pé lé yhangmoq myang nyi kôlhang, Ngò eq Ngá Wa lé a jú kô é nghut ri.

<sup>25</sup> Haû gi, 'Yhangmoq gi, jungúyô má Ngo lé a jú kut akô nghut ri.'<sup>☆</sup> ga, yhangmoq é tarâ má kê tô é dang lé lhoq dik é nghut ri.

<sup>26</sup> Haû Íwâ chyáng mâ é, Ngò nhang kat râ nghut é, Íwa mai htoq lé lo é tengmán é Woi-nyí nghut é, haû hpaqchyî byi Sû jé lé é hkûn, Ngá é hkyô lé saksé hkám byi râ nghut lhê.

<sup>27</sup> Nungmoq le, Ngò eq rahá sâng-hi mai nyi bekô nghut é yanmai, saksé hkám byi ra kó râ nghut lhê.

## 16

<sup>1</sup> Nungmoq gi, myit lingbat jowò a joq kó sháng gaq nghû, haû pé banshoq lé, Ngò, nungmoq lé taî kyo bê nghut lhê.

<sup>2</sup> Yhangmoq gi, nungmoq lé, tarajong mai hkat htoq pyám kó râ nghut lhê; ó yuq nghut kôle, yhang mai nungmoq lé sat pyâm é hkûn, yhang gi, haû đông mai Garai Gasang lé dojaú nyi lhê ga myit yu é ahkyíng, gè gè yhang, jé râ nghut lhê.

<sup>3</sup> Yhangmoq gi, haû Íwa lé le, Ngo lé le, a sé kô é yanmai, haû su kut kó râ nghut lhê.

<sup>4</sup> Nghut kôlhang, nungmoq lé, Ngò sidiq byi é hkyô lé, ahkyíng jé jáng nungmoq bûn nyi kó sháng gaq nghû, Ngò haû hkyô taî

kyô é nghut lhê. Ngò gi, nungmoq eq rahá nghut nyi é yanmai, haû hkyô lé, hí hkûn nungmoq lé a taî kyô é nghut lhê.

### *Chyoiyúng Woi-nyí é muzó*

<sup>5</sup> Nghut kôlhang, ahkuî, Ngò gi, Ngo lé nhang kat Su chyáng ló râ nghut lhê. Nghut kôlhang, nungmoq ó yuq le, 'Nàng, hká shut ló râ lú?' ga, Ngo lé a myi kó nghut ri.

<sup>6</sup> Ngò, nungmoq lé, haû hkyô pé taî kyô é yanmai, nungmoq é i-myit unghkaû má iyon hkyô byíng to bekô nghut ri.

<sup>7</sup> Nghut kôlhang, Ngò, nungmoq lé teng za taî kôlé, Ngò ló byuq é gi, nungmoq é matú je gè râ hkyô ru nghut lhê. Ngò ló byuq e za a nghut jáng, haû hpaqchyî byi Sû gi, nungmoq chyáng lé râ a nghut; Ngò ló jáng sheq, Yhang lé, Ngò, nungmoq chyáng nhang kat byi râ nghut lhê.

<sup>8</sup> Yhang jé lé é hkûn, Yhang gi, haû mara wó é eq séng luí le, dingmán hkyô eq séng luí le, tarâ jéyáng hkyô eq séng luí le, haû mingkan lé tún shit râ nghut lhê.

<sup>9</sup> Haû yubak mara wó é eq séng luí ga jang, byu pé gi, Ngo lé a lumjíng kô é yanmai nghut ri.

<sup>10</sup> Haû dingmán hkyô eq séng luí ga jang, Ngò gi, haû Íwâ chyáng ló râ nghut luí, nungmoq, Ngo lé a myàng lo kó râ nghut é yanmai nghut ri.

<sup>11</sup> Haû tarâ jéyáng hkyô eq séng luí ga jang, mingkan shi é zau gi, mara byi é huí é nghut é yanmai nghut ri.

<sup>12</sup> Ngò gi, nungmoq lé taî râ hkyô myo myo wó ashî; nghut kôlhang, ahkuî, nungmoq wó hkâm kó râ a nghut.

<sup>13</sup> Nghut kôlhang, haû tengmán é Woi-nyí jé lé é hkûn, Yhang gi, tengmán hkyô lunglhang lé shuí sé râ nghut lhê. Yhang gi, Yhâng myit đông taí râ a nghut; Yhang, wó gyô yu é hkyô lé za taî luí, dut lò râ hkyô pé lé le, nungmoq chyáng taî pyô râ nghut lhê.

<sup>14</sup> Yhang gi, Ngò wó é lé, yù mù, nungmoq lé taî kyô é eq sé nhang é đông, Ngá é hpungwup shíngkang lé hú ló nhâng râ nghut lhê.

15 Haú Îwa wó é lhunglhang gi, Ngá é chyat nghut lhê. Hau é yanmai, haú Woinyí gi, Ngò wó é lé yù mù, nungmoq lé sé nhâng rá nghut lhê nghû, Ngò taí é nghut lhê.

16 Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê." gâ ri.

*Changzô Pé É Iyon Hkyô Gi, Gabú Hkyô Taú Dut Râ*

17 Yhâng é chángzô pé ra-am gi, "Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê.' gâ é eq 'Ngò gi, Îwâ chyáng ló rá nghut é yanmai nghut lhê.' ga, Yhang taí é gi, hái jung gá nau é nghut lhê lú?" ga, rayuq eq rayuq myí lhum bum akô.

18 Hau htoq agó, yhangmoq gi, "Adê myáng má,' gâ é gi, Yhang hái jung gá nau lhê lú? Nga-nhung gi, Yhang hái taí nau é lé a sê gyo." ga, taí lhum bum akô nghut ri.

19 Yesuq gi, yhangmoq myi naú kô é hkyô lé sê ri; haú mù, Yhang, yhangmoq lé taí é gi, "Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê.' nghû, Ngò taí é lé, hái jung gá nau lhê laq nghû, rayuq eq rayuq myi lhum nyi akô lú?"

20 Ngò, nungmoq lé teng za taí kôlé, haú mingkan gi, gabú nyi é u lé, nungmoq gi, ngaú é eq iyon yón é hui kó rá nghut lhê. Nungmoq gi, iyon yón é hui kó rá nghut lhê; nghut kôlhang, nungmoq é iyon hkyô gi, gabú hkyô taú dut rá nghut lhê.

21 Myiwe gi, zoshâng hkû rá nghut jáng, zohkû-nò nò rá ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkûn gi, mingkan htoq má zoshâng rayuq wó hku to bê nghut luí, yhang gabú é yanmai, haú no hpu é hkyô lé a bun byuq lo nghut ri.

22 Haú eq rajung za, ahkuí gi, nungmoq iyon yón é ahkyíng nghut ri; nghut kôlhang, Ngò, nungmoq lé dum huí é hkûn, nungmoq gi, gabú kó rá nghut lhê; nungmoq é gabú hkyô haú lé, nungmoq chyáng mai ó yuq eq le wó yu pyám byi rá a nghut.

23 Haú buinyi má, nungmoq gi, Ngo lé, haí le a dung lo kó rá nghut lhê. Ngò, nungmoq lé teng za taí kôlé, nungmoq gi, Ngá myíng lang luí, Ngá Wâ chyáng hái dung kôlé, Yhang byi rá nghut lhê.

24 Ahkuí jé shoq, nungmoq gi, Ngá myíng lé lang luí, haí le a dúng wú shi kó nghut ri. Dung keq, haú hkûn, nungmoq myang hap yù kó rá nghut luí, nungmoq é gabú hkyô gi, byíng jup lò rá nghut lhê.

25 Ngò gi, nungmoq lé, dangtú dông haú pé taí kyo bê nghut lhê; nghut kôlhang, Ngò gi, dangtú a chùng lô e za, haú Îwa eq sêng é hkyô, nungmoq lé san za taí kyô é ahkyíng jé rá nghut lhê.

26 Haú buinyi má, nungmoq gi, Ngá é myíng lé lang luí dung kó rá nghut lhê. Ngò gi, nungmoq é matú, haú Îwâ chyáng dung byi rá nghut taí nyi é a nghut.

27 Hkâsu mù gâ le, nungmoq gi, Ngo lé chyitdap kô é eq, Ngò gi, Îwa Garai Gasâng chyáng mai jé lé é Sù nghut é lé, nungmoq lumjíng kô é yanmai, haú Îwa yhang, nungmoq lé chyitdap é nghut lhê.

28 Ngò gi, haú Îwâ chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haú Îwâ chyáng dum taú ló rá nghut lhê." gâ ri.

29 Haú hkûn, Yesuq é chángzô pé gi, "Ahkuí, Nang gi, dangtú a chùng é dông, san za taí kyô nyi é nghut bê!"

30 Nang gi, lhunglhang lé sê é sù nghut é lé le, Nang lé, ó yuq eq le dangmyi myi nó a rá é hkyô lé le, ahkuí, ngamoq wó sé bê. Hau é yanmai, Nang gi, Garai Gasâng chyáng mai lé é sù nghut é lé, ngamoq lumjíng lhê." ga taí bum akô.

31 Haú hkûn, Yesuq tû taí é gi, "Nungmoq, ahkuí lumjíng bekô lú?"

32 Nghut kôlhang, nungmoq gi, lhoq pyo pyâm é hui luí, Ngo lé baú za tô pyâm to kômù, ó le ô yhâm shut ló byuq rá ahkyíng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

33 Nungmoq gi, Ngò má nguínón hkyô wó kó sháng gaq nghû, Ngò gi, haú hkyô pé lé taí kyô é nghut lhê. Nungmoq gi,



mingkan shí má, wuîhke hkyô hui kó râ nghut lhê; nghut kôlhang, myit wum lhoq kîng keq. Ngò gi, mingkan lé ung pyám bê nghut lhê." gâ ri.

## 17

### *Yesuq Kyûdûng É Hkyô*

<sup>1</sup> Yesuq gi, haû su ga taî é htâng má, mauhkûng shut tu wú luî, kyûdûng é gi, "Áwa ê, ahkýing jé bê nghut ri; haû Nung Zo gi, Nang lé hpungwup shing kang wó hu nhâng sháng gaq, Nung Zo lé hpungwup shing kang hû ló nhâng laq ô!

<sup>2</sup> Hkâsu mù gâ le, Nang mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nang gi, byû lhunglhang bang lé up râ ahkáng, Yhang lé byi tô é yanmai nghut ri.

<sup>3</sup> Nang za tengmán é Garai Gasang nghut é eq Nang nhang kat é sù Yesuq Hkrisduq lé, sê é gi, ahtum abyuq é asak nghut lhê.

<sup>4</sup> Ngò gi, Nang, Ngo lé wûn waq nhang é muzó lé lhoq pán é dông, myidàm htoq má, Náng é hpungwup shing kang lé lhoq htoq shit bê nghut lhê.

<sup>5</sup> Áwa ê, haû mingkan lhang a joq shî mai, Ngò, Nang eq rahá chôm wó é hpungwup shing kang èq, ahkuî, Náng é myoq hí má, Ngo lé hpungwup shing kang dan hu nhâng laq.

*Chángzô pé matú, Yesuq kyûdung byi é hkyô*

<sup>6</sup> Mingkan mai, Nang, Ngo lé hkyin htoq yû byi é bang lé, Ngò gi, Náng é mying lhoq htoq shit bê nghut lhê. Yhangmoq gi, Náng é byu pé nghut bekô; Nang gi, yhangmoq lé, Ngá é loq má ap byi bê nghut luî, yhangmoq gi, Náng é dang lé châng kut bekô nghut ri.

<sup>7</sup> Nang, Ngo lé byi é lhunglhang gi, Náng chyáng mâ é nghut é lé, ahkuî, yhangmoq sé bekô nghut ri.

<sup>8</sup> Hkâsu mù gâ le, Nang, Ngo lé byi kat é mung dang pé lé, Ngò, yhangmoq lé byi bê nghut luî, yhangmoq gi, haû pé lé hap yû bekô nghut ri; Ngò gi, Náng chyáng mai lé é sù nghut é lé le, yhangmoq hkyak sê akô; Nang, Ngo lé nhang kat é hkyô lé le, yhangmoq lumjîng bekô nghut ri.

<sup>9</sup> Ngò gi, yhangmoq é matú kyûdung byi lhê. Ngò gi, haû mingkan byu pé é matú dung byi nyi é a nghut; Nang, Ngo lé ap byi tô é bâng é matú sheq dung byi nyi é ru nghut lhê; hkâsu mù gâ le, yhangmoq gi, Náng é byu pé nghut akô.

<sup>10</sup> Ngò wó é lhunglhang gi, Náng é chyat nghut mù, Nang wó é lhunglhang le, Ngá é chyat nghut lhê. Haû mù, Ngò gi, yhangmoq má hpungwup shing kang hû é hui bê nghut lhê.

<sup>11</sup> Ngò gi, Nang chyáng lò râ nghut lhê mù, mingkan htoq má nyi nyi râ a nghut lo; nghut kôlhang, yhangmoq gi, mingkan htoq má nyi nyi shirâ nghut lhê; chyoiyung é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nang, Ngo lé byi é, haû Náng mying é a-tsam eq yhangmoq lé upzúng nyi aq.

<sup>12</sup> Ngò gi, yhangmoq eq rahá nghut nyi é u lé, yhangmoq lé upzúng bê nghut luî, Nang, Ngo lé byi é mying hau èq, yhangmoq lé rago zúng bê nghut lhê. Haû Chyúmdang lhoq dik sháng gaq ga, haû bang mâ é htên byoq hui râ sù mai lai luî, ó yuq le a byuq byuq é nghut lhê.

<sup>13</sup> Ngò gi, ahkuî, Náng chyáng lò râ nghut bê; nghut kôlhang, Ngá é gabú hkyô gi, yhangmoq chyáng bying jup sháng gaq nghû, Ngò gi, haû pé lé mingkan má taî é nghut lhê.

<sup>14</sup> Ngò gi, yhangmoq lé, Náng é mung dang byi bê nghut lhê; haû mingkan gi, yhangmoq lé a jú nghut ri; hkâsu mù gâ le, Ngò gi, mingkan mâ é a nghut é su, yhangmoq le, mingkan mâ é a nghut kô é yanmai nghut ri.

<sup>15</sup> Ngò kyûdûng é gi, Nang, yhangmoq lé mingkan mai shuí htoq yû râ matú dũng é a nghut, haû agè ashop su chyáng mai, yhangmoq lé upzúng yû râ matú sheq dũng é ru nghut lhê.

<sup>16</sup> Ngò gi, mingkan mâ é a nghut é su, yhangmoq le, mingkan mâ é a nghut kó.

<sup>17</sup> Yhangmoq lé, haû tengmán hkyo èq lhoq sân-yung yû laq; Náng é mung dang gi, tengmán hkyô nghut ri.

<sup>18</sup> Nang, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lhê.

<sup>19</sup> Yhangmoq lé, tengmán hkyô má wó lhoq sân-yúng yû kó sháng gaq nghû, Ngò gi, yhangmoq é matú, yhumsing gùng lé lhoq sân-yúng yu é nghut lhê.

*Lumjǐng Bang Lhunglhâng É Matú, Yesuq Kyûdung Byî É Hkyô*

<sup>20</sup> Ngò gi, yhangmoq é matú baú za kyûdung byî é a nghut; Yhangmoq é danglu é yanmai, Ngo lé lumjǐng kó râ bâng é matú le, Ngò kyûdung byî é nghut lhê.

<sup>21</sup> Haú mù, yhangmoq banshoq bang gi, rading ralhum za dut nyi kó sháng gaq. Haú mingkan gi, Nàng, Ngo lé nhang kat é hkyô lé wó lumjǐng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq.

<sup>22</sup> Ngá hpe gi, ragùng za nghut é su, yhangmoq le, rading ralhum za dut nyi kó sháng gaq nghû, Ngò gi, Nàng, Ngo lé byî é hpungwup shingkang lé, yhangmoq lé byi bê nghut lhê.

<sup>23</sup> Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, haú mingkan wó sé râ matú, yhangmoq gi, gumjup shoq rading ralhum za wó dut kó sháng gaq nghû, Ngò gi, yhangmoq má nyi nyi luí, Nàng gi, Ngò má nyi nyi é nghut lhê.

<sup>24</sup> Áwa ê, haú mingkan lháng a joq shi mai, Nàng, Ngo lé chyitdap luí byi tô é hpungwup shingkang haú lé, Nàng, Ngo lé byi tô é bang, wó myàng kó râ matú le, Ngò nyi é jang má, Ngò eq rahá wó nyi kó râ matú le, Ngò ô nau ri.

<sup>25</sup> Dingmán é Áwa ê, haú mingkan gi, Nang lé a sé kôhang, Ngò gi, Nang lé sé lhê; Nàng, Ngo lé nhang kat é hkyô lé gi, yhangmoq sé akô nghut ri.

<sup>26</sup> Nàng, Ngo lé chyitdap é chyitdap myit gi, yhangmoq má wó joq nyi râ matú le, Ngò gi, yhangmoq má wó nyi nyi râ matú le, yhangmoq lé, Ngò, Nang é hkyô sé nhâng bê nghut luí, xoq mù sé nhang nyi shirâ nghut lhê." gâ ri.

## 18

*Yesuq Chyup Yû Huí É Hkyô*

*Mht 26:47-56; Mrk 14:43-50; Luk 22:47-53*

<sup>1</sup> Yesuq gi, haú su ga kyûdung é htâng má, Yhâng é chángzô pé eq rahá, Kedron wuìhkung mai laí byit dap ló luí, haú hpoq má joq é hkyâm ralhum má wang e akô nghut ri.

<sup>2</sup> Hkyâm haú gi, Yesuq eq Yhâng é chángzô pé lhaq hui hui kut é jowò nghut é yanmai, haú Yesuq lé ap pyám râ sù Yudaq le sé ri.

<sup>3</sup> Haú mù, Yudaq gi, haú hkyangjong agyi pé eq Hparishe pê chyáng mai nhang kat é noqkuq yhûm zúng bang ra-am eq gyezo rajùm lé, haú jowò shut shuí wang lé lo ri. Haú bang gi, myihu, myibung eq shâm lhâm pé chung lé lo akô.

<sup>4</sup> Yesuq gi, Yhang má dut lò râ hkyô lhunglháng lé sé gû nghut mù, htoq ê luí, yhangmoq lé, "Nungmoq, ó yuq lé ho akô lhú?" ga myî ri.

<sup>5</sup> Haú hkûn, yhangmoq gi, "Nazaret wà byù Yesuq lé ho lhê." ga tú taí kôjáng, Yesuq gi, "Ngò gi, haú yuq nghut lhê." ga taí ri. (Yesuq lé ap pyám sù Yudaq le, yhangmoq eq rahá yap tô ri.)

<sup>6</sup> "Ngò gi, haú yuq nghut lhê." ga Yesuq taí kat é hkûn jáng, yhangmoq gi, nungzut zut mù, myigùng má lêng leq ló bum akô nghut ri.

<sup>7</sup> Yhang gi, "Nungmoq, ó yuq lé ho akô lhú?" ga, yhangmoq lé dum myî kat jáng, yhangmoq gi, "Nazaret wà byù Yesuq lé ho lhê." ga taí akô.

<sup>8</sup> Haú hkûn, Yesuq gi, "Ngò gi, haú yuq nghut lhê nghû, nungmoq lé taí kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tú taí ri.

<sup>9</sup> Haú gi, "Nàng, Ngo lé byi tô é bang rayuq le lháng, Ngò, a lhoq hpyuq pyám." ga, Yhang taí tô é dang dik râ matú nghut ri.

<sup>10</sup> Haú hkûn, Simun Petruq gi, shâm wun tô é nghut luí, shâm shê mù, haú hkyangjong mó é dui-nhâng zôshang é loqyo nohkyap lé zân hpyit kat byî ri. (Dui-nhâng zoshâng haú yuq é myìng gi, Malhku gâ ri.)

11 Haû mù, Yesuq gi, Petruq lé, "Náng é shâm lé, shambyâng má xâng pyám aq! Haû Íwa, Ngo lé byí é góm\* lé, Ngò a shuq é wó nyí râ l hú?" ga taí kat ri.

*Yesuq Lé, Anna Chyáng Shuí E É Hkyô*  
*Mht 26:57-58; Mrk 14:53-54; Luk 22:54*

12 Hau htâng, gyezo haú jûm eq yhangmoq é gyezau hpó, Yudaq byu pé é ming-suwún wuî gi, Yesuq lé chyup yû mù, tuí akô nghut ri.

13 Yhangmoq gi, haú zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akô nghut ri.

14 Kayahpaq gi, byu pé é matú rayuq shí hkám byí le je gè râ nghut lhê ga, haú Yudaq byu pé lé hpaqchyí byí é sù yuq nghut ri.

*Yesuq Lé, Petruq Sâng-hi Dam He-ngik Pyâm É Hkyô*

*Mht 26:69-70; Mrk 14:66-68; Luk 22:55-57*

15 Simun Petruq eq gotû chángzo rayuq gi, Yesuq htâng châng e ló akô nghut ri. Gotû chángzo haú yuq gi, hkyangjong mó lé rago sê lhê nghut mù luí, hkyangjong mó é yhumwàng hkaú shut, Yesuq é htâng má châng wang ló ri.

16 Petruq kúm gi, hkúmdong shinggan má láng yap tô ri. Haú hkyangjong mó lé rago sê é sù, gotû chángzo haú yuq gi, taú htoq ló mù, hkum zúng é myiwe myhí lé taí luí, Petruq lé shuí hâng yu ri.

17 Haú hkûn, haú hkum zúng é myiwe myhí gi, Petruq lé, "Nàng gi, haú yuq é chángzô pé mâ é rayuq a nghut lhú?" ga myi jáng, yhang gi, "Ngò a nghut." ga tû taí ri.

18 Haú u lé, gyoq é yanmai, dui-nhâng zoshâng wuî eq noqkuq yhûm zúng bang gi, yhangmoq gyoq gâng râ matú myigyê èq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

*Yesuq Lé, Hkyangjong Mó Myí Choq Wú É Hkyô*

*Mht 26:59-66; Mrk 14:55-64; Luk 22:66-71*

19 Haú u lé, haú hkyangjong mó gi, Yesuq lé, Yhâng é chángzô pé hkyô eq Yhâng mhoqshit é hkyô eq séng luí myí ri.

20 Haú hkûn, Yesuq gi, "Haú mingkan htoq má, Ngò, de de taí bê nghut lhê. Ngò gi, haú Yudaq byu pé banshoq bang chôm zing é, tarajong pé má le, noqkuq yhûm má le, ayang mhoqshit é nghut lhê. Ngò gi, haq zaú luí taí é hkyô haí le a joq.

21 Nàng, haí mù Ngo lé myi lhê lhú? Haú, Ngò taí é lé wó gyô é bang lé myi aq; Ngò haí taí é hkyô lé, yhangmoq gè gè sê akô nghut ri." ga tû taí ri.

22 Yesuq haú su ga taí jáng, haú nàm má nyi tô é noqkuq yhûm zúng sù rayuq gi, Yhang lé pyuq kat luí, "Hkyangjong mó lé wá, Nàng, haú su nghú dang tû lhê lhú?" ga taí ri.

23 Haú hkûn, Yesuq gi, "Ngò taí shut é nghut le gi, shut é hkyô lé saksé tûn shit aq. Nghut kôlhang, Ngò gi, têng é dông ru taí le nhîng, nàng, haí mù Ngo lé pyuq lhê lhú?" ga tû taí ri.

24 Hau htâng, Anna gi, Yhang lé tuí to gù, haú hkyangjong mó Kayahpaq chyáng dé kat nhang ri.

*Yesuq Lé, Petruq Xoq He-ngik Pyâm É Hkyô*

*Mht 26:71-75; Mrk 14:69-72; Luk 22:58-62*

25 Haú Simun Petruq gyoq gang yap tô é hkûn, "Nàng gi, Yhâng é chángzô pé mâ é rayuq a nghut lhú?" ga, yhang lé myi kôjáng, yhang gi, "Ngò a nghut." ga, dum he pyâm ri.

26 Haú Petruq eq nohkyap zân hpyit pyám byí é huí su é buinùm nghut é sù, haú hkyangjong mó é dui-nhâng zoshâng rayuq gi, yhang lé, "Haú hkyâm má, nàng, Yhang eq rahá nghut nyi é lé, ngò a myang é su ngam lhê lhú?" ga taí ri.

27 Haú hkûn, Petruq gi, xoq he pyám ri; haú u yhang, woq tûn bê nghut ri.

*Pilat É Myoq Hí Má, Yesuq Jé Nyi É Hkun Lhê Hkyô*

*Mht 27:1-2, 11-14; Mrk 15:1-5; Luk 23:1-5*

\* 18:11 Góm lé shuq gâ é gi, jamjau hui râ eq shí hkám râ lé, taí nau é nghut lhê.

28 Hau htâng, yhangmoq gi, Yesuq lé, Kayahpaq chyáng mai, haû mauzau hpô é yhûmwàng shut shuî e ló akô. Haû u gi, napsûn noq ashî nghut ri. Yhangmoq gi, agot a-û a dut e za, htûngli dông Lhoqlhai Poî lé wó zo râ matú, yhûmhkaû má a wàng kó nghut ri.

29 Haû mù luî, mauzau Pilat gi, yhangmoq chyáng htoq é mù, "Shí yuq lé, nungmoq hai mara hûn nau akô lú?" ga myî ri.

30 Haû hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é loq má ngamoq lé ap byi râ a nghut." ga tù taî akô.

31 Pilat gi, "Yhang lé, nungmoq yhang shuî ló mù, nungmoq é tarâ dông ló jéyáng keq." ga taí jáng, haû Yudaq byu pé gi, "Nghut kôlhang, ngamoq gi, ó yuq lé sat râ ahkáng le a wó é nghut lhê." ga tù taî akô nghut ri.

32 Haû su dut é hkyô gi, Yesuq, Yhang hká dông shî râ ga taí é dang lé lhoq dik râ matú nghut lhê.

33 Haû mù, Pilat gi, yhûmhkaû má taû wang ló mù, Yesuq lé wut yù luî, "Nàng gi, Yudaq byu pé é hkohkâm nghut lhê lú?" ga myî ri.

34 Haû hkûn, Yesuq gi, "Haû gi, náng é myit dông taí é nghut lhê lú? A nghut jáng, góbang mai, nang lé, Ngá é hkyô taí kyo luî nghut lhê lú?" ga taû myî ri.

35 Pilat gi, "Ngò gi, Yudaq byù nghut lhê lú? Haû Náng é byù myú eq Náng é hkyangjong agyi pé sheq, Nang lé, ngá loq má ap byi é ru nghut lhê. Nàng gi, hai kut é nghut lhê lú?" ga dum myî ri.

36 Haû hkûn, Yesuq gi, "Ngá é mingdán gi, mingkan shî eq a séng. Mingkan shî eq séng é ru nghut le gi, haû Yudaq byu pé, Ngo lé a wó chyup yu lo shoq, Ngá é dui-nhâng zoshâng wuî, Ngo lé chôm hung yù kó râ nghut lhê. Nghut kôlhang, Ngá é mingdán gi, mingkan shî eq a séng é ru nghut lhê." ga taî ri.

37 Haû mù, Pilat gi, "Haû jáng, Nàng gi, hkohkâm nghut bê lú?" ga myi jáng, Yesuq gi, "Ngo lé, hkohkâm nghut lhê ga, nàng taí nyi é jô ri. Gè gè ga jáng, Ngò gi, hau é yanmai hku lé lo é sù nghut lhê; haû tengmán hkyô lé saksé hkám râ matú, Ngò,

mingkan htoq má jé lé é nghut lhê. Haû tengmán hkyô eq séng é sù ó yuq le, Ngá é dang lé gyô ri." ga tù taî ri.

38 Haû hkûn, Pilat gi, "Tengmán hkyô gâ é gi, hai jung lú?" ga myî ri. Yhang gi, haû su ga myi luî, haû Yudaq byu pé chyáng dum htoq é mù, "Shí yuq chyáng mara hûn râ hkyô, ngò a myàng nghut ri.

39 Nghut kôlhang, haû Lhoqlhai Poî u lé, nungmoq é matú, ngò, htóng byù rayuq nhang htoq kat byi byi kut é htûng, nungmoq wó akô. Haû mù, 'Yudaq byu pé é hkohkâm' lé, nhang htoq kat byi râ lé, nungmoq ô nau akô lú?" ga myî ri.

40 Haû hkûn, yhangmoq gi, "Haû yuq lé a nghut! Barabaq lé sheq nhâng byi aq." ga, garû kat akô. Barabaq gi, damyaq nghut ri.

## 19

*Yesuq Lé, Tapzîng Má Jén Sat Râ Matú Doqdân É Hkyô*

*Mht 27:15-31; Mrk 15:6-20; Luk 23:13-25*

1 Haû mù luî, Yesuq lé lêng she yù mù, nhuq bat râ matú, Pilat hkunmó hkyô ri.

2 Haû gyezô pé gi, zujanmaú saî yù kôluî, Yesuq é ulhum má tsung byi kômù, Yhang lé, buhîng nè hut byi akô nghut ri.

3 Hau htâng, yhangmoq gi, Yhâng chyáng dum huî ê ê kut luî, "Yudaq byu pé é hkohkâm ê! Chyung hîng xê hîng nyi sháng gaq ô!" ga taí kômù, Yhâng é myoqdong má pyuq byi akô nghut ri.

4 Pilat gi, haû Yudaq byu pé chyáng radàm dum htoq é mù, "Wú keq, shí yuq chyáng mara hûn râ hkyô, ngò a myang é lé nungmoq sé sháng nghû, Yhang lé, ngò nungmoq chyáng shuî htoq lé byi lhê." ga taî ri.

5 Yesuq gi, haû zumuq tsûng tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga taî ri.

6 Haû hkyangjong agyi pé eq yhangmoq é noqkuq yhûm zûng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garû bum akô.

Nghut kôlhang, Pilat gi, "Nungmoq shuî yù mù, tapzîng má jén sat keq. Ngò gi,

Yhâng chyáng mara hûn râ hkyô a myàng." ga tû taí ri.

<sup>7</sup> Haú hkûn, haú Yudaq byu pé gi, "Ng-amoq chyáng tarâ rahkat joq lhê; tarâ haú dông ga jang, Yhang gi, shî gíng bê nghut ri; hkâsu mù gâ le, Yhang gi, Garai Gasâng é Yhangzo haú nghut lhê gâ ri." ga xoq taí akô.

<sup>8</sup> Pilat gi, dang haú lé wó gyo jáng, je gyô gyuq luí,

<sup>9</sup> yhúmhaú shut dum wang ló mù, Yesuq lé, "Nàng, hkâmâ é sù nghut lhê lú?" ga myí ri. Nghut kôhang, Yesuq gi, dang rahkun lhang a tû taí byi nghut ri.

<sup>10</sup> Haú hkûn, Pilat gi, "Nàng, ngo lé a tû taí kut lhê lú? Ngò gi, Nàng lé, wó lhoq lhut kat é eq tapzîng má wó jén sat pyâm é ahkáng wó sù nghut é lé, Nàng a sé lú?" ga myí ri.

<sup>11</sup> Yesuq gi, "Nàng lé, haú ahtoq mai ahkáng byí e za a nghut le gi, nàng, Ngo lé haí kut râ a-tsam le wó râ a nghut. Haú mù luí, Ngo lé, nàng é loq má ap byí é sù gi, mara je bo é nghut lhê." ga tû taí ri.

<sup>12</sup> Haú hkûn mai, Pilat gi, Yesuq lé lhoq lhut kat byi nau nyi bê nghut ri. Nghut kôhang, haú Yudaq byu pé gi, "Nàng, haú yuq lé nhang pyâm é nghut jáng, nàng gi, hkoséng Kehtaq é luzúm a nghut lo; yhum-sing gùng lé, hkohkâm gâ é sù gi, hkoséng Kehtaq eq shai lhúm é sù nghut lhê." ga, ru jáng garú nyi bum akô nghut ri.

<sup>13</sup> Haú lé wó gyo jáng, Pilat gi, Yesuq lé shuí htoq ê mù, Hebre myíng dông Gabahta gâ é Luqgok hkâng myhang to jang nghu é jowò mã é tarâ jéyáng tanghkuq má zung tô ri.

<sup>14</sup> Haú u gi, Lhoqlhai Poí é matú, Hên Lajâng é Buinyi nyí-káng raxe í hkyíng nghut ri.

Pilat gi, haú Yudaq byu pé lé, "Nungmoq é hkohkâm lé wú keq." ga taí ri.

<sup>15</sup> Nghut kôhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garú bum akô.

Haú hkûn, Pilat gi, "Nungmoq é hkohkâm lé wá, ngò, tapzîng má jén sat pyám râ lú?" ga myi jáng, haú hkyangjong agyi pé

gi, "Haú hkoséng Kehtaq mai lai luí, gotú hkohkâm ngamoq a wó." ga, tû taí akô nghut ri.

<sup>16</sup> Hau htâng má, Pilat gi, Yesuq lé tapzîng má jén sat pyám râ matú, yhangmoq é loq má ap byí kat bê nghut ri. Haú mù luí, yhangmoq gi, Yesuq lé shuí ló bekô nghut ri.

### *Tapzîng Má Jén Pyâm É Hkyô*

*Mht 27:32-44; Mrk 15:21-32; Luk 23:26-43*

<sup>17</sup> Yesuq gi, yhumsing é tapzîng lé waq mù, Hebre myíng dông Golgahta gâ é, Ugyap joq é Jowò gâ é jang má htoq jé e ri.

<sup>18</sup> Yhangmoq gi, haú má, Yesuq lé tapzîng htoq má jén tap pyám akô; Yhang eq rahá, gotú í yuq lé le, rahkyam shut rayuq kut jén to kô é nghut luí, Yesuq gi, gyoro má nghut ri.

<sup>19</sup> Pilat le, masat laiká kê yù luí, haú tapzîng htoq má tap tô ri. Haú má gi, "YUDAQ BYU PÉ É HKOHKÂM, NAZARET WÀ BYÜ YESUQ" gâ tô ri.

<sup>20</sup> Yesuq lé jén tô é jowò gi, myuq eq chyâng lhúm é htoq agó, haú masat laiká gi, Hebre dông le, Latin dông le, Grik dông le, kê tô é yanmai, haú Yudaq byu pé myo myo gi, masat laiká haú lé nghap bum akô nghut ri.

<sup>21</sup> Haú Yudaq byu pé é hkyangjong agyi pé gi, Pilat lé, "'Yudaq byu pé é hkohkâm' nghú hkâká, 'Ngò gi, Yudaq byu pé é hkohkâm nghut lhê ga, Yhang taí ri.' nghú luí sheq ká aq." ga taí akô.

<sup>22</sup> Haú hkûn, Pilat gi, "Ngò kê é dông, ngò kê to bê nghut lhê." ga tû taí ri.

<sup>23</sup> Haú gyezô pé gi, Yesuq lé tapzîng má jén tap pyám é htâng má, Yhâng é mebu pé lé yù mù, myí hkyam gàm luí, rayuq rahkyam yu akô; haú ahte bu lé le, gàm râ dâ akô; nghut kôhang, haú gi, hkyupshi a bo e za, awang mai ahpyo hpyot kut woq tô é nghut ri.

<sup>24</sup> Haú mù, yhangmoq gi, "Bu shî lé gi, a lêng cheq e za, ó yuq myang yù ang râ laq, hkyîn shosé she wú sháng." ga, rayuq eq rayuq taí lhum akô.

Haú gi,

"Yhangmoq, Ngá é mebu lé chôm gam yù kó râ; Ngá é ahtê bú é matú, hkyîn shosé shê kó râ nghut lhê."\*

gâ é Chyúmdang lé lhoq dik râ matú dut é nghut lhê. Haû mù, gyezô pé gi, haû su kut bekô nghut ri.

<sup>25</sup> Haû Yesuq é tapzîng nàm má gi, Yhângnu, Yhângnû é yhanggu byizo eq, Klopa é yhangmyi Mariq eq Magadalaq wâ mâ é Mariq pé, yap tô bum akô.

<sup>26</sup> Yesuq gi, Yhang nàm má, Yhang chyitdap é chángzo eq Yhâng nu yap tô é lé myang kat jáng, Yhâng nu lé, "Ánu ê\* nung zo lé wú aq." ga taí mù,

<sup>27</sup> chángzo haû lé le, "Náng nu lé wú aq." ga taí ri. Haû hkûn mai, chángzo haû yuq gi, Yesuq é yhângnu lé, yhâng é yhûm shut shuí ló bê nghut ri.

### *Yesuq Soqkâng Byit É Hkyô*

*Mht 27:45-56; Mrk 15:33-41; Luk 23:44-49*

<sup>28</sup> Hau htâng, Yesuq gi, ahkuí, muzó bàn bê nghut é lé sé luí, haû Chyúmdang lhoq dik râ matú, "Ngò, wuì shit ri." ga taí ri.

<sup>29</sup> Haû má, tsibiyiq wing chyîn rayambú joq tô ri; haû mù, yhangmoq gi, wuìmaù lé tsibiyiq wing chyîn haû má jum yù luí, jàngyang ahyo má tuí tap mù, Yhâng é nhutwuí jé shoq yhun byi akô nghut ri.

<sup>30</sup> Yesuq gi, tsibiyiq wing chyîn haû lé shuq yù mù, "Mù bàn bê." ga taí ri. Yhang, haû su ga taí eq yhang, ulhum nghuq ló mù, kâng byit bê nghut ri.

<sup>31</sup> Htang nyí gi, ahkyak é Bánno buinyi nghut luí, haû nyí gi, Hên Lajang Buinyi nghut ri. Haû mù, Yudaq byu pé gi, Bánno buinyi má, mâng pé lé tapzîng htoq má a joq to nhâng naù kô é yanmai, hkyî pé lé bat hkyuí pyám mù, mâng pé lé yù hkyô pyám nhâng râ matú, Pilat chyáng dúng tóngbán akô.

<sup>32</sup> Haû mù luí, gyezô pé gi, lé mù, Yesuq eq jén hui su nhik mâ é, rayuq é hkyî lé hí bat hkyuí pyám mù, rayuq é hkyî lé dum bat hkyuí pyám akô nghut ri.

<sup>33</sup> Nghut kôlhang, yhangmoq gi, Yesuq chyáng jé é hkûn, Yhang shi to lánng bê nghut

é lé myàng kômù, Yhâng é hkyî lé a bat hkyui byi kó nghut ri.

<sup>34</sup> Nghut kôlhang, gyezo rayuq gi, Yesuq é namcham má lham eq htaù kat byi jáng, radá dâm sui eq wuì yui htoq lo ri.

<sup>35</sup> Haû lé myàng é sù gi, saksé hkám byi ri; yhâng saksé hkám é hkyô gi, tengmán ri. Haû yhang taí kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byi é nghut ri.

<sup>36</sup> Haû hkyô pé dut é gi, "Yhâng é showui rahkat lháng a lhoq hkyui râ nghut lhê."\* gâ é Chyúmdang haû lhoq dik râ matú nghut lhê.

<sup>37</sup> Chyúmdang gotû ralhum má le, "Yhangmoq eq htau htông é sù lé, yhangmoq tu wú kó râ nghut lhê."\* gâ é bo tô ashí nghut ri.

### *Yesuq Lé, Myhup Yhum É Hkyô*

*Mht 27:57-61; Mrk 15:42-47; Luk 23:50-56*

<sup>38</sup> Hau htâng, Yesuq é chángzo dut nyi é Aramahti myuq byù Yosep gi, haû Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat eq ahkáng byi kat jáng, yhang gi, gungsôm haû lé, lé yu ló bê nghut ri.

<sup>39</sup> Yhang gi, hí hkûn, myín lé, Yesuq lé é huí é sù, Nikodema eq rahá lé é nghut ri; Nikodema gi, mura eq achyo nyhò tô é namngón jung sum xê joí kô yu lé ri.

<sup>40</sup> Yhangnhik gi, Yesuq é gungsôm lé yù mù, Yudaq byu pé é mâng yhum htông eq rajung za, namngón jung eq rahá, pán yúng eq htup yup to byi akô.

<sup>41</sup> Haû Yesuq lé tapzîng má jén sat pyâm é jowò nàm má, hkyâm ralhum joq ri; ó yuq lé le a lheq wú shí é, lup sik ralhum hkyâm hkaù má joq tô ri.

<sup>42</sup> Haû nyí gi, Yudaq byu pé é Hên Lajang Buinyi nghut é yanmai le, lup haû le chyâng é yanmai le, yhangnhik gi, Yesuq lé, hau má é lheq tô akô nghut ri.

## 20

### *Lup Akôm*

*Mht 28:1-10; Mrk 16:1-8; Luk 24:1-12*

\* **19:26** Ánu ê, gâ é lé, Grik dông gi, "myiwe myhí ê" ga bo tô é nghut lhê. ☆ **19:36** Htoq Ló 12:46; Gyung So 9:12; Hkya-on 34:20 ☆ **19:37** Zhk 12:10

<sup>1</sup> Bánno buinyi htâng, napsûn noq le mau a bó shimá, Magadalaq wà mà é Mariq gi, haû lup má ê jé le, lup hkum mà é luqlong huí hpyuq to láng é lé myang ri.

<sup>2</sup> Haû mù, yhang gi, Simun Petruq eq Yesuq chyitdap é chángzo góyuq chyáng din jé ló mù, "Haû Yhumsîng lé, lup mai yu htoq ló byuq bekô; hkâmá ê kat to kô é lé, ngamoq a sé." ga taí ri.

<sup>3</sup> Haû mù, Petruq eq chángzo haû gi, lup shut e ló akô.

<sup>4</sup> Yhangnhik í yuq é din akô; nghut kôhang, chángzo haû gi, Petruq htoq má wó dîn luí, lup má hí din jé e ri.

<sup>5</sup> Haû mù, yhang gi, ahkaû shut ngóm wú kat é hkûn, haû pán yúng htui leq tô é lé myang ri; nghut kôhang, yhang gi, a wang ê nghut ri.

<sup>6</sup> Hau htâng, Simun Petruq gi, châng jé luí, lup hkaû shut wang e ri; haû hkûn, yhang gi, haû má pán yúng htui joq tô é lé le,

<sup>7</sup> haû Yesuq é ulhum má htup é panchoq lé le, myang ri. Panchoq haû gi, pán yúng htui eq rahá a nghut e za htui jup leq tô ri.

<sup>8</sup> Haû lup má hí jé é chángzo le, ahkaû má wang é luí, myàng jáng, lumjîng bê nghut ri.

<sup>9</sup> (Yesuq gi, shi é mai dum dui toq lô râ nghut lhê ga bo tô é Chyúmdang lé, yhangnhik gi, a sê gyo shi kó nghut ri.)

<sup>10</sup> Hau htâng, haû chángzô nhik gi, yhûm taû ló bekô nghut ri.

*Magadalaq Wà Mà É Mariq Lé, Yesuq Htoq Shit É Hkyô*

*Mrk 16:9-11*

<sup>11</sup> Nghut kôhang, Mariq gi, lup shinggan má ngau yap tô ri. Yhang gi, ngaù uchyang lup hkaû má ngóm wú kat ri.

<sup>12</sup> Haû hkûn, yhang gi, Yesuq é gungsôm lheq tô é jang má, hpyu é mebu wut é mau-mang lagyo í yuq hkyí htâng shut rayuq, umhtúng shut rayuq, zung to kô é lé, myang ri.

<sup>13</sup> Yhangnhik gi, "Myiwe myhí ê, nàng, haí mù ngau nyi lhê lhú?" ga myi kôjáng, yhang gi, "Ngá é Yhumsîng lé yù ló hpyuq kôluí, Yhang lé hkâmá ló lheq to kô é lé, ngò a sê é yanmai nghut lhê." ga tû taí ri.

<sup>14</sup> Haû su ga luí, yhang, lhing wú kat é hkûn, Yesuq yap tô é lé myàng kôhang, Yesuq nghut é lé yhang a wú sé nghut ri.

<sup>15</sup> Yesuq gi, "Myiwe myhí ê, nàng, haí mù ngau nyi lhê lhú? Nàng gi, ó yuq lé ho wún lhê lhú?" ga myi jáng, yhang gi, hkyâm saí zo sù su ngam pyám mù, "Sarà ê, nàng, Yhang lé waq htot pyâm é nghut le gi, hkâmá ê lheq tô é, ngo lé taí kyo laq, ngò, Yhang lé yu ló râ." ga taí ri.

<sup>16</sup> Haû hkûn, Yesuq gi, yhang lé, "Mariq ê" ga wut kat ri.

Mariq gi, Yhâng shut lhing mù, Hebre myíng dông, "Raboni!" ga wut kat ri. (Haû gi, "Sarà ê" gâ é lichyúm nghut ri.)

<sup>17</sup> Yesuq gi, "Ngo lé hkâzáng shi; hkâsu mù gâ le, Ngò gi, haû Íwâ chyáng a taû doq ló shi é nghut lhê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê.' gâ ri nghú, ló taí kyo aq." ga, yhang lé taí kat ri.

<sup>18</sup> Magadalaq wà mà é Mariq gi, chángzô pê chyáng ló mù, "Yhumsîng lé, ngò myàng bê!" ga taí luí, yhang lé shit kat é pé lé, taí kyô ri.

*Yesuq, Yhâng É Chángzô Pé Lé Htoq Shit É Hkyô*

*Mht 28:16-20; Mrk 16:14-18; Luk 24:36-49*

<sup>19</sup> Haû nyí, Bánno buinyi htang myìn lé, haû chángzô pé gi, Yudaq byu pé lé gyuq kô é yanmai, hkum tsing myhí pyám mù, zîng tô bum kô é u lé, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyi sháng gaq!" ga taí ri.

<sup>20</sup> Yhang gi, haû su ga taí é htâng má, yhangmoq lé, Yhâng é loq pé eq namcham lé tûn shit ri. Chángzô pé gi, haû Yhumsîng lé myàng kôjáng, gyai gabú bùm bekô nghut ri.

<sup>21</sup> Yesuq gi, "Nungmoq nguingón yuqyo nyi sháng gaq! Haû Íwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhê." ga dum taí ri.

<sup>22</sup> Haû su ga taí mù, Yhang gi, yhangmoq é ahtoq má soq mut luí, "Haû Chyoiyúng Woi-nyí lé hap yù keq.

<sup>23</sup> Ó yuq é mara pé lé nghut kôle, nungmoq hkyut byí é nghut jáng, mara haû pé gi, hkyut pyám byí é hui râ nghut lhê;

nungmoq a hkyut byi é nghut jáng, mara haú pé gi, hkyut pyâm é hui râ a nghut." ga taí ri.

### *Htomaq Lé, Yesuq Htoq Shit É Hkyô*

<sup>24</sup> Haú chángzo raxe í yuq má bo é, Zozûm le gâ é Htomaq gi, Yesuq lé jé é hkûn, haú chángzô pé eq rahá a nyi to nghut ri.

<sup>25</sup> Haú mù luí, gotû chángzô pé gi, yhang lé, "Haú Yhumsing lé, ngamoq myàng bê." ga taí kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé mâ é shamtoq zuhkô lé myàng mù, ngá é loqnyhuí èq joí wú é eq, Yhâng é namcham má, ngá é loq èq myang lap wú é za a nghut jáng, haú lé ngò lumjing râ a nghut." ga taí ri.

<sup>26</sup> Rabat myáng jáng, chángzô pé gi, haú yhúmhaú má dum nyi tô akô; Htomaq le, yhangmoq eq rahá nghut nyi ri. Haú hkum pé myhî to kôlhang, Yesuq gi, lé jé mù, yhangmoq é agùng má yap to luí, "Nungmoq nguingón yuqyo nyi sháng gaq!" ga taí ri.

<sup>27</sup> Hau htâng, Yhang gi, Htomaq lé, "Náng é loqnyhui, shî má lé joí mù, Ngá é loq pé lé wú aq. Náng é loq lhâm kat mù, Ngá é namcham má lé lap wú aq. A lùm hkâkut, lumjing nyi aq." ga taí ri.

<sup>28</sup> Haú hkûn, Htomaq gi, "Ngá é Yhumsing, ngá é Garai Gasang é!" ga Yhang lé taí ri.

<sup>29</sup> Yesuq gi, yhang lé, "Nàng gi, Ngo lé myang é yanmai, lumjing é a nghut lú? A myàng kôlhang, lumjing é bang gi, hkungsô wó nyi ri." ga taí ri.

<sup>30</sup> Laiká buk shî má a kê tô é limik kumhá pé gotû myo myo lé le, Yesuq gi, Yhâng é chángzô pê hí má kut shit bê nghut ri.

<sup>31</sup> Nghut kôlhang, Yesuq gi, Garai Gasâng é Yhangzo Hkrisduq nghut é lé, nungmoq wó lumjing râ matú eq, lumjing é yanmai, nungmoq Yhâng é mying má asak wó kó râ matú, shí hkyô pé lé kê tô é nghut lhê.

## 21

### *Ngozo Wó Chyup Yu É Limik Kumhá*

<sup>1</sup> Hau htâng má, Yesuq gi, Tiberi nhông yàm má, Yhâng é chángzô pé lé dum htoq

shit ri. Yhang htoq shit é hkyô gi, a-ô mâ é đông nghut ri.

<sup>2</sup> Simun Petruq, Zozûm le gâ é Htomaq, Galile mau Hkanaq wà mó mâ é Nah-tanelaq, Zebedi é yhangzo nhik eq gotû chángzo í yuq pé gi, rahá nyi to bum akô.

<sup>3</sup> Haú hkûn, Simun Petruq gi, yhangmoq lé, "Ngò gi, ngozo kóng ê râ." ga taí jáng, yhangmoq gi, "Ngamoq le châng lé râ." ga taí akô. Haú mù luí, yhangmoq gi, htoq ê mù, haú lhai má wàng bekô nghut ri; nghut kôlhang, haú myîn, radu lhang a wó kóng kó nghut ri.

<sup>4</sup> Htang napkyó maubó lo é hkûn, Yesuq gi, wuiyàm má yap tô ri; nghut kôlhang, haú chángzô pé gi, Yesuq nghut é lé a wú sé kó nghut ri.

<sup>5</sup> Yesuq gi, yhangmoq lé, "Luzúm wui ê, nungmoq, ngozo wó akô lú?" ga, wut myi kat jáng, yhangmoq gi, "A wó." ga tû taí akô.

<sup>6</sup> Haú hkûn, Yhang gi, "Nungmoq é gùn lé, haú lhai é loqyo hkyam shut dú hkyô kat keq; haú jáng, nungmoq wó kóng yù kó râ nghut lhê." ga taí ri. Haú mù, yhangmoq gi, gùn dú hkyô kat é hkûn, ngozo lùm myô é yanmai, haú gùn lé lhang a wó lhang yù lo kó nghut ri.

<sup>7</sup> Haú mù luí, haú Yesuq chyitdap é chángzo gi, Petruq lé, "Yhumsing ru nghut ri." ga taí ri. Simun Petruq gi, "Yhumsing ru nghut ri." gâ é lé wó gyo eq yhang, yhang gi, mebu hkyut pyâm tô é yanmai, buhông mó lé, yhâng é gùng má baiyup yù mù, wui hkaú má byam wang ló bê nghut ri.

<sup>8</sup> Haú chángzo góbang gi, wuiyàm eq ngo xê làm kê za wê é yanmai, ngozo bying tô é gùn lé, wuiyàm shut lhai mai she jé lo akô nghut ri.

<sup>9</sup> Yhangmoq gi, wuiyàm má jé dap ló kê é hkûn, myigye gyung é myihkyóm htoq má ngozo nyhin tô é lé le, muk ratsuí joq tô é lé le, myang akô.

<sup>10</sup> Yesuq gi, yhangmoq lé, "Haú, ahkuí za nungmoq wó kóng yu é ngozo, ra-am yù lé keq." ga taí ri.

<sup>11</sup> Haú mù, Simun Petruq gi, lhai má doq ji luí, kê é ngozo rasho ngó xe sùm du yhang bo é gùn lé, dùng yàm má she htoq tô ri. Ngozo haú myhó myo kôlhang, gùn gi, a jeq nghut ri.



<sup>12</sup> Yesuq gi, yhangmoq lé, "Napzang lé zo keq." ga taí ri. Chángzô pé gi, Yhang, haú Yhumsing nghut é lé sé kô é yanmai, ó yuq lhang, "Nàng, ó yuq nghut lhê?" ga, a wám myi kó nghut ri.

<sup>13</sup> Yesuq gi, lé mù, muk lé ê yù luí, yhangmoq lé byí ri; ngozo lé le, haú su kut ri.

<sup>14</sup> Yesuq gi, shi é mai lhoq dui toq yú huí é htâng, Yhâng é chángzô pé lé htoq shit é má, shí gi, sum dâm nghú râ dâm nghut ri.

### *Yesuq Eq Petruq*

<sup>15</sup> Yhangmoq bàn zô bùm kô é htâng má, Yesuq gi, Simun Petruq lé, "Yohan é yhangzo Simun ê, nàng gi, shí bang htoq má, Ngo lé teng za je chyitdap lhê lú?" ga myi jáng, yhang gi, "Nghut lhê; Yhumsing ê, ngò, Nàng lé chyitdap é hkyô lé, Nàng sê lhê." ga tú taí ri. Haú hkûn, Yesuq gi, "Ngá é sau zô pé lé, baú aq." ga, yhang lé taí ri.

<sup>16</sup> Hau htâng, Yesuq gi, "Yohan é yhangzo Simun ê, nàng gi, Ngo lé teng za chyitdap lhê lú?" ga dum myi jáng, yhang gi, "Nghut lhê; Yhumsing ê, ngò, Nàng lé chyitdap é hkyô lé, Nàng sê lhê." ga tú taí ri. Haú hkûn, Yesuq gi, "Ngá é sau pé lé, rém aq." ga taí ri.

<sup>17</sup> Dum radàm, Yesuq gi, yhang lé, "Yohan é yhangzo Simun ê, nàng gi, Ngo lé chyit lhê lú?" ga myí ri.

Haú hkûn, Petruq gi, "Nàng gi, ngo lé chyitdap lhê lú?" ga, yhang lé Yesuq eq súm dâm dâm taí é yanmai, yhâng myit nô luí, "Yhumsing ê, Nàng gi, lhunglhang lé sê lhê; ngò, Nàng lé chyitdap é hkyô lé, Nàng sê lhê." ga taí ri.

Haú hkûn, Yesuq gi, "Ngá é sau pé lé, baú aq.

<sup>18</sup> Ngò, nàng lé teng za taí lé, nàng, zorâm nghut é hkûn gi, yhumsing gùng yhumsing hpyihit baíyup\* yù mù, ê nau é jowò hkangmó má wó é é nghut lhê; nghut kôlhang, nàng mang jáng gi, loq í loq lham luí, nang lé góyuq eq hpyihit baíyup byi mù, nàng a ê nau é jowò shut shuí ê râ nghut lhê." ga taí ri.

<sup>19</sup> (Yesuq haú su ga taí é gi, haú Petruq, hkâsu kut shi é dông mai, Garai Gasâng é hpungwup shingkang lé dan hu nhâng râ nghut é lé, taí nau é nghut ri.) Hau htâng,

Yesuq gi, yhang lé, "Ngá htâng cháng aq." ga taí ri.

<sup>20</sup> Haú hkûn, Petruq gi, lhing wú kat le, haú Yesuq chyitdap é chángzo, yhangmoq htâng châng wún é lé myàng ri. Chángzo haú gi, hí hkûn, myinzang zô é u lé, Yesuq chyáng leq ngè mù, "Yhumsing ê, Nang lé ap pyám râ sù gi, ó yuq lú?" ga, myi wú é sù nghut ri.

<sup>21</sup> Petruq gi, haú yuq lé myàng jáng, Yesuq lé, "Yhumsing ê, shí yuq gi, hkâsu dut râ lú?" ga myí ri.

<sup>22</sup> Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lú? Nàng gi, Ngá htâng cháng aq." ga tú taí ri.

<sup>23</sup> Dang hau é yanmai, chángzo haú yuq a shí râ nghut lhê gâ é danglám gi, haú gumang wui chyáng byo myín to bê nghut ri. Nghut kôlhang, Yesuq gi, haú yuq a shí râ hkyô lé taí é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê lú?" ga, taí é ru nghut lhê.

<sup>24</sup> Shí pé lé saksé hkám mù, shí pé lé kê tô é sù gi, chángzo haú yuq nghut lhê. Yhâng é saksé gi, têng é lé, ngamoq sê lhê.

<sup>25</sup> Yesuq gi, gotù muzó myo myo le kut ashí nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má lhang ngo râ a nghut nghú, ngò wó myit ri.

\* **21:18** *Hpyihit baíyup* gâ é lichyúm gi, mebu wut luí ri ri kut tô é lé gâ lhê.

## LAGYO Laiká (Acts)

*Yesuq, Mauhkûng Má Shuî Yù Huî É Hkyô*

<sup>1</sup> Htohpiluq ê, Yesuq yhang hkyin yu tô é lagyô pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuî yu é buinyì jé shoq,

<sup>2</sup> Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kê kat bê nghut lhê.

<sup>3</sup> Yesuq gi, shî hkâm é htâng má, Yhang dui toq bê hkyô lé, lumgíng é saksé myo myô èq yhangmoq lé tún shit mù, buinyì myi xê nyí gyoro má yhangmoq chyáng lé htoq shit shit kut luí, Garai Gasâng é mingdán hkyô lé hko kyô ri.

<sup>4</sup> Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ é dang-gidiq byí tô é chyunghuq lé láng nyí keq.

<sup>5</sup> Hkâsu mù gâ le, Yohan gi, wui èq wui-myhup hkâm byí é nghut lhê; nghut kôlhang, nungmoq kúm gi, buinyì hkâ-myháng a myáng má, Chyoiyúng Woi-nyí mai baptisma wó hkam yù kó râ nghut lhê." gâ ri.

<sup>6</sup> Lagyô pé gi, Yhang eq rahá chôm zup míng tô é hkûn, Yhang lé, "Yhumsîng ê, nàng, haû Israelaq byu pé lé mingdán dum xuq byi râ gi, ahkuí yhang nghut bê lhú?" ga myí akô.

<sup>7</sup> Yesuq gi, "Áwa gi, Yhâng é ahkáng ayá èq kut to bê é ahkyíng yam-yoq pé lé, nungmoq sé nó a ra.

<sup>8</sup> Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yù mù luí, Yerusalem wà mó eq Yuda mau banshoq, Samariq mau eq maumyî htáng shoq, ngá é saksé pé dut kó râ nghut lhê." ga luí, yhangmoq lé taí ri.

<sup>9</sup> Dang haû ban taí é htâng má, yhangmoq wú nyi le, Yhang gi, mauhkûng shut

shuî yu é hui mù, yhangmoq hí mai Yhang lé a myàng loshoq, mhut èq htup ló byuq bê nghut ri.

<sup>10</sup> Yesuq doq ló nyi é u lé, yhangmoq mauhkûng shut ru wú tsuq nyi bum ashî le, hpyu é mebu wut é byù í yuq gi, radá dâm yhangmoq nàm má htoq yap lò mù,

<sup>11</sup> "Galile byu pé ê, haí mù luí mauhkûng shut wú tsuq nyi akô lhú? Nungmoq é hí mai mauhkûng shut shuî yu huî é, haû Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga taí akô.

*Yudaq É Jowò Má, Mahtiaq Lé Hkyin Kat É Hkyô*

<sup>12</sup> Hau htâng má, yhangmoq gi, Tsanlun Bùm mai, Yerusalem wà mó shut taú ló bekô.\* Haú gyoro gi, Bánno buinyì má ge sô é í za wê ri.

<sup>13</sup> Yhangmoq jé ló kôjáng, yhangmoq nyi nyi kô é yhûm ahtoq pyâm mâ é wap shut doq ló akô; haú bang gi, Petruq, Yohan, Yakuq, Andre, Hpilip eq Htomaq, Barhtol-ume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô.

<sup>14</sup> Yhangmoq lunglhang bang gi, myiwe wui le, Yesuq é yhângnu Mariq le, yhanggu pé le kut mù, i-myit rahkat za kyú chôm dung dung kut nyi akô.

<sup>15</sup> Buinyì haú yoq má, Petruq gi, lumjíng é gumang gu-nhá† wui rasho í xê yuq kô zup zîng tô é gung gûng má, toq yap mù,

<sup>16</sup> "Gumang gu-nhá wui ê, Yesuq lé chyup é bang lé hkyô shuî hí é sù Yudaq eq séng luí, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê nghut ri.

<sup>17</sup> Yhang gi, nga-nhúng má nghap lhôm é hui mù, hpúng sará ayá wó bê sù nghut kôlhang shí hkyô dut bê nghut ri." ga taí ri.

<sup>18</sup> (Yudaq gi, yhang kut é agè ashop é muzó mai wó é ahpaû èq myigùng ratóng wui yu é htâng, haú má yhang, a-nghop dông byit gyó mù wam buq goq luí, û banshoq buq myín byuq bê nghut ri.

\* **1:12** Tsanlun bùm eq Yerusalem gyoro gi, déng rawuí hkup kô we ri. † **1:15** Gumang gu-nhá gâ é lé, Grik má gi, gumang za gâ to lhê.

19 Haú hkyô lé Yerusalem wà mó má nyi é lhunglhâng bang wó gyo kôjáng, myigùng haú lé yhangmoq é myíng dông, 'Akeladama' ga myhíng akô; haú gi, 'Sui myigùng', gâ é nghut ri.)

20 Petruq xoq taí é gi, "Hkâsu mù gâ le, Hkya-on Kungtôn Laiká má,

'Yhâng é jowò chamchuyiuyi dut byuq sháng gaq; haú má ó le a nyi kó sháng gaq.'\*

ga luí le, dum

'Yhang wó é ayá lé byù góyuq wó yu pyám byi sháng gaq.'\*

ga luí le, bo tô ri.

21-22 Haú mù luí, Yohan baptisma byi hi é hkûn mai, Yesuq lé nga-nhúng chyáng mai shuí yu é buinyi jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyi banshoq pé má, nga-nhúng eq yhang zum nyi sù rayuq lé, hkyin kat râ dut ri. Haú yuq gi, Yesuq dum dui toq é hkyô lé nga-nhúng eq rahá saksé dut râ sù nghut lhê." gâ ri.

23 Haú hkûn, yhangmoq gi, Yustu ga le myhíng é, Barsabaq gâ é Yosep eq Mahtiaq nhik lé hkyin tô akô.

24-25 Haú mù, yhangmoq kyûdung kô é gi, "Byù banshoq é i-myt lé sê é Yhumsíng é, Yudaq Iskarut gi, yhang ló gíng é jowò shut ló râ ga, tô pyâm tô é yhâng é lagyo ayá é matú shí nhik má é nàng hkyin tô é sù lé tûn shit laq ò." ga akô.

26 Hau htâng, yhangmoq, byù hkyîn shosé she le, Mahtiaq chyáng ang bê. Haú mai, Mahtiaq lé gi, haú lagyo raxe rayuq má jat kat bê nghut ri.

## 2

### *Chyoiyúng Woi-nyí Jé Gyó Lo É Hkyô*

1 Penteko-ti\* buinyi jé jáng, lumjíng bang banshoq gi, jowò ralhum má za, chôm zup míng nyi tô akô.

2 Haú hkûn, laidun mó lo é su gâ é htê gi, byodàn ratung, mauhkûng mai myíng htoq lô mù luí, yhangmoq zing tô é yhúm byíng shoq dut to bê nghut ri.

3 Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri.

4 Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí èq taí nhang é eq rajung za, laklaí dang dông nyo lo bum akô.

5 Haú u lé, mauhkûng ô má joq é mingdán hkanmó má é, tarâ hkunggâ é Yudaq byu pé gi, Yerusalem wà mó má bíng nyi bum akô.

6 Haú mying é htê lé wó gyo kôjáng, byù rajùm rayò zíng lé lô kômù, ó le ô é myíng dông sê gyô yù kô é yanmai, maú úng-âng byuq bùm kôluí,

7 maú bùm uchyang taí kô é gi, "Wú keq, ahkuí dang taí nyi é byù shí bang lhunglháng gi, Galile byu pé chyat a nghut kó lhú?

8 Haú nghut é wa, hkâsu mù nga-nhúng ó le ô é yhumsing mau má é myíng dông sê gyô yu lhê lhú?

9 Parhti, Medi, Elam mau má é bang eq Mesopotamiaq mau, Yuda eq Kapadokia mau, Pontuq eq Asia,

10 Hprugi eq Pamhpuli, Egutuq ming má nyi é bang eq Kuruni myuq nâm má nyi é Libya ming má é bang, Romaq myuq mai lé bíng nyi é Yudaq byu pé eq Yudaq noqkuq htúng má lhing wang lò bang,

11 Kreti zinlóng eq Arabiq mau má é bang, nga-nhúng gi, yhangmoq hko kyô é Garai Gasâng é mauhpo muzó hkyô lé, yhumsing mau má é myíng dông yhang wó sê gyô yu ri-nhung." gâ ri.

12 Yhangmoq banshoq bang gi, maú úng-âng byuq kômù, "Shí gi, haí wá nghut lhê lhú?" ga le, rayuq eq rayuq myí lhùm bum akô.

13 Nghut kôlhang, byù ra-am gi, "Shí bang gi, í shuq wut é bang nghut akô." ga luí, taí jihpoi bum akô nghut ri.

### *Petruq Hko Kyô É Mungdang*

14 Haú hkûn, Petruq gi, lagyo góbang raxe rayuq eq toq yap mù, htê mó èq byù haú bang lé taí é gi, "Yudaq byu pé eq Yerusalem wà mó má nyi nyi é lhunglhâng

\* 1:20 Hkya-on 69:25 \* 1:20 Hkya-on 109:8 \* 2:1 Penteko-ti gâ é gi, Lhoqlhai Poí laí é htâng ngo xê nyi jé é buinyi má, kut é poi lé gâ lhê.

bang ê, rago gyô wú keq! Ngò, nungmoq lé, shí hkyô taí kôlê.

<sup>15</sup> Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí.

<sup>16</sup> Shí hkyô kúm gi, myiqhtoi Yoelaq taí tô é eq rajung za dut é nghut ri.

<sup>17</sup> Yhang taí tô é gi,

'Garai Gasang ísu gâ ri: Ló htâng é buinyi pé má, Ngò Ngá é Woi-nyí lé byù lhunglhâng bâng é ahtoq má hut gyun râ nghut lhê.

Haù mù, nungmoq é yuqzo byizô pé gi, myiqhtoi htoi kó râ; nungmoq é zorâm wui gi, myoqwup shing-rán myàng kó râ; nungmoq é hpaù mâng pé gi, yhupmoq myàng kó râ nghut lhê.

<sup>18</sup> Buinyi haù pé má, Ngá é dui-nhâng zoshâng hpô pé eq dui-nhâng zoshâng myhî pé é ahtoq má lhang, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó râ nghut lhê.

<sup>19</sup> Ngò gi, ahtoq mauhkûng htoq má mauhpo muzó pé lé, a-ô myigùng htoq má, kumlhá pé lé, sui eq, myi eq, myihkau dùm pé èq kut mù tân shit râ.

<sup>20</sup> Haù Yhumsing é kô hkikhkam é buinyi a jé shimá, bui gi, mauchut byuq, lhamó gi, sui dut byuq é hí dut râ nghut lhê.

<sup>21</sup> Haù hkûn, Yhumsing é myìng lé lhang é bang yuq hkangmó gi, hkyi yu é hui kó râ nghut lhê.<sup>✧</sup>

gâ ri.

<sup>22</sup> Israelaq byu pé ê, dang shí lé gyô yù keq, nungmoq sê é eq rajung za, Nazaret wà byù Yesuq nungmoq é hí má tân shit é, laklaí kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri.

<sup>23</sup> Shí yuq gi, Garai Gasang myit hpyit tô é hkyô eq, hí te sê é hpaqchyî dông, nungmoq chyáng ap pyâm é hui mù, nungmoq gi, agè ashop byu pé é loq èq, Yhang lé tapzîng htoq má jén sat pyâm nhâng bekô nghut ri.

<sup>24</sup> Nghut kôlhang, haù shí-nò hkyô gi, Yhang lé wó hkûm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyâm byi luí lhoq dui toq yù bê nghut ri.

<sup>25</sup> Dawiq gi, shí yuq eq séng luí taí é má, 'Haù Yhumsing gi, ngá é myoq hí má hkâ-nhâm le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún râ a nghut lo.

<sup>26</sup> Haù mù, ngá i-myit gi, nguingón nyi luí, ngá nhut shô gabú hkya-ôn nyi ri; ngá é gungdu le myit myoqbyù jowò má nyi nyi râ nghut lhê.

<sup>27</sup> Hkâsu mù gâ le, nàng, ngá é woi-nyí lé mosumhkung má tô pyâm to râ a nghut.

Nàng, náng é Chyoiyúng Sù lé bup byuq é hui nhâng râ a nghut.

<sup>28</sup> Nàng, ngo lé asak dui é hkyô sé nhâng bê. Náng é myoq hí má, nàng, ngo lé gabú hkyô lhoq pyíng byi râ nghut lhê.<sup>✧</sup>

gâ ri.

<sup>29</sup> Gumang wui ê, nga-nhông é íchýí íkê Dawiq kâng byit mù, myhup pyâm hui bê hkyô lé le, yhâng é lup gi, hkû-nyí jé shoq nga-nhông chyáng joq tô é lé le, ngò, nungmoq lé a gyuq a kyum wám taí lhê.

<sup>30</sup> Dawiq gi, myiqhtoi rayuq nghut é yanmai, yhâng é awut ashín mã é rayuq lé, yhâng é hkohkâm tanghkuq má zùng nhâng râ ga Garai Gasang byi tô é danggidiq lé sê to mù,

<sup>31</sup> 'Hkrisduq† gi, mosumhkung má pyâm to a hui râ eq, Yhâng é gungsho a bup byuq é za, dum dui toq ló râ nghut lhê.', gâ é hkyô lé te sê to luí taí tô ri.

<sup>32</sup> Garai Gasang gi, haù Yesuq lé lhoq dui toq yù bê. Ngamoq banshoq bang gi, haù hkyo é saksé pé nghut nyi ri.

<sup>33</sup> Haù mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng, wó gyo bekô nghut ri.

✧ 2:21 Yol 2:28-32 ✧ 2:28 Hkya-on 16:8-11 † 2:31 Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

34-35 Hkâsu mù gâ le, Dawiq gi, mauhkông htoq tsáng myhâng má a doq ló wú kôhâng, yhang gi,  
 'Haú Yhumsîng Garai gi, ngá é Yhumsîng lé,  
 "Ngò, náng é gye pé lé, náng é hkyî nang tanghkuq kut pyám byî é hkyîng jé shoq,  
 Ngá é loqyo hkyam shut zung nyi shi aq." gâ ri. ✱  
 ga luí, taí ri.

36 Hau é yanmai, Garai Gasang gi, nungmoq eq tapzîng má jén sat pyám é haú Yesuq lé, Yhumsîng eq Hkrisduq dut nhang é hkyô, Israelaq byu pé lhunghâng bang hkyak sê nyi kó sháng gaq ô." gâ ri.

### *Sâng-hi Lumjîng É Bang*

37 Yhangmoq gi, haú lé wó gyô bùm kôjáng, yhangmoq é i-myt má záng kô é nghut mù luí, "Gumang wui ê, ngamoq hkâsu kut lo râ lhú?" ga luí, Petruq eq lagyo góbang lé myî akô.

38 Petruq gi, "Nungmoq yuq hkanmó myit lhîng mù, Yesuq Hkrisduq é myîng mai wui-myhup hkâm yù keq; Haú jáng, nungmoq é yubak hkyut pyám byî é hui kó râ nghut lhê. Haú hkûn, Chyoiyúng Woi-nyí gâ é chyunghuq lé, nungmoq wó yù kó râ nghut lhê.

39 Hkâsu mù gâ le, danggidiq haú gi, nganhung é Yhumsîng Garai Gasang jî yù râ bang banshoq nghut é, nungmoq eq nungmoq é yhangzo yhangshû pé eq le, mau we má nyi é lhunghâng bang eq le, sêng lhê." ga luí, yhangmoq lé taí kyô ri.

40 Yhang gi, dang gotû myo myô eq le saksé hkám mù, "Shí agè ashop é amyû mai wó lut htoq lo keq ô!" ga luí, yhangmoq lé lhoq pun lhoq kyîng ri.

41 Dang haú lé guq yu é bang gi, wui-myhup hkâm yu bùm kôluí, haú nyí má byù sum hkyîng kô jat wàng lo bum bekô nghut ri.

### *Lumjîng Bang Zùm Yap É Hkyô*

42 Haú bang gi, lagyô pé mhoqshit é hkyô, zùm yap é hkyô, muk hpê gam é hkyô ‡ eq akyû dúng é hkyô má, i-myt rahkat za chôm châng nyi akô.

✱ 2:34-35 Hkya-on 110:1 ‡ 2:42 Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Poído chôm zô é lé gâ lhê.

43 Lagyo pé kut shit é mauhpo muzó eq limik kumlhá pé myo myô é yanmai, lhunghâng bang gi, gyuq maú nyi bum akô nghut ri.

44 Lumjîng é lhunghâng bang gi, rawò má za zup zîng to mù, azîng zè banshoq lé chôm chung nyi akô.

45 Yhangmoq gi, yhumsîng é sutzè pé lé, ûng pyám mù, yuq hkanmó lé, yhang râ tô é eq rajung za gàm byî akô.

46 Yhangmoq gi, nyí wui myit rahkat zâ eq noqkuq yhûm wàng má nyi nyi akô. Yhumsîng é yhûm pé má le muk hpê gam é hkûn,

47 Garai Gasang lé hkya-on kungtôn uchyang, gabú é eq myit huí é eq chôm zo chôm shuq nyi bum akô; byù banshoq bâng é hí má le myoqdong wó bum akô. Haú Yhumsîng gi, nyí wui yhangmoq chyáng hkyi yù hui bang jat lò nhang ri.

## 3

### *Hkyî Hten Sû Rayuq Lé, Petruq Lhoq Gê Byî É Hkyô*

1 Ahkuí, Petruq eq Yohan gi, myinhtâng zó sum hkyîng lhê é kyûdung nám má, noqkuq yhûm shut doq e ló akô.

2 Haú hkûn, ínû unghkaû mai hkyî hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúnglho hkum ga myhîng é hkúmdong má nyí hkan nyí mó waq lé lô mù, lé nyhi to to kut akô.

3 Yhang gi, Petruq eq Yohan, noqkuq yhûm haú má wang e ló é lé, myàng luí, lhom dúng nyi ri.

4 Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô.

5 Haú mù, yhang, yhangnhik chyáng mai rajung jung wó yù râ lé myit myoqbyù luí, yhangnhik lé rago za saí wú tô ri.

6 Petruq kúm gi, "Ngùn, hîng gi, ngò a wó; nghut kôhâng, ngò wó é nang lé byi lé: Nazaret wà byù Yesuq Hkrisduq é myîng mai toq sô ló aq." ga taí uchyang,

<sup>7</sup> Yhâng é loqyo loq má zui mù lêng toq kat ri; haú hkûn jáng, yhâng é hkyî kochang-chap pé wúm bo lò bê nghut ri.

<sup>8</sup> Haú mù, yhang gi, radá dâm toq yap mù sô kat luî, so uchyang, byàm uchyang Garai Gasang lé hkyá-on mù, yhangnhik eq rahá noqkuq yhûm má wang ló ri.

<sup>9</sup> Yhang sô e ló nyi é eq Garai Gasang lé hkyá-on kungton nyi é lé, lhunglhâng bang chôm myang akô.

<sup>10</sup> Haú yuq gi, noqkuq yhum é Yúnglhoó hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luî, yhâng chyáng dut lò bê hkyo é yanmai, maú hong byuq bum akô nghut ri.

### *Petruq Hkô Kyô É Mungdang*

<sup>11</sup> Petruq eq Yohan chyáng haú dung zo sù byìn châng tô é hkûn, shiwa byu pé gi, wú maú uchyang, Sholumon jirop shut, yhangmoq chyáng din yán wang lé lo bum akô.

<sup>12</sup> Petruq haú lé myàng jáng, shiwa byu pé lé taí é gi, "Israelaq byu pé ê, shí yuq é hkyô lé haí mù luî maú nyi akô lú? Nganhik é dingmán hkyô eq wum-o a-tsâm èq, shí yuq lé wó so nhang é su ngâm luî, nganhik lé wú tsuq bum akô lú? Haú đông a nghut.

<sup>13</sup> Abraham, Isak eq Yakup pê é Garai Gasang, nga-nhûng é îchyí îwa pê é Garai Gasang gi, Yhâng é dui-nhâng zoshâng Yesuq lé hpungwup shingkang lhoq htoq byí é nghut ri; nungmoq kúm gi, Yhang lé sat hui shoq ga ap pyám kômù luî, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyám akô nghut ri.

<sup>14</sup> Haú chyoiyúng dingmán é Sù lé nungmoq he-ngik pyám kômù, byù sat sù lé sheq dúng htoq yû kôluî,

<sup>15</sup> Asak Yhumsîng lé gi, sat pyám bekô. Garai Gasang kúm gi, haú yuq lé shi é mai lhoq dui toq yû bê nghut ri; ngá-nhik gi, haú hkyo é saksé nghut nyi lhê.

<sup>16</sup> Yesuq é myíng lé lumjîng é yanmai, haú lumjîng myit mai za, shí nungmoq myang é sê é sù lé wum-o lhoq pyíng byi bê nghut ri; nghut bê, Yesuq lé lumjîng é yanmai, shí

yuq lé, nungmoq banshoq bâng é hí má, gumjup shoq lhoq ge to byí bê nghut ri.

<sup>17</sup> Ahkuî, gumang wuî ê, nungmoq é uphkâng bang kut é su, nungmoq le haú hkyô lé a sé mù kut pyám é hkyô lé ngò sê nyi lhê.

<sup>18</sup> Nghut kôlhang, haú hkyô gi, Garaí é Hkrisduq shî-nò jamjau hui râ nghut lhê ga luî, myiqhtoi banshoq bang lé hí hí mai taí nhang tô é Garai Gasang yhang, lhoq dik é nghut ri.

<sup>19</sup> Hau é yanmai, haú Yhumsîng chyáng mâ é nguínón é ahkyíng yàm yoq jé lô râ matú le,

<sup>20</sup> nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byí é hui râ matú le, nungmoq gi, myit lhîng mù Garai Gasang chyáng lhîng lò keq.

<sup>21</sup> Garai Gasang gi, a-nham pyat mai, Yhâng é chyoiyúng myiqhtoi pê é nhut mai, taí nhang to bê eq rajung za, nyi mi-nyî, joq mijoq lé asik dum saí é pyat jé shoq, Yesuq lé mauhkûng htoq má nyi nhang to râ nghut lhê.

<sup>22</sup> Hkâsu mù gâ le, Mosheq taí tô é le, 'Haú Yhumsîng Garai Gasang gi, nungmoq é yhanggu yhangmâng pê chyáng mai, nungmoq é matú ngò sù é myiqhtoi rayuq pô htoq lô nhâng râ nghut lhê; haú yuq taí mitaí nungmoq gyo ra râ nghut lhê.

<sup>23</sup> Myiqhtoi hau é dang lé a gyo sù ó yuq nghut kôlhang, yhumsîng é byù myû maí chyung hpyit pyám é hui râ nghut lhê. ✧ gâ ri.

<sup>24</sup> Gè gè yhang, Samuelaq mai, yhâng é htâng má châng pô htoq lo é myiqhtoi pé banshoq bang hko kyô lo é má le, buinyî shí pé eq séng mù taí to bekô nghut ri.

<sup>25</sup> Nungmoq gi, haú myiqhtoi pê é dang silí wunlí eq, Garai Gasang mai, Abraham lé, 'Náng é awut ashîn é yanmai, mingkan htoq mâ é byù myû chângjup hkungsó wó kó râ nghut lhê! ✧ gâ é eq rajung za, nungmoq é îchyí îwâ pé eq tô tô é danggidiq lé wó hkam yù râ bang nghut akô.

<sup>26</sup> Garai Gasang gi, nungmoq yuq hkangmó lé yhumsîng agè ashop é hkyô

mai wó lhing taû lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng luí, nungmoq chyáng hí nhang kat byi bê nghut ri." gâ ri.

## 4

### *Petruq Eq Yohan Njik Chyup Huí É Hkyô*

<sup>1</sup> Hkyangjông pé, noqkuq yhûm zúng é suwún hpó eq Saduke pé gi, Petruq eq Yohan shiwa byu pé lé dáng nyo nyi é hkûn, htoq lé lô kômù,

<sup>2</sup> yhangnhik, shiwa byu pé lé mhoqshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taí nyi kô é yanmai, yhangmoq gyai yhang myit myô nyi bum akô.

<sup>3</sup> Haû mù, yhangmoq gi, yhangnhik lé chyup yû luí, myinhtâng mauchut lô bê nghut é yanmai, htang napkyó jé shoq htóng má lhung tô akô.

<sup>4</sup> Nghut kôlhang, mungdang lé wó gyô yu é bang myo myo gi, lumjîng kômù luí, yuqgè ngo hkyîng kô jé shoq myô jat lò bekô nghut ri.

### *Yudaq Byìn Tú Wapdoq Má, Yhangnhik Lé Myî Jep Wú É Hkyô*

<sup>5</sup> Htang nyí, yhangmoq é zau wuî, suwún wuî eq tarâ sará pé gi, Yerusalem wà mó má chôm huí zup akô.

<sup>6</sup> Hkyangjong mó Anna, Kayahpaq, Yohan, Alesander pé eq hkyangjong mó é amyû pé banshoq le, haû má bo tô akô.

<sup>7</sup> Haû mù, yhangmoq gi, Petruq eq Yohan lé gung gung má nyhi to luí, "Nungnhik gi, haí a-tsam, ó yuq é myîng mai mô shí lé kut akô lhú?" ga myî akô.

<sup>8</sup> Haû hkûn, Petruq gi, Chyoiyúng Woi-nyí byíng tô é nghut mù luí, yhangmoq lé taí é gi, "Mingbyû wuî é zaugun suwún wuî é,

<sup>9</sup> hkyî hten sô shí yuq lé lhoq gê byí é jeju yanmai, yhang hkâsu kut lhoq ge yû huí é hkyô lé, hkû-nyí nungmoq ngá-nhik lé myî gôn wú naû kô é nghut le gi,

<sup>10</sup> nungmoq lhunglhang bang eq Israelaq byu pé banshoq lé sé nhâng kôlé, nungmoq eq tapzîng má jén sat pyám mù, Garai Gasâng eq shi é mai lhoq dui toq yu é,

Nazaret wà byû Yesuq Hkrisduq é myîng mai, shí yuq gi, nungmoq é hí má îsu wáng wáng zán zán yap tô é nghut ri.

<sup>11</sup> 'Yhûm saí bang nungmoq hkyin htoq pyâm é luqgok gi, htungchyûn mâ é ahkyak dik é luqgok dut bê.'<sup>☆</sup>

gâ é gi, Yesuq lé taí é dông nghut ri.

<sup>12</sup> Hkyi yû hkyô gi, Yhang mai lai luí gotû a nyi lo, hkâsu mù gâ le, nga-nhúng hkyi yu é hui râ matú, mauhkûng a-ô má, Yhâng é myîng mai lai luí, xângzo byu pé lé byí tô é myîng gotû a joq lo é yanmai nghut ri." gâ ri.

<sup>13</sup> Yhangmoq kúm gi, Petruq eq Yohan njik a gyuq a kyum taí é lé myàng kôjáng, yhangnhik, jong a doq wú é, mayû byû za nghut é hkyô lé sé to kô é yanmai, maú nyi bum akô; nghut kôlhang, hí hpyang Yesuq eq zum wún wú sô nhik nghut é lé, yhangmoq bûn kat akô nghut ri.

<sup>14</sup> Hau htoq agó, lhoq gê byí é hui sô le, yhangnhik eq rahá yap tô é lé, yhangmoq myàng kô é nghut mù luí, taí râ hkyô haí le a joq lo kó nghut ri.

<sup>15</sup> Haû mù, yhangnhik lé, haû Yudaq byìn tú wapdoq\* mai lhoq htoq to mù, yhangmoq rayuq eq rayuq hpyê lhum kô é gi,

<sup>16</sup> "Shí nhik lé hkâsu kut lé gè râ lhú? Yhangnhik kut shit e laklaí kumlhá gi, Yerusalem wà mó má nyi é lhunglhang bâng é hí má de za dut bê nghut é yanmai, nga-nhúng haû lé a wó hê lo nghut ri.

<sup>17</sup> Nghut kôlhang, mingbyû wuî má shí hkyô je riyhang a byo myín ló sháng gaq, ahkuí mai myîng haû lé lang mù ó lé le a taí kyo lo râ matú, yhangnhik lé kyuq hkúm pyám sháng." gâ bum akô.

<sup>18</sup> Haû mù, yhangnhik lé dum wut hâng yû luí, Yesuq é myîng lé lang mù, haí le hkâtaí, hkâ-mhoqshit kô ga chôm hkûm akô.

<sup>19</sup> Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai Gasâng é hí má gè râ, a gè râ lé, nungmoq yhang doqdân yû keq.

<sup>20</sup> Nga-nhik kúm gi, myàng yû, wó gyô yû bê é hkyô pé lé, a taí é, a wó nyí nghut lhê." ga luí, yhangmoq lé dum tô taí akô.

☆ 4:11 Hkyá-on 118:22

\* 4:15 Yudaq byìn tú wapdoq lé Grik dông gi, San-hedrin gâ lhê.

21 Haú hkûn, yhangmoq gi, dut lai lò bê hkyo é yanmai, shiwa byu pé Garai Gasang lé hkyo-on kungton nyi bùm kôluí, yhangnhik lé dàm byi rá hkyô a myàng kó é nghut mù luí, yhangnhik lé dum tân kyuq luí nhang pyám bekô nghut ri.

22 Hkâsu mù gâ le, haú laklai kumlhá dông lhoq gê byi huí é sù gi, asak myi xê zàn chyân bê sù nghut é yanmai nghut ri.

### *Lumjîng Bâng É Kyûdung Dang*

23 Yhangnhik gi, nhang kat pyâm é hui kôjáng, yhangnhik é luzúm wui chyáng taú lò kômù, hkyangjong agyi pé eq suwún wui eq yhangnhik lé hkyîm é dang banshoq lé, lò taí kyo akô nghut ri.

24 Haú hkyô lé wó gyo kôjáng, yhangmoq gi, myit rahkat zâ eq yhumsîng é htê lhoq ko mù, Garai Gasang lé kyûdung kô é gi, "Mauhkûng eq myigûng, wuîshuq lung-aú eq, haú pé má, nyi mi-nyí lé hpan tô é, ahko ahkáng lhungháng wó é Yhumsîng ê,

25 Náng, náng é dui-nhâng zoshâng, ngamoq é íchyí íké Dawiq é nhut mai, Chyoiyúng Woi-nyí eq taí tô é gi,

'Haí mù luí, tûngbaú amyû pé gi, nhikjum yô akô? haí mù luí, byu pé gi, akôm dá pyám akô lúhú?

26 Haú Yhumsîng eq Yhâng é Hkrisduq lé gumlau toq rá matú, mingkan hkohkâm pé gi, toq mù, zau suwún wui eq rahá zup zîng bum akô. ✠

gâ ri.

27 Gè gè yhang, Herut eq Pontu Pilat nhik gi, tûngbaú pé eq Israelaq byu pé le mù, wà mó shî má chôm zîng to kôluí, nàng xú but byi é sù, † náng é Chyoiyúng dui-nhâng zoshâng Yesuq lé gumlau toq rá dá nyi akô.

28 Náng é wum-o a-tsam eq nàng ô nau é dông dut rá matú, hí hkûn mai nàng myit hpyit doqdân tô é hkyô lé, yhangmoq gi, kut pyám bekô nghut ri.

29 Yhumsîng ê, ahkuí yhangmoq taí kyuq nyi é dang lé myàng byi laq ô! Náng é dui-nhâng zoshâng wui, a gyuq a kyum é myit eq náng é dang lé taí rá matú wum-o byi laq!

30 Náng é wum-o bo é loq lhâm kat luí, noli nojàng lé lhoq gê byi mù, náng é Chyoiyúng dui-nhâng zoshâng Yesuq é myìng mai, limik kumlhá eq mauhpo muzó pé lé kut shit laq ô!" gâ akô.

31 Haú su, kyû ban dung kôjáng, yhangmoq zîng tô é jowò gi, dui nún lò mù, yhangmoq lhunghâng bang gi, Chyoiyúng Woi-nyí byíng lò luí, Garai Gasang é mungdang lé a gyuq a kyum é za taí bùm bekô nghut ri.

### *Azîng Zê Lé Chôm Gam Chûng Kô É Hkyô*

32 Haú lumjîng é lhunghâng bang gi, i-myit rahkat za nghut nyi akô; ó yuq le, yhumsîng wó é zè lé ngá é a gâ é za, banshoq eq chôm gam chung nyi akô.

33 Lagyo pé le, haú Yhumsîng Yesuq dum dui toq é hkyô lé a-tsam mó eq saksé hkâm nyi kô é nghut mù luí, yhangmoq banshoq bâng é ahtoq má jeju myo myo joq nyi ri.

34 Yhangmoq chyáng a wó a lom é byu rayuq le a nyi kó. Hkâsu mù gâ le, maumyî ratóng wó é, a nghut jáng, yhúm wó é bang ó yuq nghut kôlháng, haú pé lé adàm dàm ûng pyám luí wó yu é ngùn le gi,

35 lagyo pé é hkyî wang má lé to byi akô. Haú mù luí, a wó a lòm sù ó yuq lé le ra tô é eq rajung za gàm byi akô nghut ri.

36 Haú hkûn, Barnaba ga luí lagyo pé eq myhîng byi é, Kupru ming má é Lewiq byu Yosep le, yhang wó é maumyî ratóng lé ung luí, wó yu é ngùn lé lagyo pé é hkyî wang má, lé to byi ri.

37 Barnaba gâ é dang lichyúm gi, myit wum byí su é yhangzo gâ é lichyúm nghut lhê.

## 5

### *Anani Eq Sahpira Nhik É Hkyô*

1 Nghut kôlháng, Anani ga sù gi, yhangmyi Sahpira eq rahá, yhâng nhâm wó é maumyî ratóng lé ûng pyám luí,

2 yhangmyi le bo sê é dông, ngùn haú ra-am lé gi, haq myhit yu to mù, ra-am lé za lagyo pé é hkyî wang má lé to byi akô.

3 Haú mù luí, Petruq gi, "Anani ê, Chyoiyúng Woi-nyí lé mhaú pyám rá matú eq,

✠ 4:26 Hkyo-on 2:1-2 † 4:27 Xú but é hkyô gi, Yudaq byu pé htûng dông xú but byi jáng, rajung jung kut rá matú hkyin masat yu é hkyô nghut lhê. Xú but byi é sù gi, Grik dông Mesaia gâ é nghut lhê.



maumyî hpau mâ é ra-am lé haq yu to râ matú, haî mù luî, náng é myit má Tsadán le byíng nhang tô lê lúhú?

<sup>4</sup> Maumyî haû joq tô le, náng é zè nghut lê a nghut lúhú? Wó ung é ngùn le náng é zè nghut ashî, a nghut lúhú? Haî mù luî, nàng haú dông dâ lê lúhú? Byù lé mhaû é a nghut, Garai Gasang lé mhaû pyám bê nghut ri." ga taî ri.

<sup>5</sup> Anani gi, dang haû lé wó gyo jáng, lèng mù, shi byuq bê nghut ri. Haú hkyô lé wó gyô é bang banshoq le, gyai yhang gyuq bùm bekô nghut ri.

<sup>6</sup> Haú hkún, zorâm wui gi, toq mù, yhâng é mâng lé htup luî, ê waq myhup pyám akô.

<sup>7</sup> Hau htâng, sum hkyíng kô myáng jáng, yhangmyi le, wang lé lo ri. Haû su dut é hkyô lé gi, yhang a sé nghut ri.

<sup>8</sup> Haú hkún, Petruq gi, "Ngo lé taî kyô wú aq. Nungnhik úng é maumyî hpau gi, shí gú za nghut lê lúhú?" ga myi jáng, yhang gi, "Nghut lê, haú gú za nghut bê." ga tû taî ri.

<sup>9</sup> Petruq gi, "Nungnhik gi, haú Yhumsing é Woi-nyí lé ísu kut chyam wú râ matú, hkâsu mù chôm myit huî akô lúhú? Wú aq, náng é yhumsing hpó lé ê myhup pyám bang gi, haû hkúmdong má jé bê; yhangmoq gi, nang lé le waq htoq pyám kó râ nghut lê." ga taî ri.

<sup>10</sup> Radá dâm, yhang le lagyo hpô é hkyî wang má lèng shi byuq bê. Zorâm wui le wang lo wú le, myiwe haû shi to lánng é lé myàng kôluî, waq ê mù, yhanglang é nàm má, ê myhup pyám bekô.

<sup>11</sup> Hau é yanmai, haú hkun lê é hpúng byù banshoq bang eq, haû su dut é hkyô lé wó gyo má wó gyô é bang gi, gyai yhang gyuq bùm bekô nghut ri.

*Byù Myo Myo Lé, Lagyo Pé Lhoq Gê Byî É Hkyô*

<sup>12</sup> Ahkuî, lagyo pé gi, mingbyû wui é hí má limik kumlhá eq mauhpo muzó myo myo lé, kut shit nyi akô. Haû lumjáng bang gi, i-myit rahkat zâ èq, Sholumon jiropp má chôm hui hui kut bum akô.

<sup>13</sup> Shiwa byu pé gi, yhangmoq lé hkunggâ nyi bùm kôlhang, yhangmoq lé a wám ê zum bùm kó.

<sup>14</sup> Nghut kôlhang, haû Yhumsing lé lumjáng é myiwe yuqgè wui gi, myo sheq

myô jat lò kômù, yhangmoq chyáng je myô jat lò bê nghut ri.

<sup>15</sup> Haû mù luî, byu pé gi, Petruq laî lo é hkún, yhâng é wupzo za lháng rayuq yuq é ahtoq má zang sháng gaq ga, nõhpyo huî é bang lé, wà mâ é hkyô yàm má waq htoq ê mù, yhuphpú pé eq taphkang pé má lheq tô akô.

<sup>16</sup> Hau htoq agó, Yerusalem awui ayàm mâ é wà pé mai le, byù ajùm ayò gi, nó é bang eq agè ashop é nat wang zing-ri huî é bang lé shuí jé lé bum akô; haú bang lhunglháng gi, lhoq gê lhoq yô byî é huî bum akô nghut ri.

*Lagyo Pé Zing-ri Huî É Hkyô*

<sup>17</sup> Hkyangjong mó eq yhâng é luzúm wui, Saduke hpúng mâ é byu pé kúm gi, gyai yhang wú manon bùm kôluî, toq mù,

<sup>18</sup> lagyo pé lé chyup yû luî, wà mâ é htóng má lhung tô akô.

<sup>19</sup> Nghut kôlhang, haû myín lé, Yhumsing é maumang lagyo rayuq gi, htóng hkum pé lé hpông pyám mù, yhangmoq lé shuí htoq yû uchyang,

<sup>20</sup> "Nungmoq htoq ló mù, noqkuq yhúm má ê yap to luî, dui é asak hkyô sik eq sêng é danglù banshoq, shiwa byu pé lé taî kyo keq." ga taî ri.

<sup>21</sup> Napsûn myoqmyàng zó lé, yhangmoq gi, noqkuq yhúm má wàng mù yhangmoq wó gyô yu é eq rajung za, shiwa byu pé lé, mhogshit hi ló akô.

Haû u lé, hkyangjong mó eq yhâng é luzúm wui gi, Israelaq byu pé é suwún wui lhunglhâng bang lé ji yù mù, Yudaq byin tú wapdoq chôm zung yû luî, lagyo pé lé é shuí yû râ matú htóng shut byù nhang kat akô.

<sup>22</sup> Haú bang kúm gi, htong má jé é hkún, lagyo pé lé a myàng kôjáng, dum taû lò mù lo taî kyo kô é gi,

<sup>23</sup> "Htóng hkum le ging ging myhî to lánng ri, htóng zúng bang le hkum yâm má yap tô akô. Nghut kôlhang, hpông wú le, ahkaû má ó le a nyi to lo nghut ri." gâ ri.

<sup>24</sup> Noqkuq yhúm zúng é zau hpó eq hkyangjong agyi wui gi, dang haû lé wó gyo kôjáng, "Shí hkyô haî dut lô râ lúhú?" ga, gyai gyuq maú bum akô.

<sup>25</sup> Haú hkún, byù rayuq wang lé lô mù, "Wú keq, nungmoq eq htóng má lhung tô

é bang gi, noqkuq yhùm má yap to mù byu pé lé mhoqshit nyi bum akô." ga luí, yhangmoq lé taí kyô ri.

<sup>26</sup> Haù mù luí, zau hpó haù gi, yhâng é a-ô mâ é bang eq ê mù, lagyo pé lé é shuí yu akô. Nghut kôlhang, shiwa byu pé luqgok èq dú lô kó râ lé gyuq kô é yanmai, htân htân a wám kut kó nghut ri.

<sup>27</sup> Lagyo pé lé shuí jé lô kôjáng, Yudaq byìn tú wapdoq hí má yhangmoq lé nyhi tô akô. Haù hkûn, hkyangjong mó gi,

<sup>28</sup> "Yesuq é myìng lé lang luí a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luí, Yesuq é sui lé, ngamoq é ahtoq má ke byi râ dá nyi akô." ga luí, yhangmoq lé taí akô.

<sup>29</sup> Haù hkûn, Petruq eq gotú lagyo pé tú taí kô é gi, "Ngamoq gi, byù dang lé gyo ra htoq má Garai Gasâng é mungdang lé je luí gyo râ dut lhê.

<sup>30</sup> Nga-nhùng é îchyí îwâ pê é Garai Gasang gi, nungmoq èq tapzîng má lhâng sat pyâm é Yesuq lé, shi e mai lhoq dui toq kat bê nghut ri.

<sup>31</sup> Israelaq amyû lé, myit lhîng hkyô eq mara hkyut byi hkyô hpóng byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhâng é loqyo loq\* má waq toq to bê nghut ri.

<sup>32</sup> Ngamoq le shí hkyo é saksé pé nghut nyi lhê; mungdang lé gyô yù luí châng é bang lé Garai Gasang byi tô é Chyoiyúng Woi-nyí le, shí pê é saksé nghut lhê." ga akô.

### *Gamalelaq Hpaqchyí Byí É Hkyô*

<sup>33</sup> Yhangmoq gi, dang haù lé wó gyo kôjáng, lûm gyo nhik-yo naù kô mù, lagyo pé lé sat pyám râ lhâng myit akô.

<sup>34</sup> Nghut kôlhang, mingbyû banshoq bâng é hí má aróng wó é tarâ sará Gamalelaq gâ é Hparishe rayuq, haù Yudaq byìn tú wapdoq má toq yap mù, lagyo pé lé razup zo lhoq htoq to nhâng luí,

<sup>35</sup> yhang taí é gi, "Israelaq byu pé ê, shí bang lé hkâsu kut râ hkyô, rago za hí myit wú keq.

<sup>36</sup> Hkâsu mù gâ le, hí hpyang Htudaq gâ é byù rayuq pô htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luí, yhang htâng châng é lhunglhâng bang le byo myín byuq kô mù, haì le a wó kut dut byuq akô nghut ri.

<sup>37</sup> Hau htâng, myìng jihpán guq yu é buinyì má, Yudaq gâ é Galile byù rayuq pô htoq mù, mingbyû wuì lé yhâng hkyam shut mhoq hpoyuq yu ri. Yhang le sat pyâm é hui mù, yhang htâng châng é lhunglhâng bang le, byo myín byuq bekô nghut ri.

<sup>38</sup> Ahkuí le, shí bang lé haì le hkâgon ko, yhangmoq kâm é dông nghut nyí kó sháng gaq; yhangmoq kut nyi é hkyô eq dá nyi é hkyô pé gi, byù myit dông kut é nghut jáng, htên byoq byuq râ za nghut lhê.

<sup>39</sup> Nghut kôlhang, Garai Gasâng chyáng mâ é nghut le gi, nungmoq wó lhoq hkyîng pyám kó râ a nghut. Garai Gasâng é gyè sheq dut lò kó râ nghut lhê." gâ ri.

<sup>40</sup> Dang haù lé yhangmoq gyô htuk bum akô. Haù mù, lagyo pé lé wut yù mù luí, nhuq bat yù kô mù, Yesuq é myìng lé lang luí mhoqshit é hkyô a ge kut râ nghut lhê ga taí kô mù, nhang pyâm akô nghut ri.

<sup>41</sup> Lagyo pé kúm gi, Yesuq é mying é yanmai ru hpuzô é hkyô gi, gíngdán nyi ri, ga myit yù kô mù, Yudaq byìn tú wapdoq haù mai gabú myit èq htoq lô bekô.

<sup>42</sup> Hau htâng, yhangmoq gi, nyí wuì làng noqkuq yhùm má le, rayhùm htâng rayhùm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

## 6

### *Garúm Râ Byù Nyhit Yuq Lé Hkyin Yu É Hkyô*

<sup>1</sup> Ahkuí, chángzô pé myô jat lo nyi é buinyì pé má, Grik dang nyo é Yudaq byu pé gi, yhangmoq é chuimó myhî pé lé, nyí wuì lhê é gàm tso gàm huq é hkyô má rago a wó kut kô é yanmai, Hebre myìng mu é Yudaq byu pé lé mara hùn dang taí bum akô.

\* **5:31** *Garai é loqyo loq gâ é gi, hpautap hkungga gíng é jowò lé taí nau é nghut lhê.*

<sup>2</sup> Haú hkûn, lagyo raxe í yuq gi, chángzô pé lhunghâng bang lé wut yù mù, "Ng-amoq, Íwa Garai Gasâng é mungdang hko kyô é muzó lé rap pyâm to mù, zangbó amû lé za lajang nyi é nghut le gi, a htuk râ nghut lhê.

<sup>3</sup> Haú mù luí, gumang wuì ê, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng má é hkyin to keq. Haú bang lé muzó shí lhum hun to râ nghut lhê.

<sup>4</sup> Ngamoq kúm gi, kyûdung é hkyô eq mungdang hkô é hkyô lé za, noqzuq tung kut nyí râ nghut lhê." ga taí akô.

<sup>5</sup> Dang haú lé shiwa byù lhunghâng bang gyô htuk kômù luí, lumjíng myít kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htúng má lhing wang lò bê sù Antioku wà mó má é Nikolaq pé lé hkyin yù mù,

<sup>6</sup> lagyô pé chyáng shuí ló akô; lagyô pé gi, kyûdung byi kômù, yhangmoq lé loq ke byí akô nghut ri.

<sup>7</sup> Garai Gasâng é mungdang gi, je myô jam lò luí, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haú lumjíng hkyô má châng nyi bum akô.

### *Stehpan Chyup Yú Huí É Hkyô*

<sup>8</sup> Ahkuí, Stehpan gi, Garai Gasâng é jeju chyunghuq eq wum-o a-tsam byíng nyí é nghut mù, byu pé é hí má mauhpo muzó pé eq limik kumlhá mó pé tûn shit ri.

<sup>9</sup> Haú hkûn, luthkyô ga bâng é tarajong eq sêng é Kuruni, Alesander eq Kiliki, Asia mau má é bang ra-am gi, toq mù, Stehpan eq dang chyin chyin lhum akô.

<sup>10</sup> Nghut kôlhang, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a ûng kó nghut ri.

<sup>11</sup> Haú mù, yhangmoq gi, "Shí yuq, Mosheq eq Garai Gasang lé rhoi dang taí nyi é lé, ngamoq wó gyô ri." ga luí, mhaú taí nhâng râ byù haq lung tô akô.

<sup>12</sup> Haú mù, yhangmoq gi, mingbyù wuì eq nhik bô suwún wuì, tarâ sará pé lé, chun

htau mù, Stehpan lé chyup yú nhâng luí, Yudaq byin tú wapdoq má shuí nyhi tô akô.

<sup>13</sup> Mhaú é saksé byu pé lé le lhoq hâng kat luí, haú bang gi, "Shí yuq, shí chyoiyúng jowò\* eq jep é tarâ lé shut shai é dang ru taí nyi ri.

<sup>14</sup> Nazaret wà byù Yesuq ga sù gi, jowò shí lé hpyoq pyám mù, nga-nhúng lé Mosheq eq byí tô é htunghking lé htaí pyám râ nghut lhê ga luí, yhang taí é dang lé ngamoq wó gyô é nghut lhê." ga taí akô.

<sup>15</sup> Haú Yudaq byin tú wapdoq má zung to bang banshoq, yhang lé chôm wú tsuq nyí kô é hkûn, yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

## 7

### *Stehpan Taí É Dang*

<sup>1</sup> Haú hkûn, hkyangjong mó gi, "Dang haú pé têng lhê lhú?" ga luí, yhang lé myi jáng,

<sup>2</sup> Stehpan tû taí é gi, "Gumang wuì eq íwa wuì ê, gyô wú keq, nga-nhúng lhunghâng bâng é íchyí Abraham gi, Haran wà má a ló nyí shi lé, Mesopotamiaq mau má nyi tô ashí hkûn, hpungwup shingkang bo é Garai Gasang gi, yhâng chyáng lé htoq shit mù,

<sup>3</sup> 'Náng é ming eq náng é amyû mai htoq ló luí, ngò tûn shit râ ming shut e ló aq.\* ga luí, yhang lé taí ri.

<sup>4</sup> Haú mù, yhang gi, Hkaldea byu pé é mau mai htoq ló luí, Haran wà má ló nyi nyi ri. Yhâng wa shi byuq é htàng má, Garai Gasang gi, ahkuí, nungmoq nyi nyi é ming shí má yhang lé htot lô nhâng bê nghut ri.

<sup>5</sup> Garai Gasang gi, shí ming má yhang lé silí wunlí nghû râ, hkyí rahkô nang í é myigùng lháng a byí é nghut kôlhang, yhang, zodù lháng a wò shi mai, yhang lé le, yhâng é awut ashín pé lé le, maumyí shí byi râ ga danggidiq byí to bê nghut ri.

<sup>6</sup> Hau htoq agó, shí hkyô lé Garai Gasang xoq taí é gi, 'Náng é awut ashín pé, tûngbau ming má bíng nyí mù, haú ming bâng eq myi shô zàn jùn zô é eq zing-rî é lé hui kó râ.

\* 6:13 Shí chyoiyúng jowò gi, Yerusalem noqkuq yhâm lé gà lhê. ✧ 7:3 Apûn 12:1

7 Nghut kôlhang, yhangmoq lé jùn zô é amyû lé le, ngò jéyáng râ nghut lhê.' gâ ri. 'Haú hkûn, yhangmoq gi, háu ming mai htoq lô mù, jowò shí má ngo lé noqkuq kó râ nghut lhê.'\* ga le, Garai Gasang taí ri.

8 Hau htâng, yhang lé ahpyo-kuq hpyit byi râ hkyô eq sêng é dangshikaq le, byi ri. Háu mù, Abraham gi, Isak lé hku é htâng shit nyí buinyi má ahpyo-kuq hpyit byi ri; Isak gi, Yakup lé hkû mù, Yakup gi, íchyí îwâ achyûng raxe í yuq lé hku kat bê nghut ri.

9 Háu íchyí îwâ pé gi, Yosep lé manôn kôluí, Egutuq ming shut jùn đông ûng kat akô. Nghut kôlhang, Garai Gasang gi, yhang eq rahá nghut nyi mù luí,

10 wuîhke jamjau banshoq mai yhang lé lhoq lhut yû mù, Egutuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm háu gi, Egutuq ming eq, yhâng é hkohkâm-wâng banshoq lé up nhang ri.

11 Háu u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhông é íchyí îwâ pé le zoshuq a myang hô zo lo dut byuq bekô nghut ri.

12 Ahkuí, Yakup gi, Egutuq ming má guqzo joq é hkyô lé wó gyo jáng, nga-nhông é íchyí îwâ pé lé sâng-hî dâm ê nhang ri.

13 Htang dâm dum ê é hkûn, Yosep gi, yhanggu yhangmâng pé lé yhang ó nghut é hkyô taí kyô ri. Hpara-uq le Yosep é yhumbyù ikun hkyô lé sê yù byi bê nghut ri.

14 Hau htâng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri.

15 Yakup le Egutuq ming má jé gyó lô luí, yhang eq nga-nhông é íchyí îwâ pé gi, banshoq háu ming má shí ló byuq bekô nghut ri.

16 Yhangmoq é mâng lé gi, Shehkem wà má yu taù ló mù, Shehkem wà mâ é Hamora é yhangzo yhangshu pê chyáng mai, Abraham eq ngùn byi mù wui hpyit tô é lupdùng má ló myhup tô akô nghut ri.

17 Abraham lé Garai Gasang byi tô é danggidiq dik râ ahkyíng jé lo nyi é u lé,

18 nga-nhông é amyû gi, Egutuq ming má Yosep lé a sê é hkohkâm pô htoq é pyat jé shoq, myoluq jebe lò bekô nghut ri.

19 Hkohkâm hpó háu gi, nga-nhông é amyû htoq má a ge é hpaqchyí da luí, nyheqnú pé lé shi byuq sháng gaq ga, dú pyám nhang é đông mai nga-nhông é íchyí îwâ pé lé zing-ri bê nghut lhê.

20 Háu u má, Mosheq lé hkû to bê. Yhang gi, Garai Gasang é hí má gyai yúnglhô é sù nghut ri; yhang gi, yhângwâ é yhâm má lhamó sum hkyap baú tô é hui mù,

21 htot tô tô é hui jáng, yhang lé Hpara-uq é byizô eq xe yù mù, zosíng kut yù luí, hku kô ri.

22 Mosheq gi, Egutuq ming mâ é hpaqchyí byéng-yá banshoq lé mhoq yù luí, nhut shô a-tsam eq hkyí loq a-tsam gyai bò sù nghut ri.

23 Yhang asak myi xê zàn jé lò jáng, yhâng é gumang Israelaq byu pê chyáng ê kùm wú râ matú wó myit htoq kat ri.

24 Ê jé jáng, zing-ri hui nyi é sù rayuq lé é myâng luí, háu yuq lé búng mù, zing-rí nyi é Egutuq byù lé, loqchoq hpuq é đông sat pyâm ri.

25 Mosheq gi, yhâng é byu pé lé yhâng é loq đông Garai Gasang hkyi yù hkyô byi nyi é lé, yhâng é amyû pé sê gyo byi nhô ngàm kôlhang, yhangmoq a sê gyo byi kó nghut ri.

26 Htang nyí lé, Israelaq byù yhangchang mabyoq htoq nyi é má, e ang mù, yhangnhik lé pyín naù luí, 'Ahkaù nhik ê, gumang yhangchang sheq ru nghut lhê nhíng, hái mù rayuq eq rayuq byoq lhum nyi akô lhú?' ga taí ngón wú ri.

27 Luzúm hpó lé zing-rí nyi sù yuq gi, 'Ngamoq é ahtoq má zau eq tarâ agyì kut râ matú, nàng lé ó yuq hkyin tô é lhú?

28 A-nyí nap Egutuq byù lé sat pyâm é su, ngo lé le sat pyám nau ri lhú?\*' ga luí, tû taí uchyang yhang lé dùn chyùn pyâm ri.

29 Mosheq gi, dang hau é yanmai, hpâng luí Midian ming má é nyi byuq ri. Háu má yuqzo í yuq é wó ri.

30 Háu ming má myi xê zàn lai jáng, Sinaq Bùm yàm, yoso hkaù mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri.

31 Mosheq gi, haû lé myàng jáng, hau é yanmai maú luî, wú wú râ ga huí e ló le, Yhumsíng é htê htoq lo é gi,

32 'Ngò gi, náng íchyí îwâ pé é Garai Gasang, Abraham, Isak, Yakup é Garai Gasang nghut nyi lhê.'\* gâ ri. Mosheq kúm gi, gyuq nán luî, a wám tu wú nghut ri.

33 Haû Yhumsíng gi, 'Náng é hkyî-tsung hkyut pyám aq, nàng yap tô é jowò gi, chy-oiyúng é myigùng nghut lhê.

34 Egutuq ming má ngá é amyû pé zik zo huí nyi é hkyô lé, ngò gè gè yhang myàng bê; yhangmoq é ngàu nhik ngàu htê lé ngò wó gyo bê; yhangmoq lé hkyi yù râ matú ngò gyó lé é nghut lhê; ahkuî, lé aq, ngò, nang lé Egutuq ming shut nhang taû kat râ.\* ga luî, yhang lé dum taí ri.

35 Yhangmoq èq, 'Nang lé zau eq tarâ agyi kut râ matú, ó yuq hkyin tô é lhú?' ga luî he-ngik pyâm é Mosheq lé yhang, mhanpúng má htoq shit é maumang lagyo đông mai, Garai Gasang gi, yhangmoq é zau eq hkyi yù sù kut nhâng luî, taû nhang kat é nghut ri.

36 Haû Mosheq yhang, Egutuq ming má le, Nhang Nè má le, yoso hkaû pé má le, myi xê zàn gyoro má mauhpo muzó pé eq limik kumlhá pé tân shit uchyang, yhâng é byù myû pé lé Egutuq ming mai shuí htoq ló ri.

37 Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoí rayuq lé, Garai Gasang gi, pò htoq lô nhâng râ nghut lhê.\* ga luî, taí tô é sù le Mosheq yhang nghut ri.

38 Yoso hkaû má nghut nyi ashî hkûn lé, shiwa byù hpúng má, Sinaq Bùm má yhang lé dang taí é maumang lagyô eq le, nga-nhông é íchyí îwâ pé eq le rahá nghut sù gi, yhang yhang nghut nyi ri; nga-nhông lé ap byi râ asak dui é mungdang lé lom yu é sù le, yhang nghut nyi ri.

39 Nghut kôlhang, nga-nhông é íchyí îwâ pé kúm gi, yhâng é dang lé a kâm gyo kômù, yhang lé he pyám luî, Egutuq ming shut taú nau é myit bo bum akô.

40 Haû mù, Arun lé, 'Egutuq ming mai nga-nhông lé shuí htoq lo é Mosheq gi, haí dut byuq bê hkyô lé, ngamoq a sé lo; haû

mù, nga-nhông hí má so byi râ hparà lhô pé saí byi aq.\* ga taí akô.

41 Haû buinyi pé má, yhangmoq gi, nojùng zo lhô saí mù, alhô haû lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô.

42 Haû mù luî, myiqhtoí pé é laiká má kâ tô é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byi é nghut akô lhú?

43 Nungmoq gi, nungmoq noq râ matú saí yu é alhô, Molak é zúm eq Rehpan hpara é kyí lé sheq, waq lhing wún kô é yanmai,

Babelon lai shoq ngò nungmoq lé lhoq lham pyám râ nghut lhê.\*

ga luî, bo tô é eq rajung za, Garai Gasang gi, yhangmoq chyáng mai myoqdong lhing pyám mù, mauhkûng htoq mâ é bui, kyî, lhamó pé lé noqkuq râ matú ap pyám bê nghut ri.

44 Mosheq lé, nàng myang é azòng eq rajung za saí aq ga, Garai Gasang taí é đông saí tô é saksé zúm lé, haû yoso má nga-nhông é íchyí îwâ pé wó yû bekô nghut ri.

45 Haû mù, nga-nhông é íchyí îwâ pé gi, yhangmoq é myoq hí mai Garai Gasang èq hkat htoq pyám byi é byù myû pé é mau má, Yoshuq eq rahá wang nyi ló kô é hkûn, saksé zúm haû lé yu wang ló akô. Haû gi, Dawiq é pyat jé shoq joq to bê nghut ri.

46 Dawiq kúm gi, Garai Gasang hí má myoqdong wó sù nghut mù luî, Yakup é Garai Gasang matú nyi jowò saí râ ahkáng dung kôlhang,

47 Sholumon èq sheq saí bê nghut ri.

48 Nghut kôlhang, Myhang htáng htum Sù gi, byu é loq èq za saí é yhùm má nyi é a nghut, haû hkyô eq séng luî myiqhtoí wá taí tô é gi,

49 'Mauhkûng gi, ngá é zùng tanghkuq, myigùng gi, ngá é hkyî nang jang nghut nyi lhê;

ngá é matú hkasû é yhùm saí byi shi kó râ lhú? Ngò nô yù râ jang gi, hkâmá nghut kó râ lhú?

\* 7:32 Htoq Ló 3:6 \* 7:34 Htoq Ló 3:5, 7-8,10 \* 7:37 Tarâ Pun 18:15 \* 7:40 Htoq Ló 32:1 \* 7:43 Amo 5:25-27

\* 7:50 Esai 66:1-2

50 Haù banshoq lé ngá é loq èq baú saí tô é a nghut kó lú? ga luí, haù Yhumsing taí ri.\*

gá ri.

51 I-myt htân mù, i-myt eq nohkyap má ahpyo-kuq a hpyit é bang\* ê, nungmoq gi, nungmoq é íchýí îwâ pé su, Chyoiyúng Woi-nyí lé hkâ-nhám le lhom he-ngik pyâm nyi akô;

52 Nungmoq é íchýí îwa pè èq a zing-rí wú é myiqhtoi, ó yuq wá nyi lhê lú? Haù Dingmán Sû pô htoq râ hkyô lé hko kyô é bang lé, yhangmoq sat pyâm é chyat nghut akô; ahkuí, nungmoq le, haù Dingmán Sû lé ap pyâm é bang eq sat pyâm é bang nghut nyi akô.

53 Maumang lagyo èq shit kyo byí é tarâ lé nungmoq wó yú kôlhang, haù lé a cháng kó nghut ri." gá ri.

#### *Stephan Lé Luqgok Èq Dú Sat É Hkyô*

54 Haù hkyô lé yhangmoq wó gyo kôjáng, yhangmoq é nhiklhum má lûm htaù záng kô é yanmai, Stephan lé, zuì wang ngat kyáng shoq wú nhik-yô nyi akô.

55 Stephan kúm gi, Chyoiyúng Woi-nyí byíng mù, mauhkúng shut tu wú kat le, Garai Gasâng é hpungwup shingkang lé le, Garai Gasâng é loqyo hkyam shut Yesuq yap tô é lé le, myang ri.

56 Haù mù, yhang gi, "Wú keq, mauhkúng hpông tô é lé le, Garai Gasâng é loqyo hkyam shut haù Byu Yhangzo yap tô é lé le, ngò myàng ri." ga taí kat ri.

57 Haù hkún, yhangmoq gi, htê mó o mó garu uchyang, yhumsing é nohkyap xaù pyám mù, radá dâm yhang lé chôm htim kômù,

58 yhang lé wà mai she htoq ló kôluí, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyí wang má yhangmoq é buhîng pé lé hkyut bum tô akô.

59 Luqgok èq dú nyi bùm kô é u lé, Stephan gi, "Yhumsing Yesuq ê, ngá é woi-nyí lé hap yù laq." ga kyûdûng ri.

60 Hau htâng, yhang gi, hkyihput htuoq mù, "Yhumsing é, yhangmoq kut é mara haù lé hkyut pyám byi laq." ga luí, htê mó

èq wut dúng ri; haù ban taí jáng, yhang kâng byit byuq bê nghut ri.

## 8

### *Hpúng Byú Lé Sholuq Zing-rí É Hkyô*

1 Sholuq gi, haù má nyi to mù, Stephan lé sat pyâm é muzó má myit bo huí ri.

Haù nyí mai, Yerusalem wà mó má é noqkuq hpúng gi, zing-ri mó huí lo é nghut mù luí, lagyo pé mai lai luí, lumjîng bang lhunglhang gi, Yuda mau eq Samariq mau jowò hkanngó má byo myín ló bekô.

2 Nghut kôlhang, tarâ hkunggâ é bang gi, Stephan lé yhum pyâm é htâng má, yhang é yanmai iyon mó huí nyi akô nghut ri.

3 Sholuq kúm gi, rayhum htâng rayhûm wàng mù, myiwe yuqgè lé she hkyut htoq yú luí, htóng má lhung tô é dông mai, noqkuq hpúng haù lé lhoq hpyoq ló nyi ri.

### *Samariq Wà Má, Gabú Danglù Hkô Kyô É Hkyô*

4 Byo htoq ló é bang kúm gi, jé é jowò hkanngó má mungdang lé hkô kyô ló akô.

5 Haù hkún, Hpilip gi, Samariq mau má é myuq ra-myuq shut e ló mù, Hkrisduq é hkyô lé hkô kyô ri.

6 Byù ajùm ayò gi, Hpilip taí kyô é hkyô lé wó gyô é eq, yhang tún shit é limik kumlhá lé myàng kôjáng, i-myt rahkat za eq yhâng é dang chôm gyô nyi bum akô.

7 Nat wang júng é byù myo myô pè chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyí htên é bang myo myo le, ge ló byuq bum akô.

8 Haù mù luí, haù myuq má gabú hkyô gyai yhang wó bekô nghut ri.

### *Myoqheq Sará Simun É Hkyô*

9 Simun gâ é byù rayuq gi, hí lé haù myuq má myoqheq hpaqchyí kut shit mù, Samariq byu pé lé lhoq maú luí, yhâng gùng lé yhang, laklaí sù nghut lhê gâ ri.

10 Byù tiq ko banshoq le, "Byù shí yuq gi, 'haù a-tsam mó' gâ é, Garaí chyáng mai hpungwup a-tsam wó yú sù nghut ri." ga luí, yhâng é dang lé gyô bum akô.

\* 7:51 I-myt eq nohkyap má ahpyo-kuq a hpyit é bang gâ é gi, Garaí dang lé a lùm a châng é bang lé gâ lhê.

11 Haú yuq gi, myáng myáng yhâng é my-  
oqheq hpaqchyi èq yhangmoq lé lhoq maú  
lo é yanmai, yhâng dang lé chòm lum bum  
akô.

12 Nghut kôlhang, Hpilip hko kyô é Garai  
Gasâng é mingdán hkyô eq, Yesuq Hkris-  
duq é myìng eq sêng é gabú danglù hkyô lé,  
lumjìng kôjáng, myiwe yuqgè wui-myhup  
hkâm yu bum akô.

13 Simun yhang yhang le lumjìng mù  
luí, wui-myhup hkâm yù mù, Hpilip htâng  
châng wún ri. Hpilip é kumlhá mó eq laklái  
kumlhá pé lé myàng jáng, yhang gi, gyai  
maú byuq ri.

14 Garai Gasâng é mungdang lé Samariq  
byu pé, lhom hap yù bê hkyô lé, Yerusalem  
wà mó má nyi é lagyo pé wó gyô bùm  
kôjáng, yhangmoq gi, Petruq eq Yohan nhik  
lé haú má nhang kat akô.

15 Yhangnhik gi, lé jé jáng, byù haú bang  
Chyoiyúng Woi-nyí wó yù râ matú kyûdung  
byí akô.

16 Hkâsu mù gâ le, Chyoiyúng Woi-nyí gi,  
yhangmoq chyáng ó yuq é ahtoq má lé, a  
gyó lô shi; Yhumsing Yesuq é myìng mai  
wui-myhup hkâm yu é za ru nghut bùm  
ashí.

17 Haú mù luí, lagyo nhik yhangmoq é  
ahtoq má loq ke byi jáng, yhangmoq gi,  
haú Chyoiyúng Woi-nyí lé wó hkâm yù bekô  
nghut ri.

18 Lagyo nhik é loq ke kat jáng Chyoiyúng  
Woi-nyí wó hkâm yu é lé, Simun myàng  
jáng, yhang gi, yhangnhik lé ngùn è byi wú  
mù,

19 "Hká yuq é ahtoq má nghut kôlhang,  
ngò loq ke byi jáng, haú yuq gi, Chyoiyúng  
Woi-nyí wó yù râ matú, haú su é a-tsam ngo  
lé le byi kó laq." ga dung ri.

20 Petruq kúm gi, "Garai Gasâng é  
chyunghuq lé ngùn èq wó wui yù râ nghut  
lhè ga luí, myit é yanmai, náng é ngùn gi,  
nàng eq rahá htên byoq byuq sháng gaq.

21 Nàng gi, Garai Gasâng é hí má myit a  
dìng sù nghut é yanmai, shí hkyô má nàng  
wó bo lóm râ a nghut.

22 Haú mù luí, shí agè ashop é hkyô  
mai myit lhìng mù, Yhumsing Garaí chyáng  
dùng tôngbán aq. Haú hkûn, náng é

unghkaú má myit pyâm é hkyô lé, mara  
hkyut pyâm byi abe.

23 Nàng gi, ladu lai shoq nhikhko zo mù,  
yubak marâ èq tuí zing to huí é lé, ngò  
myàng ri." ga yhang lé taí ri.

24 Haú hkûn, Simun gi, "Nungnhik taí é  
hkyô haí le ngá chyáng a jé sháng gaq, ngá  
é matú haú Yhumsing chyáng kyûdung byi  
kó laq." ga tû taí ri.

25 Yhangnhik kúm gi, haú Yhumsing é  
mungdang lé saksé hkâm mù ban hko  
kyo jáng, Samariq byu pé é wà myo myo  
má, haú gabú danglù lé hko kyo uchyang,  
Yerusalem wà mó shut dum taú lò bekô  
nghut ri.

### *Hpilip Eq U-nuk Nhk É Hkyô*

26 Ahkuí, Yhumsing é maumang lagyo gi,  
Hpilip lé, "Toq aq, Yerusalem wà mó mai  
Gaza shut lô é hkyô jé shoq, maupyí shut  
nyâng za e ló aq. Hkyô haú gi, yoso hkyô  
nghut lhè." ga taí ri.

27 Haú hkûn, yhang toq mù e ló ri.  
Haú u lé, Ehtiopi ming lé up é hkohkâm  
myhí Kandake é hí má ahko ahkáng mó  
wó mù, yhâng é sutzè banshoq lé zùm é,  
Ehtiopi byù u-nuk rayuq gi, noqkuq râ ga  
Yerusalem wà mó má ê mù,

28 dum taú lo é hkûn, yhâng é myan-  
glhêng má zùng luí, myiqhtoi Esai-aq laiká  
lé nghap nyi ri.

29 Woi-nyí gi, Hpilip lé, "Myanglhêng shut  
chyâng e ló aq." ga taí ri.

30 Haú mù, Hpilip gi, din è mù, myiqhtoi  
Esai-aq laiká nghap nyi é lé wó gyo jáng,  
"Nàng nghap nyi é hkyô lé sê gyo ri lhú?" ga  
luí, yhang lé myí ri.

31 Haú yuq gi, "Mhoqshit sù yuq a nyi le,  
ngò hkâsu kut sê gyo râ lhú?" ga tû taí mù,  
yhang eq rahá lo doq zùng aq ga Hpilip lé  
lung ri.

32 Yhang nghap é Chyúmdang gi,  
"Sat râ sau lé su, Yhang lé she e ló bê nghut  
ri;

sau zo gi, sau maú nyhám su é hí má zim za  
nyi tô é su, Yhang le nhut a hpông é  
za nyi tô ri.

33 Yhânggùng lé lhoq shôm pyâm to huí é  
hkûn, Yhang lé a tara é đông doqdân  
pyâm bekô;

Yhâng é asak lé myigùng htoq mai yù pyám bekô nghut mù luî, Yhâng é awut ashín lé ó yuq wó gôn kyo râ lú?"<sup>☆</sup> gâ ri.

<sup>34</sup> Haú hkûn, haú u-nuk wa gi, Hpilip lé, "Haú nghut le gi, ngo lé taî kyo laq! Myiqhtoi shí yuq gi, ó lé lhoq ang luî, taî é nghut lhê lú? Yhânggùng lé taî é nghut lhê lú? Haú a nghut jáng, góyuq é hkyô lé taî é nghut lhê lú?" ga myî ri.

<sup>35</sup> Haú hkûn, Hpilip gi, Chyúmdang haú lé yù mù, Yesuq eq sêng é gabú danglù lé taî kyô ri.

<sup>36</sup> Haú su e ló kô le, wuî joq é má jé jáng, haú u-nuk hpó gi, "Wú aq, shí má wuî joq tô ri, wui-myhup hkâm yù râ matú ngo lé hkúm râ jang haî joq ashî lú?" ga taî ri.

<sup>37</sup> Hpilip gi, "Náng i-myt banshoq èq, nàng lumjîng bê nghut le gi, hkâm yu le ge lhê." ga taî ri; yhang le, "Yesuq Hkrisduq gi, Garai Gasâng é Yhangzo nghut é lé, ngò lumjîng bê." ga tû taî ri.\*

<sup>38</sup> Haú hkûn, yhâng é myanglhêng hkying nhâng mù, yhangnhik wuî má gyó wâng luî, Hpilip gi, u-nuk hpó lé wui-myhup hkâm byî ri.

<sup>39</sup> Wuî hkaú mai htoq ló kô é hkûn, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nghut kôlhang, yhang gi, e ló é hkyô shut gabú myit èq xoq sô e ló bê nghut ri.

<sup>40</sup> Hpilip kúm gi, Azutu wà má lo htoq jé kat mù luî, Kesare wà mó jé shoq haú mau mâ é myuq pé wà pé hkangmó má gabú danglù hkô kyô wún ri.

## 9

### *Sholuq Lhik Wang Lo É Hkyô*

<sup>1</sup> Haú u lé, Sholuq kúm gi, Yhumsing é chángzô pé lé hkat kyuq nha râ eq sat pyám râ ga, nhikmó-yô nyi é nghut mù luî, hkyangjong mó chyáng è mù,

<sup>2</sup> Yhumsing é Hkyô lé lumjîng é myiwe yuqgè myàng mi-myàng lé chyup yú luî, Yerusalem wà mó shut wó she ló râ matú, Damaskuq myuq mâ é tarajong pé má byi râ laiká pé lé dúng chùng ri.

<sup>3</sup> Yhang e ló le, Damaskuq myuq eq chyáng ló nyi é hkûn, yhâng é lhîngkhyuq má mauhkûng mai dàn loq tung duqbó htoq ló ri.

<sup>4</sup> Yhang myigùng má lêng ngop tô é u lé, "Sholuq, Sholuq, nàng ngo lé haî mù zing-rî nyi lhê lú?" ga luî, yhang lé taî é htê wó gyô ri.

<sup>5</sup> Haú hkûn, yhang gi, "Yhumsîng è, nàng gi, ó yuq nghut lhê lú?" ga myi jáng, haú Yhumsîng gi, "Nàng zing-rî nyi é Yesuq nghut lhê,

<sup>6</sup> toq aq, myuq shut wang ló aq. Nàng zui saí râ hkyô lé lhom taî kyo râ nghut lhê." ga tû taî ri.

<sup>7</sup> Yhang eq rahá e ló é luzúm wuî gi, htê haú wó gyo kôlhang, ó yuq lé le a myàng kô é yanmai, maú hong yap tô bum akô.

<sup>8</sup> Sholuq toq mù, myoq hpông kat wú le, haî lé le a myàng dut byuq mù luî, yhangmoq gi, yhang lé loq mai shê mù Damaskuq myuq shut shuí wang ló akô.

<sup>9</sup> Sholuq gi, sum nyi tup myoqjit byuq mù luî, a zo a shuq é nyi byuq ri.

<sup>10</sup> Damaskuq myuq má Anani gâ é chángzo rayuq nyi ri. Yhumsîng gi, yhang lé, "Anani è." ga shîng-rán dông wut ri.

Yhang gi, "Yhumsîng è, shí má nyi lhê." ga tû taî ri.

<sup>11</sup> Haú Yhumsing dum taî é gi, "Toq aq, Hkyô-Nyàng gâ é wà hkyô shut è mù, Yudaq é yhûm má, Tarshu byù Sholuq lé è hô aq, yhang gi, kyûdúng nyi ri.

<sup>12</sup> Yhang gi, Anani ga sù wang lé lô mù, yhâng é myoq dum myàng sháng gaq ga, yhâng é ahtoq má loq ke byî é lé, shîng-rán dông myàng bê nghut ri." gâ ri.

<sup>13</sup> Anani kúm gi, "Yhumsîng è, shí yuq gi, Yerusalem wà mó má, náng é sân-yúng bang lé a ge é dông hkâ-myhó kut laî lo é hkyanglù lé ngò myo myo wó gyô wú bê;

<sup>14</sup> Shí pé má le, náng é myîng lé lêng é bang banshoq lé chyup râ ga, hkyangjong agyi pé chyáng mâ é ahko ahkáng wó yu to sù nghut ri." ga tû taî ri.

<sup>15</sup> Nghut kôlhang, Yhumsîng gi, "Ru è aq, shí yuq gi, tûngbaù pé eq yhangmoq é hkohkam pé é hí má le, Israelaq byu pé é hí

<sup>☆</sup> 8:33 Esai 53:7-8 \* 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bò.



má le, ngá é myìng lé wùn waq râ matú, ngò chùng râ nghũ luí hkyin to sũ nghut lhê;

<sup>16</sup> Ngá myìng é yanmai hkâ-í hpuzo ra hkyô lé, Ngò, yhang lé tũn shit râ nghut lhê." ga taí ri.

<sup>17</sup> Hau htâng, Anani gi, jé ê mù, yhũm haú má wàng luí, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyúng Woi-nyí byíng sháng gaq ga, nàng lé lo é hkyô má, nàng lé htoq shit é Yhumsing Yesuq èq ngo lé nhang kat é nghut lhê." ga taí ri.

<sup>18</sup> Haú hkũn jáng, Sholuq é myoq mai akyap sũ é wuí gyó byuq mù, yhang myoq dum wó myàng bê. Haú hkũn, yhang gi, toq mù wui-myhup hkãm yù luí,

<sup>19</sup> zoshuq lé zo mù, wum-o dum lhoq pyíng yù bê nghut ri.

### *Sholuq, Damaskuq Myuq Má Mungdang Hko É Hkyô*

Hau htâng, yhang gi, Damaskuq myuq má é chángzô pé eq rahá rayoq zo zùm yap nyí uchyang,

<sup>20</sup> Yesuq gi, Garai Gasâng é Yhangzo nghut é hkyô, haú hkũn jáng tarajong pé má hko kyô nyí bê nghut ri.

<sup>21</sup> Sholuq é dang lé wó gyô é lhunglhâng bang gi, maú byuq bùm kômù, "Shí yuq gi, Yerusalem wà mó má myìng haú lãng é bang lé lhoq hten lhoq hpoyô sũ nghut lhê, a nghut kó lú? Ahkuí, shí má le, haú su é bang lé chyup yù mù, hkyangjong agyi pé chyáng ló ap râ da luí jé lé é sũ a nghut kó lú?" ga myi bum akô.

<sup>22</sup> Sholuq kúm gi, a-tsam je bo lò mù, Damaskuq myuq má nyí é Yudaq byu pé lé taí hpyi kyo luí, Yesuq gi, Hkrisduq yhang nghut nyí é hkyô lé saksé tũn shit ri.

<sup>23</sup> Buinyí tsómra myáng é htâng má, Yudaq byu pé gi, yhang lé sat pyám râ matú haq dâ akô.

<sup>24</sup> Nghut kôlhâng, yhangmoq dâ é hkyô lé Sholuq sê pyám ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô.

<sup>25</sup> Sholuq é chángzô pé kúm gi, myín má yhang lé shuí yù mù, manghkoq má lúng nhâng luí, wà kyám xewâm mai lhoq nyhum hkyô kat akô nghut ri.

### *Sholuq, Yerusalem Wà Mó Má Taú Jé Lo É Hkyô*

<sup>26</sup> Hau htâng, yhang gi, Yerusalem wà mó má jé lo é hkũn, chángzô pé eq zùm yap râ matú shikut wú kôlhâng, yhang gi, chángzo dut bê hkyô lé a jing kô é yanmai, lhunglhâng bang gi, yhang lé gyuq bum akô.

<sup>27</sup> Barnaba kúm gi, Sholuq lé lagyo pé chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq èq yhang lé taí é dang wó gyô é hkyô lé le, Damaskuq myuq má Yesuq é myìng mai gyuq myit a bo é za hkâsu kut hko kyô é hkyô lé le, yhangmoq lé taí kyô ri.

<sup>28</sup> Haú mù, Sholuq gi, yhangmoq eq rahá Yerusalem wà mó má htoq htoq wàng wàng kut nyí uchyang, Yhumsing é myìng mai a gyuq a kyum é za hko kyô nyi ri.

<sup>29</sup> Grik dang nyo é Yudaq byu pé eq le, taí he lhũm nyi akô; nghut kôlhâng, yhangmoq gi, yhang lé sat pyám râ dâ akô.

<sup>30</sup> Haú hkyô lé, gumang wui sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.

<sup>31</sup> Yuda mau, Galile mau eq Samariq mau jowò hkanmó má é noqkuq hpúng gi, haú yoq pé má, lhoq ging lhoq títng é hkyô wó yù mù, nguínón nyi akô; haú Yhumsing lé gyuq hkunggâ é hkyô má le, Chyoiyúng Woi-nyí èq lhoq pun lhoq kyíng é hkyô pé má le châng nyi mù, myó jat lo bùm bekô nghut ri.

### *Ainea Ge Byuq É Hkyô*

<sup>32</sup> Haú hkũn, Petruq gi, haú mau pé má hkat kúm wún uchyang, Ludaq wà mó má nyi é sãn-yúng bâng chyáng ê jé ri.

<sup>33</sup> Haú wà má, gùngjum shí luí shit zãn tup yhupjang mai a wó toq é Ainea gâ é byù rayuq lé é myang ri.

<sup>34</sup> Haú mù, Petruq gi, "Ainea ê, Yesuq Hkrisduq, nang lé lhoq gè byi bê nghut ri, toq mù, náng é yhuphpú hen yù aq." ga luí, yhang lé taí ri. Haú hkũn jáng, Ainea wó toq yap bê nghut ri.

<sup>35</sup> Ludaq eq Sharon pá má nyi é lhunglhâng bang gi, haú yuq lé myàng mù luí, Yhumsing Yesuq chyáng lhing wang lo bum akô.

### *Dorka Ga Sû Dum Dui Lo É Hkyô*

<sup>36</sup> Ahkuí, Yopa myuq má Tabihta gâ é chángzo myiwe rayuq nyi ri; myìng haú lé Grik dang đông gi, Dorka\* gâ é nghut lhê. Myiwe haú gi, ge é muzó kut nyi é sù eq, asho awuí bang lé alu byi nyi é sù nghut ri.

<sup>37</sup> Haú u lé, yhang gi, nòhpyo hui mù shi ló bê nghut ri. Yhâng mâng lé gi, chi mù luí ahtoq gok má jang tô akô.

<sup>38</sup> Ludaq wà mó gi, Yopa myuq eq chyáng é yanmai, haú myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

<sup>39</sup> Haú hkùn, Petruq gi, toq mù, haú nhik htâng châng e ló ri. Yhang jé jáng, ahtoq pyâm gok má shuì hâng yu akô. Chui mó myhí pé lhunglhâng bang gi, yhâng nàm má yap mù ngaù uchyang, yhangmoq eq rahá nyi tô ashí hkùn Dorka hkyup é buhíng eq gotú mebu pé lé tûn shit nyi akô.

<sup>40</sup> Petruq kúm gi, lhunglhâng bang lé htoq ló nhâng mù, hkyihput htuq luí, kyûdung mù, mâng shut lhing wú luí, "Tabihta ê, toq aq!" ga taí ri, haú hkùn myiwe haú myoq hpóng lô mù, Petruq lé myàng jáng, toq zung lo ri.

<sup>41</sup> Petruq gi, loq lhâm kat mù yhang lé lêng toq yù luí, lumjíng bang eq chui mó myhí pé lé wut yù mù, dui gû ap byi ri.

<sup>42</sup> Haú hkyô lé, Yopa myuq má é bang banshoq wó gyô ló kômù luí, byù myo myo gi, haú Yhumsíng Yesuq lé lumjíng bum akô nghut ri.

<sup>43</sup> Haú mù, Petruq gi, shokuq loqmú saí é Simun ga sù eq rahá, Yopa myuq má rayoq zo nyi nyi ri.

## 10

### *Koneli É Shing-rán*

<sup>1</sup> Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap má é nghut lhê.

<sup>2</sup> Yhang gi, tarâ hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alu myo myo byi uchyang,

Garai Gasang lé hkâ-nhám le kyûdung nyi ri.

<sup>3</sup> Ra-nyí lé, myinhtâng sum hkyíng kô má, Garai Gasang é maumang lagyo rayuq gi, yhâng chyáng jé mù, "Koneli é." ga luí, yhang lé wut é lé, shing-rán mai de de myang ri.

<sup>4</sup> Haú mù, haú yuq lé wú tsuq to mù, "Yhumsíng ê, hai hkyô nghut lhê lhú?" ga gyuq myit eq myi ri.

Maumang kúm gi, "Náng é kyûdung dang eq alu byi é hkyô gi, Garai Gasang é hí má, hkungga masat đông hkyâng bê nghut ri.

<sup>5</sup> Ahkuí, Yopa myuq shut byù nhang kat mù, Petruq gâ é sù Simun lé ê shuì lò nhâng aq.

<sup>6</sup> Yhang gi, wuimau yàm mâ é, shokuq hkyup zô é Simun yhùm má bíng nyi ri." ga taí ri.

<sup>7</sup> Koneli gi, yhang eq dang taí é maumang lagyo ló byuq jáng, dui-nhâng zoshâng í yuq eq, yhâng chyáng hkâ-nhám le châng nyi bang mâ é, tarâ hkunggâ é gyezo rayuq lé jì yù mù,

<sup>8</sup> dut laí lo é hkyô banshoq, yhangmoq lé taí kyo luí, Yopa myuq shut nhang kat ri.

### *Petruq É Shing-rán*

<sup>9</sup> Htang nyí nyí-káng u lé, yhangmoq, Yopa myuq jé ló yàm má, Petruq gi, kyûdung râ ga, yhumhkúng shut doq ló ri.

<sup>10</sup> Haú hkùn, yhang gi, zòmut luí rajung jung zô nau nyi ri; nghut kôlhang, zoshuq ru gaí nyi ashí le, yhang moq byuq ló mù myoqwup shing-rán myang é gi,

<sup>11</sup> mauhkúng bóng lô mù, hpajóng mó sù é lé, myi chyûn má zui luí myigùng shut lhoq hkyô kat é azíng lé myang ri.

<sup>12</sup> Haú hkaú má, myigùng htoq mâ é hkyí myi hkyí dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri.

<sup>13</sup> "Petruq ê, toq mù, sat zo aq." gâ é danghtê le myìng htoq lo ri.

<sup>14</sup> Petruq kúm gi, "Yhumsíng ê, haú gi, a wó dut, achauq achyut é eq a sanséng é zè lé, ngò hkâ-nhám le a zô wú." ga tû taí ri.✧

\* 9:36 Dorka gâ é lichyúm gi, "chochí" gâ é nghut lhê. ✧ 10:14 Nhung 11 lé wú aq.

15 Haú hkûn, "Garai Gasang lhoq san lhoq séng bê zè lé, a sanséng hkâ-nghû." ga luí, yhang lé dum taí kat ri.

16 Haú su ga sum dâm taí é htâng má, zè haú lé radá dâm mauhkûng shut wup yu ló bê nghut ri.

17 Ahkuí, Petruq gi, yhang myang é shing-rán lé haí wá nghut lhê lhú ga luí, myit maú nyi é hkûn, haú Koneli nhang kat é bang gi, Simun é yhûm lé myang hô kômù, hkumtot má yap to luí,

18 Petruq gâ é sù Simun, yhûm haú má nyi a nyi é lé, wut myí wú akô.

19 Petruq gi, shing-rán haú lé ru myit wú nyi ashî le, Woi-nyí gi, "Wú aq, byù sum yuq nang lé ho nyi akô, toq mù gyó ló aq;

20 yhangmoq gi, ngò nhang kat é bang nghut é yanmai, myit haí a úng-âng é za, yhangmoq eq rahá bo ló aq." ga taí ri.

21 Haú mù, Petruq gi, haú bâng chyáng gyó ló luí, "Nungmoq hô nyi é sù gi, ngò nghut lhê, haí ra luí lé kô é lhú?" ga myí ri.

22 Yhangmoq taí é gi, "Dingmán é, Garai Gasang lé gyuq hkunggâ é, Yudaq amyû lhunglhâng bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng taí é dang gyo yù râ matú, yhang lé chyoiyúng maumang lagyô èq taí shit kyô é hkyô lé wó yù luí, ngamoq lé nhang kat é nghut lhê." ga akô.

23 Haú mù luí, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo ló ri; Yopa myuq má é gumang wuì ram le châng akô nghut ri.

### *Koneli Lé Petruq Huí É Hkyô*

24 Hau htang nyí, yhangmoq gi, Kesare wà mó shut wang ló akô. Koneli gi, yhâng é gumang wuì eq buinùm ji-myi wuì lé ji tsing to mù, yhangmoq lé láng nyi ri.

25 Petruq wang ló jáng, Koneli gi, te yù mù, yhâng é hkyí wang má paí gop noqkuq ri.

26 Petruq kúm gi, "Toq aq, ngò le byù ru nghut lhê." ga luí, taí uchyang yhang lé tu toq ri.

27 Haú mù, Petruq gi, yhang eq dang nyô uchyang wang ló wú le, byù myo myo zup zing tô bum é lé myang ri.

28 Haú hkûn, yhang gi, yhangmoq lé, "Yudaq byù rayuq gi, noqkuq htung đông tungbaù rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôhang, ó yuq lé le achayut dut ri, a sanséng dut ri nghû a ge taí é hkyô lé gi, Garai Gasang, ngo lé tân shit bê.

29 Hau é yanmai, nungmoq ngo lé ji kat é hkûn, ngò a he pyâm é za châng lé lo é nghut lhê. Haú mù luí, haí ra kô é yanmai, ngo lé ji akô nghû ngò myí nau ri." ga taí ri.

30 Haú hkûn, Koneli gi, "Lai lò bê myi nyí nyí, myinhâng sum hkyíng má, ngá é yhûm má, ngò kyûdung nyi le, danso loq, duqbo é mebu wut é byù rayuq ngá é hí má yap htoq shit mù,

31 'Koneli ê, Garai Gasang gi, náng é kyûdung danghtê lé le gyo byi bê; nàng alu byí é hkyô lé le, bun byi bê nghut ri.

32 Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haú yuq gi, wuimau yàm má é shokuq hkyup zô é Simun yhûm má bíng nyi ri.' ga taí ri.

33 Haú mù luí, haú hkûn jáng ngò náng chyáng byù nhang kat bê nghut lhê. Ahkuí, nàng jé é gi, gyai gè bê nghut ri. Yhumsing yhang nang lé taí nhang é gû banshoq gyô yù râ matú, ahkuí ngamoq lhunglhâng bang Garai Gasang é hí má nghut nyi lhê." ga taí ri.

### *Petruq Hko Kyô É Mungdang*

34 Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuí ngò gè gè yhang sé bê.

35 Byù myû chângjup má, Yhang lé gyuq hkunggâ é eq tengmán é muzó jizó sai é sù gi, Yhang é hí má myoqdong wó nyi ri.

36 Nyi mi-nyì, joq mijoq é Yhumsing, Yesuq Hkrisduq é yanmai, nguingón hkyô eq sêng é gabú danglù lé hko kyo sháng gaq ga, Israelaq byu pê chyáng Garai Gasang hun kat é mungdang eq rajung za,

37 bapisma hkyô lé, Yohan hko é htâng, Galile mau mai Yuda mau banshoq má taí pyo ló é hkyô lé, nungmoq sé gû nghut nyi lhê.

38 Haú gi, Garai Gasang èq Chyoiyúng Woi-nyí eq wum-o a-tsam byi to bê sù,

Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat eq zing-ri huí é bang banshoq lé lhoq gê byí wún ri.

<sup>39</sup> Haú mù, Yudaq byu pé é ming má le, Yerusalem wà mó má le, yhang zui saí bê muzó banshoq é saksê pé gi, ngamoq nghut nyi lhê. Haú yuq lé yhang, yhangmoq sik zîng má jén sat pyám bekô nghut ri.

<sup>40</sup> Garai Gasang kúm gi, sum nyí nghû râ buinyi má, haú yuq lé lhoq dui toq kat é nghut mù luí, byù banshoq é hí má a nghut e za, saksé kut râ matú Garai Gasang hkyin to gù nghut é bang ngamoq é hí má za htoq shit bê nghut ri.

<sup>41</sup> Yhang shi é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê.

<sup>42</sup> Yhang gi, asak dui é bang eq shí bê bâng é tarâ agyì kut râ matú, Garai Gasâng eq Yhang lé hkyin tô é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri.

<sup>43</sup> 'Yhang lé lumjîng é bang yuq hkanmó gi, Yhâng é mying é yanmai, yubak hkyut pyám byí é hui kó râ nghut lhê.' ga luí, taí é myiqhtoi banshoq gi, Yhâng é hkyô lé saksé hkam byí é bang nghut nyi akô." ga taí ri.

### *Chyoiyúng Woi-nyí Lé, Tûngbaù Pé Wó Hap Yu É Hkyô*

<sup>44</sup> Petruq gi, haú hkyô lé ru taí nyi ashí le, dang haú wó gyô é banshoq bâng ahtoq má Chyoiyúng Woi-nyí gyó jé lo ri.

<sup>45</sup> Tûngbaù pé é htoq má lháng Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjîng bang Yudaq byu pé gi, maú bum akô.

<sup>46</sup> Hkâsu mù gâ le, yhangmoq gi, laklaí dang nyo é lé le, Garai Gasang lé hkya-on kô é lé le, wó gyô bùm kô é yanmai nghut ri.

<sup>47</sup> Haú mù, Petruq gi, "Ngamoq su Chyoiyúng Woi-nyí hkâm yù bê bang lé, bap-tisma a byi nhâng râ gi, wui lé ó yuq wó hkâm to râ lú?" ga taí ri.

<sup>48</sup> Hau htâng, yhang gi, yhangmoq lé Yesuq Hkrisduq é myîng lang luí wui-myhup hkâm yù râ matú pyîng tô ri. Haú hkûn, yhangmoq gi, Petruq lé buinyi ra-í nyí, nyi gyó shi aq ga chôm hkûm akô.

## 11

### *Petruq, Yhang Kut É Muzó Lé Shit Kyô É Hkyô*

<sup>1</sup> Tûngbaù pé le, Garai Gasâng é mung-dang lhom yù bê gâ é hkyô lé, lagyo pé eq Yuda mau pé mâ é gumang wui wó gyô akô.

<sup>2</sup> Haú mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjîng bang gi,

<sup>3</sup> "Nàng gi, ahpyo-kuq a hpyit é bâng é yhûm má wàng mù, yhangmoq eq razo rashuq kut ri." ga luí, yhang lé mara lhom taí hun bum akô.

<sup>4</sup> Haú hkûn, Petruq gi, haú dut lò bê hkyô lé awang mai ahpyo hpyot, yhangmoq lé taí sân kyô hi kat é má,

<sup>5</sup> "Ngò gi, Yopa myuq má kyûdûng nyi le, moq byuq ló mù shîng-rán myang é gi, mauhkûng mai hpajóng mó sù é myi chyûn shut zui luí, ngá shut lhoq hkyô kat é zè gyó jé lo é lé, myang ri.

<sup>6</sup> Haú lé rago za saí wú le, myigùng htoq má hkyí myi hkyí dap é jung dusak, yosô zè, dô yê é jung eq, maulat nghoqzô pé bo tô é lé, ngò myàng luí, myit wú nyi é hkûn,

<sup>7</sup> 'Petruq ê, toq mù, sat zo aq.' gâ é danghtê lé, ngò wó gyô ri.

<sup>8</sup> Ngò kúm gi, 'Yhumsîng ê, haú gi, a wó dut, achaq achyut é eq a sansêng é zè, ngá é nhut má hkâ-nhám le a wang wú.' nghû taí kat é nghut lhê.

<sup>9</sup> Haú hkûn, 'Garai Gasang lhoq san lhoq yúng bê zè lé, a sansêng hkâ-nghû.' ga luí, mauhkûng mai dum taí kat ri.

<sup>10</sup> Haú su ga sum dâm taí é htâng má, haú pé banshoq lé mauhkûng shut dum wup yu ló bê nghut ri.

<sup>11</sup> Haú hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô.

<sup>12</sup> Chyoiyúng Woi-nyí gi, ngo lé myit a úng-âng é za, yhangmoq htâng châng ê aq ga taí ri; shí gumang hkyuq yuq le ngò

eq rahá ê mù, Koneli é yhûm má ngamoq wang é.

<sup>13</sup> Haú hkûn, haú yuq gi, yhang é yhûm má maumang lagyo lé htoq shit é hkûn, yhang hkâsu myang é hkyô lé le; maumang lagyo èq yhang lé, 'Yopa myuq shut byù nhang kat mù, Petruq gà é sù Simun lé é jî nhâng aq;

<sup>14</sup> nàng eq nàng yhumbyù lunglhang bang hkyi yù hui râ danglù, yhang, nàng chyáng wun lé lô byi râ nghut lhê.' ga taí é hkyô lé le, ngamoq lé taí kyô ri.

<sup>15</sup> Ngò dang taí hi lô nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri.

<sup>16</sup> Haú hkûn sheq, ngò gi, 'Yohan gi, wui èq wui-myhup hkám byi ri; nungmoq kúm gi, Chyoiyúng Woi-nyí èq wui-myhup hkám byi é hui kó râ nghut lhê.' ga luí, Yhumsing taí é dang lé bûn kat ri.

<sup>17</sup> Haú mù luí, Yhumsing Yesuq Hkrisduq lé lumjúng é hkûn, ngamoq lé Garai Gasâng jeju chyunghuq byi é su, Yhang, yhangmoq lé le byi é nghut le gi, ngò gi, hkâsú é byù nghut luí, Garai Gasang lé wó lhom hkúm pyám râ lú?" ga taí ri.

<sup>18</sup> Yhangmoq gi, haú hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, tûngbaù pé lé le, asak dùi râ matú myit lhing hkyô byi bu-nhung!" ga luí, Garai Gasang lé chôm hkya-ôn akò nghut ri.

### *Antioku Wà Mâ É Noqkuq Hpúng*

<sup>19</sup> Ahkuí, Stehpan lé sat pyám kô é htàng má, zing-ri hui kô é yanmai, byo myín lô é bang gi, Hpinisi mau, Kupru zinlóng eq Antioku wà mó jé shoq byo lô kômù, Yudaq byu pé lé baù za, mungdang haú hko kyô akò nghut ri.

<sup>20</sup> Nghut kôlhang, yhangmoq mâ é Kupru byù eq Kuruni byù ra-am gi, Antioku wà mó má châng jé lô kômù, Yhumsing Yesuq é gabú danglù lé, Grik pé lé le taí kyô bum akò.

<sup>21</sup> Haú Yhumsing é loq gi, yhangmoq eq rahá nghut nyi mù luí, byù myo myo gi, lumjúng mù, Yhumsing chyáng lhing wang lo bùm bekò nghut ri.

<sup>22</sup> Haú bâng é hkyô lé, Yerusalem noqkuq hpúng é no má hkyang jé lô é nghut mù luí, yhangmoq gi, Barnaba lé Antioku wà mó jé shoq nhang kat akò.

<sup>23</sup> Yhang jé é hkûn, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhikhum banshoq èq haú Yhumsing má lhumzuí nyi râ matú, lunglhang bang lé myit wum byi ri.

<sup>24</sup> Hkâsu mù gà le, Barnaba gi, byù gè nghut mù, Chyoiyúng Woi-nyí le, lumjúng myit le byíng tô é sù nghut nyi ri. Haú mù, byù myo myo gi, haú Yhumsing chyáng jat wang lo bùm bekò nghut ri.

<sup>25</sup> Hau htàng, Barnaba gi, Sholuq lé é hô râ ga Tarshu myuq shut é mù, yhang lé myàng jáng, Antioku wà mó má shuí lo ri.

<sup>26</sup> Haú mù, yhangnhik gi, razàn gón noqkuq hpúng haú eq rahá zum nyi kô é nghut mù luí, byù myo myo lé wó mhoqshit akò. Chángzô pé gi, Hkristan gà é myíng lé, Antioku wà mó má sâng-hi wó yù bekò nghut ri.

<sup>27</sup> Haú u lé, myiqhtoí pé ra-am gi, Yerusalem wà mó mai, Antioku wà mó má lé jé bum akò.

<sup>28</sup> Haú bang mâ é Agabu gà é sù gi, toq yap mù, Romaq mingkan tîng má mutmó gyó lô râ nghut é hkyô lé, Woi-nyí èq tûn shit é dông taí kyô ri; (Haú gi, hkohkâm Klodi é pyat má dut bê nghut lhê.)

<sup>29</sup> Haú mù luí, chángzô pé gi, Yuda mau mâ é gumang wui lé, ó le ó wó dut é myhó garum kat râ ga, myit hpyit yu bum akò.

<sup>30</sup> Haú eq rajung za kut kômù, yhangmoq gi, chyunghuq haú pé lé Barnaba eq Sholuq nhik é loq mai suwún wui pé chyáng hun kat bekò nghut ri.

## 12

### *Petruq, Htóng Mai Wó Lut Htoq Lo É Hkyô*

<sup>1</sup> Haú u lé, Herut hkohkâm gi, hpúng byù ra-am lé chyup yù mù, zing-ri râ ga ngantsâ nyi ri.

<sup>2</sup> Haú mù, Yohan é yhangmang Yakuq lé sham èq sat pyám nhang ri.

<sup>3</sup> Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng

chyup yu ri. Haû dut é gi, mún a kat é muk zo poî u lé nghut ri.

<sup>4</sup> Herut gi, Lhoqlhai Poî lai jáng sheq, mingbyû wui hí má jéyáng râ ga myit tô é yanmai, yhang lé chyup yu é htâng má, htóng má lhûng to mù, yhang lé zúng râ matú, gyè myi yuq yuq kut myi hpúng lé ap tô ri.

<sup>5</sup> Haû mù, Petruq gi, htóng má lúng tô ri; hpúng byû wui kúm gi, yhang é matú Garai Gasâng chyáng kyû gyai chôm dung byí nyi akô nghut ri.

<sup>6</sup> Petruq gi, Herut eq yhang lé jéyáng râ matú she htoq yû râ hí myin lé, shamtoq-tui í hkat eq tui é hui luî, gyezo í yuq é gyoro má yhup myhî tô ri; zúng é bang le htóng hkum má zúng nyi bum akô.

<sup>7</sup> Haû hkûn, Yhumsing é maumang lagyo rayuq lé htoq shit mù, gok haû má duqbó lo ri. Maumang lagyo haû gi, Petruq é namcham má ê hpuk kat mù, "Myap toq wú aq." ga nhaû ri; haû hkûn, Petruq é loq má é toqjâng tui pé le gyut gyó ló bê nghut ri.

<sup>8</sup> Maumang dum taí é gi, "Hpyihit hit mù, hkyî-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taí ri.

<sup>9</sup> Haû hkûn, yhang gi, htóng mai yhâng htâng châng htoq ló ri; nghut kôlhang, maumang lagyo kut é muzó haû gi, gè gè nghut é lé, yhang a sé mù, shing-rán myang é nghut ri ga myit yu ri.

<sup>10</sup> Ahkuî, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haû le yhang baú bóng lô mù, yhangnhik htoq luî, wà hkyô rahkat má sô ló le, maumang lagyo gi, haû hkûn jáng, yhâng chyáng mai gâng ló byuq bê nghut ri.

<sup>11</sup> Ahkuî, Petruq gi, dum bûn gyîng lò jáng, "Yhumsing gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuî ngò gè gè sé bê." ga taí ri.

<sup>12</sup> Haû hkyô lé myit sê kat jáng, yhang gi, byù myo myo zing mù, kyûdûng nyi é

jowò, Markuq gâ é Yohan é yhângnu Mariq é yhûm má jé ló ri.

<sup>13</sup> Haû mù, yhang gi, yhûm wàng hkum lé ló bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri.

<sup>14</sup> Yhang gi, Petruq é htê nghut é lé sê gyô kat jáng, lûm gabú luî hkum a hpóng byi shí é za, yhûmhkaû shut din wang ló mù, "Petruq gi, hkum mhó lut má lo yap tô ri." ga ló taí kyô ri.

<sup>15</sup> Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru taí nyi ri. Dum, yhangmoq gi, "Yhâng é maumang lagyo nghut âng ri." ga taí akô.

<sup>16</sup> Nghut kôlhang, Petruq gi, hkum ru bat nyi mù, yhangmoq hpông kat é hkûn, yhang lé myàng kôjáng, chôm maú byuq bum akô.

<sup>17</sup> Yhang gi, yhangmoq lé zim za nyi keq ga loq lik shit mù, yhang lé Yhumsing eq htóng mai hkâsu kut shuí htoq yu é hkyô lé taí kyo luî, "Shí hkyô lé Yakuq eq gumang wui lé taí kyô kat keq." ga taí ri. Hau htâng, yhang htoq ló luî, jowò gó shut e ló bê nghut ri.

<sup>18</sup> Ahkuî, maubó jáng, gyezô pé gi, Petruq haû dut byuq é hkyô lé a sé kô é yanmai, gyai maú gabyông bum akô.

<sup>19</sup> Herut kúm gi, Petruq lé ho wú le a myàng jáng, zúng é bang lé myi gôn wú mù, yhangmoq lé sat pyám râ matú hkunmó hkyô ri.

### *Herut Hkohkâm Shi Byuq É Hkyô*

Hau htâng, yhang gi, Yuda mau mai Ke-sare wà mó má gyó ló mù ló nyi nyi ri.

<sup>20</sup> Haû gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haû mù luî, yhangmoq gi, myit rahkat zâ eq yhâng chyáng é mù, Blastu gâ é, hkohkâm wa lum tô é suwún hpó lé é lûm hkaû mù, simsaq hkyô é dúng akô. Hkâsu mù gâ le, yhangmoq é zoshuq wó râ matú gi, Herut é ming lé lûm hkaû nyi kô é yanmai nghut ri.

<sup>21</sup> Haû hkûn, ding lhûm tô é buinyi má, Herut gi, hkohkâm hking wut chûng mù, hkohkâm tanghkuq má zùng luî, yhangmoq lé hkohkâm mungdang byi ri.

<sup>22</sup> Haû jáng, mingbyû wuì gi, "Htê shî gi, waxâng byu é htê a nghut, garai wá é htê sheq nghut ri." ga garú bum akô.

<sup>23</sup> Radá dâm, Herut gi, Garai Gasâng é hpungwup shingkang lé a tê byî é yanmai, Yhumsing é maumang lagyo gi, yhang lé dâm byi luî, yhang gi, luq eq hkê é hui mù, shi byuq bê nghut ri.

<sup>24</sup> Haû Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

<sup>25</sup> Barnaba eq Sholuq nhik gi, Yerusalem wà mó má yhangnhik saí tûm nyi é muzó ban saí jáng, Markuq gâ é Yohan lé shuí chûng mù, Antioku wà mó shut taû lô bekô nghut ri.

## 13

### *Barnaba Eq Sholuq, Hkyin Nhang Kat Huì É Hkyô*

<sup>1</sup> Ahkuî, Antioku wà mó mâ é noqkuq hpúng má, myiqhtoi pé eq sará pé le lom nyi akô. Haû bang gi, Barnaba, Niger\* gâ é Simeon, Kuruni byû Luki, (Herut zau hpó eq zum kô lò sù) Manaen eq Sholuq pé nghut akô.

<sup>2</sup> Yhangmoq gi, zoshuq gám luî Yhumsing lé noqkuq dojaú nyi é hkûn, Chyoiyúng Woi-nyí gi, "Ngá é mú wùn waq râ matú ji tô é Barnaba eq Sholuq nhik lé, hkyin to keq." ga taí ri.

<sup>3</sup> Haû mù luî, yhangmoq gi, zoshuq gám luî kyûdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

### *Kupru Zinlóng Má Dut É Hkyô*

<sup>4</sup> Haû mù, yhangnhik gi, Chyoiyúng Woi-nyí eq nhang kat é eq rajung za, Seluki wà shut gyó lò mù, haû mâ é lhaí ji luî, Kupru zinlóng má jé lò luî,

<sup>5</sup> Salami wà mó má nyi nyi é hkûn, Yudaq byu pé é tarajong pé má, Garai Gasâng é mungdang hko kyô akô. Markuq gâ é Yohan le yhangnhik lé htuqluq htuqbang kut nyi ri.

<sup>6</sup> Yhangmoq gi, haû zinlóng mai lai byit e lò mù Pahpu wà mó jé lò kô é hkûn, myiqhtoi pyoq nghut sù Bara-Yesuq gâ é

Yudaq byû myoqheq sará rayuq eq htung hui akô.

<sup>7</sup> Haû yuq gi, Sergi Poluq gâ é, myit hpaqchyî kûng é ginwáng zau hpó é byû rayuq nghut lhê. Minggyi hpó haû gi, Garai Gasâng é mungdang gyô yù naù mù, Barnaba eq Sholuq nhik lé ji yu ri.

<sup>8</sup> Haû hkûn, myoqheq sará gâ é lichyúm dông myhîng é Eluma le gâ é Bara-Yesuq kúm gi, ginwáng zau hpó lé haû lumjîng hkyô má a jau lò nhâng nau é nghut mù luî, yhangnhik lé lhom he tang pyâm ri.

<sup>9</sup> Haû hkûn, Poluq le gâ é Sholuq gi, Chyoiyúng Woi-nyí byíng mù, yhang lé wú tsuq to luî,

<sup>10</sup> "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán hkyô hkangmó é gyè hpó ê, Yhumsing é tengmán hkyô lé a lhoq hpyoq é a wó nyi lhu?

<sup>11</sup> Ahkuî, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê." ga taí ri.

Haû hkûn jáng, yhâng é myoq gi, myhî-myhà ga luî mauchut tuq dut lò byuq ri; haû mù, yhang lé shê râ byû ho sop lhîng wùn ri.

<sup>12</sup> Haû hkyô lé ginwáng zau hpó myàng jáng, Yhumsing eq sêng é mhoqshit é hkyô lé wú maú luî lumjîng bê nghut ri.

### *Antioku Wà Mó Má Dut É Hkyô*

<sup>13</sup> Hau htâng, Poluq eq yhâng luzúm wuì gi, Pahpu wà mó mai lhaí ji mù, Pamhpuli mau mâ é Perga wà má jé lò akô. Markuq gâ é Yohan kúm gi, yhangmoq eq gang luî, Yerusalem wà mó shut taû lú byuq bê nghut ri.

<sup>14</sup> Dum, yhangmoq gi, Perga mai toq e lò le, Pesidi ginwáng má é Antioku wà mó má jé lò akô. Bánno buinyi má, yhangmoq gi, tarajong má wang zung tô akô.

<sup>15</sup> Haû hkûn, Mosheq é tarâ laiká eq myiqhtoi laiká pé lé ban nghap jáng, tarajong má up bang gi, "Gumang wuì ê, mingbyû wuì lé myit wum byi dang joq kô é nghut le gi, ahkuî taí lo keq." ga luî, yhangmoq chyáng taí nhang kat ri.

<sup>16</sup> Haû hkûn, Poluq gi, toq yap mù, zîm byuq kó sháng gaq ga loq tú luî, "Israelaq

\* 13:1 Grik dong Niger gâ é gi, byû noq gâ é nghut lhê.

byu pé eq Garai Gasang lé gyuq hkunggâ é byu pé ê, chôm gyô yù keq.

<sup>17</sup> Israelaq byu pé é Garai Gasang gi, ngamoq é íchyí íkê pé lé hkyin yù bê nghut mù luí, Egutuq ming má byùbín dut nyi to ashí hkún, yhangmoq lé kô myhâng nhâng mù, hpungwup a-tsam bo é loq èq haú mau mai shuí htoq ló ri.

<sup>18</sup> Dum, myi xê zàn kô, yoso pé má yhangmoq é a-kyang lé jân pyám byi mù,

<sup>19</sup> Hkanaan ming mâ é byuhú nyhit hú lé lhoq htên pyám luí, haú bâng é mingdán mâ é silí wunlí yhangmoq lé gàm byi ri. Haú gi, myi shô ngo xê zàn kô myáng ri.

<sup>20</sup> Hau htâng má, Garai Gasang gi, myiqhtoí Samuelaq é pyat jé shoq tarâ agyì pé lé to byi ri.

<sup>21</sup> Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyû mâ é, Kisha é yhangzo Sholuq lé byi luí, yhang gi, myi xê zàn up bê nghut ri.

<sup>22</sup> Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut rá nghut lhê.' gâ ri.

<sup>23</sup> Garai Gasang gi, Yhâng é danggidiq joq é eq rajung za, Israelaq byu pé é matú, haú yuq é awut ashín mai, hkyi yù Sû Yesuq lé, pô htoq nhâng bê nghut ri.

<sup>24</sup> Yesuq a jé lé shimá, Yohan gi, Israelaq byu pé banshoq lé myit lhîng hkyô eq sêng é baptisma hkyô lé hko kyo bê nghut ri.

<sup>25</sup> Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akò lhú? Ngò gi, haú yuq a nghut, wú keq, ngá é htâng má rayuq jé rá nghut lhê, haú yuq é hkyî-tsung tui hpyî rá lhâng ngò a gíng.' ga taí ri.

<sup>26</sup> Abraham é yhangzo yhangshû pé eq Garai Gasang lé gyuq hkunggâ é tungbaù, gumang wuì é, shí hkyi yù hkyô mungdang lé, nga-nhûng chyáng byi kat bê nghut ri.

<sup>27</sup> Yerusalem wà mó mâ é bang eq, yhangmoq é zau suwún wuì gi, Yhang hkyi yù sù nghut é lé le, Bánno buinyì hkangmó

nghap é myiqhtoí pé é dang lé le, a sê gyo kô é yanmai, Yesuq lé sat rá doqdân é hkún, myiqhtoí pé é dang lé lhoq dik pyám bekò nghut ri.

<sup>28</sup> Yhâng chyáng shí gíng é mara a myàng kôlhâng, Yhang lé sat pyám nhâng rá matú, Pilat chyáng dúng akò.

<sup>29</sup> Yhangmoq gi, yhang eq séng luí, kâ to má kâ to ban lhoq dik kôjáng, Yhang lé tapzîng mai yu hkyó mù, lup má kat tô akò nghut ri.

<sup>30</sup> Garai Gasang kúm gi, Yhang lé shi é mai lhoq dui toq yù bê nghut lhê.

<sup>31</sup> Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyì tsómra myáng shoq htoq shit shit kut ri. Haú bang gi, ahkuí, nga-nhûng Israelaq byu pé é hí má, Yhâng é saksé dut bekò nghut ri.

<sup>32</sup> Haú mù, í dam lhê é Hkya-on Kungtôn Laiká má,

'Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê.'<sup>☆</sup>

ga luí, kâ tô é eq rajung za,

<sup>33</sup> Garai Gasang gi, íchyí íwâ pé lé byi tô é danggidiq lé, Yesuq lé lhoq dui toq byi é dông, yhangmoq é yhangzo yhangshu ngamoq é matú, lhoq dik byi é gabú danglù lé, nungmoq chyáng ngamoq wun lé byi bê.

<sup>34</sup> Hau htoq agó, Yhang htên byoq é hkâ-nhám a hui shoq, shi é mai lhoq dui toq yù rá hkyô eq séng luí, Garai Gasang taí é gi, 'Dawiq lé byi tô é danggidiq eq rajung za, chyoiyúng é eq lumgíng é jeju lé, ngò nungmoq lé byi rá nghut lhê.'<sup>☆</sup>

gâ ri.

<sup>35</sup> Hkya-on Kungtôn Laiká gó wô má le, 'Náng é Chyoiyúng Sû lé, Nàng htên byoq nhâng naù rá a nghut.'<sup>☆</sup>

ga taí tô ri.

<sup>36</sup> Ahkuí, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luí, íchyí íwâ pé eq rahá myhup pyám hui mù, htên byoq byuq é hui bê nghut ri.

<sup>37</sup> Garai Gasang lhoq dui toq yu é sù kúm gi, htên byoq huí é a nghut.

<sup>38</sup> Haú nghut é yanmai, gumang wuì é, haú yuq mai yubak wó hkyut pyám byi é



hkyô lé, nungmoq lé hko kyô nyi é nghut é le, sê nyi keq.

<sup>39</sup> Hau htoq agó, Mosheq é tarâ eq mara hkyut san byî é a hui kôlhang, haú yuq lé lumjîng é bang gi, hkyô lhumjup má mara hkyut san byî é hui râ nghut lhê.

<sup>40</sup> Hau é yanmai,

'Wú keq, jihpoî é bang ê, maú mù luî htum byuq keq;

nungmoq é buinyi pé má ngò rajung jung kut htoq râ nghut lhê;

<sup>41</sup> haú hkyô lé, rayuq yuq, nungmoq lé hkaî kyo kôlhang, jîng kó râ a nghut.'<sup>✧</sup>

ga luî, myiqhtoî pé taî é dang, nungmoq má a ang sháng gaq, sidiq nyi keq." ga hko kyô nyi ri.

<sup>42</sup> Ahkuî, Poluq eq Barnaba nhik tarajong mai htoq lô le, htâng lhê é Bánno buinyi má le, haú pé lé dum hkaî kyo râ matú yhangmoq chô m dúng akô.

<sup>43</sup> Chôm byo htoq lô kô é hkûn, Yudaq byu pé eq Yudaq noqkuq htung má lhing wang lo é tarâ hkunggâ é byù myo myo gi, yhangnhik é htâng má châng bùm kô é nghut mù luî, Garai Gasâng jeju má gîng nyi râ matú, yhangnhik gi, yhangmoq lé lhoq pun lhoq kyîng akô nghut ri.

### *Tungbaù Pé Chyáng Lhing Lo É Hkyô*

<sup>44</sup> Hau htang lhê é Bánno buinyi má, Garai Gasâng é mungdang gyô yù râ matú, rawa bang aluq shoî banshoq, lé zup zîng to bum akô.

<sup>45</sup> Yudaq byu pé kúm gi, byù moq mó haú lé myàng jáng, manon myit baú byîng bùm kômù luî, Poluq taî é dang lé taî htîng é eq nhîng pyâm akô.

<sup>46</sup> Poluq eq Barnaba le gyuq myit a bo é dông taî é gi, "Garai Gasâng é mungdang lé, nungmoq lé hí taî kyo râ dut é yanmai, ngá-nhik taî bê nghut lhê. Nghut kôlhang, nungmoq gi, haú lé lhom he-ngik pyám kômù, ahtum abyuq é asak eq gingdán é dông yhumsing gùng lé a myit yù kô é yanmai, wú keq, ahkuî, ngá-nhik gi, tungbaù pé shut lhing lô berâ nghut lhê.

<sup>47</sup> Hkâsu mù gâ le, haú Yhumsîng gi,

<sup>✧</sup> 13:41 Hbk 1:5    <sup>✧</sup> 13:47 Esai 49:6

'Hkyi yù hkyô lé maumyî htum shoq wó chùng jé râ matú, Ngò, nàng lé tungbaù pé é maubó dut nhâng bê.'<sup>✧</sup> ga luî, ngamoq lé hkunmó hkyó kat bê." gâ ri.

<sup>48</sup> Tungbaù pé gi, dang haú lé wó gyô kôjáng, gabú é eq Yhumsing é mungdang lé hkyá-on kungtôn nyi bum akô. Ahtum abyuq é asak lé wó râ matú hkyin to huî é lhunglhang bang le, lumjîng bum akô nghut ri.

<sup>49</sup> Yhumsîng é mungdang gi, haú ming gón jam lò bê nghut ri.

<sup>50</sup> Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wuî mâ é tarâ hkungga bang eq, haú wâ mâ é suwún wuî lé, nhik lhoq yo kôluî, yhangnhik lé maukyo mai chô m hkat htoq pyâm akô.

<sup>51</sup> Yhangnhik gi, yhangmoq lé a nau é hkyô tûn shit é dông, yhumsing é hkyî mâ é hpuilhaú lé yhangmoq chyáng ko hkyô pyâm to kômù, Ikoni wâ mó shut lô byuq bekô nghut ri.

<sup>52</sup> Chángzô pé kúm gi, gabú é htoq agó, Choyoyúng Woi-nyí byîng nyi bum akô nghut ri.

## 14

### *Poluq Eq Barnaba Nhik, Ikoni Wâ Mó Má Lô Jé É Hkûn Lhê Hkyô*

<sup>1</sup> Ahkuî, Ikoni wâ mó má nghut nyi é hkûn, Poluq eq Barnaba nhik gi, Yudaq byu pé é tarajong má rahá wàng mù, Yudaq byù eq tungbaù pé ajùm ayò lumjîng bùm kó shoq, wum kat hko kyô akô.

<sup>2</sup> Nghut kôlhang, a lumjîng é Yudaq byu pé gi, lumjîng é gumang wuî lé a ngui râ dông tungbaù pé lé mhoq hpyoq yù mù, shuî gumlaù akô.

<sup>3</sup> Haú mù luî, yhangnhik gi, tsómra myang shoq haú má nyi mù, haú Yhumsing é matú gyuq myit a bo é za hko kyô akô; Yhang Yhumsîng le yhangnhik é loq mai limik kumlhá eq mauhpo muzó dut nhang é dông, Yhâng é jeju mungdang lé saksé hkám byî nyi ri.

<sup>4</sup> Haú wâ mâ é bang kúm gi, myit byo lô bùm kô é nghut mù luî, Yudaq byu pé

chyáng ra-am, lagyo pê chyáng ra-am, lom byuq ló akô.

<sup>5</sup> Ahkuí, tûngbaù pé le, Yudaq byù eq yhangmoq é uphkâng bang le, yhangnhik lé rhoi mù luqgok eq dú sat râ ga htîm lo bum akô.

<sup>6</sup> Nghut kôlhang, yhangnhik gi, haú hkyô lé bûn sê kat kôjáng, Lukaoni ginwáng mâ é Lustra eq Derbe wà mó eq, hau é awui ayàm wà tiq wà zo pé shut hpang e ló akô.

<sup>7</sup> Haú pé má le, gabú danglù xoq hko kyô wún akô nghut ri.

### *Lustra Wà Mó Má Ló Jé É Hkûn Lhê Hkyô*

<sup>8</sup> Ahkuí, Lustra wà mó má, înu unghkaù mai hkyî hten mù luí, hkâ-nhám le hkyô a wó sô wú é sù rayuq zung tô ri.

<sup>9</sup> Yhang le Poluq taí é dang lé gyô nyi ri. Poluq gi, haú yuq lé wú tsuq kat é hkûn, wó lhoq gè byi hui râ nghut lhê gâ é lumjîng myit yhang chyáng bo tô é lé, myàng byi ri.

<sup>10</sup> Haú mù, Poluq gi, "Toq yap aq!" ga luí, htê mó eq yhang lé taí kat jáng, yhang gi, byam toq kat mù, wó so bê nghut ri.

<sup>11</sup> Haú mù, Poluq kut é muzó lé shiwa byu pé myàng kôjáng, yhangmoq gi, Lukaoni dang đông, "Nat hparà pé gi, byù gùng đông kut luí ngamoq chyáng gyó ló bekô nghut ri." ga luí, wut garu bum akô.

<sup>12</sup> Hau htâng, Poluq gi, dang myô taí sù nghut é yanmai, yhang lé Herme ga, Barnaba lé gi, Zeu ga myhíng byi akô.

<sup>13</sup> Haú wà yàm mâ é Zeu hparà noqkuq yhûm hkyangjong hpó gi, wà hkum má nohtó pé eq ban hkóng pé yu lé mô, shiwa byu pé eq rahá yhangnhik lé hkungga nhông byi râ hen akô.

<sup>14</sup> Nghut kôlhang, lagyo nhik Barnaba eq Poluq gi, haú lé wó gyo kôjáng, yhumsing é mebu lâng cheq pyám kôluí, shiwa hpong gung gûng shut din wang ê kômù, garú taí kô é gi,

<sup>15</sup> "Hkaù pé ê, haí mù haú su kut lo akô lhú? Nga-nhik le nungmoq eq rajung za, xângzo byù za nghut lhê, akyû a bo é hkyô shí pé lé tô pyám to mù, mauhkûng eq myigùng, wuîshuq lung-aù eq haú pé má nyi mi-nyì, joq mijoq lé hpan to sù, rû dui nyi é Garai Gasâng chyáng lhing wang lò kó sháng gaq nghû luí sheq, nungmoq lé gabú danglù hko kyô é nghut lhê.

<sup>16</sup> Garai Gasang gi, byù myû chângjup lé hí hpyang lhê é pyat bán má ó le ó kâm é đông kut nhâng bê nghut ri.

<sup>17</sup> Nghut kôlhang, Yhang gi, mauhkûng mai mau wô nhâng luí, kyôshi zuí nhang é ahkyíng yam-yoq byi mù, nungmoq lé zoshuq agùn agó byi é eq, nungmoq lé i-myit ngón nhang nyi é đông, Yhang ge é hkyô lé tûn shit mù, Yhang nyi é hkyô lé saksé hkâm nyi ri." ga akô.

<sup>18</sup> Haú su ga taí kô le lháng, yhangnhik lé shiwa byu pé mai hkungga nhông byi râ hkyô lé, yhangnhik gi, gyai wuihke luí sheq wó hkûm pyám akô nghut ri.

<sup>19</sup> Hau htâng, Antioku wà mó eq Ikoni wà mó pé mâ é Yudaq byu pé ra-am lé jé kômù, shiwa byu pé lé shuî-u luí, Poluq lé luqgok eq chôm dú kômù, yhang lé shi byuq bê su ngàm kô é yanmai, wà shinggan shut shê hkyut htoq pyám akô.

<sup>20</sup> Nghut kôlhang, Poluq gi, yhang é lhîngkyuq má chángzô pé yap tô kô é hkûn, toq mù wà shut tau wang ló ri. Hau htang nyi, yhang gi, Barnaba eq rahá Derbe wà mó shut e ló bekô nghut ri.

### *Antioku Wà Mó Má Taù Jé Ló É Hkyô*

<sup>21</sup> Haú wà má yhangnhik eq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku wà mó hkyô dum taù ló kômù,

<sup>22</sup> chángzô pé lé myit lhoq ging byi uchyang, haú lumjîng hkyô má ru gîng nyi râ matú myit wum byi akô. "Nga-nhúng gi, Garai Gasâng é mingdán má wàng râ matú, wuîhke jamjau myo myo hui ra râ nghut lhê." ga le, mhoqshit akô.

<sup>23</sup> Yhangnhik gi, noqkuq hpúng hkangmó má, hpúng suwún kut râ bang lé hkyin yù mù, zoshuq gám luí kyûdung mù, yhangmoq lumjîng nyi é Yhumsing Garaí chyáng ap byi tô akô.

<sup>24</sup> Hau htâng, yhangnhik gi, Pesidi ginwáng mai laí byit ló mù, Pamhpuli ginwáng má jé ló akô nghut ri.

<sup>25</sup> Haú ginwáng mâ é Perga wà mó má mungdang hko kyo luí, Atali wà mó shut laí gyó ló akô nghut ri.

<sup>26</sup> Haû mai, lhai ji mù, ahkuî yhangnhik wùn waq laí ló bê muzó é matú, Garai Gasâng jeju má ap luí yhangnhik lé nhang kat é Antioku wà mó má dum jé lò bekò nghut ri.

<sup>27</sup> Jé lo é hkûn, yhangnhik gi, hpúng byû wuì lé wut tsîng yù mù, yhangnhik dông mai Garai Gasang kut é hkyô banshoq lé le, tûngbaù pé lé haû lumjîng hkyô hkum hpóng byî é hkyô lé le, shit kyô akô.

<sup>28</sup> Haû mù, yhangnhik gi, haú wâ má chángzô pé eq tsómra myang shoq nyi nyi akô nghut ri.

## 15

### *Ahpyo-kuq Hpyit Hkyô Eq Sêng É Manghkáng*

<sup>1</sup> Ahkuî, Yuda mau mâ é byù ra-am gi, Antioku wà mó má lé jé mù, gumang wuì lé, "Nungmoq gi, Mosheq é htûngtarâ eq rajung za, ahpyo-kuq a hpyit é nghut jáng, hkyi yu é hui râ a nghut." ga luí, mhoqshit bum akô.

<sup>2</sup> Hau é yanmai, myit a huí lhûm é hkyô htoq lô mù, Poluq eq Barnaba nhik gi, haú bang eq gyai yhang myíng myô lhûm akô; haû mù luí, gumang wuì gi, Yerusalem wà mó má nyi é lagyo pé eq suwún wui chyáng, haú hkyô lé ló hpyê lhum râ matú, Poluq, Barnaba nhik eq rahá, yhangmoq chyáng mâ é ra-am lé, nhang kat râ ga hkyin tô akô.

<sup>3</sup> Haû mù, hpúng byû wuì yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô laí ló uchyang, tûngbaù pé lhing wang lò bê hkyô lé taí kyô akô. Haú mâ é gumang wuì lé gyai yhang gabú nhang akô nghut ri.

<sup>4</sup> Yhangmoq, Yerusalem wà mó má jé kô é hkûn, hpúng byû wuì, lagyo pé eq suwún wuì gi, yhangmoq lé lhom hkûlum yù kô é nghut mù luí, yhangmoq gi, yhangmoq dông mai Garai Gasang kut é hkyô lunglhang lé, haú bang lé shit kyô akô.

<sup>5</sup> Haú hkûn, Hparishe hpúng mâ é lumjîng bang ra-am gi, toq mù luí, "Tûngbaù pé lé, ahpyo-kuq hpyit nhâng râ eq, Mosheq é tarâ dông cháng nhâng râ gi, ra yhang râ lhê." ga taí bum akô nghut ri.

### *Yerusalem Wà Mó Má Kut É Byin Tú Wap Hpong*

<sup>6</sup> Ahkuî, lagyo pé eq hpúng suwún wuì gi, shí hkyô lé chôm myit wú râ ga, zup tô bum akô.

<sup>7</sup> Shí hkyô lé gyai yhang dang rhâng lhûm bùm kô é htâng má, Petruq gi, toq mù luí, "Gumang wuì ê, Garai Gasang gi, ngá nhut mai taí é, haû gabú danglù lé, tûngbaù pé gyô yù mù lumjîng kó sháng gaq ga, hí hkûn nungmoq chyáng mai ngo lé hkyin yù bê hkyô lé, nungmoq sé lugu nghut bê.

<sup>8</sup> Haû mù, myit nhiklhum lé sé byi sù Garai Gasang gi, nga-nhúng lé byî é eq rajung za, yhangmoq lé le Choyiyúng Woinyí byî é dông, yhangmoq lé hap yù bê hkyô lé saksé tûn shit bê nghut ri.

<sup>9</sup> Garai Gasang gi, yhangmoq lumjîng luí, yhangmoq é myit nhiklhum lé lhoq san lhoq yúng byi bê nghut é yanmai, nga-nhúng eq yhangmoq é gyoro má gamhkuí é hkyô a joq nhâng lo nghut ri.

<sup>10</sup> Haû nghut le gi, íchýí îwâ pê èq le, nganhûng èq le a ung é wòlai lé, haû chángzô pê é lingzing má ke byî é dông mai, haí mù, ahkuí Garai Gasang lé chyam wú nyi akô lhú?

<sup>11</sup> Nghut kôlhang, ngamoq gi, yhangmoq eq rajung za, Yhumsîng Yesuq é jeju mai za hkyi yu é huí é hkyô lé lumjîng é bang nghut lhê." ga luí, yhangmoq lé taí ri.

<sup>12</sup> Haú hkûn, zup míng tô é bang lunglhang gi, zim za kut luí, Barnaba eq Poluq nhik mai, tûngbaù pê chyáng, Garai Gasâng èq yhangnhik é loq dông limik kumlhá pé eq mauhpo muzó pé kut shit é hkyô, taí kyô nyi é lé chôm gyô nyi akô.

<sup>13</sup> Yhangnhik dang ban taí kôjáng, Yakuq gi, "Gumang wuì ê, ngá dang lé gyô wú keq.

<sup>14</sup> Garai Gasang gi, tûngbaù pê chyáng mai Yhâng mying é matú byù ra-myú hkyin yù râ ga, yhangmoq lé sâng-hi mai hkâsu kut lé kûm nyi é hkyô lé, Simun taí kyo bê nghut ri.

<sup>15-16</sup> Shí hkyô gi,

'Hau é htâng má gi, ngò dum taú lò mù luí, lêng gyop byuq bê Dawiq é yhûm\* lé dum saí râ nghut lhê.

\* 15:15-16 Dawiq é yhûm gâ é gi, Dawiq eq yhang é awut ashîn pé up é hkyô lé gâ é nghut lhê.

Haû byoq htên tô é pé lé saî saî mù, haû lé dum lhoq toq râ nghut lhê.

17 Haû hkûn sheq, ngá myîng mai ji yu é tûngbaù pé eq, myit gyo tô é byù lhunglhâng bang gi, Yhumsîng Garai lé hô kó râ nghut lhê ga,

18 a-nham mau htoq xâng hkun mai, shí hkyô pé lé sé nhang é Yhumsîng Garai taí ri.\*

ga myiqhtoí pé kâ tô é dang eq rajung za nghut ri.

19 Haû mù luí, ngò taí nau é gi, tûngbaù pé chyáng mai Garai Gasâng shut lhing lo é bang lé, gotû haí le a lhoq wuí é za,

20 hparà lhô pé lé kyáng byí é a sansêng é zoshuq pé lé le, ashop é đông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám râ matú za, yhangmoq lé, nga-nhúng laiká mai wó shit kat lhê.

21 Hkâsu mù gâ le, gó hkûn mai yhang, Mosheq é tarâ lé wà hkgangmó má hko kyô ló kômù, Bánno buinyi hkgangmó tarajong pé má nghap kyo kyo kut bùm kô é nghut lhê." ga taí ri.

### *Lumjîng É Tûngbaù Pé Chyáng Hun Kat É Laiká*

22 Haû hkûn, lagyô pé, suwún wuí eq, hpúng byû wuí lhunglhâng bang gi, Poluq, Barnaba nhik eq rahá Antioku wà mó shut nhang kat râ byù lé, yhangmoq chyáng mai hkyin yù râ matú chôm myit hpyit akô. Haû eq rajung za, yhangmoq gi, gumang wui chyáng mâ é nhik bô suwún nhik Barsabaq gâ é Yudaq eq Sila lé hkyin yu akô nghut ri.

23 Yhangnhik é loq má, hun kat kô é laiká gi,

"Antioku wà mó, Suriq mau eq Kiliki mau pé má nyi é, tûngbaù gumang wuí ê, nungmoq é gumang wuí nghut é, ngamoq lagyô pé eq suwún wuí gi, ngu-ingón dang shit kyô kat lhê.

24 Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dang èq lhoq byok pyám luí, nungmoq é myit lé lhoq nhúng byí nyi é hkyô lé, ngamoq wó gyô bê.

25 Haû mù, ngamoq lhunglhâng bang gi, byù ra-am lé hkyin yù mù,

26 nga-nhúng é Yhumsîng Yesuq Hkris-duq é matú, yhumsing asak lé lháng a hâ é nga-nhúng chyitdap é Barnaba, Poluq nhik eq rahá, nungmoq chyáng nhang kat râ matú chôm myit hui bê.

27 Haû mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang taí kyo kó râ nghut lhê.

28 Nungmoq é matú gi, hparà lhó pé lé tîng byí é zoshuq eq sui, lingzing mai myhik sat é dusak sho eq ashop é đông gungsho zùm yap é hkyô pé lé, koi pyám râ hkyô mai lai luí, gotû wòwùn hùn râ hkyô a joq nghu luí, Chyoiyúng Woi-nyí le, ngamoq le, myit huí to bê.

29 Nungmoq haú pé lé koi pyâm nyi kôjáng gi, gè râ nghut lhê.

Nguingón wángzán nyí kó sháng gaq ô!" ga kâ tô ri.

30 Yhangmoq lé nhang kat kôjáng, yhangmoq gi, Antioku wà mó má gyó jé lô kômù, hpúng byû wuí lé ji tsîng to kôluí, haû hùn kat é laiká lé ap byí akô nghut ri.

31 Hpúng byû wuí gi, laiká haû lé ban nghap kôjáng, wum-o byí é danglù hau é yanmai, gabú nyi bum akô.

32 Yudaq eq Sila gi, myiqhtoí nhik le nghut kômù luí, gumang wuí lé mungdang myo myô èq lhoq pun lhoq kyîng kômù, wum-o lhoq gîng to byí akô.

33 Rayoq zo haú má nyi nyi kô é htâng má, gumang wuí gi, yhangmoq lé nhang kat é bâng chyáng, ngui ngui ngón ngón dum tau ló nhâng bekô nghut ri.

34 (Sila kúm gi, yhang ô nau é đông nyi gyó tô ri.)†

35 Poluq eq Barnaba kúm gi, Antioku wà mó má nyi gyó to kômù, Yhumsîng Yesuq é mungdang lé, góbang myo myo eq, mhoq kyo hko kyô akô nghut ri.

### *Poluq Eq Barnaba Nhik Gâng Lhum É Hkyô*

36 Hau htâng, buinyi tsómra myáng jáng, Poluq gi, Barnaba lé, "Yhumsing é mungdang hko kyô lai lo wú bê, wà hkyap

\* 15:18 Amo 9:11-12 † 15:34 Bun zo shí lhum gi, Grik Chyúmlaiká myo má a bò nghut lhê.

hkanmó mâ é gumang wui chyáng taû lò luí, yhangmoq hkâsu dut nyi é hkyô lé, lô dum kûm wú lo goq." ga taí ri.

<sup>37</sup> Barnaba gi, Markuq gâ é Yohan lé le shuí chûng nau ri.

<sup>38</sup> Nghut kôlhang, Poluq gi, haú yuq lé a kâm shuí chûng nau nghut ri; hkâsu mù gâ le, yhang gi, Pamhpuli mau má yhangnhik lé tô pyâm to mù, yhangnhik eq rahá muzó a kâm xoq zui nau é sù nghut é yanmai nghut ri.

<sup>39</sup> Hau é yanmai, yhangnhik gi, gyai yhang taí shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chûng luí, lhaí ji mù Kupru zinlóng shut e lô byuq bê nghut ri.

<sup>40</sup> Poluq kúm gi, Sila lé hkyin yù mù, gumang wui eq yhang lé Yhumsing Garaí é jeju má ap kat kô é htâng má, yhangnhik gi, htoq e lô byuq bekô.

<sup>41</sup> Haú mù, Poluq gi, Suriq mau eq Kiliki mau mai sô laí lô uchyang, haú mâ é noqkuq hpûng pé lé wum-o lhoq ging byí wún bê nghut ri.

## 16

### *Poluq Eq Sila Njik Chyáng Timohti Châng É Hkyô*

<sup>1</sup> Poluq gi, Derbe wà mó má jé é htâng, Lustra wà mó má dum jé ri. Haú wà má, Timohti gâ é chángzo rayuq nyi ri. Yhâng nu gi, Yesuq lé lumjîng é Yudaq myiwe myhí nghut ri; yhâng wa kúm gi, Grik amyû nghut ri.

<sup>2</sup> Timohti gi, Lustra wà mó eq Ikoni wà mó má nyi é gumang wui eq hkya-ôn é hui sù nghut ri.

<sup>3</sup> Poluq gi, hkyowuì má yhang lé shuí chûng nau mù luí, ahpyo-kuq hpyit byí ri. Hkâsu mù gâ le, yhâng wa gi, Grik nghut é hkyô lé haú mâ é Yudaq byu pé lhunglhang bang sé kômù, haú bang lé myit tê byí é yanmai nghut ri.

<sup>4</sup> Haú mù, yhangmoq gi, rawa htâng rawà mai laí lô uchyang, Yerusalem wà mó mâ é lagyô pé eq hpúng suwún wuì, chôm myit hpyit tô é hkyô lé, cháng kó sháng gaq ga, yhangmoq lé taí kyô akô.

<sup>5</sup> Haú mù luí, hpúng byû wuì gi, lumjîng hkyô má wum-o bo lò kômù, ra-nyí eq ra-nyí byù du myô jat lo nyi ri.

### *Makedoni Byù Rayuq Lé, Poluq Shing-rán Myang É Hkyô*

<sup>6</sup> Ahkuí, yhangmoq gi, Asia mau má mungdang é hko kyo râ hkyô lé Chyoiyúng Woi-nyí eq yhangmoq lé hkûm pyâm é yanmai, Hprugi mau eq Galatiq mau đông sô laí lô mù,

<sup>7</sup> Musi mau kyo má jé lô kôjáng, Bihtuni mau shut wang lô râ dâ akô; nghut kôlhang, Yesuq é Woi-nyí gi, yhangmoq lé ahkáng a byi nghut ri.

<sup>8</sup> Haú mù, yhangmoq gi, Musi mau mai sô laí lô luí, Troa myuq má gyó jé lô akô.

<sup>9</sup> Haú má, myín lé, Poluq gi, Makedoni byù rayuq lé yap to mù, "Makedoni mau shut dap lé luí, ngamoq lé le garúm yû laq." ga luí, yhang lé dung wut nyi é shing-rán myang ri.

<sup>10</sup> Shing-rán haú lé Poluq myang é eq, Makedoni byu pé lé gabú danglù hko kyo râ matú, ngamoq lé Garaí Gasang wut yù bê nghut ri nghũ myit yù luí, haú hkûn yhang, ngamoq gi, Makedoni mau shut dap é râ matú rì rì kut lô bê nghut lhê.

### *Ludia Gâ É Myiwe Myhí Hpúng Byû Dut Lo É Hkyô*

<sup>11</sup> Haú mù luí, ngamoq gi, Troa myuq mai Samohtake zinlóng ang ang shut lhaí ji é mù luí, htang nyí gi, Neapoli wà má jé bê nghut lhê.

<sup>12</sup> Haú mai lai jáng, Makedoni mau má, Romaq byu pé xuq tô é, haú ginwáng mâ é ahkyak wà mó nghut é, Hpilipi myuq má ngamoq jé mù, haú má rayoq zo nyi nyi é nghut lhê.

<sup>13</sup> Bánno buinyì jé jáng, ngamoq gi, kyûdung jowò joq nhô ngam mù, wà hkum shinggan mâ é, wuilàng yâm shut htoq ê luí, haú má zîng to lánng é myiwe wuì lé, zung gyó mù nyo hi é nghut lhê.

<sup>14</sup> Haú dang gyo nyi é bang má, Garaí Gasang lé noqkuq é, Htuatira myuq byû, pán nê ung zo sù Ludia gâ é myiwe myhí rayuq bo ri; Yhumsing Garaí gi, Poluq taí kyô é hkyô lé rago gyô yù sháng gaq ga, yhang lé myit hkum hpóng byí ri.

15 Yhang gi, yhang eq yhang yhumbyù wui wui-myhup ban hkâm yù kôjáng, "Nungmoq gi, ngo lé haù Yhumsing Yesuq má lumjínng bê sù nghut é dông, myit yù byi kô é nghut jáng, ngá yhùm má lé bíng keq." ga luí, ngamoq lé zuq zuq ji yu ri.

### *Poluq Eq Sila Nhik Htóng Lúng É Hkyô*

16 Ra-nyí lé, ngamoq gi, haù kyûdùng é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haù yuq gi, gumhpân hpan é dông yhang yhumsing wui lé ngunzè gyai yhang hô byí é sù nghut lhê.

17 Myiwe haù gi, Poluq eq ngamoq htâng má châng to mù, "Shí bang gi, nungmoq lé hkyi yù hkyô taí kyô wún é, Myhang Htâng é Garai Gasang é dui-nhâng zoshâng wui nghut bum akô ô!" ga wut garú ri.

18 Buinyí myo myo haù su chyat châng garú wún é yanmai, Poluq gi, gyai yhang myit hpêbu byuq mù, lhing wú kat luí, nat haù lé, "Yesuq Hkrisduq é myìng lang luí ngò nang lé hkunmó hkyô kat lhê, yhang chyáng mai htoq ló byuq aq." ga luí, nat haù lé, nhik-yô kat ri. Haù hkûn jáng, nat haù gi, yhang chyáng mai htoq ló byuq bê nghut ri.

19 Ahkuí, myiwe hau é yhumsing wui gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gai mâ é suwún wui chyáng she hkyut e akô.

20 Dum, yhangmoq gi, yhangnhik lé tarâ agyì pé chyáng shuí é mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé mhòqshit byí nyi é dông,

21 nga-nhùng é myuq lé gunjâng nyi akô nghut ri." ga taí akô.

22 Haù mù luí, shiwa byu pé gi, yhangnhik lé chôm htím akô. Tarâ agyì pé gi, yhangnhik é mebu lé lãng hkyut pyám luí, wumchùm hkat èq bat râ matú, hkunmó hkyô kat akô.

23 Yhangmoq gi, yhangnhik lé gyai yhang nhuq bat yu é htâng, htong má lhùng kat mù, rago za wú zúng râ matú htóng suwún lé hkunmó hkyô tô akô.

24 Htóng suwún hpó gi, haù sù é hkunmó lé wó jáng, yhangnhik lé hkyi kyum hut luí, htóng mâ é, je ahtè gok má lhùng tô ri.

### *Htóng Suwún Hpó Hkyi Yù Huí É Hkyô*

25 Nghut kôlhang, gunggàm yoq lé, Poluq eq Sila nhik gi, kyûdung luí, Garai Gasang lé mahkôn hkya-ôn nyi kô é hkûn, htóng byù góbang gi, yhangnhik é htê lé chôm gyô nyi bum akô.

26 Haù hkûn, byodàn ratung layàng mó nún lô mù htóng yhùm gón le nún lô luí, hkum pé banshoq le radá dâm bóng hâ lo bum ri; dum nghut jáng, yuq hkanmó mâ é toqjâng tui pé le gyut gyó byuq bê nghut ri.

27 Htóng suwún hpó gi, yhup bûn lò mù, htóng hkum pé bóng hâ tô bum é lé myang kat jáng, htóng byu pé ban hpan byuq bùm bekô râ nghut lhê ga myit yù luí, shâm shê mù, yhanggùng yhang sat shí râ dâ ri.

28 Nghut kôlhang, Poluq gi, "Ê, náng gùng yhang nàng haù su hkâkut, ngamoq banshoq shí má nyi tô lhê." ga luí, htê mó èq wut garu taí kat ri.

29 Haù hkûn, yhang gi, duq é myibung lé dúng yù mù, ahkaù shut din wang ló luí, Poluq eq Sila nhik é hí má gyuq nán é eq ngóm gop tô ri.

30 Hau htâng, yhang gi, yhangnhik lé shuí htoq yù luí, "Sarâ nhik ê, ngò hkyi yu é hui râ matú, haí kut ra râ lhú?" ga myi kat ri.

31 Haù hkûn, yhangnhik gi, "Yhumsing Yesuq lé lumjínng jáng, nàng eq náng yhumbyù lhunglhâng bang hkyi yu é hui râ nghut lhê." ga taí akô.

32 Hau htâng, yhangnhik gi, haù htóng suwún hpó eq yhang yhumbyù lhunglhâng lé, Yhumsing é mungdang hko kyô akô.

33 Haù myín haù u lé yhang, htóng suwún hpó gi, yhangnhik lé shuí é mù, yhangnhik é dâm pé lé tsing chí pyám byi luí, haù htâng, yhang eq yhang yhumbyù banshoq bang wui-myhup hkâm yù bekô nghut ri.

34 Hau htâng, yhang gi, yhangnhik lé, yhang é yhúmkaù má shuí wang ló mù, zoshuq hkan byi ri. Yhang eq yhang yhumbyù banshoq bang gi, Garai Gasang lé wó lumjínng bekô nghut é yanmai, gyai gabú nyi bum akô nghut ri.

### *Haq Nhang Pyám Râ Lé A Đông É Hkyô*

<sup>35</sup> Ahkuí, maubó jáng, tarâ agyì wuì gi, "Haú nhik lé nhang pyám aq." ga, htóng suwún hpô chyáng pyata pé lé taí nhang kat akô.

<sup>36</sup> Haú hkûn, htóng suwún hpó gi, "Nungnhik lé nhang pyám aq ga, tarâ agyì wuì mai byù nhang kat ri; haù mù, ahkuí, nungnhik gi, ngón za htoq ló lo keq." ga luí, Poluq lé taí ri.

<sup>37</sup> Poluq kúm gi, "Nga-nhik gi, Romaq mingdán byù sheq ru nghut le wa, myí gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôluí nhing, ahkuí tsik za haq nhang pyám râ dâ akô nhung lhi? A wó dut, yhangmoq yhang sheq lé shuí htoq yú kó sháng gaq." ga luí, yhangmoq lé tû taí kat ri.

<sup>38</sup> Pyata pé gi, tarâ agyì wuì lé dang haú pé ló taí kyo kôjáng, tarâ agyì wuì gi, Poluq eq Sila nhik Romaq mingdán byù nghut é hkyô lé wó gyo kôjáng, gyô gyuq kôluí,

<sup>39</sup> yhangmoq yhang, yhangnhik chyáng lé mù, tóngbán luí, shuí htoq yú mù, wà haù mai htoq ló byuq râ matú chôm dúng akô.

<sup>40</sup> Haù mù, Poluq eq Sila nhik gi, htóng mai htoq ló é htâng, Ludia é yhùm má wang ló akô; haù má, gumang wuì eq le hui kômù, yhangmoq lé wum-o byi luí, htoq ló bekô nghut ri.

## 17

### *Htesaloni Wà Mó Má Mungdang Hko Kyô É Hkyô*

<sup>1</sup> Hau htâng, yhangmoq gi, Amhpipoli wà mó eq Apolon wà mó mai sô laí ló mù, Htesaloni wà mó má jé akô. Haù wà má gi, Yudaq byu pé é tarajong ralhum joq ri.

<sup>2</sup> Poluq gi, yhang lhaq kut nyi é eq rajung za, tarajong má wang luí, Bánno buinyi sum nyí yhang, Chyúmdang má bo é eq séng mù, yhangmoq eq chôm ming lhum uchyang,

<sup>3</sup> Hkrisduq wuîhke jamjau hui mù, shí bê mai dum dui toq lô râ hkyô lé taí hkoq san kyo luí, "Nungmoq lé, ngò hko kyô nyi é haù Yesuq gi, Hkrisduq nghut lhê." ga taí ri.

<sup>4</sup> Yudaq byu pé má é ra-am gi, gyô jing kômù, Poluq eq Sila nhik chyáng lé xoq yu akô; haù eq rajung za, Garai Gasang lé hkunggâ é Grik pé myo myo eq, ahkyak

é myiwe wuì tsómra myo shoq le, gyô jing kômù, lé xoq yu akô.

<sup>5</sup> Nghut kôlhang, a gyô jing é Yudaq byu pé gi, manôn kôluí, gai má é byùgang jùm ra-am lé lung yù mù, byù moq mó tsing yù luí, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhùm má htím e ló akô.

<sup>6</sup> Nghut kôlhang, yhangnhik lé a myàng kôjáng, yhangmoq gi, Yason eq gumang wuì ra-am lé, yhangmoq é wà suwún wuì chyáng lêng she é kômù, "Mingkan gón lé atau ahù kut é byù shí nhik, ahkuí shí má jé jáng, Yason gi, yhâng é yhùm má lhom hkûlum yu ri.

<sup>7</sup> Yhangmoq lhunglhâng bang gi, Yesuq gâ é hkohkâm góyuq nyi lhê ga kôluí, hkoséng Kehtaq é tará lé lhoq shai é đông kut é bang nghut akô." ga taí garû bum akô.

<sup>8</sup> Shiwa byu pé eq wà suwún wuì gi, dang haù lé wó gyo kôjáng, myit wuì myit hke dut nyi bum akô.

<sup>9</sup> Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

### *Beria Wà Mó Bang, Mungdang Lé Lhom Yu É Hkyô*

<sup>10</sup> Haù myîn jáng yhang, gumang wuì gi, Poluq eq Sila nhik lé Beria wà mó shut nhang kat akô; yhangnhik gi, haù wà má jé jáng, Yudaq byu pé é tarajong má wang ló akô nghut ri.

<sup>11</sup> Haù Beria wà mó byu pé gi, Htesaloni wà mó byu pé htoq má je riyhang nhik bo bum akô; haù mù, danglù haù lé gyai ô nau é myit eq hap yù mù, danglù shí teng a têng é hkyô lé wó sé shoq ga, nyí wuì Chyúmdang lé chôm nghap wú nyi akô nghut ri.

<sup>12</sup> Haù mù luí, Yudaq byu pé myo myo gi, lumjing bum akô, haù eq rajung za, aróng wó é Grik myiwe wuì eq yuqgè wuì myo myo le, lumjing bùm bekô nghut ri.

<sup>13</sup> Poluq gi, Beria wà mó má le, Garai Gasang é mungdang hko kyô nyi é hkyô lé, Htesaloni wà mó má é Yudaq byu pé sé kôjáng, yhangmoq gi, haù má lé kômù, wà byù wuì lé mhoq hpyoq luí, gabyông lò nhang akô.

14 Haú hkûn, gumang wuì gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyó tô akô nghut ri.

15 Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló râ matú pying kat é dang lé wun chûng mù, dum taù lò bekô nghut ri.

*Poluq, Ahten Myuq Má Nyi É U Lhê Hkyô*

16 Ahkuí, Poluq gi, Ahten myuq má haú nhik lé láng nyi tô é u lé, haú wâ má rawa é hparà lhô baú dut tô é lé myàng mù luí, yhâng i-myt gyai yhang a ngón dut byuq ri.

17 Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gài pé má hui mihui bang eq le, nyí wuí taí sân kyô lhûm nyi akô nghut ri.

18 Haú mù luí, Epikuri hpaqchyí eq Sto-i hpaqchyí\* lé sê é, myit wú hpaqchyí bo é bang ra-am gi, yhang eq dang chyin chyin lhûm akô; haú hkûn, yhang gi, Yesuq é hkyô eq dum dui toq hkyô é gabú danglù lé hko kyô é yanmai, ra-am gi, "Byù pyok shí yuq gi, haí wá taí nyi lhê lhú?" ga; ra-am gi, "Góming hparà pé é hkyô lé taí kyo sù nghut sam ri." ga, taí bum akô nghut ri.

19 Hau htâng, yhangmoq gi, Aripagu gâ é byìn tú wap shut Poluq lé shuì doq ló mù, "Nang mhoqshit é hkyô asik, ngamoq lé sé nhang le a gè lhú?"

20 Nang eq taí é maú nhô za gâ é hkyô lé ngamoq wó gyô ri; haú é dang kyíng lé ngamoq sé nau ri." ga taí bum akô.

21 (Ahten byu pé eq haú má nyi é góming byu pé lhunglhâng bang gi, dang sik lù sik haú lé taí kún gyô kún mù, yhangmoq é ahkyíng lé lhoq pán nyi bum akô nghut ri.)

*Poluq, Aripagu Zuphpong Má Mung-dang Hko É Hkyô*

22 Haú u lé, Poluq gi, Aripagu zuphpong má toq yap mù, "Ahten byu pé è, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé, ngò myang ri.

23 Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaí matú.', ga luí, kê tô é hkungga gyap ralhum lé myang záng ri; haú nungmoq a sê é za jaú nyi é Garaí hkyô lé, ngò, nungmoq lé hkaí kyo kôlé.

24 Myidàm htoq eq haú má joq mijoq lé hpan tô é Garai Gasang gi, mauhkûng eq myigùng é Yhumsîng le nghut lhê mù luí, byu loq eq saí é noqkuq yhûm má nyi râ a nghut.

25 Yhang gi, byù lhunglhâng bang lé asak, soq, ra mira gumjup shoq byí to sù nghut nyi é yanmai, rajung jung râ é sù lé su, byu loq eq dojaú râ sù a nghut.

26 Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkyíng yam-yoq eq nyi râ jowò masat to byi bê nghut ri.

27 Yhang gi, nga-nhúng yuq hkangmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri.

28 Hkâsu mù gâ le, nungmoq é jihkyang kat bang, 'Nga-nhúng le yhâng é awut ashîn pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyí, wó dui é eq ísu wó dut é nghut lhê.

29 Haú mù, nga-nhúng gi, Garai Gasâng é yhangzô pé nghut nyi é yanmai, Garaí gùng gi, byu é hpaqchyí loq eq kyûng kê tô é hîng, ngùn, luqgok pé eq pûng lhê nghú luí hkâ-myit yù kó.

30 Laí lò bê haú myoq a bóng shi é pyat lé, Garai Gasang gi, haí le a ga lhaí pyâm to kôlhang, ahkuí gi, jowò hkangmó mâ é byù lhunglhâng bang lé, myit lhîng keq ga hkunmó hkyô to bê nghut ri.

31 Hkâsu mù gâ le, Yhang hkyin to sù mai mingkan gón lé tara é dông jéyáng râ buinyi ra-nyí masat to bê nghut ri. Shí hkyô lé, byù lhunglhâng bâng é hí má wó lum é saksé dut sháng gaq ga, Yhang haú yuq lé shi é mai lhoq dui toq yû bê nghut ri." ga taí ri.

32 Shí é mai dum dui toq lo é hkyô lé wó gyô bùm kôjáng, ra-am gi, taí hpoí pyám byí

\* 17:18 Epikuri hpaqchyí gi, htang pyat a joq, ahkuí ngón yù râ za ahkyak gâ é nghut lhê. Sto-i hpaqchyí gi, haí wá dut kôlhang i-myt zim za kut mù, htang pyat matú chiq a ra gâ é nghut lhê.



akô; ra-am kúm gi, "Nàng shí hkyô taí é lé ngangq dum gyô wú nau ashî." ga taí akô.

<sup>33</sup> Hau htâng, Poluq gi, haú zuphpong mai htoq ló byuq bê nghut ri.

<sup>34</sup> Nghut kôlhang, byù ra-am gi, Poluq é htâng cháng kômù, lumjínq bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gâ é myiwe rayuq eq gotû byu pé le, bo bum akô nghut ri.

## 18

### *Poluq, Korinhtuq Myuq Má Nyi É U Lhê Hkyô*

<sup>1</sup> Hau htâng má, Poluq gi, Ahten myuq mai htoq luí, Korinhtuq myuq má jé lo ri.

<sup>2</sup> Haú má, yhang gi, Romaq myuq mai Yudaq byù lhunghâng bang htoq ló byuq râ dut lhê ga, hkohkâm Klodi èq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gâ é Yudaq byù rayuq lé hui luí, yhangnhik chyáng è ri.

<sup>3</sup> Yhangmoq gi, jonghpang saí zo bang chyat nghut kô é yanmai, muzó pûng kôluí, Poluq gi, yhangnhik eq rahá nyi nyi mù, muzó chôm saí akô.

<sup>4</sup> Bánno buinyi hkangmó, Poluq gi, tarajong má Yudaq byù eq, Grik pé lé, taí sân kyo luí, lhoq pun lhoq kyîng yu ri.

<sup>5</sup> Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luí, haú Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri.

<sup>6</sup> Nghut kôlhang, Yudaq byu pé gi, lhom he-ngik pyám kômù, yhang lé rhoí dang taí pyám akô; haú mù, Poluq gi, yhâng mebu ko shit é dông yhangmoq lé a nau é hkyô tân shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tûngbau pé chyáng e ló berâ nghut lhê." ga luí, yhangmoq lé taí ri.

<sup>7</sup> Hau htâng, yhang gi, tarajong mai htoq luí, jong haú eq yhep nghut é, Garai Gasang lé noqkuq é Titu Yustu ga su é yhûm má wang ló ri.

<sup>8</sup> Krispu gâ é tarajong má up sù gi, yhâng yhumbyù lhunghâng bang eq rahá, Yhum-sing lé lumjínq akô. Korinhtuq myuq byu pé myo myo le, Poluq é dang lé gyô yù mù, lumjínq luí, wui-myhup hkâm yu bum akô nghut ri.

<sup>9</sup> Ra-myìn lé, shing-rán ralhum má Yhumsing mai Poluq lé taí é gi, "Hkâgyuq, taí aq, zim za hkâ-nyí.

<sup>10</sup> Ngò nàng eq rahá nghut nyi lhê, nàng lé ó yuq èq le haí wó kut râ a nghut, hkâsu mù gâ le, myuq shí má, ngá é byù myo myo nyi bum lhê." gâ ri.

<sup>11</sup> Haú mù luí, Poluq gi, Garai Gasang é mungdang mhoqshit uchyang, razàn eq lhamó hkyuq hkyap yhang, haú myuq má nyi nyi ri.

<sup>12</sup> Galio ga sù, Ahkaia mau má é ginwáng zau kut nyi é u lé, Yudaq byu pé gi, myít rahkat zâ èq Poluq lé chôm chyup yù kôluí, tarâ hpyit wap má she háng kômù,

<sup>13</sup> "Byù shí yuq gi, jep é tarâ eq shai lhûm é dông, Garai Gasang lé noqkuq râ matú, byu pé lé mhoq hpyoq wún ri." ga mara hún akô.

<sup>14</sup> Haú hkûn, Poluq tû taí râ dâ lò jáng, Galio gi, Yudaq byu pé lé, "Yudaq byu pé è, muzó shí gi, tarâ lu lai é muzó, haú a nghut jáng, agè ashop é muzó mai, dut lo é nghut le gi, nungmoq lé ngò gyo byi râ hkyô joq lhê.

<sup>15</sup> Nghut kôlhang, muzó shí gi, nungmoq é tarâ eq séng luí, dang eq séng luí, myîng eq séng luí, taí lhum kô é hkyô nghut é yanmai, nungmoq yhang ru ló hpyit lhum keq. Haú sù é muzó má, ngò gi, tarâ agyì kut byi râ a nghut." ga taí mù,

<sup>16</sup> tarâ hpyit wap mai yhangmoq lé hkat htoq pyám nhang ri.

<sup>17</sup> Haú hkûn, yhangmoq lhunghâng bang gi, tarajong má up sù Sositeni lé chyup yù mù, tarâ hpyit wap hí má chôm bat akô. Galio kúm gi, haú hkyô lé hai gùn a kut byi nghut ri.

### *Poluq, Antioku Wà Mó Má Dum Taú Jé É hkyô*

<sup>18</sup> Poluq gi, Korinhtuq myuq má buinyi tsómra myáng shoq lumjínq bang eq nyi nyi ri. Hau htâng, yhang gi, haú bang lé shi-kyâm to luí, Priskila eq Akula nhik lé

byinzùm kut mù, lhaî ji luî Suriq mau shut e ló akô. Hau hí má, yhang gi, danggidiq tô tô é yanmai, Kenhkrea wà má xâm nyhâm pyâm ri.\*

<sup>19</sup> Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luî, yhang baú tarajong má wàng mù, Yudaq byu pé lé taí sân kyo byî ri.

<sup>20</sup> Haû mâ é bang gi, yhangmoq eq rahá rayoq zo nyi shi râ đông yhang lé dung kô é nghut kôhang, yhang gi, a nhô lo nghut ri.

<sup>21</sup> Haû mù, yhang gi, Ehpesu myuq mai lhaî ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé râ nghut lhê." ga, yhangmoq lé danggidiq byî tô ri.

<sup>22</sup> Ahkuî, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huî tô é htâng, Antioku wà mó má dum gyó ló ri.

<sup>23</sup> Yhang gi, haû wà má rayoq zo nyi é htâng, htoq ló mù, Galatiq mau eq Hprugi mau mai sô lai ló uchyang, rawa htâng rawa mâ é chángzô pé lé wum-o lhoq ging byî ri.

### *Apolo Zui Saí É Muzó*

<sup>24</sup> Ahkuî, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyî bò sù nghut é htoq agó, Chyúmdang le gyai kûng é sù nghut ri.

<sup>25</sup> Yhang gi, Yohan é baptesma hkyô lé za sé sù nghut kôhang, Yhumsing é hkyô lé mhoq yû bê nghut luî, Yesuq é hkyô pé lé mhoq yu to bê eq rajung za wum zuq tung ga luî, hkyak hkyak mhoqshit byî ri.

<sup>26</sup> Ahkuî, yhang gi, gyuq kyûm myit a bo é za tarajong má taí hi ló ri. Haû hkûn, Priskila eq Akula nhik gi, haû lé wó gyo kôjáng, yhang lé ji yù mù, Garai Gasâng é mungdang hkyô lé azó tung taí sân kyo byî akô nghut ri.

<sup>27</sup> Apolo gi, Ahkaia mau shut dap e ló nau é hkûn, gumang wuî gi, yhang lé wum saí byi mù, yhang lé lhom hkûlum yù râ matú, chángzô pé chyáng laiká ká byî kat

akô; yhang gi, jé jáng, Garai Gasâng jeju mai lumjúng bê bang lé, gyai yhang wó garúm sù dut bê nghut ri.

<sup>28</sup> Hkâsu mù gâ le, yhang mai, Yesuq gi, Hkrisduq yhang nghut nyi ri ga luî Chyúmdang má tân shit uchyang, byu pé hí má Yudaq byu pé lé, wum kat wó taí ung pyâm é yanmai nghut ri.

## 19

### *Poluq, Ehpesu Myuq Má Nyi U Lhê Hkyô*

<sup>1</sup> Ahkuî, Apolo gi, Korinhtuq myuq má nyi tô é hkûn, Poluq gi, mau káng mai sô lai ló mù, Ehpesu myuq má jé ri. Haû má, yhang gi, chángzô pé ra-am eq hui luî,

<sup>2</sup> yhangmoq lé, "Nungmoq gi, lumjúng é hkûn, Chyoiyúng Woi-nyí lé, wó yû bekô lhú?" ga myî ri.

Haû hkûn, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tú taí akô.

<sup>3</sup> Haû mù, Poluq gi, "Haû nghut jáng, nungmoq gi, haí jung baptesma hkam yû kô é lhú?" ga luî, yhangmoq lé myi jáng, yhangmoq gi, "Yohan é baptesma hkam yu é nghut lhê." ga tú taí akô.

<sup>4</sup> Haû hkûn, Poluq gi, "Yohan é baptesma nghu é gi, myit lêng mù wui-myhup hkam yu é hkyô lé gâ lhê. Yohan gi, yhang é htâng má jé lé râ sù, haû Yesuq lé sheq lumjúng râ lhê ga shiwa byu pé lé taí ri." ga taí ri.

<sup>5</sup> Yhangmoq gi, dang haû lé wó gyo kôjáng, Yesuq é myìng lang luî baptesma byi é lé, hkam yu bum akô.

<sup>6</sup> Poluq gi, yhangmoq é htoq má loq ke byi jáng, haû Chyoiyúng Woi-nyí gi, yhangmoq htoq má jé lé mù, yhangmoq gi, laklai dang nyo lo é htoq agó myiqhtoi le htoí lo bum akô.

<sup>7</sup> Haû bang lhunglhang gi, yuqgè raxe í yuq kó nghut ri.

<sup>8</sup> Hau htâng, Poluq gi, tarajong má wàng luî, gyuq kyûm myit a bo é za lhamó sum hkyap Garai Gasâng é mingdán hkyô lé taí sân kyo mù, lhoq pun lhoq kyíng yu ri.

<sup>9</sup> Nghut kôhang, ra-am gi, myit htan lo bùm kôluí a kâm lumjúng kô é htoq agó, haû Yhumsing é Hkyô lé byu pé hí má lhoq

\* **18:18** Xâm nyhâm pyâm é gi, Yudaq htung đông rajung jung kut râ matú danggidiq to luî, haû lé ban kut jáng, yhumsing xâm lé nyhâm pyâm é nghut lhê.

hpoî pyám byi kôjáng, Poluq gi, yhangmoq chyáng mai htoq luí, chángzô pé lé shuí chúng mù, Turanu gá su é hpaqchyí mhoq jong má, nyí wuí taí sân kyô lhúm nyi akô.

<sup>10</sup> Haú su kut í zân yhang mhoqshit nyi é yanmai, Asia mau gón mâ é Yudaq byu pé eq Grik pé lhunglhâng bang gi, Yhumsing é mungdang lé wó gyô yu bum akô nghut ri.

### *Skewa É Yhangzo Nyhit Yuq É Hkyô*

<sup>11</sup> Garai Gasang gi, Poluq é loq đông laklai kumlhá kut ri.

<sup>12</sup> Haú mù, Poluq chyáng mâ é hpajet eq hpyihit rajung jung lé, nò bâng chyáng yu ló mù, ló záng byi jáng lháng, yhangmoq é nõhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

<sup>13</sup> Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é mying mai, ngò, nungmoq lé hkat htoq lhê." ga, agè ashop é nat wang júng to bâng é ahtoq má, Yhumsing Yesuq é mying lé lang luí, hkat chyam wú akô.

<sup>14</sup> Skewa gâ é, Yudaq hkyangjong agyi rayuq é yuqzo nyhit yuq le haú su kut wun akô.

<sup>15</sup> Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhâng, nungmoq gi, ó pé nghut akô?" ga tû taí mù,

<sup>16</sup> agè ashop é nat haú wang júng é byù gi, yhangmoq htoq má byam doq jî to luí, nhuq bat yù mù yhangmoq lé ung pyâm ri. Yhangmoq gi, yhúm haú mai gùngchîn sui nê yang yang hpaq htoq ló bekô nghut ri.

<sup>17</sup> Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhâng bang gi, chôm gyô gyuq bum akô. Yhumsing Yesuq é mying gi, hkya-on lhoq toq é hui bê nghut ri.

<sup>18</sup> Lumjíng bê bang myo myo gi, lé mù, yhumsing kut shut é agè ashop hkyô lé, myo myô hí má yín yu akô.

<sup>19</sup> Myoqheq hpaqchyí kut zô é bang le, yhangmoq é laiká lé yu lé kôluí, shiwa byu pé hí má nyhê hkyô pyâm akô. Mausau haú pé é ahpau lé sôn wú le, ngùn chap ngo mun záng ri.

<sup>20</sup> Haú đông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

### *Ehpesu Myuq Má Gabyông É Hkyô*

<sup>21</sup> Shí pé ban dut lai htâng má, Poluq gi, Makedoni mau eq Ahkaia mau đông sô lai ló mù, Yerusalem wà mó má ló jé rã ga myit hpyit yù luí, "Haú má ló jé tô é htâng má, ngò, Romaq myuq má le, jé wú rã dut ashî." ga taí ri.

<sup>22</sup> Haú mù, yhang lé htuqbang garúm é Timohti eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyô tô ri.

<sup>23</sup> Haú yoq lé, haú Yhumsing é Hkyô yanmai gyai yhang gabyông lo bum akô.

<sup>24</sup> Demetri gâ é ngùn bat zo sù rayuq gi, Artemi hpara é ngùn yhúm zông zo saí luí, mù saí luzúm wuí lé wó sùt nhang nyi ri.

<sup>25</sup> Yhang gi, yhâng é ngùn bat zo luzúm wuí eq haú jung amû kut é góbang lé le jì tsing to mù, taí é gi, "Luzúm wuí ê, muzó shí lhúm é yanmai, nga-nhúng nyi ngón yuqyo nyi é hkyô lé, nungmoq sê lhê.

<sup>26</sup> Nghut kôle, ahkuí gi, Ehpesu myuq má za le a nghut lo, Asia mau lháng aluq jàm shoq, byu loq èq saí é zè lé, garaí pé a nghut ga, shí Poluq ga sù mai byù myo myo lé mhoq hpyoq yù mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô.

<sup>27</sup> Haú mù luí, nga-nhúng é muzó shí gi, hpoî byuq rã lé chiq rã é za a nghut, hpara myhí mó Artemi é noqkuq yhúm gi, haí a dut byuq luí, Asia mau gón eq mingkan gón mai noq é hpara myhí é shingkang hpoî byuq rã lé le myit chiq rã dut bê." gâ ri.

<sup>28</sup> Yhangmoq gi, dang haú lé wó gyô bùm kôjáng, nhik mó gyô yo kôluí, "Ehpesu myuq byu pé é Artemi gi, kô nyi sháng gaq ô!" ga chôm garû bum akô.

<sup>29</sup> Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poí wàng mó shut radá dâm chyîn chyap wang ló bum akô.

<sup>30</sup> Poluq gi, moq hpúng hau hí má htoq shit naú kôlhâng, chángzô pé gi, yhang lé a wàng nhâng kó nghut ri.

<sup>31</sup> Poluq é luzúm wuî nghut é, haú mau má é suwún wuî ra-am lhang, yhang lé poi wàng hkaú má a ê râ matú, hkúm pyám nhang akô nghut ri.

<sup>32</sup> Zing tô é bang gi, hai hû háng le a sé lo dut byuq kômù luí, ra-am rajung ga garú bum akô. Myo mi-myo gi, hai mù luí yhangmoq haú má nyi tô é lé lhang a sê bùm kó nghut ri.

<sup>33</sup> Yudaq byu pé gi, Alesander lé hí má chôm chyún htoq kat kôluí, shiwa hpong mai ra-am gi, yhang hká dòng taí râ hkyô lé mhoq byi kat akô. Alesander le shiwa hpong lé taí san kyo naú luí, zim byuq râ matú loq tu ri.

<sup>34</sup> Nghut kôlhang, Alesander, Yudaq byu nghut é lé sé kôjáng, yhangmoq lhunglhang bang gi, rahtê za kut kôluí, "Ehpesu myuq byu pé é Artemi gi, kô nyi sháng gaq ô!" ga hkyíng hkum í hkum kô garú bum akô.

<sup>35</sup> Haú, myuq chyare hpó gi, shiwa moq mó lé lhoq zim luí taí é gi, "Ehpesu myuq byu pé é, Ehpesu myuq shí gi, Artemi myhí mó é noqkuq yhúm eq mauhkung mai byit gyó lo é yhang é alhô lé, wú zúng nyi é wà nghut é hkyô lé, mingkan má a sê é ó yuq wa nyi lhê lhu?"

<sup>36</sup> Haú mù luí, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâkut ko.

<sup>37</sup> Shí nhik gi, noqkuq yhúm lé hpoyq zo su nhik le a nghut, nga-nhung é hparà myhí lé lhoq hpoi su nhik le a nghut kô é le nhing, nungmoq shuí lé bekô nghut ri.

<sup>38</sup> Demetri eq yhang é ngùn bat zo luzúm wuî gi, rayuq yuq é ahtoq má mara hún râ hkyô joq kô é nghut jáng, tarâ rûng pé hpông tô lhê. Tarâ agyì pé nyi lhê. Haú má yhangmoq ê kó sháng gaq.

<sup>39</sup> Nungmoq taí nau é gó hkyô rajung jung joq é nghut le kúm gi, tarâ wang zuph-pong mó má chôm taí pyám râ nghut lhê.

<sup>40</sup> Hkû-nyí gabyông é mù shí má, mù htoq wang a bo é yanmai, nga-nhung lé mara hún râ chiq râ ri. Shí su kut chôm ming é hkyô lé, hai é yanmai nghut lhê nghû, nga-nhung a wó taí kyo nghut ri." gâ ri.

<sup>41</sup> Shí pé ban taí é htàng má, yhang gi, shiwa moq mó lé lhoq pyo kat bê nghut ri.

## 20

### *Makedoni Mau Éq Grik Mau Đông Lai Ló É U Lhê Hkyô*

<sup>1</sup> Haú gabyông é hkyô zím byuq é htàng má, Poluq gi, chángzô pé lé ji yù luí, yhangmoq lé wum byi dang taí to mù, shi-kyâm to luí, Makedoni mau shut htoq e ló bê nghut ri.

<sup>2</sup> Yhang gi, haú mau mai sô lai ló uchyang, byu pé lé wum byi é dang myo myo taí luí, Grik mau má ló jé bê.

<sup>3</sup> Yhang haú má lhamó sum hkyap nyi yù mù, lhai ji luí Suriq mau shut ê râ hen nyi é hkún, Yudaq byu pé gi, yhang lé gyám nyí kô é yanmai, yhang gi, Makedoni mau dòng tau lò râ lé myit hpyit bê nghut ri.

<sup>4</sup> Yhang eq rabyìn za châng é bang gi, Beria wà mó má é Purú yhangzo Sopata, Htesaloni wà mó má é Aristakuq eq Sekundu nhik, Derbe wà mó má é Ge-u, Timohti, Asia mau má é Tuhkiku eq Trohpimu nhik pé nghut akô.

<sup>5</sup> Yhangmoq gi, hí so lánq luí, ngá-nhik lé Troa myuq má ló lánq nyi akô.

<sup>6</sup> Nghut kôlhang, ngá-nhik gi, Azuma Poî\* lai é htàng má, Hpilipi wà mó mai lhai ji ló le, ngo nyí nghû jáng, Troa myuq má yhangmoq lé hui luí, haú má nyhit nyí chôm nyi é nghut lhê.

### *Troa Wà Má, Utuhku Ga Sû Lhoq Tui Toq Huí É Hkyô*

<sup>7</sup> Rabat é sâng-hi nyí lé, ngamoq gi, muk hpê gàm râ matú lé chôm zup zing tô é hkún, Poluq gi, htàng nyí ló byuq râ ga hen tô é yanmai, chángzô pé lé gunggàm jé shoq hko kyô nyi ri.

<sup>8</sup> Ngamoq zup zing nyi é haú ahtoq pyâm wap má, myibung myo myo le duq tô ri.

<sup>9</sup> Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luí, yhúm sum tsáng mai byit gyó mù, yhang lé bún toq wú le shí byuq bê nghut ri.

<sup>10</sup> Haú hkún, Poluq gi, gyó ló mù, po ngop to luí, "Hkâdân ko, yhang soq bo ashî." ga taí ri.

\* 20:6 Munchi a bo é Muk zo Poî lé, Azuma Poî le gâ lhê.

11 Haû mù, yhang gi, dum tau doq ló luí, muk lé hpé mù, zo luí, maubó shoq yhangmoq eq dang nyo kún mù htoq ló bê nghut ri.

12 Zorâm zo haû lé duì gù shuî ló kômù, nhik tîng é gyai yhang hui bekô nghut ri.

*Troa Wà Eq Melitu Wà Gyoro Mâ É Hky-owui*

13 Poluq gi, myì hkyô ló râ matú hen tô é yanmai, yhang lajang byí é eq rajung za, yhang lé Asu wà má lhai lhom shuî ji râ matú, ngamoq gi, lhai ji mù hí ló láng bê nghut lhê.

14 Haû mù, yhang gi, Asu wà má ngamoq eq hui luí, ngamoq gi, yhang lé lhai má shuî ji chûng mù, Mitulene myuq shut e ló bê.

15 Htang nyi, ngamoq gi, haû mai lhai ji mù, Kiu zinlóng yâm mai lai ló luí, hau htang nyí gi, Samu zinlóng má lai dap ló luí, htang nyí gi, Melitu wà mó má jé ló bê nghut lhê.

16 Poluq gi, wó dut é nghut jáng, Pentekoti buinyi lé Yerusalem wà mó má wó jé shoq gâ é yanmai, Asia mau má buinyi a kâm lhoq htum naù mù luí, Ehpesu myuq lé lhai pyâm to râ matú, myit hpyit to bê nghut ri.

*Ehpesu Hpúng Suwún Wuí Lé, Poluq Shikyâm Tô É Dang*

17 Poluq gi, Melitu wà mó mai Ehpesu shut byù nhang kat luí, hpúng suwún wuí lé é jì nhang ri.

18 Haú bang jé lé kôjáng, yhang yhangmoq lé taí é gi, "Ngò, Asia mau má sâng-hi jé é buinyi mai, nungmoq eq hkâsu kut nyi nyi é ahkyíng banshoq lé le;

19 Yudaq byu pé jeq hô luí, ngò wuîhke jamjau hui zo kôlhang, haû Yhumsing é muzó lé, ngò myit gyai lhoq nyhûm é eq ngaubyi ngau nhap é eq wùn waq é hkyô lé le;

20 nungmoq é matú akyû bo é hkyô banshoq lé, a myhit to loshoq taí é hkyô lé le; shiwa byu pé hí eq rayhûm htang rayhûm má ngò nungmoq lé mhogshit é hkyô lé le;

21 ngò gi, Yudaq byu pé eq Grik pé lé, myit lêng mù Garai Gasâng chyáng lhing lò ra eq, nga-nhûng é Yhumsing Yesuq lé lumjîng

ra hkyô lé, saksé hkâm kyo lugù nghut bê lé le, nungmoq sê nyi akô.

22 Ahkuí, ngò gi, Woi-nyí má tuí tô é hui bê yanmai, Yerusalem wà mó má e ló lhê; haú má, ngò hai ló dut râ lé kúm gi, a sé nghut ri.

23 Ngò gi, htóng eq wuîhke jamjau hkyô ngo lé láng tô ri ga, wà hkanmó má Chyoiyúng Woi-nyí eq lhoq pùn é hkyô lé za sê nyi lhê.

24 Nghut kôlhang, ngò gi, òn râ hkyô ban òn râ eq, Garai Gasâng jeju eq sêng é gabú danglù lé saksé hkâm râ matú, Yhumsing Yesuq ngo lé byi tô é muzó lé ban wùn waq râ za nghut jáng, ngá asak lé ratsuí le a myit ha lô é nghut lhê.

25 Garai Gasâng é mingdán hkyô lé hko kyô wún é hkùn, ngò eq hui é nungmoq lhunglhang bang gi, htang nùng má ngo lé a myàng lo kó râ nghut é lé, ahkuí ngò sê to bê.

26 Haû mù luí, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má a dap lô é hkyô lé, hkû-nyí, ngò saksé hkâm tô lhê.

27 Hkâsu mù gâ le, Garai Gasang ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê.

28 Nungmoq gi, yhumsing gùng lé le, nungmoq lé Chyoiyúng Woi-nyí eq up zúng nhang é sau hpúng<sup>†</sup> lhunglhang lé le, zúng nyí keq. Garai Gasang Yhâng suí eq wui tô é noqkuq hpúng lé le, rém zúng nyí keq.

29 Ngò ló byuq é htang má, sau hpúng lé a shogyô é, ashop é wamhkuí gi, nungmoq chyáng jé râ nghut é hkyô lé, ngò sê lhê.

30 Hau htoq agó, chángzô pé lé wó mhog hpyoq yû shoq ga, shut é òng taí é byu pé lhang nungmoq chyáng mai htoq lô râ nghut lhê.

31 Haû mù luí, nungmoq yuq hkanmó lé, ngò sum zân tup ngaubyi ngau-nhap eq nyí myín a hkying loshoq, lhoq pun lhoq kyîng tô é dang pé lé, nungmoq gi, myit bun mù machya nyí keq.

32 Ahkuí, ngò gi, nungmoq lé, Garai Gasâng chyáng le, nungmoq lé wó lhoq ging lhoq tîng mù, lhoq chyoiyúng é hui bê bang

<sup>†</sup> 20:28 Sau hpúng gâ é gi, lumjîng é bang lé gâ lhê.

eq nungmoq lé silí wunlí wó byí é, Yhâng é jeju mungdang má le, ap tô lhê.

<sup>33</sup> Ngò gi, ó yuq é hîng, ngùn, mebu pé lé le a myoqnoq wú.

<sup>34</sup> Ngá é loq shî í loq gi, ngò eq ngá htâng châng é bang ra châ é lé kut byi bê hkyô lé, nungmoq yhang sé gû nghut lhê.

<sup>35</sup> Ngò kut é muzó banshoq gi, nungmoq é alik dut bê nghut luí, shî su kut shikut é dông mai, nga-nhúng gi, wum-o nyhóm bang lé htuq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsîng Yesuq taí é dang lé bûn nyi sháng." gâ ri.

<sup>36</sup> Poluq gi, haú su ga ban taí jáng, hkyihput htuq mù, yhangmoq lhunglhâng bang eq rahá za kyûdûng ri.

<sup>37</sup> Yhangmoq lhunglhâng bang gi, yhang lé po to luí, bopuq puq mù, chôm ngaù akô.

<sup>38</sup> Htâng nùng má, yhang lé dum myàng râ a nghut lo gâ é dang yanmai, yhangmoq gi, je riyhang yón kuq bum akô. Yhang lé, lhaí má jé shoq lé châng dé kat akô nghut ri.

## 21

### *Yerusalem Wà Mó Shut Doq Lô Nyi É U Lhê Hkyô*

<sup>1</sup> Ngamoq gi, yhangmoq lé kang pyâm to luí, lhaí jî chûng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haú mai Patara wà má dum jé bê.

<sup>2</sup> Haú wâ má Hpinisi mau shut dap ló é lhaí lé, ngamoq myàng luí, haú mai chôm jî chûng bê.

<sup>3</sup> Haú hkûn, ngamoq gi, Kupru zinlóng lé myàng jáng, hau é loqyo hkyam dông lai ló luí, Suriq mau shut e ló le, hpugá zê lé hkyô râ matú, Turuq myuq má nô é nghut lhê.

<sup>4</sup> Haú wâ má, chángzô pé lé myang hô luí, yhangmoq chyáng nyhit nyí bíng yu é. Chángzo haú bang gi, Chyoiyúng Woi-nyí eq lhoq pûn é dông Poluq lé Yerusalem wà mó shut a ló râ matú, chôm hkûm akô.

<sup>5</sup> Nghut kôlhang, nyhit nyí haú lai jáng, ngamoq gi, ngamoq é hkyowuì shut dum xoq sô htoq ló bê. Chángzô pé lhunglhâng bang gi, yhangmoq é myi zo wuì eq rahá,

ngamoq lé wà shinggan jé shoq châng dé kôluí, ngamoq gi, yhangmoq eq rahá wuiyàm má hkyihput htuq mù, kyú chôm dung bê nghut lhê.

<sup>6</sup> Hau htâng, rayuq eq rayuq ban shi-kyâm lhum jáng, ngamoq gi, lhaí má wàng bê; yhangmoq gi, yhûm shut dum tau ló byuq bekô nghut ri.

<sup>7</sup> Ngamoq gi, Turuq myuq mai lhaí jî chûng mù, Toleme wà má jé ló bê. Ngamoq gi, haú wâ má é gumang wuì lé shichyên yù mù, yhangmoq eq rahá ra-nyí chôm nyi kûn é nghut lhê.

<sup>8</sup> Htang nyí gi, ngamoq haú wâ mai htoq ló mù, Kesare wà mó má dum jé bê. Haú wâ má, haú htuqluq htuqbang nyhit yuq\* má bò sù, gabú danglù hko taí é Hpilip gâ su é yhûm má, ngamoq wang bíng bê nghut lhê.

<sup>9</sup> Yhang gi, yhang hku tô é byizo zomyi myiqhtoi myi yuq wó ri.

<sup>10</sup> Ngamoq gi, haú yhûm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri.

<sup>11</sup> Yhang gi, ngamoq chyáng jé lé luí, Poluq é hpyihit lé yù mù, yhânggùng yhang loq eq hkyí pé má tui mù luí, taí é gi, "'Shî hpyihit yhumsîng lé, Yerusalem wà mó má é Yudaq byu pé mai shî su kut lhom tui luí, tûngbaù pé é loq má ap pyám kó râ nghut lhê;" ga luí, Chyoiyúng Woi-nyí taí ri." gâ ri.

<sup>12</sup> Dang haú lé wó gyo jáng, haú má é bang eq ngamoq gi, Poluq lé Yerusalem wà mó má a doq ló râ matú, gyai yhang chôm hkúm bê nghut lhê.

<sup>13</sup> Nghut kôlhang, Poluq gi, "Nungmoq gi, haí mù luí ngaubyi ngau-nhap kut é eq, ngo lé myit wum gyui râ dông kut nyi akô lúhú? Ngò gi, Yhumsîng Yesuq é yanmai, Yerusalem wà mó má, tuí é hui râ za a nghut, shî hkâm râ matú le rì rì nghut lhê." ga tû taí pyâm ri.

<sup>14</sup> Yhang lé wó taí hkúm râ su a dut lo jáng, ngamoq gi, "Garai Gasang ô nau é dông nghut sháng gaq." nghu luí, zim za chôm nyi bùm bê.

<sup>15</sup> Hau htâng má, ngamoq gi, zè món chûng mù Yerusalem wà mó shut doq ló bê nghut lhê.

\* 21:8 Lagyo 6:1-6

<sup>16</sup> Kesare wà mó mâ é chángzô pé ra-am le, ngamoq eq rabyìn za nghut kôluí, yhangmoq gi, ngamoq lé Kupru byù Manason ga sù, hí hí lhê é chángzo rayuq é yhùm má shuì ló mù, yhâng chyáng bíng nhang akô.

### *Yerusalem Wà Mó Má, Yakuq Lé Ê Huí É Hkyô*

<sup>17</sup> Yerusalem wà mó má ngamoq jé é hkùn, gumang wuì gi, ngamoq lé gabú tung lhom hkùlum yu akô.

<sup>18</sup> Htang nyí, Poluq eq ngamoq gi, Yakuq lé ê huí le, hpúng suwún wuì le zíng nyi to lánng akô.

<sup>19</sup> Poluq gi, yhangmoq eq ban shichyen jáng, yhang wùn waq laí lo é hpúng mù dông mai, Garai Gasâng eq tûngbaù pé chyáng kut byi bê hkyô pé lé, jihkúm nuqguq shit kyô ri.

<sup>20</sup> Yhangmoq gi, haù lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, "Âmang ê, Yudaq byu pé má lumjínng é bang hkâ-myhó hkyíng mun nghut bê lé, nàng sê lhê. Haù bang lhunglháng gi, jep é tarâ má myit zuq to bê bang chyat nghut bum akô.

<sup>21</sup> Nghut kôlháng, yhangmoq lhunglháng bang gi, tûngbaù pé chyáng nyó lúng tô é Yudaq byù banshoq bang lé, nàng, yhumsing yhangzo yhangshù pé é matú ahpyo-kuq hpyit a ra nghu é eq nga-nhúng é htúng tarâ lé châng nyi a ra nghu luí, Mosheq é tarâ lé tô pyám rá dông mhoqshit ri gâ é dang lé, wó gyô yu bùm bekô nghut ri.

<sup>22</sup> Nàng jé bê hkyô lé, yhangmoq wó gyo berá za nghut lhê. Ahkuí, ngamoq hkâsu kut lo rá lhú?

<sup>23</sup> Haù mù, ngamoq taí é dông kut aq, ngamoq chyáng danggidiq mó byi bê byù myi yuq nyi lhê.

<sup>24</sup> Nàng gi, haù bang lé ji yù mù, yhangmoq eq rahá lhoq san lhoq yúng yù aq, yhangmoq lé u wó wuq yù rá matú, ah-pau le htoq byi aq. Haù hkùn sheq, byù lhunglháng bang gi, yhangmoq wó gyô tô é hkyô a têng byuq é eq, nàng yhang lháng, jep é tarâ lé, châng kut nyi sù nghut é hkyô lé, sé kó rá nghut lhê.

<sup>25</sup> Lumjínng é tûngbaù pé é matú kúm gi, hparà lhô pé lé tîng byi é zoshuq, sui, lingzing mai myhik sat é dusak sho eq

ashop é dông gungsho zùm yap é hkyô pé lé, yhangmoq koi pyám rá matú, ngamoq chòm doqdan luí, kâ hùn kat bê nghut lhê." ga akô.

<sup>26</sup> Haù mù luí, Poluq gi, hau htang nyí haù bang lé ji yù luí, yhangmoq eq rahá, lhoq san lhoq yúng yù mù, noqkuq yhùm má wàng luí, yhangmoq yuq hkangmó é matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, taí kyô ri.

### *Poluq Chyup Yù Huí É Hkyô*

<sup>27</sup> Buinyi nyhit nyí haù ngap rá yàm má, Asia mau mâ é Yudaq byu pé ra-am gi, noqkuq yhùm má Poluq lé myàng kômù, shiwa byu pé lé shuì gabyong luí, yhang lé chyup yù mù, garù taí kô é dang gi,

<sup>28</sup> "Israelaq byu pé ê, garúm yù keq, shí yuq gi, nga-nhúng byuhú lé le, jep é tarâ lé le, jowò shí lé le, shut shai é dông jowò hkangmó mâ é byù banshoq lé mhoqshit sù nghut ri. Hau htoq agó, noqkuq yhùm má Grik pé lé shuì háng é eq, chyoiyúng jowò shí lé achayut kut é sù nghut ri." gâ akô.

<sup>29</sup> (Hkâsu mù gâ le, yhangmoq gi, Ehpesu myuq byù Trohpimu ga sù eq Poluq wà hkaù má rahá nghut kô é lé, myàng kômù, haù yuq lé noqkuq yhùm shut shuì háng nhô ngam pyám kô é yanmai nghut ri.)

<sup>30</sup> Rawà gón gabyông lo mù, shiwa byu pé lhínghkyuq mai din lé lô kôluí, Poluq lé chyup zing to uchyang, noqkuq yhùm shinggan shut she hkyut htoq ló akô. Haù hkùn jáng, hkum pé lé myhí pyâm akô nghut ri.

<sup>31</sup> Poluq lé yhangmoq sat rá dâ nyi kô é hkùn, Yerusalem wà gón gabyông nyi akô gâ é hkyô lé, Romaq dap up zaù é no má, lò jé ri.

<sup>32</sup> Haù mù, yhang gi, radá dâm shô up gyezau ra-am eq gyezô pé lé shuì chùng mù, byù hpúng shut, din yán gyó ló akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyîng byuq akô nghut ri.

<sup>33</sup> Haù hkùn, dap up zau hpó gi, Poluq chyáng ê jé mù, yhang lé chyup yù luí, toqjâng tui í hkat eq tuí to nhang ri; hau

htâng, yhang ó yuq nghut é hkyô lé le, haí kut shut é hkyô lé le myí wú ri.

<sup>34</sup> Shiwa byu pé kúm gi, rayuq rajung ga garú bum akô. Haú mù, gyezau hpó gi, lúm garu kô é yanmai, têng é hkyô lé rago a wó sê yù jáng, Poluq lé gyewap má shuí ló nhang ri.

<sup>35</sup> Poluq gi, zumhtâng wang má jé lo é hkùn, byù moq mó lúm htim chyín chyap lô kô é yanmai, gyezô pé gi, yhang lé waq doq ló akô.

<sup>36</sup> Shiwa byu pé gi, "Yhang lé sat pyám keq." ga châng garú nyi akô nghut ri.

### *Poluq, Yhumsing Gùng Mara A Bo É Lé Tai Sân Kyô É Hkyô*

<sup>37</sup> Gyezô pé gi, Poluq lé gyewap má shuí wàng râ za nghut é hkùn, Poluq gi, dap up zau hpó lé, "Ngò nàng lé dang wó nyô râ lú?" ga myi jáng, dap up zau hpó gi, "Nàng, Grik myíng dat mu lhê lú?"

<sup>38</sup> Nàng gi, hí hkùn gumlau kut mù, byù sat wún bang myi hkyíng lé, yoso shut shuí htoq ló é sù, Egutuq byú a nghut lú?" ga tau myí ri.

<sup>39</sup> Haú hkùn, Poluq gi, "Ngò gi, Kiliki mau Tarshu myuq mâ é Yudaq byú nghut lhê; ngò nyi é wà gi, wà chyap wà zo za a nghut, jeju mai, byù shí bang lé ngò dang tái rá ahkáng byi laq." ga dúng ri.

<sup>40</sup> Gyedap up zau hpó ahkáng byi jáng, Poluq gi, zumhtâng má yap to mù, shiwa byu pé shut loq he ri. Haú hkùn, yhangmoq lhunglhâng bang zim byuq kômù, Poluq, yhangmoq lé Hebre myíng đông tái é gi,

## 22

<sup>1</sup> "Gumang wui eq íwa pé ê, ahkuí, ngò mara a bò nghu tái é dang lé gyô wú shi keq." gâ ri.

<sup>2</sup> Yhangmoq gi, yhang Hebre myíng đông tái é dang lé wó gyô bùm kôjáng, gyai yhang zim byuq bekô. Haú mù, Poluq xoq tái é gi,

<sup>3</sup> "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôlhang, wà mó shí má nyi kô lò sù nghut lhê. Ngò gi, nga-nhúng íchýí íwa pé é jep é tarâ lé, Gamalelaq é loq má jihkúm nuqguq mhoq yú luí, hkù-nyí lhê é nungmoq lhunglhâng bang su, Garai Gasang lé gyai myit zìng zuq é sù nghut lhê.

<sup>4</sup> Ngò gi, shí Hkyô châng bang lé shi é jé shoq, zing-rí wú é sù eq, myiwe yuqgè ó yuq lé nghut kôlhang, chyup yú mù htóng má lhùng pyâm wú bê sù nghut lhê.

<sup>5</sup> Hkyangjong mó eq byìn tú wap suwún wui lhunglhâng bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wui lé byi râ laiká yhangmoq chyáng mai wó yu chùng luí, haú mâ é bang lé le Yerusalem wà mó má dam byi râ matú, chyup tuí ló râ nghu, Damaskuq myuq shut e é nghut lhê.

<sup>6</sup> Nyigùng tú zó lé, ngò Damaskuq myuq shut sô chyâng ló nyi é hkùn, maubó gi, ngá é lìnhkyuq má mauhkùng mai byodàn tung duqbó to bê nghut ri.

<sup>7</sup> Haú mù, ngò myigùng má lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rí nyi lhê lú?' gâ ri.

<sup>8</sup> Ngò le, 'Yhumsing ê, nàng ó nghut lhê lú?' nghu myí kat jáng, 'Ngò gi, nàng zing-rí wún é sù, Nazaret wà byù Yesuq nghut lhê.' ga luí, Yhang tái tái kat ri.

<sup>9</sup> Ngò eq rahá e ló é bang kúm gi, maubó lé myàng kôlhang, ngo lé tái é danghtê lé a sê gyo kó nghut ri.

<sup>10</sup> Dum, ngò gi, 'Yhumsing ê, ngò haí kut ra rá lú?' nghu myi jáng, haú Yhumsing gi, 'Toq mù, Damaskuq myuq má wang ló aq, nàng kut rá matú wò byí tô é hkyô pé lhunglhâng, nang lé haú má lhom tái kyo berâ nghut lhê.' ga ngò lé dum tái ri.

<sup>11</sup> Haú maubó é shingkâng é yanmai, ngò myoqjit byuq mù, ngá é byinzùm wui gi, Damaskuq myuq shut ngo lé loq mai she wang ló akô.

<sup>12</sup> Haú hkùn, Anani gâ é yuqgè rayuq ngá chyáng lé huí ri. Yhang gi, jep é tarâ lé gyuq hkunggâ é eq, haú má nyi é Yudaq byú lhunglhâng bâng é hí má myoqdong gyai wó é sù nghut ri.

<sup>13</sup> Yhang gi, ngá nâm má yap to luí, 'Gumang Sholuq ê, náng myoq myàng aq hkoi!' ga tái ri. Haú hkùn jáng yhang, yhang lé ngò wó myang kat bê nghut lhê.

<sup>14</sup> Yhang dum xoq tái é gi, 'Nga-nhúng íchýí íwa pé é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sù lé wó myàng luí, Yhâng é nhut



mâ é mungdang lé wó gyo sháng gaq ga lui le, hkyin to bê nghut ri.

<sup>15</sup> Haû mù, nàng gi, nàng myang é eq wó gyô yu é hkyô pé lé, byù lhunglhang bâng é hí má, Yhâng é matú saksé hkám byi râ su dut râ nghut lhê.

<sup>16</sup> Ahkuî, nàng haî lé láng nyi ashî lhu? Toq aq, Yhâng é mying lé lang lui wui-myhup hkâm yu é eq, náng é yubak mara pé lé chî sân pyám aq.' gâ ri.

<sup>17</sup> Hau htâng, ngò gi, Yerusalem wà mó má dum taû jé ló mù, noqkuq yhûm má kyû é dúng nyi le, moq byuq ló mù,

<sup>18</sup> 'Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsing ngo lé taî nyi é lé, myoqwup shing-rán dông myang ri.

<sup>19</sup> Haû mù, ngò gi, 'Yhumsing ê, tarajong ralhûm htâng ralhûm má nang lé lumjing bang lé, htóng má chyup lhûng pyâm é eq, hkat bat lhing wún é hkyô lé, yhangmoq sê bum akô.

<sup>20</sup> Náng é saksé Stehpan sat hui lui sui shun u lé, ngò nâm má yhang yap to mù, haû hkyô lé myit bo hui lui, yhang lé sat pyám bâng é mebu lé zúng byi é nghut lhê.' nghu tû taî bê.

<sup>21</sup> Haû hkûn, Yhumsing gi, 'Ê aq, ngò, nang lé, wê gâng é tûngbaù pê chyáng nhang kat râ.' ga, ngò lé taî ri." gâ ri.

### *Poluq, Romaq Mingdán Byû Nghut É Hkyô*

<sup>22</sup> Shiwa byu pé gi, dang haû hkun jé za gyô yù kômù, "Shî sù é byù gi, myigùng htoq má nyi a gíng, sat pyám keq." ga, htê mó èq garû bum akô.

<sup>23</sup> Yhangmoq gi, haû su garu uchang, yhumsing buhîng lé hkyut dú pyâm lhê, hpuilhup lé mauhkûng shut kyaq tâng lhê, kut nyi kôjáng,

<sup>24</sup> dap up zau hpó gi, Poluq lé gyewap má shuî hâng yù nhâng mù, yhang lé shiwa byu pé haî mù shî su ga garû bum kô é hkyô lé wó sé shoq ga, nhuq bat nhâng lui, myi choq nhang ri.

<sup>25</sup> Nhuq bat râ matú shokuq tuí eq tui kôjáng, Poluq gi, nâm má yap tô é shô up

gyezau lé, "Romaq mingdán byû ru nghut sù lé nhîng, lhang a jéyáng shimá, nungmoq nhuq bat le gi, tarâ wang akô lhu?" ga taî ri.

<sup>26</sup> Rashô up gyezau gi, dang haû lé wó gyo jáng, dap up zau chyáng ló mù, "Nàng haî kut râ dâ nyi lhê lhu? Shî yuq gi, Romaq mingdán byû sheq ru nghut ri." ga lui, yhang lé ló taî kyô ri.

<sup>27</sup> Haû mù, dap up zau gi, Poluq chyáng ê mù, "Nàng gi, Romaq mingdán byû nghut lhê lhu? Taî kyô wú laq." ga myi ri.

Poluq gi, "Ngò, Romaq mingdán byû nghut lhê." ga tû taî ri.

<sup>28</sup> Haû hkûn, dap up zau hpó gi, "Ngò lhang ahpau myo myo byi pyám lui sheq, Romaq mingdán byû ru wó dut é nghut lhê." ga tû taî jáng, Poluq gi, "Ngò kúm gi, Romaq mingdán byû dut gû hku lé lo é sù nghut lhê." ga taî ri.

<sup>29</sup> Yhang lé myi choq wú râ gâ é bang gi, haû hkûn jáng, yhang chyáng mai huî zut ló bûm bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

### *Yudaq Byin Tú Wapdoq Suwún Wuî Gam Hkoq Byuq É Hkyô*

<sup>30</sup> Htang nyi, dap up zau hpó gi, Yudaq byu pé mai Poluq lé hun é mara haî nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byin tú wapdoq suwún wuî lhunglhang lé ji tsing to lui, yhangmoq é gung gûng má Poluq lé shuî wàng mù, shap to bê nghut ri.

## 23

<sup>1</sup> Haû hkûn, Poluq gi, Yudaq byin tú wapdoq suwún wuî lé wú tsuq to mù, "Ngá gumang wuî ê, ngò gi, hkû-nyí jé shoq Garai Gasâng é hí má sansêng é i-myit èq asak dui nyi bê nghut lhê." ga taî ri.

<sup>2</sup> Haû mù lui, hkyangjong mó Anani gi, Poluq nâm má yap to bang lé, yhang nhut má bat byi keq gâ ri.

<sup>3</sup> Haû hkûn, Poluq gi, yhang lé, "But hpyu tô é xewâm\* nàng ê, nàng lé sheq Garai Gasâng èq bat râ nghut lhê. Nàng gi, tarâ

\* 23:3 But hpyu tô é xewâm gâ é gi, gegùn labyoq kut bang lé gâ lhê.

eq rajung za ngo lé jéyáng râ matú shî má zung to luí nhîng, haí mù tarâ eq shut shai é đông ngo lé bat nhang lê lú?" ga taí ri.

<sup>4</sup> Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lê lú?" ga luí, chôm taí akô.

<sup>5</sup> Poluq gi, "Gumang wui ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Náng amyú lé up é sù lé wó rhoi râ a nghut.'\* ga le kê tô é nghut lê." ga tũ taí ri.

<sup>6</sup> Hau htâng, haú zîng tô é bang mâ é ram gi, Saduke pé, góbang gi, Hparishe pé nghut é lé, Poluq gi, sé jáng, Yudaq byìn tú wapdoq suwún wuí lé, "Gumang wui ê, ngò gi, Hparishe awut ashín mâ é, Hparishe rayuq nghut lê. Shî bê bang dum dui toq lô râ hkyô lé myit myoqbyù é yanmai, ngò jéyáng é huí nyí ri." ga luí, garú taí kat ri.

<sup>7</sup> Yhang haú su ga taí kat jáng, Hparishe pé eq Saduke pé gi, dang jet jet lhúm lò kômù, Yudaq byìn tú wapdoq hpong gi, gam hkoq ló byuq bekô nghut ri.

<sup>8</sup> (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyí ga taí bum akô. Hparishe pé kúm gi, haú pé joq lê ga, lumjîng bang nghut akô.)

<sup>9</sup> Haú mù luí, gyai yhang taí garú bum akô. Haú hkûn, Hparishe hpúng mâ é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taí bê nghut jáng gi, hkâsu nghú kó râ lú?" ga luí, zuq zuq taí htîng lhúm akô nghut ri.

<sup>10</sup> Haú su kut gyai yhang taí htîng lhúm lò kôjáng, dap up zau hpó gi, Poluq lé lîng myha pyám kó râ lé chiq é yanmai, yhangmoq chyáng gyó ê mù, Poluq lé haú bâng é gung gûng mai ê lú shuí lò luí, gyewap má shuí wang ló râ matú, gyezô pé lé nhang kat ri.

<sup>11</sup> Haú myîn, Yhumsîng gi, Poluq é nâm má yap to luí, "Hkâgyuq, Yerusalem wà mó má nàng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lê." ga, yhang lé taí ri.

### *Poluq Lé Sat Râ Haq Dâ É Hkyô*

\* 23:5 Htoq Ló 22:28

<sup>12</sup> Htâng napkyó, Yudaq byu pé gi, Poluq lé sat râ hpaqchyí chôm da kômù, yhang lé a wó sat sat gi, a zo a shuq râ nghut lê ga, ó le ó dakam yu akô nghut ri.

<sup>13</sup> Hpaqchyí shî lé chôm dâ é bang gi, myi xê yuq chyân nghut bum akô.

<sup>14</sup> Yhangmoq gi, hkyangjong agyi pé eq suwún wui chyáng ê kômù, "Poluq lé a wó sat sat gi, ngamoq haí le a zo nghú, chôm dakam yu to bê nghut lê.

<sup>15</sup> Hau é yanmai, ahkuí nungmoq gi, Yudaq byìn tú wapdoq suwún wui eq rahá kut luí, Poluq é hkyô lé rago za myí gon wú râ nghu mhaú é đông, yhang lé nungmoq chyáng wut yù râ matú, dap up zaú chyáng dúng kat keq. Haú hkûn, ngamoq gi, hkyolat má yhang lé lhom sat pyám râ rì rì kut to râ nghut lê." ga taí akô.

<sup>16</sup> Nghut kôlhang, haú lhom haq sat kó râ gâ é hkyô lé, Poluq é yhâng nhammó é yhangzo yuqgè zo wó gyô yù luí, yhang gi, gyewap má wang ê mù, Poluq lé ê taí kyó ri.

<sup>17</sup> Haú hkûn, Poluq gi, shô up gyezau rayuq lé ji yù mù, "Zorâm shî lé dap up zaú chyáng shuí ê aq, yhang, yhang lé shit kyo râ hkyô rajung joq lê ga." ga taí ri.

<sup>18</sup> Haú mù luí, shô up gyezau hpó gi, zorâm haú lé dap up zaú chyáng shuí ê mù, "Zorâm shî nang lé shit kyo râ hkyô rajung joq lê gâ ri ga, yhang lé náng chyáng shuí lé râ matú, htóng byù Poluq gi, ngo lé ji yù mù taí ri." ga, yhang lé taí ri.

<sup>19</sup> Haú jáng, dap up zau hpó gi, jauwò má zorâm haú lé yhâng loq mai she ê mù, "Nàng ngo lé haí jung shit kyó nau ri lú?" ga, yhang lé baú tsik za myí ri.

<sup>20</sup> Haú hkûn, zorâm haú gi, "Yudaq byu pé gi, Poluq lé rago za saí myí wú râ su kut mhaú mù, napmá, Yudaq byìn tú wapdoq má shuí yù râ matú, náng chyáng dung kó râ ga, myit chôm huí to bekô nghut ri.

<sup>21</sup> Haú mù luí, yhangmoq ô nau é đông hkâgyo byi, hkâsu mù gâ le, Poluq lé a wó sat sat gi, haí le a zo a shuq râ nghut lê ga, byù myí xê yuq chyân yhang, ó le ó dakam yù bekô nghut ri. Haú bang gi, yhang lé lhom chyup yù râ matú haq lhom to lîng kó râ nghut lê. Ahkuí lîng, yhangmoq gi,

mû haû kut râ matú rì rì nghut bûm bekô; náng é ahkáng lé za lánq nyi bum akô nghut ri." ga shit kyô ri.

<sup>22</sup> Haû hkûn, dap up zau hpó gi, zorâm haû lé, "Nàng, ngo lé shí hkyô shit kyo bê hkyô lé, ó yuq lé le hkâtaî kyo." ga, sidiq byi mù, taû nhang kat bê nghut ri.

### *Mingzau Hpilik Chyang Poluq Lé Dé Kat É Hkyô*

<sup>23</sup> Hau htâng, yhang gi, shô up gyezau í yuq lé ji yù mù, "Hkû-myîn sum hkyíng<sup>†</sup> má Kesare wà mó shut ê râ matú, gyezô pé í shô, myang ji bang nyhit xê, lhâm chùng bang í shô kut mù, rì rì hen to keq.

<sup>24</sup> Hau htoq agó, Poluq lé mingzau Hpilik chyang ngón za wó dé kat râ matú, yhang ji râ myang pé le lajang byi keq." ga, yhang-nhik lé pying kat ri.

<sup>25</sup> Laiká hun kat é le:

<sup>26</sup> "Aróng wó dik é mauzau Hpilik ê, ngò Klodi Lusi gi, nguingón danglù shit kyô kat lhê.

<sup>27</sup> Shí yuq lé gi, Yudaq byu pê èq chyup yû mù sat pyám râ dâ nyi bekô za nghut lhê. Nghut kôlhang, ngò gi, gyezô pé eq rahá é wú le, yhang Romaq mingdán byû nghut é lé wó sê yu é yanmai, yhangmoq chyang mai yhang lé hkyi lo é nghut lhê.

<sup>28</sup> Haû su mù, haî mù yhang lé mara hûn kô é hkyô lé sé nau é yanmai, yhangmoq é Yudaq byin tú wapdoq má yhang lé shuí jé byi wú bê nghut lhê.

<sup>29</sup> Haû hkûn, yhangmoq é tarâ hkyô eq séng luî za mara hun bùm kô é lé ngò myang ri. Nghut kôlhang, shí gíng é eq htóng lhúng gíng é mara haî le a bò nghut ri.

<sup>30</sup> Shí yuq lé sat pyám râ hpaqchyî da kô é hkyô, ngo lé shit kyo kô é hkûn, radá dâm, yhang lé ngò náng chyang dé nhang kat bê. Yhang lé mara hûn nau é bang lé gi, nang hí má yhang hun lhum keq nghú pying kat bê nghut lhê." gâ ri.

<sup>31</sup> Haû mù luî, gyezô pé gi, haû pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri.

<sup>32</sup> Htang nyí, myang ji bang lé ê châng dé nhâng kômù, yhangmoq gi, gyezô shut dum taû lò bekô nghut ri.

<sup>33</sup> Myang jî é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byi akô nghut ri.

<sup>34</sup> Haû hkûn, mauzau hpó gi, laiká haû lé ban nghap jáng, Poluq hká mau má é byù nghut é hkyô lé myí wú luî, Kiliki mau má é byù nghut é lé sé jáng,

<sup>35</sup> "Nang lé mara hûn bang jé jáng sheq, náng mù lé ngò gôn wú râ." ga taî ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

## 24

### *Poluq, Mara Hûn Huî É Hkyô*

<sup>1</sup> Hau htâng, ngo nyí lai jáng, hkyangjong mó Anani gi, suwún wuî ra-am eq tarâ sé sù Tertulu lé shuí gyó ló mù, mauzau hpó hí má Poluq lé mara lé taî hun bum akô.

<sup>2</sup> Haû hkûn, Poluq lé hí má ji hâng tô é nghut mù, Tertulu, yhang lé mara hûn dang taî hí é gi, "Aróng wó dik é Hpilik ê, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nàng sê up sê hkang é jeju lé, byù myû shí wó hkâm zô nyi é yanmai,

<sup>3</sup> ngamoq gi, haû lé hkyô hkat hkangmó eq jowò hkangmó má jeju bûn é myit eq hkam yu nyi bê nghut lhê.

<sup>4</sup> Nghut kôlhang, ngò nang lé lhoq hkyik é dông a dut sháng gaq, taî râ dang ratot zo lé, myit hîng hîng to mù gyo byi laq nghú dúng tôngbán lhê ô!

<sup>5</sup> Shí yuq gi, byù lé gunjang sù, mingkan gón má é Yudaq byu pé lhunglhang lé shuí gabyong sù eq, haû Nazaret hpúng má é hkyô-u shê sù nghut é lé, ngamoq myang ri.

<sup>6</sup> Hau htoq agó, yhang gi, noqkuq yhúm lé achayut kut râ dâ nyi luî, yhang lé ngamoq chyup yû mù, (ngamoq é tarâ dông jéyáng râ hen nyi é hkûn,

<sup>7</sup> dap up zau Lusi gi, lé lô mù, ngamoq é loq mai yhang lé lé lú shuí yù luî, yhang lé mara hûn bang lé, náng chyang jé keq ga hkunmó hkyô tô é nghut lhê.)

<sup>†</sup> 23:23 Myín sum hkyíng gi, nga-nhúng é myín gau hkyíng nghut lhê.

<sup>8</sup> Haû mù, nàng, yhang lé myî wú jáng, ngamoq yhang lé hun é mara banshoq têng é hkyô lé, nàng wó sé râ nghut lhê." gâ ri.

<sup>9</sup> Yudaq byu pé le, haú pé gi, têng lhê ga bo chô m taí akô nghut ri.

### *Poluq, Mara A Bò É Lé Taí Hung É Hkyô*

<sup>10</sup> Mingzau hpó gi, Poluq lé dang taí râ dông loq lik kat jáng, Poluq taí é gi, "Zau ê, shí mau bâng é ahtoq má, nàng zanwut myo myo jéyáng byî nyi é hkyô lé, ngò sê é yanmai, ngò gabú myit èq yhumsing matú, mara a bo é hkyô taí bá.

<sup>11</sup> Ngò, Yerusalem wà mó má noqkuq râ matú doq e é buinyi raxe í nyí lhang a chyân shi é gi, nàng luí za wó sé râ nghut lhê.

<sup>12</sup> Noqkuq yhûm má ngò ó yuq eq taí htîng lhûm é lé lhang, tarajong, a nghut jáng, wà hkaû hká jowò má le byu pé lé shuî gabyông é lé lhang, ngo lé mara hun é bang gi, a myàng kó.

<sup>13</sup> Ahkuî, ngo lé yhangmoq hun é mara pé lé, náng hí má yhangmoq saksé lhang a wó tân shit kó nghut ri.

<sup>14</sup> Nghut kôlhang, náng hí má ngò yín yû râ hkyô rahkat gi, yhangmoq èq shut shaí hkyô ga myhîng tô é Hkyô lé cháng luí, ngamoq é íchyí îwâ pê é Garai Gasang lé noqkuq nyi lhê. Jep é tarâ eq myiqhtoi laiká pé má kê tô é lhunglhang lé le lumjîng lhê.

<sup>15</sup> Ngò gi, dingmán é bang eq a dingmán bâng é dum dui toq lô râ hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê.

<sup>16</sup> Haû mù luí, Garai Gasang eq byu é hí má, ngò gi, râ é hkyô a bo é za, myit é hkyô san za wó dut nyi shoq, shikut nyi lhê.

<sup>17</sup> Zanwut tsómra laí é htâng má, ngò gi, ngá é byù myû mâ é myùng bang lé chyunghuq byi râ eq alu kat râ matú, Yerusalem wà mó shut lô jé bê nghut lhê.

<sup>18</sup> Haû su kut nyi é hkûn, ngò eq rahá hai byù moq mó le a nyi, hái jung gabyông é hkyô le a htoq, ngò noqkuq yhûm má lhoq san lhoq yúng yû bê hkyô lé za, yhangmoq myang akô.

<sup>19</sup> Nghut kôlhang, Asia mau mâ é Yudaq byù ra-am gi, haú má nyi tô é nghut lhê; yhangmoq mai ngo lé mara hûn râ hkyô

joq kô é nghut le gi, shî náng é hí má yhangmoq lé jé kó ra nghut lhê.

<sup>20-21</sup> Haû a nghut jáng, shî má nyi tô é bang gi, ngò Yudaq byin tú wapdoq hí má yap to mù, 'Shi byuq bâng é dum dui toq râ hkyô é yanmai, hkû-nyi nungmoq ngo lé jéyáng nyi akô.' nghû luí, garû é dang hkûn mai lai luí, ngò má gotû mara myàng shi kô é nghut le gi, yhangmoq yhang taí kyo kó sháng gaq." gâ ri.

<sup>22</sup> Hpilik gi, Hkyô haû lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga luí, yhangmoq lé ahkyíng htot kat byi ri.

<sup>23</sup> Poluq lé le, zúng za zúng to mù, yhâng é buinùm ji-myi wui mai yhang ra chá é hkyô lajang byi naû kô é bang nyi le gi, ahkáng byi keq ga luí, shô up gyezau lé hkunmó hkyô kat ri.

<sup>24</sup> Buinyi rayoq zo lai é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luí, yhang, Hkrisduq Yesuq lé lumjîng hkyô taí kyô é le gyô yu ri.

<sup>25</sup> Poluq gi, dingmán hkyô, yhumsing gùng lé hkang é hkyô eq, jé lô râ tarâ dara hkyô lé mhoqshit jáng, Hpilik gi, gyô gyuq mù, "Nàng ahkuî wó lô bê, ngò jìn jáng sheq nang lé dum ji yù râ nghut lhê." ga taí ri.

<sup>26</sup> Hpilik kúm gi, Poluq èq ngùn haq byi râ lé myit myoqbyù mù, yhang lé anum num ji yù luí, yhang eq nyo lhum lhum kut ri.

<sup>27</sup> Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pê é hí má myoqdong wó nau é yanmai, Poluq lé htóng má jâng lhûng pyâm to bê nghut ri.

## 25

### *Poluq, Kehtaq Chyáng Jé Râ Matú Dûng É Hkyô*

<sup>1</sup> Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq lô ri.

<sup>2</sup> Haú hkûn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù,

<sup>3</sup> yhangmoq gi, Poluq lé hkyolat má lhom haq sat pyâm râ dâ to kômù luí, jeju ralhum kut byi é dông Poluq lé Yerusalem wà mó

shut dé kat byi râ matú, Hpestu lé lhom dúng akô.

<sup>4</sup> Nghut kôlhang, Hpestu gi, "Poluq lé Kesare wà mó má sheq ru lhúng tô lhê, hkâ-myháng a myáng má, ngò yhang le haú má dum taû lô râ nghut lhê.

<sup>5</sup> Haû mù, nungmoq mâ é hkyô-u shê bang ra-am, ngò eq rahá gyó lô mù, haú yuq kut shut é hkyô bo é nghut jáng gi, yhang lé mara lé hún kó sháng gaq." ga tû taî ri.

<sup>6</sup> Hau htâng, yhang gi, shit nyi, raxê nyi kô yhangmoq chyáng nyi yù luí, Kesare wà mó má taû lô mù, htang nyí gi, tarâ tanghkuq má zùng luí, Poluq lé yhâng hí má shuí wang lò râ matú hkunmó hkyô kat ri.

<sup>7</sup> Poluq jé jáng, Yerusalem wà mó mai gyó lo é Yudaq byu pé gi, yhâng é lhínhkyuq má yap to kôluí, saksé a wó tûn shit é mara mó myo myo lé, yhâng é ahtoq má chôm taî hun akô nghut ri.

<sup>8</sup> Haú hkûn, Poluq gi, "Yudaq byu pé é jep é tarâ eq shai é dông le, noqkuq yhûm lé shut é dông le, Kehtaq\* lé shut é dông le, ngò a kut wú." ga luí, mara a bo é hkyô taî ri.

<sup>9</sup> Nghut kôlhang, Hpestu gi, Yudaq byu pé é hí má myoqdong wó naû mù, Poluq lé, "Nàng, Yerusalem wà mó má doq lô luí, shí hkyô pé lé ngò haú má doqdan byi râ matú, nàng dóng lhê lú?" ga myí ri.

<sup>10</sup> Poluq kúm gi, "Ngò gi, doqdan hui râ nghut jáng, shí doqdan é jowò, Kehtaq é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé haí lhang a shut wú sù nghut lhê.

<sup>11</sup> Laq má mù, shí gíng é mara lé, ngò kut shut pyâm é nghut le gi, shí hkám râ hkyô lé ngò a he pyám; nghut kôlhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi râ ahkáng wó râ a nghut, ngò gi, Kehtaq chyáng wang taí râ nghut lhê." ga tû taî ri.

<sup>12</sup> Haú hkûn, Hpestu gi, yhâng é byìn tú wap bang eq ban hpyê lhum jáng, "Nàng Kehtaq chyáng wang taí râ ga bê nghut lhê, Kehtaq chyáng wang lô aq hkoi!" ga taî kat ri.

### *Poluq Lé, Hkohlâm Agripa Hí Má Shuí Hâng Yu É Hkyô*

<sup>13</sup> Hau htâng, buinyi hkâ-myháng a myáng má, Hkohlâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huí nyo akô nghut ri.

<sup>14</sup> Haû mù, yhangnhik tâng gi, buinyi tsómra myáng nyi nyi é htâng má sheq, Hpestu gi, haú Poluq é hkyô lé hkohlâm wa eq taî kyô lhûm é gi, "Hpilik, lhúng to lánng é htóng byû rayuq nyi ri.

<sup>15</sup> Ngò Yerusalem wà mó má nyi tô é hkûn, hkyangjong agyi pé eq Yudaq byu pé é suwún wuí gi, haú yuq é hkyô lé taî kyo kôluí, haú yuq lé mara byi râ matú ngo lé chôm dúng akô.

<sup>16</sup> Haú hkûn, ngò gi, mara hun é hui sù, mara hun é bang eq chyung chyoq yoq kut luí, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám râ le, Romaq htung a joq nghú luí yhangmoq lé taî kyo bê nghut lhê.

<sup>17</sup> Yhangmoq ngá htâng châng gyó lô kô é hkûn, ngò gi, a nô yu é za, htang nyí jáng tarâ tanghkuq má zùng luí, haú yuq lé shuí wang lò râ matú hkunmó hkyô kat é.

<sup>18</sup> Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhûm le a hun htoq lô kô nghut ri.

<sup>19</sup> Yhangmoq é noqkuq htung hkyô eq, haú dui nyi ri ga Poluq eq taí é, shi byuq bê Yesuq é hkyô lé za dang jet jet lhûm bum akô.

<sup>20</sup> Haû mù, ngò gi, haú hkyô lé hká dông gon yù râ le a sé lô é yanmai, haú hkyô lé Yerusalem wà mó má doqdan é lô hkam yù râ matú, yhang dóng a dóng é hkyô lé myí wú le,

<sup>21</sup> Poluq yhang sheq, Hkoséng mó chyáng jé râ ga taí é yanmai, Kehtaq chyáng a dé kat shi é u lé, yhang lé zúng nyí shirâ matú, ngò hkunmó hkyô kat é nghut lhê." gâ ri.

<sup>22</sup> Haú hkûn, Agripa gi, "Ngò le haú yuq é dang gyô wú nau ri." ga, Hpestu lé taí jáng, yhang gi, "Nap má, nàng wó myang gyo râ nghut lhê." ga tû taî ri.

<sup>23</sup> Htâng nyí, Agripa eq Bernike nhiktâng gi, shing kang bò bò za lé lô mù, dap up zau wuí eq wà má é agyi suwún wuí eq rahá,

\* 25:8 Kehtaq gâ é gi, "hkoséng" gâ é nghut lhê.

rûng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuí hâng tô akô.

<sup>24</sup> Haú hkûn, Hpestu taí é gi, "Hkohkâm Agripa eq ahkuí shí má zup zîng tô é lhunglhang bang ê, Yerusalem wà mó eq shí wà mâ é Yudaq byu pé banshoq bang, ngá chyáng lé taí kôluí, shí yuq lé asak a wó dui nhang to lo ga garû bùm é gi, ahkuí nungmoq myang é shí yuq yhang nghut bê.

<sup>25</sup> Nghut kôlhang, shí yuq zui saí é má shí gíng é mara haí lé lhang ngò a myàng nghut ri. Yhang gi, Hkosêng chyáng wâng rã ga taí é yanmai, yhang lé Romaq myuq shut dé kat rã matú ngò myit hpyit to bê.

<sup>26</sup> Dé kat bá nghû jáng le, ngá é yhumsîng Hkosêng chyáng yhang é hkyô jihkúm nuqguq kã hun kat rã haí le a bò nghut ri. Haú mù luí, yhang lé ban myí gôn wú jáng sheq, kã rã hkyô rajung jung hkâlhang ngò myàng abe nghû, nungmoq banshoq bâng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lhê.

<sup>27</sup> Hkãsu mù gã le, htóng byû rayuq yuq lé dé kat é hkûn, yhang lé hun é mara a wó tûn shit lé gi, a htuk nghû luí, ngò myit lhê." gã ri.

## 26

### *Poluq É Hí Hpyang Lhê É Nyi Yap Hkyô*

<sup>1</sup> Haú hkûn, Agripa gi, Poluq lé, "Nàng, náng matú dang tai rã ahkáng wó bê." ga taí ri.

Haú mù luí, Poluq loq tû kat mù mara a bo é hkyô taí é gi,

<sup>2-3</sup> "Hkohkâm Agripa ê, nàng gi, Yudaq byu pé é htunghking banshoq eq taí htîng lhûm é hkyô hkat hkangmó lé, gyai sê to sú nghut é yanmai, Yudaq byu pé ngo lé hun é mara hkat hkangmó lé, ngò hkû-nyí náng é hí má mara a bò é hkyô myang taí é gi, ngá matú gabú hpo yhang nghut ri nghû myit yu nyi lhê; haú mù luí, ngá dang lé myit hing é eq gyô yû byi laq nghû, dîng tôngbán kat lhê.

<sup>4</sup> Ngò gi, zoshâng hkûn mai, ngá amyû má le, Yerusalem wà mó má le, hkãsu kut nyi kô lo é hkyô lé, Yudaq byu pé lhunglhang bang gi, sé gû nghut akô.

<sup>5</sup> Yhangmoq gi, ngo lé hí hkûn mai sé kô é yanmai, ngò, ngamoq é noqkuq htûng mâ é tarã htan dik é hpúng má bo é Hparishe rayuq nghut é hkyô lé, saksé hkám naú kô é nghut jáng, yhangmoq wó hkâm lhê.

<sup>6</sup> Nghut kôlhang, doqdân é hui zo rã matú, ahkuí ngò shí má yap tô é gi, Garai Gasang eq ngamoq é îchyí îwa pé lé byí tô é dang-gidiq lé myit myoqbyû nyi é yanmai nghut lhê.

<sup>7</sup> Ngamoq é byû myû raxe í hú gi, dang-gidiq jeju haú lé wó hkam yû shoq ga, Garai Gasang lé nyí myín noqkuq dojaú shikut nyi bum akô; Hkohkâm wa ê, myit myoqbyû hkyô hau é yanmai, ngo lé Yudaq byu pé mara hun bum akô nghut ri.

<sup>8</sup> Garai Gasang gi, shí bê bang lé dum lhoq tui lhê gã é hkyô lé, a wó lûm nghû, haí mù myit yu akô lhú?

<sup>9</sup> Ngò le, Nazaret wà byû Yesuq é myîng eq shai lhûm é dông myo myo wó kut rã nghut lhê nghû, gè gè yhang myit yu wú bê nghut lhê.

<sup>10</sup> Gè gè haú dông le Yerusalem wà mó má kut wú bê nghut lhê; hkyangjong agyi pé chyáng mâ é ahkáng wó yû luí, ngò gi, sân-yûng bang myo myo lé htóng má kat pyâm é eq, yhangmoq sat hui kôjáng le, ngò myit bo huí wú bê nghut lhê.

<sup>11</sup> Ngò gi, tarajong banshoq má a lîng lîng yhangmoq lé dam byi luí, Yesuq lé rhoi dang taí kó shoq shikut wú bê nghut lhê; nhik mó góng yo luí, gó mau mâ é wà pé lhang jé shoq, yhangmoq lé châng zing-rî wú bê nghut lhê.

### *Poluq Hpúng Byû Dut Lo É Hkyô*

<sup>12</sup> Haú hkûn, radàm lé, ngò gi, hkyangjong agyi pé chyáng mai ahko ahkáng eq hkunmó lé yu chûng mù, Damaskuq myuq shut e ló nyi le,

<sup>13</sup> Hkohkâm wa ê, nyigûng tu ló zó lé, bui htoq má je duq é maubó gi, haú hkyô má, ngò eq ngá é luzúm wui é lînghkyuq má, mauhkûng mai duq bó htoq lo é lé myang ri.

<sup>14</sup> Haú hkûn, ngamoq banshoq bang myigûng má lêng gop tô bum le, Hebre myîng dông, 'Sholuq, Sholuq, nàng, ngo lé haí mù zing-rî nyi lhê lhú? Zuchûn lé pik le gi, náng é matú gyai yhang wú lhê.' ga

luí, ngo lé taí é danghtê lé ngò wó gyô kat ri.

<sup>15</sup> Haú mù, ngò gi, 'Yhumsîng ê, nàng gi, ó yuq nghut lhê lú?' nghû luí, myi jáng, haú Yhumsîng tû taí é gi, 'Nàng zing-rî nyi é Yesuq nghut lhê.

<sup>16</sup> Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tûn shit shirâ nghut é hkyô pê é matú, ngá é mû wùn râ byù eq saksé dut nhâng râ đông nang lé hkyin to râ nghû, ngò náng chyáng lé htoq shit é nghut lhê.

<sup>17</sup> Náng é amyû pê é loq mai le, tûngbaù pê é loq mai le, ngò, nang lé hkyi yù nyi râ nghut lhê.

<sup>18</sup> Yhangmoq, yubak hkyut pyám byî é jeju wó yù râ eq, ngo lé lumjîng é yanmai, lhoq sân-yúng huí é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaú mai maubó shut, Tsadán é a-tsam hkaú mai Garai Gasâng shut yhangmoq lhing ló râ matú, ngò, nàng lé yhangmoq chyáng nhang kat râ nghut lhê.' gâ ri.

### *Poluq Kut É Muzó Hkyô*

<sup>19</sup> Haú mù luí, hkohkâm Agripa ê, ngò gi, mauhkûng mâ é myoqwup shing-rán haú lé a gyô é a wó é nyí nghut lhê.

<sup>20</sup> Ngò gi, yhangmoq myit lhîng luí, Garai Gasang shut lhing taú lò mù, myit lhîng bê hkyô lé, hkyi zó loq zó đông mai tûn shit kó sháng gaq nghû, sân-hi má Damaskuq myuq má nyi é bâng chyáng mai hí luí, Yerusalem wà mó mâ é bâng chyáng má le, Yuda mau gón mâ é bâng chyáng má le, tûngbaù pê chyáng má le, hkô kyo bê nghut lhê.

<sup>21</sup> Hau é yanmai, Yudaq byu pé gi, ngo lé noqkuq yhûm má chyup yù luí, sat pyám râ da kô é nghut lhê.

<sup>22</sup> Nghut kôlhang, ngò gi, hkû-nyí jé shoq Garai Gasâng eq garúm é lé wó yù luí, ahkuí shí má yap to mù, tiq ko banshoq bang lé saksé wó hkâm kyô é nghut lhê.

<sup>23</sup> Ngò taí é má, Hkrisduq gi, hpuzo luí, shí bê bang mai sân-hi dui toq lò mù, Yhâng é amyû eq tûngbaù amyû pé lé maubó é hkyô lé wó taí kyo râ nghut lhê ga luí, dut lò râ hkyô lé, myiqhtoí pé eq

Mosheq taí tô é hkyô mai lai luí, ngò gotú haí le a taí é nghut lhê." gâ ri.

<sup>24</sup> Yhang haú su ga mara a bo é hkyô taí é lé, Hpestu gi, "Poluq ê, nàng na bê! Lúm mhoq myô yu é yanmai na bê nghut ri." ga luí, htê mó eq dang lat taí hpyit kat ri.

<sup>25</sup> Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lhê.

<sup>26</sup> Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lhê nghû, ngò myit lum nyi lhê.

<sup>27</sup> Hkohkâm Agripa ê, nàng gi, myiqhtoí pê é dang lé lumjîng lhê lú? Nàng lumjîng é hkyô lé ngò sê lhê." ga tû taí ri.

<sup>28</sup> Haú hkûn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lú?" ga taí ri.

<sup>29</sup> Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkû-nyí ngò taí é dang lé gyô nyi é lhunglhang bang, ngò su dut râ matú, ngò gi, Garai Gasang lé kyûdûng nyi lhê." ga tû taí ri.

<sup>30</sup> Haú hkûn, hkohkâm wa gi, ginwáng zau hpó eq Bernike le mù, haú má zùng tó é bang eq rahá toq yap ri.

<sup>31</sup> Yhangmoq htoq ló kô é hkûn, "Shí yuq gi, sat gíng é mara eq htóng lhung gíng é mara haí le a kut shut nghut ri." ga, rayuq eq rayuq taí lhum bum akô nghut ri.

<sup>32</sup> Agripa gi, Hpestu lé, "Shí yuq gi, yhang mai Kehtaq chyáng jé râ ga a taí tô é nghut le gi, yhang lé wó nhang pyám berâ nghut lhê." ga taí ri.

## 27

### *Poluq, Romaq Myuq Shut Wuì-sanghpo Mai E Ló É Hkyô*

<sup>1</sup> Ahkuí, ngamoq lé Itali ming shut wuì-sanghpo mai gû dap ló nhâng râ matú myit hpyit to kôluí, yhangmoq gi, Poluq eq htongbyû góbang ra-am lé, Augustuq Hkosêng é gyewap mó mâ é, Yuliu gâ é shô up gyezaú é loq má ap byi kat akô.

<sup>2</sup> Haú hkûn, Asia mau mâ é wuimau gin-gau cháng luí wà pé má wang jón ló é, Adramuti myuq mai toq é wui-sanghpo má ngamoq wang ji bê nghut lhê. Htesaloni wà mó mâ é Aristakuq gâ é Makedoni byù rayuq le ngamoq eq rahá nghut lhê.

<sup>3</sup> Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng rã é hkyô lé yhâng é buinùm wui mai lhom lajang byi kó sháng gaq ga, yhangmoq eq é hui rã matú ahkáng byí kat ri.

<sup>4</sup> Haú mai dum toq ló é hkûn, laì tau mut é yanmai, Kupru zinlóng lé lai hkaú uchyang jì laì ló mù,

<sup>5</sup> Kiliki eq Pamhpuli mau mâ é wuimau đông laì byit ló le, Laiki mau mâ é Mura myuq má jé bê nghut lhê.

<sup>6</sup> Haú má, shô up gyezau hpó gi, Itali ming shut dap e ló é, Alesandru myuq mâ é wui-sanghpo lé myang hkyup luí, ngamoq lé haú má jì nhâng bê nghut ri.

<sup>7</sup> Haú mai buinyì myo myo yhó yhó lé za jì e ló luí, awui ahke yhang Kidu wà mó eq ang má wó jé ló jáng, laì tau mut é yanmai, hí shut a wó laì ló lo mù, ngamoq gi, laì lé cháng luí, Kreti zinlóng lé lai hkaú mù, Salamone kongzô é tù tap âng é mai laì ló é nghut lhê.

<sup>8</sup> Haú mâ é wuiyàm mai awui ahke jì ló lé, Lasea wà eq a wê lhùm é Yuqyo é Guhkan gâ é jowò má jé ri.

<sup>9</sup> Ahkuí, buinyì tsómra lhoq lhaì pyám luí, haú Zoshuq gám poì lai bê nghut é yanmai, wui-sanghpo mai sô wún le gi, gyuq chiq rã nám jé bê nghut ri. Haú mù, yhangmoq lé Poluq taì pun taì kyíng é gi,

<sup>10</sup> "Àhkaú pé ê, shí dàm lhê é wui hkyô gi, wuìhke mó hui luí, wui-sanghpo eq zè pé sùm pyám rã htoq agó, nga-nhùng é asak lhang sum rã dut é hkyô lé, ngò byu myang ri." gâ ri.

<sup>11</sup> Nghut kôlhang, shô up gyezau hpó gi, Poluq é dang lé gyo rã malaì, wui-sanghpo hkàng sù eq wui-sanghpo yhumsing é dang lé, je lum ri.

<sup>12</sup> Guhkan haú gi, gyoqmyò\* wó lhoq lhai rã su a dut é yanmai, myo hpyang gi,

Hponik guhkan má wó jé le jé mù, haú má gyoqmyò ló nyi lhai rã matú chôm myit huì akò. Guhkan haú gi, Kreti zinlóng má maupyì buiwàng hkyam eq mautsung buiwàng hkyam shut hu tô é jowò nghut ri.

### *Wuimau Má, Laidun Mó Htùng Huì É Hkyô*

<sup>13</sup> Maupyì shut mâ é laì yhó le hik lô jáng, yhangmoq myit tô é má hkyak nghut bê su ngam pyám kôluí, shamtoq goknghe lé lhoq toq yù kômù, Kreti zinlóng yâm đông jì e ló bê nghut lhê.

<sup>14</sup> Nghut kôlhang, hkâ-myháng a myáng má, Buihtoq mautsung laì gâ é laidun mó gi, haú zinlóng mai mut lò luí,

<sup>15</sup> wui-sanghpo lé lo mut htùng é yanmai, hí shut a wó ló lo jáng, ngamoq gi, laì mut ló é shut châng yông ló bê nghut lhê.

<sup>16</sup> Ngamoq gi, Koda gâ é zinlóng zo lé lai hkaú uchyang yông ló nyi é hkûn, haú sakhkyìlhaì lé gyai shikut é èq wó lãng yù luí,

<sup>17</sup> wui-sanghpo ahtoq má lãng toq to bê. Wui-sanghpo lé gi, a byoq lo shoq tuí èq tuí kíng to bê nghut lhê. Dum, yhangmoq gi, Surti gâ é semuì bùm má ló kê gyâm to rã lé chiq kô é yanmai, wui-sanghpo mâ é panlong pé lé lhoq nyhum hkyô yù mù, châng yông ló bekô nghut ri.

<sup>18</sup> Laidun mó lùm htan é yanmai, htang nyí yhangmoq gi, hpugá zê pé lé hkyom dú hkyó pyám bekô nghut ri.

<sup>19</sup> Sum nyí nghu é nyí má, yhangmoq gi, wui-sanghpo zè pé lé yhumsing é loq èq yhang hkyô pyám bekô.

<sup>20</sup> Buinyì myáng myáng, buì lé le, kyì pé lé le a myàng é eq, laidun mó za ru mut nyi é yanmai, wó lut rã nghu myit myoqbyu tô é hkyô lé, ngamoq tô pyám bê nghut lhê.

<sup>21</sup> Yhangmoq zoshuq a zô é, buinyì tsómra myáng lô bê nghut mù luí, Poluq gi, yhangmoq é gung gung má yap to mù, "Àhkaú pé ê, nungmoq ngá é dang gyo luí, Kreti zinlóng mai a htoq ló é nghut le gi, shí su htên byoq é marop hui zo rã a nghut.

<sup>22</sup> Ahkuí nghut kôlhang, ngò taì é dang lé gyô yù mù myit wum yù keq; nungmoq

\* 27:12 Gyoqmyò lé, haú mau má laidun mó lò lò dut mù, yông wún le gyuq chiq nám nghut lhê.



mâ é hká yuq lé asak sum râ a nghut, wuì-sanghpo za sheq htên byoq byuq râ nghut lhê.

<sup>23</sup> Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taí é gi,

<sup>24</sup> 'Poluq ê, hkâgyuq, Kehtaq é hí má nàng wó yap râ nghut lhê. Wuì-sanghpo shí má nàng eq rahá ji tô é lhunglhâng bâng é asak lé, Garai Gasang gi, náng é yanmai, láí láí byi râ nghut lhê.' gâ ri.

<sup>25</sup> Hau é yanmai, âhkaú pé ê, myit wum yù keq, ngo lé taí kyô é eq rajung za dut lò râ nghut lhê nghû luí, Garai Gasang lé ngò lumjǐng nyi lhê.

<sup>26</sup> Nghut kôlhang, nga-nhúng gi, zinlóng ralhum lhum má ló htung chyap to râ nghut lhê." ga luí, yhangmoq lé i-myt taí tǐng ri.

<sup>27</sup> Buinyì raxe myi nyí myín má, gunggàm yoq lé, ngamoq gi, Adria wuimau má yǒng lhing wún é hkûn, sanghpo hkâng bang gi, dùng yàm eq chyâng lo nyi é su gâ é lé sê gyo kat akô.

<sup>28</sup> Haú su mù, wuì nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri.

<sup>29</sup> Haú mù luí, luqmó má ló záng htung râ lé chiq kômù, yhangmoq gi, wuì-sanghpo htàng shut mâ é shamtoq goknghe myí lhum lé lhoq hkyô kat luí, mau hân bó sháng gaq ga kyûdǔng nyi bum akô nghut ri.

<sup>30</sup> Wuì-sanghpo hkâng bang gi, wuì-sanghpo lé tô pyám to luí hpâng râ dâ é myit eq, wuì sanghpo-u shut mâ é shamtoq goknghe pé lé lhoq hkyó râ su kut mhaú luí, sakhkyílhaí lé wuì má lhoq hkyô nyi bum akô.

<sup>31</sup> Haú mù, Poluq gi, shô up gyezau eq gyezô pé lé, "Shí bang wuì-sanghpo má a nyi le gi, nungmoq wó lut râ a nghut." ga taí ri.

<sup>32</sup> Haú hkûn, gyezô pé gi, sakhkyílhaí lé tuí tô é tui lé zân hpyit kat kôluí, sakhkyílhaí gi, byit gyó byuq bê nghut ri.

<sup>33</sup> Maubó lô jáng, Poluq gi, yhangmoq banshoq bang lé zang zo râ matú myit wum byí é gi, "Nungmoq gi, myit chiq luí,

zoshuq haí le a zô é, hkû-nyí raxe myi nyí myàng lô bê.

<sup>34</sup> Haú mù luí, zoshuq rajung jung zo keq! Haú gi, nungmoq wó lut râ matú nghut lhê. Nungmoq chyâng mâ é ó yuq é xâm rahkat lháng byuq râ a nghut." gâ ri.

<sup>35</sup> Haú su ga ban taí é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkya-on mù, muk lé hpé luí, zô hí bê nghut ri.

<sup>36</sup> Haú hkûn sheq, banshoq bang gi, myit wum wó yù kômù, zoshuq zô bùm bekô nghut ri.

<sup>37</sup> Wuì-sanghpo haú mâ é byù lhunglháng gi, í sho nyhit xe hkyuq yuq nghut lhê.

<sup>38</sup> Yuq hkangmó bàn zô gyí é htàng má, wuì-sanghpo sóm râ matú, sungsô pé lé wuì má dú kat pyám akô nghut ri.

### *Wuì-Sanghpo Htên Gyop Byuq É Hkyô*

<sup>39</sup> Myoq san za myàng jáng, yhangmoq gi, jowò haú lé a sé kôlhang, semuì-jàng chyùn ralhum lé byu myàng kôluí, wó dut é nghut jáng, haú má sanghpo lé kôn gyam râ matú chòm doqdân yu akô nghut ri.

<sup>40</sup> Haú mù, yhangmoq gi, shamtoq goknghe pé lé wuimau má hkyut hkyô pyám tô akô. Lhaishap tui lé le hkyut yù luí, wuì-sanghpo ulhum mâ é panlong lé lhoq toq yù mù, lài hkyô cháng luí wuiyàm shut mut lô bê nghut ri.

<sup>41</sup> Nghut kôlhang, semuì lo bum tô é jowò ralhum má, wuì-sanghpo ló htung chyap byuq luí, sanghpo u gi, a wó duí lo mù, sanghpo htàng lé gi, wuìheng èq lò bat hkyop myha pyám bê nghut ri.

<sup>42</sup> Haú hkûn, gyezô pé gi, htongbyù pé wuili lí hpang byuq kó râ lé gyuq kô é yanmai, yhangmoq lé sat pyám râ chòm dâ akô.

<sup>43</sup> Nghut kôlhang, shô up gyezau hpó gi, Poluq lé hkyi yù naù luí, yhangmoq dâ é hkyô lé hkûm pyám mù, wuili dat li bang gi, wuì má byam gyó luí wuiyàm shut hí li dap ló kó sháng ga luí le,

<sup>44</sup> góbang gi, siklong eq wuì-sanghpo mâ é gotú zè pé má zui mù, gu dap ló sháng ga le, hkunmó hkyô kat ri. Haú đông mai lhunglhâng bang gi, wuiyàm shut rago wó jé dap ló bekô nghut ri.

## 28

*Malata Zinlóng Má Jé Nyi Tô É U Lhé Hkyô*

<sup>1</sup> Ngamoq wó lut dap ló jáng sheq, zinlóng haú gi, Malata gâ é lé sê ri.

<sup>2</sup> Zinlóng byu pé gi, ngamoq lé shogyo myit gyai lhom tûn shit akô. Mau ru jáng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô.

<sup>3</sup> Haú hkûn, Poluq gi, htang rawaq guq tsing yù mù, myihkyóm má kat kat é hkûn, myi soq htan lò jáng, duq htân lhangmuì radu gi, htoq ló mù, yhâng é loq má htê zing tô ri.

<sup>4</sup> Zinlóng byu pé gi, Poluq é loq má lhangmuì haú htê lhâng tô é lé myàng kôjáng, "Shí yuq gi, gè gè yhang byù sat é sù teng râ dut ri; wui mai wó lut ló kôlhang, yhang asak dui nyi râ matú, Tengmán tarâ gi, a dóng lo nhung!" ga luí, rayuq eq rayuq taí lhum bum akô nghut ri.

<sup>5</sup> Poluq kúm gi, lhangmuì haú lé myihkyóm má ko hkyô kat luí, haí le a dut é za nyi tô ri.

<sup>6</sup> Yhangmoq gi, yhânggùng wâm lò berâ, haú a nghut jáng, byodàn ratung shi hkyaq lêng lò berâ, ga myit lánng nyi bum akô. Nghut kôlhang, myáng myáng lánng wú nyi bum le, yhang má haí le a dut lo é lé myàng kôjáng, yhangmoq é i-myit dum htaí pyám kôluí, shí yuq gi, hparâ rayuq sheq nghut ri ga dum taí bum akô nghut ri.

<sup>7</sup> Hau é nàm má, zinlóng agyì hpó Popli sing é maumyí pé joq tô ri. Haú yuq gi, ngamoq lé lhom te yù mù, yhâng yhûm má sum nyí yhang lalúm la-nye lhom hkûlum yu ri.

<sup>8</sup> Haú u lé, Popli é yhângwa gi, alì nyé no nyi é eq wuiwam shun leq tô ri. Poluq gi, haú yuq chyáng wàng mù, kyûdung byi luí, yhâng é ahtoq má loq ke byi mù, yhang lé lhoq gè byí ri.

<sup>9</sup> Haú su dut é yanmai, zinlóng mâ é nõ byù góbang banshoq le, lé luí lhoq gè byí é hui bekô nghut ri.

<sup>10</sup> Yhangmoq gi, ngamoq lé a hkyô hkyô dông hkungga kôluí, ngamoq wui-sanghpo ji mù, dum toq ló râ hkûn, ngamoq râ é gû lé châng byi kat akô nghut ri.

*Romaq Myuq Má, Poluq Jé É Hkyô*

<sup>11</sup> Lhamó sum hkyap lai jáng, Alesandru myuq mâ é, "Hparâ zozûm nhiktâng" gâ é alhô dap é wui-sanghpo má, ngamoq wang jî htoq ló bê nghut lhê. Wui-sanghpo haú gi, gyoqmyò lé zinlóng haú má joq lai é nghut ri.

<sup>12</sup> Surakusa wà mó má jé jáng, haú má ngamoq sum nyí nõ yu é nghut lhê.

<sup>13</sup> Haú mai jî xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luí, í nyí nyí má nghut jáng, Potioli wà mó má jé lô bê nghut lhê.

<sup>14</sup> Haú mâ é gumang wui ra-am eq hui luí, ngamoq lé nyhit nyí nõ râ matú lùng kômù, ngamoq gi, nõ yù bê; hau htâng, Romaq myuq má jé ló bê nghut lhê.

<sup>15</sup> Haú mâ é gumang wui gi, ngamoq jé lo nyi é hkyô lé wó gyo kôjáng, te yù râ ga, Api Gai gâ é wà eq Bìng Yhûm Sûm Lhum gâ é wà jé shoq lé akô. Poluq gi, haú bang lé lhom myàng jáng, Garai Gasang lé hkyanon kungtôn mù, myit wum wó yù bê nghut ri.

<sup>16</sup> Ngamoq, Romaq myuq má jé wang ló é hkûn, Poluq gi, yhang lé zúng râ gyezo rayuq eq gotû san nyi râ matú, ahkáng wó ri.

*Poluq, Romaq Myuq Má, Mungdang Hko Kyô É Hkyô*

<sup>17</sup> Buinyi sum nyí lai é htâng má, Poluq gi, haú mâ é Yudaq suwún wui lé ji yu ri. Yhangmoq jé lé bûm kôjáng, yhang gi, "Gumang wui é, ngò gi, nga-nhung é amyû lé le, íchyí îwa pé é htunghking lé le, shut shai é dông haí le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pé é loq má ap byí kat é hui bê nghut lhê.

<sup>18</sup> Romaq zau wui kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô nghut ri.

<sup>19</sup> Nghut kôlhang, haú lé Yudaq byu pé a dóng kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haú nghut kôle, ngá amyû lé mara hûn râ jowò joq é yanmai gi, a nghut.

<sup>20</sup> Haû mù luí, Israelaq amyú é myit myoqbyù hkyô\* é yanmai, shí shamtoq-tuí èq tuí é ngò hui zô é hkyô eq séng luí, nungmoq eq nyo kún râ matú, ngò, nungmoq lé ji kat é nghut lhê." ga luí, yhangmoq lé taí ri.

<sup>21</sup> Haú hkûn, yhangmoq gi, "Náng é hkyô eq séng luí Yuda mau mâ é laiká ngamoq a wó yû nghut ri. Haû mai lé é gumang wui ó yuq le, nàng eq séng é a ge é luhkyang lé shit kyô é a bò kó nghut ri.

<sup>22</sup> Nghut kôlhang, shí nàng lom é hpúng gi, jowò hkangmó má taí he pyâm é huí é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tû taí akô.

<sup>23</sup> Yhangmoq gi, yhang eq huí kún râ buinyi ding to kôluí, yhang bíng é yhûm má byù myo myo lé zîng bum akô. Haú hkûn, yhang gi, napkyó mai myín htàng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoí pè é dang má cháng mù, yhangmoq lé shikut luí, Yesuq é hkyô taí pun taí kyîng ri.

<sup>24</sup> Yhang taí é hkyô lé, ra-am gi, lumjîng bum akô; ra-am kúm gi, a lumjîng kó nghut ri.

<sup>25</sup> Yhangmoq rayuq eq rayuq haû su myit a huí lhûm bùm kô é yanmai, Poluq gi, yhangmoq lé, "Chyoiyúng Woi-nyí, Myiqh-toi Esai-aq é nhut mai nungmoq é íchýí íwâ pé lé taí é dang gi, gyai yhang têng ri. Dang haû gi,

<sup>26</sup> 'Byù haú hú chyáng è mù,  
"Nungmoq gyô tsuq to kôlhang, sê gyo kó râ a nghut;  
wú tsuq to kôlhang, wú sé kó râ a nghut.", nghû è taí aq.

<sup>27</sup> Hkâsu mù gâ le, amyû shi é i-myt gi, htan byuq luí,  
yhangmoq é nohkyap gi, htú byuq bê nghut ri;  
yhangmoq é myoq gi, chûm byuq bê nghut ri;

haû a nghut le gi, yhangmoq é myoq èq myàng mù,  
yhangmoq é nohkyap èq wó gyo luí,

yhangmoq é i-myt má sê hkyâng kômù,  
ngá chyáng lhing lò kôluí, ngò yhangmoq lé lhoq gê byi berâ nghut lhê.'\*  
gâ ri.

<sup>28</sup> Haû mù luí, shí Garai Gasâng é hkyi yù hkyô lé, tûngbaù pè chyáng byí kat bê nghut luí, yhangmoq lhom gyô yù berâ hkyô lé, nungmoq yhang sê nyi keq ô!" ga luí, danghkun haû taí kat é htàng má, yhangmoq gi, htoq ló byuq bùm bekô nghut ri.

<sup>29</sup> (Poluq haû su ga taí é htàng má, Yudaq byu pé gi, yhangmoq yhangchang dang jet jet lhum uchyang ló byuq bekô nghut ri.)

<sup>30</sup> Poluq gi, yhang nghô lúng é yhûm má í zân tup nyi é u lé, yhâng chyáng lé má lé é bang lé lhom hkûlum yu ri.

<sup>31</sup> Haû mù, a gyuq a kyum é za, Garai Gasâng é mingdán hkyô lé hko taí kyô é eq, Yhumsîng Yesuq Hkrisduq eq séng é hkyô lé mhoqshit byí ri; yhang lé, ó le a hkûm zing to kó nghut ri.

\* **28:20** Israelaq amyú é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê. ✨ **28:27** Esai 6:9,10

## ROMAQ

### Pê Chyáng Hun Kat é Laiká (Romans)

<sup>1</sup> Hkrisduq Yesuq é dui-nhâng zoshâng eq lagyo dut râ matú, Garai Gasâng èq ji yu é hui luí, chyoiyúng Chyúmdang pé má,

<sup>2</sup> Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng èq chyitdap é hui luí, sân-yúng bang dut râ matú jí yu é bang banshoq lé, dang kyô kat lhê.

<sup>3</sup> Yhâng é Yuqzo haú gi, byù hkyam dông ga jáng, Dawiq é awut ashín nghut ri;

<sup>4</sup> Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm èq sé nhâng bê nghut ri. Yhang gi, nga-nhúng é Yhumsing Yesuq Hkrisduq nghut ri.

<sup>5</sup> Yhang dông mai le, Yhâng myíng é matú le, ngamoq gi, byù myú chângjup mai byù jí yù mù, lumjínq hkyô lé châng nyi nhâng râ matú, jeju eq lagyo ayá lé wó hkam yù bê nghut lhê.

<sup>6</sup> Nungmoq le, Yesuq Hkrisduq eq séng râ matú jí yù huí é bang má lòm bekô nghut ri.

<sup>7</sup> Nga-nhúng é Íwa Garai Gasang eq Yhumsing Yesuq Hkrisduq chyáng má é jeju eq nguínqón hkyô gi, nungmoq chyáng ru joq nyí sháng gaq ô!

*Poluq, Romaq Myuq Má Ló Kum Nau É Hkyô*

<sup>8</sup> Nungmoq é lumjínq hkyô lé, mingkan gón má taí pyo ló bê nghut é yanmai, sân-hi má, ngò gi, Yesuq Hkrisduq é myíng mai, nungmoq banshoq bâng é matú, ngá é Garai Gasang lé, jeju hkya-on lhê.

<sup>9</sup> Ngá é kyúdung dang pé má, ngò, nungmoq lé hkâ-nhám le bún nyi é hkyô lé, Yhâng é Yuqzô é hkyô gabú danglù lé hko

kyô nyi é má, ngá é myit nhiklhum banshoq èq dojaú é Garai Gasang gi, ngá é saksé nghut lhê;

<sup>10</sup> Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuí, ngò kyúdung lhê.

<sup>11</sup> Ngò gi, nungmoq lé, woi-nyí hkyô eq sêng é chyunghuq wó gâm byi mù, nungmoq lé wum-o wó lhoq kínq byi râ matú, nungmoq lé gyai yhang myàng nau nyi ri.

<sup>12</sup> Haú su nghu é gi, nga-nhúng rayuq eq rayuq é lumjínq hkyô dông mai, nungmoq eq ngò, myit wum byí é hui râ matú nghut lhê.

<sup>13</sup> Gumang wui ê, ngò gi, haú tungbaú pê chyáng mai ashi wó yu é eq rajung za, nungmoq chyáng mai le ashi wó yú râ matú, nungmoq chyáng lé jé râ nghú adàm dàm dá wú é nghut kôlháng, ahkuí jé shoq hkúm tang pyám huí é hkyô lé, nungmoq lé sé nhâng nau ri.

<sup>14</sup> Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê.

<sup>15</sup> Haú nghut é yanmai, ngò gi, Romaq myuq má é bang nungmoq lé le, haú gabú danglù gyai yhang hko kyo nau nyi é nghut lhê.

<sup>16</sup> Haú gabú danglù hkyô má, ngò gi, a hoq é nghut lhê; hkâsu mù gâ le, haú gi, sân-hi má Yudaq byu pé, hau htâng tungbaú pé má, lumjínq é sù yuq hkangmó lé hkyi yu é wó hui nhâng râ nghut é, Garai Gasâng é hpungwup a-tsâm nghut lhê.

<sup>17</sup> Hkâsu mù gâ le, lumjínq myit mai wó yú luí, lumjínq myit má gíng nyi é, Garai Gasâng chyáng má é dingmán hkyô lé gi, gabú danglù haú má hpông shit bê nghut ri. Haú gi, "Haú dingmán sù gi, lumjínq myit mai asak dui râ nghut lhê."☆ ga kê tô é eq rajung za nghut ri.

*Xângzo Byu Pé Htoq Má Garai Nhkmo-yô É Hkyô*

<sup>18</sup> Haú tengmán hkyô lé, yhumsing é agè ashop hkyo èq zik hkúm pyám é byu pé é agè ashop hkyô eq garai a bo é hkyô pé banshoq htoq má, mauhkúng mai Garai

☆ 1:17 Hbk 2:4

Gasâng é nhikmo-yo hkyô lé hpông shit bê nghut ri.

<sup>19</sup> Haî mù gâ le, Garai Gasang gi, Yhang eq sêng é hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri.

<sup>20</sup> Hkâsu mù gâ le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaî é myit sâmlai lé gi, san za wó myâng, wó sê gyô é nghut lhê. Haû mù luî, byu pé gi, mara mai wó he lut râ hkyô a joq lo nghut ri.

<sup>21</sup> Haî mù gâ le, yhangmoq gi, Garai Gasang lé sê to kôlhang, Yhang lé Garaî dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyíng é yhangmoq é myit nhiklum gi, chut byuq bê nghut ri.

<sup>22</sup> Yhangmoq gi, hpaqchyî bò bang nghut lhê ga kôlhang, a-ngok é bang dut byuq bekô nghut ri.

<sup>23</sup> Haû mù, htên byoq a sê é Garai Gasâng é hpungwup shingkang lé, htên byoq sê é byù zông, nghoq lhô, dusak lhô eq yê jung dusak lhô pé èq, htaî lhik pyám bekô nghut ri.

<sup>24</sup> Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myit má, yhangmoq lé ap pyám bê nghut ri.

<sup>25</sup> Yhangmoq gi, haû Garai Gasâng é tengmán hkyô lé, mhaû é hkya eq htaî lhik pyám kômù, hpân Sû lé noqkuq dojaú râ malaî, mhaû hkyô nghut é hpan tô é zè pé lé noqkuq mù, dojaú akô nghut ri. Hpân Sû haû gi, ahtum abyuq hkya-on hui sû nghut ri. Amen.

<sup>26</sup> Haû nghut é yanmai, Garai Gasang gi, yhangmoq lé, ahoq ahî é yut yut ô nau hkyô má ap pyám bê nghut ri. Yhangmoq é myiwe wuî lhang gi, htûng akying lé tô pyám kômù, haû eq shai é dông htaî lhik pyám nyi akô nghut ri.

<sup>27</sup> Haû eq rajung za, yuqgè wuî le, myiwe wuî eq zum é htûng akying lé tô pyám kômù, rayuq eq rayuq, myi su nyé

shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluî, yhangmoq kut shut é eq gingdán é yubak dam lé, yhumsing gùng yhumsing hkam yù nyi bekô nghut ri.

<sup>28</sup> Hau htoq agó, haû Garai Gasang lé sê é hkyô gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garai Gasang gi, yhangmoq lé, htên byoq sê é myit má ap pyám é nghut lhê.

<sup>29</sup> Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lhûm é hkyô pé byíng jup tô é bang dut bekô nghut ri; manon é, byù sat é, mabyoq jishûm htoq é, mhaû zô é eq myit goi bo é pé le byíng bum ri.

<sup>30</sup> Yhangmoq gi, lumu é bang, gansang é bang, Garaî lé a jú é bang, byù rhoi é bang, nghutbûn é bang, gyáng é bang, agè ashop kut râ hkyô lhoq htoq é bang, mó wui é jìno a gyô é bang nghut akô.

<sup>31</sup> Yhangmoq gi, a gyíng a hâng é bang, gidiq a zung é bang, chyit myit a bo é bang, shogyo nhikmyin a sê é bang nghut akô.

<sup>32</sup> Haû pé lé kut é bang gi, shî gíng lhê gâ é, Garaî Gasâng é dingmán tarâ joq é lé, yhangmoq sê to kôlhang, haû pé lé, yhangmoq xoq kut nyi kô é htoq agó, haû hkyô lé kut é bang lé le, hkya-on waq toq akô nghut ri.

## 2

### *Garai Gasang Tarâ Jéyáng É Hkyô*

<sup>1</sup> Haû mù luî, góyuq lé tarâ jéyáng é sù nàng ê, nàng gi, mara mai wó he lut râ hkyô a joq lo; hkâsu mù gâ le, nàng yhang jéyáng nyi luî, mù haû pé lé, nàng kut nyi é yanmai, byù góbang lé jéyáng é hkûn, náng gûng nàng mara byi nyi bê nghut ri.

<sup>2</sup> Haû dông kut nyi é bang lé, Garaî Gasang gi, tengmán é dông tarâ jéyáng é lé, nga-nhúng sê nyi lhê.

<sup>3</sup> Haû mù, byù za nghut to luî, góbang lé gi, jéyáng mù, yhumsing gi, haû dông roq châng kut nyi é sù nàng ê, nàng gi, Garaî Gasâng é tarâ jéyáng hkyô mai wó hpang lut râ su ngam nyi lhê lhú?

<sup>4</sup> Haû a nghut jáng, nàng gi, Garaî Gasâng é ge é hkya eq nang lé myit wó shuí lhing

nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyâm nyi lhê lú?

<sup>5</sup> Nghut kôlhang, náng é myit htân hkyô eq myit a lêng é nhiklhum é yanmai, haú Garai Gasang dingmán é dông tarâ jéyáng shit râ nghut é, Yhâng é nhikmo-yô é buinyi má hkâm zo râ nhikmo-yo hkyô lé, yhumsing gùng yhang hkong tô nyi bê nghut ri.

<sup>6</sup> Garai Gasang gi, yuq hkangmó lé, ó le ó kut é má cháng luí, hkâm zo nhâng râ nghut lhê.

<sup>7</sup> Jân shirâng mù, ge é hkyô kut nyi é dông, hpungwup shing kang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lhê.

<sup>8</sup> Nghut kôlhang, haú yhumsing wuízát hkyô za hô luí, tengmán hkyô lé he-ngik pyám mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé râ nghut lhê.

<sup>9</sup> Wuíhke hkyô eq iyon yon hkyô gi, agè ashop kut é xângzo byù yuq hkangmó chyáng jé râ nghut lhê; sâng-hi má Yudaq byu pè chyáng jé mù, tûngbaù pè chyáng le jé râ nghut lhê.

<sup>10</sup> Nghut kôlhang, hpungwup shing kang, aróng eq nguingón hkyô gi, haú ge é hkyô kut é bang yuq hkangmó chyáng jé râ nghut lhê: sâng-hi má Yudaq byu pè chyáng jé mù, tûngbaù pè chyáng le jé râ nghut lhê.

<sup>11</sup> Hkâsu mù gâ le, Garai Gasang gi, myoqdong a hkyin é Sù nghut lhê.

<sup>12</sup> Haú jep é tarâ lé a sê é mara kut shut é bang lhunglhang gi, jep é tarâ dông a nghut é za htên byoq kó râ nghut lhê. Haú jep é tarâ hkaù má mara kut shut é bang lhunglhang gi, jep é tarâ dông jéyáng é hui zo kó râ nghut lhê.\*

<sup>13</sup> Hkâsu mù gâ le, haú jep é tarâ lé wó gyô é bang lé, Garai Gasâng é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui râ nghut lhê.

<sup>14</sup> Haú jep é tarâ lé a wó é tûngbaù pé gi, jep é tarâ hkyô lé, yhang baú yhang châng nyi kô é hkún, jep é tarâ lé a wó kôlhang,

yhumsing gùng yhumsing é matú tarâ dut bekô nghut ri.

<sup>15</sup> Yhangmoq gi, haú jep é tarâ hkyô pé lé, yhangmoq é i-myit unghkaù má kâ to bê nghut é lé, tûn shit bekô nghut mù, yhangmoq é myit má hkâm zô é hkyô le, haú lé saksé hkâm byi nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri.

<sup>16</sup> Haú hkyô gi, ngò taí pyo é gabú danglù eq rajung za, byu pè é zaú nghop tô é hkyô pé lé, Hkrisduq Yesuq dông mai Garai Gasâng eq tarâ jéyáng é buinyi má dut râ nghut lhê.

### *Yudaq Byu Pé Eq Jep É Tarâ*

<sup>17</sup> Nghut kôlhang, náng gi, náng gùng náng Yudaq byù rayuq nghut lhê ga mù, haú jep é tarâ lé lumhkau nyi é eq Garai Gasang lé xoq é hkyô má nghutbun nyi é sù;

<sup>18</sup> Yhâng ô nau é hkyô lé sê é eq haú jep é tarâ mhoqshit é hkyô wó yú bê nghut é yanmai, je ahkyak é hkyô lé sê gâm hkoq é sù;

<sup>19</sup> haú jep é tarâ má, hpaqchyí eq tengmán hkyô é alik wó sù nghut é yanmai, haú myoqjit bâng é matú hkyô-u shê sù eq mauchut hkaù mâ é bâng é matú maubó nghut sù;

<sup>20</sup> byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi,

<sup>21</sup> náng, góbang lé mhoq byi sù nhing, yhumsing gùng yhumsing a mhoq yú lú? A wó hkau ga hko taí luí nhing, náng gi, hkaù lhê a nghut lú?

<sup>22</sup> Su-myi sulàng lú hkyô a wó kut ga byu pé lé taí luí nhing, náng gi, su-myi sulàng lú hkyô kut lhê a nghut lú? Hparà lhô lé a jú dik sù náng gi, noqkuq yhúm lé hpyoq zo hpyoq shuq nyi lhê a nghut lú?

<sup>23</sup> Jep é tarâ eq séng luí nghutbun sù náng gi, haú jep é tarâ lé lu laí é dông, Garai Gasang lé a hkungga kut lhê a nghut lú?

<sup>24</sup> Haú gi, "Garai Gasâng é mying gi, nungmoq é yanmai, tûngbaù pè chyáng lhoq hpoí pyâm é hui ri."\* ga kâ tô é eq rajung za nghut ri.

\* **2:12** Haú jep é tarâ lé a sê bang gâ é gi, tûngbaù pé lé gâ é nghut luí, haú jep é tarâ hkaù má é bang gâ é gi, Yudaq byu pé lé gâ é nghut lhê. ✨ **2:24** Esai 52:5

<sup>25</sup> Haû jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laî é nghut jáng, a hpyit é eq rajung za dut bê nghut ri.

<sup>26</sup> Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang đông ge sôn byi lê a nghut kó lú?

<sup>27</sup> Kâ tô é tarâ lé wó mù, ahpyo-kuq hpyit hkam to gù nghut é, tarâ lu laî é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hùn râ nghut lê.

<sup>28</sup> Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut.

<sup>29</sup> Ahte myit hkaû má Yudaq byù nghut sù za, Yudaq byù kyîng nghut lê. Kâ tô é tarâ đông a nghut é za, Woi-nyí èq myit má ahpyo-kuq hpyit é gi, ahpyo-kuq hpyit kyîng nghut bê. Haû yuq é hkya-on kungtôn hkyô gi, byù mai lo é a nghut, Garai mai lo é ru nghut lê.

### 3

#### *Garai É Lhumzui Hkyô*

<sup>1</sup> Haû đông ga jang, Yudaq byù rayuq dut nyi é gi, hai akyû hkâm zo râ lú? Ahpyo-kuq hpyit hkyô gi, hai akyû bò râ lú?

<sup>2</sup> Hkyô hkangmó má gyai akyû bò lê! Je hí má gi, haû Garai Gasâng é mungdang lé yhang, yhangmoq lé ap byi bê nghut ri.

<sup>3</sup> Yhangmoq mâ é ra-am lumjîng myit a bo é nghut le gi, hkâsu kó lú? Yhangmoq lumjîng myit a bo é yanmai, Garai Gasâng é lhumzui hkyô lé akyû a bò nhâng wó dut râ lú?

<sup>4</sup> Hká đông le a wó dut!

"Haû mù, nàng dang taî é hkûn, dingmán é hkyô wó lhoq htoq râ eq,  
nàng jéyáng huí é hkûn, ùng râ nghut lê."\*

ga kâ tô é eq rajung za, byù yuq hkangmó gi, byù-mhaû dut kôlhang, Garai Gasang gi, tengmán nyi sháng gaq.

<sup>5</sup> Nghut kôlhang, nga-nhûng é a dingmán hkyô gi, Garai Gasâng é dingmán hkyô lé

san za je lhoq htoq shit é nghut lê; haû nghut jáng, nga-nhûng hkâsu nghû taî râ lú? Nga-nhûng lé Garai Gasang nhikmo-yô é hkyô gi, Yhang a tarâ mù nghut lê lú? (Ngò gi, byù hkyam đông taî htîng é nghut lê.)

<sup>6</sup> Ratsuí lhang a nghut! Haû su ru nghut le gi, haû mingkan lé, Garai Gasang hkâsu wó jéyáng râ lú?

<sup>7</sup> Rayuq yuq, "Ngò mhaû é hkyô gi, Garai Gasang tengmán é hkyô lé lhoq ko jat mù, Yhâng é hpungwup shîngkang lé je wó lhoq hu nhang é nghut le nhîng, haî mù luí, ngò, yubak byù rayuq đông mara byi é hui zô nyi ra shirâ lú?" ga taî dang-rháng râ nghut lê.

<sup>8</sup> "Ge é hkyô htoq sháng gaq, nga-nhûng, agè ashop hkyô kut sháng." nghû haî mù a taî kô é lú? Dang haû lé ngamoq taî é nghut lê ga luí, ngamoq lé lumù gansang é đông byù ra-am taî akô. Haû bang gi, mara dam byi é hui zo gîng bang nghut akô.

#### *Dingmán Byù A Nyi*

<sup>9</sup> Haû jáng, hkâsu nghû lo râ lú? Nga-nhûng gi, je gè bang nghut lê lú? Ratsuí lhang a nghut. Yudaq byù nghut nghut, tungbàu pé nghut nghut, yubak mara hkaû mâ é bang chyat nghut lê nghû, ngamoq taî san kyô wú bê nghut lê.

<sup>10</sup> Chyúmdang má kâ tô é le,

"Dingmán é byù a nyi, rayuq lhang a nyi nghut ri;

<sup>11</sup> Sê gyô é byù rayuq le a nyi, Garai Gasang lé ho é byù le a nyi nghut ri;

<sup>12</sup> Lhunglhang bang gi, lhing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sù ó a nyi, rayuq lhang a nyi nghut ri."\*

gâ ri.

<sup>13</sup> "Yhangmoq é hkyung gi, hpông tô é lup pé nghut akô; yhangmoq é shô gi, mhaû akô."\*

"Yhangmoq é nhutwuí pé má gi, shîduq bò lhangmuí é duq dap bum ri."\*  
gâ tô ri.

14 "Yhangmoq é nhut pé gi, nhing myíng nhing htê eq myit nó danghko bau byíng zan tô ri."✠

gâ tô ri.

15 "Yhangmoq é hkyî pé gi, byù sat sui lhoq htoq râ matú, lawán nau akô;

16 Yhangmoq sô nyi é hkyô pé gi, htên byoq é eq wuíhkê é ahkô tông tô é nghut mù,

17 nguínón é hkyô lé gi, yhangmoq a sé kó nghut ri."✠

gâ tô ri.

18 "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri."✠

gâ tô ri.

19 Byù yuq hkanmó é nhut gi, tû táí jang a joq dut byuq mù, mingkan gón gi, Garai Gasâng é hí má mara bo é bang dut nyi sháng gaq ga, haù jep é tarâ má taí é lhunglháng gi, jep é tarâ ô má nyi é bang lé taí é nghut é hkyô lé, nga-nhúng sê lhê.

20 Haù mù luí, jep é tarâ lé châng é đông mai, ó yuq le, Yhâng é hí má dingmán sú gâ é wó hui râ a nghut; jep é tarâ đông gi, yubak mara bo é hkyô lé wó sê yu é za nghut lhê.

### *Lumjínng Jáng, Dingmán Sû Wó Dut É Hkyô*

21 Ahkuí kúm gi, jep é tarâ đông a nghut é za, haù jep é tarâ eq myiqhtoi laiká pé mai saksé hkâm tô é Garai Gasâng chyáng má é dingmán hkyô lé, sé nhâng bê nghut ri.

22 Garai Gasâng chyáng má é dingmán hkyô haù gi, Yesuq Hkrisduq lé lumjínng é đông mai nghut mù, lumjínng bang banshoq htoq má jé é nghut lhê. Gamhkuí é hkyô a joq.

23 Hkâsu mù gâ le, lhunglháng bang gi, yubak mara kut shut bê bang chyat nghut mù, Garai Gasâng é hpungwup shingkanng lé a hkyit hkap byuq lo kó nghut ri.

24 Ahkuí kúm gi, Hkrisduq Yesuq mai lo é hkyi yù hkyô đông, Garai Gasâng é jejû èq, mara hkyut san byí é laí laí wó hui bê nghut ri.

25 Garai Gasang gi, Yesuq é sui lé lumjínng bâng matú, shíhtaí gunglik hkungga ralhum đông, Yesuq lé byí pyám bê nghut ri.

Haù gi, laí lò bê yubak mara lé lhut pyám byi shoq, Garai Gasang myit hîng byi bê nghut é yanmai, Yhâng é tengmán hkyô lé tûn shit é nghut ri.

26 Garai Gasang haù su kut é gi, Yhânggùng yhang dingmán Sû nghut é eq, Yesuq lé lumjínng é sù lé mara hkyut san byí é Sû nghut râ matú, ahkuí lhê ipyat má, Yhâng é tengmán hkyô lé shit byí é nghut lhê.

27 Haù su nghut jáng, nghutbun jowò joq ri lúhú? A joq. Hai tarâ mai a joq dut byuq é lúhú? Haù jep é tarâ châng é yanmai nghut lhê lúhú? A nghut, lumjínng hkyo é yanmai sheq a joq dut byuq é nghut lhê.

28 Hkâsu mù gâ le, byù gi, haù jep é tarâ châng é đông a nghut é za, lumjínng luí, mara hkyut san byi hui é hkyô lé, ngamoq lum nyi lhê.

29 Garai Gasang gi, Yudaq byu pé é Garai Gasang za nghut lhê lúhú? Túngbaù pé é Garai Gasang le a nghut lúhú? Nghut lhê, túngbaù pé é Garai Gasang le nghut lhê.

30 Hkâsu mù gâ le, Garai Gasang gi, rayuq za nghut é yanmai, rajung za lumjínng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê.

31 Haù nghut jáng, nga-nhúng gi, lumjínng myit hau eq, jep é tarâ lé lhoq hpoi pyám râ lúhú? Ratsuí lháng a nghut! Nga-nhúng gi, jep é tarâ haù lé lhoq ging tîng é bang ru nghut lhê.

## 4

### *Abraham, Mara Hkyut San Hui É Hkyô*

1 Haù su nghut jáng, nga-nhúng é íchýí íwa Abraham gi, haù hkyô mai haí wó sê yu ri nhú, taí râ lúhú?

2 Abraham gi, zui saí é đông mai, mara hkyut san byi hui é ru nghut le gi, yhang nghutbun jang joq râ nghut lhê; nghut kôlháng, Garai Gasâng é hí má gi, yhang haù đông a nghut.

3 Chyúmdang má hkâsu gâ tô ri lúhú gâ le, "Abraham gi, Garai Gasang lé lumjínng bê nghut mù, yhang lé, dingmán sú ga són byi bê nghut ri."✠ gâ ri.



4 Zui saî é sù gi, yhâng é zuihpau lé, chyunghuq dông wó yu é a nghut é za, wó yû gíng luí, wó yu é ru nghut lhê.

5 Nghut kôlhang, zui saî é hkyô dông a nghut é za, haû agè ashop hkyô lé mara hkyut san byî é Garai Gasang lé lumhkau é sù gi, yhâng é lumjínng myit é yanmai, dingmán sù ga són byi huí é nghut lhê.

6 Haû eq rajung za, yhang zui saî é hkyô dông a nghut é za, Garai Gasâng eq dingmán sù ga són byi huí é, Garai Gasâng chyáng mâ é shimân jeju wó é sù eq séng luí, Dawiq taí é gi,

7 "Tarâ lu lai é lé mara hkyut pyám byi huí é eq yubak mara lé nghop pyám byi huí é bang gi, hkungsô wó nyi ri.

8 Bo tô é mara lé, Yhumsing eq mara a són byî é hui sù gi, hkungsô wó nyi ri."✧  
gâ ri.

9 Haû sù é jeju gi, ahpyo-kuq hpyit hkâm bâng é matú za nghut lhê lú? Ahpyo-kuq a hpyit bâng é matú le nghut lhê lú? Hkâsu mù gâ le, Abraham é lumjínng myit lé, dingmán sù ga són byi bê nghut lhê nghû, ngamoq taí nyi bê nghut lhê.

10 Haû su són byî é gi, hkâ-nhám nghut lhê lú? Ahpyo-kuq hpyit hkâm é htâng má lú? A nghut jáng, hí má lú? Haû gi, ahpyo-kuq hpyit hkâm é htâng má a nghut é za, hí má ru nghut lhê.

11 Hau htoq agó, Abraham gi, yhang, ahpyo-kuq hpyit a hkam yù shî é hkûn mai, lumjínng luí wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haû mù, yhang gi, haû ahpyo-kuq hpyit a hkam yù kôlhang, lumjínng é lhunghâng bang lé dingmán bang ga són byî é wó hui râ matú, haû bâng é îwa dut bê nghut ri.

12 Haû ahpyo-kuq hpyit hkâm é za a nghut, nga-nhûng é îwa Abraham, ahpyo-kuq hpyit a hkam yù shi má wó é lumjínng hkyo é hkyî-kám lé cháng luí ahpyo-kuq hpyit bâng é îwa le, yhang nghut ri.

13 Mingkân é amyû hkûng xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a

nghut é za, lumjínng hkyô mai lo é dingmán hkyô dông ru nghut lhê.

14 Hkâsu mù gâ le, jep é tarâ dông nyi yap é bang gi, amyû hkûng xoq pé nghut é nghut jáng, lumjínng hkyô gi, akyû a bo é eq, danggidiq gi, hpau a dap é dut byuq lhê.

15 Haû jep é tarâ gi, nhikmo-yo hkyô lhoq htoq é nghut lhê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

16 Haû mù luí, danggidiq gi, Abraham é awut ashín lhunghâng bâng chyáng, jeju mai za lo é eq gíngtíng nyi é dut sháng gaq ga, lumjínng hkyô mai lo é nghut lhê. Haû gi, jep é tarâ má lòm bâng é matú baú za a nghut, Abraham é lumjínng hkyô má lòm bâng é matú le nghut lhê. Abraham gi, nga-nhûng lhunghâng bâng é îwa nghut ri.

17 "Ngò gi, nang lé, byù myû myo myô é îwa dut nhâng bê."✧ ga kê tô é eq rajung za, haû shi byuq bê bang lé wó lhoq dui é eq a joq wú é zè lé joq shoq wó kut é, yhang lumjínng é sù Garai Gasâng hí má, Abraham gi, nga-nhûng é îwa nghut lhê.

18 "Náng é awut ashín pé le, haû eq rajung za myô lò râ nghut lhê."✧ ga yhang lé taí kyô to bê eq rajung za, yhang gi, myit myoqbyù jowò haí a joq kôlhang, lumjínng luí myoqbyu nyi é nghut mù, byù myû myo myô é îwa dut bê nghut ri.

19 Yhang gi, rashô zàn kê jé byuq bê nghut mù, yhânggùng gi, shi é gyá dut é hui zô é eq Sarah é zoyhûm shibó le shum byuq kôlhang, yhang gi, lumjínng myit a yom byuq nghut ri.

20 Hau htoq agó, Garai Gasâng é danggidiq eq séng luí, a lumjínng a dut é eq hê myit mhô myit a dut é za, yhâng é lumjínng myit lé saî lhoq gíng tíng mù, Garai Gasang lé hkya-on kungtôn luí,

21 Garai Gasang gi, Yhang byî tô é danggidiq eq rajung za wó kut râ a-tsam bò sù nghut é lé, yhang myit zing nyi ri.

22 Hau é yanmai, "Yhang lé, dingmán sù ga són byi bê nghut ri."✧ gâ tô é nghut lhê.

23 "Yhang lé, són byi bê." ga, kê tô é dang gi, yhang é matú za a nghut,

24 nga-nhûng é Yhumsing Yesuq lé, shi é mai lhoq dui toq yû sù Garai Gasang lé

lumjínq luí, Yhang éq dingmán bang ga són byi râ nghut é, nga-nhúng é matú le nghut lhê.

<sup>25</sup> Yhumsíng Yesuq gi, nga-nhúng é yubak marâ é matú, shî hkám byi râ dông ap pyâm é hui luí, nga-nhúng, mara hkyut san byi é hui râ matú, lhoq dui toq é hui bê nghut ri.

## 5

### *Nguingón Hkyô Eq Gabú Hkyô*

<sup>1</sup> Haú mù luí, nga-nhúng gi, lumjínq é dông mai mara hkyut san byi é hui bê nghut é yanmai, nga-nhúng é Yhumsíng Yesuq Hkrisduq dông, Garai Gasang eq buinùm wó xoq yú bê nghut lhê.

<sup>2</sup> Yesuq é yanmai, nga-nhúng gi, ahkuí wó yu to bê jeju shî má, lumjínq luí wó wâng bê nghut mù, Garai Gasâng é hpungwup shing kang lé myoqbyù luí gabú gumrong nyi lhê.

<sup>3</sup> Haú za a nghut, nga-nhúng gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri;

<sup>4</sup> hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê.

<sup>5</sup> Myoqbyu to hkyô haú gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhúng lé byi tô é Chyoiyúng Woi-nyí dông, nga-nhúng é i-myit unghkaú má hut kat byi bê nghut ri.

<sup>6</sup> Hkâsu mù gâ le, nga-nhúng gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shî hkám byi bê nghut ri.

<sup>7</sup> Gè gè ga jáng, dingmán su é matú shî hkám byi râ byù gi, shau râ nghut lhê; nghut kôlhang, byù gè rayuq é matú kúm gi, wám shî hkâm é byù nyi sê lhê.

<sup>8</sup> Nghut kôlhang, nga-nhúng gi, yubak dap bang nghut nyi ashî hkûn, nga-nhúng é matú Hkrisduq shî hkám byi é má, Garai Gasang gi, Yhâng é chyitdap myit, nga-nhúng lé shit byi bê nghut ri.

<sup>9</sup> Nga-nhúng gi, ahkuí, Yhâng é sui mai mara hkyut san byi é hui bê nghut mù, Yhâng é yanmai, Garai Gasâng é nhikmo-yo

hkyô mai, hkyi yu é je riyhang hui râ nghut lhê.

<sup>10</sup> Hkâsu mù gâ le, nga-nhúng gi, Garai Gasâng é gyè pé nghut nyi ashî u le, Yhâng Zo shî hkám byi é dông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu é hui râ nghut lhê.

<sup>11</sup> Haú su za a nghut, nga-nhúng gi, nga-nhúng é Yhumsíng Yesuq Hkrisduq dông mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai Gasang má le, gabú gumrong nyi lhê.

### *Shi É Gi, Adam É Yanmai, Dui É Asak Gi, Hkrisduq É Yanmai*

<sup>12</sup> Byù rayuq dông mai, yubak mara gi, mingkan má jé wâng bê nghut luí, shî-nò hkyô gi, yubak marâ é yanmai châng jé bê nghut ri; haú dông mai, byù lhunghâng bang gi, yubak dap bang chyat nghut byuq mù, shî-nò hkyô gi, byù lhungháng bâng chyáng jé bê nghut ri.

<sup>13</sup> Hkâsu mù gâ le, haú jep é tarâ lé a byi shimá, yubak mara gi, mingkan má joq to bê nghut lhê. Nghut kôlhang, jep é tarâ a joq shî é hkûn gi, yubak mara lé mara su a ngàm shî é nghut lhê.

<sup>14</sup> Haú su ga kôlhang, Adam su hkunmó lé lu laí é dông mara a kut shut bâng é ahtoq má lhang, shî-nò hkyô gi, Adam é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azông nghut ri.

<sup>15</sup> Nghut kôlhang, jeju chyunghuq gi, haú mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-i yhang byíng mui nyi ri-nhung!

<sup>16</sup> Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byi é hkyô lhoq htoq é nghut lhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê.

17 Hau htoq agó, byù rayuq tarâ lu lai luí, haú rayuq é yanmai, shî-nò hkyô up nyi bê nghut lhê, ahkuí kúm, haú Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak dui hkyô má uphkanq nyi kó râ nghut lhê.

18 Haú mù luí, tarâ lu lai é hkyô ralhûm é yanmai, byù lhunghâng bang gi, mara dam byí é hui zo kô é su, dingmán hkyo é muzó ralhûm é yanmai, byù lhunghâng bang gi, asak dui hkyô eq sêng é mara hkyut san byi hkyô lé wó bê nghut ri.

19 Hkâsu mù gâ le, byù rayuq jìno a gyô é yanmai, myo myo gi, yubak dap bang dut byuq é su, byù rayuq jìno gyô é yanmai, myo myo gi, dingmán bang gâ é hui kó râ nghut lhê.

20 Haú jep é tarâ jat é gi, tarâ lu lai hkyô je myo rá matú nghut lhê. Nghut kôlhâng, yubak mara myô jat é hkûn, jeju gi, je riyhang myô jat lo é nghut lhê.

21 Haú mù, yubak mara gi, shî-nò hkyô dông uphkâng bê su, jeju gi, nga-nhúng é Yhumsing Yesuq Hkrisduq é yanmai, ah-tum abyuq é asak wó byí é dingmán hkyô dông up râ nghut lhê.

## 6

### *Hkrisduq Eq Rading Ralhum*

1 Haú nghut jáng, nga-nhúng gi, hkâsu nghû tái râ lú? Jeju myô jat lò sháng gaq nghû, nga-nhúng, yubak mara kut xoq nyi râ lú?

2 Haú su a nghut sháng gaq! Nga-nhúng gi, yubak mara eq shi gang bê bang nghut lhê; hkâsu mù haú má wó dui nyi lo râ lú?

3 Hkrisduq Yesuq eq rading ralhum za dut râ matú, wui-myhup hkâm yù bê bang nga-nhúng banshoq gi, Yhâng é shî hkám hkyô má le rading ralhum za dut râ matú, wui-myhup hkâm yù bê nghut é lé, nungmoq a sé kó lú?

4 Haú mù luí, Hkrisduq gi, Íwâ é hpung-wup shingkâng èq, shî bê mai lhoq dui toq huí é su, nga-nhúng le, asak asik dông wó dui nyi sháng gaq nghû, nga-nhúng gi, wui-myhup hkâm é dông, Yhang eq rahá, shî hkâm é eq myhup yhum é hui bê nghut lhê.

5 Nga-nhúng gi, Yhang shî hkám é hkyô má, Yhang eq rading ralhum za dut bê nghut jáng, Yhâng é dum dui toq hkyô má le, Yhang eq rading ralhum za hkyak dut râ nghut lhê.

6-7 Hkâsu mù gâ le, shî bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui râ matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lhê.

8 Haú mù, nga-nhúng gi, Yhang eq rahá shî hkám bê nghut jáng, Yhang eq rahá dui nyi râ nghut lhê nghû, lumjínq lhê.

9 Hkâsu mù gâ le, Hkrisduq gi, shî bê mai lhoq dui toq é hui bê nghut mù, Yhang gi, dum wó shi lo râ a nghut é lé, nga-nhúng sê lhê; shî-nò hkyô gi, Yhang lé hkâ-nhám le wó sing to râ a nghut lo.

10 Yhang shî hkâm é shî-nò hkyô gi, banshoq bâng é matú, yubak mara eq séng luí radàm za shî hkám byi bê nghut ri; nghut kôlhâng, Yhang dui nyi é asak gi, Garai Gasâng hí má dui nyi é nghut lhê.

11 Haú eq rajung za, nungmoq gi, yubak mara eq shi gang luí, Hkrisduq Yesuq dông Garai Gasâng é matú asak dui nyi lhê nghû, sôn yù keq.

12 Haú mù luí, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê.

13 Nungmoq é gungdu showui showang pé lé, agè ashop hkyo é chùng zè pé dông yubak mara má hkâ-ap byí pyám kó, shî bê mai lhoq dui toq yú huí é bang su, yhumsing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyo é chùng zè pé dông, Garai Gasâng chyáng ap byi keq.

14 Hkâsu mù gâ le, nungmoq gi, jep é tarâ hkaú má a nghut lô é za, jeju hkaú má nghut nyi bekô yanmai, yubak mara gi, nungmoq lé sîng sù wó dut râ a nghut lo.

*Dingmán Hkyo É Jùn Pé*

15 Haû jáng gi, hkâsu kó l hú? Nga-nhúng gi, jep é tarâ hkaû má a nghut lo é za, jeju hkaû má nghut nyî bekô yanmai, mara wó kut shut kó râ l hú? Haû su a wó kut!

16 Nungmoq gi, rayuq yuq é jîno gyo râ matú, yhumsing gùng lé jùn pé dông ap pyâm é hkûn, shî-nò hui râ nghut é yubak marâ é jùn dông nghut kôlhang, dingmán hkyô wó râ nghut é jîno gyo hkyô nghut kôlhang, nungmoq châng nyi é nghut le gi, nungmoq, haû é jùn dut bê lé, a sé kó l hú?

17 Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklum banshoq èq châng bekô nghut é yanmai, Garai Gasang lé jeju hkya-on sháng.

18 Nungmoq gi, yubak mara mai lhoq lhut é hui bang nghut kô mù, dingmán hkyô é jùn dut bekô nghut ri.

19 Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn dông l háng ap byí wú bekô nghut é su, ahkuí gi, chyoiyúng hkyô wó yû râ matú, haú pé lé, dingmán hkyô má jùn dông ap byi keq.

20 Nungmoq gi, yubak marâ é jùn dut nyi kô é hkûn, dingmán hkyô èq uphkang é mai lut nyi kô é nghut lhê.

21 Ahkuí, nungmoq hoqjung nghû wú htoq é pé gi, haú u lé, hai akyû wó yû kô é l hú? Hau pé gi, shi byuq é má htûm é chyat nghut ri.

22 Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasang é jùn dut bekô nghut ri; hau é akyû gi, chyoiyúng hkyô wó yu é nghut mù, ahtum abyuq é asak wó râ nghut lhê.

23 Hkâsu mù gâ le, yubak marâ é ah-pau gi, shi é hkyô nghut ri; nghut kôlhang, Garai Gasang é chyunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nghut ri.

## 7

### *Tarâ Mai Lut É Hkyô*

1 Gumang wuê, ngò gi, tarâ lé sê é bang nungmoq lé tái nyi lhê: haû tarâ gi, byù rayuq lé, yhang, asak dui nyi é u lé za wó uphkang é lé, nungmoq a sé kó l hú?

2 Dangké, ikun wàng bê myiwe myhí rayuq gi, yhang é yhumsing hpó asak dui nyi é ahkyíng má, tarâ eq up zing tô é hui ri; nghut kôlhang, yhang é yhumsing hpó shi byuq é nghut jáng gi, haû ikun wàng tarâ mai, yhang wó lut bê nghut ri.

3 Haû nghut é yanmai, yhang é yhumsing hpó asak dui nyi ashî u lé, yuqgè góyuq eq hâng lhûm é nghut jáng gi, yhang lé, sulàng lú sù ga kó râ nghut lhê. Nghut kôlhang, yhang é yhumsing hpó shi byuq é nghut jáng gi, yhang, tarâ haû mai lut bê nghut lui, yuqgè góyuq eq hâng lum kôlhang, sulàng lú sù a nghut lo.

4 Haû mù lui, ngá é gumang wuê, nungmoq le, haû shi byuq é mai lhoq dui toq yù hui bê sù Yuqgè chyáng wó xoq mù, nga-nhúng gi, Garai Gasang lé ashî wó zui byi sháng gaq ga, Hkrisduq é gungdu dông mai, jep é tarâ eq shi gang bê nghut lhê.

5 Hkâsu mù gâ le, nga-nhúng, yubak gungsho má nghut nyi é hkûn, nga-nhúng gi, shî-nò hkyô é ashî zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê.

6 Nghut kôlhang, ahkuí gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau dông a nghut é za, Woi-nyí é hkyô sik dông nga-nhúng dojaú nyi é nghut lhê.

### *Jep É Tarâ Eq Yubak Mara*

7 Haû jáng, nga-nhúng hkâsu tái râ l hú? Jep é tarâ gi, yubak mara nghut lhê l hú? Ratsuí l háng a nghut! Gè gè ga jáng, haû jep é tarâ dông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"✧ ga jep é tarâ má a tái tô é nghut jáng, myoqnoq é hkyô lé, ngò sé râ a nghut.

8 Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkangmó lhoq htoq byí ri; hkâsu

mù gâ le, jep é tarâ hkaû má a nghut jáng, yubak mara gi, shi é za nghut lhê.

<sup>9</sup> Ngò gi, tarâ hkaû má a nghut é za asak dui wú bê nghut lhê; nghut kôlhang, haû hkunmó htoq lô jáng, yubak mara gi, dui lò mù, ngò gi, shi bê nghut lhê.

<sup>10</sup> Haû mù luí, asak dui nhâng râ matú nghut é hkunmó haû gi, shi-nò hkyô dut byuq é lé, ngò wó sê é nghut lhê.

<sup>11</sup> Hkâsu mù gâ le, yubak mara gi, hkunmó é ahkáng lé chùng mù, ngo lé mhaû yù luí, hau eq ngo lé shi nhang ri.

<sup>12</sup> Hau pé lé wú jáng, jep é tarâ gi, chyoiyúng ri; haû hkunmó gi, chyoiyúng, dingmán é eq ge é nghut ri.

<sup>13</sup> Haû nghut jáng, ge é hkyô haû gi, ngá é matú shi-nò hkyô dut byuq bê lúh? Haû dông a nghut! Nghut kôlhang, yubak mara lé gi, yubak mara dông hkyak wó lhoq htoq shit râ matú, haû ge é hkyô dông mai, yubak mara gi, ngò má shi-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó dông mai tân shit é nghut lhê.

<sup>14</sup> Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn dông ung zô é hui bê nghut lhê.

<sup>15</sup> Ngò haí kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê.

<sup>16</sup> Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê.

<sup>17</sup> Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê.

<sup>18</sup> Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haû lé a wó kut htoq nghut ri.

<sup>19</sup> Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri.

<sup>20</sup> Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a

nghut lo é za, ngò má lúng tô é haû yubak sheq haû lé kut nyi é ru nghut lhê.

<sup>21</sup> Haû mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri.

<sup>22</sup> Hkâsu mù gâ le, ngò gi, Garai Gasâng é tarâ lé, ngá é i-myit unghkaû má myit ngui gabú nyi lhê.

<sup>23</sup> Nghut kôlhang, ngá é gungdu showui showang pé má bo é gotû tarâ gi, ngá é i-myit tarâ eq majan zân lhùm é nghut luí, ngá é gungdu showui showang hkaû má mú zui nyi é yubak é tarâ má, ngo lé shúmbyû dut nhang é lé, ngò myang ri.

<sup>24</sup> Ngò gi, shogyo rayhup dut sù nghut ri-nhung! Shi nhang é gungdu shi mai, ó yuq wá, ngo lé wó hkyi yù râ lúh?

<sup>25</sup> Nga-nhúng é Yhumsing Yesuq Hkrisduq dông mai wó lut bê nghut mù, Garai Gasang lé jeju hkya-ôn nyi lhê!

Haû mù luí, ngò yhang, myit é dông gi, Garai Gasâng é tarâ lé châng lhê, nghut kôlhang, yubak gungsho dông gi, yubak é tarâ lé châng lhê.

## 8

### *Haû Woi-nyí Mai Asak Dui É Hkyô*

<sup>1</sup> Haû mù luí, ahkuí, Hkrisduq Yesuq má nghut nyi bâng é matú gi, mara byí é hkyô a joq lô é nghut lhê.

<sup>2</sup> Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq dông, yubak mara eq shi-nò hkyô é tarâ mai, ngo lé lhoq lhut yù bê nghut lhê.

<sup>3</sup> Haû jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gungghyâng dông, Yhang Zo sîng lé nhang kat é dông kut pyám bê nghut ri.

<sup>4</sup> Haû mù, Garai Gasang gi, yubak gungsho dông asak a dui é za Woi-nyí dông asak dui bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhum má, mara lé doqdân pyám bê nghut ri.

<sup>5</sup> Haû yubak gungsho dông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí dông asak

dui é bang kúm gi, Woi-nyí ô nau é hkyô pé lé myit zuq nyi akô nghut ri.

<sup>6</sup> Haû yubak byu é myit gi, shi é hkyô nghut ri; haû Woi-nyí èq hkang to huí su é myit kúm gi, asak eq ngingón hkyô nghut ri.

<sup>7</sup> Haû yubak myit gi, Garaí é tarâ ô má a nyi é htoq agó, haû lé a wó cháng kut é yanmai, Garaí é gyè nghut ri.

<sup>8</sup> Haû yubak gungshô èq hkang tô é hui bang gi, Garaí Gasang lé a wó gabú nhâng kó nghut ri.

<sup>9</sup> Nghut kôle, Garaí Gasâng é Woi-nyí gi, nungmoq chyáng lúng nyí bê nghut jáng, nungmoq gi, haû yubak gungshô èq hkang to huí é bang a nghut lô é za, Woi-nyí èq hkang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê.

<sup>10</sup> Nghut kôlhang, nàng má Hkrisduq nyi nyi é nghut jáng, nàng é gungdu gi, yubak marâ é yanmai shí kôlhang, nàng é woi-nyí gi, dingmán hkyo é yanmai dui nyi ri.

<sup>11</sup> Hau htoq agó, Yesuq lé shi é mai lhoq dui toq yû Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yû Sû gi, nungmoq má nyi nyi é, Yhâng é Woi-nyí dông mai, nungmoq é, shí sê é gungdu pé lé le, asak dui nhâng râ nghut lhê.

<sup>12</sup> Haû mù luí, Gumang wui ê, nga-nhúng gi, yubak gungsho dông asak dui râ matú, wò wó é bang a nghut.

<sup>13</sup> Hkâsu mù gâ le, haû yubak gungsho dông asak dui kô é nghut jáng, nungmoq gi, shí râ nghut lhê; nghut kôlhang, haû gungshô é shut shaí hkyô lé, Woi-nyí èq sat pyám kô é nghut jáng, nungmoq gi, asak dui râ nghut lhê.

<sup>14</sup> Garaí Gasâng é Woi-nyí èq shuî u é hui bang gi, Garaí Gasâng é yhangzô pé nghut lhê.

<sup>15</sup> Hkâsu mù gâ le, nungmoq gi, gyuq râ matú, nungmoq lé jùn dum taû dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é

yanmai, "Aba,\* Âwa ê" nghu wut é nghut lhê.

<sup>16</sup> Nga-nhúng gi, Garaí Gasâng é yhangzô pé nghut é lé, Woi-nyí haû gi, nga-nhúng é woi-nyí eq rahá saksé hkâm nyi ri.

<sup>17</sup> Ahkuí, nga-nhúng gi, zo wui nghut bê yanmai, Hkrisduq eq rahá, Garaí Gasâng é amyû hkûngxoq pé wó dut é nghut lhê. Nga-nhúng gi, Hkrisduq é wuihke jamjau pé lé, gè gè yhang bo huí zô é nghut jáng, Yhâng é hpungwup shing kang lé le, bo myang hkam yû râ nghut lhê.

### *Htàngnùng Lhê É Hpungwup Shing kang*

<sup>18</sup> Nga-nhúng é ahkuí lhê é wuihke jam-jau hkyô pé gi, nga-nhúng lé shit râ nghut é hpungwup shing kang eq whuí râ a gingdán nghu, ngò wó myit ri.

<sup>19</sup> Haû hpan to huí é lhunglhang gi, Garaí Gasâng é yhangzô pé lé lhoq htoq shit byi râ lé, gyai yhang myit lánng nyi akô nghut ri.

<sup>20</sup> Hkâsu mù gâ le, haû hpan to huí é lhunglhang gi, akyû a bo é chyat dut byuq bê nghut ri. Haû gi, yhumsing hkyin yu é dông a nghut é za, haû su dut nhâng Sû ô nau é dông kut é nghut ri.

<sup>21</sup> Haû hpan to huí é lhunglhang gi, htên byoq byuq râ matú shúm dut é mai lhoq lhut é hui luí, Garaí Gasâng é yhangzo pé é hpungwup bo é luthkyô má wó wâng râ matú, myoqbyu tô é nghut lhê.

<sup>22</sup> Haû hpan to huí é lhunglhang gi, ahkuí hkying jé shoq, zohkû-nò no é su nò-kying kying nyi kô é lé, nga-nhúng sê lhê.

<sup>23</sup> Haû pé za a nghut, Woi-nyí é sâng-hi ashi† lé wó yû bê bang nga-nhúng le, zo pé dông yín yu é jeju lé lánng uchyang, i-myit unghkaû má nò-kying kying é nghut lhê. Zo pé dông yín yu é jeju haû gi, nga-nhúng é gungdu hkyi xe yû hkyô nghut lhê.

<sup>24</sup> Hkâsu mù gâ le, nga-nhúng gi, myit myoqbyu hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bê é lé, ó yuq wá myit myoqbyu shirâ lú?

\* **8:15** *Aba* gâ é gi, Aramaik dang dông "âwa" gâ é lichyúm nghut lhê. † **8:23** *Woi-nyí é sâng-hi ashi* gâ é gi, Woi-nyí gi, Garaí Gasang byí é chyunghuq pé mâ é sâng-hi lhum nghut lhê.

<sup>25</sup> Nghut kôlhang, nga-nhúng gi, a wó shí é lé myit myoqbyu é nghut jáng, myit hîng hîng kut lánng é nghut lhê.

<sup>26</sup> Haû eq rajung za, Woi-nyí gi, nga-nhúng wum nyhôm é hkyô má garúm byí ri. Nga-nhúng gi, haî dung râ é lé a sé kôlhang, haû Woi-nyí yhang gi, dang mai a wó taí htoq é nò-kying htê đông, nga-nhúng é matú bo dúng xoq byí ri.

<sup>27</sup> Nga-nhúng é i-myt unghkaû lé gôn wú é Sû gi, haû Woi-nyí myit é hkyô lé sê lhê, hkâsu mù gà le, haû Woi-nyí gi, Garai Gasang ô nau é đông, sân-yúng bâng é matú bo dúng xoq byí ri.

### *Banshoq Lé Je Wó Ung Pyám Râ Hkyô*

<sup>28</sup> Garai Gasang gi, Yhang myit sôn tô é eq rajung za, ji yù luí, Yhang lé chyitdap bâng é matú, lhunglhang lé ge é đông chyat kut é hkyô lé, nga-nhúng sê lhê.

<sup>29</sup> Hkâsu mù gà le, Yhang Zo gi, gumang wui myo myo má zomún dut shâng gaq ga, Garai Gasang gi, hí te sê tô é bang lé, Yhang Zô é sâmlai eq wó pûng nhâng râ matú, hí mai masat to bê nghut ri.

<sup>30</sup> Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byí ri; mara hkyut san byí é hui bang lé gi, hpungwup shíngkang bò nhang ri.

<sup>31</sup> Haû jáng gi, shí hkyô eq séng luí, nga-nhúng haî taí shirâ lhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gye wám kut râ lhú?

<sup>32</sup> Yhumsing é Yhangzo lé lhang a ha bûn é za, nga-nhúng banshoq bâng é matú ap byí pyâm é Sû gi, Yhang lé le, lhunglhang lé le, rahá laí laí byi râ a nghut lhú?

<sup>33</sup> Garai Gasang eq hkyin yu to bê bang lé, ó yuq wá mara wó hûn râ lhú? Garai Gasang gi, mara hkyut san byi Sû nghut ri.

<sup>34</sup> Hkrisduq Yesuq gi, shí hkâm luí, shí hkâm é htoq agó, shí é mai lhoq dui toq yu é hui mù, Garai Gasang é loqyo hkyam má nghut nyí luí, nga-nhúng é matú bo dúng xoq byí nyi bê nghut é yanmai, ó yuq wá mara wó byi râ lhú?

<sup>35</sup> Hkrisduq é chyitdap myit mai, nga-nhúng lé, hai eq wá wó lhoq kang râ lhú?

Gunjang huí é hkyo eq luq? Wuîhke huí é hkyo eq luq? Zing-ri huí é hkyo eq luq? Mutmó huí é hkyo eq luq? Gùng chín dut huí é hkyo eq luq? Gyuq jung eq luq? Sham eq luq?

<sup>36</sup> Haû gi,

"Náng é yanmai, ngamoq, nyí wui sat pyâm é huí nyi ri;

sat râ matú nyhi tô é sau pé lé su, ngamoq lé myit pyâm akô."☆

ga kê tô é eq rajung za nghut ri.

<sup>37</sup> A wó lhoq kang; nga-nhúng lé chyitdap Su é yanmai, nga-nhúng gi, haû pé banshoq lé je wó ung pyâm é nghut lhê.

<sup>38</sup> Hkâsu mù gà le, shí kôlhang, byùn kôlhang, maumang lagyô pé nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, hai jung a-tsam pé nghut kôlhang,

<sup>39</sup> htoq tsáng mâ é nghut kôlhang, a-ô tsáng mâ é nghut kôlhang, hpan tô é gotû haî nghut kôlhang, nga-nhúng é Yhumsing Hkrisduq Yesuq má bo é Garai Gasang é chyitdap myit mai, nga-nhúng lé wó lhoq kang pyám râ a nghut nghû, ngò gi, hkyak wó sê yu ri.

## 9

### *Garai Gasang Hkyin Yu É Israelaq Byu Pé*

<sup>1</sup> Ahkuí, ngò gi, Hkrisduq má tengmán é dang taí râ; ngò a mhaû é lé, haû Chyoiyúng Woi-nyí gi, ngá é unghkaû myit má hkyak saksé hkâm nyi ri.

<sup>2</sup> Ngò gi, ngá é myit nhiklum má, gyai yhang yón kuq nyi é eq ayang hpuzô nyi lhê.

<sup>3</sup> Hkâsu mù gà le, ngò gi, ngá é byuhú, ngá é gumang wui é matú, nhîng é hui luí Hkrisduq eq gang le lhang gè râ su gà ri.

<sup>4</sup> Haû bang gi, Israelaq byu pé nghut lhê. Zo yín yú huí é hkyô le, hpungwup shíngkang le, dangshikaq pé le, tarâ lé myang hap yu é hkyô le, noqkuq yhûm má noqkuq é hkyô le, danggidiq pé lé le, yhangmoq wó yu akô nghut ri.

<sup>5</sup> Haû myìng hû é íchýí íwâ pé gi, yhangmoq é íchýí íwâ pé nghut luí, byu é hkyam đông gon jáng, Hkrisduq gi, yhangmoq amyû mâ é nghut ri. Yhang gi, lhunglhang

lé up é, ahtum abyuq hkya-on huí é Garai Gasang nghut ri! Amen.

<sup>6</sup> Haú gi, Garai Gasang é danggidiq akôm dut byuq bê nghú nau é a nghut. Hkâsu mù gà le, Israelaq byu pé banshoq bang gi, Israelaq byù akying chyat a nghut kó nghut ri.

<sup>7</sup> Abraham é awut ashín banshoq bang gi, yhang é zo wuí akying chyat nghú a wó taí é nghut lhê. Hau é malaí, "Isak dông mai lo é lé, nang é awut ashín nghú són byi râ nghut lhê." ✧ ga tô ri.

<sup>8</sup> Radông taí sháng ga jáng, gungsho mai hku é zo wuí gi, Garai Gasang é zo wuí akying a nghut kó, danggidiq eq sêng é zo wuí za sheq, Abraham é awut ashín pé dông són byí é nghut lhê.

<sup>9</sup> Hkâsu mù gà le, "Masat tô é ahkyíng má, ngò dum taú lé mù, Sarah gi, yuqzo hkú râ nghut lhê." ✧ ga taí tô é danggidiq é yanmai nghut lhê.

<sup>10</sup> Haú za a nghut, Rebeka é yhangzô nhiktang é íwa gi, nga-nhúng é íwa nghut su Isak rayuq za nghut lhê.

<sup>11-12</sup> Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gíng nyi sháng gaq ga, haú zozúm nhik a hku lé shí é htoq agó, ge é eq a ge é muzó haí lhang a kut shimá, "Haú ko sú yuq gi, tiq sú yuq lé dojaú râ nghut lhê." ✧ ga, Rebeka lé taí kyô tô é nghut lhê.

<sup>13</sup> Haú gi, "Yakup lé, ngò chyitdap lhê, nghut kôlhang, Eso lé gi, a ngui é nghut lhê." ✧ ga kê tô é eq rajung za nghut ri.

<sup>14</sup> Haú nghut é yanmai, nga-nhúng hkâsu nghú taí râ? Garai Gasang gi, a tarâ é sú nghut lhê lhú? Ratsuí lhang a nghut!

<sup>15</sup> Hkâsu mù gà le,  
"Ngò, shogyo nhikmyin naù sù lé, shogyo  
nhikmyin râ nghut lhê;  
Ngò, jeju byi naù sù lé, jeju byi râ nghut  
lhê." ✧  
ga, Mosheq lé Yhang taí ri.

<sup>16</sup> Haú mù luí, haú hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasang é shogyo nhikmyin é yanmai za nghut lhê.

<sup>17</sup> Hkâsu mù gà le, Chyúmdang má, "Náng chyáng Ngá é a-tsam wó tún shit râ eq mingkan gón má Ngá é myíng lhoq pyo é hui râ matú sheq, Ngò, nang lé lhoq toq kat é nghut lhê." ✧ ga, Hpara-uq lé taí ri.

<sup>18</sup> Haú mù luí, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

<sup>19</sup> Nungmoq mâ é rayuq yuq, "Haú jáng, Garai Gasang gi, ngamoq lé haí mù mara hun nyi ashí lhú? Yhang ô nau é hkyô lé, ó yuq wá wó hkúm pyâm lhê lhú?" ga, ngo lé taí kó râ nghut lhê.

<sup>20</sup> Nghut kôlhang, Garai Gasang lé dang tu sù byù nang gi, ó yuq wá nghut lhê lhú? Saí to hui bê é zè pé gi, "Nang, haí mù ngo lé shí su kut saí tô lhê lhú?" nghú saí é Sù lé wó taí râ lhú?

<sup>21</sup> Tso-au saí sù gi, tsohtung ralhum mai za, hkik é tso-au pé eq a hkik é tso-au pé saí râ ahkáng wó lhê a nghut kô lhú?

<sup>22</sup> Garai Gasang gi, Yhang é nhikmo-yo hkyô tún shit luí, Yhang é a-tsam lé sé nhâng naù kôlhang, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taí râ jang haí joq ashí lhú?

<sup>23</sup> Hpungwup shingkâng é matú noq mai hen to bang nghut é, Yhang shogyo nhikmyin huí é bang lé, Yhang é agùn agó é hpungwup shingkang lé sé nhâng naù mù, Yhang haú su kut é nghut jáng, taí râ haí joq ashí lhú?

<sup>24</sup> Haú bang gi, Yudaq byu pé mai za a nghut, tungbaù pé mai le ji yù huí é bang nga-nhúng nghut lhê.

<sup>25</sup> Haú eq rajung za, Hosea laiká má Yhang taí tô é gi,

"Ngá é byù myû a nghut é bang lé, 'Ngá é byù myû' nghú;

Ngò a chyit é byizo lé 'Ngò chyit sù' nghú wut râ nghut lhê." ✧

gâ ri.

<sup>26</sup> Haú mù,

"Nungmoq gi, ngá é byù myû pé a nghut.'  
nghú yhangmoq lé taí é jowò má yhang,



yhangmoq gi, 'Rû dui nyi é Garai Gasâng yhangzô pé' ga wut é hui kó râ nghut lhê."<sup>✧</sup>  
gâ ri.

<sup>27</sup> Esai-aq le, Israelaq byu pé eq séng luí garu taí é gi,

"Israelaq yhangzo yhangshû pé gi, wuìshuq lung-aû yàm mâ é semuì su myo kôlhang,  
myit gyó tô é bang za sheq hkyi yu é hui kó râ nghut lhê.

<sup>28</sup> Hkâsu mù gâ le, haû Yhumsîng gi, myidàm htoq má Yhâng é tarâ jéyáng hkyô lé hân hân lhoq dik lhoq htûm pyám râ nghut lhê."<sup>✧</sup>

gâ ri.

<sup>29</sup> Haû eq rajung za, hí lé Esai-aq taí tô é gi,

"A-tsam dik shoq bò sù haû Yhumsîng za, nga-nhúng lé, awut ashín a myhit to byí é nghut jáng,  
nga-nhúng gi, Sodom wà su dut byuq luí, Gomoraq myuq eq pung byuq râ nghut lhê."<sup>✧</sup>

gâ ri.

### *Israelaq Byu Pé A Lumjîng Kô É Hkyô*

<sup>30</sup> Haû mù, nga-nhúng hkâsu nghû taí râ l hú? Dingmán hkyô lé a châng hkat é tûngbaù pé gi, haú lé wó yù bekô; haû gi, lumjîng hkyo é yanmai wó yu é dingmán hkyô nghut ri.

<sup>31</sup> Nghut kôlhang, tarâ eq séng é dingmán hkyô lé châng hkat é Israelaq byu pé gi, haú lé a wó yù kó nghut ri.

<sup>32</sup> Haí mù a wó yù kô é l hú? Yhangmoq gi, lumjîng myit eq châng hkat kô é a nghut é za, muzó pé eq châng hkat kô é yanmai, a wó yù kô é nghut ri. Yhangmoq gi, "htung htê râ luqgok" má htûng leng bekô nghut ri.

<sup>33</sup> Haû,

"Wú keq, htûng leng râ luqgok eq myit leqbat nhâng râ luqmó cham lé, Ngò, Zi-un bùm má lheq to luí,

Yhang lé lumhkaû sù gi, hkâ-nhám le hoq hpu é hui râ a nghut."<sup>✧</sup>

ga kâ tô é eq rajung za nghut ri.

## 10

<sup>1</sup> Gumang wuì ê, ngò gi, haû Israelaq byu pé hkyi yu é hui kó sháng gaq nghû, gyai yhang myit shirông luí, Garai Gasâng chyáng yhangmoq é matú kyûdung byí nyi lhê.

<sup>2</sup> Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é dông a nghut kó.

<sup>3</sup> Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsîng dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaû má a nyi kó nghut ri.

<sup>4</sup> Hkrisduq gi, lumjîng bang yuq hkgangmó, dingmán é má wó jé kó sháng gaq ga, jep é tarâ ló htûm jang dut bê nghut ri.

<sup>5</sup> Mosheq gi, "Haú pé dông châng é sù gi, haú pé mai asak dui râ nghut lhê."<sup>✧</sup> ga, jep é tarâ eq séng é dingmán hkyô lé kâ sân kyô tô é nghut lhê.

<sup>6</sup> Nghut kôlhang, lumjîng hkyô eq séng é dingmán hkyô gi, "Náng é myit nhiklhum má, 'Mauhking má, ó yuq doq ló râ l hú?'<sup>✧</sup> (Haû gi, Hkrisduq lé shuì gyó lò râ gá nau é nghut lhê),

<sup>7</sup> haû a nghut jáng, 'Nik é jang má, ó yuq gyó wâng râ l hú?'<sup>✧</sup> (Haû gi, Hkrisduq lé, shi é mai dui toq nhâng râ gá nau é nghut lhê.), nghû hkâtaí kó." gâ tô ri.

<sup>8</sup> Haû jáng, hkâsu gâ tô ri l hú? "Haû mungdang gi, nàng eq chyâng nyi ri; náng é nhut má le, náng é myit nhiklhum má lé nghut nyi ri."<sup>✧</sup> gâ tô ri. Haû gi, ngamoq hko taí é lumjîng hkyô eq séng é mungdang nghut lhê.

<sup>9</sup> Haû mù, "Yesuq gi, Yhumsîng nghut ri." nghû náng é nhut eq yín yù mù, Garai Gasang gi, Yhang lé, shi é mai dui toq nhâng bê nghut lhê nghû, náng é myit nhiklhum má lumjîng é nghut jáng, nàng gi, hkyi yu é hui râ nghut lhê.

<sup>10</sup> Hkâsu mù gâ le, byù gi, myit nhiklhum má lumjîng jáng, mara hkyut san byí é hui

✧ 9:28 Esai 10:22-23 ✧ 9:29 Esai 1:9 ✧ 9:33 Esai 8:14; 28:16 ✧ 10:5 Nhung 18:5 ✧ 10:6 Tarâ Pun 30:12  
✧ 10:7 Tarâ Pun 30:13 ✧ 10:8 Tarâ Pun 30:14

mù, nhut mai yín yû jáng, hkyi yù huí é nghut lhê.

11 Haû Chyúmdang taí é gi, "Yhang lé lumhkau é sù ó yuq le, hkâ-nhám lhang hoq hpû é hui râ a nghut." ✧ gâ ri.

12 Hkâsu mù gâ le, Yudaq byù eq tûngbaù pé é gyoro má gam hkoq é hkyô hai le a joq é za, haû Yhumsing gi, banshoq bâng é Yhumsing nghut lhê mù, Yhang lé wut dung bang lhunglhang lé, agùn agó shimân byî ri.

13 Hkâsu mù gâ le, "Haû Yhumsing é mying lé lhang é bang yuq hkanmó gi, hkyi yu é hui râ nghut lhê." ✧ gâ tô ri.

14 Haû nghut lé gi, yhangmoq a lumjîng é sù lé nhîng, hkâsu wó wut dung kó râ lú? Yhangmoq a wó gyô wú é sù lé nhîng, hkâsu wó lumjîng kó râ lú? Hko kyô é sù a nyi le nhîng, hkâsu wó gyo kó râ lú?

15 Nhang kat é a hui le gi, yhangmoq hkâsu kut wó hko kyo kó râ lú? Haû eq rajung za, "Gabú danglù pé hko kyo bâng é hkyî-kám pé gi, hkâ-í yhang yúng ri myhi-nhung!" ✧ ga kê tô ri.

16 Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsing ê, ngamoq é danglù lé ó yuq wá lumjîng é lú?" ✧ ga taí ri.

17 Haû nghut mù luí, lumjîng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê.

18 Nghut kôlhang, ngò myi kó lé: yhangmoq gi, a wó gyô wú kô é nghut lhê lú? Yhangmoq gi, wó gyo gù za nghut lhê, haû eq rajung za,

"Yhangmoq é htê gi, myidàm htoq banshoq má jàm bê nghut ri;

yhangmoq é mungdang pé gi, mingkan htungchyûn hkanmó má jé bê nghut ri." ✧

gâ tô ri.

19 Ngò dum myi kó lé: Israelaq byu pé gi, a sê gyo kô é nghut lhê lú? Mosheq sângh-i má taí é gi,

"Byù rahú lhang a nghut bang èq, Ngò, nungmoq lé manôn nhâng râ; sê gyo nyan a bo é amyù èq, Ngò, nungmoq lé wú nhik-yo nhâng râ nghut lhê." ✧

gâ ri.

20 Hau htoq agó, Esai-aq a gyuq a wàm taí é gi,

"Ngo lé a ho é bang gi, Ngo lé myang hô bekô nghut ri;

Ngá hkyô lé a myí é bang lé, Ngò htoq shit bê nghut lhê." ✧

gâ ri.

21 Nghut kôlhang, Israelaq byu pé eq séng luí, Yhang taí é gi,

"Ngò gi, jîno a gyô é eq ngegáng-htu é byù myú lé, nyí wuí Ngá loq lham mù jî nyi lhê." ✧

gâ ri.

## 11

### *Israelaq Byu Pé Lé A He-ngik Pyám*

1 Haû mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lú? Ratsuí lhang a nghut! Ngò yhang le, Israelaq byù myú nghut luí, Abraham é awut ashín eq Ben-yamyin hú má é sù nghut lhê.

2 Garai Gasang gi, Yhang te sê to gû nghut é, Yhâng é byu pé lé a he-ngik pyám é nghut lhê. Eliyaq eq sêng é hkyô Chyúmdang má bo tô é lé, nungmoq a sé kó lú? Garai Gasâng é hí má, yhang, Israelaq byu pé lé mara hûn é gi,

3 "Yhumsing ê, yhangmoq gi, Náng é myiqhtoí pé lé sat pyám kô é eq Náng é hkungga gyap pé lé tu lhêng pyám akô nghut ri; ngò rayuq za myit gyó tô é nghut luí, ngo lé sat râ matú le yhangmoq ho nyi akô nghut ri." ✧ gâ ri.

4 Garai Gasang gi, yhang lé, hkâsu ga tú taí é nghut lhê lú? Haû gi, "Balaq hpara é hí má hkyihput a htuq shí é byù nyhit hkyíng lé, Ngá é matú myhit to lhê." ✧ gâ é nghut lhê.

5 Haû eq rajung za, ahkuí gi, jeju yanmai hkyin yù huí é bang za myit gyó tô é nghut lhê.

<sup>6</sup> Jeju yanmai nghut é nghut le gi, muzó é yanmai a nghut lo; muzó đông ru nghut le gi, jeju gi, jeju a nghut lo.

<sup>7</sup> Haû nghut jáng, hkâsu lhú? Israelaq byu pé gyai ho shikut kôlhang, a wó kô é lé, hkyin htoq yû huí é bang kúm gi, wó bekô nghut ri. Góbang gi, myit lhoq htân byí é hui akô nghut ri;

<sup>8</sup> haû gi,

"Garai Gasang gi, hkû-nyí jé shoq, yhangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri."✧

ga kâ tô é eq rajung za nghut ri.

<sup>9</sup> Dawiq taí é le,

"Yhangmoq é zangbó gi, yhangmoq é matú, dumzo eq lhai, myit leqbat jowò eq lató hpuq hkyô dut sháng gaq;

<sup>10</sup> Yhangmoq myoq a wó myâng shoq, myoqjí lhoq chut pyám byí é hui sháng gaq;

yhangmoq é nunghkûng gi, ayang wôlai wun goí nhang é hui sháng gaq."✧

gâ ri.

### *Tûngbaù Pé Lé Hkyi Yu É Hkyô*

<sup>11</sup> Ngò dum myi kó lé: Israelaq byu pé gi, a wó dum gè râ í leqbat byuq bekô lhú? Ratsuí lhang a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yû hkyô gi, tûngbaù pé chyáng jé byuq é nghut lhê.

<sup>12</sup> Nghut kôlhang, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyâm é hkyô gi, tûngbaù pé é matú wó sùt hkyô dut é nghut jáng, yhangmoq é byíng jup hkyô gi, je riyhang kô é wó sùt hkyô dut râ nghut ri-nhung!

<sup>13</sup> Nungmoq tûngbaù pé lé ngò taí nyi lhê: ngò gi, tûngbaù pé é lagyo nghut nyi é u má, ngá é hpungmú lé hpautap nyi lhê.

<sup>14</sup> Haû gi, ngá é amyû pé lé manôn myit wó bô nhâng mù, yhangmoq ra-am lé wó hkyi yû râ lé myit myoqbyu é hkyô nghut lhê.

<sup>15</sup> Hkâsu mù gâ le, yhangmoq lé he-ngik pyâm é hkyô gi, mingkân é matú Garai

eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é đông dut bê a nghut lhi?

<sup>16</sup> Hau htoq agó, sâng-hî ashi đông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haû amyit gi, chyoiyúng é nghut jáng, akoq pé le chyoiyúng é nghut lhê.

<sup>17</sup> Haû tsanlun akoq pé\* ra-am gi, lhoq hkyui pyâm é hui luí, yosô tsanlun a-nyuq† nghut sù nàng gi, haû pé má xoq é hui mù, haû tsanlun amyit é xû lé bo shuq lom é nghut jáng,

<sup>18</sup> akoq haû pé lé hkâwú tiq pyám kó. Nungmoq haû su kut é nghut jáng, nungmoq gi, haû amyit lé htuq é a nghut é za, amyit haû sheq nungmoq lé htuq é hkyô lé, nungmoq myit sé keq.

<sup>19</sup> Nungmoq kúm gi, "Ngò, haû má xoq é hui râ matú sheq, akoq haû pé gi, lhoq hkyui pyâm é huí é ru nghut lhê." ga taí râ nghut lhê.

<sup>20</sup> Haû su gi, nghut lhê. Nghut kôlhang, yhangmoq gi, a lumjínng é yanmai, lhoq hkyui pyâm é hui kômù, nungmoq kúm gi, lumjínng é yanmai, wó ging tîng nyi é nghut lhê. Hká gumrong nyi, gyuq kyum nyi keq.

<sup>21</sup> Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun râ a nghut.

<sup>22</sup> Haû mù luí, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyi râ nghut lhê. Haû a nghut jáng, nungmoq le, zân hpyit pyâm é hui râ nghut lhê.

<sup>23</sup> Yhangmoq gi, a lumjínng hkyô lé tô pyám kô é nghut jáng, dum xoq yu é hui kó râ nghut lhê; hkâsu mù gâ le, Garai Gasang gi, yhangmoq lé dum wó xoq yu é Sû nghut lhê.

<sup>24</sup> Haí mù gâ le, yosô tsanlun gàm akoq nghut gù nungmoq lé hpyit yû mù, htûng a nghut é đông, hô é tsanlun agàm má xoq é nghut le gi, haû akoq akying pé nghut é

✧ **11:8** Tarâ Pun 29:4 ✧ **11:10** Hkya-on 69:22-23 \* **11:17** Tsanlun akoq pé gi, Israelaq byu pé lé taí nau é nghut lhê. † **11:17** Yosô tsanlun a-nyuq gi, tûngbaù pé lé taí nau é nghut lhê.

yhangmoq gi, ó le ó é tsanlun-ngut akying má xoq yu é lé je riyhang hui râ nghut lhê ô!

*Israelaq Byu Pé Hkyi Yu É Hui Râ Hkyô*

<sup>25</sup> Haû mù, gumang wui ê, nungmoq a nghutbun kó sháng gaq nghû, zau tô é hkyô shî lé, nungmoq a sé dut râ lé, ngò a ô nau é nghut lhê: haû gi, tûngbaù pé wang lo é laké byíng é hkûn jé shoq, Israelaq byu pé ra-am gi, myit lhoq htan é huí é hkyô nghut lhê.

<sup>26</sup> Hau htâng sheq, Israelaq amyû ban-shoq bang hkyi yu é hui râ nghut lhê. Haû gi,

"Hkyi yù Sû gi, Zi-un bùm mai htoq lô râ nghut lhê;

Yhang gi, Garai lé nunghtáng tô pyâm é hkyô lé, Yakup é awut ashín mai huí sêng pyám byi râ nghut lhê.

<sup>27</sup> Ngò, yhangmoq é yubak mara lé huí sêng pyám byi jáng,

haû gi, yhangmoq lé Ngò byi tô é Ngá é dangshikaq nghut lhê."<sup>☆</sup>  
ga kê tô é eq rajung za nghut ri.

<sup>28</sup> Haû gabú danglù eq séng luí ga jang, yhangmoq gi, nungmoq é matú gyè nghut akô; nghut kôlhang, hkyin htoq yù hkyô eq séng luí ga jang, yhangmoq gi, myìng hû é îchyi îwa pé é yanmai, chyitdap é huí akô nghut ri;

<sup>29</sup> hkâsu mù gâ le, Garai Gasâng é chyunghuq pé eq Yhang ji yu é hkyô lé gi, wó htaî lhik pyâm é a nghut.

<sup>30</sup> Nungmoq gi, Garai Gasâng é jìno a gyô é bang radàm dut wú kô é nghut kôlhang, yhangmoq jìno a gyô é yanmai, ahkuí kúm, shogyo nhikmyin hkyô wó hkam yù bekô nghut é su,

<sup>31</sup> ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuí, jìno a gyo bang dut bekô nghut ri.

<sup>32</sup> Hkâsu mù gâ le, Garai Gasang gi, byù lhunglhâng bang lé, shogyo nhikmyin hkyô wó tûn shit shoq ga, lhunglhâng bang lé, jìno a gyo hkyo é shúm dut nhang to bê nghut ri.

*Hkya-on Kungtôn Dang*

<sup>33</sup> Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wui jung nghut ri-nhung!

<sup>34</sup> "Haû Yhumsing é myit lé, ó yuq wá ung sê lhê lhú? Yhâng é hpaqchyí byi sù gi, ó yuq wá dut wú é lhú?"<sup>☆</sup>  
gâ ri.

<sup>35</sup> "Garai Gasâng èq jeju dum tau byi râ dut shoq, ó yuq wá, Garai Gasang lé byi wú é lhú?"<sup>☆</sup>  
gâ ri.

<sup>36</sup> Hkâsu mù gâ le, joq mijoq gi, Yhâng chyáng mai nghut mù, Yhang dông mai nghut luí,

Yhâng é matú chyat nghut ri. Haû hpungwup shing kang gi,

Yhâng chyáng ahtum abyuq ru joq nyí sháng gaq ô! Amen.

## 12

*Dui É Hkungga Pé Dut Râ Hkyô*

<sup>1</sup> Haû mù luí, gumang wui ê, nungmoq é gungdu pé lé, Garai Gasang myit ngui ô nau é eq chyoiyúng é, dui é hkungga dông nhông byi keq nghû, Garai Gasâng é shogyo nhikmyin hkyô mai, ngò, nungmoq lé wum byi kat lhê. Haû gi, woi-nyí hkyô dông nungmoq noqkuq dojaú é hkyô nghut lhê.

<sup>2</sup> Mingkan shí lhùm é sâmlai dông a cháng lo é za, myit sik wó yù râ dông nungmoq é a-kyang lé htaî pyám byi nhâng keq. Haû hkûn sheq, Garai Gasâng é ge é, myit ngui é eq gumjup é ô nau hkyô lé, nungmoq wó chyâm, wó sê gàm hkoq yù kó râ nghut lhê.

<sup>3</sup> Hkâsu mù gâ le, ngo lé byi tô é jeju yanmai, nungmoq yuq hkangmó lé ngò taí kôlê: nungmoq gi, yhumsing gùng lé lai shoq a nghutbun é za, ó le ó lé, Garai Gasâng èq lumjìng myit tsing gàm byi to bê eq rajung za, myit yù gíng é í za myit yù keq.

<sup>4</sup> Nga-nhúng yuq hkangmó é gungdu ral-hum má gi, gungdu showui showang pé

myo myo bo é nghut luî, gungdu showui showang haú pé banshoq gi, jai chûng jang a pung é nghut lhê.

<sup>5</sup> Haú eq rajung za, myo myo nghut é nga-nhúng le, Hkrisduq má gungdu ralhum za dut luî, yuq hkanq mó gi, rayuq eq rayuq gungsho sêng lhûm é bang chyat nghut lhê.

<sup>6</sup> Nga-nhúng lé byî tô é jeju yanmai, nga-nhúng wó é chyunghuq gi, gotû tû nghut lhê. Byù rayuq é chyunghuq gi, myiqhtoi htoî é nghut jáng, yhâng é lumjínq hkyô eq rajung za htoi sháng gaq;

<sup>7</sup> dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq;

<sup>8</sup> myit wum byî é nghut jáng, myit wum byi sháng gaq; ra châ é bang lé garúm byî é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit eq kut sháng gaq.

### *Chyitdap Myit*

<sup>9</sup> Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuî nyi keq.

<sup>10</sup> Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gùng htoq je hpautap lhum keq.

<sup>11</sup> Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyi mù, haú Yhumsing lé dojaú nyi keq.

<sup>12</sup> Myit myoqbyù hkyô má gabú keq; wuîhke hkyô má hkam jan keq; kyûdung hkyô má lhumzui keq.

<sup>13</sup> Ra châ tô é Garai Gasâng é byu pé lé gàm byi keq. Bínq hkulum é lé rago kut keq.

<sup>14</sup> Nungmoq lé zing-rî é bang lé shimân byi keq; shimân byi keq, hkâ-nhing kó.

<sup>15</sup> Gabú é bang eq rahá bo gabú keq; yón é bang eq rahá bo yón keq.

<sup>16</sup> Rayuq eq rayuq byin hpyé gohut huî nyi keq. A nghutbûn é za, nyi yap hkyô nyhûm bang eq zùm yap keq. Hpaqchyî bo é sù su hkâ-myit ngàm kó.

<sup>17</sup> Ó yuq lé le, agè ashop é yanmai, agè ashop é dông lató hkâhpuq kó. Yuq

hkanq mó é myoq hí má ge é lé kut râ rago myit keq.

<sup>18</sup> Wó dut é nghut jáng, nungmoq wó dut é í, yuq hkanq mó eq nguínq shoq nyi keq.

<sup>19</sup> Ngá é buinùm wuî ê, lató a hpuq é za, Garai Gasâng é nhikmo-yo hkyô lé sheq láng nyi keq. Hkâsu mù gâ le, "Ngò sheq lató hpuq râ sù nghut lhê; ngò lató hpuq râ."✧ ga, haú Yhumsing taî ri ga kê tô ri.

<sup>20</sup> Haú mù, "Nungmoq lé gyè kut sù zòmut é nghut le gi, byi tso keq; yhang wuîshit é nghut le gi, rajung jung byi huq keq.

Haú dông kut jáng, nàng, yhâng é ulhum htoq má gyúng é myigye bum to byi é nghut lhê."✧

ga le kê tô ri.

<sup>21</sup> Agè ashop é gi, nungmoq lé a ung pyám sháng gaq, ge é hkyo eq agè ashop é lé ung pyám keq.

## 13

### *Ahkánq Ayá Wó Bânq Ô Má Nyi Râ É Hkyô*

<sup>1</sup> Yuq hkanq mó gi, up é ahkánq ayá wó bânq é a-ô má nyi ra râ nghut lhê; hkâsu mù gâ le, Garai Gasâng chyáng mai za a nghut le gi, up é ahkánq ayá joq é a nghut. Joq tô é ahkánq ayá pé gi, Garai Gasâng eq byi tô é chyat nghut lhê.

<sup>2</sup> Hau é yanmai, up é ahkánq ayá lé gum-lau toq é sù gi, Garai Gasâng byi tô é up é ahkánq ayá lé gum-lau toq é sù nghut ri; haú su kut é bang gi, tarâ jéyáng é hui zo râ hkyô lé ho yù nyi é bang nghut akô.

<sup>3</sup> Hkâsu mù gâ le, uphkanq é bang gi, ge é hkyô kut bânq é matú gyuq nán hpo a dut é za, shut shaî hkyô kut bânq é matú sheq dut é ru nghut lhê. Up é ahkánq wó sù lé gyuq é mai lut nau lhê a nghut lí? Haú jáng, ge é hkyô kut aq, haú hkûn, yhang, nàng lé hkya-on râ nghut lhê.

<sup>4</sup> Hkâsu mù gâ le, yhang gi, nàng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôlhâng, nàng, shut shaî hkyô kut é nghut le gi, gyuq nán nyi aq; haî mù gâ le, yhang gi, sâm lé ajè wun tô é a nghut. Yhang gi, Garai Gasâng é dui-nhâng zoshâng nghut

mù, shut shaí hkyô kut sù lé dam byi râ matú nhikmo-yo Su é gunglik nghut lê.

<sup>5</sup> Haú mù luí, dam byi râ lé chiq é yanmai za a nghut, yhumsing nhik bô râ é yanmai le, haú up é ahkáng ayá wó bang é a-ô má nyi râ dut lê.

<sup>6</sup> Nungmoq hkansê kat râ é gi, hau é yanmai le nghut lê; hkâsu mù gà le, haú up é ahkáng ayá wó bang gi, Garai Gasang é dui-nhâng zoshâng wui nghut lê mù, uphkan é mù lé, ahkying bying shoq wùn waq nyi akô nghut ri.

<sup>7</sup> Yuq hkanmó lé byi âng é eq rajung za byi keq; hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuyq kyum ang sù lé gi, gyuyq kyum keq; hkungga ang sù lé gi, hkungga keq.

### *Rayuq Eq Rayuq Chyitdap Lhum Râ Hkyô*

<sup>8</sup> Rayuq eq rayuq chyitdap lhùm é chyin mai lai luí, hai chyin le hkâdap lhùm kó; hkâsu mù gà le, góyuq lé chyitdap é sù gi, haú jep é tará lé lhoq dik bê sù nghut ri.

<sup>9</sup> "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"\* gà tô é hkunmó pé eq gotú hkunmó hai nghut nghut, "Náng gung lé náng chyitdap é su, náng é chyangnâm mâ é bang lé le chyitdap aq."\* gà é tará má lo jup to bê nghut lê.

<sup>10</sup> Chyitdap myit gi, chyangnâm mâ é byù lé a ge é haí le a kut é nghut lê. Haú mù luí, chyitdap myit gi, haú jep é tará lé lhoq dik é hkyô nghut ri.

<sup>11</sup> Haú mù, ahkuí lê é ahkying yàm-yoq lé sê gyo luí, haú hkyô lé kut keq. Nungmoq yhup mui é mai bún gyng râ ahkying jé bê; haí mù gà le, nga-nhúng é hkyi yù hkyô gi, lumjing hi é hkun lê htoq má ahkuí je chyáng bê nghut ri.

<sup>12</sup> Haú myin ahkying gi, lai byuq ló râ za nghut bê; nyí ahkying gi, jé lô berâ nghut lê. Haú mù luí, mauchut é muzó lé tô pyám mù, maubó é gyehking lé wut to sháng.

<sup>13</sup> Ye lhai é eq shuq wut é, ashop é đông gungsho zùm yap é eq shut é đông nyi zô lhùm nau é myit bo é, mabyoq jishùm htoq

é eq manon é pé a kut é za, nyí-káng lê su, ge é a-kyang đông nyi yap sháng.

<sup>14</sup> Hau htoq agó, Yhumsing Yesuq Hkrisduq lé, mebu su wut to keq; yubak gungsho ô nau é đông lhoq dik râ matú hkâ-myit kó.

## 14

### *Gumang Wui Lé A Jéyang Râ Hkyô*

<sup>1</sup> Lumjing myit má wum nyhóm sù lé, mying myo nhô zâ é hkyô pé lé a jéyang byí é za hap yù keq.

<sup>2</sup> Byù rayuq é lumjing myit gi, jung hkanmó zô ri; nghut kôhang, lumjing myit nyhóm sù gotú rayuq gi, mhan-haq hpoqnoq za zô ri.

<sup>3</sup> Jung hkanmó zo sù gi, a zo sù lé a ge wú tiq pyám; jung hkanjung mó a zo sù gi, zo sù lé mara a ge byi; hkâsu mù gà le, Garai Gasang gi, yhang lé hap yu to bê nghut ri.

<sup>4</sup> Nàng gi, ó yuq wá nghut mù, góyuq é dui-nhâng zoshâng lé jéyang lê lhú? Yhang, yap ging kôhang, leqbat kôhang, yhâng é yhumsing myit za nghut lê. Yhang gi, wó yap ging râ nghut lê; hkâsu mù gà le, haú Yhumsing gi, yhang lé wó yap ging nhâng Sù nghut lê.

<sup>5</sup> Rayuq myit é gi, buinyi ra-nyí gi, gó nyí htoq je ge lê gà ri; dum rayuq myit é gi, nyí wui rajung za nghut lê gà ri. Yuq hkanmó gi, yhumsing myit yu é lé a úng-âng nyi sháng gaq.

<sup>6</sup> Buinyi ra-nyí lé, ahkyak lê ga myit yù sù gi, haú Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haú Yhumsing lé bun luí zô nyi ri; a zo sù le, haú Yhumsing lé bun luí Garai Gasang lé jeju hkya-ôn nyi ri.

<sup>7</sup> Hkâsu mù gà le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut.

<sup>8</sup> Nga-nhúng asak dui nyi le gi, haú Yhumsing é matú dui é ru nghut lê; nga-nhúng shi byuq le gi, haú Yhumsing é matú shi é ru nghut lê. Haú mù, asak dui nyi kôhang, shi byuq kôhang, nga-nhúng gi, haú Yhumsing eq sêng é bang nghut lê.

<sup>9</sup> Haû su mù, Hkrisduq gi, shi byuq bang eq asak duì bâng é Yhumsing dut sháng gaq ga, shî hkám mù dum dui toq é nghut lhê.

<sup>10</sup> Haû mù, nàng gi, haî mù nàng é gumang hpó lé jéyáng nyi lhê lú? Haî mù nàng é gumang hpó lé wú tiq nyi lhê lú? Nga-nhúng lhunghâng bang gi, Garai Gasâng é tarâ jéyáng tanghkuq hí má yap rá bang chyat nghut lhê.

<sup>11</sup> Hkâsu mù gâ le,

"Haû Yhumsing gi, 'Ngò rû dui nyi é eq rajung za, Ngá é hí má hkyihput hkanmó htuq rá nghut lhê;

Garai Gasang lé, shô hkanmó èq yín yú kó rá nghut lhê.' ga taî ri."✧

ga kâ tô ri.

<sup>12</sup> Haû mù luî, nga-nhúng yuq hkanmó gi, yhumsing kut laî lo é hkyô lé, Garai Gasâng chyáng shit ra rá nghut lhê.

<sup>13</sup> Haû nghut mù, nga-nhúng gi, rayuq eq rayuq tarâ jéyáng lhum é hkyô lé tô pyám sháng. Ó yuq nghut kôhang, yhumsing é gumang é hkyowuì má, myit leqbat jowò eq htung htê jowò a to byi rá matú, myit sidiq keq.

<sup>14</sup> Haû Yhumsing Yesuq má nghut nyi é sù ngò gi, haî jung zoshuq nghut kôhang, yhang baú yhang a sansêng a dut é hkyô lé, hkyak wó sé luî, jing nyi lhê. Nghut kôhang, ó yuq le, rajung jung lé a sansêng ga myit yu é nghut jáng, yhang é matú, zè haû gi, a sansêng é nghut lhê.

<sup>15</sup> Nàng zô é zoshuq yanmai, nàng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shî hkám byi bê sù nghut é, nàng é gumang hpó lé, nàng zoshuq é dông mai hkâlhoq hten pyám.

<sup>16</sup> Nàng, ge ri nghû myit yu é hkyô lé, agè ashop é dông hkâtaî pyám nhâng.

<sup>17</sup> Hkâsu mù gâ le, Garai Gasâng é mingdán gi, zo zo shuq shuq hkyô a nghut é za, dingmán hkyô, nguingón hkyô eq Choyiyúng Woi-nyí má gabú é hkyô ru nghut lhê.

<sup>18</sup> Haî mù gâ le, shí hkyô dông mai Hkrisduq lé dojaú é sù gi, Garai Gasang ô nau é sù eq byu pè èq hkya-ôn é hui sù nghut ri.

<sup>19</sup> Haû mù luî, nguingón hkyô má nyi rá eq, rayuq eq rayuq wum byi lhum rá hkyô lé, shikut nyi keq.

<sup>20</sup> Zoshuq é yanmai, Garai Gasâng é muzó lé hkâlhoq hten pyám. Zoshuq lhungháng gi, sansêng é chyat nghut lhê; nghut kôhang, góyuq lé myit leqbat nhang é jung lé zô é sù gi, shut é nghut lhê.

<sup>21</sup> Tsibiyiq wing shuq é eq sho zô é hkyô má nghut kôhang, gotû haî jung kut é nghut kôhang, nàng é gumang hpó lé myit leqbat nhang é nghut le gi, a kut le je ge lhê.

<sup>22</sup> Haû mù, haú pé eq séng luî, nàng lumjín é haî nghut kôle, nàng eq Garai Gasâng gyoro má za joq nyi sháng gaq. Yhumsing ge lhê gâ é èq, yhumsing gùng yhumsing mara byi jang a joq é sù gi, hkungsô wó nyi ri.

<sup>23</sup> Nghut kôhang, úng-âng é myit èq zô é nghut le gi, mara byi é hui ri, haî mù gâ le, yhang zô é gi, lumjín myit mai a nghut; lumjín myit mai a kut é haî nghut kôhang, mara nghut ri.

## 15

### *Góyuq Lé Myit Ngón Nhâng Râ Hkyô*

<sup>1</sup> Lumjín hkyô má wum-o bo é nga-nhúng gi, yhumsing myit ngón rá hkyô lé a ho é za, wum-o a bò bâng é wum nyhóm hkyô lé, hkam jan byi nyi rá dut lhê.

<sup>2</sup> Nga-nhúng yuq hkanmó gi, yhumsing é chyangnâm mâ é su é ge é hkyô dut rá matú, yhang wó kô myhang lò shoq, yhang lé lhoq ngón byi nyi sháng.

<sup>3</sup> Hkâsu mù gâ le, Hkrisduq lhang gi, Yhànggùng yhang lhoq ngón é a nghut; haû gi, "Nang lé rhoi bâng é dang gi, Ngá chyáng gyó ke bê nghut ri."✧ ga, kâ tô é eq rajung za nghut ri.

<sup>4</sup> Hkâsu mù gâ le, laî lò bê hkûn kâ tô é lhungháng gi, nga-nhúng lé mhoq byi rá matú chyat kâ tô é nghut lhê; haû gi, Chyúmdang mâ é hkam jan hkyô eq myit wum byi hkyô dông mai, nga-nhúng myit myoqbyù hkyô wó rá matú nghut lhê.

<sup>5</sup> Haû hkam jan hkyô eq myit wum byi hkyô lé byi é Garai Gasang gi, nungmoq, Hkrisduq Yesuq é htâng châng nyi é u lé,

nungmoq yhangchang rading ralhum za dut é woi-nyí byí sháng gaq;

<sup>6</sup> haû jáng sheq, nungmoq gi, i-myt rahkat eq nhut htê ralhum eq za, nganhûng é Yhumsîng Yesuq Hkrisduq é Yhângwa nghut Sû, Garai Gasang lé, wó hkyá-on kungtôn kó râ nghut lhê.

<sup>7</sup> Haû mù luí, Hkrisduq gi, nungmoq lé hap yù bê é eq rajung za, Garai Gasâng é hpungwup shíngkang lé lhoq htoq shit râ matú, nungmoq le, rayuq eq rayuq hap yu lhum keq.

<sup>8</sup> Hkâsu mù gâ le, ngò, nungmoq lé tai kôlé, haû myîng hû é íchyí íwâ pé lé byí tô é danggidiq pé lé lhoq ging râ matú, Hkrisduq gi, Garai Gasâng é tengmán hkyo é malaí, Yudaq byu pé é dui-nhâng zoshâng dut bê nghut ri.

<sup>9</sup> Haû mù, Garai Gasâng é shogyo nhikmyin hkyo é yanmai, haû tûngbaù pé, Garai Gasang lé wó hkyá-on kungtôn kó râ nghut lhê. Haú hkyô gi,

"Haû mù luí, tûngbaù pé chyáng má, Nang lé, ngò hkyá-on râ nghut lhê;

Náng é myîng lé, ngò hkyá-on mahkôn râ nghut lhê."✧

ga kâ tô é eq rajung za nghut ri.

<sup>10</sup> Dum,

"Tûngbaù pé ê, Yhâng é byu pé eq rahá gabú nyí keq."✧

gâ tô ri.

<sup>11</sup> Dum,

"Nungmoq tûngbaù pé lhunglhâng bang ê, haû Yhumsîng lé hkyá-on keq, byú myú lhunglhâng bang ê, Yhang lé hkyá-on mahkôn hkôn keq."✧

gâ tô ashí nghut ri.

<sup>12</sup> Hau htoq agó, Esai-aq taí é gi,

"Yese é Amyit gi, yuq htoq lô luí, Yhang gi, byú myú chângjup é ahtoq má up râ sù nghut lhê;

tûngbaù pé gi, Yhang má myit myoqbyù kó râ nghut lhê."✧

gâ ri.

<sup>13</sup> Haû myit myoqbyù hkyô byí é Garai Gasang gi, Yhang lé lumhkau nyi é bang nungmoq lé, gabú hkyô banshoq eq ngu-ingón hkyô lhoq pyíng byi sháng gaq; haû

jáng sheq, nungmoq gi, Chyoiyúng Woi-nyí é wum-o a-tsâm eq, myit myoqbyù hkyô wó byíng mui nyí kó râ nghut lhê.

### *A Gyuq A Wam É Za, Poluq Laiká Kâ É Hkyô*

<sup>14</sup> Ngá é gumang wuì ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhûm é má kûng é bang nghut é lé, ngá gûng ngò yhang hkyak lumjîng lhê.

<sup>15</sup> Ngò gi, nungmoq lé dum lhoq pûn é dông, ahkyak é pé ra-am lé a gyuq a wám kâ kat bê nghut lhê.

<sup>16</sup> Hkâsu mù gâ le, tûngbaù pé gi, Chyoiyúng Woi-nyí dông mai lhoq sân-yúng é hui luí, Garai Gasâng eq hap yù gíng é hkungga wó dut kó sháng gaq ga, Garai Gasâng é gabú danglù lé hkô râ hkyangjong é wò dông, tûngbaù pé chyáng, Hkrisduq Yesuq é hpungmû wùn sù dut râ matú, Garai Gasang, ngo lé jeju byí é yanmai nghut lhê.

<sup>17</sup> Haû mù luí, ngò gi, Garai Gasang lé dojaú é hkyô eq séng luí, Hkrisduq Yesuq má nghutbùn nyi lhê.

<sup>18</sup> Ngò gi, ngò taí é eq zui saí é muzó dông le, haû Woi-nyí é a-tsâm chûng mù, kumlhá pé eq laklai kumlhá pé dông le, tûngbaù pé lé, Garai Gasâng é jîno gyo shoq shuí ú é má, ngo lé Hkrisduq nhang é muzó hkyô lé taí é mai lai luí, gotú haí lé le wám taí é a nghut.

<sup>19</sup> Haû mù luí, ngò gi, Yerusalem wà mó mai Ilurikhkam mau jé shoq é hkyô awui ayàm jâm shoq, Hkrisduq é gabú danglù lé hko kyo bê nghut lhê.

<sup>20</sup> Ngò hkâ-nhám le myit tuí nyi é hkyô gi, góyuq hí tô é apûn awang má dum a puq saí pyâm é za, Hkrisduq lé a sé shi é jowò má gabú danglù hko kyo râ hkyô nghut lhê.

<sup>21</sup> Haû gi,

"Yhâng é hkyô lé, taí kyô é a hui shí é bang, myàng kó râ nghut luí,

a wó gyô wú é bang, sê gyo kó râ nghut lhê."✧

ga kâ tô é eq rajung za nghut ri.

<sup>22</sup> Haû mù luí, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.



### Romaq Myuq Lé Ló Kum Râ Sôn É Hkyô

<sup>23</sup> Nghut kôlhang, ahkuí gi, shí mau pé má ngò zui saí râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za,

<sup>24</sup> ngò, Sipin ming shut ló é hkûn, nungmoq chyáng wàng râ sôn tô lhê. Ngò gi, lai ló é hkûn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haú mai htuqbang kat râ lé, ngò myoqbyu tô lhê.

<sup>25</sup> Ahkuí, ngò kúm gi, Yerusalem wà mó mâ é sân-yúng bang lé dojaú râ matú, haú wà shut e ló é hkyolat má nghut nyi lhê.

<sup>26</sup> Hkâsu mù gâ le, Makedoni eq Ahkaia mau mâ é bang gi, Yerusalem wà mó mâ é sân-yúng bâng chyáng mâ é myúng bâng é matú, garúm chyunghuq hkyui tsing nau bùm bekô nghut ri.

<sup>27</sup> Yhangmoq gi, haú su kut nau bùm bekô nghut ri, gè gè ga jáng, haú gi, yhangmoq chyín dap tô é đông ru nghut lhê. Hkâsu mù gâ le, haú Yudaq byu pé é woi-nyí eq sêng é shimân jeju lé, tûngbàu pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chòm chûng râ chyín dap tô é đông nghut lhê.

<sup>28</sup> Haú mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, lai ló uchyang, nungmoq chyáng lé sô kum râ nghut lhê.

<sup>29</sup> Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é eq jé lé râ nghut é lé, ngò sê lhê.

<sup>30</sup> Gumang wuì ê, ngá é matú Garai Gasâng chyáng kyûdung byí é đông, ngò wum kat yhang shikut é hkyô má nungmoq bo wàng lòm râ matú, nga-nhùng é Yhumsing Yesuq Hkrisduq eq Woi-nyí é chyitdap myit é yanmai, ngò, nungmoq lé wum taí tsuq kat lhê.

<sup>31</sup> Yuda mau mâ é a lumjúng bâng chyáng mai, ngò hkyi yu é wó hui luí, Yerusalem wà mó má ngò wùn waq é muzó lé, haú mâ é sân-yúng bang hap yù gíng é wó dut râ matú kyû bo dung byi keq.

<sup>32</sup> Haú jáng sheq, ngò gi, Garai Gasang ô nau é đông mai, gabú myit eq nungmoq chyáng wó jé lé mù, nungmoq eq rahá wum-o wó yù râ nghut lhê.

<sup>33</sup> Haú nguingón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

## 16

### Shi-kyám Dang

<sup>1</sup> Ngò gi, Kenhkrea noqkuq hpúng má é hpungtê, nga-nhùng é gu-nhá Hpobe lé, nungmoq chyáng shichyen byi kat lhê.

<sup>2</sup> Nungmoq gi, sân-yúng bang kut gíng é eq rajung za, haú Yhumsing má yhang lé hap yù luí, yhang râ tô é hkyô haí nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

<sup>3</sup> Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq.

<sup>4</sup> Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbàu pé é noqkuq hpúng pé banshoq le, yhangnhik lé jeju bûn lhê.

<sup>5</sup> Yhangnhik é yhùm má chòm huí zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjúng wang lo é, ngò chyitdap é Epanetu lé bo shi-kyám byi keq.

<sup>6</sup> Nungmoq é matú gyai yhang shikut wú bê sù nghut é Mariq lé bo shi-kyám byi keq.

<sup>7</sup> Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shí le nyi bê sù nhik nghut akô.

<sup>8</sup> Haú Yhumsing má, ngò chyitdap é sù, Ampliatu lé bo shi-kyám byi keq.

<sup>9</sup> Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

<sup>10</sup> Hkrisduq má chyam é hui mù, wó lùm bê sù, Apele lé bo shi-kyám byi keq.

Aristobulu eq sêng é yhumbyù wuì lé bo shi-kyám byi keq.

<sup>11</sup> Ngá é buinùm Herudion lé bo shi-kyám byi keq.

Haû Yhumsîng má nghut nyî bê bang, Narkiso é yhumbyù wui lé bo shi-kyám byi keq.

<sup>12</sup> Haû Yhumsîng má mù zui shikut é myiwê nhik, Truhpena eq Truhposa lé bo shi-kyám byi keq.

Haû Yhumsîng má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

<sup>13</sup> Haû Yhumsîng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhângnu lé le, bo shi-kyám byi keq.

<sup>14</sup> Asunkritu, Hpelegon, Herme, Patroba, Herma eq yhangmoq eq rahá nyi é gumang wui lé, bo shi-kyám byi keq.

<sup>15</sup> Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

<sup>16</sup> Rayuq eq rayuq, chyoiyúng bopuq é èq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

<sup>17</sup> Gumang wui ê, nungmoq é lumjîng hkyô má, nungmoq mhoq hkam yù bê nghut é mhoqshit hkyô eq shai lhûm é, gam hkoq hkyô pé eq myit leqbat hkyô pé lhoq htoq é bang lé sidiq keq nghû, wum taî tsuq kat lhê. Yhangmoq lé koi pyám keq.

<sup>18</sup> Hkâsu mù gâ le, haû sù é bang gi, nga-nhûng é Yhumsîng Hkrisduq lé dojaú é bang a nghut é za, yhumsing é wamdaû matú dojaú é bang nghut akô. Yhangmoq gi, myit nú-nhâm é bang lé, dang ngón dang nguî dông mhaú zô akô nghut ri.

<sup>19</sup> Nungmoq, jîno gyo kô é hkyô lé, yuq hkanmó wó gyo bê nghut ri; haû mù, ngò gi, nungmoq é matú gyai yhang gabú nyi lhê; nghut kôlhâng, ge é hkyô eq séng luî gi, nungmoq hpaqchyî bò mù, agè ashop hkyô eq séng luî gi, nungmoq a bo lòm râ lé, ngò ô nau ri.

<sup>20</sup> Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhûng é Yhumsîng Yesuq é jeju gi, nungmoq eq rahá nghut nyî sháng gaq ô.

<sup>21</sup> Ngá é mù zui luzúm Timohti gi, nungmoq lé shi-kyám dang sang kat ri; haû eq rajung za, ngá é buinùm wui Luki, Yason eq Sosipata pé le, shi-kyám dang sang kat akô nghut ri.

<sup>22</sup> Laiká shî lé bo ká sù ngò Tertiu gi, haû Yhumsîng má nungmoq lé shi-kyám kat lhê.

<sup>23</sup> Ngo lé le, noqkuq hpúng gón lé le, bíng hkulum é sù Ge-u gi, nungmoq lé shi-kyám dang sang kat ri.

Haû wa mâ é ngùnzuî sù Erastu eq nga-nhûng é gumang hpó Kuartu gi, nungmoq lé shi-kyám dang sang kat akô.

<sup>24</sup> Nga-nhûng é Yhumsîng Yesuq Hkrisduq é jeju gi, nungmoq lhunglhâng bang eq rahá nghut nyî sháng gaq. Amen.\*

<sup>25</sup> Byù myû chângjup bang lumjîng luî, Yhang é jîno gyo sháng gaq ga, a-nham pyat mai haq tô é hui kôlhâng,

<sup>26</sup> ahkuî, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wui é hkyo é shing-rán má cháng luî, ngá é gabú danglù eq Yesuq Hkrisduq é hkyô taî pyo é dông, nungmoq lé wó lhoq ging tíng byî é,

<sup>27</sup> rayuq za é hpaqchyî bo sù Garai Gasâng chyáng, Yesuq Hkrisduq dông mai, hpungwup shingkang gi, ahtum abyuq ru joq nyî sháng gaq ô! Amen.

\* **16:24** Chyúmding ra-am má chyúbun 24 shî a bo é nghut lhê.

## KORINHTUQ

### Pê Chyáng Hî Dàm Hun Kat é Laiká (1 Corinthians)

<sup>1</sup> Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi,

<sup>2</sup> jowò hkanmó má nga-nhùng é Yhumsing Yesuq Hkrisduq é mying lé lêng é bang eq rahá, chyoyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mâ é, Garai Gasang é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsing nghut lhê.

<sup>3</sup> Nga-nhùng é Îwa Garai Gasang eq Yhumsing Yesuq Hkrisduq chyáng mâ é jeju eq nguóngón hkyô gi, nungmoq chyáng ru joq nyí sháng gaq ô.

#### *Hkrisduq É Yanmai Wó É Jeju*

<sup>4</sup> Garai Gasang jeju lé Hkrisduq Yesuq đông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê.

<sup>5</sup> Hkâsu mù gâ le, nungmoq gi, Hkrisduq đông mai, nungmoq dang taí é hkyô banshoq eq nungmoq é sumsé hpaqchyî banshoq má je lhoq gumjup é hui bekô nghut ri.

<sup>6</sup> Haû gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê.

<sup>7</sup> Haû mù, nga-nhùng é Yhumsing Yesuq Hkrisduq dum htoq shit râ lé, nungmoq gyai myoqbyu lánng nyi é u má, nungmoq gi, woi-nyí hkyô eq séng é chyunghuq haí lé le langhpyut kó râ a nghut.

<sup>8</sup> Nga-nhùng é Yhumsing Yesuq Hkrisduq é buinyi má, nungmoq lé mara hùn râ hkyô a bò shoq, Hkrisduq gi, nungmoq lé, htáng shoq gingtíng nhang nyi râ nghut lhê.

<sup>9</sup> Nga-nhùng é Yhumsing nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

#### *Noqkuq Hpúng Má Gam Hkoq Lhùm É Hkyô*

<sup>10</sup> Gumang wuì ê, nungmoq hkaû má gam hkoq lhùm é hkyô pé a joq é za, nungmoq é myit eq myit sôn wú é hkyô má gumjup shoq rading ralhùm za dut nyi sháng gaq, nungmoq lhunghang bang rayuq eq rayuq byin hpyé gohut huí nyi keq nghù, ngò, nungmoq lé, nga-nhùng é Yhumsing Yesuq Hkrisduq é mying mai dúng tôngbán kat lhê.

<sup>11</sup> Ngá é gumang wuì ê, Hkloe é yhùm byù wuì gi, nungmoq hkaû má mabyoq htoq hkyô joq é lé, ngo lé hkyáng lo shit akô.

<sup>12</sup> Ngò haû su nghù taí é gi, nungmoq mâ é rayuq yuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga, dum rayuq gi, "Ngò gi, Kehpa htâng châng lhê." ga, dum góyuq gi, "Ngò gi, Hkrisduq htâng châng lhê." ga, taí bùm kô é yanmai nghut lhê.

<sup>13</sup> Hkrisduq gi, gam hkoq é hui bê lhú? Ngò Poluq gi, nungmoq é matú tapzîng má jén sat é hui bê lhú? Nungmoq gi, ngá é mying mai wui-myhup hkâm yù kô é lhú?

<sup>14</sup> Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byi wú é yanmai,

<sup>15</sup> nungmoq ó yuq le, ngá é mying mai wui-myhup hkâm yù bê nghù a wó taí é nghut mù, ngò, Garai lé jeju hkya-ôn lhê.

<sup>16</sup> (Stehpana é yhumbyù wuì lé le, ngò wui-myhup hkâm byi é nghut lhê, haû mai lai luí gotú ó lé hkâm byi záng ashî laq, ngò a myit bun lo nghut ri.)

<sup>17</sup> Hkâsu mù gâ le, Hkrisduq, ngo lé nhang kat é gi, wui-myhup hkâm byi râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyî byéng-yá dang đông hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

#### *Garai É A-tsam Eq Hpaqchyî Byéng-yá Gi, Hkrisduq*

<sup>18</sup> Hkâsu mù gâ le, tapzîng má Yesuq shí hkâm é hkyô eq séng é danglù gi, htên byoq hui râ bâng é matú, danggang dut byuq ri;

nghut kôlhang, hkyi yu é huí nyì bang nga-nhùng é matú gi, Garai Gasâng é a-tsam nghut ri.

<sup>19</sup> Hkâsu mù gà le, Chyúmdang má kê tô é gi,

"Hpaqchyî bò bâng é hpaqchyî byéng-yá lé, Ngò lhoq htên pyám rà nghut lhê; nyan bò bâng é nyan lé, Ngò, ajè dut pyám nhâng rà nghut lhê."<sup>\*</sup>

ga ri.

<sup>20</sup> Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang tái kung bang gi, hkâmá lhú? Garai Gasâng gi, mingkân é hpaqchyî byéng-yá lé lhoq ngok pyám bê a nghut lhú?

<sup>21</sup> Hkâsu mù gà le, Garai Gasâng é hpaqchyî byéng-yá mai ga jang, mingkan zo wuí gi, yhumsing é hpaqchyî byéng-yá đông mai Garai Gasâng lé a wó sé kê é yanmai, danggang gà pyám byi kê é mungdang lé hko kyô é đông lumjîng bang lé hkyi yù rà matú, Garai Gasâng myit hpyit é nghut lhê.

<sup>22</sup> Yudaq byu pé gi, limik kumlhá pé lé dúng akô; Grik byu pé gi, hpaqchyî byéng-yá lé ho akô nghut ri.

<sup>23</sup> Nghut kôlhang, ngamoq gi, tapzîng má jén sat huí é Hkrisduq é hkyô lé hko kyô lhê. Haù gi, Yudaq byu pé é matú myit leqbat jowò eq tûngbaù pé é matú danggang dut byuq ri.

<sup>24</sup> Nghut kôlhang, Garai Gasâng èq ji yù huí é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri.

<sup>25</sup> Hkâsu mù gà le, Garai Gasâng é ngok hkyô gà é lháng gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gà é lháng gi, byu é wum-o htoq má je gyaú ri.

<sup>26</sup> Gumang wuì è, Garai Gasâng, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsáng đông hpaqchyî byéng-yá bo é bang, ahkáng ayá wó é bang, zaugun suwún amyù mã é bang a myô é nghut lhê.

<sup>\*</sup> 1:19 Esai 29:14    <sup>\*</sup> 1:31 Yer 9:24

<sup>27</sup> Nghut kôlhang, Garai Gasâng gi, hpaqchyî byéng-yá bò bang lé hoq lhoq hpu rà matú, mingkan mã é ngok bang gà é lé hkyin yu é nghut lhê; Garai Gasâng gi, wum bò bang lé hoq lhoq hpu rà matú, mingkan mã é wum nyhóm bang gà é lé hkyin yu é nghut lhê.

<sup>28</sup> Yhang gi, mingkân èq ahkyak tô é lé lhoq htên pyám rà matú, haì a nghut é lé le, mingkan mã é aróng a bo é eq wú tiq pyám huí é lé le, hkyin yu é nghut lhê.

<sup>29</sup> Haù gi, ó yuq le, Yhâng é hí mã a ge nghutbun rà matú nghut ri.

<sup>30</sup> Garai Gasâng é yanmai, nungmoq gi, Hkrisduq Yesuq má nghut nyi bekô nghut ri; Hkrisduq gi, nga-nhùng é matú, Garai Gasâng chyáng mã é hpaqchyî byéng-yá dut bê nghut ri. Haù gi, nga-nhùng é dingmán hkyô, chyoiyúng hkyô eq hkyi yù hkyô nghut ri.

<sup>31</sup> Haù mù luì, "Gumrong é sù gi, haù Yhumsîng má gumrông sháng gaq."<sup>\*</sup> ga kê tô é eq rajung za nghut ri.

## 2

### *Woi-nyí Mai Lo É Garai Gasâng É Hpaqchyî Byéng-yá*

<sup>1</sup> Gumang wuì è, ngò gi, Garai Gasâng eq sêng é saksé hkyô lé nungmoq chyáng tái pyò rà matú jé lé é hkûn, dang tái kûng é eq hpaqchyî byéng-yá mó bo é đông lé é a nghut.

<sup>2</sup> Hkâsu mù gà le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luì, jung hkangmó lé tô-myhî pyám rà nghú myit hpyit yù bê nghut lhê.

<sup>3</sup> Ngò gi, nungmoq chyáng jé lé é hkûn, wum nyhóm é eq gyai yhang gyuq nán é nghut lhê.

<sup>4</sup> Ngá é danglù eq ngò hko kyô é hkyô gi, hpaqchyî bo é eq mhuí yu é dang pé đông a nghut é za, Woi-nyí é a-tsâm èq nungmoq lé shit é đông ru nghut mù,

<sup>5</sup> nungmoq é lumjîng myit gi, byù é hpaqchyî byéng-yá mã a nghut é za, Garai Gasâng é hpungwup a-tsam mã nghut nyi lhê.

<sup>6</sup> Nghut kôlhang, ngamoq gi, myit dîng bê bang lé hpaqchyî byéng-yá đông nyo lê; shí pyat lê é hpaqchyî byéng-yá eq htên byoq nyi huí é shí pyat mâ é zaú wui é hpaqchyî byéng-yá đông kúm a nghut.

<sup>7</sup> Ngamoq taí é gi, haq tô é eq, ahkyíng nghu é lhang a joq shi mai nga-nhung é hpungwup shingkang é matú Garai Gasang tô to byí é hpaqchyî byéng-yá nghut é, Garai Gasang é zaú tô é hpaqchyî byéng-yá lé taí é ru nghut lê.

<sup>8</sup> Shí pyat lê é zau wui gi, hpaqchyî byéng-yá haú lé rayuq lhang a sê gyo kó nghut ri; yhangmoq sê gyo kô é ru nghut le gi, hpungwup shingkan bo é Yhumsing lé tapzîng má jén sat pyám kó râ a nghut.

<sup>9</sup> Nghut kôlhang, Chyúmdang má,

"Ó yuq eq le a myang wú, ó yuq eq le a wó gyô wú, ó yuq eq le a bûn myit wú é hkyô lé, Garai Gasang gi, Yhang lé chyitdap bang é matú lajang to byi bê nghut ri."<sup>☆</sup>

ga kê tô é eq rajung za nghut ri.

<sup>10</sup> Nghut kôlhang, Garai Gasang gi, haú hkyô lé, Yhang é Woi-nyí đông nga-nhung lé hpông shit bê nghut ri.

Woi-nyí haú gi, jung hkanmó lé ho gôn wú é nghut lui, Garai Gasang é zaú tô é hkyô lé lhang ho gôn wú é sù nghut ri.

<sup>11</sup> Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lê thú? Haú eq rajung za, Garai Gasang é Woi-nyí za a nghut jáng, Garai Gasang myit é hkyô lé, ó yuq le wó sê é a nghut.

<sup>12</sup> Nga-nhung gi, mingkân é woi-nyí lé hap yu tô é a nghut é za, Garai Gasang eq nga-nhung lé byí to bê jeju lé, ngamoq wó sê gyo râ matú, Garai Gasang chyáng mâ é Woi-nyí lé sheq hap yu tô é ru nghut lê.

<sup>13</sup> Haú mù lui, ngamoq gi, waxâng zô wui é hpaqchyî byéng-yá eq mhoq byí é dang đông taí é a nghut, Garaí é Woi-nyí eq mhoq byí é dang đông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang đông taí sân kyô é nghut lê.

<sup>14</sup> Haú Woi-nyí lé a wó é sù gi, Garai Gasang é Woi-nyí mai lo é hkyô pé lé a

hap yu é nghut lê; haí mù gâ le, haú pé gi, yhang é matú ngok é hkyô nghut lui, woi-nyí hkyô đông mai haú hkyô lé a wú é yanmai, yhang gi, haú pé lé a wó sê gyo nghut ri.

<sup>15</sup> Woi-nyí eq sêng é byù gi, lhunglhang lé wó jéyang lê, nghut kôlhang, yhang lé kúm gi, ó yuq eq le wó jéyang é a nghut.

<sup>16</sup> Chyúmdang má,

"Hkâsu mù gâ le, ó yuq wá, haú Yhumsing é myit lé sé mù, Yhang lé wó mhoqshit wú é thú?"<sup>☆</sup>  
ga kê tô ri. Nghut kôlhang, nga-nhung gi, Hkrisduq é myit lé wó é bang nghut lê.

### 3

#### *Noqkuq Hpúng Má Gam Hkoq Lhâm É Hkyô*

<sup>1</sup> Gumang wui ê, hí hkûn, ngò gi, nungmoq lé, Woi-nyí eq sêng é bang lé đông wó taí é a nghut; mingkan eq sêng é bang đông nghut kômù, Hkrisduq má zonú su dut bang lé đông sheq taí wú é nghut lê.

<sup>2</sup> Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lê.\* Ahkuí lhang, nungmoq gi, zoshuq apat lé a wó zo shi kó nghut ri.

<sup>3</sup> Nungmoq gi, mingkan eq sêng é bang ru nghut nyi ashí kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lê a nghut kó luq? Mingkan zo wui su nyi yap bum lê a nghut kó luq?

<sup>4</sup> Rayuq gi, "Ngò gi, Poluq htâng châng lê." ga, góyuq gi, "Ngò gi, Apolo htâng châng lê." ga taí nyi bùm kô é nghut jáng, nungmoq gi, mingkan zo wui nghut nyi bum lê a nghut kó luq?

<sup>5</sup> Apolo gi, ó wá nghut lê? Poluq gi, ó wá nghut lê? Nga-nhik gi, Garaí é dui-nhâng zoshâng za nghut lui, ó le ó lé, haú Yhumsing eq hun tô é muzó eq rajung za wùn waq é nghut lui, nungmoq gi, ngá-nhik đông mai wó lumjîng kô é ru nghut lê.

<sup>6</sup> Ngò gi, gabú danglù amyui lé hô kat, Apolo gi, wui hpyun byi, nghut kôlhang,

☆ 2:9 Esai 64:4 ☆ 2:16 Esai 40:13 \* 3:2 Nungmoq lé naú byi huq é, gâ é gi, lui é hkyô pé lé hí mhoq byi é lé gâ lê.

yuq kô lò nhang é gi, Garai Gasang za ru nghut lhê.

<sup>7</sup> Haû mù, amyui hô kat sù eq wui hpyun byi sù gi, ahkyak mó a nghut, yuq kô lò nhang é Garai Gasang za sheq ahkyak ru nghut lhê.

<sup>8</sup> Amyui hô kat sù eq wui hpyun byí su nhik myoqbyu tô é hkyô gi, rajung za nghut ri; nghut kôlhâng, yhumsing shikut é eq rajung za, ó le ô é shigyaú chyunghuq wó yú kó râ nghut lhê.

<sup>9</sup> Hkâsu mù gâ le, ngamoq gi, Garai Gasâng é mù zui luzúm wui nghut lhê; nungmoq gi, Garai Gasâng é yò, Garai Gasâng é yhùm nghut nyi akô.

<sup>10</sup> Garai Gasang, ngo lé byí to bê jeju eq rajung za, yhùm saí kung sù rayuq dông, ngò gi, yhùm apùn awang hi to bê nghut lhê; gotû byù gi, hau é ahtoq má saí toq jat nyi é nghut lhê. Nghut kôlhâng, yuq hkgangmó gi, yhumsing saí é má rago sidiq râ lhê.

<sup>11</sup> Hkâsu mù gâ le, hi to gù nghut é, Yesuq Hkrisduq nghu é yhùm apùn awang mai lai luí, ó yuq le, gotû yhùm apùn awang lé wó saí é a nghut.

<sup>12</sup> Yhùm apùn awang hau é ahtoq má, hîng, ngùn, hpaudap luqgok pé, sik, mhan, hkowá pé lé chûng mù saí jat kô é nghut jáng,

<sup>13</sup> yuq hkgangmó é muzó hkâsu nghut é hkyô lé lhoq htoq shit é hui râ nghut lhê. Haí mù luí gâ le, haû Yesuq é Buinyi gi, haû lé byu-myàng nhâng mù, haû buinyi lé gi, myí eq lhoq htoq shit râ nghut lhê. Haû myi gi, yuq hkgangmó saí é muzó hkasû é nghut é lé chyâm râ nghut lhê.

<sup>14</sup> Rayuq yuq saí é yhùm gi, ru gîng nyi é nghut jáng, haû yuq gi, yhang é shigyaú chyunghuq wó yú râ nghut lhê.

<sup>15</sup> Nghut kôlhâng, yhùm haû nyé gyó byuq é nghut jáng, yhang gi, yhùm sùm byuq é hui zo râ nghut lhê; yhang gi, asak lut kôlhâng, myishâm mai wó lut é byù su dut râ nghut lhê.

<sup>16</sup> Nungmoq gi, Garai Gasâng é noqkuq yhùm nghut luí, Garai Gasâng é Woi-nyí gi, nungmoq má lúng nyí bê hkyô lé a sé kó lhú?

<sup>17</sup> Rayuq yuq, Garai Gasâng é noqkuq yhùm lé lhoq htên é nghut jáng, Garai Gasang gi, haû yuq lé lhoq htên pyám râ nghut lhê. Hkâsu mù gâ le, Garai Gasâng é noqkuq yhùm gi, chyoiyúng lhê; nungmoq gi, noqkuq yhùm haû nghut akô.

<sup>18</sup> Nungmoq gi, yhumsing gùng yhumsing hkâlhoq nghoq kó. Nungmoq má é rayuq yuq, shí ipyat má é byù nyi a-tsáng dông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut râ lhê.

<sup>19</sup> Hkâsu mù gâ le, mingkan shí má é hpaqchyí byéng-yá gi, Garai Gasâng é hí má ngok é hkyô nghut ri. Haû gi, "Garai Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri."\* ga kâ tô é eq rajung za nghut ri.

<sup>20</sup> Hau htoq agó, "Haû Yhumsing gi, hpaqchyí byéng-yá bò bang myit é hkyô pé akôm nghut é lé sê lhê."\* ga le kâ tô ri.

<sup>21</sup> Haû mù luí, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat nghut lhê.

<sup>22</sup> Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htàngnùng má é hkyô le, banshoq gi, nungmoq é chyat nghut ri.

<sup>23</sup> Nungmoq gi, Hkrisduq é nghut akô; Hkrisduq gi, Garai Gasâng é nghut ri.

## 4

### *Hkrisduq É Lagyô Pé*

<sup>1</sup> Haû mù luí, byu pé gi, ngamoq lé, Hkrisduq é dui-nhâng zoshâng wui dông eq Garai Gasâng é zaú tô é hkyô pé lé taí pyô râ matú ap byí tô é hui bang dông sôn yù râ lhê.

<sup>2</sup> Haû dông nghut jáng, ap byí tô é hui bang gi, yhumsing lhumzui hkyô lé saksé shit râ dut lhê.

<sup>3</sup> Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng é nghut lhê.

<sup>4</sup> Haí mù gâ le, ngá gûng ngò mara a bò bûn é nghut kôlhâng, haû gi, ngo lé wó lhoq

sân-yúng byî é a nghut. Ngo lé jéyáng é sù gi, haù Yhumsîng nghut lhê.

<sup>5</sup> Haù mù, masat tô é ahkyíng a jé shimá haì lé le a jéyáng é za, haù Yhumsîng jé lé shoq, láng nyî keq. Yhang gi, mauchut hkaù má haq tô é pé lé byu-myàng nhâng mù, byu pé é myit nhiklhùm má lúng é hkyô lé lhoq htoq shit râ nghut lhê. Haù hkùn, yuq hkangmó gi, ó le ó wó gíng é hkyâ-ôn hkyô lé, Garai Gasâng chyáng mai wó yù râ nghut lhê.

<sup>6</sup> Gumang wui ê, ngò gi, "Kâ tô é gù mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yù sháng gaq nghù, nungmoq é akyu é matú, ngò eq Apolo má haù pé lé yù mù dangtú kut é nghut lhê. Haù hkùn, nungmoq gi, nghutbùn é dông, rayuq lé gi, wú ko, góyuq lé gi, wú shóm, a kut kó râ nghut lhê.

<sup>7</sup> Ó yuq wá, nang lé, góyuq eq shaì shoq kut lhê lhú? Nàng hap yu é a nghut le gi, wó râ lhú? Nàng, hap yu é nghut le gi, a hap yu é dông haì mù nghutbùn nyi lhê lhú?

<sup>8</sup> Nungmoq gi, râ é lhunglhang gumjup bang nghut bekô hung! Nungmoq gi, wó bang dut gù nghut bekô hung! Ngamoq a lom é za, nungmoq gi, hkohkam pé dut bekô hung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lhê ô!

<sup>9</sup> Nghut kôlhang, sat râ matú doqdan huì é shúm byû pé lé su, Garai Gasang gi, lagyô pé nghut é ngamoq lé de de kut htoq shit bê nghù, ngò wó myit ri. Ngamoq gi, nyi mi-nyì, joq mijoq, maumang lagyô pé eq waxâng zô wui é hí má, wú kùn jung dông dut nhang é huì nyi gù bê nghut lhê.

<sup>10</sup> Ngamoq gi, Hkrisduq é yanmai ngok é bang dông sôn yu é huì kôlhang, nungmoq kúm gi, Hkrisduq má hpaqchyí gyai bo é bang dông dut bekô hung! Ngamoq gi, wum nyhôm é bang dông sôn yu é huì kôlhang, nungmoq kúm gi, wúm bo é bang dông dut bekô hung! Nungmoq gi, hkunggá é huì akô; ngamoq kúm gi, hkunggá é a huì hung!

<sup>11</sup> Shí hkyíng shí u jé shoq, ngamoq gi, zòmut wuìshit huì é, mebu ajeq amyhâ dut

huì é, nhuq bat huì é, yhumsing é nyì jowò a wó é bang nghut nyi lhê.

<sup>12</sup> Ngamoq gi, yhumsing loq èq yhang mù zui wum kat nyi lhê. Ngamoq gi, nhîng pyâm é huì jáng, shimân byi, zing-rî é huì jáng, jân pyám kut lhê.

<sup>13</sup> Ngamoq gi, lumù gansang é huì jáng, dang ngón dang nguì tù nyo lhê. Ngamoq gi, ahkuì jé shoq, myidàm htoq mâ é hpoqkyuq hpoqpyâng eq mingkân é buzaq pé dông sôn yu é huì nyi lhê.

<sup>14</sup> Ngò gi, nungmoq lé hoq lhoq hpu râ matú haù pé lé kâ é a nghut, ngá é chyitdap zo wuì lé dông lhoq pùn kying râ matú ru nghut lhê.

<sup>15</sup> Nungmoq gi, Hkrisduq má mhoqshit bang ra mun wó kô é nghut kôlhang, îwâ pé myo shoq wó kô é a nghut; hkâsu mù gâ lé, ngò gi, haù gabú danglù dông mai, Hkrisduq Yesuq má nungmoq é îwa dut é nghut lhê.

<sup>16</sup> Haù mù luì, ngò kut é su cháng keq nghù, ngò, nungmoq lé lung kat lhê.

<sup>17</sup> Hau é yanmai, ngò gi, haù Yhumsîng má lhumzui sù nghut é, ngò chyitdap é ngá zo dông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mâ é ngá é asak duì hkyô lé, jowò hkangmó mâ é noqkuq hpúng hkangmó lé ngò mhoq byî é eq rajung za, nungmoq lé lhoq pun byi râ nghut lhê.

<sup>18</sup> Nungmoq mâ é ra-am gi, nungmoq chyáng ngò a dum jé lé râ su ngam pyám kômù, nghutbùn byuq bekô nghut ri.

<sup>19</sup> Nghut kôlhang, haù Yhumsîng gyô é nghut jáng, ngò gi, nungmoq chyáng hân za jé lé râ nghut lhê; haù hkùn, ngò gi, nghutbùn é byù haù bang haì taì é hkyô lé za a nghut, yhangmoq hai a-tsam wó é hkyô lé le gôn htoq râ nghut lhê.

<sup>20</sup> Hkâsu mù gâ le, Garai Gasâng é mingdán gi, taì é dang má bo é a nghut, a-tsam má sheq ru nghut lhê.

<sup>21</sup> Nungmoq hká dông ô nau akô lhú? Ngò gi, nungmoq chyáng, nuichùm hkat èq, a nghut jáng, chyitdap é eq nú-nhâm é myit mai lé lô ra râ lhú?

## 5

*Ashop É Đông Gungsho Zùm Yap É Hkyô*

### *Kut É Sû Lé Lhoq Htoq Pyám Râ Hkyô*

<sup>1</sup> Nungmoq chyáng, ashop é dông gungsho zùm yap é hkyô joq é lé, hkyak taí hú lò bekô; haú gi, a lumjǐng bǎng chyáng lǎng a dut wú é hkyô nghut é, yuqgè rayuq gi, yhângwâ é myiwe eq nyi zô lhùm nyi é hkyô nghut ri.

<sup>2</sup> Nghut kôle, nungmoq gi, nghutbùn nyi bum akô nhung! Haú dông a nghut é za, nungmoq gi, yón é myit tũn shit mù, haú su kut é byù lé, nungmoq é hpúng mai lhoq htoq pyám le, a gè kó lúh?

<sup>3</sup> Ngò gi, ngá gungdu, nungmoq eq rahá a nyi to kôlhang, ngá é i-myt gi, nungmoq eq rahá nghut nyi luí, gungdu jé nyi tô é dông mai, haú hkyô kut é sũ lé jéyáng doqdan gũ nghut lhê.

<sup>4</sup> Nungmoq gi, nga-nhũng é Yhumsĩng Yesuq é myĩng mai zup zing mù, ngá é i-myt gi, nungmoq eq rahá nghut nyi luí, nga-nhũng é Yhumsĩng Yesuq é a-tsam le, nungmoq eq rahá nghut nyi é hkũn,

<sup>5</sup> byù haú yuq lé, Tsadán é loq má ap byi pyám keq.\* Haú jǎng, Yhumsĩng é buinyi má, yhâng é woi-nyí gi, hkyi yu é hui rǎ matú, yhâng é yubak gungsho gi, lhoq htên pyám é hui rǎ nghut lhê.

<sup>6</sup> Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lúh?

<sup>7</sup> Nungmoq gi, múnchi a bo é bang nghut nyi kô é eq rajung za, múnchi a bo é muk htung asik su wó dut kô shǎng gaq, múnchi axau lé lhuí pyám keq. Hkâsu mù gǎ le, nga-nhũng é Lhoqlhai Poĩ sauzo, Hkrisduq gi, hkungga nhong é hui bê nghut lhê.

<sup>8</sup> Haú mù luí, nga-nhũng gi, agè agáu hkyô eq hpuzo nhâng hkyô nghut é múnchi axau bo é dông a nghut é za, lhumzui hkyô eq tengmán hkyo é muk nghut é, múnchi a bo é muk èq, Poĩ haú lé kut nyi shǎng.

<sup>9</sup> Ashop é dông gungsho zùm yap é bang eq hkâzũm kó nghũ, ngò, nungmoq lé, ngá é laiká má ká kat byi bê nghut lhê.

<sup>10</sup> Nghut kôlhang, mingkan shĩ eq sêng é, ashop é dông gungsho zùm yap é bang,

myoqnoq é bang, mhaú zô é bang eq hparà noq é bang lé hkâzũm yap kó nghũ é gi, a nghut. Haú su ru nghut le gi, mingkan htoq shĩ mai nungmoq htoq ló byuq ra kô rǎ nghut lhê.

<sup>11</sup> Nghut kôlhang, yhânggũng yhang gi, gumang ga kôle, ashop é dông gungsho zùm yap é, myoqnoq é, hparà noq é, lumù gansang é, i shuq wut é, mhaú zô é sũ ó yuq eq le a ge zùm yap kô rǎ nghut lhê nghũ, ahkuĩ, ngò, nungmoq lé ká kat nau é nghut lhê. Haú sũ é byù eq gi, rahá lǎng hkâzo kó.

<sup>12</sup> Haú noqkuq hpúng shinggan mã é bang lé jéyáng rǎ gi, ngò eq haĩ sêng lhê lúh? Nghut kôlhang, hpúng ahkaũ mã é bang lé nungmoq jéyáng rǎ dut lhê.

<sup>13</sup> Hpúng shinggan mã é bang lé gi, Garai Gasang jéyáng rǎ nghut lhê. Nghut kôlhang, "Haú agè agáu é sũ lé, nungmoq chyáng mai lhoq htoq pyám keq."\* gǎ tô ri.

## 6

### *Lumjǐng Bǎng Hkaũ Má Jéyáng Lhùm É Hkyô*

<sup>1</sup> Nungmoq mã é rayuq yuq gi, gumang góyuq eq dang-rhâng lhùm tô é nghut jǎng, haú hkyô lé jéyáng nhâng rǎ matú, haú sǎn-yũng bǎng é hí má taí rǎ malaĩ, Garai a wó bǎng é hí má wám taí rǎ lúh?

<sup>2</sup> Haú sǎn-yũng bang gi, mingkan lé jéyáng rǎ nghut é hkyô lé, nungmoq a sé kó lúh? Nungmoq gi, mingkan lé jéyáng rǎ bang nghut kôle nhĩng, tiq é mũ pé lé wó jéyáng é bang a nghut kó lúh?

<sup>3</sup> Nga-nhũng gi, maumǎng pé lé jéyáng rǎ nghut é hkyô lé, nungmoq a sé kô lúh? Haú mù, shĩ pyat mã é hkyô pé lé, gè gè yhang wó jéyáng kô rǎ nghut lhê ô!

<sup>4</sup> Haú mù luí, nungmoq gi, dang-rhâng lhùm é mũ pé joq é nghut jǎng, noqkuq hpúng mã ahkyak a nghut é bang lé tará agyĩ kut nhâng kô rǎ lúh?

<sup>5</sup> Ngò, haú su nghũ taí é gi, nungmoq lé hoq hpu nhâng rǎ matú nghut lhê. Lumjǐng bǎng chyáng dang-rhâng lhùm é hkyô lé wó jéyáng rǎ hpaqchyĩ luq shoq bo é byù,

\* 5:5 Tsadán é loq má ap byi pyám keq gǎ é gi, hpúng byũ wui eq a zùm yap nhâng lo rǎ lé taí é nghut lhê. † 5:6 Mún gǎ é gi, yubak mara lé taí nau é nghut lhê. Lhoqlhai Poĩ jé jǎng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk saĩ kô é nghut lhê. \* 5:13 Tará Pun 17:7



nungmoq chyáng rayuq lháng a nyi dut kô râ lhú?

<sup>6</sup> Nghut kôlhang, nungmoq gi, gumang yhangchang rayuq eq rayuq, a lumjínq bâng é hí má lháng rúnq shok lhum akô nhung!

<sup>7</sup> Nungmoq hkaû má mù jéyáng lhûm é hkyô joq é nghut jáng, nungmoq gi, sum lugù nghut bê. Góyuq èq shut le lháng rû ge lhê a nghut kô lhú? Mhaú zô é huí le lháng rû gè lhê a nghut kô lhú?

<sup>8</sup> Nghut kôle, nungmoq yhang gi, mhaú zo kô é eq shut kô é nghut luí, haû gi, nungmoq é gumang wui lé kut é nghut lhê.

<sup>9</sup> Agè agaú é bang gi, Garai Gasâng é mingdán mâ é shimân jeju a myang hkam yù kô râ nghut é hkyô lé, nungmoq a sé kô lhú? Hkâ-nâ nyi kô. Ashop é đông gungsho zùm yap é bang le, hparà noq é bang le, sumyi sulàng lú é bang le, shiwa hpó kut é bang le, yuqgè yhangchang nyi zô lhûm é mara kut shut é bang le,

<sup>10</sup> hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasâng é mingdán mâ é shimân jeju lé myang hkam yù kô râ a nghut.

<sup>11</sup> Nungmoq mâ é ra-am gi, haû su kut kô é bang nghut akô. Nghut kôlhang, nungmoq gi, nga-nhûng é Garai Gasâng é Woi-nyí eq Yhumsîng Yesuq Hkrisduq é myîng mai, mara hkyut san byí é, lhoq sân-yúng é eq chí sân pyám byí é hui bekô nghut ri.

### *Ashop É Đông Gungsho Zùm Yap É Hkyô*

<sup>12</sup> "Jung hkangmó kut râ ahkáng ngò wó lhê." Nghut kôlhang, jung hkangmó gi, akyû byí é a nghut. "Jung hkangmó kut râ ahkáng ngò wó lhê." Nghut kôlhang, haí jûng èq le ngo lé wó sing pyám râ a nghut.

<sup>13</sup> "Zoshuq gi, wamdaû é matú nghut mù, wamdau gi, zoshuq é matú nghut ri." ga nungmoq ra-am taí kô râ nghut lhê. Nghut kôlhang, Garai Gasang gi, haû í jûng é lé lhoq htên pyám râ nghut lhê. Gungdu gi, ashop é đông gungsho zùm yap hkyô é matú a nghut é za, haû Yhumsîng é matú nghut mù, haû Yhumsîng gi, gungdû é matú nghut ri.

<sup>14</sup> Garai Gasang gi, Yhâng é a-tsâm èq, haû Yhumsîng lé, shi é mai lhoq dui toq yû bê nghut mù, nga-nhûng lé le lhoq dui toq yû râ nghut lhê.

<sup>15</sup> Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lhú? Haû nghut le nhîng, Hkrisduq é gungsho showui showang pé lé yù mù, shiwa myhî pé eq rading ralhum za kut pyám nhâng kô râ lhú? Hkâ-nhâm le a ge dut nhâng!

<sup>16</sup> Shiwa myhî eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lhú? Hkâsu mù gâ le, "Yhangnhik gi, gungsho ralhum za dut kô râ nghut lhê." ✧ ga taí tô ri.

<sup>17</sup> Nghut kôlhang, haû Yhumsîng eq rading ralhum za dut é sù gi, woi-nyí má Yhang eq ralhum za dut bekô nghut ri.

<sup>18</sup> Ashop é đông gungsho zùm yap é hkyô lé koi pyám keq. Byù rayuq kut shut é gotù mara pé banshoq gi, yhâng é gungdu shîng-gan má nghut lhê; nghut kôlhang, ashop é đông gungsho zùm yap é hkyô kut shut é sù gi, yhumsîng gùng lé mara shut é sù nghut ri.

<sup>19</sup> Nungmoq é gungdu gi, Garai Gasâng chyáng mai nungmoq wó yû bê nghut é, nungmoq má lúng nyi é Chyoiyúng Woi-nyí é noqkuq yhûm nghut é lé, nungmoq a sé kô lhú? Nungmoq gi, yhumsîng gùng lé sing é bang a nghut.

<sup>20</sup> Hkâsu mù gâ le, nungmoq gi, ahpau ralhum byi mù wui hpyit tô é hui bê bang nghut akô. Haû mù luí, nungmoq é gungdû èq, Garai Gasang lé, hkunggâ é hkyô shit nyi keq.

## 7

### *Myî Yu É Eq Sêng É Hkyô*

<sup>1</sup> Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le gè ri.

<sup>2</sup> Nghut kôlhang, ashop é đông gungsho zùm yap é hkyô gyai myô é yanmai, yuqgè hkangmó gi, yhumsîng é myiwe wó râ lhê; myiwe hkangmó gi, yhumsîng é yuqgè wó râ lhê.

<sup>3</sup> Haû yhumsîng hpó gi, wò joq é eq rajung za, yhâng yhumsîng myhí eq zùm sháng gaq; haû dông za, yhumsîng myhí le, yhâng yhumsîng hpó eq zùm sháng gaq.

<sup>4</sup> Haû yhumsîng myhí é gungdu gi, yhânggùng yhang za sêng é a nghut, yhâng é yhumsîng hpó eq le sêng lhê. Haû eq rajung za, yhumsîng hpó é gungdu gi, yhânggùng yhang za sêng é a nghut, yhâng é yhumsîng myhí eq le sêng lhê.

<sup>5</sup> Nungmoq myit huí lhum luí, kyûdùng é má rago ap nong râ ahkýng ayoq za a nghut jáng gi, rayuq eq rayuq hkâhe lhum kó. Nungmoq yhumsîng gùng lé a wó hkang é yanmai, Tsadán eq gunglaú é a hui kô sháng gaq, ahkýng ayoq haû lai jáng, rahá dum zùm keq.

<sup>6</sup> Ngò, haû su nghû taí é gi, hkunmó hkyô é dông a nghut, ahkáng byí kat é dông ru nghut lhê.

<sup>7</sup> Byù banshoq bang gi, ngò su nyi râ lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

<sup>8</sup> Ahkuí, myiwe a yù lô é bang eq chuimó pé lé ngò taí kôlé, ngò su, haû dông jáng nyi pyám kô é nghut le, yhangmoq é matú ge é hkyô nghut ri.

<sup>9</sup> Nghut kôlhang, yhumsîng gùng lé a wó hkang kô é nghut le gi, yhangmoq, myi yû myi lô râ lhê; hkâsu mù gâ le, myi su nyé luí ô nau nyi râ malaí, myi yu myi lô le je ge lhê.

<sup>10</sup> Myi yû bê bang lé, ngò, hkunmó hkyô kôlé, shí gi, ngò dông hkyô é a nghut, Yhumsîng chyáng mâ é ru nghut lhê: Yhumsîng myhí gi, yhâng é yhumsîng hpó chyáng mai a ge gang râ nghut lhê.

<sup>11</sup> Nghut kôlhang, yhang gâng é nghut jáng, myi a dum lô é za nyi râ lhê, haû a nghut jáng, yhâng é yhumsîng hpó eq dum xoq yû râ lhê. Yhumsîng hpó le, yhâng é yhumsîng myhí lé a ge kâng pyám râ nghut lhê.

<sup>12</sup> Góbang lé ngò shí su nghû taí kôlé, shí gi, Yhumsîng chyáng mâ é a nghut, ngò dông mai taí é ru nghut lhê. Gumang rayuq yuq gi, lumjîng sù a nghut é yhumsîng myhí wó é nghut le, myiwe haû, yhang eq rahá

nyi nau é nghut jáng, yhang lé a ge kâng pyám râ nghut lhê.

<sup>13</sup> Myiwe rayuq gi, lumjîng sù a nghut é yhumsîng hpó wó é nghut le, yuqgè haû, yhang eq rahá nyi nau é nghut jáng, yhang eq a ge gang râ nghut lhê.

<sup>14</sup> Hkâsu mù gâ le, haû a lumjîng sù yhumsîng hpó gi, yhâng yhumsîng myhí dông mai lhoq sân-yúng é hui bê nghut mù, a lumjîng sù yhumsîng myhí le, lumjîng sù nghut é yhâng é yhumsîng hpó dông mai lhoq san lhoq yúng é hui bê nghut ri. Haû a nghut jáng, nungmoq é zo wuí gi, a sanséng dut kô râ nghut lhê; nghut kôlhang, yhangmoq gi, haû dông mai, chyoiyúng bekô nghut ri.

<sup>15</sup> Nghut kôlhang, haû a lumjîng sù gâng ló naû jáng gi, gâng ló sháng gaq. Lumjîng é yuqgè nghut nghut, myiwe nghut nghut, haû sù é hkyô pé má gi, hkûm zing tô é hkyô a joq é nghut lhê. Garai Gasang gi, nganhung lé, nguingón shoq nyi sháng gaq ga ji yù bê nghut lhê.

<sup>16</sup> Yhumsîng myhí ê, náng é yhumsîng hpó lé wó hkyi yù râ nghû, hkâsu wó sé râ lhú? Yhumsîng hpó ê, náng é yhumsîng myhí lé wó hkyi yù râ nghû, hkâsu wó sé râ lhú?

<sup>17</sup> Hká dông nghut kôlhang, yuq hkangmó gi, Garai Gasang, yhang lé ji yu tô é hkûn, haû Yhumsîng mai yhang lé nyi nhang tô é dông asak dui nyi râ lhê. Haû gi, noqkuq hpúng pé banshoq má ngò tô to byí é tará nghut lhê.

<sup>18</sup> Byù rayuq gi, ji yu é huí é hkûn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù dông a dut byuq sháng gaq. Byù rayuq gi, ji yu é huí é hkûn, ahpyo-kuq hpyit a hkam yu to shí é nghut jáng, ahpyo-kuq hpyit a hkam yù sháng gaq.

<sup>19</sup> Ahpyo-kuq hpyit hkâm hkyô gi, haí ahkyak a nghut; ahpyo-kuq hpyit a hkâm hkyô gi, haí ahkyak a nghut. Garai Gasâng é hkunmó pé lé châng nyi é za sheq ahkyak nghut lhê.

<sup>20</sup> Yuq hkangmó gi, yhang lé Garai Gasâng eq ji yu é hkûn lhê su xoq nyi nyi râ lhê.

<sup>21</sup> Náng gi, ji yù huí é hkûn jùn dut nyi é lhú? Haû hkyô lé hkâ-myit chiq. Nghut

kôlhang, nàng gi, luthkyô wó yu é nghut jáng, haú dông nyi aq.

<sup>22</sup> Hkâsu mù gâ le, haú Yhumsing eq ji yu é huí é hkûn, jùn dut nyi é sù gi, haú Yhumsing eq lhoq lhut yu é byù nghut bê. Haú eq rajung za, ji yu é huí é hkûn, luthkyô wó é sù gi, Hkrisduq é jùn nghut ri.

<sup>23</sup> Nungmoq gi, Garai Gasâng eq ahpau byi mù wui hpyit yu é hui bê bang nghut akô. Haú mù, byu pê é jùn hkâdut kó.

<sup>24</sup> Gumang wui ê, yuq hkangmó gi, yhumsing lé Garai Gasâng eq ji yu é huí to bê dông, Yhâng é hí má xoq nyi nyi rá lê.

<sup>25</sup> Ahkuí, zomyi zorâm wui é hkyô taí kôlé. Haú Yhumsing chyáng mâ é hkunmó gi, ngò a wó; nghut kôlhang, Yhumsing é shogyo nhikmyín é yanmai, lumgíng sù rayuq nghut nyi é dông, ngò, nungmoq lé hkyô shit rá nghut lê.

<sup>26</sup> Ahkuí hui zô é wuîhke hkyo é yanmai, nungmoq gi, yhumsing nyi to é su xoq nyi nyi le je ge ri nghû, ngò wó myit ri.

<sup>27</sup> Nàng, myiháng bê a nghut lhi? Lhoq kang rá hkâda lo. Nàng, myi a háng shi a nghut lhi? Myi hkâhô lo.

<sup>28</sup> Nghut kôlhang, nàng, myiháng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myiháng é bang gi, shí pyat má wuîhke hkyô pé myo myo hui kó rá nghut mù, ngò, nungmoq lé haú mai hkyi yù nau ri.

<sup>29</sup> Gumang wui ê, ngò taí nau é lichyúm gi, ahkýng tot byuq bê nghut mù, ahkuí mai, myi wó é bang gi, a wó é bang dông nyi kó sháng gaq.\*

<sup>30</sup> Yón ngaú huí é bang gi, a huí é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su;

<sup>31</sup> haú mingkan zè pé lé chung é bang gi, haú pé lé a myit tuí é bang su, nghut kó sháng gaq. Hkâsu mù gâ le, shí mingkân é ahkuí lê é azòng isâm gi, laí ló nyi é nghut lê.

<sup>32</sup> Ngò gi, nungmoq lé a myit myo nhâng naù. Myi a yù shí é sù gi, haú Yhumsing lé hkâsu wó gabú nhâng rá matú, haú Yhumsing é muzó lé myit chiq nyi ri.

<sup>33</sup> Nghut kôlhang, myi yù bê sù gi, yhâng é yhumsing myhí lé hkâsu wó gabú nhâng rá matú, mingkan shi é muzó eq séng luí myit chiq nyi ri.

<sup>34</sup> Haú mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyí má haú Yhumsing lé rago wó ap nóng rá matú, Yhumsing é muzó pé eq séng luí myit chiq nyi ri. Nghut kôlhang, myi ló bê myiwe gi, yhâng é yhumsing hpó lé hkâsu wó gabú nhâng rá matú, mingkan shi é muzó eq séng luí myit chiq nyi ri.

<sup>35</sup> Ngò, haú su nghû taí é gi, nungmoq é matú ge é hkyô nghut lê; nungmoq lé tara eq zú zing é a nghut é za, myit a byò lo shoq Yhumsing lé wó ap nóng rá matú, jô é dông asak wó duí kô sháng gaq nghu é hkyô ru nghut lê.

<sup>36</sup> Nghut kôlhang, rayuq yuq gi, yhang dúng tô é zomyi gyíng lé a htuk é dông kut nyi é su wó myit ngàm jáng, myiwe haú asak kô lo nyi mù, hâng yù rá dut bê nghû myit é nghut le gi, yhang ô nau é dông kut sháng gaq. Yhang mara kut é a nghut. Yhangnhik gi, hâng lhum rá lê.

<sup>37</sup> Nghut kôlhang, yhang gi, haú hkyô lé yhâng é myit mai wó lhoq zím pyâm é nghut mù, yut yut ô naù hkyo é ahkaú má a nghut é za, yhumsing ô naù é hkyô lé wó hkúm zing pyâm é sù nghut luí, haú zomyi gyíng lé a hâng yù rá matú wó myit hpyit bê sù nghut é nghut jáng, yhang gi, ge é hkyô kut bê nghut ri.

<sup>38</sup> Haú mù luí, zomyi gyíng haú lé hâng yu é sù gi, jô é hkyô kut bê nghut ri; nghut kôlhang, zomyi gyíng haú lé a hâng yu é sù gi, je ge é hkyô kut bê nghut ri.

<sup>39</sup> Myiwe rayuq gi, yhâng é yhumsing hpó rû dui nyi nyi, yhang eq xoq tô ashí nghut lê. Nghut kôlhang, yhâng é yhumsing hpó shi byuq é nghut jáng, yhang gi, myi ló rá ahkáng dum wó bê nghut lê, nghut kôle, haú yuq gi, Yhumsing eq séng é sù dut rá lê.

<sup>40</sup> Ngò jéyáng é dông ga jáng, myi a dum ló é wó nyi le gi, yhâng é matú je gabú hkyô

\* 7:29 A wó é bang dông nyi kó sháng gaq gâ é gi, Garai mù lé je myit zuq nyi sháng gá naù é nghut lê.

dut râ nghut lhê. Ngò le, Garai Gasâng é Woi-nyí wó sù nghũ wó myit ri.

## 8

### *Hparà Lhò Lé Tíng Byî É Zoshuq*

<sup>1</sup> Ahkuí, hparà lhò pé lé tíng byî é zoshuq hkyô: nga-nhúng banshoq bang gi, haú hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê.

<sup>2</sup> Byù rayuq yuq gi, rajung jung lé sé bûn é nghut le, yhang sé âng é lé lhang a sé shi nghut ri.

<sup>3</sup> Nghut kôlhang, Garai Gasang lé chyitdap é sù gi, Garai Gasâng eq sê é sù nghut ri.

<sup>4</sup> Haú mù luí, hparà lhò pé lé tíng byî é zoshuq lé zô é eq séng luí gi: hparà lhò gi, mingkan má hái lhang a nghut é hkyô lé le, Garai Gasang gi, Yhang rayuq mai lai luí gotû a nyi é lé le, nga-nhúng sê lhê.

<sup>5</sup> Hkâsu mù gâ le, mauhkûng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlhang

<sup>6</sup> nga-nhúng é matú gi, Íwa nghut é Garai Gasang rayuq za nyi é nghut mù, lhunglhang gi, Yhang mai hpan é nghut luí, nga-nhúng gi, Yhang é matú asak dui nyi é nghut lhê. Yesuq Hkrisduq nghu é Yhumsing rayuq za nyi é nghut mù, lhunglhang gi, Yhang đông mai hpan é nghut luí, nga-nhúng gi, Yhang đông mai asak dui nyi é nghut lhê.

<sup>7</sup> Nghut kôlhang, yuq hkanmó gi, haú hkyô lé sê gam hkoq yu é a nghut. Ra-am gi, ahkuí jé shoq hparà lhò pé má mán byuq kô é yanmai, haú sù é zoshuq lé yhangmoq zô é hkûn, hparà lhò lé tíng byî é zoshuq đông myit sôn yu akô. Yhangmoq myit sôn sê é hkyô wum nyhôm é yanmai, mara wó bûn akô nghut ri.

<sup>8</sup> Nghut kôlhang, zoshuq gi, nga-nhúng lé, Garai Gasâng shut shuí chyâng e é a nghut. Nga-nhúng a zô é nghut le gi, je sêm byuq ló é a nghut, zô é nghut le gi, je ge lo é a nghut.

<sup>9</sup> Haú su ga kôlhang, nungmoq a htung a htê zô é hkyô gi, lumjín myit wum nyhóm

bâng é matú myit leqbat jowò a dut shoq sidiq keq.

<sup>10</sup> Hkâsu mù gâ le, sumsé hpaqchyí wó é bang nungmoq gi, hparà lho é noqkuq yhùm má zô nyi kô é lé, haú myit sôn sê é hkyô má wum nyhôm é sù rayuq yuq myang é nghut jáng, hparà lhò pé lé tíng byî é zoshuq lé, yhang wám zo râ lé wum byî é a dut kó râ lú?

<sup>11</sup> Haú mù, Hkrisduq shí hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyí eq lhoq htên pyâm é hui berâ nghut lhê.

<sup>12</sup> Nungmoq gi, haú hkyô đông mai, nungmoq é gumang wuì lé mara kut shut é eq, yhangmoq é myit sôn sê é hkyô wum nyhôm é lé nò nhang é hkûn, Hkrisduq lé mara kut shut é nghut bekô.

<sup>13</sup> Haú mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhang sháng gaq, ngò, hkâ-nhám le, sho lé a zo lo râ nghut lhê.

## 9

### *Lagyo Rayuq É Ahko Ahkáng*

<sup>1</sup> Ngò gi, lut sù a nghut lú? Ngò gi, lagyo rayuq, a nghut lú? Ngò gi, nga-nhúng é Yhumsing Yesuq lé myang wú bê sù, a nghut lú? Nungmoq gi, haú Yhumsing má, ngò zui saí é muzó é ashi pé chyat, a nghut kô lú?

<sup>2</sup> Ngò gi, góbâng chyáng lagyo a nghut kôlhang, nungmoq chyáng gè gè nghut lhê! Hkâsu mù gâ le, nungmoq gi, haú Yhumsing má, ngò lagyo nghut é hkyô saksé dizik nghut bum akô.

<sup>3</sup> Ngá ahtoq má jéyáng bang lé, ngá gùng ngò taí hung kat kôlé.

<sup>4</sup> Ngamoq gi, zo râ shuq râ ahko ahkáng a wó é bang nghut lhê lú?

<sup>5</sup> Gotû lagyo pé eq Yesuq é yhanggu yuqzô pé eq Kehpa kut é su, lumjín sù nghut é yhumsing myhí shuí chùng râ, ngamoq, ahko ahkáng a wó é nghut lhê lú?

<sup>6</sup> Ngò eq Barnaba baú za, asak dui hkyo é matú mù zui ra râ lú?

<sup>7</sup> Ó yuq wá, yhumsing zoshuq wùn luí, gyè mù wùn waq râ lú? Ó yuq wá, tsibiyiq hkyâm saí mù, haú mâ é tsibiyiq shi a zo kut

râ lú? Ó yuq wá, sau rém mù, sau naú a shuq kut râ lú?

<sup>8</sup> Ngò gi, shí hkyô pé lé xângzo hkyam đông za taí é nghut lè lú? Haú tará má le, rajung za taí tô lè, a nghut lú?

<sup>9</sup> Hkâsu mù gâ le, haú Mosheq é tará má, "Guq nâng nyi é no lé nhuttsung hkâ-tsung to byi."\* ga kê tô ri. Garai Gasang gi, no eq séng luí za chiq é nghut lè lú?

<sup>10</sup> Gè gè yhang, yhang gi, nga-nhùng é matú taí é a nghut kô lú? Nghut lè, haú gi, nga-nhùng é matú kê to byi é nghut lè. Haí mù gâ le, yò hpuq sù, yò hpuq é eq, guq bat sù, guq bat é gi, kyô chòm shù yù râ lé myoqbyù luí, kut kô é nghut lè.

<sup>11</sup> Ngamoq gi, nungmoq chyáng woi-nyi amyui sân kat bê nghut mù, nungmoq chyáng mâ é mingkan zè lé shù yu é nghut jáng, lùm myô é dut byuq bekô lú?

<sup>12</sup> Góbang gi, nungmoq chyáng mai garúm é ahko ahkáng wó kô é nghut jáng, ngamoq gi, haú lé je wó râ lè a nghut kô lú?

Nghut kôlhang, ngamoq gi, ahko ahkáng haú lé a yu é nghut lè. Haú yù râ maláí, Hkrisduq é gabú danglù gi, hkùm zing pyâm é a hui râ matú sheq, jung hkangmó lé ngamoq hkam jân nyi lè.

<sup>13</sup> Haú noqkuq yhùm má mù zuí é bang gi, yhangmoq é zoshuq lé haú noqkuq yhùm mai wó é hkyô eq, hkungga gyap má dojaú é bang gi, hkungga gyap má nhông byi é ra-am lé myàng zô é hkyô lé, nungmoq a sé kô lú?

<sup>14</sup> Haú eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lè ga, haú Yhumsing hkunmó hkyô to bê nghut ri.

<sup>15</sup> Nghut kôlhang, ngò gi, ahko ahkáng haú pé haí lé le a yu é nghut lè. Nungmoq, ngo lé haú su lhom kut byi râ lé myoqbyù mù, ngò, shí hkyô lé kê é a nghut. Hkâsu mù gâ le, ngò haú su gumrong é hkyô lé, rayuq yuq lhoq htên pyám byi râ htoq má, ngò shí byuq le lhang je ge ri.

<sup>16</sup> Nghut kôlhang, gabú danglù lé ngò hko kyô é hkùn, ngò gumrông jang a joq; hkâsu mù gâ le, haú gi, ngò a kut a ge é ngá wô nghut lè. Haú gabú danglù lé ngò a hko

kyô é nghut le gi, ngò dingnyé wó râ nghut lè.

<sup>17</sup> Yhumsing nau é myit mai ngò hko é nghut jáng, shigyaú chyunghuq wó râ nghut lè; yhumsing nau é myit mai a nghut jáng gi, ngo lé lùm luí ap tô é lé, agon za wùn waq nyi é dut râ nghut lè.

<sup>18</sup> Haú mù luí, ngá é shigyaú chyunghuq gi, haí nghut lè lú ga jang, haú gabú danglù lé hko kyô é hkùn, ngò gi, ahpau a yu é za wó ap nóng luí, gabú danglù hko kyo hkyô mâ é ngá é ahko ahkáng pé lé ngò a yu é amyat nghut lè.

<sup>19</sup> Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gung ngò, yuq hkangmó é jùn kut nyi lè.

<sup>20</sup> Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkùn, Yudaq byù rayuq đông dut nyi lè. Ngò gi, tará hkaú má nyi sù a nghut kôlhang, tará hkaú mâ é bang lé shuí lhing yù râ matú, tará hkaú má nyi bang chyáng nghut nyi é hkùn, tará hkaú mâ é byù rayuq đông dut nyi lè.

<sup>21</sup> Ngò gi, tará a wó bang lé shuí lhing yù râ matú, tará a wó bang chyáng nghut nyi é hkùn, tará a wó sù rayuq đông dut nyi lè. Nghut kôlhang, gè gè ga jáng, Garai Gasang é tará mai a lut htoq é za, Hkrisduq é tará hkaú má nyi sù nghut lè.

<sup>22</sup> Ngò gi, wum nyhóm bang lé shuí lhing yù râ matú, wum nyhóm bang chyáng nghut nyi é hkùn, wum nyhóm sù rayuq đông dut nyi lè. Ngò gi, wó dut é hkyô đông mai byù ra-am lé wó hkyô sháng gaq nghù, byù lhunglhang bang chyáng, byù ajà jà đông nyi nyi lè.

<sup>23</sup> Ngò gi, gabú danglù mai wó é shimân jeju pé lé wó chòm hkam yù sháng gaq nghù, gabú danglù é yanmai haú pé ban-shoq lé kut é nghut lè.

<sup>24</sup> Dìn shingjóng poí má dìn râ bang ban-shoq dìn kôlhang, rayuq za shigyaú chyunghuq wó é hkyô lé, nungmoq a sé kô lú? Chyunghuq wó râ matú dìn keq.

<sup>25</sup> Sup poí má shingjóng lhum é bang yuq hkangmó gi, yhumsing gung yhumsing tará htan é đông lhoq mhân yù râ lè.

\* 9:9 Tará Pun 25:4

Yhangmoq gi, gîng nyi râ a nghut é janmaú wó râ matú, haú su kut é nghut akô; nghut kôlhang, nga-nhúng gi, ahtum abyuq gîngtîng nyi râ nghut é janmaú wó râ matú shikut é nghut lhê.

<sup>26</sup> Haú mù luí, ngò gi, jum dân din é byù rayuq su din é sù a nghut. Ngò gi, laì lé bat é byù rayuq su, akôm má bat é sù le a nghut.

<sup>27</sup> Ngò gi, góbâng chyáng mungdang hko é htâng má, ngá gûng ngò, shigyaú chyunghuq eq a gîngdán sù a dut sháng gaq nghû, ngá gûng lé gyai yhang lhoq mhân yù mù, ngá gung lé jùn kut yu nyi lhê.

## 10

### *Israelaq Pê Ê Labaú Mai Sidiq Byî Ê Hkyô*

<sup>1</sup> Gumang wui ê, ngò gi, dut laì lo é hkyô lé, nungmoq lé a sé a dut nhâng nau é nghut lhê; hí hkûn, nga-nhúng é íchýí îwa pé banshoq bang gi, mhutdûm ô má nyi mù, Nhông Nè mai wó laì byit kô é nghut lhê.\*

<sup>2</sup> Yhangmoq banshoq bang gi, mhutdûm eq Nhông Nè má, Mosheq é chángzô pé dông baptisma hkam yu é bang chyat nghut bekô.

<sup>3</sup> Yhangmoq banshoq bang gi, rajung zâ é woi-nyí zang zo kô é eq,

<sup>4</sup> rajung zâ é woi-nyí wui shuq kô é nghut lhê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haú gi, Hkrisduq nghut bê.

<sup>5</sup> Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

<sup>6</sup> Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi râ matú nga-nhúng é azòng dut bê nghut ri.

<sup>7</sup> "Byu pé gi, zùng mù, zo luí shuq luí, a lumjîng bang kut é dông, toq mù, ye bum akô."✧ ga kâ tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó.

<sup>8</sup> Yhangmoq mâ é ra-am gi, ashop é dông gungsho zùm yap é hkyô shut kômù, ra-nyí má za í mûn sum hkyîng yuq shi byuq é su,

ashop é dông gungsho zùm yap é hkyô le, nga-nhúng gi, a ge kut shut râ nghut lhê.

<sup>9</sup> Yhangmoq mâ é ra-am gi, haú Yhumsîng lé chyâm luí, lhangmui pé eq hte sat é huí bùm kô é su, haú Yhumsîng lé, nga-nhúng gi, a ge chyâm râ nghut lhê.

<sup>10</sup> Yhangmoq mâ é ra-am gi, nhutluq shô-myo kôluí, lhoq htên é maumâng eq sat pyâm é hui kô é su, nungmoq gi, nhutluq shô-myo hkâkut kó.

<sup>11</sup> Yhangmoq chyáng wú yû râ azòng dông haú pé dut htoq luí, ló htáng râ ipyat pé má nyi âng to bang nga-nhúng é matú sidiq byi râ dông kâ to bê nghut ri.

<sup>12</sup> Haú mù luí, nungmoq gi, yap gîng nyi bê su ngàm kô é nghut jáng, a leqbat râ matú sidiq nyi keq!

<sup>13</sup> Byu chyáng htoq sê é gunglaú hkyô za nungmoq hui râ nghut lhê. Garai Gasang gi, lhumzui sù nghut lhê mù, nungmoq a wó jân é gunglaú hkyô lé hui nhâng râ a nghut. Nghut kôlhang, nungmoq gunglaú huí é hkûn, Yhang gi, haú lé nungmoq wó jan râ matú, hkyô htong byi râ nghut lhê.

### *Hparà Lhô Noq Hkyô Lé Koi Pyám Râ Hkyô*

<sup>14</sup> Haú mù luí, ngò chyitdap é luzúm wui ê, hparà lâ noq hkyô lé koi pyám keq.

<sup>15</sup> Nhik gyîng bang lé ngò taí lhê; ngò haí taí nyi é hkyô lé nungmoq gùng myit sôn yù keq.

<sup>16</sup> Nga-nhúng, jeju bûn nyi é jeju góm lé shuq é hkûn, Hkrisduq é sui má chôm zùm bê a nghut kó lú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kô lú?

<sup>17</sup> Haí mù gâ le, muk htung ralhum za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gâ le, nga-nhúng banshoq bang gi, haú rah-tung zâ é muk lé chôm gàm zô é bang chyat nghut lhê.

<sup>18</sup> Israelaq byu pé é hkyô lé myit wú keq. Haú hkungga lé zô é bang gi, hkungga gyap má chôm lom é bang nghut lhê, a nghut kó lú?

\* **10:1** Bun zo ralhum mai raxê lhum gi, Htoq Ló Laiká má bo é Mosheq htâng cháng bâng é hkyô lé kâ tô é nghut lhê.

✧ **10:7** Htoq Ló 32:6

19 Hparà lhô, a nghut jáng, hparà lhô lé títng byî é hkungga gi, rajung jung nghut lhê nghû, ngò taí é lhú?

20 Haû su taí é a nghut, a lumjítng bâng é hkungga gi, Garai Gasang lé nhông byî é a nghut, nat gâng pé lé títng byî é ru nghut lhê. Ngò gi, nungmoq, nat gâng pé eq chòm zum nyi bang dut râ lé a ô nau é nghut lhê.

21 Nungmoq gi, haû Yhumsing é góm lé le, nat gâng pé é góm lé le, ge shuq râ a nghut; nungmoq gi, haû Yhumsing é zangbó má le, nat gâng pé é zangbó má le, rahá ge bo lòm râ a nghut.

22 Nga-nhúng gi, haû Yhumsing lé manôn nhâng nau é bang dut râ a nghut kô lhú? Nga-nhúng gi, Yhâng htoq je wúm bo é bang nghut lhê lhú?

### *Lumjítng Su É Luthkyô*

23 "Jung hkangmó kut râ ahkáng wó lhê." nghut kôlhang, jung hkangmó gi, akyû wó é a nghut. "Jung hkangmó kut râ ahkáng wó lhê." nghut kôlhang, jung hkangmó gi, byû lé wó kô làm nhang é a nghut.†

24 Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

25 Sho úng gài má úng é haí lé lé, úng-âng é myit èq a myi gôn é za zo keq.

26 Hkâsu mù gâ le, "Myidàm htoq eq haú má joq é jung hkangmó gi, Yhumsing é chyat nghut lhê."☆ gâ tô ri.

27 A lumjítng bang ra-am, nungmoq lé zang zo jì mù, nungmoq ê nau é nghut jáng, úng-âng é myit èq a myi gôn é za, nungmoq hí má to byî é gû lé zo keq.

28 Nghut kôlhang, rayuq yuq, nungmoq lé, "Shî gi, hparà lhô lé títng byi bê nghut lhê." ga taí kyô é nghut jáng, nungmoq lé taí kyo su é yanmai le, myit úng-âng é yanmai le, haú lé hkâzo kó.

29 Úng-âng é myit haû gi, nungmoq é a nghut, góyuq é úng-âng é myit lé taí nau é ru nghut lhê. Ngá é luthkyô lé, haí mù góyuq é úng-âng é myit èq jéyáng é huí nhang lhê lhú?

30 Ngò jeju bûn é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haí mù lumu pyâm é ngò huí râ lhú?

31 Haû mù luí, nungmoq zo kôlhang, shuq kôlhang, haí kut kôlhang, Garai Gasang é hpungwup shingkâng é matú chyat kut keq.

32 Ngò gi, yuq hkangmó lé, hkyô hkangmó má shikut luí myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasang é noqkuq hpúng mâ é byû lé nghut nghut, ó yuq lé le myit hkâleqbat nhâng kó.

33 Hkâsu mù gâ le, ngò gi, yhangmoq hkyi yu é wó hui kô sháng gaq nghû, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

## 11

1 Ngò gi, Hkrisduq é alik châng é su, nungmoq gi, ngá é alik cháng keq.

### *Noqkuq É Má Htap Htuk Râ Hkyô*

2 Nungmoq gi, hkyô hkangmó má ngo lé bûn nyi kô é yanmai le, nungmoq lé ngò hai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-on lhê.

3 Ahkuí, ngò, nungmoq lé sê hkyâng nhâng nau é hkyô gi: yuqgè hkangmó é ulhum gi, Hkrisduq nghut ri; myiwe hkangmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri.

4 Yuqgè hkangmó gi, kyûdûng le nghut nghut, myiqhtoi htoí le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoí pyâm é nghut bê.

5 Myiwe hkangmó gi, kyûdûng le nghut nghut, myiqhtoi htoí le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoí pyâm é nghut bê. Haû gi, yhâng é ulhum lé wuq pyâm é eq rajung za nghut ri.

6 Myiwe rayuq gi, yhâng é ulhum lé a nghop pyâm é nghut jáng, yhâng é xâm

† 10:23 Bun zo 23 má é dangngho gi, Korinhtuq byu pé lhaq taí é dang nghut lhê. ☆ 10:26 Hkya-on 24:1

lé nyhâm pyám ra râ nghut lhê. Nghut kôlhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoi lhê nghut jáng, yhang gi, yhâng é ulhum lé nghop to ra râ nghut lhê.

<sup>7</sup> Yuqgè gi, Garai Gasâng é azòng isâm eq hpungwup shingkang nghut é yanmai, yhâng é ulhum lé a nghop râ é nghut lhê. Myiwe kúm gi, yuqge é hpungwup shingkang nghut ri.

<sup>8</sup> Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê.\*

<sup>9</sup> Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqge é matú hpan tô é ru nghut lhê.

<sup>10</sup> Haû nghut é yanmai le, maumang lagyo pê é yanmai le, myiwe gi, ahko ahkáng kumlhá dông yhâng é ulhum lé nghop râ dut lhê.

<sup>11</sup> Nghut kôlhang, haû Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê.

<sup>12</sup> Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkangmó gi, Garai Gasang mai lo é nghut lhê.

<sup>13</sup> Myiwe rayuq, ulhum a nghop é za Garai Gasang lé kyûdûng é gi, htuk kô râ lhú? Nungmoq, yhumsing gung é matú doqdân yù keq.

<sup>14</sup> Yuqgè xâm hîng tô é nghut jáng, yhâng é matú aróng hpoi é hkyô dut é nghut kôle,

<sup>15</sup> myiwe xâm hîng tô é nghut jáng, yhâng é matú hpungwup shingkang nghut é hkyô lé, htûnglî eq nungmoq lé mhoqshit lhê, a nghut kô lhú? Hkâsu mù gâ le, xâm hîng tô é gi, nghop râ zè dông yhang lé byî tô é nghut lhê.

<sup>16</sup> Rayuq yuq, haû hkyô lé tai dang-rháng nau é nghut jáng, ngamoq chyáng le, Garai Gasâng é noqkuq hpúng pê chyáng le, gotú htûngli a joq é nghut lhê.

### *Yhumsing É Myinzang*

<sup>17</sup> Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut.

<sup>18</sup> Sâng-hi má, noqkuq hpúng ralhûm dông nungmoq zup zîng é hkûn, nungmoq hkaû má gam hkoq hkyô joq é lé wó gyô é nghut luî, têng é le bò râ nghû, ngò lumjîng lhê.

<sup>19</sup> Ô pé gi, Garai Gasang o é hkyam shut nghut é lé wó shit râ matú, nungmoq ahkaû má gam hkoq lhum hkyô joq râ dut lhê.

<sup>20</sup> Nungmoq rahá zup zîng kô é hkûn, nungmoq gi, haû Yhumsing é myinzang zô é a nghut kó.

<sup>21</sup> Hkâsu mù gâ le, nungmoq zô é hkûn, góyuq lé le a lánng é za, ó le ó hí yù zô akô. Haû mù, rayuq gi, zo mut huî nyî, góyuq gi, shuq wut to dut akô nghut ri.

<sup>22</sup> Nungmoq gi, zo jang shuq jang yhûm a wó bang nghut akô lhú? Garai Gasâng é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lhú? Nungmoq lé ngò hkâsu nghû tai kó râ lhú? Haû pê é yanmai, ngò, nungmoq lé hkya-on râ lhú? Ratsuí lhang a wó dut!

<sup>23</sup> Hkâsu mù gâ le, haû Yhumsing chyáng mai ngò wó hap yu é gû lé, nungmoq lé lhai byi bê nghut lhê: Haû Yhumsing Yesuq gi, Yhang lé ap pyám huî é myìn má, muk lé yù mù,

<sup>24</sup> jeju hkya-ôn é htâng má, haû lé myhik hpé mù, tai é gi, "Shî gi, nungmoq é matú Ngá é gungsho nghut lhê; Ngo lé bûn nyî râ matú, shî su kut nyî keq." gâ ri.

<sup>25</sup> Haû eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui má é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyî râ matú shî su kut keq." gâ tai ri.

<sup>26</sup> Hkâsu mù gâ le, nungmoq gi, muk shî lé zo luî, góm shî lé shuq é hkangmó, haû Yhumsing shî hkâm é hkyô lé, Yhang jé lé shoq, shit kyô nyî râ lhê.

<sup>27</sup> Haû mù luî, ó yuq nghut kôle, a gingdán é dông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê.

<sup>28</sup> Haû mù, ó yuq le, muk zo góm shuq râ hí má, yhumsing gûng yhumsing jep wú ra

\* 11:8 Apûn 2:21-23



râ nghut lhê.

<sup>29</sup> Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhânggùng yhang mara zô bô shuq bo yu é nghut lhê.

<sup>30</sup> Haû nghut é yanmai, nungmoq mâ é byù myo myo gi, wum nyhôm é, nõhpyo huí é nghut bum akô. Ra-am gi, shi ló byuq bekô nghut ri.

<sup>31</sup> Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tarâ jéyáng é hui râ a nghut.

<sup>32</sup> Nga-nhúng gi, mingkan eq rahá, mara byí é a hui zo sháng gaq ga, nga-nhúng lé haû Yhumsing èq jéyáng é hkûn, nga-nhúng gi, mhoqshit é huí nyi gù bê nghut lhê.

<sup>33</sup> Haû mù luí, ngá é gumang wui ê, nungmoq gi, zo râ nghû rahá zup zîng é hkûn, rayuq eq rayuq láng lhum keq.

<sup>34</sup> Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmut é nghut jáng, yhûm má zô chùng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

## 12

### *Woi-nyí Hkyô Eq Sêng É Chyunghuq Pé*

<sup>1</sup> Gumang wui ê, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê.

<sup>2</sup> Nungmoq gi, a lumjíng bang nghut nyí kô é hkûn lé, dang a nyo é hparà lhô noq râ matú hkyô shuí nghoq é hui kô é hkyô lé, nungmoq sê lhê.

<sup>3</sup> Haû mù luí, "Yesuq gi, nhîng pyâm é hui sháng gaq." ga, Garai Gasâng é Woi-nyí mai taí é byù ó yuq le a nyi é eq, haû Chyoiyúng Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó taí é nghut lhê nghû, ngò, nungmoq lé taí kyô é nghut lhê.

<sup>4</sup> Woi-nyí hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyí mai chyat nghut lhê.

<sup>5</sup> Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê.

<sup>6</sup> Zui saí é hkyô ajung jung joq lhê, nghut kôlhang, Garai Gasang yhang za, byù

lhunglhang bang má, haû pé banshoq lé kut é nghut lhê.

<sup>7</sup> Woi-nyí é hpông shit hkyô gi, byù pé é gè hkyô matú, yuq hkanmó lé byi bê nghut ri.

<sup>8</sup> Rayuq lé gi, Woi-nyí haû mai, hpaqchyí byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyí byíng é danglù byí é nghut ri;

<sup>9</sup> góyuq lé gi, Woi-nyí hau èq, lumjíng myit byí é nghut ri; dum góyuq lé gi, Woi-nyí hau èq, nõ lhoq ge é chyunghuq byí é nghut ri;

<sup>10</sup> dum, góyuq lé gi, hpungwup a-tsam pé; dum, góyuq lé gi, myiqhtoi htoí é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haû pé é lichyúm taí sân kyô é ahkáng, byí é nghut ri.

<sup>11</sup> Chyunghuq haû pé banshoq gi, Woi-nyí hau èq za kut é loqmú chyat nghut mù, Yhang myit hpyit é đông yuq hkanmó lé haû pé tsing gam byí é nghut ri.

### *Gungbun Myo Kôlhang, Ra Gùng Za*

<sup>12</sup> Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haû eq rajung za, Hkrisduq eq le haû đông nghut ri.

<sup>13</sup> Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

<sup>14</sup> Haû gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê.

<sup>15</sup> Haû hkyí gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut.

<sup>16</sup> Dum, haû nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut.

17 Ragùng dû é gi, myoqjí za nghut é nghut jáng, gyô é hkyô gi, hkâmá nghut râ lú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lú?

18 Nghut kôlhang, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri.

19 Gungsho showui showang gi, ra bun za nghut é nghut jáng, gungdu gi, hkâmá nghut râ lú?

20 Hkyak ga jang, gungsho showui showang pé myo kôlhang, gungdu gi, ragùng za nghut ri.

21 Haû myoqjí gi, loq lé, "Ngò, nang lé a ra!" nghû a ge taí. Haû ulhum gi, hkyî lé, "Ngò, nang lé a ra!" nghû a ge taí.

22 Haû za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lâ.

23 Hau htoq agó, hpau a lúm tap râ su myit ngam é gungsho showui showang pé lé, nga-nhúng je hpautap râ lâ. Haû a shit é jung gungsho pé lé, nga-nhúng hpautap é dông rago nghop râ lâ.

24 Nga-nhúng é wó shit é gungsho pé kúm gi, haû hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri.

25 Haû mù, gungdu má gamhkuí lhúm é hkyô a bo é za, gungsho showui showang pé ralhum eq ralhum, rajung za kut wó myit tê byí lhum kó râ nghut lâ.

26 Haû gungsho showui showang ralhum jamjau huí é nghut jáng, lhum hkangmó bo jamjau râ nghut lâ. Ralhum hpautap huí é nghut jáng, lhum hkangmó bo gabú é nghut lâ.

27 Ahkuí, nungmoq gi, Hkrisduq é gungdu nghut kôluí, nungmoq yuq hkangmó gi, haû é gungsho showui showang pé nghut akô.

28 Garai Gasang gi, noqkuq hpúng má, sâng-hi lé, lagyô pé, í lhum nghû râ má, myiqhtoí pé, súm lhum nghû râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é

bang lé le, góbang lé wó garúm é bang, shuí- u râ chyunghuq wó é bang, laklaí dang ahú hú ge taí é bang lé, masat to bê nghut ri.

29 Banshoq bang gi, lagyô pé nghut lâ lú? Banshoq bang gi, myiqhtoí pé nghut lâ lú? Banshoq bang gi, mhoqshit bang nghut lâ lú? Banshoq bang gi, laklaí kumlhá kut akô lú?

30 Banshoq bang gi, nò lhoq ge é chyunghuq wó é nghut lâ lú? Banshoq bang gi, laklaí dang ahú hú ge taí lâ lú? Banshoq bang gi, dang hau pé é lichyúm ge taí sân kyô lâ lú?

31 Nghut kôlhang, nungmoq gi, je gyaú é chyunghuq lé gyai yhang ô nau nyi keq.

### *Chyitdap Myit*

Hau htoq agó, ahkuí, ngò, nungmoq lé, je gyaú dik é hkyô ralhum shit kôlé.

## 13

1 Ngò gi, byu pé é eq maumang lagyô pé é myíng pé lé sê taí é nghut kôlhang, chyitdap myit a bo é nghut jáng, mying hung htê bo é ut eq mying tui htê bo é chapchéng su za dut byuq râ nghut lâ.

2 Ngò gi, myiqhtoí htoí é chyunghuq, zaú tô é hkyô pé banshoq lé sê gyô é nyan, sumpsé hpaqchyí banshoq lé wó é eq, bùm pé lé wó htot nhang é lumjíng myit bo é nghut kôlhang, chyitdap myit a bo é nghut jáng, ngò haí a nghut sù dut berâ nghut lâ.

3 Ngò gi, wó é sutzè banshoq myùng bang lé byí pyám é eq, ngá é gungdu lé nyhê pyám râ matú ap pyám é nghut kôlhang, chyitdap myit a bo é nghut le gi, hai akyú a bò nghut ri.

4 Chyitdap myit gi, myit hing lâ, nú-nhâm lâ. Chyitdap myit gi, a manôn, gyáng dang a taí, a nghutbùn é nghut lâ.

5 Chyitdap myit gi, hpau a dap é hkyô a kut, yhumsing é akyú baú za a hô, lui za nhikjum a yo, shut é mara a matsíng é nghut lâ.

6 Chyitdap myit gi, agè ashop é má a gabú é za, haû tengmán hkyô má gabú nyi ri.

7 Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

<sup>8</sup> Chyitdap myit gi, hkâ-nhám le htâm byuq é a nghut. Myiqhtoi htoi é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumsé hpaqchyí hkyô gi, lai ló byuq râ nghut lhê.

<sup>9</sup> Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoi htoi é gi, ra-am rahtâng ru nghut lhê.

<sup>10</sup> Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lhê.

<sup>11</sup> Ngò, zoshâng nghut ashî hkûn gi, zoshâng đông dang taí, zoshâng đông myit, zoshâng đông myit sôn wú é nghut lhê. Ngò, suwún nghut jáng gi, zoshâng nyi yap hkyô pé lé tô pyám bê nghut lhê.

<sup>12</sup> Ahkuí, nga-nhúng gi, myoqjám hkaú mâ é rago a sân é wupzo lé za myâng é nghut lhê; nghut kôlhang, htâng má, myoqdong hkyûm wó myâng râ nghut lhê. Ahkuí, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.

<sup>13</sup> Ahkuí, lumjínng myit, myit myoqbyù hkyô, chyitdap myit shi sùm lhum myit tô ri. Nghut kôlhang, haú pé mâ é kô dik é gi, chyitdap myit nghut ri.

## 14

### *Myiqhtoi Htoi É Chyunghuq Pé Eq Laklai Dang Nyo É Chyunghuq Pé*

<sup>1</sup> Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoi é chyunghuq lé je riyhang myit o nyi keq.

<sup>2</sup> Hkâsu mù gâ le, laklaí dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí eq nyo htoq é nghut ri.

<sup>3</sup> Nghut kôlhang, myiqhtoi htoi é sù yuq hkangmó gi, byu pé lé wum byi dang eq nhik títng dang taí ri.

<sup>4</sup> Laklaí dang rahû nyo é sù gi, yhum-sing gùng lé htuqbang byi ri, nghut kôlhang, myiqhtoi htoi é sù gi, noqkuq hpúng lé htuqbang byi ri.

<sup>5</sup> Ngò gi, nungmoq yuq hkangmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoi râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, haú noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

<sup>6</sup> Ahkuí, gumang wui ê, ngò gi, nungmoq chyáng lé jé mù, laklaí dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lú?

<sup>7</sup> Htê lhoq htoq é asak a bo jung zè pé má lhang gi, sampyí nghut nghut, títng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lú?

<sup>8</sup> Dum, tut htê le gam hkoq é đông a mut kyô é nghut jáng, majan htoq râ rì rì ó yuq wá hên râ lú?

<sup>9</sup> Nungmoq chyáng le haú đông nghut lhê. Nang, laklaí dang ahú hú nyo le, sê gyô é danghkun mai nyo é za a nghut jáng, nang haí taí nyi é lé ó yuq wá hkâsu wó sé râ lú? Nungmoq gi, maulat má za taí hâng pyâm nyi kó râ nghut lhê.

<sup>10</sup> Mingkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê.

<sup>11</sup> Haú mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haú dang taí su é matú maigan byù dut mù, yhang gi, ngá é matú maigan byù dut é nghut lhê.

<sup>12</sup> Nungmoq chyáng le haú đông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

<sup>13</sup> Haú nghut é yanmai, laklaí dang ahú hú taí é sù ó yuq le, yhang haú taí é lichyúm wó taí sân kyo sháng gaq, kyûdung râ dut lhê.

<sup>14</sup> Hkâsu mù gâ le, laklaí dang ahú hú đông ngò kyûdung é nghut jáng, ngá é woi-nyí mai dúng é nghut lhê; nghut kôlhang,

ngá é myitnyân é matú, hai akyû a wó nghut ri.

15 Haû mù, ngò hkâsu kut râ lhú? Ngò gi, ngá é woi-nyí mai le kyûdung râ, ngá é myitnyan mai le kyûdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê.

16 Nungmoq gi, nungmoq é woi-nyí mai za Garai Gasang lé hkyá-on kô é nghut jáng, a sê gyô é bang mâ é rayuq gi, nungmoq haî taí é lé a sê é nghut mù, nungmoq jeju hkyá-ôn é hkûn, "Amen" ga hkâsu wó taí râ lhú?

17 Nungmoq gi, ge dik shoq jeju hkyá-on kô é abe, nghut kôlhang, góbang gi, htuqbâng é a hui kó nghut ri.

18 Ngò gi, nungmoq banshoq bâng htoq má laklaí dang ahú hú je wó taí é yanmai, Garai Gasang lé jeju bûn ri.

19 Nghut kôlhang, noqkuq hpúng má, laklaí dang rahû dông danghkun ramun ngò taí râ htoq má, góbang lé mhoqshit râ akyû bo é dang ngo hkun taí râ lé ngò je ô nau ri.

20 Gumang wuì ê, zoshâng wuì su myit nyi é lé nô pyám keq. Agè ashop hkyô eq sêng é má gi, nyheqnú dông kut mù, nungmoq myit é hkyô má gi, ko bang dông kut keq.

21 Haû jep é tarâ má kê tô é gi,

"A wó gyô wú é dang dông mai le, góming byu pê é nhutwuì dông mai le, byu shí bang lé ngò taí râ nghut lhê;

nghut kôlhang, yhangmoq gi, ngá dang gyo kó râ a nghut."

ga Yhumsîng taí ri."✠  
gâ ri.

22 Haû mù, laklaí dang ahú hú nyo é hkyô gi, lumjîng bâng matú kumlhá a nghut é za, a lumjîng bâng matú sheq ru nghut lhê. Myiqhtoi dang kúm gi, a lumjîng bâng matú a nghut é za, lumjîng bâng matú sheq ru nghut lhê.

23 Haû nghut mù, noqkuq hpúng gón chôm zing mù, yuq hkangmó laklaí dang ahú hú nyò kô é nghut jáng, a sê gyô é bang nghut nghut, a lumjîng é bang nghut nghut, wang lé kô é hkûn, yhangmoq gi, nungmoq nâ bùm bekô ga a taí kó râ nghut lhê lhú?

24 Nghut kôlhang, yuq hkangmó, myiqhtoi dang taí nyi é u má, a lumjîng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq eq lhoq pûn kyîng é hui râ eq, banshoq eq jéyáng é hui râ nghut é htoq agó,

25 yhâng é i-myit má zaú tô é hkyô pé lé de de lhoq htoq shit é hui râ nghut lhê. Haû mù, yhang gi, ngóm gop luî, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat râ nghut lhê.

### *Shuq Shuq Tap Tap Za Noqkuq Râ Hkyô*

26 Haû jáng, gumang wuì ê, nga-nhúng haî taí râ lhú? Nungmoq rahá lé chôm zîng é hkûn, yuq hkangmó gi, Garai hkyá-on mahkôn nghut nghut, mhoqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haû pé banshoq gi, noqkuq hpúng lé wum-o byi râ matú chyat kut é dut râ lhê.

27 Rayuq yuq, laklaí dang ahú hú nyo é nghut jáng, í yuq eq myô htum sum yuq mai a lai é za, rayuq htâng rayuq nyò râ dut é htoq agó, rayuq yuq haû lé taí sân kyo ra râ dut lhê.

28 Taí san kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi râ dut mù, yhânggùng yhang eq Garai Gasang lé za nyo râ dut lhê.

29 Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haî taí é lé rago gyô chyam wú râ dut lhê.

30 Nghut kôlhang, zung tô é sù rayuq yuq chyáng shing-rán jé é nghut jáng, hí taí nyi é sù gi, nô byuq râ dut lhê.

31 Hkâsu mù gâ le, yuq hkangmó gi, mhoqshit é eq myit wum byî é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoí é nghut lhê.

32 Haû myiqhtoi pê é woi-nyí pé gi, myiqhtoi pé uphkang é a-ô má nghut nyi ri.

33 Hkâsu mù gâ le, Garai Gasang gi, atau ahú dut é Garai Gasang a nghut é za, ngu-ingón hkyo é Garai Gasang ru nghut lhê.

Sân-yúng bâng zing tô é hpúng banshoq mâ é eq rajung za,

<sup>34</sup> myiwe wuì gi, noqkuq hpúng pé má zim za nyì râ dut lhê. Yhangmoq gi, dang taí ahkáng a wó é nghut mù, haù jep é tarâ má bo é eq rajung za a-ô má nyì kô sháng gaq.

<sup>35</sup> Yhangmoq gi, rajung jung sé naù kô é nghut jáng, yhùm má yhangmoq é yhumsing hpô pê chyáng myi kô sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahî hkyô nghut ri.

<sup>36</sup> Haù Garai Gasâng é mungdang gi, nungmoq chyáng mai htoq lo é nghut lhê lhú? Haù gi, nungmoq chyáng za lé jé bê nghut lhê lhú?

<sup>37</sup> Rayuq yuq, yhang gi, myiqhtoi, a nghut jáng, woi-nyí chyunghuq byí é hui sù nghut lhê ga myit é nghut jáng, ngò, nungmoq lé ká byí é pé gi, haù Yhumsing é hkunmó nghut é lé, yhang sê yù sháng gaq.

<sup>38</sup> Yhang gi, haù lé haì su a ngàm kut é nghut jáng, yhânggùng le, haì su a ngàm kut é hui zo râ nghut lhê.

<sup>39</sup> Haù mù luí, ngá é gumang wuì ê, myiqhtoi htoi râ lé ô nau nyì mù, laklaí dang ahú hú nyo é lé hkâhkùm pyám kó.

<sup>40</sup> Nghut kôlhang, jung hkangmó gi, htuk é đông eq shuq shuq tap tap zâ é hkyô đông kut é dut râ lhê.

## 15

### *Hkrisduq É Dui Toq Hkyô*

<sup>1</sup> Gumang wuì ê, ngò, nungmoq lé hko kyo bê nghut mù, nungmoq le hap yù luí, nungmoq yap gîng tô é jowò nghut é gabú danglù hkyô lé, ahkuí, ngò, nungmoq lé lhoq pùn kat nau ri.

<sup>2</sup> Ngò, nungmoq lé hko kyo bê é mungdang lé, nungmoq ging ging myhik zing nyì kô é nghut jáng, nungmoq gi, gabú danglù hau é yanmai hkyi yù huí é nghut akô. Haù a nghut jáng, nungmoq lumjîng é gi, akôm dut bê nghut lhê.

<sup>3</sup> Ngò hap yu tô é pé lé, sâng-hi ahkyak é đông, ngò, nungmoq lé hai byi bê nghut lhê. Haù pé gi: Chyúmdang eq rajung za, Hkrisduq gi, nga-nhùng é yubak marâ é matú shî hkám byi bê gâ é nghut ri;

<sup>4</sup> Yhang gi, myhup yhùm é hui luí, Chyúmdang eq rajung za sum nyì nghu é nyí má lhoq dui toq é hui bê nghut mù,

<sup>5</sup> Petruq lé htoq shit luí, haù lagyo raxe í yuq lé le htoq shit ri.

<sup>6</sup> Hau htâng má, Yhang gi, ra-u má za, gumang wuì ngo shô yuq chyân lé htoq shit ri. Haù bang mâ é myo hpyang gi, ahkuí jé shoq asak dui nyi bum akô; ra-am kúm gi, shi ló byuq bekô nghut ri.

<sup>7</sup> Hau htâng, Yhang gi, Yakuq lé htoq shit mù lagyo pé banshoq bang lé htoq shit ri.

<sup>8</sup> Ló htâng má, Yhang gi, hkû buinyì a jé shî é má hku é đông nghut sù ngo lé le htoq shit bê nghut ri.

<sup>9</sup> Hkâsu mù gâ le, ngò gi, lagyo pé mâ é tiq dik sù nghut lhê. Haù Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghû râ lháng a gingdán é sù nghut lhê.

<sup>10</sup> Nghut kôlhang, ngò ahkuí ìsu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mũ wùn waq shikut lhê. Haù gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê.

<sup>11</sup> Haù mù luí, ngò nghut nghut, yhangmoq nghut nghut, ngamoq hko kyô é gi, haù hkyô chyat nghut lui, nungmoq lumjîng é le, haù hkyô nghut ri.

### *Shi Byuq Bâng É Dui Toq Hkyô*

<sup>12</sup> Nghut kôlhang, haù Hkrisduq shi é mai lhoq dui toq é hui bê hkyô lé hko kyô nyì bê nghut mù, nungmoq mâ é ra-am gi, shi byuq bâng é dui toq hkyô a joq nghû, hkâsu wó taí kó râ lhú?

<sup>13</sup> Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut.

<sup>14</sup> Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjîng hkyô gi, akôm dut byuq râ nghut lhê.

<sup>15</sup> Hau htoq agó, Garai Gasang gi, haù Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é

hkyak a joq é ru nghut le gi, Garai Gasang, Yhang lé lhoq dui toq kat râ a nghut.

<sup>16</sup> Hkâsu mù gâ le, haû shi byuq bang lhoq dui toq é a huî é nghut jáng, Hkrisduq le, lhoq dui toq é hui berâ a nghut.

<sup>17</sup> Hkrisduq gi, lhoq dui toq é a huî é nghut jáng, nungmoq é lumjîng hkyô gi, akôm dut luî, nungmoq gi, nungmoq é yubak mara hkaû má ru nyi nyi shi kó râ nghut lhê.

<sup>18</sup> Haû nghut jáng, Hkrisduq má shi lô byuq bê bang le, htên byoq byuq râ za nghut lhê.

<sup>19</sup> Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lhê.

<sup>20</sup> Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi lô byuq bâng é sâng-hi ashi dut bê nghut ri.

<sup>21</sup> Hkâsu mù gâ le, shî-nò hkyô gi, byù rayuq dông mai lò bê nghut é eq rajung za, shi byuq bâng é dui toq hkyô le, byù rayuq dông mai lo é nghut lhê.

<sup>22</sup> Hkâsu mù gâ le, lunglhang bang gi, Adam é yanmai shi byuq é su, lunglhang bang gi, Hkrisduq eq rading ralhum za nghut é yanmai lhoq dui toq é hui râ nghut lhê.

<sup>23</sup> Nghut kôlhang, yuq hkangmó gi, ó le ó âng é hkûn lhoq dui toq é hui râ nghut lhê: Hkrisduq gi, sâng-hi lhoq dui toq huî é sù nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lhê.

<sup>24</sup> Hau htâng, jîhtûm jé râ nghut lhê; haû hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haû Íwa nghut sù Garai Gasang lé mingdán ap byi râ nghut lhê.

<sup>25</sup> Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra râ nghut lhê.

<sup>26</sup> Haû lhoq htên pyâm é hui râ nghut é lô htâng é gye gi, shî-nò hkyô nghut ri.

<sup>27</sup> Hkâsu mù gâ le, "Garai Gasang gi, jung

hkangmó lé, Yhâng é hkyî wang ô má tô pyâm bê nghut ri."\* gâ Chyúmdang má kê tô ri. "Jung hkangmó lé" Yhâng é a-ô má tô pyâm bê ga taí é hkûn, jung hkangmó lé Hkrisduq é a-ô má tô pyâm bê sù Garai Gasang yhang kúm a lom é hkyô, san za nghut nyi ri.

<sup>28</sup> Yhang gi, haû hkyô ban kut é htâng má, haû Zo yhang le, jung hkangmó lé Yhâng é a-ô má to byi bê sù Garai Gasang é a-ô má nyi sù dut nhang é hui râ nghut mù, Garai Gasang gi, lunglhang htoq má gyaú sù nghut luî, lunglhang lé sîng sù nghut râ nghut lhê.

<sup>29</sup> Dui toq hkyô a joq é ru nghut le gi, shi byuq bê bâng é matú wui-myhup hkâm byí bùm kô é gi, hai akyû bò kó râ lú? Haû shi byuq bang lhoq dui toq é a hui kô é ru nghut le gi, yhangmoq matú haî mù byu pé wui-myhup hkâm yù kó râ lú?

<sup>30</sup> Ngamoq gi, ngamoq é matú, hkyíng hkangmó haî mù chiq râ jowò má nyi râ lhê lú?

<sup>31</sup> Gumang wui ê, ngò gi, nyí wui aluq shoî shoî shi é hui zô é nghut lhê. Haû su nghû é gi, nga-nhúng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê.

<sup>32</sup> Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lú? Shi byuq bang lhoq dui toq é a huî é ru nghut le gi,

"Nga-nhúng gi, napmá shî râ nghut é yanmai,

zo sháng, shuq sháng."\*<sup>†</sup>

ngû râ za nghut lhê.\*

<sup>33</sup> "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ é sanghkyang eq rajung za, hkyô shuí nghoq é hkâhui zo kó!

<sup>34</sup> Nungmoq gi, tau bún gyîng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haû su nghû taí é gi, nungmoq hoq bun râ matú nghut lhê.

### *Dui Toq É Gungdu*

\* 15:27 Hkya-on 8:6 \* 15:32 Esai 22:13 \* 15:32 Dang ngho shí gi, a lumjîng bang taí é dang nghut lhê.

35 Nghut kôlhang, rayuq yuq gi, "Haû shi byuq bê bang, hkâsu kut lhoq dui toq é hui kó râ lú? Yhangmoq gi, hkasû é gungdu nghut kó râ lú?" ga myi râ nghut lhê.

36 Haû-í nghâ sù ê! Nàng hô hkyô kat é pé gi, shi byuq é za a nghut jâng, yuq htoq lô râ a nghut mhaî.

37 Nàng, kyô hkyô é hkûn, yuq lò râ nghut é agàm lé hô hkat e a nghut é za, sungso amyui nghut nghut, gotû amyui rajung jung nghut nghut lé za hô kat é ru nghut lhê.

38 Nghut kôlhang, Garai Gasang gi, Yhang myit hpyit to bê eq rajung za haû lé gungdu ralhum byi mù, kyôshi myui hkangmó lé, ó le ô é gungdu byi ri.

39 Gungsho lhunglhang gi, rajung za a nghut. Byù pé é gungsho gi, rajung, dusak pé é gi, gó jung, nghoq pé é gi, gó jung, ngozo pé é gi, gó jung ru nghut lhê.

40 Mauhkûng gùng pé le joq é nghut luí, myidam gùng pé le joq ri; nghut kôlhang, mauhkûng gùng pé é shingkang gi, rajung, myidam gùng pé é shingkang gi, gó jung ru nghut lhê.

41 Haû bui má bo é shingkang gi, rajung, lhamó mâ é gi, gó jung, kyî pé mâ é gi, gó jung ru nghut lhê; kyî racham eq rachâm é shingkang le gotû tû shai lhûm lhê.

42 Haû mù, shi byuq bê bâng é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut lhê.

43 Hô hkyô kat é hkûn gi, aróng a bò, lhoq dui toq huí é hkûn gi, hpungwup shingkang bo ri. Hô hkyô kat é hkûn gi, wum nyhóm mù, lhoq dui toq huí é hkûn gi, a-tsam bo ri.

44 Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê.

45 Haû nghut mù, "Haû sâng-hi yuq byù Adam gi, asak dui é xângzo dut bê nghut ri."\* ga kê tô ri. Haû lô htâng é Adam kúm gi, asak byî é woi-nyí nghut ri.†

46 Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê.

47 Haû sâng-hi yuq byù gi, myidàm mâ é tseyûn lé saí é nghut mù, htang lhê yuq byù gi, mauhkûng htoq mâ é nghut ri.

48 Haû myidàm byù nghut sù su, myidàm eq sêng é bang le nghut nyi akô; haû mauhkûng htoq mâ é byù nghut sù su, mauhkûng eq sêng é bang le nghut nyi akô.

49 Nga-nhúng gi, myidàm byù é gunghkyâng isâm lé hkam yù bê nghut é su, mauhkûng htoq mâ é byu é gunghkyâng isâm lé le myang hkam yù râ nghut lhê.

50 Gumang wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yû râ a nghut, htên byoq sê é le, htên byoq a sê é silí wunlí lé wó yû râ a nghut.

51 Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq râ a nghut é za, htaí lhik é hui râ ru nghut lhê.

52 Haû gi, lô htâng é tut htê mying é hkûn, ralhap za, myoqkuq ralap má dut râ nghut lhê. Hkâsu mù gâ le, tut htê mying râ nghut lhê, haû hkûn, shi byuq bê bang gi, htên byoq a sê é shut lhoq dui toq yu é hui râ nghut mù, nga-nhúng gi, htaí lhik é hui râ nghut lhê.

53 Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê.

54 Haû htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ûng budâng èq myui pyâm é hui bê nghut ri."\* ga kê tô é eq,

55 "Shî-nò hkyô ê, náng é ûng budang gi, hkâmá lú? Shî-nò hkyô ê, náng é nyin gi, hkâmá lú?"\*

gâ tô é sanghkyang gi, dik râ nghut lhê.

56 Haû shî-nò hkyo é nyin gi, yubak mara nghut ri; yubak marâ é a-tsam gi, jep é tarâ nghut ri.

<sup>57</sup> Nghut kôlhang, Garai Gasang lé jeju hkyâ-ôn lhê! Yhang gi, nga-nhông é Yhumsîng Yesuq Hkrisduq dông mai, nga-nhông lé ûng budang byî é nghut ri.

<sup>58</sup> Haû mù luî, ngá é chyitdap gumang wuî ê, yap gingtîng nyî keq. Hai êq le, nungmoq lé hkâlhoq dui nún nhâng kó. Nungmoq gi, haû Yhumsîng má nungmoq wùn waq é muzó akôm a nghut é lé sé kô é nghut lhê yanmai, haû Yhumsîng é muzó lé ayang wùn waq shikut nyî keq.

## 16

### *Yerusalem Wà Mó Mã É Lumjîng Bâng É Matú Alu Hkyuî Râ Hkyô*

<sup>1</sup> Ahkuî, Garai Gasang é byu pê é matú alu hkyuî râ hkyô eq séng luî gi, haû Galatiq mau mã é noqkuq hpûng pé lé ngò kut nhang é su kut keq.

<sup>2</sup> Ngò jé lé é hkûn, alu hkyuî râ hkyô a kut ra râ dông, bat hkangmó mã é sâng-hi nyî má, yuq hkangmó gi, yhumsîng wó ho é má cháng mù, gam tô to láng keq.

<sup>3</sup> Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó mã é dé nhâng râ nghut lhê.

<sup>4</sup> Ngò le ê ang râ dut é nghut jáng, yhangmoq gi, ngá é byinzùm kut râ nghut lhê.

### *Poluq Lum Kat É Hkyô Pé*

<sup>5</sup> Ngò gi, Makedoni mau laî byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau laî byit râ za nghut lhê.

<sup>6</sup> Ngò hkâmá ê kôlhang, ngá é hkyowuî má nungmoq wó garúm kat kó râ matú, ngò gi, rayoq zo nghut nghut, gyoqmyò lháng lai shoq nghut nghut, nungmoq eq rahá nyî abe.

<sup>7</sup> Ngò gi, laî ló uchyang za nungmoq lé lé kum râ nghut mù, ahkuî wó myâng râ lé a nau é nghut lhê; ngò gi, haû Yhumsîng dóng é nghut jáng, nungmoq eq rahá rayoq nyî râ lé myit myoqbyu lhê.

<sup>8</sup> Nghut kôlhang, ngò gi, Penteko-ti poi buinyî jé shoq Ehpesu myuq má nyî râ nghut lhê.

<sup>9</sup> Haî mù gâ le, ngo lé htúq htîng é bang myo myo nyî é nghut kôlhang, akyû htoq é

muzó é matú hkum mó ngo lé hpông to byî é yanmai nghut lhê.

<sup>10</sup> Timohti jé lé jáng, yhang, nungmoq eq rahá nyî é u má, gyuq é hkyô haî le a joq râ matú wú byi keq; hkâsu mù gâ le, yhang gi, haû Yhumsîng é muzó lé, ngò su wùn waq wùn é sù nghut lhê.

<sup>11</sup> Haû mù, ó yuq le, yhang lé hkâwú shóm kó. Yhang gi, ngá chyáng wó dum taû jé sháng gaq, yhâng é hkyowuî má nguínón é dông nhang kat keq. Haû gumang wuî eq rahá lò kó râ lé, ngò myit láng nyî lhê.

<sup>12</sup> Ahkuî, nga-nhông é gumang Apolo é hkyô eq séng luî ga jang: yhang gi, haû gumang wuî eq rahá nungmoq chyáng lé râ lé, ngò, gyai yhang wum taî tsuq lhê. Yhang kúm gi, ahkuî lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

<sup>13</sup> Machya nyî keq; lumjîng hkyô má ging ging tîng tîng yap nyî keq; gyuq kyum myit hkâbô kó; wum bo nyî keq.

<sup>14</sup> Jung hkangmó lé, chyitdap myit eq zui saî keq.

<sup>15</sup> Stehpana eq yhâng é yhumbyù wuî gi, Ahkaia ming má sâng-hi hpúng wâng bang nghut luî, yhangmoq gi, yhumsîng gùng lé, haû sân-yúng bâng é dojaú hkyô má ap nóng bekô lé, nungmoq sê akô nghut ri. Gumang wuî ê, ngò, nungmoq lé wum taî tsuq kat kôlé,

<sup>16</sup> haû sù é bâng é a-ô má le, haû muzó má bo wang lóm mù, mù zui shikut bang yuq hkangmó é a-ô má le, nyî keq.

<sup>17</sup> Ngò gi, Stehpana, Hportunatu eq Ahkaiku pé jé lo é hkûn, gyai gabú é nghut lhê, haî mù gâ le, yhangmoq gi, nungmoq a kut byî é hkyô lé, lhoq pyíng byi bekô nghut ri.

<sup>18</sup> Hkâsu mù gâ le, yhangmoq gi, ngá é woi-nyî eq nungmoq é woi-nyî lé lhoq ngón byi bekô nghut ri. Haû sù é bang lé, hpautap nyî keq.

### *Ló Htâng É Shi-kyâm Dang*

<sup>19</sup> Asia mau mã é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhúm má chôm huî é noqkuq hpúng lé, haû Yhumsîng má nungmoq lé gyai yhang shi-kyâm kat akô.



<sup>20</sup> Shí má nyi é gumang wuì banshoq bang gi, nungmoq lé shi-kyâm kat akô. Rayuq eq rayuq chyoiyúng é chytpuq èq shi-kyâm lhum keq.

<sup>21</sup> Ngò, Poluq gi, shi-kyám dang shî lé, ngá é loq èq yhang ká é nghut lhê.

<sup>22</sup> Rayuq yuq, haû Yhumsîng lé a chyt-dap é nghut jáng, haú yuq gi, nhîng pyâm é hui sháng gaq. Yhumsîng ê, jé lé aq hkoi!

<sup>23</sup> Haû Yhumsîng Yesuq é jeju gi, nungmoq eq rahá nghut nyî sháng gaq.

<sup>24</sup> Ngá é chyt-dap myit gi, Hkrisduq Yesuq má nungmoq banshoq bâng chyáng joq nyî sháng gaq. Amen.

## KORINHTUQ

### Pê Chyáng Htang Dàm Hun Kat é Laiká (2 Corinthians)

<sup>1</sup> Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhùng é gumang Timohti le kut, Korinhtuq myuq mâ é, Garai Gasâng é noqkuq hpúng lé le, Ahkaia mau gón mâ é sân-yúng bang banshoq chyáng le, dang kyô kat lhê:

<sup>2</sup> Nga-nhùng é Îwa nghut é Garai Gasang eq haù Yhumsîng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyî sháng gaq.

#### *Nhik tíng hkyô banshoq é Garai Gasang*

<sup>3</sup> Nga-nhùng é Yhumsîng Yesuq Hkrisduq é Yhângwa eq Garai Gasang, shogyo nhik-myin hkyô é Îwa eq nhik tíng hkyô banshoq é Garai Gasang gi, hkya-on kungton é huî nyî sháng gaq.

<sup>4</sup> Garai Gasâng chyáng mai ngamoq wó yù bê nghut é nhik tíng hkyô eq, hkâsù é wuîhke hkyô hui bang lé le nga-nhùng wó nhik tíng byi sháng gaq ga, Yhang gi, ngamoq é wuîhke hkyô banshoq má nhik tíng byî ri.

<sup>5</sup> Hkâsu mù gâ le, Hkrisduq hui zô é jamjau hkyô myo myo lé ngamoq bo hui zô é su, Hkrisduq dông mai, ngamoq é nhik tíng hkyô le byíng mui nyi é nghut lhê.

<sup>6</sup> Ngamoq, myit myo uhkyî é huî é nghut jáng, nungmoq é nhik tíng hkyô eq hkyi yù hkyô é matú nghut nyi ri; ngamoq, nhik tíng é huî é nghut jáng, nungmoq é nhik tíng hkyô é matú nghut luî, haù gi, ngamoq jamjaù é eq rajung za nghut é jamjau hkyô lé, myit hing é dông mai wó jân pyám rà a-tsam, nungmoq chyáng lhoq htoq byî é nghut lhê.

<sup>7</sup> Haù mù, ngamoq é jamjau hkyô pé má nungmoq bo lòm bekô nghut é su, ngamoq é nhik tíng hkyô má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

<sup>8</sup> Gumang wuî ê, Asia mau má, wuîhke jamjaù é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lhang htum shoq hpuzô é nghut luî, ngamoq gi, asak duì lo rà lhang a myit myoqbyu lô é nghut lhê.

<sup>9</sup> Gè gè yhang, ngamoq gi, sat hui berâ nghû, ngamoq é i-myt má lumjîng pyâm é nghut lhê. Nghut kôlhang, haù gi, ngamoq gùng ngamoq a lumhkau é za, shî bê bang lé lhoq duì toq sù Garai Gasang lé lumhkaù rà matú dut é nghut lhê.

<sup>10</sup> Garai Gasang gi, haù sù é shî rà hkyô mai hkyi yù bê nghut mù, ngamoq lé hkyi yù rà za nghut lhê. Yhang gi, ngamoq é matú nungmoq kyûdung byî nyi é u má, xoq luî ngamoq lé hkyi yù rà za nghut lhê nghû, ngamoq gi, Yhang lé myit myoqbyu to bê nghut luî,

<sup>11</sup> myo myo kyûdung byî é lé gyo byî é má ngamoq shimân jeju wó mù, byù myo myo gi, ngamoq wó é shimân jeju é yanmai Garai Gasang lé jeju hkya-on kó rà nghut lhê.

#### *Poluq, Hen Tô É Muzó Htaì Pyâm É Lé Tai Hung É Hkyô*

<sup>12</sup> Ngamoq nghutbùn é gi, Garai Gasâng chyáng mâ é chyoiyúng hkyô eq lhumzui hkyô má, mingkan zo wuî eq ngamoq asak duì bê hkyô lé le, je luî nungmoq eq zùm yap é hkyô lé le, ngamoq é myit sôn sê é hkyô eq, saksé hkám byî é hkyô nghut lhê. Ngamoq haù su kut é gi, mingkan hpaqchyî byéng-yá dông mai kut é a nghut é za, Garai Gasâng é jeju dông mai kut é ru nghut lhê.

<sup>13</sup> Hkâsu mù gâ le, ngamoq gi, nungmoq a dat nghap é eq a sê gyô é haì le a ká byî kat é nghut lhê. Ngò, myit myoqbyu kat é gi,

<sup>14</sup> nungmoq gi, ngamoq é hkyô ra-am lé wó sê gyô yù bê eq rajung za, haù Yhumsîng Yesuq é buinyi má nungmoq é hkyô lé ngamoq nghutbun rà nghut é su, ngamoq é hkyô lé nungmoq wó nghutbun rà matú, nungmoq, banshoq lé sê gyo kó rà nghut lhê.

<sup>15</sup> Haù hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yù kó sháng gaq nghû, ngò gi,

nungmoq chyáng hí lé kum râ matú hen to bê nghut lhê.

<sup>16</sup> Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taù lò luì, Yuda mau shut e é hkyowuì má, nungmoq, ngo lé garúm kat kó râ lé myit lum to bê nghut lhê.

<sup>17</sup> Ngò gi, haù hkyô hen é hkûn, agon za hen hkyut é nghut lhê lú? Haù a nghut jáng, ngò hen é pé gi, ra-u má za, "Nghut lhê, nghut lhê." nghû é eq, "A nghut, a nghut." nghu é wó taí râ matú, mingkan myit đông hen é nghut lhê lú?

<sup>18</sup> Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut.

<sup>19</sup> Hkâsu mù gà le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasang é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê.

<sup>20</sup> Hkâsu mù gà le, Garai Gasang gi, dang-gidiq hkâ-myhó to kôle, haù pé gi, Hkrisduq má "Nghut lhê" chyat nghut lhê. Haù mù, Garai Gasang é hpungwup shingkang é matú, Yhâng đông mai, nga-nhúng gi, "Amen" nghu taí é nghut lhê.

<sup>21</sup> Ngamoq eq nungmoq lé Hkrisduq má yap gingtíng nhang é sù gi, Garai Gasang nghut ri. Yhang gi, nga-nhúng lé masat é xù but byi mù,

<sup>22</sup> Yhang sing lhê gà é dizik, nga-nhúng lé htung tap byi luì, jé lô râ hkyô pé hkyak joq lhê nghu é masat zè đông, Yhâng é Woi-nyí lé nga-nhúng é i-myit unghkaù má kat byi bê nghut ri.

<sup>23</sup> Ngò gi, nungmoq hkyamsa râ matú, Korinhtuq myuq má a dum taù lé é hkyô têng é lé, ngá é saksé dut râ đông Garai Gasang lé wut dúng lhê.

<sup>24</sup> Haù gi, nungmoq é lumjíng hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chôm zui saí é ru nghut lhê; haù mù gà le, lumjíng myit mai za nungmoq wó yap gíng nyi bùm kô é ru nghut lhê.

## 2

<sup>1</sup> Haù mù luì, ngò gi, nungmoq lé myit nò nhâng é dut râ đông, lé dum kûm é a kut râ nghû, myit hpyit to bê nghut lhê.

<sup>2</sup> Hkâsu mù gà le, nungmoq lé ngò yón kuq nhang é nghut le gi, ngò yón kuq nhang bê bang nungmoq mai lai luì, ó yuq wá ngo lé wó gabú nhâng râ lú?

<sup>3</sup> Ngò jé lé é hkûn, ngo lé gabú nhâng râ âng é bâng èq, ngo lé myit nò nhang é a hui sháng gaq nghû, ngò gi, ngò kut é eq rajung za laiká kê kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghû, nungmoq banshoq bang lé ngò hkyak myit lum tô lhê.

<sup>4</sup> Hkâsu mù gà le, ngò gi, nungmoq lé laiká kê é hkûn, myit myo uhkyí mó èq le, myit má yón kuq é èq le, ngaubyi ngau-nhap é èq le, kê kat bê nghut lhê. Haù gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chyitdap é hkyô lé sé nhâng râ matú ru nghut lhê.

### *Mara Hkyut Byí Lhum Râ Hkyô*

<sup>5</sup> Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haù hkyô eq séng luì, ngò gyai wá yhang zuq zuq a taí nau é nghut lhê.

<sup>6</sup> Nungmoq myo hpyâng èq yhang lé mara dam byí é hkyô gi, yhâng é matú gé bê nghut ri.

<sup>7</sup> Nghut kôlhang, ahkuì, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik tíng byi keq.

<sup>8</sup> Haù mù luì, nungmoq é chyitdap myit gi, yhang é ahtoq má dum lhoq gíng shit nyí keq nghû, nungmoq lé ngò wum taí tsuq kat lhê.

<sup>9</sup> Ngò, nungmoq lé haù mù laiká ká byí kat é hkyô gi, nungmoq chyam wú hui é hkyô lé wó jân é hkyô eq jung hkangmó má jìno gyo hkyô bò a bo é lé, wó sé râ matú le nghut lhê.

<sup>10</sup> Nungmoq, rayuq yuq lé mara hkyut byí é nghut le gi, ngò le, haù yuq lé mara hkyut byí lhê. Mara hkyut râ rajung jung joq é nghut jáng, ngò mara hkyut é gi, Tsadán èq nga-nhúng lé a wó ûng râ matú,

nungmoq é yanmai, Hkrisduq é myoq hí má ngò mara hkyut byi bê nghut lhê.

<sup>11</sup> Hkâsu mù gâ le, Tsadán hen é hkyô pé lé nga-nhúng a sê é a nghut.

### *Dangshikaq Asik Mâ É Hpungmû Wùn Bang*

<sup>12</sup> Ngò gi, Hkrisduq é gabú danglù hko kyo râ matú, Troa myuq má ê jé é hkûn, haû Yhumsing gi, ngo lé hkum hpóng byi é lé, ngò myang ri.

<sup>13</sup> Nghut kôlhang, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to luî, Makedoni mau shut xoq e ló é nghut lhê.

<sup>14</sup> Nghut kôlhang, Hkrisduq má, ngamoq lé hkâ-nhám le ùng budang hkyô shut shuî-û yù mù, Hkrisduq lé sê é sumsé hpaqchyi é nam ngón shôm lé, ngamoq dông mai jowò hkangmó má taî pyo é sù, Garai Gasang gi, jeju hkya-ôn é huî nyi sháng gaq.

<sup>15</sup> Hkâsu mù gâ le, ngamoq gi, hkyi yu é huî nyi bâng chyáng le, htên byoq ló é huî nyi bâng chyáng le, Garai Gasâng é matú Hkrisduq é nam ngón shôm nghut nyi lhê.

<sup>16</sup> Ngamoq gi, htên byoq nyi bâng é matú shî-nò hkyo é shôm dut mù, hkyi yù huî nyi bâng é matú nghut jáng, asak hkyo é nam ngón shôm dut é nghut lhê. Haû mù, ó yuq wá muzó shî eq htuk râ lhú?

<sup>17</sup> Ngamoq gi, amyat wó râ matú Garai Gasâng é mungdang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé dông lhumzui myit mai taî é nghut lhê.

## 3

<sup>1</sup> Ngamoq gi, yhumsing gùng yhumsing dum owaq hí ló é nghut lhê lhú? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq?

<sup>2</sup> Nungmoq gùng yhang gi, ngamoq é myit nhiklhum má kê tô é, yuq hkangmó èq nghap luî sê yu é laiká gùng pé nghut akô.

<sup>3</sup> Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng mâ é laiká nghut kô é hkyô lé shit nyi akô. Haû gi, kê jung chí èq kê tô é dông a

nghut é za, rû dui nyi é Garai Gasâng é Woi-nyí èq kê tô é nghut é htoq agó, luqlong pé má kê tô é dông a nghut é za, xângzo byu é myit nhiklhum long pé má kê tô é ru nghut lhê.

<sup>4</sup> Haû su nghû hkyak wó myit lum é hkyô gi, Garai Gasâng é hí má, Hkrisduq dông mai ngamoq wó yu é nghut lhê.

<sup>5</sup> Ngamoq gi, yhumsing gùng haî lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê.

<sup>6</sup> Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haû gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shî dâm byi lhê, Woi-nyí kúm gi, asak byi é nghut lhê.

### *Dangshikaq Asik É Hpungwup Shing kang*

<sup>7</sup> Ahkuî, haû Mosheq é myoqdong mâ é hpungwup shingkâng é yanmai, haû Israe-laq byu pé gi, yhâng é myoqdong lé a wó wú tsuq to kó nghut ri. Hpungwup shing kang haû shûm lo byuq sê é nghut kôlhang, luq-long má dok kê tô é, shî-nò hkyô lhoq htoq é tarâ muzó gi, hpungwup shing kang eq rahá jé lé é nghut lhê.

<sup>8</sup> Haû su nghut jáng, haû Woi-nyí é muzó gi, hpungwup shing kang je riyhang dut râ a nghut kó lhú?

<sup>9</sup> Gè gè yhang, haû byù lé mara byi é tarâ muzó lháng, hpungwup shing kang bo é nghut le gi, dingmán nhang é hkyô sik gi, je riyhang hpungwup shing kang bo é nghut lhê ô!

<sup>10</sup> Hkâsu mù gâ le, hpungwup shing kang bo é tarâ muzó gi, hpungwup shing kang je bo é dangshikaq asik eq whuí é hkûn, hpungwup shing kang a bò lo dut byuq bê nghut ri.

<sup>11</sup> Shum byuq ló é tarâ lháng gi, hpung-wup shing kang eq rahá lé jé bê nghut le gi, ru gîng nyi é dangshikaq asik é hpungwup shing kang gi, je riyhang gyaú râ nghut lhê ô!

<sup>12</sup> Haû mù luî, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nghut lhê.

<sup>13</sup> Ngamoq gi, Mosheq su a nghut. Yhang gi, duqbang é hkyô shûm byuq ló é hkûn, haû Israe-laq byu pé haû lé a wú tsuq râ

matú, yhâng é myoqdong lé myoqgo èq nghop pyâm é sù nghut ri.

<sup>14</sup> Nghut kôlhang, yhangmoq é myit gi, lhoq chut byî é hui bekô nghut ri; hkâsu mù gâ le, hkû-nyî jé shoq, dangshikaq axau lé nghap é hkûn, rajung zâ é myoqgò gi, ru nghop to byî ashî nghut ri. Haû gi, huî sêng pyâm é a hui shi, haî mù gâ le, Hkrisduq dông za haû lé wó yu pyâm é nghut lhê.

<sup>15</sup> Hkû-nyî jé shoq lháng, Mosheq é laiká lé nghap é hkûn, yhangmoq é myit nhiklum má myoqgò èq nghop tô é nghut ri.

<sup>16</sup> Nghut kôlhang, ó yuq le, Yhumsîng chyáng hká u lhîng lò kôlhang, haû hkûn jáng, myoqgò gi, hî pyám byî é hui râ nghut lhê.

<sup>17</sup> Yhumsîng gi, haû Woi-nyî nghut mù, Yhumsîng é Woi-nyî nyi é jowò má, luthkyô le joq lhê.

<sup>18</sup> Haû Yhumsîng é hpungwup shing kang lé lhoq htoq shit é bang banshoq nghut é myoqdong má myoqgò a nghop é bang nga-nhûng gi, ru myo jat nyi é hpungwup shing kang lhoq htoq byi hkyô nghut é, Yhâng é isâm shut htaî lhik wang é huî nyi bê nghut lhê. Haû hkyô gi, haû Woi-nyî nghut sù Yhumsîng chyáng mai lo é nghut lhê.

## 4

### *Tseyam Pé Má Bo É Sutzè*

<sup>1</sup> Ngamoq gi, Garai Gasâng jeju mai muzó hkyô haû wó é nghut mù, myit wum a gyuí é nghut lhê.

<sup>2</sup> Ngamoq gi, zaû tô é eq hoq htoq é hkyô pé lé tô pyám luî, mhaû zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haû su kut râ malaî, ngamoq gi, haû tengmán hkyô lé san za lhoq htoq shit é dông, Garai Gasâng é hí má yuq hkangmó é myit sôn sê é hkyô má, yhumsîng gùng yhumsîng htuk shoq nyi lhê.

<sup>3</sup> Ngamoq é gabú danglù gi, myoqgo èq nghop pyâm é huî é nghut jáng, haû gi, htên byoq nyi bâng chyáng za nghop pyám huî é ru nghut lhê.

<sup>4</sup> Haû Garai Gasâng é azòng isâm nghut sù, Hkrisduq é hpungwup shing kang bo é gabú danglù é maubó lé, a lumjîng bang a wó myâng kó sháng gaq ga, ipyat shi é garai\* gi, yhangmoq é myit lé lhoq chit byi bê nghut ri.

<sup>5</sup> Haû nghut é yanmai, ngamoq gi, yhum-sîng gùng eq séng luî hko kyô é a nghut é za, Yesuq Hkrisduq gi, Yhumsîng nghut é hkyô lé le, Yesuq é matú, ngamoq gùng yhang gi, nungmoq é jùn pé nghut é hkyô lé le, hko kyô é ru nghut lhê!

<sup>6</sup> Hkâsu mù gâ le, "Mauchut hkaû mai maubó htoq lô sháng gaq."\* ga taî é Garai Gasâng gi, Yesuq Hkrisduq é myoqdong má é Garai Gasâng é hpungwup shing kang é maubó lé sê gyô é nyan lé, nga-nhûng lé byî é dông, Yhâng é maubó lé, nga-nhûng é i-myit unghkaû má duqbó nhâng bê nghut ri.

<sup>7</sup> Nghut kôlhang, ngamoq gi, sutzè haû bo é tseyam pé† nghut nyi lhê. Haû gi, gyaú dik é a-tsam mó gi, ngamoq chyáng má é a nghut é za Garai Gasâng chyáng má é nghut é hkyô lé tûn shit râ matú nghut lhê.

<sup>8</sup> Ngamoq gi, wuîhke hkyo èq lhîngkyuq mai gyai yhang nhê zik é hui kôlhang, a gyop byuq é nghut lhê; myit lhoq nhûng pyâm é hui kôlhang, myit a htûm byuq é nghut lhê;

<sup>9</sup> zîng-rî é hui kôlhang, kâng pyám huî é a nghut; bat lhêng pyâm é hui kôlhang, htên byoq huî é a nghut.

<sup>10</sup> Haû Yesuq é asak duì hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wún é nghut lhê.

<sup>11</sup> Hkâsu mù gâ le, Yesuq é asak duì hkyô gi, nga-nhûng é shî sê é gungdu má lhoq htoq shit é hui sháng gaq nghû, asak duì nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huî nyi ri.

<sup>12</sup> Haû mù luî, shi byuq hkyô gi, ngamoq má mù zuî nyi ri; asak duì hkyô kúm gi, nungmoq má mù zuî nyi é nghut ri.

<sup>13</sup> "Ngò gi, lumjîng bê nghut lhê, haû mù, ngò taî é nghut lhê."\* ga kâ tô é eq rajung

\* 4:4 *Ipyat shi é garai* gâ é gi, Tsadán lé gâ é nghut lhê. ✧ 4:6 Apûn 1:3 † 4:7 *Tseyam pé* gâ é gi, nga-nhûng é wum nyhôm é gungdu lé gâ é nghut lhê. ✧ 4:13 *Hkya-on* 116:10

za, ngamoq le, lumjıng hkyô hau eq yhang, lumjıng bê nghut mù tai é nghut lhê.

<sup>14</sup> Hai mù gâ le, hau Yhumsıng Yesuq lé shi é mai lhoq dui toq é Sû gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yhâng é hí má shuí jé râ nghut é lé, ngamoq sê lhê.

<sup>15</sup> Hau jeju wó é byu pé gi, je riyhang myô jat lô mù, Garai Gasâng é hpungwup shıngkâng é matú, jeju hkya-ôn é hkyô gi, byıng mui nyi sháng gaq ga, hau pé ban-shoq gi, nungmoq é akyu é matú nghut nyi ri.

<sup>16</sup> Hau mù luı, ngamoq gi, myit wum a gyuí é nghut lhê. Ngamoq é shınggan gungdu gi, htên byoq ló nyi kôlhıng, i-myit unghkaú gi, ra-nyı eq ra-nyı asik dut nhang é huı nyi ri.

<sup>17</sup> Hkâsu mù gâ le, ngamoq é tiq é eq razup zâ é wuıhke hkyô pé gi, ngamoq é matú hau pé htoq gyai hkik é ahtum abyuq é hpungwup shıngkang lé, wó yû nhang ri.

<sup>18</sup> Hau mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

## 5

### *Mauhkıng Htoq Mã É Yhım*

<sup>1</sup> Hau myidâm zúm nghut é nga-nhúng lıng nyi é gungdu gi, htên byoq sê é nghut kôlhıng, byu loq eq saı é a nghut é za, mauhkıng htoq mã joq é ahtum abyuq é yhım\* nghut é, Garai Gasâng chyáng mã é yhım lé, nga-nhúng wó é hkyô lé, nga-nhúng sê lhê.

<sup>2</sup> Nghut kôlhıng, ahkuı, nga-nhúng gi, nga-nhúng é mauhkıng yhım lé tı hut byı é lé gyai yhang hui naı mù, nò-kyıng su kyıng nyi lhê.

<sup>3</sup> Hai mù gâ le, nga-nhúng gi, hut byı é hui jáng, gungdu a bò bang a dut lo râ nghut lhê.

<sup>4</sup> Hkâsu mù gâ le, nga-nhúng gi, zúm shı má lıng nyi é u lé, wôlai wùn mù, nò-kyıng su kyıng nyi lhê; hau gi, shı byuq sê é lé,

asak dui é eq wó htaı lhik pyám sháng gaq nghı, nga-nhúng gi, a hut byı é hui râ lé a ô nau é za, nga-nhúng é mauhkıng yhım lé tı hut byı é hui râ lé ô nau é yanmai nghut lhê.

<sup>5</sup> Ahkuı kúm, jeju hau hkam yû râ matú, nga-nhúng lé lajáng to byı é sı gi, Garai Gasang nghut mù, jé lô râ hkyô gi, hkyak joq lhê nghı é masat zè dıng, nga-nhúng lé hau Woi-nyı byi bê nghut ri.

<sup>6</sup> Hau mù luı, ngamoq gi, hkâ-nhám le hkyak lum tı lhê. Gungdu shı má yhım dıng ru lıng nyi nyi gi, hau Yhumsıng eq wê gâng nyi ashı nghut é lé ngamoq sê nyi lhê.

<sup>7</sup> Ngamoq gi, byu-myang é dıng mai a nghut é za, lumjıng myit mai asak dui é ru nghut lhê.

<sup>8</sup> Ngamoq gi, hkyak myit lum tı lhê nghı, ngò tai lhê, hau mù, gungdu shı mai wê gang luı, hau Yhumsıng eq rahá nyi râ lé ngamoq je riyhang ô nau é nghut lhê.

<sup>9</sup> Hau mù, ngamoq gi, gungdu shı má yhım dıng lıng nyi é nghut nghut, hau mai wê gâng é nghut nghut, ngamoq myit myoqbyu tı é jowò gi, Yhang lé gabú nhıng râ matú nghut lhê.

<sup>10</sup> Hkâsu mù gâ le, yuq hkangmó gi, gungdu shı má yhım dıng lıng nyi é u lé, ge é nghut nghut, a ge é nghut nghut, kut é eq rajung za hkam yû râ matú, Hkrisduq é tará jéyáng tanghkuq hí má, nga-nhúng banshoq bang htoq shit ra râ nghut lhê.

### *Nguıngón Hkyô Xoq É Muzó*

<sup>11</sup> Hau mù, Yhumsıng lé gyuq hkungga râ hkyô hai nghut é lé ngamoq sê é nghut luı, ngamoq gi, byu pé lé tai pın kyıng shikut lhê. Ngamoq hai nghut é gi, Garai Gasâng chyáng san za nghut nyi mù, nungmoq é myit sôn sê é hkyô má le san za nghut râ lé, ngò myit lum lhê.

<sup>12</sup> Hau myit nhıklhum má bo é lé gumrông râ malaı, byu-myang é lé gum-rong é bang lé, nungmoq wó tı tai kó sháng gaq nghı, ngamoq gi, nungmoq chyáng yhımsıng gıng lé dum owaq shikut é a nghut é za, ngamoq é hkyô lé, nungmoq wó gumrông râ ahkáng, nungmoq lé byı é ru nghut lhê.

\* 5:1 *Mauhkıng htoq mã joq é ahtum abyuq é yhım gâ é gi, nga-nhúng, mauhkıng mingdán mã jé é hkın wó râ gungdu asik lé gâ é nghut lhê.*

<sup>13</sup> Ngamoq a gyîng é dông nghut le gi, Garai Gasâng é matú a gyîng é nghut lhê; ngamoq gyîng é dông nghut le gi, nungmoq é matú gyîng é nghut lhê.

<sup>14</sup> Hkâsu mù gâ le, Hkrisduq é chyitdap myit eq ngamoq lé kut nhang nyi é nghut lhê. Haû gi, banshoq bâng é matú rayuq shî hkâm byi bê nghut mù, banshoq bang shi é dông nghut bê nghû, ngamoq hkyak sê gyô é yanmai nghut lhê.

<sup>15</sup> Yhang gi, asak dui nyi é bang, yhangmoq yhumsing gung é matú a dui lô é za, yhangmoq é matú shî hkâm byi luî, lhoq dui toq é hui Su é matú dui kó sháng gaq ga, banshoq bâng é matú shî hkâm byi bê nghut ri.

<sup>16</sup> Haû mù, ngamoq gi, ahkuî mai, ó yuq eq séng luî le, mingkan hkyam dông mai a wú lô é nghut lhê. Ngamoq gi, hí hkûn Hkrisduq lé haû dông wú é nghut kôhang, haû su hkâ-nhám le a kut lô é nghut lhê.

<sup>17</sup> Haû nghut mù luî, rayuq yuq gi, Hkrisduq má nghut nyi é nghut jáng, yhang gi, asik hpân hui sù dut bê nghut ri; haû axau gi, byuq byuq mù, lhungháng asik dut bu-nhung!

<sup>18</sup> Haû pé banshoq gi, Garai Gasâng chyáng mâ é chyat nghut lhê. Yhang gi, Hkrisduq dông mai nga-nhúng lé Yhânggùng eq nguingón hkyô xoq yû luî, nguingón hkyô xoq é muzó ngamoq lé byi bê nghut ri.

<sup>19</sup> Haû gi, Garai Gasang gi, byu pé é mara lé a matsíng byi é za, Hkrisduq dông mingkan lé Yhânggùng eq nguingón hkyô xoq yû bê nghut luî, Yhang gi, nguingón hkyô xoq yu é mungdang haû lé, ngamoq lé ap byi to bê nghû nau é nghut lhê.

<sup>20</sup> Haû mù luî, ngamoq gi, Hkrisduq é gunglik pé nghut lhê mù, Garai Gasang gi, ngamoq dông mai nungmoq lé lhoq pún kyîng nyi é nghut lhê. Garai Gasang eq nguingón hkyô xoq yû keq nghû, ngamoq gi, Hkrisduq é gunglik dông nungmoq lé dúng tôngbán nyi lhê.

<sup>21</sup> Nga-nhúng gi, Hkrisduq dông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sù lé, nga-nhúng é matú yubak mara

hkungga dut nhâng bê nghut ri.

## 6

<sup>1</sup> Ngamoq gi, Garai Gasâng é mù zui by-inzùm wuî nghut nyi é eq rajung za, Garai Gasâng jeju lé akyú a bo é dông hkâhap yù kó nghû, nungmoq lé wum taî tsuq kat lhê.

<sup>2</sup> Hkâsu mù gâ le,

"Ngò ô nau é ahkyíng má, nang lé ngò gyo byi bê nghut mù, hkyi yù hui rá buinyi má, nang lé ngò garúm bê nghut lhê."☆

ga luî, Yhang taî ri. Ngò, nungmoq lé taî kyo kôlé, ahkuî gi, Garai Gasang ô nau é ahkyíng, ahkuî gi, hkyi yu é buinyi nghut ri.

### *Poluq É Wuîhke Hkyô Pé*

<sup>3</sup> Ngamoq é hpungmû gi, taî hpoî pyâm é a hui sháng gaq nghû, ngamoq gi, ó yuq é hkyô má le, leqbat jung a to byi é nghut lhê.

<sup>4</sup> Haû kut rá malaî, ngamoq gi, Garai Gasâng é dui-nhâng zoshâng wuî nghut é hkyô lé, hkyô hkangmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuîhke hkyô pé má le, myit myo uhkyi hkyô pé má le shit nyi lhê.

<sup>5</sup> Nhuq bat huî é pé má le, htóng lhúng huî é eq toq gabyông é má htim é huî é má le, mù zui shikut é má le, a myang yhup é myín pé má le, zòmut huî é má le, shit nyi lhê.

<sup>6</sup> Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyí eq chyitdap myit akying má le,

<sup>7</sup> tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghû é laknak pé dông le, shit nyi lhê.

<sup>8</sup> Hpungwup shingkang byi é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang taí kôle, shit nyi lhê. Ngamoq gi, tengmán kôhang, mhaû zo bang dông sôn yu akô nghut ri.

<sup>9</sup> Ngamoq lé sé kôhang, a sê é dông kut akô nghut ri; shi ló nyi kôhang, rû dui nyi é bang nghut lhê; nhuq bat é hui kôhang, sat pyâm é a hui shî é bang nghut lhê.

<sup>10</sup> Yón hkyô byíng nhâng kôlhang, hkâ-nhám le gabú nyi lhê; myùng kôlhang, byù myo myo lé wó sùt nhang nyi lhê; haí le a wó kôlhang, jung hkangmó lé sing é dông nghut lhê.

<sup>11</sup> Korinhtuq bang ê, ngamoq gi, nungmoq lé san za taí bê nghut luí, ngamoq é myít nhiklum lé, nungmoq é matú làm shoq hpông to byi bê nghut lhê.

<sup>12</sup> Ngamoq gi, ngamoq é chyitdap myit lé, nungmoq chyáng mai lêng taú yu nyi é a nghut, nungmoq sheq, ngamoq chyáng mai lêng taú yu nyi kô é ru nghut lhê.

<sup>13</sup> Nungmoq le, myit nhiklum lé làm shoq dum taú hpông keq nghû, ngò gi, ngá zô pé lé dông taí lhê.

### *A Lumjínq Bang Eq A Nhungkut Râ Hkyô*

<sup>14</sup> A lumjínq bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, haí sêng lhum lhê lú? Maubó eq mauchut gi, hkâsu wó zùm yap kó râ lú?

<sup>15</sup> Hkrisduq eq Beliala\* gi, hkâsu kut myit wó huí lhum kó râ lú? Lumjínq sù rayuq eq a lumjínq sù gi, hkâsu wó pung lhum kó râ lú?

<sup>16</sup> Garai Gasâng é noqkuq yhúm eq hparà lhô pé gi, hkâsu wó húm râ lú? Hkâsu mù gâ le, nga-nhúng gi, rû dui nyi é Garai Gasâng é noqkuq yhúm nghut lhê. Haú gi, "Ngò gi, yhangmoq eq rahá nyi mù, yhangmoq chyáng sô nyi râ nghut luí, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lhê."✧ ga Garai Gasang taí tô é eq rajung za nghut ri.

<sup>17</sup> "Haú mù luí, yhangmoq chyáng mai htoq lô mù, gotú san za nyi keq. A sansêng é zè lé hkâzàng kó, haú hkûn, Ngò, nungmoq lé lhom hap yù râ nghut lhê."✧ ga haú Yhumsíng taí ri.

<sup>18</sup> "Ngò gi, nungmoq é Îwa dut mù, nungmoq gi, Ngá é byizo yuqzô pé dut kó râ nghut lhê."✧

ga haú wum-o a-tsam dik shoq bò Sù Yhumsíng taí ri.

## 7

<sup>1</sup> Chyitdap é luzúm wui ê, nga-nhúng gi, danggidiq haú pé lé wó tô é bang nghut é yanmai, gungdu eq woi-nyí lé agot a-ù dut nhang é jung hkangmó mai, yhumsing gùng yhumsíng lhoq sân-yúng yù luí, Garai Gasang lé gyuq hkunggâ é myit èq chyoiyúng hkyô má lhoq gumjup yu nyi sháng.

### *Poluq É Gabú Hkyô*

<sup>2</sup> Nungmoq é i-myt unghkaú má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaú zô wú é nghut lhê.

<sup>3</sup> Ngò gi, nungmoq lé mara byi râ matú haú su taí é a nghut. Ngamoq gi, asak duí kôle, shí kôle, nungmoq eq rahá wó dut shoq, nungmoq gi, ngamoq é i-myt unghkaú má lúng nyi é nghut lhê nghû, hí hkûn ngò taí wú bê nghut lhê.

<sup>4</sup> Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byí é gyai yhang huí ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

<sup>5</sup> Hkâsu mù gâ le, ngamoq gi, Make-doni mau má jé é hkûn, ngamoq é gungdu gi, zim za a myang nyi é htoq agó, hkyô hkangmó má ngamoq wuîhke jamjau hui zô é nghut lhê. Shinggan má gi, mabyoq htoq, ahkaú má gi, gyuq kyum nyi é nghut lhê.

<sup>6</sup> Nghut kôlhang, nhik ngê bang lé nhik títng é Garai Gasang gi, Tituq lé jé lé nhang é dông mai, ngamoq lé nhik títng byi bê nghut ri.

<sup>7</sup> Yhang jé lé é dông mai za a nghut, yhang lé nungmoq nhik títng byí é hkyô dông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuí nyi é hkyô, nungmoq gyai yhang shut bûn é hkyô, ngá é matú nungmoq gyai myit chiq byí é hkyô pé lé, ngamoq lé taí kyo bê nghut ri.

<sup>8</sup> Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é

\* **6:15** Beliala gâ é gi, Tsadán é myìng rajà nghut lhê. ✧ **6:16** Nhung 26:12; Yer 32:38; Ezk 37:27 ✧ **6:17** Esai 52:11; Ezk 20:34,41 ✧ **6:18** 2 Sam 7:14



nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê.

<sup>9</sup> Nghut kôlhang, ngò gi, ahkuí gabú lhê; haú gi, nungmoq lé yón hui nhang é yanmai a nghut é za, nungmoq é yón hkyo eq, nungmoq lé myit lhing nhang é yanmai ru nghut lhê. Nungmoq gi, Garai Gasang ô nau é đông yón huí é bang dut bekô nghut mù, nungmoq lé, ngamoq eq hai akyû le a lhoq yôm byí é nghut lhê.

<sup>10</sup> Hkâsu mù gâ le, Garai o é đông yón kuq huí é hkyô gi, nungngham wó hkyô a bo é za, hkyi yù hkyô wó shoq, myit lhing nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri.

<sup>11</sup> Garai o é đông, nungmoq chyáng akyû lhoq htoq byí é yón kuq hkyô lé wú wú keq! Haú gi, gyai yhang myit zuq é hkyô, yhumsing gùng mara a bo é lé tûn shit rá lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byí é hkyô, tengmán hkyô kut rá rì rì nghut é hkyô pé nghut lhê. Nungmoq gi, haú hkyô má mara a bo é lé hkat hkanngmó má saksé tûn shit bekô nghut ri.

<sup>12</sup> Haú mù luí, ngò, nungmoq lé kê kat é nghut kôlhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nóng byí é hkyô lé, Garai Gasang hí má nungmoq gùng nungmoq wó myâng rá matú kê kat é sheq ru nghut lhê.

<sup>13</sup> Haú pé banshoq đông mai, ngamoq gi, myit wum byí é huí ri.

Ngamoq myit wum byi huí é htoq agó, Tituq hkâ-í yhang gabú é lé myàng mù, ngamoq gi, je riyhang myit gabú é nghut lhê. Haí mù yhang gabú é gâ lé, nungmoq banshoq băng eq yhâng é myit lé lhoq ngu-ingón byi kê é yanmai nghut ri.

<sup>14</sup> Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq taí é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê.

<sup>15</sup> Nungmoq banshoq bang jìno gyo kômù, gyuq nán é myit mai yhang lé lhom hap yù kê é lé, yhang myitbûn é hkûn,

yhang nungmoq lé chyitdap é myit gi, je riyhang kê dik nyi ri.

<sup>16</sup> Ngò gi, nungmoq lé banshoq wó lum to bê lé sê é yanmai, gabú nyi lhê.

## 8

### *Byí É Hkyô*

<sup>1</sup> Gumang wuì ê, ahkuí, ngamoq gi, Makedoni mau mâ é noqkuq hpúng pé lé Garai Gasang byí é jeju eq sêng é hkyô, nungmoq lé sé nhâng nau ri.

<sup>2</sup> Yhangmoq gi, wuìhke jamjau hkyô myô eq chyam lik é huí é nghut kôlhang, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri.

<sup>3</sup> Hkâsu mù gâ le, yhangmoq gi, yhangmoq wó dut é myhó byi kê é htoq agó, yhangmoq é a-tsam lai shoq lhang byi kê é hkyô lé, ngò saksé hkám lhê. Yhangmoq gi, yhangmoq é myit hkaú mai yhang haú su kut kê é nghut ri.

<sup>4</sup> Yhangmoq gi, haú sân-yúng bang lé wó bo dojaú rá matú, ngamoq lé gyai yhang ahkáng dung kê é nghut ri.

<sup>5</sup> Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng é đông, yhangmoq gùng lé hí haú Yhumsing lé ap byí pyám kômù, hau htàng sheq ngamoq lé ap kê é nghut ri.

<sup>6</sup> Haú mù luí, Tituq yhang hí kut hi nyi bê nghut é yanmai, ngamoq gi, jeju haú lé nungmoq chyáng le shuí lhoq bying jup byi rá matú, yhang lé wum byi bê nghut lhê.

<sup>7</sup> Nungmoq gi, lumjing myit má, dang nyo é hkyô má le, sumsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkanngmó má agùn agó dut bekô eq rajung za, nungmoq gi, byí nau é jeju shí má le agùn agó dut rá lé, bûn nyi keq.

<sup>8</sup> Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é đông, nungmoq é chyitdap myit jet é hkyô lé chyam wú nau luí sheq ru nghut lhê.

<sup>9</sup> Hkâsu mù gâ le, nungmoq gi, nga-nhùng é Yhumsing Yesuq Hkrisduq é jeju lé sê akô nghut ri. Yhang gi, Yhâng é myùng hkyô đông mai nungmoq wó bang dut kó sháng

gaq ga, jung hkangmó wó sù nghut kôlhang, nungmoq é matú é yanmai, myùng sù dut bê nghut ri.

10 Shí hkyô eq sêng é má, nungmoq é matú ge dik é hkyô ngò hpaqchyî byi kôlé: A-nhik, nungmoq gi, sâng-hi, byí hî kô é za a nghut, haú su kut nau é myit bo é bang le nghut akô.

11 Nungmoq wó dut é eq rajung za, haú lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuí, muzó haú lhoq pán keq.

12 Hkâsu mù gâ le, byí nau é myit bo é nghut jáng, chyunghuq haú gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

13 Nungmoq é matú gi, wòlai dut, góbang gi, hkyamsâ nyi râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê.

14 Nungmoq haí râ tô é lé, yhangmoq agùn agó wó é mâ é wó dum taú htuqbang byi kó sháng gaq, ahkui lhê é ahkyíng má, yhangmoq haí râ tô é lé, nungmoq agùn agó wó é mâ é htuqbang byi keq. Haú jáng sheq, wuí wuí za wó dut kó râ nghut lhê.

15 Haú gi, "Myo myo tsíng yu é sù gi, lûm myo shoq wó é a nghut, shau za tsíng yu é sù gi, lûm shau shoq wó é a nghut."✧ ga kâ tô é eq rajung za nghut ri.

### *Tituq Lé Korinhtuq Myuq Shut Nhang Kat É Hkyô*

16 Nungmoq é matú ngò myit chiq byí é eq rajung zâ é myit lé, Tituq é i-mytit má kat byí é Garai Gasang lé, ngò jeju hkya-ôn lhê.

17 Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yhang myit toq mù, yhânggùng yhang myit hpyit yú luí, nungmoq chyáng lé lô gù za nghut ri.

18 Ngamoq gi, haú gabú danglù lé dojaú é má noqkuq hpûng pé banshoq èq hkya-on huí é gumang hpó haú lé le, yhang eq rahá nhang kat lhê.

19 Hau htoq agó, ngamoq garúm râ myit bo nyi é hkyô lé tûn shit mù, haú Yhumsíng lé hkungga râ matú ngamoq wú gôn nyi hkyô nghut é, alu lé ngamoq yu chung

é hkûn, ngamoq é byinzùm kut râ matú, noqkuq hpûng pé èq hkyin yu é sù le yhang nghut lhê.

20 Ngamoq gi, myit lòm luí byí é chyunghuq shí lé ngamoq wú gôn nyi é hkyô má, ó yuq èq le mara hô râ hkyô a htoq shoq sidiq nyi lhê.

21 Hkâsu mù gâ le, jô é hkyô kut râ matú ngamoq shikut nyi é gi, haú Yhumsing é myoq hí má za a nghut, byu pé é myoq hí má le nghut lhê.

22 Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotú gumang hpó lé le yhangnhik eq rahá nhang kat lhê. Yhang gi, ahkuí lhang, nungmoq lé gyai yhang myit lum tô é yanmai, shirông myit je riyhang bo nyi ri.

23 Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhûng é gumâng nhik é hkyô ga jáng, yhangnhik gi, noqkuq hpûng pé é gunglik eq Hkrisduq é aróng nghut akô.

24 Haú mù luí, haú noqkuq hpûng pé wó myâng kó sháng gaq, nungmoq má ngamoq haí mù gumrong é hkyô eq nungmoq é chyitdap myit é saksé lé, haú bang lé tûn shit keq.

## 9

1 Ngò gi, haú sân-yúng bang lé htuqbang râ hkyô eq séng luí, nungmoq lé kâ kat râ a ra nghut ri.

2 Hkâsu mù gâ le, nungmoq gyai garúm nau é myit lé ngò sê lhê, haú mù, ngò gi, Makedoni mau bang lé, haú hkyô eq séng luí gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé taíkyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaú toq byi bê nghut ri.

3 Nghut kôlhang, shí hkyô má nungmoq eq séng luí ngamoq gumrong é gi, hká dông le dangsôm a dut byuq sháng gaq, ngò taí bê eq rajung za nungmoq rì rì wó hen to râ matú, ngò gi, gumang wuí lé nhang kat é nghut lhê.

<sup>4</sup> Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kô é nghut jáng, nungmoq za hoq hpu rá a nghut, ngamoq le, nungmoq lé lûm yhang lum pyâm é yanmai, hoq bo hpu rá nghut lhê.

<sup>5</sup> Haû mù luî, nungmoq danggidiq byî to bê nghut é, chyunghuq lé rago wó lajâng pân to rá matú, gumang wui lé wum tai tsuq mù, nungmoq lé hí, lé kum nhâng rá gi, ra yhang rá lhê nghû ngò wó myit ri. Haû hkûn sheq, a nau é dông byî é a nghut é za, byí nau é chyunghuq dông hen tô é dut rá nghut lhê.

### *Agùn Agó Byî É Hkyô*

<sup>6</sup> Shau za sân hkyó sù gi, shau za shû yù rá nghut mù, agùn agó sân hkyó sù gi, agùn agó shû yù rá nghut lhê gâ é dang lé, myitbûn nyi keq.

<sup>7</sup> Yuq hkanmó gi, a kâm byî é eq byí nhang é dông a nghut é za, yhumsing myit má byí nau é myhó lé myit hpyit yù mù byî é dông dut rá lhê. Hkâsu mù gâ le, Garai Gasang gi, gabú myit eq byi sù lé chyitdap ri.

<sup>8</sup> Haû mù, ahkyíng hkanmó jung hkanmó má, nungmoq rá é banshoq wó mù, ge é muzó hkanmó lé nungmoq je myo wó kut kó sháng gaq ga, Garai Gasang gi, jeju lhungháng lé, nungmoq lé wó byî é sù nghut lhê.

<sup>9</sup> Haû gi,

"Yhang gi, a ha bûn é za myùng bang lé yhâng é chyunghuq tsing gâm byi bê nghut ri; Yhâng é dingmán hkyô gi, ahtum abyuq gíng nyi ri."\*

ga kâ to eq rajung za nghut ri.

<sup>10</sup> Kyô hkyó sù lé kyôshi, zoshuq matú muk byî é Sù gi, nungmoq lé kyôshi byi mù, lhoq myô jat byi rá eq, nungmoq é dingmán hkyo é ashi lé myô lò nhâng rá nghut lhê.

<sup>11</sup> Nungmoq gi, ayoq abun hkanmó má agùn agó byî é bang wó dut kó rá matú, hkyô hkanmó má sùt wó é bang dut é hui kó rá nghut lhê. Nungmoq agùn agó byî é hkyô lé, ngamoq lhai byi mù, Garai Gasang lé jeju hkya-ôn é hkyô dut rá nghut lhê.

<sup>12</sup> Nungmoq dojaú é hkyô shî gi, Garai Gasang é byu pé rá é hkyô lé lajang byî é

za a nghut, Garai Gasang lé jeju bûn é dang byíng mui nyi nhang é le nghut lhê.

<sup>13</sup> Dojaú hkyô hau é yanmai, nungmoq lhumzui hkyô saksé tûn shit bekô nghut mù, byu pé gi, Hkrisduq é gabú danglù lé nungmoq yín yù luî jìno gyo kô é yanmai le, yhangmoq eq yuq hkanmó lé, nungmoq é a ha bûn é myit mai shuí gam chûng kô é yanmai le, Garai Gasang lé hkya-on kó rá nghut lhê.

<sup>14</sup> Hau htoq agó, Garai Gasang gi, nungmoq lé jeju lai shoq byî tô é yanmai nungmoq é matú yhangmoq kyûdung byî é u má, yhangmoq é myit nhiklum gi, nungmoq chyáng htoq jé rá nghut lhê.

<sup>15</sup> A ung htoq tai é Garai Gasang é chyunghuq é yanmai, jeju hkya-on hkyô gi, Yhâng chyáng ru nghut nyi sháng gaq ô!

## 10

### *Poluq, Yhâng É Hpungmû Lé Tai Hung É Hkyô*

<sup>1</sup> Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wàm dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô dông mai, nungmoq lé pying kat lhê.

<sup>2</sup> Shî mingkân é nyi yap a-tsang dông ngamoq asak dui ri ga myit ngam é byù ram lé, ngò a gyuq a wam é myit lé shit rá dô tô lhê. Ngò jé lé é hkûn, nungmoq lé haû sù é myit a shit ra sháng gaq, ngò nungmoq lé dúng tôngbán kat lhê.

<sup>3</sup> Hkâsu mù gâ le, ngamoq gi, mingkan shî má asak dui nyi kôlhang mingkan byu pé kut é dông majan zân é a nghut.

<sup>4</sup> Ngamoq majan zân é laknak gi, mingkan shî é laknak a nghut é za, shut shai é dông dang-rháng hkyô nghut é, gíngtíng é gyedap pé lé lhoq htên pyám rá matú Garaî é a-tsam byíng é laknak ru nghut lhê.

<sup>5</sup> Ngamoq gi, dang-rháng rhâng lhûm é hkyô pé eq Garai Gasang lé sê é hkyô lé shut shai shoq yhumsing gùng yhumsing lhoq myhang mhaû é hkyô hkanmó lé lhoq htên pyám mù, Hkrisduq é jìno gyo rá matú,

\* 9:9 Hkya-on 112:9

myit sôn é hkyô hkat hkangmó lé shúm kut yu é nghut lhê.

<sup>6</sup> Nungmoq é jìno gyo hkyô gi, gumjup é hkûn, jìno a gyô é hkyô hkangmó lé ngamoq dam byi râ rì rì dut râ nghut lhê.

<sup>7</sup> Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq.

<sup>8</sup> Hkâsu mù gâ le, nungmoq lé lêng hkyô râ nó gi, nungmoq lé kô myhâng nhâng râ matú, ngamoq lé haû Yhumsîng byî é ahko ahkáng lé gyai gumrong le lháng, ngò gi, hoq hpû é hui râ a nghut.

<sup>9</sup> Ngò gi, ngá é laiká pè èq nungmoq lé kyuuq é su a dut nhâng nau é nghut lhê.

<sup>10</sup> Hkâsu mù gâ le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlhâng, yhânggùng gi, byuwup a bo é nghut mù, yhang taî é dang pé gi, haî a nghut." ga taî akô.

<sup>11</sup> Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saî râ nghut é hkyô lé, haû sù é bang sê gyo râ dut lhê.

<sup>12</sup> Ngamoq gi, haû yhumsîng gùng yhumsîng owaq é bâng é hpúng má bo lom é hkyô nghut nghut, yhangmoq eq whuí é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chîn lhûm wú é eq yhangmoq gùng yhangmoq whuí lhûm wú kô é hkûn, hpaqchyî a bo é bang dut bekô nghut ri.

<sup>13</sup> Nghut kôlhâng, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byî é, nungmoq chyáng lháng hkyit jé shoq nghut é maukyo hkaû má za gumrông râ nghut lhê.

<sup>14</sup> Ngamoq gi, nungmoq chyáng a jé lé wú é dông mai, gyai yhang gumrong nyi râ a nghut; hkâsu mù gâ le, ngamoq gi, Hkrisduq é gabú danglù chûng mù, nungmoq chyáng lháng lé jé bê nghut lhê.

<sup>15</sup> Dum, ngamoq gi, góbang kut é muzó lé le, âng é mai lai luî gumrong lai é a nghut. Ngamoq myoqbyu é hkyô gi, nungmoq é

lumjîng myit kô myhang jat nyi jáng sheq, nungmoq chyáng ngamoq zui saî é jowò gyai wó lhoq lâm râ nghut lhê.

<sup>16</sup> Haû gi, nungmoq é mau lháng lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq èq zui saî to bê loqzó eq sêng luî, gumrông nau é a nghut.

<sup>17</sup> Nghut kôlhâng, "Gumrong é sù gi, haû Yhumsîng má gumrông sháng gaq."☆ ga kâ tô ri.

<sup>18</sup> Hkâsu mù gâ le, yhumsîng gùng yhumsîng owaq é sù gi, hap yù huî é a nghut é za, haû Yhumsîng èq owaq byî é sù sheq, hap yù huî é ru nghut lhê.

## 11

### *Lagyo Apyoq Pé Eq Poluq*

<sup>1</sup> Ngò gi, ngá é ratsuí ngok é dang lé, nungmoq jân pyám byi râ lé myoqbyu é nghut lhê; gè gè yhang, nungmoq gi, haû su kut nyi gù nghut bekô.

<sup>2</sup> Haî mù gâ le, ngò gi, Garai Gasang mai nungmoq lé magum é myit èq, nungmoq é matú magûm byî lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghû, Hkrisduq nghut é yhumsîng hpô chyáng za nungmoq lé byi zo râ nghû, danggidiq byî to bê nghut lhê.

<sup>3</sup> Nghut kôlhâng, Ewaq gi, lhangmuî hpaqchyî dâ é èq mhaû zô é huî é su, nungmoq myit é hkyô pé gi, Hkrisduq chyáng nungmoq é lhumzui é eq sansêng é i-myt ap nóng é hkyô mai shuí nghoq ló byuq é hui râ lé, ngò myit chiq ri.

<sup>4</sup> Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é dông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haû lé lui lui za lhom hap yu é dut bekô nghut ri.

<sup>5</sup> Nghut kôlhâng, ngò gi, "Ahkyak-lagyô pé" ga bâng é htoq má ratsuí lháng gyamgyi gyó sù a nghut nghû myit ngam é nghut lhê.

☆ 10:17 Yer 9:24

<sup>6</sup> Ngò gi, dang taí hpaqchyî kung sù rayuq a nghut kôlhang, sumsé hpaqchyî bò sù nghut lhê. Ngamoq gi, hkyô hkangmó má, nungmoq lé haú hkyô hkyâng shoq sé nhâng bê nghut lhê.

<sup>7</sup> Ngò, nungmoq lé, Garai Gasâng é gabú danglù lé ahpau a yu é za hko kyô é đông, nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lhú?

<sup>8</sup> Ngò, nungmoq lé dojaú râ matú, gotù noqkuq hpûng pé mai htuqbâng é lé hap yu é gi, haú bâng chyáng mai ngò zik lú yu é đông dut bê nghut lhê.

<sup>9</sup> Ngò gi, nungmoq eq rahá nyi mù, rajung jung râ é hkûn, ó yuq lé le wòlai a dut nhang é nghut lhê; hkâsu mù gâ le, Makedoni mau mai lé jé é gumang wui gi, ngò haí râ é lé htuqbang byi kô é yanmai nghut lhê. Hká đông nghut kôlhang, ngò gi, ngá gùng lé, nungmoq é matú wòlai a dut nhâng shoq kut bê nghut mù, xoq luí le haú đông kut nyi râ nghut lhê.

<sup>10</sup> Haú Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lhang, ngò haú su gumrong é hkyô lé wó hkùm zìng râ a nghut.

<sup>11</sup> Haí mù lhú? Ngò, nungmoq lé a chyitdap é yanmai nghut lhê lhú? Ngò, nungmoq lé chyitdap é hkyô lé, Garai Gasang sê lhê.

<sup>12</sup> Ngò gi, yhangmoq zui saí é lé gumrong é hkyô pé má ngamoq eq rawuí za són byi râ ahko ahkáng ô nau é bang lé ahkáng a byi râ matú, ngò kut nyi é su xoq luí kut shi râ nghut lhê.

<sup>13</sup> Hkâsu mù gâ le, haú sù é bang gi, lagyo apyoq pé, mhaú zô é mù zui bang, Hkrisduq é lagyo pé đông kut mhaú é bang nghut akô.

<sup>14</sup> Haú gi, maú ra hkyô a joq, hkâsu mù gâ le, Tsadán lhang gi, maubó é maumang lagyo rayuq đông kut mhaú é sù nghut lhê.

<sup>15</sup> Haú mù, Tsadán é dui-nhâng zoshâng wui gi, dingmán hkyo é dui-nhâng zoshâng wui đông kut mhaú é nghut jáng, maú dân râ hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó râ nghut lhê.

*Yhâng É Wuìhke Jamjau Hkyô Eq Séng Luí, Poluq Gumrong É Hkyô*

<sup>16</sup> Ngò puq taí kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrông sháng gaq, byù gò lé nungmoq hap yu é su, ngo lé hap yù kó laq.

<sup>17</sup> Ngò, haú su gumrong é hkyô gi, haú Yhumsîng o é đông ngò taí nyi é a nghut, byù gò rayuq đông taí nyi é ru nghut lhê.

<sup>18</sup> Byù myo myo gi, mingkân é hkyô đông gumrong nyi bum lhê nghut mù, ngò le gumrông râ nghut lhê.

<sup>19</sup> Nungmoq gi, hpaqchyî lûm bo kô é nghut mù, byù go pé lé gabú myit èq jân nyi akô nhung!

<sup>20</sup> Gè gè yhang, nungmoq gi, nungmoq lé jùn kut é sù lé le, nungmoq lé rhoi zô é sù lé le, nungmoq chyáng akyû hô zô yu é sù lé le, yhang gùng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri.

<sup>21</sup> Ngamoq gi, nungmoq lé haú hkyô kut râ má wum gyai nyhôm lhê nghu yín yû râ lé, ngò, hoq ri!

Rayuq yuq, haí lé wám gumrong é nghut jáng, ngò le, haú lé wám gumrong lhê nghu, byù gò rayuq đông ngò taí nyi é nghut lhê.

<sup>22</sup> Yhangmoq gi, Hebre byu pé nghut akô lhú? Ngò le nghut lhê. Yhangmoq gi, Israelaq byu pé nghut akô lhú? Ngò le nghut lhê. Yhangmoq gi, Abraham é awut ashîn pé nghut akô lhú? Ngò le nghut lhê.

<sup>23</sup> Yhangmoq gi, Hkrisduq é dui-nhâng zoshâng wui nghut akô lhú? (Ngò gi, myit a gyíng é sù đông haú su taí é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huí wú bê, shi râ î é adàm dàm huí wú bê nghut lhê.

<sup>24</sup> Ngò gi, Yudaq byu pé nuichum èq bat é myi xê dàm byíng râ radàm ra ra dut é, ngo lêng hui zô wú é nghut lhê.

<sup>25</sup> Ngò gi, dumbáng èq nhuq huí é sum dàm, shi sháng gaq ga luqgok èq dú huí é radàm, wui-sanghpo byoq huí é sum dàm, wuimau má myû byôm é ra-nyí ra-myìn hui zô wú bê nghut lhê.

<sup>26</sup> Ngò gi, xoq xoq hkyowui htoq e ló é hkûn, wui gû é gyuq chiq jung, damyaq hui

é gyuq chiq jung, ngá é amyû wui chyáng mã é gyuq chiq jung, tûngbaù pê chyáng mã é gyuq chiq jung, myuq hkaû pé mã é gyuq chiq jung, yoso pé mã é gyuq chiq jung, wuimau mã é gyuq chiq jung eq gumang apyoq pê chyáng mã é gyuq chiq jung pé hui zô wú bê nghut lhê.

<sup>27</sup> Ngò gi, mù lé zuí núg zuí hkyik mù, anum num a myang yhup shoq dut wú bê nghut lhê. Ngò gi, zòmut wui shit huí é eq zoshuq a wó é anum num huí lai lo wú bê nghut lhê. Ngò gi, gyoq hpû é eq gùngchîn dut é huí wú bê nghut lhê.

<sup>28</sup> Haú pé lhunglhang htoq má, noqkuq hpûng pé banshoq é matú ngò myit chiq byí é hkyô gi, nyí wuí ngò má wòlai dut nyí ri.

<sup>29</sup> Rayuq yuq wum nyhóm le, ngò le wum a nyhóm râ lúh? Rayuq yuq mara shuí kut shut é hui le, ngò myit a nyé râ lúh?

<sup>30</sup> Ngò gumrông râ dut é nghut le gi, ngò wum nyhóm é hkyô lé tûn shit é pé lé gumrông râ nghut lhê.

<sup>31</sup> Ngò a mhaû nyí é hkyô lé pyat dedu hkya-on huí é sù, haû Yhumsîng Yesuq é Íwa eq Garai Gasang sê lhê.

<sup>32</sup> Damaskuq myuq má, Hkohkâm Areta é a-ô mã é mauzau gi, ngo lé chyup râ matú, myuq lé zúng nhang é nghut lhê.

<sup>33</sup> Nghut kôlhang, ngò gi, manghkoq má lúng mù, myuq xêwâm mã é hkohot dong mai lhoq hkyô kat é hui lui, yhang é loq mai wó lut é nghut lhê.

## 12

### *Poluq É Myoqwup Shing-rán Pé*

<sup>1</sup> Ngò gi, rû gumrông nyí râ za nghut lhê. Akyû wó râ a nghut kôlhang, haû Yhumsîng chyáng mai lo é myoqwup shing-rán pé eq hpông shit é shing-rán pé lé gumrông râ nghut lhê.

<sup>2</sup> Ngò gi, lai lò bê raxe myi zân hkûn, mauhkûng sum tsáng nghu é má shuí toq yu huí é, Hkrisduq mã é byù rayuq\* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê.

<sup>3</sup> Yhang hparadisu má shuí toq yû huí é gi, ngò sê lhê. Yhang gi, gungdu eq nghut

lhê luq, a nghut é luq, ngò a sé, nghut kôlhang, Garai Gasang gi, sê lhê.

<sup>4</sup> Yhang gi, byu pé tai kyô htoq râ ahkáng a wó é hkyô pé nghut é, a wó tai sân kyô é hkyô pé lé wó gyô ri.

<sup>5</sup> Ngò gi, haú yuq sù é byu é hkyô eq séng lui gumrông râ nghut lhê; nghut kôlhang, ngò gi, ngá é wum nyhóm hkyô eq séng lui, gumrông é mai lai lui, ngá gûng ngò gumrông râ a nghut.

<sup>6</sup> Ngò gi, gumrông hkyô lé hkyin yù râ dut é nghut jáng lhang, byù gò dut râ a nghut, hai mù gâ le, ngò gi, tengmán hkyô tai nyí râ nghut lhê. Nghut kôlhang, ó yuq le, ngò kut é eq ngò tai é mai myit lum to kô é htoq má, ngo lé, je a myit lo ko sháng gaq nghû, ngò a gumrông kut pyâm nyí lhê.

<sup>7</sup> Haû laklai dik é dong ngo lé hpông shit é shing-rán mó pé é yanmai, ngò a nghutbûn byuq sháng gaq ga, ngo lé gunjang râ matú, Tsadán é lagyo nghut é zu lé, ngá é gungsho má kat byí to bê nghut ri.

<sup>8</sup> Haû lé ngá chyáng mai yu pyám byí râ matú, ngò, Yhumsîng lé sum dâm dúng tóngbán wú bê nghut lhê.

<sup>9</sup> Nghut kôlhang, Yhang gi, "Ngá é jeju gi, náng é matú luq dun é nghut lhê; hkâsu mù gâ le, Ngá é a-tsam gi, wum nyhóm é hkyô má lhoq gumjup é hui ri." ga lui, ngo lé tai ri. Haû mù lui, Hkrisduq é a-tsam gi, ngò má wó joq nyí sháng gaq nghû, ngò gi, ngá é wum nyhóm é hkyô pé eq séng lui, gabú myit mai je riyhang gumrông râ nghut lhê.

<sup>10</sup> Haû nghut mù lui, ngò gi, Hkrisduq é yanmai, wum nyhóm é hkyô pé má le, rhoi huí é hkyô pé má le, wuihke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyí lhê. Hkâsu mù gâ le, ngò wum nyhóm é hkûn sheq, ngò wúm bo é nghut lhê.

### *Poluq Chiq Byí É Hkyô*

<sup>11</sup> Ngò gi, ngá gûng ngò byù gò lhoq kut yû bê nghut ri, nghut kôlhang, haû gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkâsu mù gâ le, ngò gi, hai a nghut kôlhang,

\* 12:2 Hkrisduq mã é byù rayuq gâ é gi, Poluq yhanggùng yhang lé tai nyí é nghut lhê.

"Ahkyak lagyô pé" ga bâng é htoq má ratsuí lhang gyamgyi gyó sù a nghut.

<sup>12</sup> Lagyo rayuq é masat kumlhá nghut é, kumlhá pé, mauhpo muzó pé eq laklai kumlhá pé lé, ngò gi, gyai yhang hkam jan mù nungmoq chyáng kut bê nghut lhê.

<sup>13</sup> Ngò gi, nungmoq é matú, hkâ-nhám le wòlai a dut é nhing, nungmoq gi, hkâsu mù, gotú noqkuq hpung pé htoq má gyamgyi gyó nyi akô lú? Ngò, haú hkyô má shut é nghut jáng, mara hkyut pyám byi kó laq!

<sup>14</sup> Ahkuí, ngò gi, nungmoq lé, sum lhang nghu rô dàm, lé kum rô rì rì nghut bê mù, nungmoq é matú wòlai gi, a dut rô nghut lhê. Haú mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká đông nghut kôle, zo wuí gi, mó wui é matú sutzè hkong to byi rô dut é a nghut, mó wuí sheq, zô wuí é matú hkong to byi rô dut é nghut lhê.

<sup>15</sup> Haú mù luí, ngò gi, gyai yhang gabú é myit mai, ngò wó é jung hkangmó lé nungmoq é matú chung jài rô nghut mù, ngá gung lé lhang chùng jài rô nghut lhê. Ngò, nungmoq lé myô chyitdap é yanmai, nungmoq gi, ngo lé shaú chyitdap kó rô lú?

<sup>16</sup> Ngò gi, nungmoq chyáng wòlai a dut é hkyô têng lhê. Nghut kôlhang, ngò gi, hpaqchyí haq da sù dut mù, mhaú lhik é đông nungmoq lé chyup yú sù dut byuq bê ga nungmoq ra-am myit akô myhi-nhung!

<sup>17</sup> Ngò gi, nungmoq chyáng nhang kat byí é byù đông, nungmoq chyáng amyat kut zô yù bê nghut lhê lú?

<sup>18</sup> Ngò gi, Tituq lé nungmoq chyáng lé rô matú wum taí tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lú? Nga-nhik gi, rajung zâ é myit đông chyat kut mù, rajung zâ é hkyô lé chyat châng é su nhik nghut lhê, a nghut kó lú?

<sup>19</sup> Ngamoq gi, nungmoq hí má ngamoq gùng ngamoq taí hung yu nyi ri nghu, ahkuí jé shoq myit nyi akô lú? Ngamoq gi, Hkrisduq mã é byu pé đông, Garai Gasâng hí má taí nyi é nghut lhê. Chyitdap é gumang wui é, ngamoq kut é jung hkangmó

gi, nungmoq é akyu matú chyat nghut lhê.

<sup>20</sup> Hkâsu mù gâ le, ngo lé jé é hkun, ngò, nungmoq lé dut nhang nau é su, nungmoq a wó dut kó rô eq, nungmoq, ngo lé dut nhang nau é su, ngò a wó dut rô lé, ngò myit gyuq ri. Ngò gi, mabyoq jishum htoq é, manon é, nhik-un buq é, byù hpung gam é, gansang é, lumu é, gyai nghutbun é eq atau ahú dut é hkyô pé joq rô lé gyuq ri.

<sup>21</sup> Ngò dum lé jé é hkun, ngá é Garai Gasang gi, nungmoq é hí má ngo lé myit nyhum nhang mù, yhangmoq ô nau é myit châng é má shut é đông nyi zô lhum nau é i-myit, gungsho zum yap é yubak mara eq a sân-yung é hkyô kut shut é mai myit a lhang bang myo myô é yanmai, yon kuq é hui zo rô lé, ngò myit chiq ri.

## 13

### *Ló Htáng Má Sidiq Byí É Dang Pé*

<sup>1</sup> Ahkuí, ngò, nungmoq chyáng lé kum rô gi, sum lhang nghu rô dàm nghut lhê. Haú gi, "Mara hun é hkyô hkangmó lé, í yuq sum yuq saksé hkâm é eq lhoq teng ra rô nghut lhê."\* ga kâ tô é eq rajung za nghut lhê.

<sup>2</sup> Ngò gi, í lhang nghu rô dàm nungmoq eq rahá nyi é hkun, nungmoq lé sidiq byí gú bê nghut lhê. Ahkuí le, nungmoq eq wê gang tô é u lé, dum taí kôlé, ngò dum jé lé é hkun, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo rô nghut lhê.

<sup>3</sup> Haú gi, ngò đông mai Hkrisduq dang taí nyi é hkyô saksé shit rô lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuí-ú é hkyô má wum nyhom é a nghut, nungmoq chyáng a-tsam mó shit sù sheq ru nghut ri.

<sup>4</sup> Hkâsu mù gâ le, Yhang gi, wum nyhom é má jén sat é hui bê nghut kôlhang, Garai Gasâng é a-tsâm eq dui nyi é gi, hkyak têng lhê. Haú eq rajung za, ngamoq gi, Yhang su wum nyhom kôlhang, nungmoq lé dojaú rô matú, Garai Gasâng é a-tsâm eq, Yhang eq rahá dui nyi rô nghut lhê.

<sup>5</sup> Nungmoq gi, lumjing hkyô má nghut nyi lhê luq, yhumsing gùng yhumsing myí wú keq. Yhumsing gùng yhumsing chyam

wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyí bê hkyô lé sé kó râ nghut lhê.

<sup>6</sup> Ngamoq gi, chyam é má a sùm é hkyô lé, nungmoq wó sé kó râ nghut lhê nghû, ngò hkyak lum tô lhê.

<sup>7</sup> Ahkuí, ngamoq gi, nungmoq shut é hkyô haí a kut kó râ matú, Garai Gasâng chyáng kyûdung byi lhê. Haú gi, ngamoq chyâm hui luí wó lut é hkyô lé byu pé myàng kó râ matú a nghut é za, ngamoq sùm é su dut kôlhang, nungmoq ge é hkyô kut kó râ lé myàng râ matú nghut lhê.

<sup>8</sup> Hkâsu mù gâ le, ngamoq gi, haú tengmán hkyô eq shaí é dông haí le a ge kut é za, tengmán hkyô é matú za kut râ dut é nghut lhê.

<sup>9</sup> Ngamoq wum nyhóm kôlhang, nungmoq wúm bo é hkûn, ngamoq gabú é nghut lhê; ngamoq kyûdung é gi, nungmoq gumjup râ matú nghut lhê.

<sup>10</sup> Ngò gi, wê gâng tô é hkûn, haú hkyô pé lé haí mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haú gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haú Yhumsîng ngo lé byí é sheq ru nghut lhê.

### *Ló Htâng É Shi-kyám Dang*

<sup>11</sup> Ló htáng má ngò taí nau é gi, gumang wui ê, nguingón yuqyo nyí keq. Gumjup hkyô shut sô nyí keq, ngò dúng tôngbán é dang lé gyo keq, myit rahkat za dut nyí keq, nguingón shoq asak duí nyí keq. Haú hkûn, chyitdap hkyô eq nguingón hkyô é Garai Gasang gi, nungmoq eq rahá nyí nyí râ nghut lhê.

<sup>12</sup> Chyoiyúng é bopuq puq é èq, rayuq eq rayuq shi-kyâm lhum keq.

<sup>13</sup> Sân-yúng bang banshoq gi, nungmoq lé shi-kyâm kat akô.

<sup>14</sup> Haú Yhumsîng Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bâng chyáng ru joq nyí sháng gaq ô.



## GALATIQ

### Mau Bâng Chyáng Hun Kat é Laiká (Galatians)

<sup>1</sup> Byu pê chyáng mai le a nghut, ó yuq èq nhang é le a nghut e za, haû Yesuq Hkrisduq lé shî bê mai dum lhoq dui toq yu é sù Íwa Garai Gasang eq Yesuq Hkrisduq chyáng mai nhang kat é lagyo rayuq nghut sù, ngò Poluq gi,

<sup>2</sup> ngò eq rahá nyi é gumang wuì banshoq bang le mù, Galatiq mau mâ é noqkuq hpûng pê chyáng dang kyô kat lhê.

<sup>3</sup> Nga-nhûng é Íwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyí sháng gaq ô.

<sup>4</sup> Haû Hkrisduq gi, nga-nhûng é Íwa Garai Gasang ô nau é eq rajung za, agè ashop é ipyat shî mai, nga-nhûng lé xe yù râ ga, nga-nhûng é yubak marâ é matú yhânggùng lé Yhang byí pyám bê nghut ri.

<sup>5</sup> Haû hpungwup shingkang gi, Garai Gasâng chyáng pyat dedu ahtum abyuq ru joq nyí sháng gaq ô. Amen.

#### *Gotû Gabú Danglù A Joq É Hkyô*

<sup>6</sup> Ngò gi, haû Hkrisduq é jeju mai nungmoq lé ji yù Sù lé, nungmoq haû-í han kâng pyâm to kôluí, shaí é gabú danglù shut lhing ló nyí kô é hkyô lé, gyai yhang maú nyi ri.

<sup>7</sup> Danglù haû gi, gabú danglù ratsuí lháng a nghut. Byù ra-am mai nungmoq lé lhoq shuk byí luí, haû Hkrisduq é gabú danglù lé, shikut luí lhoq shai nhang pyâm nyi kô é hkyô za nghut lhê.

<sup>8</sup> Nghut kôlháng, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkûng htoq mâ é maumang lagyo rayuq nghut nghut, shaí é gabú danglù, nungmoq lé hko kyô é nghut jáng, haû yuq gi, ahtum abyuq dam byí é hui zo sháng gaq ô!

<sup>9</sup> Ngamoq taí wú bê eq rajung za, ahkuí le, ngò dum taí kôlé: rayuq yuq mai, nungmoq hap yu to bê é gabú danglù mai lai

luí, gotû hko nyi e nghut jáng, haû yuq gi, ahtum abyuq dam byí é hui zo sháng gaq ô!

<sup>10</sup> Haû su nghu taí é gi, ahkuí, ngò, byù é hí má myoqdong wó râ matú shikut nyi é nghut lhê lhú? Haû a nghut jáng, Garai Gasâng é hí má myoqdong wó râ matú shikut nyi é nghut lhê lhú? Byù lé gabú nhâng râ matú, ngò shikut nyi é nghut lhê lhú? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut râ a nghut.

#### *Poluq Lé, Garai Gasang Ji Yu É Hkyô*

<sup>11</sup> Gumang wuì ê, ngò hko kyô é gabú danglù haû gi, byu èq kut htoq é hkyô a nghut é lé, ngò, nungmoq lé sé nhâng nau ri.

<sup>12</sup> Ngò gi, haû lé, byu chyáng mai wó yu é le a nghut, góyuq èq mhoq byí é le a nghut e za, Yesuq Hkrisduq èq shing-rán byí é dông wó hap yu é ru nghut lhê.

<sup>13</sup> Ngò, Yudaq noqkuq htûng má nghut nyi ashî hkûn, Garai Gasâng é noqkuq hpûng lé ladu lai shoq hkâsu kut zing-ri luí, haû lé lhoq htên shikut wún é, ngá é hí hpyang lhê é asak dui hkyô lé, nungmoq wó gyô wú bekô râ nghut lhê.

<sup>14</sup> Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htûng lé je cháng sù nghut é htoq agó, ngá é íchýí íwa pê é htûngli lé ladu lai shoq myit zing zuq sù nghut lhê.

<sup>15</sup> Nghut kôlháng, ngá nú é unghkaû mai yhang hkyin to luí, Yhang é jeju yanmai ngo lé ji yu é Garai Gasang gi,

<sup>16</sup> haû Yhang Zô é hkyô gabú danglù lé, ngò mai tûngbaù pê chyáng hko kyo sháng gaq ga, Yhang Zo lé ngá chyáng htoq shit nhâng râ matú myit hpyit yu é hkûn, ngò gi, ó yuq eq le a hpyé yù,

<sup>17</sup> Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut ê luí, Damaskuq myuq má dum taú ló bê nghut lhê.

<sup>18</sup> Sum zân lai é htâng má, ngò gi, Yerusalem wà mó má doq ló mù, Petruq\* lé ló hui luí, yhang eq raxe ngo nyí, ló nyi nyi é nghut lhê.

\* 1:18 Petruq lé Kehpa le gà lhê.

19 Haù má, Yhumsing é yhanggu Yakuq mai lai luí, lagyo góbang lé ngò a myàng nghut ri.

20 Nungmoq lé ngò ká byí kat é má, mhaù é hkyô a bò nghû luí, Garai Gasâng hí má, hkyak, ngò taí lhê.

21 Hau htâng má, ngò gi, Suriq mau eq Kiliki mau má é jé é nghut lhê.

22 Haù hkûn, haù Hkrisduq má nghut é, Yuda mau má é noqkuq hpúng byû wuì gi, ngo lé myoqno a shú kó nghut ri.

23 Yhangmoq gi, "Hí hkûn, nga-nhúng lé zing-ri sù gi, yhang mai lhoq hten rá matú radám shikut wú é lumjínng hkyô haù lé, ahkuí hko nyi ri." gâ é hkyanglù lé wó gyô wú kôluí za,

24 ngá é yanmai, Garai Gasang lé hkya-ôn bum akô nghut ri.

## 2

### *Poluq Lé Lagyô Pé Lhom Hap Yu É Hkyô*

1 Raxe myi zân lai é htâng má, ngò gi, Barnaba eq rahá Yerusalem wà mó má dum doq ló é hkûn, Tituq lé le shuí chung é nghut lhê.

2 Garai Gasang byí é shing-rán eq rajung za doq ló luí, ngò kut wú bê muzó eq ahkuí kut é muzó pé akôm a dut pyám sháng gaq nghû, tûngbaù pé chyáng ngò hko kyô nyi é gabú danglù lé, haù suwún dut bâng é hí má za shap kyô é nghut lhê.

3 Nghut kôlhang, ngò eq rahá nghut é Tituq gi, Grik byù nghut kôle, yhang lé ahpyo-kuq a hpyit nhâng kó nghut ri.

4 Haù hkaù wang lo é mhaù é gumang wuì gi, Hkrisduq Yesuq má ngamoq wó é luthkyô má jowú luí, nga-nhúng lé jùn dut nhâng rá dâ kô é yanmai, haù hkyô gabyông htoq lo é nghut ri.\*

5 Nghut kôlhang, haù gabú danglu é tengmán hkyô gi, nungmoq chyáng joq gîng nyi sháng gaq nghû, razup za lhang, yhangmoq é dang lé ngamoq gyo byí é a nghut.

6 Ahkyak é byù su dut é bang gi, yhangmoq haí jung kut kôlhang, ngò eq a séng nghut ri; Garai Gasang gi, du lé wú mù

jéyáng é sù a nghut; byù haù bang gi, ngá é mungdang má haí le a jat kat e za,

7 Petruq gi, Yudaq byu pé† lé, haù gabú danglù hko kyo rá mù má lum tô é hui bê eq rajung za, ngò gi, tûngbaù pé‡ lé, haù gabú danglù hko kyo rá mù má lum tô é hui bê hkyô lé za, yhangmoq myang akô nghut ri.

8 Hkâsu mù gâ le, Yudaq byu pé é matú Petruq lé lagyo ayá dâng byí é sù Garai Gasang gi, tûngbaù pé matú ngo lé le lagyo ayá dâng byi bê nghut lhê.

9 Haù hkungmó-zîng su ahkyak é, Yakuq, Petruq eq Yohan pé gi, ngo lé byi tô é jeju lé myang sé kôjáng, ngò eq Barnaba lé, zùm yap hkyô gâ é loqyo loq èq shi-kyâm yù kôluí, yhangmoq gi, Yudaq byu pé shut, ngá-nhik lé gi, tûngbaù pé shut ê rá lhê ga, myit hui bekô nghut ri.

10 Yhangmoq gi, ngá-nhik mai myùng bang lé ru bûn nyi rá matú za pying kat akô; haù gi, ngò gyai yhang kut nau nyi é hkyô nghut lhê.

### *Petruq Lé Poluq Htuq Htîng É Hkyô*

11 Antioku wà mó má Petruq jé lé é hkûn, yhang lé mara hûn rá hkyô joq é yanmai, ngò gi, byu hí má yhang, yhang lé lhom htuq htîng é nghut lhê.

12 Hkâsu mù gâ le, Yakuq chyáng mai lé é bang a jé shí é u lé, yhang gi, tûngbaù pé eq rahá chôm zo chôm shuq lhaq kut ri. Nghut kôlhang, haù bang jé é hkûn, yhang gi, ahpyo-kuq hpyit rá lhê gâ é hpúng má lom é bang lé gyuq é yanmai, tûngbaù pé chyáng mai htoq gang luí, yhang baù nyi tô ri.

13 Yhang, gegùn labyoq kut é hkyô má, gotû Yudaq byu pé le bo châng kut akô nghut mù luí, Barnaba lhang yhangmoq kut é gegùn labyoq hkyô má bo châng nghoq ló bê nghut ri.

14 Haù gabú danglu é tengmán hkyô eq rajung za, yhangmoq a châng kô é lé myàng jáng, ngò gi, yhangmoq banshoq bâng é hí má, Petruq lé, "Nàng gi, Yudaq byu nghut to mù luí, Yudaq byu rayuq dông a nyi e za, tûngbaù rayuq dông nyi luí nhîng, tûngbaù

\* 2:4 Yudaq byu pé ra-am gi, hpúng asik wang é bang lé Yudaq htûng tarâ châng nhâng nau akô nghut ri. † 2:7 Grik má ahpyo-kuq hpyit hkam é bang ga bo tô ri. ‡ 2:7 Grik má ahpyo-kuq hpyit a hkam é bang ga bo tô ri.

pé lé Yudaq byu pé é htôngli hkâsu kut wó châng nhâng râ lúhú?

<sup>15</sup> Ngamoq gi, yubak dap bang gâ é tûngbaù pé a nghut e za, hkû é buinyi mai yhang, Yudaq byû nghut gû bê nghut lhê.

<sup>16</sup> Byù gi, jep é tarâ lé châng luí mara hkyut san byi huí é a nghut e za, Yesuq Hkrisduq lé lumjínq é yanmai sheq mara hkyut san byi huí é hkyô lé, ngamoq sê lhê. Haù mù luí, ngamoq gi, jep é tarâ lé châng luí a nghut e za, Yesuq Hkrisduq lé lumjínq é yanmai, mara hkyut sân pyám byí é hui sháng gaq nghû, Yesuq Hkrisduq lé lumjínq bê nghut lhê; hkâsu mù gâ le, ó yuq le, jep é tarâ lé châng é yanmai, mara hkyut san byí é hui râ a nghut.

<sup>17</sup> Ngamoq gi, Hkrisduq má ngamoq é mara hkyut san byí é hui râ hkyô ho nyi é hkûn, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é nghut lhê lúhú? Ratsuí le a nghut.

<sup>18</sup> Ngò gi, ngò hpyoq pyám bê hkyô lé dum saí kut é nghut jáng, tarâ lu lai é byù ngò nghut é lé tûn shit ri.

<sup>19</sup> Ngò gi, jep é tarâ eq sêng é má, jep é tarâ é yanmai shí jáng sheq, Garai Gasâng é matú wó dui nyi râ nghut lhê.

<sup>20</sup> Ngò gi, Hkrisduq eq rahá jén sat é hui bê nghut mù luí, ngá gûng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí, ngá é matú yhanggûng lé Yhang byí pyám é, haù Garai Gasâng é Yhangzo lé lumjínq é yanmai ru nghut lhê.

<sup>21</sup> Ngò gi, Garai Gasâng é jeju lé tô pyám é a nghut, hkâsu mù gâ le, dingmán é hkyô lé, jep é tarâ dông wó yu é ru nghut le gi, Hkrisduq shí hkâm é gi, akôm dut byuq râ nghut lhê." nghû tai é nghut lhê.

### 3

#### *Lumjínq Myit Lúhú? Jep É Tarâ Lúhú?*

<sup>1</sup> Galatiq mau mâ é byùbâm pé ê! Yesuq Hkrisduq gi, tapzínq má jén sat hui bê hkyô lé, nungmoq é myoq má bò nhang to bê le

nhîng, ó yuq eq wá nungmoq lé lêng nghoq yû bekô lúhú?

<sup>2</sup> Nungmoq gi, haù Woi-nyí lé, jep é tarâ châng luí wó yû kô é nghut lhê lúhú? A nghut jáng, nungmoq wó gyô yu é gabú danglù lé lumjínq luí wó yû kô é nghut lhê lúhú? Haù rahkat lé za, ngò sê yû nau ri.

<sup>3</sup> Nungmoq gi, haù-í yhang bâm akô lúhú? Haù Woi-nyí lé lumhkaù mù kut hí kôluí nhîng, ahkuí, gungsho wum-o lé lumhkaù mù, yhumsîng myit tô é hkyô lé lhoq pán râ matú shikut nyi akô lúhú?

<sup>4</sup> Nungmoq, myo myo hpuzô pyám é gi, akôm nghut akô lúhú? Gè gè yhang, haù gi, akôm nghut byuq bekô lúhú?

<sup>5</sup> Garai Gasang, nungmoq lé Yhâng é Woi-nyí byí é htoq agó, nungmoq chyáng laklaí kumlhá kut é gi, jep é tarâ lé nungmoq châng é yanmai nghut akô lúhú? A nghut jáng, nungmoq wó gyô é gabú danglù lé, nungmoq lumjínq é yanmai nghut akô lúhú?

<sup>6</sup> "Abraham gi, Garai Gasang lé lumjínq luí, yhang lé dingmán sù ga sôn yu é hui bê nghut ri."\* ga, Abraham eq séng luí tai tô é lé myit wú keq.

<sup>7</sup> Haù mù luí, lumjínq myit bo é bang gi, Abraham é yhangzô pé\* yhang dut bê nghut é hkyô lé sé keq.

<sup>8</sup> Lumjínq myit é yanmai, tûngbaù pé lé Garai Gasang mara hkyut san byi râ nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tô é gabú danglù gi, "Nang é yanmai, byuhú chângjup gi, shimân jeju wó yû kô râ nghut lhê."\* gâ ri.

<sup>9</sup> Haù mù luí, lumjínq myit bo é bang gi, lumjínq myit bo é Abraham eq rahá, shimân jeju lé myang hkam yù kô râ nghut lhê.

<sup>10</sup> Jep é tarâ châng é hkyô má nègè hkau é lhunglhang bang gi, nhîng pyám é hui bang chyat nghut lhê. Hkâsu mù gâ le, "Tarâ laiká má kâ tô é lhunglhang lé a xoq kut é sù, ó yuq nghut kôle, nhîng pyám é hui kô râ nghut lhê."\* ga luí, kâ tô ri.

<sup>11</sup> Hau htoq agó, "Haù dingmán sù gi, lumjínq myit mai asak dui râ nghut lhê."\* ga kâ tô é yanmai, ó yuq nghut kôle, Garai

\* 3:6 Apûn 15:6 \* 3:7 Abraham é yhangzô pé gâ é gi, Garai Gasâng é yhangzô pé lé gâ é nghut lhê. \* 3:8 Apûn 12:3 \* 3:10 Tarâ Pun 27:26 \* 3:11 Hbk 2:4

Gasâng é hí má jep é tarâ lé cháng luí, mara hkyut san byí é a huí é hkyô gi, san za nghut bê nghut ri.

12 Haú jep é tarâ gi, lumjínq myit eq haí a sêng é nghut luí, "Haú pé dông châng é sù gi, haú pé mai asak duí râ nghut lhê." ✧ ga kê tô ri.

13 Haú Chyúmdang má, "Sik zínq má jén lhang to huí é sù ó yuq nghut kôle, nhing pyâm é hui sù nghut ri." ✧ ga kê tô é eq rajung za, Hkrisduq gi, nga-nhúng é matú nhing pyâm é hui sù dut bê nghut é yanmai, jep é tarâ má é nhing é hkyô mai nga-nhúng lé hkyi yù bê nghut ri.

14 Haú Abraham lé byí tô é shimân jeju gi, Hkrisduq Yesuq é yanmai tûngbaù pé chyáng le jé sháng gaq ga, Yhang nga-nhúng lé hkyi yu é nghut ri; haú mù, nga-nhúng gi, danggidiq byí tô é Woi-nyí haú lé, lumjínq myit mai wó yù râ nghut lhê.

### *Jep E Tarâ Eq Danggidiq*

15 Gumang wui ê, nyí wui é asak duí hkyô má é lé dangtú yù mù, ngò nungmoq lé taí kôlé, byù mai chòm tô tô é dangshikaq lé, ó yuq eq le wó lhoq hpyoq pyám râ a nghut, ó yuq eq le haú má wó jat kat râ a nghut.

16 Abraham eq yhang é awut ashín lé byi tô é danggidiq le haú eq rajung za nghut ri. "Awut ashín pé lé" gâ é dang gi, byù myo myo lé gâ lhê; nghut kôlhang, haú Chyúmdang má, haú lé taí nau é a nghut e za, "náng é awut ashín lé" ✧ ga taí nau é ru nghut lhê, haú é lichyúm gi, byù rayuq lé za taí é nghut lhê, haú gi, Hkrisduq nghut ri;

17 haú mù luí, ngò taí nau é gi, Garai Gasang, dangshikaq tô tô é htâng, myí sho sum xê zàn má lé joq é tarâ gi, dangshikaq haú lé le wó lhoq hpyoq pyám râ a nghut, danggidiq lé le wó lhoq htên pyám râ a nghut.

18 Hkâsu mù gâ le, haú silí wunlí gi, jep é tarâ eq séng lhum é nghut jáng, danggidiq eq gi, haí le a sêng lhum lo nghut ri; nghut kôlhang, Garai Gasang gi, Yhâng é jeju yanmai, Abraham lé danggidiq dông silí wunlí haú byí to bê nghut ri.

19 Haú su nghut jáng, haú jep é tarâ gi, hai akyû bò râ lú? Haú gi, danggidiq dông

lhoq âng tô é Awut ashín nghut é sù jé lé é hkûn jé shoq, mara kut shut nyi bùm kô é yanmai, jat kat tô é nghut lhê; jep é tarâ haú gi, maumang lagyô pé mai gyoro sô xoq byi sù † é loq dông byí tô é ru nghut lhê.

20 Gyoro sô xoq byi sù gi, rahkyam shut mâ é bang eq baú sêng é a nghut, nghut kôlhang, Garai Gasang gi, rayuq za nghut lhê.

21 Haú mù luí, jep é tarâ gi, Garai Gasâng é danggidiq pé eq htuoq htîng lhum lhê lú? Ratsui le a nghut. Hkâsu mù gâ le, dui é asak wó byí é jep é tarâ lé byi to bê nghut le gi, gè gè yhang, dingmán hkyô gi, jep é tarâ mai lò râ nghut lhê.

22 Nghut kôlhang, mingkan gón má é bang gi, yubak marâ é htongbyu pé chyat nghut akô ga Chyúmdang má bo tô ri; haú mù luí, haú byí to bê danggidiq lé gi, Yesuq Hkrisduq lé lumjínq é bang lé byi râ nghut lhê.

23 Lumjínq hkyô haú a jé shimá, nga-nhúng gi, haú jep é tara eq htongbyu dông lhum tô é hui luí, lumjínq hkyô haú htoq shit é hkûn jé shoq myhí lhum tô é huí wú bê nghut lhê.

24 Haú mù luí, nga-nhúng gi, lumjínq é yanmai mara hkyut san byí é hui sháng gaq ga, jep é tarâ gi, nga-nhúng lé Hkrisduq chyáng shuí ê râ matú, nga-nhúng é hkyô-u shê sù dut bê nghut ri.

25 Ahkuí kúm gi, haú lumjínq hkyô jé bê nghut é yanmai, nga-nhúng gi, haú jep é tarâ mai hkyô-u shê é loq hkaú má a nghut lo.

### *Garai Gasâng É Yhangzô Pé*

26 Nungmoq lhunglhang bang gi, Hkrisduq Yesuq lé lumjínq é yanmai, Garai Gasâng é yhangzô pé nghut bê;

27 Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô nghut ri.

28 Nungmoq lhunglhang bang gi, Hkrisduq Yesuq má rading ralhum za nghut é yanmai, Yudaq byù nghu é eq Grik nghu é, jùn nghu é eq luthkyô nghu é, yuqgè nghu é eq myiwe nghu é, a gam hkoq lo nghut ri.

✧ 3:12 Nhong 18:5 ✧ 3:13 Tarâ Pun 21:23 ✧ 3:16 Apûn 12:7; 13:15; 24:7 † 3:19 Gyoro so xoq byi sù gi, Mosheq nghut ri.

<sup>29</sup> Nungmoq gi, Hkrisduq eq séng bekô nghut jáng, Abraham é awut ashîn pé le, haû danggidiq eq rajung za silí wunlí hkam yù bang le, nghut akô nghut ri.

#### 4

<sup>1</sup> Ngò taí nau é lichyúm gi, haû amyû hkûng xoq dut râ sù gi, ikun sutzè ban-shoq lé síng ang sù nghut kôlhang, yhang, zoshâng nghut ashî hkûn gi, jùn hpó eq haí a shaí nghut ri.

<sup>2</sup> Yhang gi, yhâng wa masat tô é ahkyíng jé shoq, yhang lé zúng é sù eq yhûm lé up su é a-ô má ru lúng nyi ashî nghut ri.

<sup>3</sup> Haû eq rajung za, nga-nhúng le zoshâng\* nghut é hkûn gi, mingkan uphkâng tarâ ô má jùn dut nyi é bang nghut lhê.

<sup>4</sup> Nghut kôlhang, ahkyíng lo ngap jáng, zo dut râ ahkáng lé byíng shoq, nga-nhúng wó yû sháng gaq ga, Garai Gasang gi, jep é tarâ hkaû mâ é byu pé lé hkyi yù râ matú,

<sup>5</sup> jep é tarâ hkaû má, myiwe mai hku kat nhang é Yhang Zo lé, nhang kat byi bê nghut ri.

<sup>6</sup> Hkâsu mù gâ le, nungmoq le, zo wuî nghut bê yanmai, "Aba, Áwa ê." ga dat wut é, Yhang Zô é Woi-nyí lé, Garai Gasang gi, nga-nhúng é i-myt unghkaû má kat byi bê nghut ri.

<sup>7</sup> Haû mù luí, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyû hkûng xoq dut nhang bê nghut ri.

#### *Galatiq Mau Bang Lé Poluq Myit Chiq Byî É Hkyô*

<sup>8</sup> Hí hkûn, Garai Gasang lé nungmoq a sé shî é u lé, nungmoq gi, nat hparà lháng a nghut bâng é a-ô má jùn dut é bang nghut ri.

<sup>9</sup> Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhîng, nungmoq gi, hkâsu mù, haû wum nyhôm é eq akyû a byî é, mingkan uphkang é tarâ shut dum

lhing taû ló nyi akô lhú? Nungmoq gi, haû pé èq jùn zô é dum hui zó nau akô lhú?

<sup>10</sup> Nungmoq gi, buinyì wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashî kó nhung!

<sup>11</sup> Nungmoq chyáng ngò wum kat pyâm é hkyô gi, akôm dut bê abe nghû, nungmoq é matú ngò myit chiq nyi ri.

<sup>12</sup> Gumang wuî ê, ngò gi, nungmoq su dut bê nghut é yanmai, nungmoq le ngò su dut keq† nghû, nungmoq lé dúng tôngbán kat lhê. Nungmoq gi, ngo lé haí le a kut shut wú kô é nghut lhê.

<sup>13</sup> Sâng-hî dàm ngò nungmoq lé gabú danglù hko kyo é hkyô gi, nungmoq sê é eq rajung za, ngò nòhpyo huí é yanmai nghut lhê.

<sup>14</sup> Ngá é nòhpyo gi, nungmoq é matú wuîhke hkyô dut kôlhang, nungmoq gi, ngo lé a wú tiq pyám kô é htoq agó, a wú chaq pyám kó e za, Garai Gasâng é maumang rayuq lé su le, Hkrisduq Yesuq lé su yhang le, ngo lé lhom hap yù kô é nghut lhê.

<sup>15</sup> Haû sù é nhîng, nungmoq é gabú hkyô banshoq gi, haí dut byuq bekô lhú? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byî pyám kó râ í dut laí lò bê hkyô lé, ngò saksé wó hkâm lhê.

<sup>16</sup> Ahkuí, ngò gi, nungmoq lé haû tengmán hkyô taí kyô é yanmai, nungmoq é gyè dut to bê nghut lhê lhú?

<sup>17</sup> Haû byù góbang gi, nungmoq lé gyai shirong é hkyô tûn shit ri; nghut kôlhang, ge é hkyô haí a bò; yhangmoq ô nau é hkyô gi, yhangmoq lé nungmoq taû shirông kó abe ga, nungmoq lé ngamoq chyáng mai lhoq kâng yù râ matú ru nghut lhê.

<sup>18</sup> Ge é hkyô lé shirong é gi, ge lhê; ngò eq rahá nyi é hkûn za a nghut, hkâ-nhám le haû su shirong le ge lhê.

<sup>19</sup> Ngò chyitdap é zo wuî ê, Hkrisduq é a-kyang nungmoq má gumjup lo é jé shoq, ngò gi, zo hkû nò no é su radàm dum hkâm zô nyi luí,

<sup>20</sup> nungmoq é hkyô lé myit wuîhkê tô é yanmai, ahkuí, nungmoq eq rahá myang

\* **4:3** Bun zo shî má, *zoshâng* gâ é lichyúm gi, Yesuq lé a lumjîng shî é bang lé gâ lhê. † **4:12** Ngò su dut keq gâ é lichyúm gi, nungmoq le ngò su jep é tarâ mai lut htoq keq gâ nau é nghut lhê.

nyì mù, ngò taí é danghtê wó htaí râ matú, gyai yhang myoqbyu nyi lhê ô.

### *Hagara eq Sarah Nhik É Hkyô*

<sup>21</sup> Haû jep é tarâ ô má nyi nau é bang ê, nungmoq gi, jep é tarâ má taí é hkyô lé a sê gyo kô é nghut lhê lhú? Ngo lé taí kyô wú kó laq.

<sup>22</sup> Hkâsu mù gà le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kê tô ri.

<sup>23</sup> Haû jùn myhí é yhangzo gi, gungsho đông hku lé é sù nghut kôlhang, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.

<sup>24</sup> Haú hkyô pé gi, dangtú ru nghut lhê, myiwe haû í yuq gi, dangshikaq í lhum eq wuí lhê; dangshikaq ralhum gi, Sinaq Bùm mâ é† nghut luí, jùn dut râ nghut é zo wuí lé hku kat é Hagara lé taí nau é nghut ri.

<sup>25</sup> Hagara haû gi, Arabiq mau mâ é Sinaq Bùm lé taí nau é nghut luí, ahkuí lhê é Yerusalem eq wuí nyi ri. Hkâsu mù gà le, Yerusalem haû gi, yhang zô pé eq rahá, jep é tara é jùn dut nyi kô é yanmai nghut lhê.

<sup>26</sup> Nghut kôlhang, ahtoq mâ é Yerusalem gi, jùn myhí a nghut sù nghut luí, nga-nhúng é ìnu nghut ri.

<sup>27</sup> Hkâsu mù gà le,  
"Zoshâng a hku é baùdung myhí ê, gabú nyi aq. Zo hkú nò a no wú shí é myiwe gi, gabú luí, gabú garú nyi aq;  
hkâsu mù gà le, haû chamchuyiuyi dut é myiwe myhí gi, làng wó é myiwê htoq má zo wuí je myô wó bê nghut ri."  
ga kê tô ri.✧

<sup>28</sup> Gumang wuí ê, ahkuí, nungmoq gi, Isak su, danggidiq byí tô é zo wuí nghut bê nghut ri.

<sup>29</sup> Haú hkún lé, haû gungsho đông hku lé lo é sù gi, Woi-nyí wum-o đông hku lé lo é sù lé zing-rí ri. Haû eq rajung za, ahkuí le dut nyi ri.

<sup>30</sup> Nghut kôlhang, Chyúmdang má hkâsu ga kê tô ri lhú gà le, "Haû jùn myhí eq

yhangzo yuqzo lé hkat htoq pyám aq; hkâsu mù gà le, haû jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chôm hkam yù râ a nghut."✧ gà ri.

<sup>31</sup> Haû mù luí, gumang wuí ê, nga-nhúng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

## 5

### *Hkrisduq Mâ É Luthkyô*

<sup>1</sup> Nga-nhúng luthkyô wó râ matú, Hkrisduq gi, nga-nhúng lé lhoq lhut kat bê nghut ri. Haû mù luí, haû má ru gîng nyi mù, yhumsing gùng lé jun é wòlai hkaû má hkâtaû bainaí nyi kó.

<sup>2</sup> Ngá dang lé matsîng yù keq! Ngò Poluq, nungmoq lé taí kyo kôlé, nungmoq ahpyo-kuq hpyit hkam yù kô é nghut jáng, Hkrisduq gi, nungmoq é matú hai akyú le bò kó râ a nghut.

<sup>3</sup> Hau htoq agó, ahpyo-kuq hpyit hkam yu é sù ó yuq lé nghut kôle, ahpyo-kuq hpyit é sù gi, jep é tarâ lhunglhang lé châng kut râ lhê nghú, ngò kyô kat lhê.

<sup>4</sup> Jep é tarâ châng shikut é đông mara hkyut san byí é hui naû bang, nungmoq gi, Hkrisduq eq gâng lhùm to bekô nghut luí, haû Garaí jeju mai le byit gyó byuq bekô nghut ri.

<sup>5</sup> Ngamoq kúm gi, myit myoqbyu tô é ðingmán hkyô lé, haû Woi-nyí é yanmai lumjîng myit eq gyai yhang láng nyi é bang nghut lhê.

<sup>6</sup> Hkâsu mù gà le, Hkrisduq Yesuq má gi, ahpyo-kuq hpyit é nghut nghut, ahpyo-kuq a hpyit é nghut nghut, hai akyú a bò nghut ri; chyitdap myit mai htoq lo é lumjîng myit za sheq, akyú bo lhê.

<sup>7</sup> Nungmoq gi, rago ðin wú bekô\* nghut é wá, haû tengmán hkyô lé a châng sháng gaq ga, nungmoq lé ó yuq eq hkûm zing pyám kô é lhú?

<sup>8</sup> Haû su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut.

‡ 4:24 Sinaq Bùm mâ é dangshikaq gi, jep é tarâ eq sêng é dangshikaq nghut lhê. ✧ 4:27 Esai 54:1 ✧ 4:30 Apùn 21:10 \* 5:7 Rago ðin wú bekô gà é gi, woi-nyí hkyô má kô myhang lai lò bê lé taí nau é nghut lhê. † 5:9 Shut é ðông mhoqshit é hkyô ratsuí gi, muk long gón lé mún eq wó lhoq ðaù é su, nungmoq banshoq lé wó lhoq nghoq yu pyám lhê.

<sup>9</sup> "Mún ratsuí zo gi, muk long gón lé wó lhoq daû lhê."† gâ é dang joq lhê.

<sup>10</sup> Nghut kôlhang, nungmoq gi, gotû hkyô đông a lhom yù kó râ nghut lhê nghû, Hkrisduq má hkyak ngò myit lum nyi lhê. Nungmoq lé lhoq byok byi é sù, ó yuq nghut kôle, yhumsing é mara eq rajung za dam byi é hui zo râ nghut lhê.

<sup>11</sup> Gumang wui ê, ahyo-kuq hpyit é hkyô lé, ngò rû hko nyi ashî nghut le gi, haî mù luî, zing-rî é lé ngò hui zô nyi râ lú? Haû su kut é nghut jáng, haû tapzîng eq séng luî, manghkáng joq râ a nghut lo.

<sup>12</sup> Nungmoq lé lhoq byok nyi é bang gi, hau htoq chyân luî, yhumsing gùng yhumsing banshoq hpyit pyám kó sháng gaq nghû, ngò wó myit ri.

<sup>13</sup> Gumang wui ê, nungmoq gi, luthkyô wó râ matú ji yù huî é bang nghut akô; nghut kôlhang, nungmoq é luthkyô ahkáng lé, yubak gungsho má hkácháng nhâng kó, chyitdap myit mai kúm gi, rayuq eq rayuq dojaú lhûm nyi keq.

<sup>14</sup> Hkâsu mù gâ le, "Náng gûng lé nàng chyitdap é su, náng é chyangnâm mâ é bang lé le chyitdap aq."\* gâ é hkunmó má za, jep é tarâ banshoq lo bo to bê nghut lhê.

<sup>15</sup> Nungmoq, rayuq eq rayuq ngat lhum myui lhûm nyi kô é nghut le gi, rayuq eq rayuq lhoq htên pyâm lhum kó râ nghut é lé, sidiq nyi keq.

### *Woi-nyí Êq Asak Dui Râ Hkyô*

<sup>16</sup> Nghut kôlhang, ngò taí kôlé, Woi-nyí shuî û é đông asak dui nyi keq; haû hkûn, nungmoq gi, yubak gungsho ô nau é hkyô cháng kó râ a nghut.

<sup>17</sup> Hkâsu mù gâ le, yubak gungsho ô nau hkyô gi, Woi-nyí eq shai lhûm nyi; Woi-nyí gi, yubak gungsho ô nau hkyô eq shai lhûm nyi, dut ri. Haû í lhum gi, gyè dut lhûm ri; haû mù, nungmoq gi, yhumsing ô nau é đông hkâkut kó.

<sup>18</sup> Nghut kôlhang, nungmoq lé Woi-nyí êq hkyô hî é nghut jáng, nungmoq gi, jep é tarâ ô má a nghut lo nghut ri.

<sup>19</sup> Yubak gungsho é muzó gi, de de yhang nghut lhê; haû pé gi, ashop é đông gungsho

\* 5:14 Nhong 19:18

zùm yap é hkyô, a sân-yúng é hkyô, shut é đông nyi zô lhûm nau é myit,

<sup>20</sup> hparà noq hkyô, myoqheq mù kut é hkyô, a jú é hkyô, byoq lhûm é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô,

<sup>21</sup> ningsû é hkyô, î shuq wut é hkyô, zo yê shuq yê mù achâq achyut kut é hkyô pé eq haû pé su kut é gotû hkyô pé nghut ri; haû su kut nyi yap é bang gi, Garai Gasâng mingdán é silí wunlí lé wó hkam yù râ a nghut nghû, ngò, hí hkûn nungmoq lé taí wú bê eq rajung za, ahkuí lé, nungmoq lé ngò sidiq byi nyi lhê.

<sup>22</sup> Nghut kôlhang, Woi-nyí é ashî gi, chyitdap hkyô, gabú hkyô, nguingón hkyô, myit hîng hkyô, nhik-u nû é hkyô, ge é hkyô, lhumzui hkyô,

<sup>23</sup> nûm é hkyô, yhumsing gùng lé wó hkyô é hkyô pé nghut ri. Haû hkyô pé lé hkûm zing pyám râ tarâ haî le a joq nghut ri.

<sup>24</sup> Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzîng má jén sat pyám bekô nghut ri.

<sup>25</sup> Nga-nhúng gi, Woi-nyí mai asak dui bê nghut mù, haû Woi-nyí htâng châng nyi sháng.

<sup>26</sup> Nga-nhúng gi, akôm gyáng dang taí luî, rayuq eq rayuq jeq ho lhûm é eq manon lhûm é bang, a dut nyi sháng gaq.

## 6

### *Lhunglhang Bang Lé, Ge É Hkyô Kut Byi Râ Hkyô*

<sup>1</sup> Gumang wui ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nûm é myit êq haû yuq lé lhoq pun lhoq kyîng yù keq. Nghut kôlhang, nàng gi, gunglaú é a hui sháng gaq, sidiq nyi aq.

<sup>2</sup> Rayuq eq rayuq é wòlai lé tê byi lhûm nyi keq; haû đông mai, nungmoq gi, Hkrisduq é tarâ lé wó lhoq dik kó râ nghut lhê.

<sup>3</sup> Rayuq yuq gi, yhumsing gùng haî le a nghut é wá, ahkyak su ngam é nghut jáng,

haú yuq gi, yhumsing gùng lé mhaú pyâm é sù nghut ri.

<sup>4</sup> Yuq hkanmó gi, yhumsing nyi yap é hkyô lé taú myit wú keq; haú hkún, yhumsing gùng lé góbang eq whuí nó a râ e za, yhumsing gùng má aróng wó yú râ nghut lhê.

<sup>5</sup> Hkâsu mù gâ le, yuq hkanmó gi, ó le ô wò lé wùn waq ra râ dut lhê.

<sup>6</sup> Haú mungdang lé mhoq yu é sù gi, mhoqshit byi sù lé, ge é zè banshoq gam byi sháng gaq.

<sup>7</sup> Garai Gasang lé gi, wó rhoi râ a nghut, yhumsing gùng yhumsing mhauzô é hkâhui nhâng kó; byù gi, hô kat é eq rajung za, shù yù râ nghut lhê.

<sup>8</sup> Haú yhumsing é yubak gungsho lé lhoq ngón râ matú hô kat é sù gi, myit haú mai htên byoq é hkyô lé myang hkam yù râ nghut lhê; haú Woi-nyí lé lhoq ngón râ matú hô kat é sù kúm gi, Woi-nyí haú mai ahtum abyuq é asak lé myang hkam yù râ nghut lhê.

<sup>9</sup> Nga-nhúng gi, ge é hkyô kut é má ngu byuq é bang a dut sháng gaq, hkâsu mù gâ le, haú lé nga-nhúng a tô pyâm é nghut jáng, ahkyíng yam-yoq jé é hkún, nga-nhúng gi, akyú myang hkam yù râ nghut lhê.

<sup>10</sup> Haú mù luí, nga-nhúng gi, kut râ ahkyíng wó tô é u lé, byù lhunglhâng bang lé ge é hkyô kut byi sháng, haú lumjín hkyô eq séng é ikun byu pé lé, je riyhang kut byi sháng.

*Ahpyo-kuq Hpyit É Hkyô A Nghut E Za,  
Byù Sik Hpân Huí É Hkyô*

<sup>11</sup> Ngò, nungmoq lé, ngá é loq èq hkâ-í kô é laiká cham kê kat byi é lé, wú wú keq!

<sup>12</sup> Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akô; yhangmoq haú su kut é hkyô gi, Hkrisduq é tapzing é yanmai zing-ri huí é hkyô lé, koi pyâm râ matú za nghut ri.

<sup>13</sup> Hkâsu mù gâ le, haú ahpyo-kuq hpyit é bang lháng jep é tarâ lé a cháng kó nghut ri; nghut kôlhâng, yhangmoq gi, nungmoq é gungsho eq séng luí wó gumrông kó sháng

gaq ga, nungmoq lé ahpyo-kuq hpyit nhâng nau akô nghut ri.

<sup>14</sup> Ngò kúm gi, nga-nhúng é Yhumsing Yesuq Hkrisduq é tapzing eq séng luí gumrông é mai lai luí, haí má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê.

<sup>15</sup> Ahpyo-kuq hpyit é hkyô nghut nghut, a hpyit é nghut nghut, hai akyú a bò; byù sik hpân huí é hkyô za sheq, ahkyak é nghut lhê.

<sup>16</sup> Tarâ haú lé châng é lhunglhâng bâng é ahtoq má le, haú Garai Gasang é Israelaq byu pé\* é ahtoq má le, nguínón hkyô eq shogyo nhikmyin hkyô gi, ru joq nyí sháng gaq ô.

<sup>17</sup> Ahkuí mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wùn lhê.

<sup>18</sup> Gumang wui ê, nga-nhúng é Yhumsing Yesuq Hkrisduq é jeju gi, nungmoq é woi-nyí eq ru joq nyí sháng gaq. Amen.

\* 6:16 Bun zo shí lhum mã é Israelaq byu pé gâ é gi, hpúng byù wui banshoq lé taí nau é nghut lhê.



## EHPESU Pê Chyáng Hun Kat é Laiká (Ephesians)

<sup>1</sup> Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haù sân-yúng bâng chyáng nguingón dang shit kyô kat lhê.

<sup>2</sup> Nga-nhùng é Îwa Garai Gasang eq Yhumsing Yesuq Hkrisduq chyáng mâ é, jeju eq nguingón hkyô gi, nungmoq chyáng ru joq nyi sháng gaq ô!

### *Hkrisduq Mâ É, Woi-nyí Hkyô Shimân Jeju Pé*

<sup>3</sup> Mauhkung htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhúng lé shimân byi sù, nga-nhùng é Yhumsing Yesuq Hkrisduq é Yhângwa, Garai Gasang gi, hkungsô wó nyi sháng gaq.

<sup>4</sup> Hkâsu mù gâ le, nga-nhúng gi, Garai Gasang é hí má, chyoiyúng é bang eq mara a bo é bang dut râ matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri.

<sup>5</sup> Hau htoq agó, Yhang, nga-nhúng lé chyitdap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu râ matú, hí mai nga-nhúng lé masat to bê nghut ri.

<sup>6</sup> Haù mù, Yhang chyitdap é Sù\* má, nga-nhúng lé láí láí byi bê nghut é, hpungwup shingkan bo é jeju chyunghuq lé, chôm hkya-on sháng.

<sup>7</sup> Garai Gasang é agùn agó é jeju yanmai, nga-nhúng mara hkyut byi é hui lui, Yhang Zô é sui đông mai, nga-nhúng gi, Yhang má hkyi yù hkyô wó yu é nghut lhê.

<sup>8</sup> Jeju haù lé gi, hpaqchyí byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê.

<sup>9</sup> Garai Gasang gi, Yhang myit ngui é eq rajung za, Hkrisduq đông mai kut râ matú

hen to bê nghut é, Yhâng é zaú tô é hkyô lé, nga-nhúng lé shit bê nghut ri.

<sup>10</sup> Sê gyo wui é hkyô haù gi, lhoq dik râ ahkying jé jáng, mauhkung htoq eq myigùng htoq mâ é lunglhang lé, Hkrisduq má rading ralthum za kut râ nghut é hkyô nghut lhê.

<sup>11</sup> Hkrisduq má sâng-hi myit myoqbyù bang nghut é nga-nhúng gi, Yhâng é hpungwup shingkan lé hkya-on kungtôn sháng gaq ga,

<sup>12</sup> Garai Gasang gi, Yhang myit sôn tô é lunglhang lé ban kut mù, Yhâng ô nau é đông, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri.

<sup>13</sup> Hau htoq agó, nungmoq le, nungmoq é hkyi yù hkyô é gabú danglù gâ é tengmán mungdang lé wó gyo kô é hkun, Hkrisduq eq sêng é bang dut bekô nghut ri. Nungmoq gi, Hkrisduq lé lumjing bekô nghut é yanmai, haù gidig byi tô é Chyoiyúng Woi-nyí dizik htung tap byi é hui bekô nghut ri.

<sup>14</sup> Garai Gasang é hpungwup shingkan lé hkya-on râ matú, Yhang eq sêng é byu pé hkyi xe yù hui é hkying jé shoq, Chyoiyúng Woi-nyí haù gi, nga-nhùng é muizè lé hkyak wó yu râ ngu é masat nghut ri.

### *Poluq Kyûdung Byi É Hkyô*

<sup>15</sup> Haù mù lui, Yhumsing Yesuq lé nungmoq lumjing é hkyô eq sân-yúng bang lunglhang lé nungmoq chyitdap é hkyô lé, ngò wó gyô é yanmai,

<sup>16</sup> ngò gi, ngá é kyûdung dang má nungmoq lé myit bun uchyang, anum yhang, nungmoq é matú jeju hkya-on nyi lhê.

<sup>17</sup> Nga-nhùng é Yhumsing Yesuq Hkrisduq é Garai Gasang nghut é, hpungwup shingkan bò sù haù Îwa gi, Yhang lé nungmoq je sé râ matú, hpaqchyí byéng-yá wó byi é eq san za wó sé nhang é Woi-nyí, nungmoq lé byi sháng gaq ngu, ngò, Yhâng chyáng dúng nyi lhê.

<sup>18</sup> Hau htoq agó, Yhang, nungmoq lé ji yu é myit myoqbyù hkyô, hkasú é nghut é lé le, Yhâng é hpungwup shingkan bo é muizè gi, sân-yúng bâng chyáng agùn agó joq nyi é hkyô lé le, Yhâng é kô dik é a-tsam mó gi,

\* 1:6 Yhang chyitdap é Sù gâ é gi, Yesuq lé tái nau é nghut lhê.

lumjǐng bang nga-nhúng é matú nghut é lé le,

<sup>19</sup> nungmoq wó sé rā matú, nungmoq é myit myoqjí lhoq gyeng byí é hui sháng gaq nghû, ngò kyûdung byí nyi lhê. A-tsam mó haû gi, Garai Gasang, Hkrisduq lé shi é mai lhoq dui toq yû mù,

<sup>20</sup> mauhkûng htoq tsáng myhâng má, Yhâng é loqyò hkyam shut zùng nhang é hkûn, chung é wum-o a-tsam mó eq rajung za nghut ri.

<sup>21</sup> Hkrisduq gi, uphkang é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhîng é mying lhunglhâng é htoq má le, je gyaú é sù nghut lhê.

<sup>22</sup> Hau htoq agó, Garai Gasang gi, lhunglháng lé Yhâng é hkyiwa ô má tô to luí, haû noqkuq hpúng é matú, Yhang lé, jung hkanmó é ushuq dut rā đông masat to bê nghut ri.

<sup>23</sup> Noqkuq hpúng haû gi, Hkrisduq é gungdu nghut luí, hkyô hkanmó má jung hkanmó lhoq byíng Jup é Hkrisduq byíng nyi é nghut ri.

## 2

### *Hkrisduq Má Asak Dui É Hkyô*

<sup>1</sup> Láí ló bê hkûn, nungmoq gi, tarâ lu láí é eq mara kut shut é hkyô pê é yanmai, shi tô é bang dut kô é nghut lhê.

<sup>2</sup> Haú hkûn, nungmoq gi, mingkan ngón hkyô pé má lhaq châng nyi kô é htoq agó, haú tarâ a cháng bâng é myit má ahkuí mú zuí nyi é sobyô nghut é, maulat lé up sù htâng châng nyi kô é bang nghut lhê.

<sup>3</sup> Nga-nhúng banshoq bang le, yhangmoq su kut nyi láí lo é bang chyat nghut mù, yubak mara byíng é suisho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé đông za châng wú é bang nghut lhê. Haû mù, góbang eq rajung za, nga-nhúng gi, Garai Gasang é nhikmo-yo hkyô eq gingdán wú é bang chyat nghut lhê.

<sup>4</sup> Nghut kôlhâng, shogyo nhikmyin myit gyaí bo é Garai Gasang gi, nga-nhúng, tarâ lu lai luí shi byuq bê bang dut kôlhâng,

Yhâng é chyitdap myit mó èq, nga-nhúng lé chyitdap luí, Hkrisduq eq rahá asak dui nhâng bê nghut ri.

<sup>5</sup> Haû mù, nungmoq gi, Garaí jejú èq za hkyi yu é hui bekô nghut ri.

<sup>6</sup> Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a ung taí é Yhâng é jeju lé, htang pyat má wó shit sháng gaq ga,

<sup>7</sup> nga-nhúng lé, Hkrisduq eq rahá lhoq dui toq yû mù, mauhkûng htoq tsáng myhâng má, Yhang eq rahá zùng nhang to bê nghut ri.

<sup>8</sup> Hkâsu mù gâ le, nungmoq gi, lumjǐng é đông mai Garaí jejú èq za hkyi yu é hui bekô nghut ri. Haû gi, nungmoq chyáng mâ é a nghut, Garai Gasang jeju chyunghuq za ru nghut lhê.

<sup>9</sup> Haû gi, yhumsing é muzó mai wó é a nghut é yanmai, ó yuq le nghutbun rā hkyô a joq.

<sup>10</sup> Hkâsu mù gâ le, nga-nhúng gi, Garaí Gasang é loqmú pé nghut mù, nga-nhúng zui saí rā matú, hí hí mai, Garaí Gasang hen lajâng tô é ge é muzó pé lé zui saí rā matú, Hkrisduq Yesuq má hpan to hui bê bang nghut lhê.

### *Hkrisduq Má Rading Ralhum*

<sup>11</sup> Haû mù luí, nungmoq gi, hí hkûn, hku lé lo é mai yhang tûngbaù pé nghut é hkyô lé le, byu loq èq za gungsho má kut é, "ahpyo-kuq hpyit hkâm bang" gâ é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq.

<sup>12</sup> Haú u lé, nungmoq gi, Hkrisduq eq gâng lhûm tô é bang; Israelaq mingbyû a nghut é bang; danggidiq eq sêng é dangshikaq pé má gó ming byù nghut é bang; mingkan htoq má, myoqbyù jowò a joq é eq Garaí a wó é bang nghut é lé, myitbun keq.

<sup>13</sup> Nungmoq gi, hí hkûn wê gâng nyi é bang nghut kôlhâng, ahkuí kúm, Hkrisduq é sui đông mai Hkrisduq Yesuq má shuí chyâng htep é hui bekô nghut ri.

<sup>14</sup> Hkâsu mù gâ le, Yhânggùng yhang gi, nga-nhúng é nuingón hkyô nghut ri. Yhang gi, gyoro má kyo tô é madin nghut

\* 2:14 I myú gâ é gi, Israelaq byu pé eq tûngbaù pé lé gâ lhê.

é a naù a wom hkyô lé hpyoq hpyi pyám byi luí, haù í myû\* dut nyi é lé, rahú za dut nhâng bê nghut ri.

<sup>15</sup> Haù hkunmó pé eq hkanq tô é tarâ pé bo é jep é tarâ lé, Yhâng é gungsho má lhoq htúm pyám bê nghut ri. Haù mù, Yhang ô nau é hkyô gi, haù í myû dut tô é lé, Yhânggùng má yhang, byù sik ra-myû za hpan to rá matú nghut ri; haù dông, simsaq hkyô kut byi bê nghut ri.

<sup>16</sup> Yhang gi, a naù a wôm lhúm é hkyô lé, haù tapzîng má lhoq htúm pyám byi mù, haù tapzîng dông mai, byù myu í myu é lé ragùng za kut luí, Garai Gasang eq xoq byi bê nghut ri.

<sup>17</sup> Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri.

<sup>18</sup> Hkâsu mù gâ le, nga-nhúng í myû gi, Yhang dông mai, Woi-nyí ralhum zâ èq, haù Íwâ chyáng wàng rá hkyô dong bê nghut ri.

<sup>19</sup> Hau é yanmai, nungmoq gi, tûngbaù pé eq byù bíng pé a nghut lô é za, Garaí é byu pé eq rahá, mingbyû wui eq yhumbyû wui chyat nghut bekô nghut luí,

<sup>20</sup> haù lagyô pé eq myiqhtoí pé, hi tô é apûn awang htoq má xuq tô é bang chyat nghut akô; Hkrisduq Yesuq yhang, haù má é ahkyak é htungchyûn luqgok dut bê nghut ri.

<sup>21</sup> Yhang má, wahpang lhum gón xoq lhúm bùm é nghut mù, haù Yhumsîng má chyoiyúng noqkuq yhúm ralhum dut lò bê nghut ri.

<sup>22</sup> Woi-nyí dông mai, Garai Gasang nyi rá jang dut rá matú, nungmoq le, Yhang má, wahpang su tsuq é chôm huí nyi bùm bekô nghut ri.

### 3

#### *Poluq, Tûngbaù Pé É Tarâ Hkô Sará*

<sup>1</sup> Haù su nghut mù, Hkrisduq Yesuq é hkyô lé, nungmoq tûngbaù pé chyáng hko kyô é yanmai, htongbyû dut sù, ngò Poluq gi, nungmoq é matú kyûdung byí lhê.

<sup>2</sup> Nungmoq lé dojaù rá é matú, ngo lé byí tô é Garaí Gasâng jeju ayá shí lé, nungmoq gè gè wó gyô wú bekô rá nghut lhê.

<sup>3</sup> Haù gi, hí hkûn, ngò, tot é dông kê tô wú bê eq rajung za, haù zaù tô é hkyô lé, shing-rán dông ngo lé sé nhang é nghut ri.

<sup>4</sup> Haù hkyô lé, nungmoq nghap wú é hkûn, Hkrisduq eq sêng é zaù tô é hkyô, ngò rago sê é lé, nungmoq wó sé kó rá nghut lhê.

<sup>5</sup> Haù lé, laí lò bê ipyat pé mâ é byu pé lé a sé nhang é nghut kôlháng, ahkuí gi, Garaí Gasâng é chyoiyúng é, lagyô pé eq myiqhtoí pé lé, haù Woi-nyí eq hpông shit bê nghut ri.

<sup>6</sup> Zaù tô é hkyô haù gi, gabú danglù dông mai, Hkrisduq Yesuq má, Israelaq byu pé eq rahá, tûngbaù pé le, hkûng xoq bang wó dut luí, gungdu ralhum é gungsho showui showang pé chyat dut é eq, danggidiq byi tô é lé wó chôm hkam yu é bang dut é hkyô nghut ri.

<sup>7</sup> Yhâng é hpungwup a-tsam mai, ngo lé byí tô é Garaí Gasâng jeju chyunghuq é yanmai, ngò gi, gabú danglù shí taí rá dui-nhâng zoshâng dut é nghut lhê.

<sup>8</sup> Ngò gi, haù Garaí Gasâng é byu pé mâ é tiq dik sù htoq má lháng je tiq sù nghut kôlháng, haù Hkrisduq é a ung htoq taí é wó sùt hkyô lé, tûngbaù pé chyáng hko kyo rá matú le,

<sup>9</sup> haù lhunglháng lé hpan é Garaí Gasang má, laí lò bê ipyat pé má zaù tô é, zaù tô é hkyô haù lé hkâsu kut tô é lé, yuq hkanq mó lé taí sân kyo rá matú le, jeju shí, ngo lé byi bê nghut ri.

<sup>10</sup> Haù gi, nga-nhúng é Yhumsîng Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za,

<sup>11</sup> haù Garaí Gasâng é hpaqchyí mó góng lé, noqkuq hpúng dông mauhkûng htoq tsáng myhâng mâ é uphkâng bang eq ahkáng ayá wó bang lé, ahkuí sé nhang rá matú nghut lhê.

<sup>12</sup> Nga-nhúng gi, nga-nhúng é Yhumsîng Hkrisduq Yesuq eq rading ralhum za nghut é yanmai le, Yhang lé lumjîng é yanmai le, Garaí Gasang chyáng, wám é myit eq a gyuq a wám é myit èq wó htep é é nghut lhê.

† 2:17 Wê gâng nyi é bang gâ é gi, tûngbaù pé lé gâ lhê. ‡ 2:17 Chyâng htep nyi é bang gâ é gi, Israelaq byu pé lé gâ lhê.

13 Haû mù luí, ngò, nungmoq lé dúng tôngbán nau é gi, nungmoq é matú, ngò wuîhke jamjau hui zô é yanmai, nungmoq i-myt hkâgyui kó; haû gi, nungmoq é matú akyû bò râ hkyô nghut lhê.

### *Ehpesu Myuq Byu Pé Lé Kyûdung Byí É Hkyô*

14 Haú pê é yanmai, ngò gi, haû Íwâ é hí má hkyihput htuq luí kyûdung é nghut lhê.

15 Mauhkûng eq myigùng htoq mâ é Yhâng é ikun byù lhunglhang gi, Yhâng chyáng mai myìng wó yu é chyat nghut lhê.

16 Nungmoq é lumjìng myit mai, nungmoq é i-myt unghkaú má Hkrisduq wó nyi nyi sháng gaq nghû,

17 Yhang é hpungwup shingkang bo é agùn agó wó sùt é mai, nungmoq é i-myt unghkaú mâ é sù lé, Yhâng é Woi-nyí dông, hpungwup a-tsâm eq wum-o lhoq kìng byi râ matú, ngò kyûdung byi lhê. Hau htoq agó, nungmoq gi, chyitdap myit má amyit chìn to luí, awang hi to mù,

18 sân-yúng bang eq rahá, hau é apyí, a-tsûng, myhâng, nik, hkâ-í nghut é lé, rago wó sé kôluí,

19 Garai Gasâng é gumjup é hkyô lhunglhang eq wó lhoq gumjup yù kó sháng gaq nghû, sê é nyan htoq má gyaú é Hkrisduq é chyitdap hkyô lé, nungmoq wó sé râ matú, ngò kyûdung byi lhê.

20 Ahkuí, nga-nhúng é hkaú má mù zúi nyi é, Yhâng é wum-o a-tsâm é yanmai, nga-nhúng dúng é banshoq eq myit é hkyô lhunglhang htoq je wó kut byí é Su chyáng,

21 haû noqkuq hpûng é yanmai le, Hkrisduq Yesuq é yanmai le, pyat pyat zai zai, ahtum abyuq, hpungwup shingkang rû bo nyi sháng gaq ô! Amen.

## 4

### *Hkrisduq É Gungdu Má Rading Ralhum Za*

1 Haû mù luí, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghû, haû Yhumsing é yanmai, htóng lúng sù ngò Poluq gi, nungmoq lé lhoq pun lhoq kyíng kat lhê.

2 Hkyô hkat hkangmó má i-myt lhoq nyhum é eq i-myt nú-nhâm nyi keq; myit hing é eq chyitdap myit mai rayuq eq rayuq hkam jân lhúm nyi keq.

3 Haû Woi-nyí eq byí é myit hui hkyô lé, nguìngón hkyô dông mai châng nyi râ matú, wó dut é í shikut nyi keq.

4 Nungmoq gi, wut yù hui kô é hkûn, myit myoqbyù hkyô rashut za wut yù hui bekô nghut é eq rajung za, gungdu ralhum eq Woi-nyí ralhum za nghut nyi ri.

5 Yhumsing rayuq za, lumjìng hkyô rahkat za, baptisma ralhum za nghut nyi ri.

6 Banshoq bâng é Íwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut luí, lhunglhang dông mai mù kut é eq lhunglhang é ahkaú má lúng nyi sù nghut ri.

7 Nghut kôlhang, nga-nhúng yuq hkangmó gi, jeju chyunghuq lé, Hkrisduq mai ké byí é dông wó yu é nghut lhê.

8 Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuí chùng mù, byu pé lé gi, chyunghuq tsing gâm byí ri."\*

ga, Chyúmdang má tai tô é nghut lhê.

9 Haû "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá naû é a nghut lhi?

10 Haû gyó lé é Sù gi, junghkang jungmó lé lhoq byíng jup râ matú, mauhkûng banshoq é ahtoq má doq ló é Sù yhang nghut lhê.

11 Yhang gi, ra-am lé, lagyô pé, ra-am lé, myiqhtoí pé, ra-am lé, gabú danglù hko kyo râ bang, ra-am lé, hpúng-up pé eq sará pé kut tsing byí to bê nghut ri.

12 Haú bang gi, Garai Gasâng é byu pé lé wùn waq âng é muzó pê é matú, hen lajâng é bang nghut ri. Haú hkûn sheq, Hkrisduq é gungdu gi,

13 haû lumjìng hkyô eq Garai Gasâng é Yhangzo lé sê é hkyô má, nga-nhúng banshoq bang rading ralhum za wó dut mù, kô òng bang dut luí, Hkrisduq é gumjup é

\* 4:8 Hkya-on 68:18

isâm banshoq lé wó yu é hkûn jé shoq, wó kô jat nyi râ nghut lhê.

14 Haû mù, nga-nhúng gi, wuibaù pé èq hí shut htâng shut bat myhû é su dut é eq, byu pé é agè ashop é eq haq dâ é mhoq hpyoq hpaqchyí pé eq mhoqshit hkyô laidun hkangmó èq, shí shut hé shut mut tâng é su dut é lé hui zô é zoshâng wui su a nghut lô é za,

15 chyitdap myit mai tengmán é dang lé taí nyi jáng, Hkrisduq nghu é ulhum má hkyô hkangmó kô myhang lò râ nghut lhê.

16 Yhang dông mai, gungdu gón gi, ralhum eq ralhum htuqbâng é gungsho showui showang pé lé xoq byí to bê nghut mù, gungsho showui showang haú pé gi, yhumsing é muzó lé zui saí nyi é nghut jáng, gungdu haú gi, chyitdap myit má, yhanggùng yhang kô lò myhang lò râ nghut lhê.

#### *Byù Sik Dông Asak Dui Râ Hkyô*

17 Haû mù luí, haû Yhumsing é ahko ahkáng mai ngò nungmoq lé taí nau é hkyô gi, haú tûngbaù pé gi, akyû a bo é lé myit mù, asak dui kô é su, nungmoq gi, hkâkut kó.

18 Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, haí le a sé kô é yanmai, Garai Gasang byí é asak eq wê gâng byuq bekô nghut ri.

19 Yhangmoq gi, gyuq hoq hkyô a bo byuq lo kô é yanmai, myoqnoq myit dông a sansêng é hkyô jung hkangmó lé je wó kut xoq nyi shoq ga, yhumsing gùng lé, gungsho ô nau gadaú é hkyô má ap pyám bekô nghut ri.

20 Nungmoq kúm gi, Hkrisduq é hkyô lé haú dông mhoq yû kô é a nghut.

21 Nungmoq gi, Yesuq chyáng má é tengmán hkyô dông, Yhâng é hkyô lé wó gyô wú é eq mhoq yu wú bekô nghut lhê.

22 Haû mù, nungmoq gi, hí hpyang lhê é nungmoq é nyi yap sâmlai nghut é, ô nau gadaú luí, yhumsing gùng yhumsing mhaú pyám é dông htên byoq ló nyi é nungmoq é byù xau lé tô pyám râ matú mhoq yû bê eq rajung za,

23 nungmoq é i-myt lé asik htaí pyám nhâng keq;

24 hau htoq agó, nungmoq gi, tengmán é eq sêng é dingmán hkyô eq chyoiyúng hkyô má, Garai Gasang eq dù shoq hpan to hui bê nghut é byù sik lé, yu wut to keq.

25 Haû mù, nga-nhúng banshoq bang gi, gungdu ralhum é gungsho showui showang pé chyat nghut é yanmai, nungmoq yuq hkangmó gi, mhaú é hkyô lé tô pyám luí, yhumsing é chyangnâm mâ é sù lé, tengmán é dang taí ra râ nghut lhê.

26 "Nungmoq nhikjum yô é hkûn, mara hkâkut kó."\* nungmoq gi, bui wàng shoq nhikjum hkâyô nyi kó.

27 Nat Tsadán lé le, jowò hkâbyi kó.

28 Hkau sù gi, a dum hkau lo sháng gaq; râ nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyi luí, muzó zuí shikut ra râ nghut lhê.

29 Nungmoq é nhut mai agè agaú é dang haí le hkâhtoq nhâng kó; wó gyô é bang akyû bò shoq, yhangmoq râ tô é má cháng luí, haú bang kô lam lò râ dang za taí keq.

30 Haû hkyi yù râ buinyi é matú, dizik dông nungmoq lé tap to byí é Garai Gasang é Chyoiyúng Woi-nyí lé hkâlhoq yón kó.

31 Haû myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaú é hkyô pé banshoq lé, nungmoq tô pyám keq.

32 Nungmoq gi, rayuq eq rayuq, ge é hkyô eq shogyo nhikmyin é hkyô tûn shit lhum luí, Garai Gasang gi, Hkrisduq má, nungmoq lé mara hkyut byí é su, nungmoq yhangchang le mara hkyut byí lhûm nyi keq.

## 5

1 Haû mù, nungmoq gi, chyitdap dik é zoshâng wui nghut é yanmai, Garai Gasang lé alik yu é bang kut keq.

2 Hkrisduq gi, Yhanggùng lé namngón jung hkungga eq shigu hkungga dông, nga-nhúng é matú Garai Gasang chyáng Yhanggùng yhang ap byí pyám shoq, nga-nhúng lé chyitdap é su, nungmoq le chyitdap myit èq asak dui nyi keq.

\* 4:26 Hkya-on 4:4

<sup>3</sup> Hau htoq agó, ashop é dōng gungsho zùm yap é hkyô, a sansêng é hkyô hkanmó eq myoqnoq é hkyô pé lé, nungmoq táí lhang hkátáí kó; hkâsu mù gâ le, nungmoq gi, Garai Gasâng é chyoiyúng byu pé nghut lhê.

<sup>4</sup> Haû eq rajung za, a táí gíng é, ahoq ahî dang, dangsôm eq hkunchōq dōng gyâ é dang pé lé a táí é za, jeju hkyā-on dang za táí nyî keq.

<sup>5</sup> Hkâsu mù gâ le, ashop é dōng gungsho zùm yap é hkyô kut shut sū, a sansêng é sū eq hparà noq é sū nghut é myoqnoq sū ó yuq nghut kōlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyî keq.

<sup>6</sup> Ó yuq nghut kōle, dangsôm\* dōng mai nungmoq lé a wó mhaú kó sháng gaq; hkâsu mù gâ le, haú hkyô pé é yanmai, Garai Gasâng é nhikmo-yo hkyô gi, haú jìno a gyo bāng é ahtoq má jé rā nghut lhê.

<sup>7</sup> Haû mù luí, haú bāng chyáng hkābo wang lóm kó.

<sup>8</sup> Hkâsu mù gâ le, nungmoq gi, hí hpyang mauchut tuq dut é bang nghut lhê; nghut kōlhang, ahkuí gi, haû Yhumsíng má maubó pé nghut bekō nghut ri.

<sup>9</sup> Haû Yhumsíng ô nau é hkyô haî nghut é lé ho htoq yû mù, maubó é yhangzô pé dōng asak dui keq.

<sup>10</sup> Hkâsu mù gâ le, haû maubó é ashi gi, ge é hkyô banshoq, dingmán é hkyô eq tengmán hkyô chyat nghut ri.

<sup>11</sup> Haû ashi a zuí é mauchut tuq muzó má a bo wang lom é za, yhangmoq é mara lé tūn shit keq.

<sup>12</sup> Hkâsu mù gâ le, haû jìno a gyo bang haq zaú kut é hkyô lé gi, táí htoq le lhang hoq hpo nghut ri.

<sup>13</sup> Nghut kōlhang, junghkang jungmó lé, haû maubó èq tūn shit jáng gi, wó byu-myang é chyat dut rā nghut lhê.

<sup>14</sup> Hkâsu mù gâ le, junghkang jungmó lé byu-myàng nhang é gi, maubó nghut ri. Hau é yanmai,

"Yhup ngón nyî sū ê, toq aq, haû shi é mai dui toq aq hkoi; haû jáng, Hkrisduq gi, nang lé duqbó byi rā nghut lhê."†

ga luí taí tô é nghut lhê.

<sup>15</sup> Haû mù luí, nungmoq hkâsu kut asak dui é hkyô má gyai sidiq nyî keq; hpaqchyí a bò bang su a nghut é za, hpaqchyí bò bang su kut nyî keq.

<sup>16</sup> Buinyî ahkyíng shí pé gi, agè ashop é yanmai, wó é ahko ahkáng banshoq lé ge dik é dōng chung jaî keq.

<sup>17</sup> Hau é yanmai, byù ngok pé a dut é za, haû Yhumsíng ô nau é hkyô gi, haî nghut é lé, sê gyô yu nyî keq.

<sup>18</sup> Haû achaq achyut é yubak hkyô lhoq htoq é í lé hkâshuq wut kó; Woi-nyí lé kúm byíng nhang nyî keq.

<sup>19</sup> Nungmoq gi, hkyā-on kungtōn dang dōng le, hkyā-on mahkōn dang dōng le, woi-nyí eq sêng é mahkōn dōng le, rayuq eq rayuq dāng nyo lhum luí, nungmoq é i-myit unghkaú mai, haû Yhumsíng lé mahkōn hkōn mù, lhoq ngón nyî keq.

<sup>20</sup> Nga-nhūng é Yhumsíng Yesuq Hkrisduq é myíng lé lang luí, jung hkanmó é matú, haû Íwa Garai Gasang lé, hkā-nhám le jeju hkyā-on nyî keq.

<sup>21</sup> Hkrisduq lé hkungga hpautap é myit èq, rayuq eq rayuq hpautap lhūm nyî keq.

### *Myi Eq Làng*

<sup>22</sup> Ikun myhî pé ê, haû Yhumsíng uphkan é dōng chāng é su, nungmoq é ikun hpô pé uphkan é dōng chāng nyî keq.

<sup>23</sup> Hkâsu mù gâ le, Hkrisduq gi, haû noqkuq hpūng é ulhum nghut é su, haû ikun hpó gi, ikun myhî é ulhum nghut nyi ri; Hkrisduq gi, haû Yhāng gungdu nghut é noqkuq hpúng lé hkyi yû Sū nghut ri.

<sup>24</sup> Haû noqkuq hpúng gi, Hkrisduq uphkan é dōng chāng é su, ikun myhî pé le, hkyô hkat hkanmó má, yhangmoq é ikun hpô pé uphkan é dōng chāng nyî rā lhê.

<sup>25</sup> Ikun hpô pé ê, Hkrisduq gi, haû noqkuq hpúng lé chytidap luí, hau é matú Yhānggūng lé Yhang ap pyām é su, nungmoq é ikun myhî pé lé chytidap nyî keq.

<sup>26</sup> Yhang haû su kut é gi, haû noqkuq hpúng lé, mungdang dōng wuì má chî pyām luí, lhoq sân-yúng yû rā eq,

\* **5:6** Dangsôm gâ é gi, Garai Gasâng é nhikmo-yo hkyô a jé rā ga taí é dang nghut lhê. † **5:14** Dang ngho shí gi, hí lhê é noqkuq hpúng pé taí gyó lo é dang nghut lhê.

27 haù noqkuq hpúng gi, agè agaú é eq a-ká akông é hkyô haì le a bo é za, mara hùn râ hkyô a bo é eq chyoiyúng é, hpungwup shingkang bo é noqkuq hpúng dông, Yhânggùng lé wó ap byi râ matú nghut lhê.

28 Haù eq rajung za, ikun hpô pé gi, yhangmoq é ikun myhî pé lé, yhumsing gungdu lé su chytidap râ dut lhê. Yhumsing é ikun myhí lé chytidap é sù gi, yhumsing gùng lé le, chytidap é sù nghut bê.

29 Ó yuq le, yhumsing gùng lé a chytidap a kut é za, Hkrisduq gi, haù noqkuq hpúng lé kut byi nyi é su, yhumsing gùng lé byi tso byi huq luí, rago wú zúng nyi é nghut lhê.

30 Hkâsu mù gà le, nga-nhúng gi, Yhâng é gungdû é gungsho showui showang pé chyat nghut lhê.

31 Haù mù, "Hau é yanmai, yuqgè gi, înu îwa eq gang luí, yhangmyi eq zùm-yap mù, yhangnhik í yuq gi, gungsho ralhum za dut kó râ nghut lhê."\* gà tô ri.

32 Haù hkyô gi, gyai yhang zaú tô é hkyô nghut ri. Nghut kôhang, ngò gi, haù Hkrisduq é hkyô eq noqkuq hpúng é hkyô lé taí nyi é nghut lhê.

33 Haù mù, nungmoq yuq hkangmó gi, yhumsing gùng lé chytidap é su, yhumsing é ikun myhí le le chytidap râ dut lhê; haù ikun myhí le, yhâng é ikun hpó lé hkungga râ dut lhê.

## 6

### *Zo Wuí Eq Mó Wui É Hkyô*

1 Zoshâng wui ê, haù Yhumsing má, nungmoq é mó wui é jìno gyo keq; hkâsu mù gà le, haù gi, kut gíng é hkyô nghut ri.

2 "Náng é înu îwa lé hkungga aq.

3 Haù jáng, nàng, nyi ngón yuqyò mù, myidàm htoq má náng é asak chyungxe hing nyi râ nghut lhê."\* gà é dang gi, dang-gidiq lom é sâng-hí lhum hkunmó nghut ri.

4 Îwa pé ê, nungmoq é zo wui lé nhikjum a lhoq yô é za, haù Yhumsing é mhoq kyo hkyô eq mhoqshit lhoq pun hkyô dông yhangmoq lé baú kô nyi keq.

### *Jùn Pé Eq Junsing Pé É Hkyô*

5 Jùn pé ê, nungmoq gi, Hkrisduq é jìno gyô é su, gyuq hkunggá é eq lhumzuí é myit

mai, nungmoq é myidàm htoq mâ é junsing pé é jìno gyo keq.

6 Nungmoq gi, yhangmoq é hí má za, myoqdong ho é dông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myit unghkaù mai châng kut nyi keq.

7 Byù lé za dojaú é dông a nghut é za, haù Yhumsing lé dojaú nyi é dông le, shirông myit èq dojaú nyi keq.

8 Hkâsu mù gà le, jùn nghut nghut, luthkyô wó sù nghut nghut, ge é hkyô kut nyi é nghut jáng, haù Yhumsing gi, yuq hkangmó lé shigyaú râ nghut é lé, nungmoq sê nyi lhê.

9 Junsing pé ê, nungmoq le, nungmoq é jùn pé lé haù eq rajung za kut byi nyi keq. Yhangmoq lé hkâkyuq zo kó; nungmoq sê é eq rajung za, yhangmoq eq nungmoq é Yhumsing hpó gi, mauhkúng htoq má nyi é nghut luí, Yhang gi, myoqdong hkyin é hkyô a bo é sù nghut lhê.

### *Garai Gasâng É Gyè Hking*

10 Ló htâng má, taí nau é hkyô gi, haù Yhumsing eq Yhâng é hpungwup a-tsam mó má wum-o bo nyi keq.

11 Haù nat Tsadán wá dâ é hpaqchyí pé lé, nungmoq wó he-ngik pyám kó sháng gaq, haù Garai Gasâng é gyè hking banshoq lé wut to keq.

12 Hkâsu mù gà le, nga-nhúng gi, gungsho eq sui lé htuq htíng é bang a nghut é za, haù uphâng bang, ahkáng ayá wó bang, mauchut tuq dut é mingkan shi é a-tsam pé eq mauhkúng htoq tsáng myhâng mâ é agè ashop é byò eq sêng é wum-o pé lé, htuq htíng é bang ru nghut lhê.

13 Haù mù luí, Garai Gasâng é gyè hking banshoq lé wut to keq; haù hkùn sheq, nungmoq gi, agè ashop hkyô jé é buinyi má, yhumsing jowò má wó yap gíng to mù, hkyô hkat hkangmó lé ban kut jáng, wó yap gíng tít nyi kó râ nghut lhê.

14 Haù mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luí,

<sup>15</sup> nungmoq é hkyî má gi, haû simsaq hkyô byî é gabú danglù hkô râ rì rì kut to mù, ging ging yap nyi keq.

<sup>16</sup> Hau htoq agó, haû agè ashop su é myiduq é myoshi lhunglháng lé wó sat ung pyám râ matú, lumjínq hkyô nghu é golong lé chung to keq.

<sup>17</sup> Hkyi yù hkyô shamtoq muq lé tsûng to luî, Garai Gasâng é mungdang nghut é, haû Woi-nyî é shâm lé wun chûng keq.

<sup>18</sup> Ahkyíng hkangmó má, kyûdung dang eq dúng tôngbán é dang ajung jûng èq, haû Woi-nyî má kyûdung nyi luî, machya nyi uchyang, sân-yúng bang banshoq é matú, hkâ-nhâm le, xoq xoq kyûdung byî nyi keq.

<sup>19</sup> Haû gabú danglu é yanmai, shamtoq-tui hut huî é lagyo rayuq ngò nghut nyi kôlhang, haû gabú danglù nghut é zaú tô é hkyô lé, a gyuq a wàm wó taî kyo luî,

<sup>20</sup> ngò taî râ dut é lé, a gyuq a wàm wó taî sân kyo shoq, ngá nhut hpóng hkangmó, ngò taî râ mungdang pé lé byi sháng gaq, ngá é matú le, kyû bo dung byî nyi keq.

### *Shi-kyám Dang*

<sup>21</sup> Haû Yhumsíng má, chyitdap é gumang eq lhumzuî é dui-nhâng zoshâng nghut sù, Tuhkiku gi, nungmoq lé jung hkangmó taî kyo râ nghut luî, ngò hkâsu nghut nyi é hkyô eq haî kut nyi é hkyô lé, nungmoq wó sé kó râ nghut lhê.

<sup>22</sup> Ngamoq hkâsu nghut nyi é hkyô lé, nungmoq wó sé râ eq, yhang, nungmoq lé myit wum wó byi râ matú za myit myoqbyù luî, yhang lé, ngò, nungmoq chyáng nhang kat é nghut lhê.

<sup>23</sup> Íwa Garai Gasang eq Yhumsíng Yesuq Hkrisduq chyáng mâ é lumjínq hkyô má bo é chyitdap myit eq nguínqón hkyô gi, haû gumang wui chyáng ru joq nyî sháng gaq ô!

<sup>24</sup> A dat htûm é chyitdap myit mai, nganhûng é Yhumsíng Yesuq Hkrisduq lé chyitdap é lhunglhâng bang chyáng, Garaî jeju gi, ru joq nyî sháng gaq ô!



## HPILIPÍ Pê Chyáng Hun Kat é Laiká (Philippians)

<sup>1</sup> Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglhang eq, hpúng-up, hpungte pé lé, dang kyô kat lhê.

<sup>2</sup> Nga-nhùng é Íwa Garai Gasang eq Yhumsing Yesuq Hkrisduq chyáng mâ é jeju eq nuingón hkyô gi, nungmoq chyáng ru joq nyi sháng gaq ô.

### *Jeju Hkya-ôn É Hkyô*

<sup>3</sup> Ngò gi, nungmoq lé myit bûn kat hkangmó, ngá é Garai Gasang lé jeju hkya-ôn nyi lhê.

<sup>4</sup> Ngò gi, kyûdung hkangmó, hkâ-nhâm le nungmoq banshoq bang é matú gabú myit eq dung byi nyi lhê.

<sup>5</sup> Hkâsu mù gà le, nungmoq gi, sâng-hi nyi mai ahkuí je shoq, gabú danglù má ngò eq chòm zùm yap nyi é yanmai nghut lhê.

<sup>6</sup> Haû nungmoq má ge é muzó kut hi é sù Garai Gasang gi, Yesuq Hkrisduq é buinyi je shoq muzó haû lé lhoq pân râ nghut lhê nghû, ngò hkyak myit lum tô lhê.

<sup>7</sup> Nungmoq banshoq bang gi, ngá é i-myit má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkâsu mù gà le, ngò kyum hut huí tô é u lé le, haû gabú danglù hkyô lé taí húng luí, lhoq gíng é u lé le, nungmoq gi, ngò eq rahá Garai Gasang jeju chòm hkâm yu é bang nghut lhê.

<sup>8</sup> Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

<sup>9</sup> Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za,

<sup>10</sup> Garai Gasang é hpungwup shingkang eq hkya-on kungtôn hkyo é matú, Yesuq Hkrisduq é yanmai lo é dingmán hkyo é ashi wó byíng nyi sháng gaq nghû le;

<sup>11</sup> nungmoq é chyitdap myit gi, tengmán é hpaqchyí eq wó sê é nyan banshoq má

je riyhang kô jat lò sháng gaq nghû le, ngò kyûdung nyi lhê.

### *Dui Nyi Le Gi, Hkrisduq É Matú*

<sup>12</sup> Gumang wuì é, ahkuí ngò nungmoq lé sé nhâng nau é hkyô gi, ngò má haí dut lai lò bê hkyô pé gi, gè gè yhang gabú danglù ríng jat lò râ matú dut lò bê nghut ri.

<sup>13</sup> Hau é yanmai, haû hkohkâm-wâng zúng é lhunglhang bang eq gotú banshoq bang é hí má, Hkrisduq é yanmai ngò kyum hut huí é hkyô, de de dut htoq bê nghut ri.

<sup>14</sup> Hau htoq agó, ngò htóng lúng é yanmai, haû Yhumsing Yesuq má gumang wuì nghut é myo mi-myô gi, myit wum wó yû kômù, Garai Gasang é mungdang lé, je riyhang a gyuq a kyum wám hko kyo bekô nghut ri.

<sup>15</sup> Gè gè yhang byù ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akô. Nghut kôlhang, byù ra-am gi, ge é myit mai hko kyô bum akô nghut ri.

<sup>16</sup> Ge é myit mai hko é bang gi, gabú danglù lé húng râ matú ngo lé hkyin é hkyô lé, yhangmoq sé kômù, chyitdap myit eq hko kyô é bang nghut akô.

<sup>17</sup> Haû góbang chyaú gi, sanséng é i-myit eq a nghut é za, ngò kyum wut é hkyô má wuîhke jamjau jat byi râ matú, myit nyi bùm kô é nghut mù luí, Hkrisduq é hkyô lé yhumsing é wuizat é dông za, hko taí nyi bum akô nghut ri.

<sup>18</sup> Nghut kôlhang, haû gi, haí râ ri lhú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirâ nghut lhê.

<sup>19</sup> Hkâsu mù gà le, nungmoq kyûdung byí é eq Yesuq Hkrisduq é Woi-nyí garúm é yanmai, ngò má dut lai lò bê hkyô gi, ngò wó luthkyô dut râ nghut é lé ngò sê lhê.

<sup>20</sup> Ngò myit láng tô é eq myit myoqbyù tô é má, ngò gi, hoq nó haí a râ é za, hí hkun lhê su, ahkuí le, dui nyi kôlhang, shi byuq kôlhang, gyuq kyum myit a bo é hkyô lé wó yû mù luí, Hkrisduq gi, ngá gûng má hkya-on waq toq é hui râ nghut lhê.

21 Hkâsu mù gâ le, ngò, asak dui nyi le gi, Hkrisduq é matú, shî jáng gi, ngá e amyat nghut ri.

22 Nghut kôlhang, ngò gi, gungsho má rû dui nyi mù, ngò kut é muzó má ashi zuí lo é nghut le gi, hká lhum lé sheq hkyin yu le gè râ lú?

23 Ngò gi, hkyô í hkat gyoro má hká hpyang le a hkap dut tô ri; shi ló luí Hkrisduq eq rahá nyi râ lé gi, ngò ô nau ri, hkâsu mù gâ le, haû gi, je ge é hkyô nghut ri.

24 Nghut kôlhang, ngò gungsho má dui nyi le gi, nungmoq é matú akyû je bò râ nghut lhê.

25 Haû mù, ngò gi, shí hkyô lé hkyak myit lum to luí, lumjîng hkyô má nungmoq kô jat lo é eq gabú nyi râ matú, nyi gyó luí, nungmoq lhunglhâng bang eq nyi nyi râ hkyô lé, ngò sê lhê.

26 Haû mù luí, ngò nungmoq chyáng dum jé lé é hkûn, ngá é yanmai, Hkrisduq Yesuq má nungmoq é gabú hkyô gi, je riyhang jat lò râ nghut lhê.

27 Haî wà dut kôlhang, nungmoq gi, Hkrisduq é gabú danglù eq gingdán é dông nyiyap keq. Haû jáng, ngò, nungmoq chyáng jé mù huí lhûm é hkûn nghut nghut, we gang lhum tô é hkûn nghut nghut, nungmoq gi, woi-nyí ralhum má za yap gîng to mù, haû gabú danglù lé lumjîng hkyô má, i-myit rahkat zâ èq shikut nyi kô é hkyô lé le;

28 nungmoq gi, hká hkyô má nghut kôlhang, gyè pè èq kyuq zô é lé a gyuq lò kô é hkyô lé le, ngò sé râ nghut lhê. Haû gi, yhangmoq é matú htên byoq hui râ kumlhá dut lò bê nghut lhê; nghut kôlhang, nungmoq gi, hkyi yù hui râ nghut lhê. Haû gi, Garai Gasang kut é nghut lhê.

29 Hkâsu mù gâ le, Hkrisduq má wó lumjîng râ é jeju za a nghut, Yhang é matú wuîhke jamjau hui râ jeju le, nungmoq hkam yù bekô nghut ri.

30 Haû gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

## 2

*Yesuq, Myit Lhoq Nyhum É Hkyô*

1 Hkrisduq eq rading ralhum za nghut nyi é yanmai, myit wum byî é hkyô, Yhâng é chyitdap myit mai nhik tîng é hkyô, Woi-nyí eq zûm yap é hkyô, nú-nhâm é myit eq shogyo nhikmyîn é hkyô rajung jung lé, nungmoq wó yu é nghut le gi,

2 nungmoq gi, haû i-myit huí é hkyô rahkat za, chyitdap myit rajung za, myit nhiklhum eq myit é hkyô má ralhum za kut nyi é dông, ngá é gabú hkyô lé, byîng jup nhâng keq.

3 Yhumsing é wuizat é dông le, akôm gyáng pyâm é dông le, haî le a kut é za, myit lhoq nyhum nyi mù, góbang gi, nungmoq htoq má je gyaú lhê nghû myit yu nyi keq.

4 Nungmoq yuq hkangmó gi, yhumsing eq sêng é lé za a nghut, góbang eq sêng é lé le, myit byi râ lhê.

5 Hkrisduq Yesuq má bo é myit yhang, nungmoq chyáng bò râ dut lhê.

6 Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi râ matú a myit é za,

7 Yhânggùng lé lhoq gôm pyám luí, dui-nhâng zôshang é gunghkyâng lé yu chûng mù, xângzo byù gùng roq lé dut bê nghut ri.

8 Xângzo byù rayuq dông nghut nyi é hkûn, Yhânggùng lé Yhang lhoq nyhum pyám luí,

haû tapzîng htoq má lháng tap sat pyâm é hui shoq jîno gyô ri.

9 Haû mù luí, Garai Gasang gi, Yesuq é myîng lé mauhkûng htoq mâ é hkyihput,

myidàm htoq mâ é hkyihput eq mom-îng mâ é hkyihput hkangmó htuq paí luí,

10 haû Îwa Garai Gasâng é hpungwup shingkâng é matú, Yesuq Hkrisduq gi, Yhumsing nghut lhê nghû,

nhut shô hkangmó yín yù sháng gaq ga,

11 myhang htâng é jowò má Yhang lé lhoq toq tô é eq, myîng lhunglhâng é htoq má gyaú é myîng haû,

Yhang lé byî to bê nghut ri.

*Kyî Pé Su Duqbó Nyi Râ Hkyô*

12 Haû mù luí, ngò chyitdap é luzúm wui é, nungmoq gi, hkâ-nhám le jino gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkûn le, nungmoq hkyi yù hui bê hkyô lé, gyai gyuq hkunggâ é myit eq je riyhang lhoq htoq nyi keq.

13 Hkâsu mù gâ le, Garai Gasang gi, Yhang ô nau é hkyô lé, kut naû râ myit eq wó kut râ hkyô lé nungmoq má lhoq htoq byi nyi é sù nghut lhê.

14 Haí kut kôlhang, taí put lhûm é đông, haû a nghut jáng, dang jet jet lhûm é đông hkâkut kó.

15 Haû jáng sheq, myit goí é, agè ashop é pyat hkaû má, nungmoq gi, mara a bo é, sân-yúng é, shut hkyô a bo é, Garai Gasâng é yhangzô pé dut kó râ nghut lhê.

16 Hau htoq agó, nungmoq gi, asak mungdang lé chung htoq uchyang, mauhkûng mâ é kyî pé su, yhangmoq chyáng wó duqbó nyi kó râ nghut lhê. Haû hkûn, ngò gi, ajè a din pyâm é, a nghut jáng, muzó lé akôm a zui pyâm é yanmai, Hkrisduq é buinyi má gumrông jowò wó berâ nghut lhê.

17 Nghut kôlhang, ngò gi, shuq jung hkungga\* ralhûm su, nungmoq é lumjîng myit mai nhongjaú byi é shigu hkungga ahtoq má hut gyûn pyâm é hui le lhang, gabú luí, nungmoq banshoq bang eq rahá chôm gabú nyi lhê.

18 Haû eq rajung za, nungmoq le gabú luí, ngò eq rahá chôm gabú nyi râ dut lhê.

### *Timohti Eq Epahprodi Nhik Lé Nhang Kat Râ Gâ É Hkyô*

19 Ngò gi, nungmoq chyáng Timohti lé hân za wó nhang kat râ lé, haû Yhumsîng Yesuq má myit myoqbyu nyi lhê; haû hkûn sheq, nungmoq eq sêng é ludang lé ngò wó sé jáng, ngò myit ngón râ nghut lhê.

20 Nungmoq é hkyô lé, yhang su hkyak za ge myit chiq byi é byù gotû rayuq le ngò a wó.

21 Hkâsu mù gâ le, yuq du jup gi, Yesuq Hkrisduq eq sêng é hkyô lé a nghut é za, ó le

ó eq sêng é hkyô lé za ho nyi bum akô nghut ri.

22 Yhang kúm gi, zo rayuq mai îwa lé htuqbâng é su, haû gabú danglù hkyô má ngò eq rahá dojaú é yanmai, yhâng lumluq é hkyô tûn shit é lé, nungmoq sê nyi lhê.

23 Haû mù luí, ngò gi, ngò má hkâsu dut râ lé sê é hkûn yhang, yhang lé nhang kat râ matú ngò myit myoqbyu nyi lhê.

24 Hau htoq agó, hkâ-myháng a myáng má, ngò yhang le nungmoq chyáng wó jé nhâng râ nghut lhê nghû, haû Yhumsîng má hkyak lum nyi lhê.

25 Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò râ é hkyô má wú gon byi râ matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taû kat byi râ lhê nghû, ngò myit hpyit to bê nghut lhê.

26 Hkâsu mù gâ le, yhang gi, nungmoq lhunglhang bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri.

27 Gè gè yhang, yhang gi, aluq shoí shí shoq no pyâm é nghut lhê. Nghut kôlhang, Garai Gasang gi, yhang lé shogyo nhikmyîn yu ri; yhang lé baú a nghut, ngò yón htoq yón a dut nyi râ matú, ngo lé le shogyo nhikmyîn yu ri.

28 Haû mù luí, yhang lé nungmoq lhom dum myàng jáng, nungmoq myang gabú râ matú le, ngò yón é hkyô yom ló byuq râ matú le, yhang lé ngò hân hân nhang kat byi nau ri.

29 Nungmoq gi, gyai yhang gabú é myit eq, haû Yhumsîng má yhang lé lhom hkûlum yù mù, yhang su dut é bang lé hkungga keq.

30 Hkâsu mù gâ le, yhang gi, ngo lé nungmoq a wó garúm é hkyô lé garúm râ matú, yhâng é asak lé lhang a ha loshoq kut mù, haû Hkrisduq é muzó é yanmai, aluq shoí shoí shi é hui zô ri.

## 3

### *Gungsho Má Lumhkaû Râ Hkyô A Joq*

\* 2:17 Shuq jung hkungga gâ é gi, tsibiyiq wing ragóm lé myi htoq má hut pyâm é đông Garai lé gyuq hkunggâ é hkyô lé tûn shit é nghut lhê. Bun zo shí má shí hkâm é hkyô lé taí nau é nghut lhê.

1 Hau htoq agó, ngá é gumang wui ê, haû Yhumsîng má gabú nyî keq! Rajung zâ é hkyô lé, nungmoq é matú dum puq ká byi râ gi, ngò má wui é hkyô haî a joq, nungmoq é matú akyû dut râ matú sheq ru nghut lhê.

2 Haû, hkuî pé lé le; agè ashop é muzó jizó kut é bang lé le; gungsho yâm é bang lé le; sidiq nyî keq.\*

3 Hkâsu mù gâ le, Garai Gasâng é Woi-nyî èq noqkuq é bang, Hkrisduq Yesuq má gabú gumrong nyi é bang, gungsho má a lumhkau é bang, nga-nhúng gi, ahpyo-kuq hpyit hkam yu é bang akying† nghut lhê.

4 Ngò kúm gi, gungsho má lumhkaû râ hkyô wó ang sù nghut lhê.

Góbang rayuq yuq, haû gungsho má lumhkaû râ hkyô wó âng lhê ga myit é nghut le gi, ngò gi, je riyhang wó sù nghut lhê.

5 Ngò gi, hkû lé é htâng shit nyî nghû râ nyî má ahpyo-kuq hpyit bê sù; Israe-laq amyû mâ é, Ben-yamyin é awut ashín nghut sù, Hebre byû mâ é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê;

6 shirong é hkyô eq séng luî ga jang, ngò gi, haû noqkuq hpúng lé zing-rî wú bê nghut lhê; jep é tarâ mâ é dingmán hkyô eq séng luî ga jang, ngò gi, shut é hkyô a bo wú sù nghut lhê.

7 Nghut kôlháng, ngá é amyat nghu é pé lhunglháng gi, ahkuî, Hkrisduq é yanmai sùm byuq é chyat nghut bê nghû myit yù bê nghut lhê.

8 Hau htoq agó, ngò gi, ngá é Yhumsîng Hkrisduq Yesuq lé wó sê é ko dik é jeju lé sôn kat jâng, jung hkangmó lé buzaq dông myit yù bê. Hkâsu mù gâ le, lhunglháng lé ngò tô pyâm é gi, Yhang é yanmai nghut lhê.

9 Ngò gi, Hkrisduq lé wó yù râ eq, Yhang eq rahá wó nghut nyî râ matú, haû jung hkangmó lé buzaq nghû myit yu pyâm bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjîng é yanmai za wó yu é ru nghut lhê; haû gi, lumjîng myit mai wó é nghut lhê.

10 Ngò gi, Hkrisduq lé le, Yhang dui toq hkyô é hpungwup a-tsam lé le, Yhang hpuzô é hkyô má wó zùm yap râ lé le, Yhang shî hkâm é hkyô lé wó cháng râ lé le, sé nau ri.

11 Haû jáng gi, ngò le, shi byuq bê mai dum dui toq é hkyô lé wó myoqbyù râ nghut lhê.

### *Myit Myoqbyu Tô É Jowò Shut Din Nyi Râ Hkyô*

12 Ngò gi, haû pé banshoq lé wó gû bê le a nghû naù, ngò gumjup gù bê le a nghû naù. Nghut kôlháng, Hkrisduq Yesuq gi, ngo lé lhom yù bê eq rajung za, ngò gi, haû lé wó lhom yù sháng gaq nghû, châng hkat nyi lhê.

13 Gumang wui ê, ngò yhang ngò gi, haû lé wó hap yù bê nghû a myit; nghut kôlháng, ngò kut é muzó ralhum gi, nunghtáng mâ é lé tô-myhî pyâm mù, myoq hí mâ é lé wó yù shoq nghû shikut luî,

14 Hkrisduq Yesuq má Garai Gasâng èq ngo lé ahtoq shut ji yu é chyunghuq lé wó yù râ matú, myoqbyu tô é jowò shut châng hkat din nyi lhê.

15 Gumjup bê bang nga-nhúng lhunglháng gi, haû sù é myit bò râ lhê. Rajung jung má nungmoq myit é hkyô shai nyi kô é nghut le gi, haû lé le, Garai Gasang gi, nungmoq lé san za tân shit râ nghut lhê.

16 Hká dông nghut kôlháng, nga-nhúng gi, ahkuî jé shoq châng nyi bê hkyô eq rajung za châng kut nyi sháng.

17 Gumang wui ê, nungmoq gi, ngò kut é dông chôm kut nyî keq, ngamoq mai nungmoq lé kut shit é alik eq rajung za châng é bang lé wú yù keq.

18 Hkâsu mù gâ le, hí hkûn ngò, nungmoq lé anum num taî kyô wú luî, ahkuî lháng, ngaù byî èq dum taî kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri.

19 Yhangmoq é jihtûm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi,

\* 3:2 Bun zo shi lhum gi, ahpyo-kuq hpyit hkyô má noqzuq nyi é bang lé taî nau é nghut lhê. † 3:3 Ahpyo-kuq hpyit hkam yu é bang akying gâ é gi, Garai Gasâng é yhangzo hkyak nghut bê bang lé gâ lhê.

yhangmoq hoq hpu hkyô nghut ri. Yhangmoq é i-myt gi, mingkan zè htoq má za nghut ri.

<sup>20</sup> Nghut kôlhang, nga-nhông é yhummau gi, mauhkông mingdán má nghut lhê. Nga-nhông gi, haú má é Yhumsing Yesuq Hkrisduq gâ é hkyi yù Sû lé, myoqbyu láng nyi é bang nghut lhê.

<sup>21</sup> Yhang gi, jung hkanmó lé, Yhang uphkan é a-ô má wó kut tô é Yhông é a-tsâm eq nga-nhông é htên byoq sê é gungdu lé htaî lhik pyám byi luí, Yhông é hpungwup bo é gungdu su dut nhâng râ nghut lhê.

#### 4

<sup>1</sup> Haú mù luí, chyitdap é luzúm wuí le nghut mù, ngò chyitdap bôn nghâm nyi é, ngá é gabú jowò eq janmaú nghut nyi é, ngá é gumang wuí ê, haú gi, Yhumsing má nungmoq hkâsu kut yap gîng nyi râ hkyô nghut lhê.

#### *Lhoq Pun Lhoq Kyîng É Hkyô*

<sup>2</sup> Ngò gi, Uodia eq Suntuki nhik lé, haú Yhumsing má rayuq eq rayuq myit huí lhâm nyi râ matú, gyai yhang pying kat lhê.

<sup>3</sup> Ngá é mù wùn luzúm kyîng ê, ngò gi, myiwe shí nhik lé garúm yù laq nghû, nang lé le dúng tóngbán kat lhê; yhangnhik gi, Klemen eq le, asak jihpán laiká buk má mying bo é, ngá é mù wùn luzúm wuí góbang eq le, haú gabú danglù hkyô má ngò eq rahá gyai shikut wú bê sù nhik nghut lhê.

<sup>4</sup> Haú Yhumsing má hkâ-nhám le gabú nyi keq! Ngò dum taí lhê, gabú nyi keq!

<sup>5</sup> Nungmoq nú-nhâm é hkyô, byù ban-shoq bang lé sé nhâng keq. Haú Yhumsing gi, chyáng bê nghut ri.

<sup>6</sup> Haí eq séng luí le, myit hkâ-myô hkâchiq kó; hkyô hkanmó má jeju hkyá-on uchyang, kyûdúng é eq dúng tóngbán é dông, nungmoq dúng é hkyô pé lé, Garai Gasâng chyáng shit kyô nyi keq.

<sup>7</sup> Haú hkûn, sé gyô é nyan ban-shoq htoq má gyaú é, Garai Gasâng é nguingón hkyô gi, nungmoq é myit nhiklhûm eq nungmoq myit é hkyô lé, Hkrisduq Yesuq má upzúng byi nyi râ nghut lhê.

<sup>8</sup> Jihtúm má, gumang wuí ê, tengmán é, hpautap gíng é, dingmán é, sansêng é, wó

chyitdap é, hkungga gíng é, haí má nghut kôlhang, aróng wó dik é hkyô rajung jung, a nghut jáng, hkyá-on gíng é hkyô rajung jung bo é nghut le gi, haú sù é hkyô pé lé myit nyi keq.

<sup>9</sup> Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, haí lé le châng kut nyi keq. Haú hkûn, nguingón hkyô byi é Garai Gasâng gi, nungmoq eq rahá nyi nyi râ nghut lhê.

#### *Jeju Bôn É Hkyô*

<sup>10</sup> Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haú Yhumsing má gyai yhang gabú nyi lhê; gè gè yhang, nungmoq myit chiq byi nyi kôlhang, haú lé tûn shit râ ahkáng a wó kó nghut ri.

<sup>11</sup> Ngò îsu nghû taí nyi é gi, ngò má râ é hkyô bo tô é yanmai taí é a nghut, hkâsu mù gâ le, ngò gi, ngò hui mihui má, nhik dik nyi râ matú mhoq yù bê nghut lhê.

<sup>12</sup> Ra châ tô u lé, hkâsu kut râ ngò sê lhê; agùn agó wó u lé, hkâsu kut râ ngò sê lhê; hkyô hkanmó eq dut tô é ahkyo lhûm jup má, wam gyi kôlhang, zòmut kôlhang, agùn agó wó tô nyi kôlhang, ra châ to kôlhang, myit dik nyi râ hpaqchyí lé ngò wó mhoq yù bê nghut lhê.

<sup>13</sup> Ngò gi, ngo lé wum-o a-tsâm byi sù Hkrisduq é yanmai, hkyô hkat hkanmó wó kut lhê.

<sup>14</sup> Nghut kôlhang, ngò wuíhke jamjau huí nyi é hkûn, nungmoq garúm yù kô é gi, ge é hkyô kut bekô nghut ri.

<sup>15</sup> Hau htoq agó, Hpilipi byu pé nungmoq sê é eq rajung za, haú gabú danglù lé, ngò hkô mù nungmoq wó gyô yu hí é buinyi pé má, ngò Makedoni mau mai htoq ló râ hkûn, haú byi é hkyô eq lhóm yu é hkyô má, nungmoq mai lai luí, noqkuq hpúng gotû ralhum lháng, ngo lé garúm kat é hkyô a bo é nghut lhê.

<sup>16</sup> Ngò Htesaloni wà mó má nyi tô é hkûn lé lháng, nungmoq gi, ngò ra châ é hkyô lé adàm dâm hùn byi bekô nghut ri.

<sup>17</sup> Ngò gi, chyunghuq chyunghtâng lé ho nyi é a nghut, nungmoq mai ashi je myo zuí jat râ matú lé za sheq ho nyi é nghut lhê.

<sup>18</sup> Ngò gi, haí le gúm shoq myang yu é htoq agó, chyân shoq lháng nghut bê.

Ahkuî, haû nungmoq hun kat é chyunghuq lé, Epahprodi chyáng mai ngò lhom myang yù luî, ngò má agùn agó nghut nyî bê. Haû pé gi, namngón jung hkungga su, Garai Gasang lé gabú nhang é, hap yù gíng é hkungga ralhum nghut ri.

<sup>19</sup> Ngá é Garai Gasang gi, Yhang agùn agó wó sùt nyi é eq rajung za, nungmoq rá é hkyô banshoq lé, Hkrisduq Yesuq má lhoq gúm lhoq jup byi rá nghut lhê.

<sup>20</sup> Hpungwup shingkang gi, nga-nhông é Îwa Garai Gasâng chyáng pyat dedu ahtum abyuq ru joq nyî sháng gaq ô! Amen.

### *Shi-kyám Dang*

<sup>21</sup> Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyî é gumang wuì gi, nungmoq lé shi-kyâm kat akô nghut ri.

<sup>22</sup> Sân-yúng bang banshoq gi, nungmoq lé shi-kyâm kat akô; Kehtaq é yhûm mâ é sân-yúng bang gi, je riyhang shi-kyâm kat akô nghut ri.

<sup>23</sup> Yhumsîng Yesuq Hkrisduq é jeju gi, nungmoq banshoq bang eq rahá ru joq nyî sháng gaq ô!

## KOLOSE Pê Chyáng Hun Kat é Laiká (Colossians)

<sup>1</sup> Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhông é gumang Timohti gi,

<sup>2</sup> Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhông é Íwa Garai Gasâng chyáng má é jeju eq nguingón hkyô gi, nungmoq chyáng ru joq nyi sháng gaq.

### *Jeju Hkya-ôn É Eq Kyûdung É Dang*

<sup>3</sup> Ngamoq gi, nungmoq é matú kyûdung byi é hkûn, nga-nhông é Yhumsing Yesuq Hkrisduq é Íwa nghut é Garai Gasang lé ayang jeju hkya-ôn lhê.

<sup>4</sup> Haí mù gà le, Hkrisduq Yesuq má nungmoq lumjîng hkyô eq Yhâng é sân-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê.

<sup>5</sup> Lumjîng myit eq chyitdap myit haú gi, nungmoq é matú mauhkûng htoq má hkong to byi é myit myoqbyù hkyô\* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gû nghut lhê.

<sup>6</sup> Nungmoq gi, gabú danglù haú lé wó gyo luí, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashi zuí é eq kô myhang nyi bê nghut é eq rajung za, gabú danglù haú gi, mingkan gón má ge é ashi zuí nyi é eq kô myhang nyi bê nghut ri.

<sup>7</sup> Nungmoq gi, haú hkyô lé, ngamoq é chyitdap byinzùm Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzuí é hpúng mù wùn sù nghut lhê.

<sup>8</sup> Yhang gi, haú Woi-nyí eq nungmoq lé byi tô é chyitdap hkyô lé, ngamoq lé taí kyo sù le nghut ri.

<sup>9</sup> Haú nghut é yanmai, ngamoq gi, nungmoq eq sêng é hkyô lé wó gyô é nyí mai,

nungmoq é matú ayang kyûdung byi nyi lhê. Garai Gasang ô nau é hkyô lé sé râ hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pyíng byi sháng gaq nghû, Yhâng chyáng kyûdung byi nyi lhê.

<sup>10</sup> Haú su kut kyûdung byi é gi, haú Yhumsing ô nau é hkyô eq gingdán é dông nungmoq asak wó duí luí, hkyô hkgangmó má Yhang lé wó gabú nhâng râ matú nghut lhê. Hau dông mai, nungmoq gi, ge é muzó hkgangmó má ashi zuí nyi luí, Garai Gasang lé sê é hpaqchyí má kô myhang nyi kó râ nghut lhê.

<sup>11</sup> Hau htoq agó, nungmoq gi, Yhâng é hpungwup a-tsam dông mai a-tsam banshoq eq wum-o lhoq kîng byi é huí nyi kó râ nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó yú kó râ nghut lhê.

<sup>12</sup> Maubó é mingdán má, sân-yúng bang eq sêng é muizé lé wó bo hkam yù râ matú, nungmoq lé gingdán nhang é sù haú Íwa lé le, jeju wó hkya-on kó râ nghut lhê.

<sup>13</sup> Hkâsu mù gà le, Íwa haú gi, nga-nhông lé, mauchut eq up é hkaú mai hkyi htoq yú luí, Yhang chyitdap é Yhang Zô é mingdán má shuí hâng é Sù nghut lhê.

<sup>14</sup> Nga-nhông gi, haú Yhang Zo dông mai, hkyi xe yu é hui mù, yubak mara hkyut pyám byi é hui bê nghut lhê.

### *Jung Hkgangmó É Ushuq, Hkrisduq*

<sup>15</sup> Hkrisduq gi, myoq eq a byu-myàng é Garai Gasâng é gungghkyâng isâm nghut luí, zomún dông hpan tô é lhunglhâng htoq má gyaú é sù nghut ri.

<sup>16</sup> Hkâsu mù gà le, mauhkûng eq myigùng htoq má joq é azíng zê pé, myoq eq byu-myang é eq a byu-myang é pé nghut kôle, hkohkâm ayá pé, a-tsam pé, uphkâng bang, ahkáng ayá wó bang nghut kôle, lhunglháng gi, Yhâng eq hpan to huí é chyat nghut lhê. Lhunglháng gi, Yhâng é matú, Yhâng eq hpan to huí é chyat nghut ri.

<sup>17</sup> Yhang gi, lhunglhâng é hí má é nghut mù, lhunglháng gi, Yhâng é yanmai joq gîng bum é chyat nghut lhê.

\* **1:5** Bun zo shí má bo é myit myoqbyù hkyô gi, Yesuq lé taí é nghut lhê.

18 Yhang gi, noqkuq hpúng nghu é gungdú é ulhum nghut ri; Yhang gi, jung hkanmó má gyaú dik é ushuq dut sháng gaq ga, sâng-hi awang nghut sù eq shi é bang má é hî dui toq é zomún dut sù nghut ri.

19 Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi râ lé myit ngui ô nau é nghut mù,

20 haú tapzîng má htoq byi é Yhang Zô é sui dông mai nguingón hkyô kut byi é èq, myigùng htoq mâ é azíng zê nghut nghut, mauhkûng mâ é azíng zê nghut nghut, lhungháng lé, Yhang Zo dông mai, Yhang eq nguingón simsaq hkyô xoq yû bê nghut ri.

21 Nungmoq gi, Garai Gasang eq wê gâng é bang dut wú kôluí, nungmoq é agè ashop nyi yap sâmlai é yanmai, nungmoq i-myt má, Yhâng é gyè dut wú bekô nghut lhê.

22 Nghut kôlhang, ahkuí, Garai Gasang gi, nungmoq lé, râ é hkyô a bo é eq mara hún râ hkyô a bo é za, chyoiyúng é dông Yhâng é hí má shit râ matú, Hkrisduq é gungsho gungdu shî hkâm é dông, nungmoq eq nguingón simsaq hkyô xoq yû bê nghut ri.

23 Haú gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gingtîng nyi mù, nungmoq é lumjîng hkyô má xoq nyi nyi é nghut jáng sheq dut râ nghut lhê. Gabú danglù shî gi, nungmoq wó gyô wú bê nghut é htoq agó, mauhkûng ô má hpan tô é jung hkanmó lé hko kyô nyi bê nghut lhê. Ngò, Poluq le, gabú danglù hau é dui-nhâng zoshâng dut é nghut lhê.

### *Noqkuq Hpúng É Matú Poluq Wùn Waq É Hkyô*

24 Ahkuí, ngò gi, nungmoq é matú jamjau huí é má gabú lhê; hau htoq agó, Hkrisduq é gungdu nghut é, noqkuq hpúng é matú, râ tô ashî nghut é, Yhang hpuzô é hkyô lé, ngá é gùng má ngò lhoq gumjup yu nyi lhê.

25 Ngò gi, Garai Gasâng é mungdang lé, nungmoq chyáng gumjup shoq hko kyo râ matú, Garai Gasang, ngo lé hun tô é wò mai, noqkuq hpúng hau é mú wùn sù dut é nghut lhê.

26 Mungdang haú gi, gohkûn mai apyat pyat haq tô gyó lo é zaú tô é hkyô nghut

kôlhang, ahkuí gi, haú sâ-n-yúng bang lé hpông shit bê nghut ri.

27 Garai Gasang, haú su kut é gi, zaú tô é hkyô hau é agùn agó hpungwup shingkang, tûngbaù pè chyáng hkâsu nghut é hkyô, yhangmoq lé sé nhâng râ matú nghut lhê. Zaú tô é hkyô haú gi, hpungwup shingkang lé myoqbyù é hkyô nghut é, nungmoq má Hkrisduq dui nyi bê hkyô lé gâ é nghut lhê.

28 Hkrisduq má gumjup é dông, byù yuq hkanmó lé wó shuî jé sháng gaq nghu, ngamoq gi, Hkrisduq é hkyô lé taí pyô luí, yuq hkanmó lé, hpaqchyí byéng-yá banshoq èq taí pun taí kyíng é eq mhoshit nyi é nghut lhê.

29 Ngò, haú-í yhang wó wùn waq shikut é gi, ngò má wum-o a-tsam byíng byíng mú zuí nyi Su é wum-o banshoq èq wùn waq shikut nyi é ru nghut lhê.

## 2

1 Ngò gi, nungmoq é matú le, Ladoki wà mó bâng é matú le, ngò eq myoqdong hkyûm a huí wú shî é bang banshoq é matú le, hkâ-í yhang awui ahke shikut nyi é hkyô lé, nungmoq lé sé nhâng nau ri.

2 Haú su awui ahke shikut é hkyô gi, yhangmoq, myit má wum-o byi é huí râ eq chyitdap myit má rading ralhum za wó dut râ matú nghut lhê. Haú hkûn, yhangmoq gi, Garai Gasâng é zaú tô é hkyô nghut é, Hkrisduq lé wó sé râ matú, sê gyô é nyan lhunghâng é isut byíng shoq lé wó yû kó râ nghut lhê.

3 Haú Hkrisduq má kúm gi, hpaqchyí byéng-yá eq sumsé hpaqchyí gâ é sutzè lhungháng lé tsíng tô ri.

4 Nungmoq lé ngò haú hkyô taí kyô é gi, ó yuq le, dang ngón dang ngui èq mhòq hpyoq é dông, nungmoq lé a wó mhaú zo râ matú nghut lhê.

5 Hkâsu mù gâ le, ngá gungdu nungmoq eq rahá a nyi kôlhang, ngá é myit gi, nungmoq eq rahá nghut nyi luí, nungmoq shuq shuq tap tap za nghut nyi kô é eq Hkrisduq lé lumjîng é má hkâ-í gingtîng nyi kô é lé myàng mù, ngò gabú nyi lhê.

### *Hkrisduq Dông Mai Wó É Gumjup É Asak Dui Hkyô*



<sup>6</sup> Haû mù luî, nungmoq gi, Hkrisduq Yesuq lé Yhumsîng nghû hap yù bekô nghut é eq rajung za, Yhang má asak xoq dui nyi keq.

<sup>7</sup> Yhang má apûn amyit chîn gîng nyi mù, kô myhang lò luî, nungmoq mhoq yù bê eq rajung za, lumjîng hkyô má wum-o lhoq kîng mù, jeju hkya-ôn é hkyô byîng zan nyi keq.

<sup>8</sup> Hkrisduq chyáng mâ é a nghut é za, mingkan shî mâ é uphkâng tarâ pé eq xângzo wui é htûngli cháng luî, mhaú zô é myit sôn hpaqchyî eq akyû a bo é dang dông, ó yuq èq le, nungmoq lé a wó shuî nghoq yù kó sháng gaq, sidiq nyi keq.

<sup>9</sup> Hkâsu mù gâ le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyi mù,

<sup>10</sup> nungmoq gi, a-tsam bo é banshoq eq ahkáng ayá wó é banshoq é ushuq nghut é Hkrisduq eq sêng é bang nghut kômù, gumjup é bang dut bekô nghut ri.

<sup>11</sup> Yhang má, nungmoq gi, byu loq èq kut é ahpyo-kuq hpyit hkyô dông a nghut é za, ahpyo-kuq hpyit é su, Hkrisduq èq yubak gungsho mara lé hkyut sêng pyâm é hkyô lé hkam yù bekô nghut ri.

<sup>12</sup> Nungmoq gi, wui-myhup hkâm é hkûn Hkrisduq eq rahá myhup yhûm é hui bekô nghut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjîng kô é yanmai, Yhang eq rahá lhoq dui toq yu é hui bekô nghut ri.

<sup>13</sup> Nungmoq é yubak mara pé é yanmai le, nungmoq é yubak gungsho mara lé huî sêng pyâm é a hkam yu é yanmai le, nungmoq shi tô é hkûn, Garai Gasang gi, nungmoq lé, Hkrisduq eq rahá asak dui nhâng bê nghut ri. Yhang gi, nga-nhûng é yubak mara lhunglháng lé hkyut pyâm byi luî,

<sup>14</sup> nga-nhûng eq shai lhum mù, nga-nhûng lé htuq htîng é, tarâ pé bo é jéyáng râ jihpán lé huî sêng pyâm byi bê nghut ri. Yhang gi, haû lé tapzîng htoq má dok tap pyâm é dông yu pyâm byi bê nghut lhê.\*

\* **2:14** Yhang gi, haû lé tapzîng htoq má dok tap pyâm é dông yu pyâm byi bê nghut lhê gâ é gi, Hkrisduq tapzîng má shî hkâm byí é hkûn, nga-nhûng é yubak mara banshoq lé, Garai Gasâng èq hkyut pyâm byí é lé tai nau é nghut lhê.

† **2:18** Byu-myang é lé gâ é gi, yhang myit htoq é shing-rán lé gâ lhê. \* **3:1** Loqyo hkyam nghû é gi, ahko ahkáng wó é jowò lé gâ é nghut lhê.

<sup>15</sup> Haú dông mai, a-tsam bò bang eq ahkáng ayá wó bâng a-tsam lé lang hkyut hkyô pyâm mù, Yhang gi, tapzîng èq yhangmoq lé ung pyâm é dông, byù pé é hí má yhangmoq lé de de kut to bê nghut ri.

<sup>16</sup> Haû mù luî, nàng haî zo haî shuq é yanmai le, noqkuq htûng eq sêng é poi buinyi, Lhoxan Lhosik poi, Bánno buinyi eq sêng luî le, nungmoq lé, ó yuq èq le a wó jéyáng kó sháng gaq.

<sup>17</sup> Haú pé gi, dut lò râ hkyô pé é wupzo chyat nghut lhê; haû gùng gyîng gi, Hkrisduq yhang nghut nyi ri.

<sup>18</sup> Myit lhoq nyhum mhaû é eq maumang lagyô pé lé noqkuq é lé myit nguî é sù ó yuq èq le, nungmoq lé, chyunghuq eq a gingdán râ dông hkâkut nhâng kó. Haû su é yuq gi, yhumsîng byu-myang é lé† za taî shikut mù, yhumsîng é gungsho myit mai, akôm yhang nghut é lé gyáng dang taî é sù nghut ri.

<sup>19</sup> Yhang gi, Garai Gasang kô myhâng nhang é su, gungdu gón é gungsho showuî showang pé eq shogyi pé lé htuqbang byi mù rahá lêng tsing tô é haû ulhum nghut é Hkrisduq eq xoq é hkyô lé byoq ló nhâng bê nghut ri.

<sup>20-21</sup> Nungmoq gi, Hkrisduq eq rahá, mingkan shî mâ é tarâ pé eq shi gang bekô nghut le nhîng, haî mù, haû eq sêng lhum nyi ashî kó lhú? "Hkâzui, hkâchyâm, hkâzáng." gâ é tarâ ô má nyi nyi ashi kó lhú?

<sup>22</sup> Haú pé gi, waxâng zô wui é hkunmó pé eq mhoqshit hkyô pé nghut é yanmai, jai chung é hkûn, htên byuq râ chyat nghut lhê.

<sup>23</sup> Haû sù é tarâ pé gi, yhumsîng yhang noqkuq shikut é, myit lhoq nyhum mhaû é eq gungdu lé gunjâng é pé nghut luî, hpaqchyî byéng-yá bo é su dut kôlhâng, gungshô é agè ashop yut yut ô naù hkyô lé wó hkûm zîng pyâm râ má, hai akyû a bò nghut ri.

### 3

#### *Chyoiyúng É Dông Asak Dui Râ Hkyô*

<sup>1</sup> Haû mù luî, nungmoq gi, Hkrisduq eq rahá lhoq dui toq é hui bekô nghut jáng, Garai Gasâng é loqyo hkyam\* má zung tô é Hkrisduq é jowò má joq é, ahtoq mâ é azíng zê pé lé myit ô nau nyi keq.

<sup>2</sup> Nungmoq gi, myidàm htoq mâ é azíng zê lé myit tuí é a nghut é za, ahtoq mâ é azíng zê lé myit tuí nyi keq.

<sup>3</sup> Hkâsu mù gâ le, nungmoq gi, shî bekô nghut luî, ahkuî, nungmoq é asak gi, Hkrisduq eq rahá, Garai Gasang má haq tô é hui bekô nghut ri.

<sup>4</sup> Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shing kang hkaû má htoq shit kó râ nghut lhê.

<sup>5</sup> Haû mù luî, nungmoq é mingkan hkyô eq sêng é, ashop é dông gungsho zùm yap é hkyô, agot a-û nyi zô lhùm é hkyô, ye lhai nau é hkyô, agè ashop yut yut ô nau é hkyô eq, hparà noq hkyô nghut é myoqnoq hkyô pé haî lé le sat pyám keq.

<sup>6</sup> Haú hkyô pé é yanmai, Garai Gasâng é nhikmo-yo hkyô gi, jìno a gyo bâng é ahtoq má† jé râ za nghut lhê.

<sup>7</sup> Laî lò bê hkûn, nungmoq le, haú hkyô pé dông sô wú kô é nghut lhê.

<sup>8</sup> Nghut kôlhang, ahkuî, nungmoq gi, nhikjum yô é, nhikmo-yô é, agè ashop é dông nò shoq kut é, lumù gansang é eq, nungmoq é nhutwuî mai hkunchoq taî é hkyô shí pé banshoq lé, yhumsing gùng yhumsing tô pyám râ dut lhê.

<sup>9</sup> Rayuq eq rayuq hkâ-mhaû lhum kó; hkâsu mù gâ le, nungmoq gi, nungmoq é byù xau eq byù xaû é nyi yap hkyô lé hkyut pyám mù,

<sup>10</sup> byù sik lé tû wut yû kô é nghut lhê; byù sik haû gi, sumsé hpaqchyî dông mai, yhang lé hpân Su é gungdu ísâm má asik jat lò nhang é huî nyi ri.

<sup>11</sup> Byù sik má gi, Grik eq Yudaq byù nghu é, ahpyo-kuq hpyit hkâm bang eq a hkâm bang nghu é, byù bíng eq byù jum nghu é, jùn eq jùn a nghut sù nghu é a nyi lô é za, Hkrisduq gi, banshoq nghut mù, banshoq má nyi nyi ri.

<sup>12</sup> Haû mù luî, Garai Gasâng èq hkyin yù

huî é bang, Yhâng èq gyai yhang chyitdap é huî é chyoiyúng bang dông, shogyo myit, gè hkyô shit é myit, lhoq nyhum é myit, nú nhâm é myit eq myit hing é hkyô pé lé, yhumsing gùng yhumsing mebu su wut to keq.

<sup>13</sup> Nungmoq yhangchang mara kut shut é hkyô joq é nghut jáng, hkam jan byî lhum luî, rayuq eq rayuq mara hkyut byî lhum keq. Haû Yhumsing gi, nungmoq é mara hkyut pyám byî é su, nungmoq le mara hkyut byi keq.

<sup>14</sup> Haû ge é sâmlai banshoq wó é htoq agó, gumjup é rading ralhum za dut é hkyô má, banshoq lé rahá wó tuí zing tô é chyitdap myit lé puq wut to keq.

<sup>15</sup> Nungmoq gi, nuingón hkyô wó râ matú ji yu é hui bekô nghut mù, gungdu ralhum mâ é bang chyat nghut bekô yanmai, Hkrisduq é nuingón hkyô lé, nungmoq é myit má up nhang nyi keq. Haû mù, jeju hkya-ôn nyi keq.

<sup>16</sup> Nungmoq, rayuq eq rayuq, hpaqchyî byéng-yá banshoq èq mhoqshit é eq lhoq pun lhoq kyíng lhùm é hkûn le, Garai Gasang lé nungmoq jeju bûn é myit mai, jihkyang dang, hkya-on mahkôn, woi-nyí eq sêng é mahkôn pé hkôn é hkûn le, haû Hkrisduq é mungdang lé, nungmoq é myit nhiklhum má agùn agó bò nhang nyi keq.

<sup>17</sup> Nungmoq haî wá kut kut, dang dông nghut nghut, zui saî é dông nghut nghut, banshoq lé Yhumsing Yesuq é myíng mai kut é hkûn, haû Íwa nghut é Garai Gasang lé Yhang dông mai jeju hkya-on keq.

### *Hkristan Ikun Byu Pé Nyi Yap Râ Hkyô*

<sup>18</sup> Ikun myhî pé ê, ikun hpô pé uphkan é ahkaû má nyi keq. Haû gi, Yhumsing é hí má kut gíng é hkyô nghut lhê.

<sup>19</sup> Ikun hpô pé ê, ikun myhî pé lé chyitdap nyi keq. Yhangmoq lé dang htân hkânyô kó.

<sup>20</sup> Zo wuî ê, jung hkanmó má nungmoq é mó wuî é jìno gyo keq; hkâsu mù gâ le, haû gi, Yhumsing ô nau é hkyô nghut lhê.

<sup>21</sup> Íwâ pé ê, nungmoq é zo wuî lé myit hkâ-nô nhâng kó, nò nhâng jáng gi, yhangmoq, myit wum gyuî byuq kó râ nghut lhê.

† 3:6 Jìno a gyo bâng é ahtoq má, gâ é dang, chyúmding ra-am má a bò nghut lhê.

<sup>22</sup> Jùn pé ê, hkyô hkanmó má nungmoq é myidàm htoq mâ é jùn sîng bang uphkan é ahkaû má nyi nyi keq; yhangmoq é myoq hí má za zui saí luí, myoqdong ho é dông a nghut é za, haû Yhumsîng lé gyuoq hkunggâ é eq lhumzui é myit mai zui saí nyi keq.

<sup>23</sup> Nungmoq haí wá kut kôle, byu é matú kut é a nghut, haû Yhumsing é matú kut nyi é dông, nungmoq é myit nhiklum ban-shoq eq zui saí nyi keq.

<sup>24</sup> Haí mù gâ le, nungmoq gi, haû Yhumsing chyáng mai, muizé lé chyunghuoq dông wó yû kó râ nghut é lé, sé kô é yanmai nghut lhê. Nungmoq dojaú nyi é sù gi, Yhumsîng Hkrisduq ru nghut lhê.

<sup>25</sup> Kut shut sù gi, yhang kut shut é marâ matú dam byí é hui zo râ nghut lhê, haí mù gâ le, Garai Gasang gi, myoqdong hkyin é hkyô a joq.

#### 4

<sup>1</sup> Jùn sîng bang ê, nungmoq é jùn pé lé, tengmán é eq gîng âng é dông lajang byí nyi keq; haí mù gâ le, nungmoq le, mauhkûng htoq má Yhumsîng rayuoq wó é lé sé kô é yanmai nghut lhê.

#### *Xoq Lui Pying Kat É Hkyô*

<sup>2</sup> Nungmoq gi, kyûdûng é má myit zîng zuq nyi mù, machyâ luí, jeju hkyâ-ôn nyi keq.

<sup>3</sup> Ngò, shamtoq-tui hut huí nyi shoq dut é, Hkrisduq é zaú tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí râ hkyô hkum hpóng byi râ matú kyû bo dung byi kó laq.

<sup>4</sup> Haû Hkrisduq é zaú tô é hkyô lé, ngò taí âng é dông san za wó taí pyô sháng gaq, kyû bo dung byi kó laq.

<sup>5</sup> Nungmoq gi, a lumjîng bang eq zùm yap é hkûn hpaqchyí bo nyi keq; wó yu é ahkyíng hkanmó lé rago yhang chung jai keq.

<sup>6</sup> Nungmoq gi, yuoq hkanmó lé hkâsu tû taí râ hkyô wó sé kó shoq, dâng nyo é má, xô eq nghám nhang é su, hkâ-nhâm le jeju byíng é dang bo nyi sháng gaq.

#### *Ló Htâng É Shi-kyám Dang*

<sup>7</sup> Tuhkiku gi, ngá hkyô eq sêng é danglù banshoq, nungmoq lé taí kyo râ nghut

lhê. Yhang gi, ngá é chyitdap gumang, haû Yhumsîng má, lhumzui é hpúng mù wùn sù eq byinzùm nghut lhê.

<sup>8</sup> Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé râ eq, nungmoq lé myit wum wó byi râ matú nghut lhê.

<sup>9</sup> Yhang gi, nungmoq chyáng mâ é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhang-nhik gi, shí má dut nyi é hkyô jung hkanmó lé taí kyo kó râ nghut lhê.

<sup>10</sup> Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba é yhâng za-aû Markuq le, nungmoq lé shi-kyâm kat ri. (Markuq eq séng luí pying kat é hkyô lé nungmoq wó yû to bê nghut mù, nungmoq chyáng, yhang jé lé é nghut jâng, lhom hkûlum yû keq.)

<sup>11</sup> Yustu le gâ é Yesuq le, nungmoq lé shi-kyâm kat ri. Garai Gasâng é mingdân matú ngá é byinzùm mù zui bang má, haú bang za Yudaq byu pé nghut kômù, yhangmoq gi, ngo lé nhik tíng byí é bang nghut akô.

<sup>12</sup> Nungmoq chyáng mâ é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lunglhang má hkyak lùm to mù, gumjup luí wó gîngtîng nyi sháng gaq ga, Yhang gi, ayang nungmoq é matú kyûdung shikut byí nyi ri.

<sup>13</sup> Nungmoq é matú le, Ladoki wà mó eq Herapoli wà mó bâng é matú le, yhang gi, gyai yhang mù zui shikut byí é hkyô lé, yhang é matú ngò saksé hkâm lhê.

<sup>14</sup> Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri.

<sup>15</sup> Ladoki wà mó mâ é gumang wui lé le, Numhpa eq yhâng yhûm mâ é noqkuq hpúng lé le, bo shi-kyám byi keq.

<sup>16</sup> Laiká shí lé, nungmoq lé nghap kyô é htâng má, Ladoki byu pê é noqkuq hpúng má le nghap nhâng mù, Ladoki wà bâng chyáng hûn kat é laiká lé le, nungmoq nghap wú keq.

<sup>17</sup> "Haû Yhumsing chyáng mai nâng hap yû to bê é muzó lé rago za lhoq pân pyám aq." nghû, Arkipo lé taí kyo keq.

<sup>18</sup> Ngò, Poluq gi, ngá é loq èq yhang shi-kyám dang shî lé kê kat é nghut lhê. Ngò, shamtoq-tui wut tô é lé bûn nyi keq. Jeju gi, nungmoq chyáng ru joq nyi sháng gaq ô.

## HTESALONI Pê Chyáng Hî Dàm Hun Kat é Laiká (1 Thessalonians)

<sup>1</sup> Ngò Poluq, Sila\* eq Timohti pé gi, Íwa Garai Gasang eq Yhumsing Yesuq Hkrisduq má nghut nyí bê bang, haû Htesaloni wà mó byu pê é noqkuq hpúng lé dang kyô kat lhê. Garaî jeju eq nuingón hkyô gi, nungmoq chyáng ru joq nyí sháng gaq.

### *Jeju Hkya-ôn É Hkyô*

<sup>2</sup> Ngamoq gi, hkâ-nhám le, nungmoq ban-shoq bâng é matú, Garai Gasang lé jeju hkya-on luí, ngamoq é kyúdung dang má nungmoq lé bo dũng lhôm nyi lhê.

<sup>3</sup> Nungmoq é lumjǐng myit mai zui saí é nungmoq é muzó lé le; chyitdap myit é yanmai, nungmoq shikut é hkyô lé le; nga-nhũng é Yhumsing Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhũng é Íwa Garai Gasang é hí má, ngamoq ru bũn nyi lhê.

<sup>4</sup> Garai Gasang chyitdap é gumang wuì ê, Yhang nungmoq lé hkyin yù bê lé, ngamoq sê lhê.

<sup>5</sup> Hkâsu mù gâ le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyung Woi-nyí đông le, tengmán hkyô bying jup é đông le, jé bê nghut é yanmai nghut lhê. Ngamoq, nungmoq eq rahá nyi é hkũn, nungmoq é matú hkâsu kut laí lo é hkyô lé, nungmoq sé gù nghut lhê.

<sup>6</sup> Nungmoq gi, wuìhke jamjau myo myo hui zo kôhang, Chyoiyung Woi-nyí byí é gabú myit mai, danglù haû lé lhom yù kôluí, ngamoq lé le, haû Yhumsing lé le, alik kut yu é bang dut bekô nghut ri.

<sup>7</sup> Haû mù, Makedoni mau eq Ahkaia mau má é lumjǐng bang ban-shoq é alik, nungmoq dut bekô nghut ri.

<sup>8</sup> Nungmoq chyáng mai, Makedoni mau eq Ahkaia mau má, haû Yhumsing é mungdang hũ htoq ló e za a nghut, Garai Gasang má nungmoq lumjǐng hkyô gi, jowò

hkanqmó jàm ló bê nghut luí, ngamoq gi, haí le taí nó a ra lo nghut ri.

<sup>9</sup> Hkâsu mù gâ le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garai Gasang shut hkâsu kut lhing lò mù, rû dui nyi é eq tengmán é Garai Gasang lé dojaú nyi é hkyô lé le;

<sup>10</sup> mauhkũng má é haû Yhang Zo lé lánng nyi é hkyô lé le, yhangmoq taí kyô akô. Yhangzo haû gi, Yhang eq shi é mai lhoq dui toq yu é hui luí, jé lô râ nhikmó yo hkyô mai nga-nhũng lé hkyi yù sũ, Yesuq nghut ri.

## 2

### *Poluq, Htesaloni Wà Mó Má Garaî Mũ Wũn Waq É Hkyô*

<sup>1</sup> Gumang wuì ê, nungmoq chyáng ngamoq lé kũm é hkyô gi, akôm a nghut é lé, nungmoq yhang sê lhê.

<sup>2</sup> Nungmoq sê é eq rajung za, ngamoq gi, hí hkũn, Hpilipi wà mó má wuìhke jamjau eq rhoí é hui wú bê nghut lhê; nghut kôhang, nga-nhũng é Garai Gasang garúm é yanmai, gyaí lhom htuq htĩng é hui kôle, Garai Gasang é gabú danglù lé, a gyuq a kyum nungmoq lé wám taí kyô é nghut lhê.

<sup>3</sup> Hkâsu mù gâ le, ngamoq lhoq pun lhoq kyĩng é hkyô gi, shut é, a nghut jáng, a sanseng é i-myit đông eq nungmoq lé mhaú zô é đông a nghut e za,

<sup>4</sup> haû gabú danglù lé chũng gĩng é bang ga, Garai Gasang chyáng mai ahkang wó é đông za, ngamoq taí é nghut lhê. Ngamoq gi, byu pé lé gabú nhang râ matú a nghut, ngamoq é myit lé chyam wú nyi é Garai Gasang lé, gabú nhang râ matú shikut é ru nghut lhê.

<sup>5</sup> Hkâsu mù gâ le, nungmoq sê é eq rajung za, ngamoq gi, lhoq ngón mhaú é dang le hkâ-nhám a chũng wú, nghop tô é myoqnoq myit le hkâ-nhám a bò, Garai Gasang gi, ngamoq é saksé nghut lhê.

<sup>6</sup> Ngamoq gi, byu pé mai le, nungmoq mai le, gotũ ó yuq mai le hkya-on râ lé ho nyi é a nghut, Hkrisduq é lagyô pé nghut

\* 1:1 Sila lé gi, Salwanu le gâ lhê.

é eq rajung za, nungmoq lé wòlai hùn nau jáng wó hun lhê; nghut kôlhang,

<sup>7</sup> Ìnu rayuq, yang é zoshâng zô pé lé hku baú é su, nungmoq chyáng nú-nhâm é đông nyi lai lò bê nghut lhê.

<sup>8</sup> Ngamoq gi, nungmoq lé gyai yang chyitdap lui, Garai Gasâng é gabú danglù za a nghut, ngamoq é asak pé nungmoq lé byi pyâm le lhang nhik dik lhê; hkâsu mù gâ le, nungmoq gi, ngamoq chyitdap dik é bang dut bekô nghut é yanmai nghut lhê.

<sup>9</sup> Gumang wui ê, nungmoq gi, ngamoq gyai yang mù zui shikut é hkyô lé, gè gè bun kó rá nghut lhê; Garai Gasâng é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wòlai a byi sháng gaq nghû, ngamoq gi, nyí lé, myín lé, mù zui é nghut lhê.

<sup>10</sup> Ngamoq gi, lumjìng bê bang nungmoq é hí má, hkâsu chyoiyung é eq dingmán é, mara hùn rá a bo é bang dut lai lo é hkyô lé, nungmoq le, Garai Gasang le, saksé nghut lhê.

<sup>11</sup> Hkâsu mù gâ le, ngamoq gi, ìwa rayuq mai yhumsing yangzô pé lé kut byi é su, nungmoq yuq hkgámó lé, myit wum byi nyi é hkyô lé le, nhik taí tìng nyi é hkyô lé le,

<sup>12</sup> Yang é mingdán eq hpungwup shingkang má, nungmoq lé wut yu é Garai Gasang eq gingdán é đông, nungmoq asak wó dui nyi sháng gaq nghû, nungmoq lé wum byi nyi é hkyô lé le, nungmoq yang sê nyi lhê.

<sup>13</sup> Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkûn, byu é dang lé lhom yu é đông a nghut e za, lumjìng é bang nungmoq má mù zui nyi é, haù Garai Gasâng é mungdang lé yang, lhom yù kô é yanmai, Garai Gasang lé xoq xoq jeju hkya-ôn nyi lhê.

<sup>14</sup> Gumang wui ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpung pé lé, alik kut yu é bang dut bekô nghut ri. Noqkuq hpung haù pé gi, Yudaq byu pé zing-rí é lé hui zô é su, nungmoq le, yhumsing mau mâ é byu pé zing-rí é lé hui zô akô nghut ri.

<sup>15</sup> Yudaq byu pé gi, haù Yhumsing Yesuq

eq myiqhtoí pé lé sat pyám kôluí, ngamoq lé le hkat htoq akô. Yangmoq gi, Garai Gasang a ô nau é hkyô kut é bang, byù lunglhang eq gyè dut é bang nghut akô.

<sup>16</sup> Tungbaù pé hkyi yù hui rá matú, ngamoq hko kyô é hkyô lé, yangmoq hkûm akô; yangmoq gi, hkâ-nhâm le, yhumsing é mara lé dik shoq haù đông lhoq jat myô yù akô nghut ri. Haù mù, Garai Gasâng é nhikmo-yô é hkyô gi, yangmoq ahtoq má jé bê nghut ri.

### *Htesaloni Byu Pé Lé Poluq Huí Nau Nyi É Hkyô*

<sup>17</sup> Gumang wui ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi lui, wó myang hui shoq nghû, ngamoq gyai yang shikut nyi lhê.

<sup>18</sup> Nungmoq chyáng ngamoq jé lé naù mù lui, ngò Poluq yang, adàm dàm shikut wú bê; nghut kôlhang, Tsadán gi, ngamoq lé hkûm tang pyâm ri.

<sup>19</sup> Hkâsu mù gâ le, nga-nhùng é Yhumsing Yesuq Hkrisduq é hí má, Yang jé lé é hkûn, ngamoq é myit myoqbyù hkyô, gabú hkyô eq gumrông rá janmaù gi, haì jung wá nghut lhê gâ le, nungmoq yang nghut nyi lhê a nghut kó lú?

<sup>20</sup> Gè gè yang, nungmoq gi, ngamoq é gumrông jowò eq gabú hkyô nghut nyi ri.

## 3

<sup>1</sup> Haù mù lui, ngamoq gi, haù lé a wó jân nyi lo jáng, Ahten myuq má ngamoq baù nyi gyó le je gè rá nghut lhê nghû, myit hpyit yù mù,

<sup>2</sup> wuìhke jamjau shí pé é yanmai, ó yuq le, myit a hten kó sháng gaq nghû, nungmoq é lumjìng hkyô má, nungmoq lé wum-o byi rá eq myit wum byi rá matú,

<sup>3</sup> Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhùng gi, wuìhke jamjau pé hui zo rá matú, hkyin to hui é bang nghut é lé, nungmoq yang rago sê nyi lhê.

<sup>4</sup> Nga-nhùng gi, zing-ri hui zo rá nghut lhê nghû, ngamoq, nungmoq eq rahá nghut nyi é hkûn, noq mai nungmoq lé

ngamoq taí kyô nyi gù nghut bê. Nungmoq rago sê é eq rajung za, haú dông dut bê nghut ri.

<sup>5</sup> Hau é yanmai, ngò a wó jân nyi lo jáng, haú gunglaú sù mai nungmoq lé gunglaú yû luí, ngamoq wùn waq bê muzó gi, akôm dut byuq râ lé, myit chiq mù, nungmoq é lumjíngh hkyô lé wó sé râ matú, yhang lé ngò nhang kat é nghut lhê. Gunglaú sù gi, nat Tsadán nghut lhê.

### *Timohti Lo Shit Kyô É Wum Byi Dang*

<sup>6</sup> Ahkuí kúm, Timohti gi, nungmoq é lumjíngh hkyô eq chyitdap myit eq sêng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bûn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taí kyo bê nghut ri.

<sup>7</sup> Haú mù luí, gumang wuè ê, ngamoq myit myo uhkyí é hkyô eq zing-ri huí é hkyô pé banshoq má, nungmoq é lumjíngh hkyô é yanmai, nungmoq eq sêng luí myit wum byí é hkyô lé ngamoq wó yû bê nghut lhê.

<sup>8</sup> Ahkuí, ngamoq gi, haú Yhumsîng má nungmoq yap gîng nyi kô é yanmai, gè gè nyi ngón bê nghut lhê.

<sup>9</sup> Nga-nhûng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju ûng hkya-on râ lhú?

<sup>10</sup> Ngamoq gi, nungmoq lé dum myàng râ matú eq, nungmoq é lumjíngh myit má langhpyut é hkyô lé wó lhoq hkúm byi râ matú, nyí, myín, gyai yhang lhumsuzi luí kyûdûng nyi lhê.

<sup>11</sup> Nungmoq chyáng ngamoq lé râ matú, nga-nhûng é Yhumsîng Yesuq eq nga-nhûng é Íwa Garai Gasang yhang ngamoq lé hkyô hpóng byi sháng gaq.

<sup>12</sup> Nungmoq lé ngamoq chyitdap nyi é su, haú Yhumsîng gi, nungmoq é chyitdap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyíng byi sháng gaq.

<sup>13</sup> Nga-nhûng é Yhumsîng Yesuq gi, Yhâng é chyoiyúng bang banshoq eq rahá lé é hkûn, nga-nhûng é Íwa Garai Gasâng é hí má, nungmoq gi, mara hûn jowò a joq é eq chyoiyúng é bang dut râ matú, nungmoq é myit nhiklum má, haú Yhumsîng mai wum-o lhoq kîng byí nyi sháng gaq. Yhâng é chyoiyúng bang gâ é gi, byù lé, a nghut jáng, maumang lagyô pé lé, taí záng lhê.

## 4

### *Garai Gasang Ô Nau É Dông Asak Dui Râ Hkyô*

<sup>1</sup> Xoq luí taí nau é gi, gumang wuè ê, ngamoq gi, ahkuí nungmoq cháng nyi é eq rajung za, nungmoq hká dông nyi yap luí, Garai Gasang lé gabú nhâng râ hkyô nungmoq lé mhoqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat râ matú, Yhumsîng Yesuq má nungmoq lé dúng tôngbán luí, myit wum byi kat lhê.

<sup>2</sup> Hkâsu mù gâ le, nungmoq gi, haú Yhumsîng Yesuq é ahko ahkáng dông, ngamoq mai, nungmoq lé mhoqshit to byí é hkyô pé lé, sê akô nghut ri.

<sup>3</sup> Garai Gasang ô nau é hkyô gi, haú nungmoq sân-yúng é huí râ matú le, ashop é dông gungsho zùm yap é hkyô lé koi pyám râ matú le;

<sup>4</sup> nungmoq yuq hkangmó gi, haú Garai Gasang lé a sê é, a lumjíngh bang kut é su, gungsho yut yut ô nau é hkyô a châng e za,

<sup>5</sup> haú chyoiyúng é eq hkungga gíng é sù wó dut shoq, yhumsîng gùng lé wó hkang é hkyô mhoq yû râ matú le;

<sup>6</sup> shí hkyô eq sêng luí, ó yuq le, yhumsîng é gumang lé, a ge shut, a ge lhûngzo râ matú le nghut lhê. Ngamoq, nungmoq lé taí kyo mù, lhoq pun lhoq kyíng gù nghut bê eq rajung za, haú Yhumsîng gi, haú hkyô shut é banshoq lé, dam byi râ nghut lhê.

<sup>7</sup> Hkâsu mù gâ le, Garai Gasang gi, nga-nhûng lé a sân-yúng é bang dut râ matú wut yu é a nghut, chyoiyúng é dông asak dui nyi râ matú sheq wut yu é ru nghut lhê.

<sup>8</sup> Haú mù luí, mhoqshit hkyô shí lé he-ngik pyâm é sù gi, byù lé he-ngik é a nghut,

haû nungmoq lé, Yhâng é Chyoiyúng Woiní byí tô é sù, Garai Gasang lé he-ngik pyâm é sheq ru nghut lhê.

<sup>9</sup> Rayuq eq rayuq chyitdap lhum râ matú, nungmoq yhang, Garai Gasâng èq mhoqshít é hui bekô nghut é yanmai, gumang yhangchang chyitdap lhúm é hkyô eq séng luí, ngamoq gi, nungmoq chyáng kê kat byí a ra lo nghut ri.

<sup>10</sup> Haû eq rajung za, nungmoq gi, Make-doni mau gón mâ é gumang wuì banshoq lé chyitdap nyi akô nghut ri. Nghut kôlhang, gumang wuì ê, haû su je myo kut râ matú nungmoq lé ngamoq wum byí lhê.

<sup>11-12</sup> Nungmoq é nyí wui lhê é asak dui hkyô má, gotú byu pè èq hkunggâ é wó yú luí, ó yuq lé le, lumhkaû a ra wó dut sháng gaq, hí hkûn nungmoq lé ngamoq taí kyô tô é eq rajung za, num num byù zè râ hkyô lé le, yhumsing eq a séng é hkyô a kut wún râ lé le, yhumsing loq èq zui saí mù nyi râ lé le, nungmoq é myit myoqbyù jowò kut yú keq.

### *Haû Yhumsing Gyó Lé Râ Hkyô*

<sup>13</sup> Gumang wuì ê, myit myoqbyù hkyô a wó é byù góbang su, nungmoq, iyon ningtsáng a dut kó sháng gaq, haû yhup ngón byuq é bang eq séng luí, nungmoq a sé râ lé, ngamoq a ô nau é nghut lhê. Yhup ngón byuq é bang gâ é gi, lumjínng luí shi ló byuq é bang lé gâ é nghut lhê.

<sup>14</sup> Hkâsu mù gâ le, Yesuq shí luí, dum dui toq bê hkyô lé nga-nhúng lumjínng é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé râ nghut lhê nghú, nga-nhúng lumjínng é nghut lhê.

<sup>15</sup> Haû Yhumsing taí é dang eq rajung za, nungmoq lé ngamoq taí kyo kôlé, haû Yhumsing dum lé é hkûn, asak dui nyi é eq myit gyo tô é bang nga-nhúng gi, yhup ngón byuq bê bâng htoq ratsuí le wó hí râ a nghut.

<sup>16</sup> Hkâsu mù gâ le, haû Yhumsing yhang gi, htê mó hkunmó èq le, maumang lagyo mó é hte èq le, Garai Gasâng é tutmó mut hte èq le, mauhkung mai gyó lé lô luí, haû Hkrisduq má shi ló bê bang hí dui toq râ nghut lhê.

<sup>17</sup> Hau htâng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui luí, maulat má haû Yhumsing eq hui râ nghut lhê. Haú hkûn, nga-nhúng gi, haû Yhumsing eq ahtum abyuq nyi nyi berâ nghut lhê.

<sup>18</sup> Haû mù luí, nungmoq gi, dang shí pé mai rayuq eq rayuq myit wum byí lhúm nyi keq.

## 5

<sup>1</sup> Nghut kôlhang, gumang wuì ê, ahkyíng buinyi eq séng luí, nungmoq lé ngamoq kê hún byi a ra lo nghut ri.

<sup>2</sup> Hkâsu mù gâ le, haû Yhumsing é buinyi gi, myín lé hkau sù wang é su jé lé râ nghut é hkyô lé, nungmoq rago za sé akô nghut ri. Yhumsing é buinyi gi, Yesuq dum jé lé râ buinyi lé taí nau é nghut lhê.

<sup>3</sup> Byu pé gi, 'Nguingón yuqyo ri.' ga taí nyi bùm kô é u lé, gùng laí é myiwe rayuq zohkû-nò no lo é su, htên byoq hkyô gi, byodàn tung yhangmoq chyáng jé luí, hká dông lé yhangmoq wó hfang lut kó râ a nghut.

<sup>4</sup> Nghut kôlhang, gumang wuì ê, nungmoq gi, mauchut hkaû má nyi é bang a nghut é yanmai, buinyi haû gi, hkau sù lé é su, nungmoq é matú byodàn tung dut râ a nghut.

<sup>5</sup> Nungmoq lhunglhâng bang gi, maubó é yhangzô pé eq nyí é yhangzô pé nghut lhê. Nga-nhúng gi, myín eq mauchut hkaû eq séng é bang a nghut.

<sup>6</sup> Haû mù luí, nga-nhúng gi, byù góbang su a yhup nyi e za, machyâ luí, gyíng gyíng kut nyí sháng.

<sup>7</sup> Hkâsu mù gâ le, yhup é bang gi, myín lé yhup akô; î shuq wut é bang le, myín lé shuq wut akô.

<sup>8</sup> Nghut kôlhang, nga-nhúng gi, nyí eq séng lhê nghut é yanmai, gyíng gyíng kut nyí luí, lumjínng myit eq chyitdap myit lé gi, wànggò-long lé su gò to, hkyi yù hui râ lé myit myoqbyù tô é hkyô lé gi, shamtoqmuq lé su tsung to, kut sháng.

<sup>9</sup> Hkâsu mù gâ le, Garai Gasang gi, Yhâng nhikmo-yô é hkyô lé hkâm zo râ matú, nga-nhúng lé hkyin tô é a nghut e za, nga-nhúng é Yhumsing Yesuq Hkrisduq mai, hkyi yù



hkyô lé nga-nhúng wó yû râ matú hkyin to bê nghut lhê.

<sup>10</sup> Yesuq gi, nga-nhúng yhup bún nyi kôlhang, yhup ngón to kôlhang, Yhang eq rahá wó nyi nyi sháng gaq ga, nga-nhúng é matú shî hkám byi bê nghut ri.

<sup>11</sup> Haû mù luî, nungmoq gi, ahkuî, nungmoq kut nyi é eq rajung za, rayuq eq rayuq myit wum byî lhum mù, htuqluq htuqbáng kut lhûm nyi keq.

### *Ló Htâng Lhê É Mhoqshit Hkyô*

<sup>12</sup> Gumang wuî ê, nungmoq mâ é muzó shikut luî, haû Yhumsîng má nungmoq lé up nyi é eq lhoq pun lhoq kyîng nyi é bang lé, nungmoq hkungga râ matú lé;

<sup>13</sup> yhangmoq zui saî é muzó jizó é yanmai, yhangmoq lé chyitdap myit dông gyai yhang hkungga râ matú le, nungmoq lé ngamoq sang kat lhê. Nungmoq le, rayuq eq rayuq nguingón lhûm nyi keq.

<sup>14</sup> Gumang wuî ê, nungmoq lé ngamoq wum byî kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkanqmó lé, i-myit hîng byî nyi keq;

<sup>15</sup> ó yuq lé nghut kôlhang, a ge é hkyo é yanmai, a ge é dông a taû kut râ lé lhoq pun lhoq kyîng nyi keq; nungmoq rayuq eq rayuq le, góbang banshoq eq le, shikut luî, hkâ-nhám le, ge é hkyô kut byî lhum nyi keq.

<sup>16</sup> Hkâ-nhám le, ru gabú nyi keq;

<sup>17</sup> abyit alan kyúđung nyi keq;

<sup>18</sup> hkyô hkat hkanqmó má jeju hkya-ôn nyi keq, hkâsu mù gâ le, haú pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

<sup>19</sup> Haû Woi-nyí lé hkâlhoq jôm pyám kó;

<sup>20</sup> myiqhtoi htoî é lé, haî su a ngàm hkâkut kó.

<sup>21</sup> Jung hkanqmó lé, chyam wú luî, ge é hkyô lé zui zing nyi mù,

<sup>22</sup> agè ashop é hkyô hkanqmó lé, koi pyám keq.

<sup>23</sup> Nguingón hkyo é apûn awang nghut é Garai Gasang yhang, nungmoq lé, lunglhang lhoq sân-yúng pyám byi sháng

gaq; nga-nhúng é Yhumsîng Yesuq Hkrisduq dum lé é hkûn, nungmoq é woi-nyí, myit nhiklum, gungdu gi, mara hûn râ hkyô a bò sháng gaq.

<sup>24</sup> Nungmoq lé ji yu é Sû gi, lhumzui é Sû nghut lhê mù, Yhang, shí hkyô lé kut râ nghut lhê.

<sup>25</sup> Gumang wuî ê, ngamoq é matú kyû bo dung byi kó laq.

<sup>26</sup> Gumang wuî banshoq bang lé, chyoiyúng é chyitpuq puq é dông bo shi-kyám byi kó laq.

<sup>27</sup> Gumang wuî banshoq bang lé, hun kat é laiká shî nghap kyo râ matú, haû Yhumsîng é myîng mai, ngò, nungmoq lé pying kat lhê.

<sup>28</sup> Nga-nhúng é Yhumsîng Yesuq Hkrisduq é jeju gi, nungmoq chyáng ru joq nyi sháng gaq ô!

## HTESALONI Pê Chyáng Htang Dàm Hun Kat é Laiká (2 Thessalonians)

<sup>1</sup> Ngò Poluq eq Sila, Timohti pé gi, nga-nhông é Íwa Garai Gasang eq Yhumsing Yesuq Hkrisduq má nghut nyi bê bang, haû Htesaloni wà mó byu pê é noqkuq hpúng lé dang kyô kat lhê.

<sup>2</sup> Haû Íwa Garai Gasang eq Yhumsing Yesuq Hkrisduq chyáng mâ é jeju eq ngu-ingón hkyô gi, nungmoq chyáng ru joq nyi sháng gaq ô!

### *Jeju Hkya-on É Eq Kyûdùng É Hkyô*

<sup>3</sup> Gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri; haû gi, gíng lhê; hkâsu mù gâ le, nungmoq é lumjínng myit gi, je je kô jat lo nyi luí, nungmoq yuq hkanngmó é chyitdap myit le, rayuq eq rayuq é ahtoq má je myô jat lo nyi é yanmai nghut lhê.

<sup>4</sup> Haû mù luí, ngamoq gi, nungmoq zing-ri huí é hkyô pé eq wuîhke jamjau huí é hkyô pé banshoq lé, nungmoq wó jân nyi kô é yanmai, nungmoq é hkam jan hkyô eq lumjínng hkyô lé, Garai Gasang é noqkuq hpúng pé é hí má gumrong nyi lhê.

<sup>5</sup> Shí hkyô banshoq gi, haû Garai Gasang dingmán é dông jéyáng é hkyô lé saksé tân shit é nghut lhê; haû mù luí, nungmoq gi, Garai Gasang é mingdán é matú wuîhke jamjau hui zo bekô nghut é yanmai, mingdán haû eq gingdán é bang gâ é hui kó râ nghut lhê;

<sup>6</sup> Garai Gasang gi, tengmán Sû nghut lhê; haû mù, nungmoq lé jamjau byí é bang lé, Yhang mai jamjau byi râ eq.

<sup>7</sup> jamjau huí nyi é bang nungmoq lé le, ngamoq lé le lhoq lhut byi râ nghut lhê. Shí hkyô gi, haû Garai Gasang lé a sê é bang eq nga-nhông é Yhumsing Yesuq eq sêng é gabú danglú lé a gyo a châng é bang lé, jéyáng râ matú,

<sup>8</sup> haû Yhumsing Yesuq, wum-o a-tsam byíng é Yhang é maumang lagyô pé eq rahá,

myishâm eq mauhkông mai htoq shit é hkûn, dut râ nghut lhê.

<sup>9</sup> Yesuq jé lé lô mù, Yhang é chyoiyúng bang má hpungwup shingkang wó yu é eq lumjínng bang banshoq mai mauhong é huí é buinyi má, yhangmoq gi, htên byoq hkyô lé ahtum abyuq jéyáng é hui zo kó râ nghut lhê.

<sup>10</sup> Hau htoq agó, haû Yhumsing é hí mai le, Yhang é a-tsam kô làm é mai le, lhoq kâng pyâm é hui kó râ nghut lhê. Ngamoq é saksé dang lé nungmoq lumjínng bekô nghut é yanmai, haû lumjínng bang má nungmoq le lòm bekô nghut lhê.

<sup>11</sup> Haû mù luí, nga-nhông é Garai Gasang gi, nungmoq lé, Yhang ji yu é hkyô eq gingdán ri ga râ le, haû Yhang é wum-o a-tsam mai, nungmoq myit tô é ge é hkyô hkanngmó eq nungmoq é lumjínng myit eq sêng é muzó lhumjup lé, lhoq dik byi sháng gaq nghû le, nungmoq é matú, hkâ-nhám le, ngamoq kyûdung byi nyi lhê.

<sup>12</sup> Ngamoq haû su dung byi nyi é hkyô gi, nga-nhông é Garai Gasang eq Yhumsing Yesuq Hkrisduq é jeju yanmai, haû nga-nhông é Yhumsing Yesuq é myíng gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó râ matú nghut lhê.

## 2

### *A Tara É Sû*

<sup>1</sup> Gumang wui ê, haû nga-nhông é Yhumsing Yesuq Hkrisduq dum lé râ hkyô, Yhang eq nga-nhông rahá zup nyi to râ hkyô eq séng luí, nungmoq lé ngamoq pyíng kat nau é gi,

<sup>2</sup> haû Yhumsing é buinyi gi, jé to gù nghut bê gâ é myiqhtoi dang, luhkyang, laiká pé rajung jung, ngamoq chyáng mâ é nghut lhê ga nungmoq chyáng jé é nghut jáng, nungmoq é myit lui za hkâduí kó, hkâgyuq dàn kó.

<sup>3</sup> Hkâsu mù gâ le, haû htên byoq é yhangzo nghut é a tará Sû htoq shit luí, haû gumlau toq é hkyô hí a htoq htoq gi, buinyi haû jé râ a nghut, haû mù luí, nungmoq lé, ó yuq èq, hká dông mai mhaú kôlháng hkájíng kó.

<sup>4</sup> Haú yuq gi, Garai ga noqkuq huí é zè lhungháng lé htuq htíng luí, haú pé banshoq é htoq má yhânggùng yhang lhoq gyaú yû râ nghut lhê; haú mù luí, Garai Gasâng é noqkuq yhûm má zung to luí, yhânggùng yhang Garai Gasang nghut lhê ga taí râ nghut lhê.

<sup>5</sup> Ngò gi, nungmoq eq rahá nyi tô é hkûn, shí hkyô pé lé lhaq taí kyo kyo kut é hkyô lé, nungmoq a bun lo kó lúhú?

<sup>6</sup> Haú yuq gi, ahkýing yam-yoq jé jáng sheq htoq shit sháng gaq ga, ahkuí, yhang lé hai èq hkûm zing tô é hkyô lé, nungmoq sê lhê.

<sup>7</sup> Haú a tara é hkyo é haq dá é a-tsam gi, mù zui nyi gù nghut bê; nghut kôlhang, haú lé hkûm zing nyi sù gi, hui htot pyám huí é hkûn jé shoq, haú lé hkûm zing nyi shirâ nghut lhê.

<sup>8</sup> Haú hui htot pyám huí é hkûn, a tarâ Sû htoq shit râ nghut lhê; haú Yhumsîng Yesuq kúm gi, Yhâng nhut mâ é soq èq yhang lé sat pyám râ eq, Yhang gyó lo u lhê é hpungwup mó èq, yhang lé lhoq htên pyám râ nghut lhê.

<sup>9</sup> Haú a tarâ Sû lé lo é gi, Tsadán a-tsam đông laklaí kumlhá pé, kumlhá pé, mauhpo muzó pé ajung jung kut mhaú é eq,

<sup>10</sup> htên byoq huí nyi é bang lé mhaú zo râ agè ashop é hkyô jung hkangmó lé tân shit râ nghut lhê. Yhangmoq htên byoq é gi, haú tengmán hkyô lé chyitdap luí hkyi yù hui râ nghut é hkyô lé he-ngik pyám kô é yanmai nghut ri.

<sup>11</sup> Hau é yanmai, Garai Gasang gi, haú tengmán hkyô lé a lumjîng e za agè ashop hkyô má ô nau é lhunghâng bang mara byí é hui kó sháng gaq ga,

<sup>12</sup> mhaú é dang lé jîng kó râ matú, a-tsam mó bo é lum shut râ hkyô lé, yhangmoq chyáng nhâng byi bê nghut ri.

### *Mhoqshit é hkyô má gîng nyi râ hkyô*

<sup>13</sup> Nghut kôlhang, haú Yhumsîng chyitdap é gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri. Hkâsu mù gâ le, haú Woi-nyí èq lhoq sân-yúng nyi é muzó đông le, tengmán hkyô lé lumjîng é đông le, hkyi yù hui râ matú, Garai Gasang gi, nungmoq lé, sân-hi mai hkyin yù bê nghut ri.

<sup>14</sup> Yhang gi, nga-nhûng é Yhumsîng Yesuq Hkrisduq é hpungwup shingkang má, nungmoq wó bo lôm shoq ga, ngamoq é gabú danglù đông nungmoq lé shí hkyô má ji yù bê nghut lhê.

<sup>15</sup> Haú mù luí, gumang wui ê, nhutdang đông nghut nghut, laiká đông nghut nghut, nungmoq lé ngamoq hai byí é mhoqshit hkyô lé zui gîng nyi luí, gîng gîng yap nyi keq.

<sup>16</sup> Yhâng é jeju yanmai, nga-nhûng lé, ahtum abyuq é myit wum byi hkyô eq ge é myit myoqbyù hkyô lé byí é, nga-nhûng lé chyitdap é, nga-nhûng é Íwa Garai Gasang eq nga-nhûng é Yhumsîng Yesuq Hkrisduq gi,

<sup>17</sup> nungmoq é i-myt má wum byi luí, ge é muzó eq ge é nhutdang lhumjup má, nungmoq lé wum-o lhoq kîng byi sháng gaq ô!

## 3

### *Kyû Dung Byi Râ Matú Lung Kat É Hkyô*

<sup>1</sup> Gumang wui ê, je htâng má pying kat nau é hkyô gi, nungmoq chyáng dut wú bê eq rajung za, haú Yhumsîng é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo dung byi kó laq.

<sup>2</sup> Yuq hkangmó gi, lumjîng myit bo é a nghut é yanmai, haú achayut agè ashop é byu pê chyáng mai ngamoq wó lut râ matú le, kyû bo dung byi kó laq.

<sup>3</sup> Nghut kôlhang, haú Yhumsîng gi, lhumzui é sù nghut é yanmai, Yhang nungmoq lé wum-o lhoq kîng byi mù, haú agè ashop su chyáng mai nungmoq lé hung yù râ nghut lhê.

<sup>4</sup> Nungmoq gi, ngamoq pying tô é dang pé lé kut nyi mù, xoq luí le kut nyi râ nghut lhê nghû, haú Yhumsîng má ngamoq hkyak myit lum tô lhê.

<sup>5</sup> Haú Yhumsîng gi, nungmoq lé Garai Gasâng é chyitdap hkyô eq Hkrisduq é hkam jân é hkyô má, shuí wàng sháng gaq ô!

### *Mù Zui Shikut Râ É Hkyô*

<sup>6</sup> Gumang wui ê, ngamoq gi, ngamoq chyáng mai nungmoq hap yù bê ngamoq

mhoqshit é hkyô dông a nyi yap é eq lagôn é gumang ó yuq eq le, we we nyi keq nghû, haû Yhumsîng Yesuq Hkrisduq é myîng mai nungmoq lé hkunmó hkyô kat lhê.

<sup>7</sup> Hkâsu mù gâ le, ngamoq kut é alik lé hká dông cháng râ dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó,

<sup>8</sup> ó yuq é zoshuq lé le, ngùn a byî é a zo wú é nghut lhê. Nungmoq má ó yuq lé le wòlai a byi sháng gaq nghû, ngamoq gi, muzó shikut hkyô eq wuîhke hkyô má, nyí lé, myín lé, zui saí é nghut lhê.

<sup>9</sup> Ngamoq gi, nungmoq lé garúm nhâng râ ahkáng a wó é a nghut, yhumsing gùng lé nungmoq cháng râ matú alik dut sháng gaq nghû sheq, haû su kut é ru nghut lhê.

<sup>10</sup> Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

<sup>11</sup> Hkâsu mù gâ le, nungmoq chyáng mâ é byù ra-am lagon luî, haî mù le a zuî e za, mù châng lhoq gyô byî wún akô gâ é hkyô lé, ngamoq wó gyô é yanmai nghut lhê.

<sup>12</sup> Ngamoq gi, haû su kut é bang lé, zim za nyi mù zui saí luî, yhumsing é zoshuq ho nyi kó sháng gaq nghû, haû Yhumsîng Yesuq Hkrisduq é myîng lé lang luî, hkunmó hkyô kat mù, wum byî kat lhê.

<sup>13</sup> Gumang wuî ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

<sup>14</sup> Byù rayuq yuq gi, laiká shî má ngamoq mhoqshit é hkyô lé, a châng é nghut jáng, haû yuq lé rago chôm matsîng yù mù, yhang hoq bun sháng gaq, yhang eq hkâzûm yap kó.

<sup>15</sup> Nghut kôlhang, yhang lé gyè rayuq dông a sôn e za, gumang rayuq dông lhoq pun lhoq kyîng nyi keq.

<sup>17</sup> Ngò, Poluq gi, ngá é loq mai yhang shi-kyám dang shî lé kê kat lhê; shî gi, ngò kê é laiká banshoq má kumlhá nghut lhê. Ngò kê é gi, shí dông chyat nghut lhê.

<sup>18</sup> Nga-nhûng é Yhumsîng Yesuq Hkrisduq é jeju gi, nungmoq banshoq bâng chyáng ru joq nyi sháng gaq ô!

### *Ló Htâng Lhê É Shi-kyám Dang*

<sup>16</sup> Haû nguîngón hkyô é Yhumsîng yhang gi, ahkyîng hkangmó eq hkyô hkat hkangmó má, nungmoq lé nguîngón hkyô byî nyi sháng gaq. Haû Yhumsîng gi, nungmoq banshoq bang eq ru nyi nyi sháng gaq.

## TIMOHTI Chyáng Hî Dàm Hun Kat é Laiká (1 Timothy)

<sup>1</sup> Nga-nhông é hkyi yù Sû Garai Gasang eq nga-nhông é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngô Poluq gi,

<sup>2</sup> haù lumjín hkyô má ngá zo sîng nghut sù, Timohti lé dang kyô kat lhê; haù Îwa Garai Gasang eq nga-nhông é Yhumsîng Hkrisduq Yesuq chyáng mâ é, jeju eq shogyo nhikmyîn hkyô, nguínón hkyô gi, náng chyáng ru joq nyî sháng gaq ô.

### *Sará Pyoq Pé Lé Sidiq Râ Hkyô*

<sup>3</sup> Ngò, Makedoni mau má jé wang ló é hkûn, pying to hkô é eq rajung za, Ehpesu myuq má nyi to shi aq; haù hkûn sheq, nàng gi, shut shai é mhoqshit hkyô lé mhoqshit é bang a mhoq xoq lo râ matú le,

<sup>4</sup> myit htoq mhô-myi dang eq a dat htûm é byù xik labaù má yhangmoq a ap nóng râ matú le, haù bang lé hkunmó wó hkyô râ nghut lhê. Haù hkyô pé gi, lumjín myit mai kut htoq é Garai Gasâng é muzó lé lhoq htoq râ malaî, mabyoq jishûm za sheq lhoq htoq nyi é nghut lhê.

<sup>5</sup> Haù hkunmó hkyô luí myit myoqbyu tô é hkyô gi, chyitdap myit yhang nghut ri; chyitdap myit haù gi, sansêng é i-myt, mara a bò bûn é myit eq lumjín myit akying mai lo é nghut lhê.

<sup>6</sup> Byù ra-am gi, haù hkyô pé mai htoq ló kôluí, dangsôm taí é hkyô shut lhing ló byuq bekô nghut ri.

<sup>7</sup> Haù bang gi, jep é tarâ sará pé dut nau kôlhang, yhangmoq haí taí nyi é hkyô lé le, hkyak, haí lé mhoqshit é hkyô lé le, a sé kó nghut ri.

<sup>8</sup> Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhông sê lhê.

<sup>9</sup> Haù jep é tarâ gi, dingmán bâng é matú tô tô é a nghut e za, tarâ lu laí é bang eq gumlau toq bâng é matú, tarâ a hkunggá

é bang eq mara kut bâng é matú, a chyoiyúng é bang eq lumjín hkyô a cháng bâng é matú, yhangmoq é yhangwa lé nghut nghut, yhangnu lé nghut nghut, sat pyám bâng é matú, byù sat bâng é matú,

<sup>10</sup> ashop é đông gungsho zùm yap é bang eq yuqgè yhangchang nyi zo lhum bâng é matú, jùn đông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhûm é lhunglhang bâng é matú sheq, jep é tarâ tô tô é nghut é lé, nga-nhông sê lhê.

<sup>11</sup> Tengmán mhoqshit hkyô haù gi, hkungsô wó é Garai Gasâng eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

### *Poluq Chyáng Yhumsing É Jeju Joq Nyi É Hkyô*

<sup>12</sup> Ngò gi, ngo lé wum-o byi é, nga-nhông é Yhumsîng Hkrisduq Yesuq lé jeju hkyaôn lhê; hkâsu mù gâ le, Yhang gi, ngo lé lhumzui sù rayuq đông sôn yù luí, Yhâng é muzó jizó má hkyin kat yu é yanmai nghut lhê.

<sup>13</sup> Hí hkûn, ngò gi, Garai Gasang lé taí hpoi sù, zing-ri sù eq byù rhoi sù nghut wú kôlhang, a sé shi mù lumjín myit a bo e za kut é yanmai, shogyo nhikmyîn yu é hkyô lé ngò wó yu é nghut lhê.

<sup>14</sup> Nga-nhông é Yhumsîng é jeju lé le, Hkrisduq Yesuq eq sêng é lumjín myit eq chyitdap myit lé le, ngá chyáng agùn agó hut hkyô kat byi bê nghut ri.

<sup>15</sup> Yubak dap bang lé hkyi yù râ matú, Hkrisduq Yesuq gi, mîngkan má jé lé bê gâ é dang gi, lumjín é mungdang nghut luí, gè gè yhang lhom yù gíng é dang nghut lhê. Haù yubak dap bang má, ngò gi, yubak je ko sù nghut é nghut lhê.

<sup>16</sup> Nghut kôlhang, Hkrisduq Yesuq gi, Yhang lé lumjín luí ahtum abyuq é asak lé wó yù râ bâng é alik dut râ matú, yubak dap bang má yubak je ko sù nghut é, ngá é ahtoq má, Yhâng é hkam jan hkyô lhunglhang wó tûn shit sháng gaq ga, Garai Gasang gi, ngo lé shogyo nhikmyîn yu ri.

<sup>17</sup> Haù mù, haù aróng eq hpungwup shingkang gi, ahtum abyuq é, a dat htên byoq é, myoq eq a byu-myang é Hkohlâm nghut sù, rayuq zâ é Garai Gasâng chyáng

pyat dedu ahtum abyuq ru joq nyî sháng gaq ô! Amen.

<sup>18</sup> Ngá zo Timohti ê, nàng eq séng luî myiqhtoi dang joq wú é eq rajung za, ngò gi, nang lé haú dông mhoqshit kat lhê; haú mù, nàng gi, haú pé lé chung nyî luî, ge é majan zan mù,

<sup>19</sup> lumjǐng myit eq mara a bò bûn é myit bo nyî sháng gaq. Byù ra-am gi, haú hkyô pé lé he-ngik pyám kô é nghut luî, yhangmoq é lumjǐng myit gi, wuî-sanghpo htên byoq ló é su htên byoq byuq bekô nghut ri.

<sup>20</sup> Haú bang má, Humenu eq Alesander le bò kômù, Garai Gasang lé taí hpoî é dang a taí râ matú mhoq yù kó sháng gaq nghû, ngò, yhangnhik lé Tsadán é loq má ap pyám bê nghut lhê.

## 2

### *Noqkuq Hkyô Eq Séng Luî Mhoqshit Byî É Hkyô*

<sup>1</sup> Haú mù luî, ngò, hí pying kat nau é gi, tarâ hkunggâ é eq hkungga gíng é hkyô banshoq má, nga-nhúng wó ngu-ingón yuqyo nyî sháng gaq, hkohkâm pé eq ahkáng ayá wó bang banshoq é matú le,

<sup>2</sup> yuq hkangmó é matú le, dúng tôngbán byi, kyûdung byi, dúng xoq byi, jeju hkyan on byi, kut aq nghû nau ri.

<sup>3</sup> Haú gi, ge é hkyô nghut mù, nga-nhúng é hkyi yù Sû Garai Gasang ô nau é hkyô nghut ri.

<sup>4</sup> Yhang gi, byù lhunglhâng bang hkyi yu é hui mù, tengmán é mungdang lé sê gyo râ lé, ô nau nyi ri.

<sup>5</sup> Hkâsu mù gâ le, Garai Gasang gi, rayuq za nghut luî, Garai Gasang eq byu é gyoro má sô xoq byi sù le rayuq za nghut lhê; haú yuq gi, xângzo byù nghut é Hkrisduq Yesuq nghut ri.

<sup>6</sup> Yhang gi, byù lhunglhâng bâng é matú shihtai gunglik hkungga dông Yhânggùng lé byî pyám bê nghut ri; haú gi, ahkyíng yamyoq jé é hkûn, saksé htoq shit bê nghut lhê.

<sup>7</sup> Ngò gi, tûngbàu pé lé, tengmán é lumjǐng hkyô mhoqshit râ matú, hkô kyo sù rayuq eq lagyo rayuq dông hkyin tô é hui sù nghut lhê. Ngò, haú su taí é gi, mhaú taí é a nghut, têng é hkyô lé za taí nyi é ru nghut lhê.

✧ 2:15 Apûn 3:16

<sup>8</sup> Yuqgè wuî gi, nhikjum yô é hkyô eq dang htíng htíng lhûm é hkyô a bo e za, jowò hkangmó má chyoyúng é loq tú mù kyûdung râ lé, ngò ô nau ri.

<sup>9</sup> Myiwe wuî gi, xâm nik nik é, hîng zè, palhé, hpaû jung mebû èq a mhôn chung e za, siri bo é mebu wut chûng mù, tap tap za, shuq shuq za kut luî,

<sup>10</sup> Garai Gasang lé noqkuq é myiwe wuî eq gíng shoq, ge é muzó èq yhumsing gùng lé mhôn nyi râ lé le, ngò ô nau ri.

<sup>11</sup> Myiwe gi, uphkang tô é dông châng nyi mù, zim za mhoq yù kó sháng gaq.

<sup>12</sup> Myiwe gi, yuqgè lé mhoqshit râ hkyô lé le, yuqgè lé uphkâng râ hkyô lé le, ngò ahkáng a byi; myiwe gi, zim za kut nyi ra râ nghut lhê.

<sup>13</sup> Hkâsu mù gâ le, Adam lé hí hpan to mù, Ewaq lé hpan é ru nghut lhê.

<sup>14</sup> Hau htoq agó, Adam gi, mhaú é hui zo sù a nghut; haú myiwe sheq mhaú é hui zo luî, mara kut shut é ru nghut lhê.

<sup>15</sup> Nghut kôlhâng, myiwe wuî gi, lumjǐng myit, chyitdap myit eq chyoyúng hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é dông mai hkyi yu é hui kó râ nghut lhê.✧

## 3

### *Hpúng-up Eq Hpungtê Kut Râ Bâng É Hkyô*

<sup>1</sup> Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lungíng é dang nghut nyi ri.

<sup>2</sup> Haú mù luî, hpúng-up rayuq gi, mara hûn râ hkyô a bo é sù, myiwe rayuq za wó é sù, dat sidíq é sù, yhumsing gùng lé wó hkang é sù, hkungga gíng é sù, byù bíng lé dat hkulum é sù, dat mhoqshit é sù,

<sup>3</sup> íhpê é jùn a dut é sù, byoq lhum byoq cheq a kut e za nûm é sù, mabyoq jishûm a lhoq htoq é sù, ngunzè lé a chyitdap é sù, nghut râ lhê.

<sup>4</sup> Yhang gi, yhâng é ikun lé rago dat uphkâng luî, yhang zô pé mai hkungga myit bo é èq yhâng dang lé gyo byî é sù le, nghut râ lhê.

<sup>5</sup> Rayuq yuq, yhumsing é ikun lé lháng a dat uphkan é nghut le gi, Garai Gasâng é noqkuq hpúng lé gi, hkâsu kut wó wú gon râ lúh?

<sup>6</sup> Chángzo dut é a myáng shi é sù gi, hpúng-up wó kut râ a nghut, kut é nghut jáng, yhang gi, nghutbùn lò luí, jéyáng é hkyô lé nat Tsadán hui zô é su hui zo abe.

<sup>7</sup> Hpúng-up rayuq gi, tungbaù pè hí má ge é mying wó é sù le dut râ lhê; haù jáng, yhang gi, taí hpoí pyâm é lé le a hui, nat Tsadán é tuihkyó má le a myí, dut râ nghut lhê.

<sup>8</sup> Haù eq rajung za, hpungtê pé gi, hkungga gíng é bang, shô-kó a xân é bang, ìhpê é jùn a dut é bang, a tengmán é amyat lé a ho é bang, nghut râ lhê.

<sup>9</sup> Yhangmoq gi, lumjínng hkyô mâ é nik é mauhpo tengmán hkyô pé lé, sansêng é i-myt eq châng nyí ra râ nghut lhê.

<sup>10</sup> Yhangmoq gi, chyam é lé hí huí wú kó sháng gaq, hau htâng, yhangmoq lé mara hûn râ hkyô haí a bò lo jáng, hpungtê mù lé wùn kó sháng gaq.

<sup>11</sup> Haù eq rajung za, yhangmoq é yhumsing myhí pé le, myit no nhang é dang a taí e za, dat sidiq é eq hkyô hkangmó má lumjínng luí, hkungga gíng é myiwe wui, nghut ra râ dut lhê.

<sup>12</sup> Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut ra râ nghut lhê.

<sup>13</sup> Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjínng hkyô má, gyuq kyum é hkyô a bo é myit mó lé le, hkyak wó yu akô nghut ri.

<sup>14</sup> Ngò gi, hkâ-myháng a myáng má náng chyáng lé jé râ matú, myit myoqbyu to kôlhang, ahkyíng du myáng pyâm le,

<sup>15</sup> Garai Gasâng é ikun hkaù má, byu pé hká dông nyí yap râ é hkyô lé, nàng sé sháng gaq nghû, pying kat é dang shi pé lé ká byí kat lhê; ikun haù gi, rû dui nyí é Garai Gasâng é noqkuq hpúng nghut luí, tengmán hkyo é hkungmó-zíng eq apûn awang nghut ri.

<sup>16</sup> Tarâ hkungga hkyo é zaú tô é hkyô gi, ko dik é nghut é lé, ó yuq le wó he-ngik pyâm é a nghut;

haù gi, Yhang, byù gungsho má htoq shit mù, haù Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri;

byuhú ahú hú má Yhâng é hkyô lé hko kyo mù, Yhang lé mingkan byu pé lumjínng luí, hpungwup shingkan eq Yhang lé mauhkûng shut shuí toq yú bê nghut ri.

## 4

### *Timohti Lé Mhoqshit É Hkyô*

<sup>1</sup> Jihtûm buinyí pé má, byù ra-am gi, lumjínng hkyô mai htak htoq lò luí, mhaú zô é woi-nyí pè htâng cháng kó râ eq nat gang mai lo é mhoqshit hkyô pé lé gyo byi kó râ nghut lhê ga, haù Woi-nyí gi, san za taí ri.

<sup>2</sup> Haù sù é mhoqshit hkyô pé gi, gegùn labyoq kut é byù-mhaù pè chyáng mai lo é nghut lhê; haù bâng é myit nhiklhum gi, nyhê nhe tô é shamtoq eq nyhê man tô é su dut byuq bê nghut ri.

<sup>3</sup> Haù bang gi, hâng lhûm é hkyô lé hkûm tang é hkyô lé le, haù lumjínng luí tengmán hkyô lé sê é bang mai jeju hkya-on mù hap yù ge é, Garai Gasang hpan to byí é zoshuq lé koi pyám nhang é le, kut akô nghut ri.

<sup>4</sup> Garai Gasang hpan tô é lhunglhang gi, ge é chyat nghut ri; Garai Gasâng é mung-dang eq kyûdûng é dang dông haù pé lé lhoq sân-yúng nyí é nghut é yanmai,

<sup>5</sup> jeju hkya-on luí hap yu é nghut le gi, haí jung lé lháng he-ngik pyám râ hkyô a bò nghut ri.

<sup>6</sup> Haù gumang wui lé, nàng haù hkyô pé lhoq pun lhoq kyíng é nghut le gi, nàng gi, haù nàng cháng bê ge é mhoqshit hkyô eq lumjínng hkyô mâ é tengmán hkyô má, kô myhâng sù nàng nghut râ htoq agó, Hkrisduq Yesuq é ge é hpungmù wùn sù le dut râ nghut lhê.

<sup>7</sup> Garai a bo é myit htoq mhô-myi dang eq hpô-myhí mâng pè é mhô-myi dangsôm lé koi pyám luí, tarâ hkunggâ é hkyô má yhumsing gùng lé lhoq kûng yù aq.

<sup>8</sup> Hkâsu mù gâ le, gungsho lé lhoq kûng é hkyô gi, akyû shau za htoq é nghut lhê; nghut kôlhang, tarâ hkunggâ é hkyô kúm gi, jung hkangmó é matú akyû bo lhê nghut

mù luí, shí ipyat má le, htang pyat má le, akyû bo nyi ri.

<sup>9</sup> Haû gi, banshoq hap yù gíng é, lumgíng é mungdang nghut lhê.

<sup>10</sup> Haû mù luí, xângzo byù banshoq bâng é hkyi yù Sû nghut é, je riyhang, lumjíng bâng é hkyi yù Sû nghut é, rû dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gyai yhang shikut nyi lhê.

<sup>11</sup> Haú pé lé, hkunmó hkyó luí mhoqshit byí nyi aq.

<sup>12</sup> Náng é zorâm pyat lé, ó yuq èq le a wú tiq pyám sháng gaq, dang taí é má le, nyi yap é hkyô má le, chyitdap é hkyô má le, lumjíng hkyô má le, sansêng é hkyô má le, lumjíng bâng é matú alik kut shit nyi aq.

<sup>13</sup> Náng chyáng ngò jé lé é buinyi jé shoq, náng gi, Chyúmdang nghap kyô é má le, hko kyô é má le, mhoqshit é má le, ap nóng nyi aq.

<sup>14</sup> Náng gi, hpúng suwún wuî náng é ahtoq má loq ke byí é hkûn, myiqhtoi dang dông nang lé Garai Gasang byí to bê nghut é, woi-nyí hkyô eq sêng é chyunghuq lé, haí su a ngàm hkâkut pyám.

<sup>15</sup> Haú hkyô pé lé, myit zìng zuq luí zui saí nyi aq; náng kô myhang lo é hkyô lé, yuq hkanmó byu-myàng kó sháng gaq, náng gûng banshoq haú pé má ap nóng nyi aq.

<sup>16</sup> Náng é asak dui hkyô má le, náng mhoqshit é hkyô má le, rago sidiq nyi aq. Haú pé má ru gíng nyi aq, hkâsu mù gâ le, náng haú su kut é nghut jáng, náng é asak lé le, náng chyáng mai gyô yu é bang lé le, náng wó hkyi yù râ nghut lhê.

## 5

### *Suwún Wuî, Chuimó Pé, Jùn Pé Eq Séng Luí Hpaqchyí Byí É Hkyô*

<sup>1</sup> Asak kô sù lé dang htân a tân e za, yhumsing é îwa lé su, yhang lé lhoq pun lhoq kying aq. Zorâm wuî lé gi, gumang wuî lé su,

<sup>2</sup> asak kô é myiwe wuî lé gi, înu pé lé su zùm yap luí, zomyi wuî lé gi, nhammó wuî lé su sansêng é i-myit banshoq èq zùm yap nyi aq.

<sup>3</sup> Gè gè yhang garúm râ dut é chuimó myhí pé lé, hkunggâ nyi keq.

<sup>4</sup> Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhum-sing é ikun lé wú gon luí, înu îwa eq îchyí îwhoí pé lé jeju taú é dông, yhangmoq é lumjíng hkyô lé, zui saí é má lhoq mhán nhâng râ lé hí mhoq yù ra râ nghut lhê; hkâsu mù gâ le, haú gi, Garai Gasang ô nau é hkyô nghut ri.

<sup>5</sup> Haû lùm râ ó yuq le a wó mù, gè gè yhang râ tô é chuimó myhí gi, Garai Gasâng chyáng myit myoqbyu nyi luí, nyí, myín xoq xoq kyûdung mù, Garai Gasang garúm râ hkyô lé dúng nyi ri.

<sup>6</sup> Nghut kôlhang, ngón hkyô za cháng luí asak dui é chuimó myhí gi, asak dui nyi kôlhang, shí gù nghut bê nghut ri.

<sup>7</sup> Yhangmoq lé, ó yuq èq le mara a hûn kó sháng gaq, haú hkyô pé lé le mhoqshit byí nyi aq.

<sup>8</sup> Rayuq yuq, yhâng é buinùm ji-myi wuî lé a baú é htoq agó, je luí yhumsing é ikun byù lé a baú é nghut le gi, haú lumjíng hkyô lé he-ngik pyám bê nghut luí, a lumjíng su htoq má je ashop é sù dut bê nghut ri.

<sup>9</sup> Hkyuq xê zàn byíng bê é chuimó myhí za a nghut jáng, chuimó jihpán má wó kat râ a nghut; hau htoq agó, yhang gi, yuqgè rayuq za wó wú é sù;

<sup>10</sup> zoshâng wuî lé hku baú é sù, bíng lé rago dat hkulum é sù, sân-yúng bê bang é hkyí lé chi byí é sù, wuîhke huí tô é bang lé garúm luí, ge é muzó junghkang jungmó má yhumsing gùng yhang ap nóng nyi ri ga, yhang kut é ge é muzó má myìng hú é sù le, nghut râ lhê.

<sup>11</sup> Asak tiq é chuimó myhí pé lé, jihpán haú má hkâkat. Hkâsu mù gâ le, gungsho ô nau é hkyo èq Hkrisduq chyáng yhangmoq ap nóng tô é hkyô lé ung pyám é hkûn, yhangmoq gi, myí ló nau kó râ nghut lhê.

<sup>12</sup> Haû mù, yhangmoq gi, sâng-hi lé yhangmoq tô tô é danggidíq lé lhoq hpyoq pyám kô é yanmai, tarâ darâ é hui zo kó râ nghut lhê.

<sup>13</sup> Hau htoq agó, yhangmoq gi, rayhùm htâng rayhùm châng wang wún kômù, lagôn mán byuq kó râ nghut lhê. Lagôn é bang za dut kó râ a nghut, lumù gansang é bang eq yhangmoq taí a ge é pé lé taí kômù,



yhumsîng eq a sêng é mû má châng wang nyo wún é bang le, dut kó râ nghut lhê.

<sup>14</sup> Haû mù luî, gyè pé mai lumù gansâng dang a wó tai pyám kó sháng gaq, asak tiq é chuimó myhî pé gi, myi ló mù, zoshâng hkû luî, yhangmoq é ikun lé gôn lajang râ matú, ngò, yhangmoq lé hpaqchyî byî kat lhê.

<sup>15</sup> Hkâsu mù gâ le, ra-am gi, lhing taû ló kôluî, Tsadán é htâng châng nyi lugù nghut bekô nghut ri.

<sup>16</sup> Lumjîng é myiwe rayuq yuq gi, yhâng é ikun má chuimó myhî wó é nghut le, haû yuq é matú noqkuq hpúng lé wòlai a hun e za, yhang mai garúm yû ra râ nghut lhê; haû hkûn sheq, noqkuq hpúng gi, gè gè yhang râ tô é chuimó myhî pé lé wó garúm râ nghut lhê.

<sup>17</sup> Haû noqkuq hpúng lé rago za shuî û é hpúng suwún wuî gi, akyû í tú hkam yù gíng lhê; haû mungdang hko é hkyô eq mhoqshit é hkyô má shikut é suwún wuî gi, je riyhang hkam yù gíng lhê.

<sup>18</sup> Hkâsu mù gâ le, "Guq nâng nyi é no lé, nhuttsung hkâ-tsûng to byi." ✧ ga le, "Mû zui sù gi, yhâng é zuihpau wó yû gíng lhê." ✧ ga le, Chyúmdang má tai tô ri.

<sup>19</sup> Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhom yù.

<sup>20</sup> Nghut kôlhang, lhoq pun lhoq kyîng é hkyô lé góbang wó yû kó sháng gaq, mara kut shut é bang lé, shiwa byu pê hí má tân mhoqshit aq.

<sup>21</sup> Pying kat é dang shi pé lé, gamhkui myit a bo e za châng nyi râ eq, myoqdong hkyîn luî haî le a kut râ matú, Garai Gasang eq Hkrisduq Yesuq é hí má le, hkyin yù huî é maumang lagyô pê é hí má le, ngò, nang lé pying kat lhê.

<sup>22</sup> Ó yuq é ahtoq má le loq ke\* byi râ lé hkâhân; góbang é mara hkaû má le hkâbo lòm. Yhumsîng yhang yhumsîng sâ-n-yúng shoq kut nyi aq.

<sup>23</sup> Náng é wamdau ra luî, anum num no lò lò dut é yanmai, nang gi, wuî za shuq é hkyô lé nô pyám luî, tsibiyiq wing le ratsuí tsuí shuq byi aq.

<sup>24</sup> Byù ra-âm é mara pé gi, de de dut é nghut mù luî, tarâ jéyáng é jang má hí ló jé ri; ra-âm é mara kúm gi, hau é htâng má châng byông htoq lo ri.

<sup>25</sup> Haû eq rajung za, ge é muzó pé gi, de de nghut nyi luî, haû su de de a nghut é pé lé le, wó zaú to râ a nghut.

## 6

<sup>1</sup> Jùn dut é wòlai hkaû má nyi é lhunglhâng bang gi, yhangmoq é yhumsîng wuî lé gyaî yhang hkungga gíng lhê nghû, myit yù râ dut lhê; haû hkûn sheq, Garai Gasâng é myîng eq nga-nhûng é mhoqshit hkyô gi, lumù gansang é a huî râ nghut lhê.

<sup>2</sup> Lumjîng é yhumsîng wuî é jùn gi, gumang wuî nghut é yanmai, yhangmoq lé a wú myuq é za, yhangmoq dojaú luî akyû myang hkâm zô é bang gi, lumjîng bang eq chyitdap gíng é bang nghut é yanmai, yhangmoq lé je ge é dông dojaú râ lhê. Shí hkyô pé lé, nang gi, yhangmoq lé mhoq byî nyi é eq lhoq pun lhoq kying byî nyi aq.

### *Ngùn Lé Chyitdap É Hkyô*

<sup>3</sup> Rayuq yuq gi, shut é lumjîng hkyô lé mhoqshit luî, nga-nhûng é Yhumsîng Yesuq Hkrisduq é tengmán mhoqshit hkyô eq tarâ hkunggâ é mhoqshit hkyô lé a myit huî é nghut jáng,

<sup>4</sup> haû yuq gi, nghutbûn é sù eq haî lé le a sê gyô é sù nghut ri. Yhang gi, htuq htíng lhûm é hkyô pé lé ô nau é, a ge é myit bò luî, dang eq séng mù mabyoq lhoq htoq ri; haû mai, manon é hkyô, byoq lhum byoq cheq é hkyô, lumù gansang é hkyô, agè ashop é dông myit ngam pyâm é hkyô eq,

<sup>5</sup> haû tengmán hkyô lé lhoq hpyuq pyám mù, tarâ hkungga hkyô gi, ngùn zè wó hkyô za nghut ri ga myit yu é, i-myt lhoq htên pyám bê bâng é gyoro má, byin a huî é hkyô pé lé, lhoq htoq kat ri.

<sup>6</sup> Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri.

<sup>7</sup> Hkâsu mù gâ le, nga-nhúng gi, mingkan htoq má haî jung le a yu wang lé, haû mai le haî wó yu htoq ló râ a nghut.

✧ 5:18 Tarâ Pun 25:4 ✧ 5:18 Luk 10:7 \* 5:22 Haû hkun lhê bang gi, hpúng suwún kut râ matú hkyin to bê bang lé, loq ke kyûdung byî é nghut lhê.

8 Haû mù luí, nga-nhúng gi, wutbu wutme eq zoshuq wó é nghut jáng, hau èq nhik dik nyi sháng.

9 Wó naû sùt nau é byu pé gi, gunglau hkyô eq tuihkyó má le, haû byoq yeq hkyô eq htên byoq hkyô má, byu pé lé myup shi nhang é, nga é hkyô myo myo eq myit nò nhang nau é hkyô má le, byit gyó wâng kó rá nghut lhê.

10 Hkâsu mù gâ le, ngùn lé chyitdap é hkyô gi, agè ashop hkyô ajung jùng é apùn awang nghut nyi ri. Byù ra-am gi, ngùn lé ô naû luí, haû lumjúng hkyô mai sô nghoq ló mù, yhumsing gùng lé yhumsing, haû yón kuq hkyo eq htaû rot pyám bekô nghut ri.

### *Timohti Lé Pying Kat É Dang*

11 Nghut kôhang, Garai Gasâng é byù nàng gi, haû pé banshoq lé koi pyám luí, dingmán hkyô, tarâ hkungga hkyô, lumjúng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyi aq.

12 Lumjúng hkyô eq sêng é ge é majan le zân nyi aq. Hap yù lumjúng bê ga, saksé myo myô pé é hí má, ge é đông nàng yín yu é hkûn, wut yu é hui luí wó é ahtum abyuq é asak lé, zuí zing nyi aq.

13 Haû lhungháng lé asak byi é Garai Gasâng é hí má le, Pontu Pilat chyáng saksé hkâm nyi é hkûn, ge é đông yín yu é Hkrisduq Yesuq é hí má le, ngò, nang lé pying kat lhê:

14 Yhâng é ahkyíng yam-yoq jé jáng, Garai Gasang htoq shit nhang rá nghut é sù, nga-nhùng é Yhumsing Yesuq Hkrisduq htoq shit é buinyi jé shoq,

15 nàng gi, agot a-u é hkyô eq mara hùn rá hkyô a bo e za, hkunmó shi lé châng nyi aq. Garai Gasang gi, hkungsô wó sù, Yhang za up sù, hkohkam pé é Hkohkâm, yhumsing pé é Yhumsing,

16 Yhang za ahtum abyuq dui nyi sù, a ge chyâng htep e é maubó má dui nyi sù, ó yuq èq le a myang wú é, a wó myang é sù nghut nyi ri. Aróng eq hpungwup a-tsam gi, Yhâng chyáng ahtum abyuq ru joq nyi sháng gaq ô! Amen.

17 Shí ipyat má wó sùt é bang gi, a gumrông rá eq a gîng é sutzè má yhangmoq é myit myoqbyù hkyô a tô e za, nga-nhúng nguínón yuqyo nyi rá matú junghkang

jungmó lé agùn agó byi é sù, Garai Gasâng chyáng za, yhangmoq myit myoqbyu nyi rá matú, hkunmó hkyó aq.

18 Ge é hkyô kut luí, ge é muzó má wó sùt nyi mù, a chum e za, gam chùng nau é myit bò rá matú, yhangmoq lé hkunmó hkyó aq.

19 Haû đông mai, yhangmoq gi, jé lô rá ipyat é matú gîng é apùn awang đông, yhangmoq é matú sutzè wó tsing to kó rá nghut lhê; haû hkûn sheq, yhangmoq gi, asak kyíng nghut é asak haû le wó zuí zing to kó rá nghut lhê.

20 Timohti ê, nang lé ap to bê hkyô lé, zúng nyi aq. Tarâ a hkunggâ é poming ming bâng èq hpaqchyí nghut lhê ga myhíng shut é htuq htíng lhum lhum kut é hkyô lé, koi pyám aq.

21 Byù ra-am gi, haû lé hpaqchyí nghut lhê ga yín yù kôluí, haû lumjúng hkyô mai so nghoq htoq ló byuq bekô nghut ri.

Jeju gi, nungmoq chyáng ru joq nyi sháng gaq ô.

## TIMOHTI Chyáng Htang Dàm Hun Kat é Laiká (2 Timothy)

<sup>1</sup> Hkrisduq Yesuq chyáng má é asak byi rá gâ é danggidiq eq rajung za, Garai Gasang ô nau é đông, Hkrisduq Yesuq é lagyo nghut sũ, ngò, Poluq gi, ngò chyitdap é ngá zo Timohti lé, dang kyô kat lhê.

<sup>2</sup> Haũ Íwa Garai Gasang eq nga-nhông é Yhumsing Hkrisduq Yesuq chyáng má é jeju eq shogyo nhikmyin hkyô, nguingón hkyô gi, ru joq nyi sháng gaq ô!

### *Lumluq Râ Matú Myit Wum Byi É Hkyô*

<sup>3</sup> Ngò gi, ngá é kyûdung dang má, nyi, myín, abyit alan nang lé bũn nyi uchyang, sân-yúng é i-myt mai, ngá é íchyí íwâ pé dojaú é su, ngò dojaú nyi é Garai Gasang lé, jeju hkyá-ôn nyi lhê.

<sup>4</sup> Ngò gi, ngò má gabú hkyô bying jup sháng gaq nghũ, náng é ngaubyi lé myit bũn nyi mù, nang lé gyai yhang myàng nau nyi ri.

<sup>5</sup> Ngò gi, nang é gyíng é lumjíng myit lé lhoq pũn yù mù, náng whoí Lu-i eq náng nu U-ni nhik chyáng má hí bo é lumjíng myit, ahkuí, náng chyáng le bo ri nghũ, hkyak myit lum nyi lhê.

<sup>6</sup> Hau é yanmai, ngò loq ke byi é đông, nàng má bo tô é Garai Gasang é chyunghuq lé, gyúng nhang nyi rá matú, nang lé ngò lhoq pũn kat lhê.

<sup>7</sup> Hkâsu mù gâ le, Garai Gasang gi, gyuq sê é myit nga-nhông lé a kat byi e za, a-tsam bo é myit, chyitdap sê é myit, yhumsing gùng lé dat hkan é myit sheq kat byi tô é ru nghut lhê.

<sup>8</sup> Haũ mù luí, nàng gi, nga-nhông é Yhumsing eq séng luí saksé hkâm é hkyô má le, Yhâng é yanmai htóng byu dut to sũ ngá é hkyô má le, hoq myit a bo é za, Garai Gasang é wum-o mai, haũ gabú danglu é matú, ngò eq rahá wuĩhke jamjau chòm hui goq.

<sup>9</sup> Garai Gasang gi, nga-nhông zui saí é muzó đông a nghut e za, Yhânggùng yhang myit sôn tô é hkyô eq Yhâng é jeju yanmai

za, nga-nhông lé, hkyi yù luí chyoiyúng é asak duí hkyô má ji yù bê nghut ri. Ahkyíng nghu é lháng a joq shi mai yhang, jeju haũ gi, Hkrisduq Yesuq má nga-nhông lé byi to gũ nghut bê.

<sup>10</sup> Nghut kôhang, nga-nhông é hkyi yù Sũ, Hkrisduq Yesuq pô htoq é đông, ahkuí, haũ lé lhoq htoq shit bê nghut ri. Yhang gi, shĩ-nò hkyô lé lhoq htên pyám luí, haũ gabú danglu đông mai, asak lé le, a dat htên byoq é hkyô lé le, lhoq htoq shit bê nghut ri.

<sup>11</sup> Ngò gi, gabú danglu é matú hko kyo sũ, lagyo eq mhoqshit sũ đông, hkyin tô é hui sũ nghut lhê.

<sup>12</sup> Hau é yanmai, ngò gi, wuĩhke jamjau shĩ lé huí nyi é nghut lhê. Nghut kôhang, ngò gi, ó yuq lé lumjíng bê nghut é hkyô lé, sê é htoq agó, Yhang lé ngò ap tô é pé lé, haũ buinyi jé shoq, Yhang wó zúng rá nghut lhê nghũ hkyak myit lum tô é yanmai, ngò a hoq.

<sup>13</sup> Nàng gi, ngá chyáng mai wó gyô yu é tengmán dang pé lé, Hkrisduq Yesuq má, lumjíng myit eq chyitdap myit mai alik kut yu nyi aq.

<sup>14</sup> Nang lé ap byi to bê, haũ ge é mung-dang lé, nga-nhông chyáng bo tô é Chyoiyúng Woi-nyí é wum-o mai zúng nyi aq.

<sup>15</sup> Asia mau má é bang yuq hkanmó gi, ngo lé pyám to kô é hkyô lé, nàng sê lhê; haũ bang má, Hpugelu eq Heramoge nhik le bo akò nghut ri.

<sup>16</sup> Haũ Yhumsing gi, Onesihpurũ é yhum-byù lé shogyo nhikmyin é hkyô tũn shit sháng gaq; hkâsu mù gâ le, yhang gi, ngo lé anum num myit lhoq ngón é htoq agó, ngò wut é shamtoq-tuĩ é yanmai, a hoq e za,

<sup>17</sup> yhang, Romaq myuq má jé nyi é hkũn, ngo lé myang hui shoq, ho shikut é sũ nghut ri.

<sup>18</sup> Haũ Yhumsing gi, haũ buinyi má, yhang lé haũ Yhumsing é shogyo nhikmyin hkyô byi sháng gaq! Ehpesu myuq má, yhang ngo lé hkâ-myhó garũm bê nghut é gi, nàng rago yhang sê lhê.

## 2

<sup>1</sup> Haũ mù, ngá zo ê, nàng gi, Hkrisduq Yesuq má é jeju hkaũ má, wũm bo nyi aq.

<sup>2</sup> Nàng gi, saksé myo myô é hí má ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq.

<sup>3</sup> Hkrisduq Yesuq é ge é gyezo rayuq su, wuñke hkyô lé chôm jan nyi sháng.

<sup>4</sup> Gyezo rayuq dông gyè mù wùn waq nyi é sù, ó yuq nghut kôle, gotû muzó má a bo lom é za, yhang lé hkunmó hkyô nyi é gyezau lé, gabú nhâng nau é chyat nghut lhê.

<sup>5</sup> Haû eq rajung za, shingjóng é sù rayuq le, shingjóng lhum poî wang é hkûn, tô tô é tarâ dông a châng e nghut le gi, ung é aróng chyunghuq lé wó yù râ a nghut.

<sup>6</sup> Yo-mû zuî shikut é sù gi, kyôshi lé sâng-hi myang hkam yù râ sù nghut lhê.

<sup>7</sup> Haû Yhumsîng gi, shí pé banshoq lé wó sê é nyan nang lé byi râ nghut é yanmai, ngò tai é hkyô pé lé myit wú aq;

<sup>8</sup> Haû Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; haû gi, ngá é gabú danglù nghut lhê.

<sup>9</sup> Gabú danglù hau é yanmai, mara bò sù rayuq lé su, ngò gi, kyum hut é hui luî, hpuzô nyi é nghut lhê. Nghut kôlhang, Garai Gasâng é mungdang gi, kyum hut huî é a nghut.

<sup>10</sup> Haû mù luî, ngò gi, Hkrisduq Yesuq chyáng mâ é hkyi yù hkyô eq ahtum abyuq é hpungwup shingkang lé wó yù kó sháng gaq nghû, haû hkyin yù hui bâng é matú, jung hkanmó lé hkam jân nyi lhê.

<sup>11</sup> A-ô mâ é dang gi, lumging é dang nghut lhê:

Nga-nhúng gi, Yhang eq rahá shî bê nghut jáng, Yhang eq rahá duî râ nghut lhê.

<sup>12</sup> Nga-nhúng gi, hkam jân é nghut jáng, Yhang eq rahá up râ nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm râ nghut lhê.

<sup>13</sup> Nga-nhúng gi, lhumzui myit a bò kôlhang, Yhang gi, lhumzui nyi râ nghut lhê. Hkâsu mù gâ le, Yhang gi, yhânggùng yhang wó he-ngik pyâm é a nghut.

*Garai Gasâng Hí Má Myoqdong Wó É Mû Zui Sù*

✧ 2:19 Gyung So 16:5

<sup>14</sup> Nàng gi, yhangmoq lé, shí hkyô pé xoq luî lhoq pùn nyi aq. Dang pé eq séng luî, a byoq lhùm nyi kó sháng gaq, Garai Gasâng hí má yhangmoq lé sidiq byi aq. Haû gi, akyû a bo é htoq agó, wó gyô é bang lé htên byoq nhang é hkyô za nghut lhê.

<sup>15</sup> Nàng gi, haû tengmân é mungdang lé jo shoq chung jai é eq, hoq nó a râ é mù zui sù rayuq dông Garai Gasâng hí má myoqdong wó shoq, wó dut é myhó shikut aq.

<sup>16</sup> Tarâ a hkunggâ é po-ming ming bang lé koi pyám aq. Hkâsu mù gâ le, haû su kut é bang gi, tarâ a hkunggâ é hkyô má je riyhang wang nân ló byuq é bang dut kó râ nghut lhê.

<sup>17</sup> Yhangmoq é mhoqshit hkyô gi, mong ana su byo myín ló râ nghut lhê; haû bang má Humenu eq Hpilitu nhik le bò kôluî,

<sup>18</sup> haû tengmân hkyô mai sô nghoq ló byuq akô. Yhangnhik gi, haû dum dui toq hkyô dut lai bê ga tai kômù, ra-âm é lumjing hkyô lé lhoq htên pyám byi akô nghut ri.

<sup>19</sup> Nghut kôlhang, "Haû Yhumsîng gi, Yhang eq sêng é bang lé sê lhê."\* ga luî le, "Haû Yhumsîng é mying lé yin yu é bang yuq hkanmó gi, agè ashop hkyô mai lhing tau ra kó râ nghut lhê." ga luî le, dizik haû htung tap tô é, Garai Gasâng é ging ting é apùn awang gi, ging nyi ri.

<sup>20</sup> Yhùm mó ralhum má gi, hîng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut.

<sup>21</sup> Haû mù luî, haû pé mai yhumsing gùng lé lhoq sansêng pyâm é sù gi, chyoiyung luî, haû Yhumsîng chung jai gíng é sù, ge é muzó hkanmó kut râ hen tô é sù nghut é yanmai, aróng hkyo é matú chungzè dut râ nghut lhê.

<sup>22</sup> Zoram é agè ashop é ô naù hkyô lé koi pyám mù, haû sân-yung é myit mai, Yhumsîng lé wut dúng é bang eq rahá, dingmân hkyô, lhumzui hkyô, chyitdap hkyô, nguingón hkyô pé lé, châng hkat nyi aq.

<sup>23</sup> Go é eq ngok é dông dang jet jet lhùm é hkyô gi, mabyoq lhoq htoq é hkyô nghut é

lé, nàng sê lhê nghut é yanmai, haú hkyô lé koi pyâm aq.

<sup>24</sup> Haú Yhumsing é dui-nhâng zoshâng gi, mabyoq a lhoq htoq é za, yuq hkgangmó lé dat myit tê byî é, wó mhoqshit é, a dat nhik-yô é su dut ra râ nghut lhê.

<sup>25</sup> Yhang gi, yhang lé htuq htîng é bang lé, nú-nhâm é đông mhoqshit byi ra râ nghut lhê; haú hkûn, Garai Gasang gi, yhangmoq lé myit hîng hkyô byi mù, tengmán hkyô lé sê gyo nhâng luí,

<sup>26</sup> yhangmoq gi, bûn gyîng lò mù, nat Tsadán ô nau é hkyô lé kut byi râ matú, chyup yû huí é, nat Tsadán é tuihkyó mai wó hpang lut ló kó abe nghû, myit lum kat lhê.

### 3

#### *Jihtûm Buinyi Pé Má Dut Lò Râ Hkyô*

<sup>1</sup> Jihtûm buinyi pé má, wuîhkê é ahkyíng pé joq lò râ nghut é lé, nàng matsíng to aq.

<sup>2</sup> Hkâsu mù gâ le, haú u lé, byu pé gi, yhumsing gùng lé za chyitdap é bang, ngùn lé myoqnoq é bang, gumrong é bang, nghutbûn é bang, góbang lé taí hpoí é bang, înu îwa nyo é lé a gyô é bang, jeju a dat bûn é bang, a chyoiyúng é bang,

<sup>3</sup> chyitdap myit a bo é bang, mara hkyut byi a sê é bang, lumù gansang é bang, yhumsing gùng lé hkâng a sê é bang, byuwuí pé, ge é hkyô lé a ngui é bang,

<sup>4</sup> haq gumlaú é bang, a bun a so dut wún é bang, yhumsing gùng lé za hkik bûn é bang, Garai Gasang lé chyitdap é bang dut râ malaí ngón kún hkyô lé za chyitdap é bang, dut bùm kó râ nghut lhê.

<sup>5</sup> Yhangmoq gi, tarâ hkunggâ é bang su dut kôlhang, haú pê é a-tsam lé he-ngik pyâm akô nghut ri; haú sù é bang lé, nàng koi pyâm nyi aq.

<sup>6</sup> Yhangmoq gi, hpaqchyí da mù yhûm pé má wàng kôluí, mara wôlai lé wun é, agè ashop é ô nàu hkyô ajung jung má sô nghoq ló byuq é,

<sup>7</sup> hkâ-nhâm le mhoq yu nyi kôlhang, haú tengmán hkyô lé a sê gyô é, myit nyhôm é myiwe wui lé wó lâng nghoq yu é bang nghut akô.

<sup>8</sup> Yanne eq Yambre nhik gi, Mosheq lé htuq htîng é su, haú bang le, haú tengmán

hkyô lé htuq htîng akô nghut ri; yhangmoq gi, myit é hkyô htên byuq kôluí, haú lumjîng hkyô má lhum a zuí é bang nghut akô.

<sup>9</sup> Nghut kôlhang, haú nhik é hkyô byông htoq lo é su, yuq hkgangmó é hí má, yhangmoq ngok é hkyô byông htoq lô râ nghut mù, haú mai lai luí yhangmoq wó kut jat kó râ a nghut.

#### *Timohti Lé Pying Kat É Dang*

<sup>10</sup> Nàng kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjîng hkyô, myit hîng hkyô, chyitdap hkyô, hkam jan hkyô,

<sup>11</sup> zing-ri huí é hkyô eq wuîhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nàng rago sê lhê. Nghut kôle, haú Yhumsing gi, haú pé banshoq mai ngo lé xe yù bê nghut ri.

<sup>12</sup> Gè gè yhang, agè ashop é byu pé eq mhaú kut é bang gi, mhaú zô nyi bum é eq mhaú zô é huí nyi bùm kôluí, a ge é hkyô shut je riyhang myô jat lò kô é hkûn,

<sup>13</sup> Hkrisduq Yesuq má tarâ hkunggâ é asak đông nyiyap nau é bang yuq hkgangmó gi, zing-ri é hui kó râ nghut lhê.

<sup>14</sup> Nghut kôlhang, nàng gi, ô pê chyáng mai nàng mhoq yù bê hkyô lé le, Hkrisduq Yesuq lé lumjîng jáng hkyi yu é hui shoq,

<sup>15</sup> nang lé hpaqchyí byéng-yá wó byî é chyoiyúng Chyúmdang pé lé, zoshâng hkûn mai nàng sê to bê hkyô lé le, nàng sê é yanmai, nàng mhoq yu to bê hkyô eq hkyak lumjîng to bê hkyô má, xoq kut nyi aq.

<sup>16</sup> Chyúmdang hkgangmó gi, Garai Gasâng é soq hâng tô é pé chyat nghut é yanmai, mhoqshit é hkyô, tân mhoq é hkyô, lhoq jo byî é hkyô eq dîngmán hkyô lé tûn shit byî é hkyô pê é matú, akyû bo ri;

<sup>17</sup> haú mù luí, haú Garai Gasâng é byù gi, ge é muzó jizó hkgangmó lé kut râ matú, wó gumjup râ nghut lhê.

### 4

<sup>1</sup> Garai Gasâng é hí má le, dui nyi bang eq shi byuq bang lé tarâ dara râ sù Hkrisduq Yesuq é hí má le, Yhang htoq shit râ hkyô eq Yhâng mingdán é yanmai, ngò, nang lé pying kat é gi,

<sup>2</sup> haû mungdang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyaí hing é eq rago za mhoqshit é dông, lhoq jo byi, tân mhoqshit é eq myit wum byi kut nyí aq.

<sup>3</sup> Hkâsu mù gâ le, byu pé gi, tengmán mhoqshit hkyô lé a kâm gyô é ahkyíng jé mù, yhangmoq ô nau yut yut é hkyô cháng luí, yhangmoq é no yo bui nau é nohkyap gyô nau é hkyô taí nhâng râ matú, sará pé rajùm rayò lé lhíngkhyuq má lhoq tsing to kó râ nghut lhê.

<sup>4</sup> Yhangmoq gi, haû tengmán hkyô mai yhangmoq é nohkyap lé lhing pyâm mù, myit htoq mhô-myi dang shut lhing ló kó râ nghut lhê.

<sup>5</sup> Nghut kôlhang, nàng gi, dut tô é hkyô banshoq má rago sidiq nyí aq; wuîhke jam-jau hkyô lé hkam jân nyí aq; gabú danglù hko kyô é muzó kut nyí aq; nàng é hpungmû banshoq lé wùn waq nyí aq.

<sup>6</sup> Hkâsu mù gâ le, ngò gi, shuq jung hkungga ralhum dông hut pyâm é huí nyí gù nghut mù luí, mingkan mai ngò htoq ló râ ahkyíng jé bê nghut ri.

<sup>7</sup> Ngò gi, haû ge é majan le zan bê; din shíngjóng lhúm é hkyô le bàn bê; haû lumjíng hkyô le chang bê nghut lhê.

<sup>8</sup> Ahkuí, haû tengmán é tarâ Agyi nghut sù, Yhumsíng gi, haû buinyi má ngo lé ap byi râ nghut é, haû dítngmán hkyô é janmaú lé, ngá matú tô to byi bê nghut lhê. Haû gi, ngá é matú za a nghut, Yhang htoq shit râ hkyô lé myit láng nyi é bang banshoq é matú le nghut lhê.

### *Timohti Lé Jì Kat É Hkyô*

<sup>9</sup> Nàng gi, ngá chyáng wó dut é í hân hân lé lô aq.

<sup>10</sup> Hkâsu mù gâ le, Demaq gi, mingkan shí lé chyitdap é yanmai, ngo lé pyâm to luí, Htesaloni wà mó shut; Krezen gi, Galatiq mau shut; Tituq gi, Dalamati mau shut, é ló byuq bekô nghut é yanmai nghut lhê.

<sup>11</sup> Lukaq za ngò eq rahá nghut nyi lhê. Markuq lé, nàng eq rahá shuí lé lô aq; yhang gi, ngá é hpungmû má wó htuqbáng râ sù nghut lhê.

<sup>12</sup> Ngò gi, Tuhkiku lé Ehpesu myuq shut nhang kat bê nghut lhê.

<sup>13</sup> Nàng gi, lé lo é hkûn, Troa myuq má, Karpu chyáng ngò tô tô é buhíng haû lé le, ngá é chyúmding lé le, je luí eq haû shokuq chyúmding pé lé le, yù lé lô byi aq.

<sup>14</sup> Haû ningdup hpó Alesander gi, ngo lé a ge é myo myo kut bê nghut ri; haû Yhumsíng gi, yhang kut é eq rajung za, yhang lé dam byi râ nghut lhê.

<sup>15</sup> Yhang gi, ngamoq é danglù lé wum kat htuq htíng bê sù nghut é yanmai, nàng le, yhang lé sidiq ra râ nghut lhê.

<sup>16</sup> Sâng-hí dàm, ngá gûng lé ngò taí hung é hkûn, yuq hkangmó gi, ngá é hkyam shut a bo lom e za, ngo lé pyâm tô akô. Nghut kôlhang, haû gi, yhangmoq ahtoq má mara a dut sháng gaq.

<sup>17</sup> Nghut kôlhang, ngò dông mai danglù haû lé rago wó hko pyo kat luí, tûngbaù pé banshoq bang wó gyo kó sháng gaq ga, haû Yhumsíng gi, ngá hkyam shut yap to mù, ngo lé wum-o byí é nghut lhê. Hau htoq agó, ngò gi, hkanghkyí é nhut mai le hkyí yù hui bê nghut lhê.\*

<sup>18</sup> Haû Yhumsíng gi, ngo lé agè ashop é hkyô hkangmó mai hkyí yù luí, Yhang é mauhkûng mingdán má ngón za shuí jé râ nghut lhê. Hpungwup shíngkang gi, Yhâng chyáng ahtum abyuq ru joq nyí sháng gaq ô. Amen.

### *Shi-kyám Dang*

<sup>19</sup> Priskila eq Akula nhik lé le, Onesih-puru yhumbyù wuì lé le, bo shi-kyám byi laq.

<sup>20</sup> Erastu gi, Korinhtuq myuq má nyi gyô to bê; Trohpimu lé gi, nò luí, Melitu wà mó má ngò nyhi pyâm to bê nghut lhê.

<sup>21</sup> Nàng gi, wó dut é í, gyoqmyò a wàng shi lé, shí má jé lé lò aq. Úbulu gi, nàng lé shi-kyâm kat ri; haû eq rajung za, Pudén, Linu, Klodia eq gumang wuì banshoq bang gi, nàng lé shi-kyâm kat akô nghut ri.

<sup>22</sup> Haû Yhumsíng gi, náng é woi-nyí eq rahá nghut nyí sháng gaq. Jeju gi, nungmoq chyáng ru joq nyí sháng gaq ô.

\* 4:17 Haû hkûn lé, Romaq byu pé, byù sat lé gi, hkanghkyi lé tsô pyâm lhê.

## TITUQ Chyáng Hun Kat é Laiká (Titus)

<sup>1</sup> Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjínq hkyô jat râ eq, tengmán hkyô lé wó sé mù, tarâ hkungga sé nhâng râ matú, hkyin yù huí é sù nghut lhê.

<sup>2</sup> Haù ahtum abyuq é asak hkyô lé, mhaù a sê é Garai Gasang gi, ahkyínq nghu é lháng a joq shi mai danggidiq byi to mù, Yhang masat tô é ahkyínq yam-yoq má sheq mungdang hko kyô é đông lhoq htoq shit luí,

<sup>3</sup> nga-nhùng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

<sup>4</sup> Nga-nhúng chòm lumjínq é hkyô đông mai, ngá zo sítq nghut é Tituq lé laiká kâ kat lhê. Íwa Garai Gasang eq nga-nhùng é hkyi yù Sù Hkrisduq Yesuq chyáng mã é jeju eq nguínqon hkyô gi, náng chyáng ru joq nyí sháng gaq ô.

### *Kreti Zinlóng Má, Tituq Wùn Waq Râ Muzó*

<sup>5</sup> Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngò a ban zui saí é loqzó pé lé lhoq pán râ matú eq, wà hkangmó má hpúng suwún ayá dáng to byi râ matú nghut lhê.

<sup>6</sup> Haù hpúng suwún kut râ sù gi, mara hùn râ hkyô a bo é sù; yhangmyi rayuq za wó é sù; yhang zô pé le, agè ashop é eq jino a gyô é ga, mara hùn râ jowò a joq é lumjínq bang nghut é sù, nghut râ lhê.

<sup>7</sup> Hkâsu mù gâ le, hpúng-up rayuq gi, Garai Gasâng é sùt zum sù rayuq đông nghut lhê mù, mara hùn râ hkyô a bo é sù nghut râ lhê; yhang gi, yhumsing myit a cháng; i-myit a lùm tot; íhpê é jùn a dut; mabyoq jishùm a kut; a sansêng é ngùn hínq lé a myit ô nau é sù nghut râ lhê.

<sup>8</sup> Yhang gi, byù bíng lé dat hkulùm sù; ge é hkyô lé chyitdap sù; nùm é sù, dingmán sù; chyoiyúng sù; yhumsing gùng lé wó hkang é sù;

<sup>9</sup> mhoq yu to bê hkyô eq rajung za, lumjínq é mungdang lé ging ging zuí zing nyi é sù nghut râ lhê. Haù hkùn sheq, yhang gi, góbang lé tengmán é mhoqshit hkyô đông myit wum wó byí é eq, haù eq shai lhum é bang lé, shut é hkyô wó tũn shit râ nghut lhê.

<sup>10</sup> Hkâsu mù gâ le, gumlau kut é bang, dangsôm taí é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akô.

<sup>11</sup> Haù bâng é nhut shô lé gi, xaù pyám byi râ lhê. Hkâsu mù gâ le, yhangmoq gi, a tengmán é đông sutzè lé wó yù shoq ga luí, mhoqshit a gínq é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri.

<sup>12</sup> Kreti byù mã é myiqhtoi rayuq lháng gi, "Kreti byu pé gi, ayang mhaù é bang, tân jung yosô dusak pé, lagòn é zo myoqnoq bang nghut akô." ga taí wú ri.

<sup>13</sup> Saksé shí gi, têng ri. Haù mù luí, yhangmoq gi, Yudaq byu pê é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyo kô é za,

<sup>14</sup> haù lumjínq hkyô má ging títq nyi kó sháng gaq, yhangmoq lé htân htân tân mhoqshit byí nyi aq.

<sup>15</sup> Sân-yúng bâng é matú gi, azínq zê lhunglháng sân-yúng ri; a sân-yúng bang eq a lumjínq bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhiklhum eq myit sôn sê é hkyô pé gi, gè gè yhang, a sân-yúng dut byuq bekô nghut ri.

<sup>16</sup> Yhangmoq gi, Garai Gasang lé sê lhê ga kôhang, yhumsínq zui saí é loq zó đông, Yhang lé he-ngik pyâm é bang nghut akô. Yhangmoq gi, achaq achyut é bang, jino a gyô é bang eq, ge é mù joq mijoq eq a htuk é bang nghut akô nghut ri.

## 2

### *Hká Đông Nyi Yap Râ Hkyô*

<sup>1</sup> Náng kúm gi, tengmán é mhoqshit hkyô eq wuí é đông mhoqshit nyí râ dut lhê.

<sup>2</sup> Hpô-mâng pé lé gi, i-myt shirâm sé râ hkyô; hkungga gíng é byù dut râ hkyô; yhumsing gùng lé wó hkàng râ hkyô eq, lumjíng myit gíng râ, chyitdap myit gíng râ, hkam jan hkyô gíng nyi râ hkyô pé lé, mhoqshit byi nyi aq.

<sup>3</sup> Haú eq rajung za, hpô-myhí mâng pé lé gi, hkungga gíng é a-kyang bo nyi râ hkyô; lumù gansâng dang a taí râ hkyô; ìhpê é jùn a dut râ hkyô eq ge é hkyô lé za dat mhoqshit é bang wó dut râ matú mhoqshit byi aq.

<sup>4</sup> Haú hkûn, Garai Gasâng é mungdang gi, lumu pyâm é a hui sháng gaq, yhangmoq gi, hpô-myhí zô pé lé, yhumsing yhanglâng eq, yhangzô pé lé chyitdap é,

<sup>5</sup> yhumsing gùng lé wó hkang é, siri bo é, ikun lé dat wùn waq é, ge é myit wó tân shit é, yhumsing é yhanglâng uphkang é dông dat châng é bang dut râ matú, ge mhoqshit é hpô-myhí mâng pé dut râ nghut lhê.

<sup>6</sup> Haú eq rajung za, zorâm wui lé le, yhumsing gùng lé wó hkang nyi kó sháng gaq, lhoq pun lhoq kyíng nyi aq.

<sup>7</sup> Hkyô hkat hkangmó má, yhangmoq lé nàng yhang ge é muzó alik tân shit nyi aq.

<sup>8</sup> Nàng lé lhom htuq htíng é bang gi, nga-nhúng é hkyô má mara a wó hûn kômù hoq hpû nyi kó sháng gaq, nàng mhoqshit é hkyô má, taí pyám râ hkyô a bò shoq, têng é, siri bo é, eq sansêng é dang taí nyi aq.

<sup>9-10</sup> Nga-nhúng é hkyi yù Sû Garai Gasang eq sêng é mhoqshit é hkyô pé hkat hkangmó yúng nyi sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyi mù, yhumsing wui é i-myt ngón shoq dang a tu râ; a hkau râ; wó lum tô é bang dut râ hkyô pé lé, mhoqshit byi aq.

<sup>11</sup> Hkâsu mù gâ le, hkungsô wó é myit myoqbyù hkyô ga é, nga-nhúng é kô myhang é Garai Gasang eq hkyi yù Sû, Yesuq Hkrisduq gi, hpungwup shíngkang eq htoq shit râ hkyô lé láng nyi é hkûn,

<sup>12</sup> tarâ a hkunggâ é myit eq mingkan myit ô nau é hkyô koi pyám luí, shí ipyat má yhumsing gùng lé wó hkàng râ, dingmán râ eq, tarâ hkunggâ é hkyô wó cháng shoq,

<sup>13</sup> nga-nhúng lé mhoqshit byi râ matú, Garai Gasâng jeju chyunghuq gi, htoq shit

bê nghut mù luí, byù lhunglâng bang lé hkyi yù hkyô hpóng byi bê nghut ri.

<sup>14</sup> Haú Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut râ matú wó lhoq sân-yúng yú shoq ga, nga-nhúng é matú Yhânggùng lé ap byi pyám bê nghut ri.

<sup>15</sup> Nang lé ó yuq èq le, a wú shôm pyám kó sháng gaq; nàng gi, ahko ahkáng banshoq eq, yhangmoq lé shí hkyô pé mhoqshit nyi aq; myit wum byi é eq, tân mhoqshit é hkyô lé le kut nyi aq.

### 3

#### *Ge É Muzo Zui Saí Râ Hkyô*

<sup>1</sup> Nàng gi, lumjíng bang lé, zau wui eq ahko ahkáng wó bâng é a-ô má nyi mù, jìno gyô nyi râ eq, hkâ-nhám le ge é muzó hkangmó zui saí râ lé hen nyi uchyang,

<sup>2</sup> ó yuq lé le lù a mù râ; nguingón hkyô hô râ; myit tê byi é hkyô tân shit râ eq; byù banshoq lé nûm é i-myt tân shit nyi kó sháng gaq, lhoq pun lhoq kyíng nyi aq.

<sup>3</sup> Hkâsu mù gâ le, nga-nhúng le, hí hpyang gi, byù ngok pé, jìno a gyô é bang, mhaú zo hui é bang eq, gungsho ô nau é hkyô eq mingkan ngón hkyô ajung jûng èq jùn kut é hui bang, dut mù luí, agè ashop é eq manon lhûm é hkyô kut nyi mù, rayuq eq rayuq a jú lhûm é dông nyi lai lò bê nghut lhê.

<sup>4</sup> Nghut kôlhang, nga-nhúng é hkyi yù Sû Garai Gasâng jeju eq chyitdap myit htoq shit é hkûn,

<sup>5</sup> nga-nhúng yhang kut é dingmán é muzó èq a nghut é za, Yhâng é shogyo nhikmyîn é jeju yanmai sheq, Garai Gasang gi, nga-nhúng lé hkyi yù bê nghut ri.

<sup>6</sup> Yhang gi, nga-nhúng é hkyi yù Sû Yesuq Hkrisduq é yanmai, nga-nhúng é ahtoq má agùn agó hut hkyó byi é Chyoiyúng Woi-nyí èq nga-nhúng lé chí san chí sêng pyám byi mù, woi-nyí má dum hku é hui nhâng luí, myit sik htaí byi é hkyô dông nga-nhúng lé hkyi yù bê nghut ri.

<sup>7</sup> Haú mù luí, Yhâng é jeju mai mara hkyut san byi é hui bê nghut é yanmai, ahtum abyuq é asak lé myit myoqbyu nyi



é eq rajung za, nga-nhúng gi, silí wunlí wó hkam yu é bang dut lò râ nghut lhê.

<sup>8</sup>Dang shí pé gi, lumjínq é dang nghut lhê mù luí, Garai Gasang lé lumjínq é bang gi, ge é muzó lé myit lòm luí rago zui saí nyi kó sháng gaq, haú hkyô pé lé nàng wum zuq tung mhoqshit byi râ lé, ngò ô nau nyi lhê. Shí pé gi, byù lhunglhâng bâng é matú ge é eq, akyû bo é hkyô nghut lhê.

<sup>9</sup>Nghut kôlhang, ana apâ ga luí taí htíng lhûm é hkyô lé le; byùxik labaû gôn é hkyô lé le; nyo byoq lhûm é hkyô lé le; jep é tarâ eq séng mù byoq lhûm é hkyô pé lé le koi pyâm nyi aq, hkâsu mù gâ le, haú pé gi, akyû a bo é hkyô eq chûng a ge é hkyô pé nghut ri.

<sup>10</sup>Gam hkuí é myit bò sù lé gi, í dâm mhoqshit wú mù, a wó jáng, yhang lé baú tô pyâm aq.

<sup>11</sup>Haú su kut sù gi, yhang kut é muzó má mara wó to bê nghut mù, yhumsing gùng lé yhumsîng mara hun é sù nghut é lé, nàng sê to lo aq.

### *Je Htâng Má Pying É Dang*

<sup>12</sup>Ngò gi, Nikopoli wà má gyoqmyò lhoq lhai râ dông myit hpyit tô é yanmai, Artima lé, a nghut jáng Tuhkiku lé, náng chyáng nhang kat byi râ, jé eq yhang, nàng gi, shikut luí, haú wà shut ngá chyáng lé lô aq.

<sup>13</sup>Nàng gi, tarâ sê é sù Zena eq Apolo nhik lé, yhangnhik é hkyowuì má râ é hkyô banshoq, shikut luí garúm kat aq.

<sup>14</sup>Nga-nhûng é byu pé gi, nyí wuî râ é hkyô lé wó htuq é eq ashi zuí é bang dut kó sháng gaq, ge é muzó lé myit lòm mù zui saí nyi râ hkyô lé mhoq yû râ lhê.

<sup>15</sup>Ngò eq rahá nyi é bang yuq hkangmó gi, nang lé shi-kyâm kat akô. Lumjínq hkyô má ngamoq lé chyitdap é bang lé, bo shi-kyâm byi aq.

Garaí é jeju gi, nungmoq eq rahá joq nyi sháng gaq ô!

## HPILEMON Chyáng Hun Kat é Laiká (Philemon)

<sup>1</sup> Hpilemon ê, Hkrisduq Yesuq é yanmai htóng lúng nyî sù, ngò Poluq eq nga-nhông é gumang Timohti nhik gi, ngá-nhik chyitdap é mù wùn luzúm nghut é sù nang lé le,

<sup>2</sup> ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhùm má huì lhum lhum kut é noqkuq hpúng lé le, dang kyô kat lhê.

<sup>3</sup> Nga-nhông é Íwa Garai Gasang eq Yhumsing Yesuq Hkrisduq chyáng má é, jeju eq nguingón hkyô gi, nungmoq chyáng ru joq nyî sháng gaq ô!

### *Jeju Hkya-ôn É Hkyô Eq Kyûdung Dang*

<sup>4-5</sup> Ngò gi, Yhumsing Yesuq lé nang lumjing é hkyô lé le, sân-yúng bang ban-shoq lé nang chyitdap é hkyô lé le, wó gyô é yanmai, ngò kyûdung é hkûn, nang lé myit bûn nyî luí, hkâ-nhám le ngá é Garai Gasang lé jeju hkya-ôn nyî lhê.

<sup>6</sup> Ngò gi, Hkrisduq é matú nga-nhông chyáng bo tô é ge é mù lhumjup lé sê gyô é hkyô lé, nang wó yù sháng gaq nghû, nang é lumjing hkyô lé, nang saksé hkâm é má akyû htoq râ matú, kyûdung byî nyî lhê.

<sup>7</sup> Náng é chyitdap myit gi, ngo lé gyai gabú nhang é eq wum-o wó yù nhang ri; hkâsu mù gâ le, gumang hpó ê, náng é yanmai, sân-yúng bâng é i-myt má nguingón yuqyo é hkyô wó yù bekô nghut ri.

### *Onesimu É Matú Tôngbán Byî É Hkyô*

<sup>8</sup> Haù su mù, nang kut gíng é muzó hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haù wó kut nhang lhê nghut kôlhang, chyitdap myit dông za nang lé pying kat lhê.

<sup>9</sup> Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí,

<sup>10</sup> ngò kyum hut huì nyi é u lé ngá zo dut lo é Onesimu é matú nang lé ngò dúng tôngbán kat lhê.

<sup>11</sup> Yhang gi, hí hpyang náng é matú akyû a bo é nghut kôlhang, ahkuí gi, náng é matú le, ngá é matú le, akyû bò bê nghut ri.

<sup>12</sup> Ngò nhik htông é Onesimu lé náng chyáng dum taù nhang kat lhê.

<sup>13</sup> Haù gabú danglu é yanmai, ngò htóng lúng nyi é má náng é malaí ngo lé garúm râ matú, yhang lé ngò shuì nyi to naù kôlhang,

<sup>14</sup> ngò gi, nang myit a huì le haì le a kâm kut. Hau é yanmai, ngò, nang lé kut nhang é dông a nghut e za, nang ô nau é dông kut é san za nghut sháng gaq.

<sup>15</sup> Hkâsu mù gâ le, náng chyáng mai yhang rayoq rabun zo gâng nyi é gi, yhang dum taù lò mù hkâ-nhám le nang eq rahá dum wó nyi nyi râ matú nghut lhê abe.

<sup>16</sup> Yhang gi, htâng hpyang, jùn rayuq dông a nghut e za, jùn htoq má je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq dông le, Yhumsing Yesuq má gumang hpó rayuq dông le, je riyhang chyitdap râ sù dut bê nghut ri.

<sup>17</sup> Haù mù luí, nang, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq.

<sup>18</sup> Yhang, nang lé rajung jung shut pyâm é nghut le le, chyin dap tô é nghut le le, haù gi, ngá chyáng dap é chyin nghû sôn yù aq.

<sup>19</sup> Ngò, Poluq gi, chyin haù xap râ nghû luí, ngá loq eq yhang kê kat kôlhang, nang yhang lhang, ngo lé asak chyin xap râ sù nghut é lé bûn nham aq.

<sup>20</sup> Nghut bê, gumang hpó ê, nang é yanmai, haù Yhumsing má ngò gabú é hkyô wó yu nyi sháng gaq, Hkrisduq má ngá é i-myt lé lhoq ngui lhoq ngón byî é dông, shî, ngò pying kat é dang lé gyo byi laq.

<sup>21</sup> Nang gi, ngò taì kat é htoq má je lhom kut râ nghut é lé, hkyak za sé luí, ngò kê kat é nghut lhê.

<sup>22</sup> Hau htoq agó, ngá é matú nyi râ gok lajang láng aq. Hkâsu mù gâ le, nungmoq kyûdung byî é yanmai, ngò gi, nungmoq chyáng dum wó jé râ lé myit myoqbyu nyi lhê.

<sup>23</sup> Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri.

<sup>24</sup> Ngá é htúq luq htúq bang nghut é Markuq, Aristakuq, Demaq, Lukaq pé le, nàng lé shi-kyâm kat akô.

<sup>25</sup> Yhumsîng Yesuq Hkrisduq é jeju gi, nungmoq é woi-nyí eq rahá za ru joq nyî sháng gaq ô!

## HEBRE Pê Chyáng Hun Kat é Laiká (Hebrews)

*Garai Yhangzo Gi, Maumang Lagyô Pé  
Htoq Je Gyaú É Hkyô*

<sup>1</sup> Laí ló bê ipyat pé má, Garai Gasang gi, nga-nhúng é íchyí íwâ pé lé myiqhtoí pé dông alhîng lhîng eq adông dông mai dáng nyo wú bê nghut lhê.

<sup>2</sup> Nghut kôlhang, ló htâng é buinyì shí pé má, Yhang gi, Yhâng Zo dông mai nga-nhúng lé dang nyô bê nghut ri; Yhang gi, lhunglháng lé sîng sù dut râ matú haú Zo lé masat to mù, Zo dông mai, nyì mi-nyì, joq mijoq lé hpan to bê nghut ri.

<sup>3</sup> Haú Zo gi, Garai Gasang é hpung-wup shîngkang duqbó é hkyô eq Yhâng é gunghkyâng isâm roq nghut nyì mù, lhunglháng lé Yhâng é a-tsam byíng é dâng èq zuí zîng tô ri. Yhang gi, yubak mara lé lhoq sâ-n-yúng é hkyô lé ban kut é htâng, mauhkûng htoq má Hkikhkam dik Sù Garai Gasang é loqyo hkyam má zung to bê nghut ri.

<sup>4</sup> Haú mù luí, Yhang gi, maumang lagyô pé é myîng htoq gyaú é myîng lé wó sing yù bê nghut é eq rajung za, yhangmoq htoq je riyhang gyaú sù dut bê nghut ri.

<sup>5</sup> Hkâsu mù gâ le, Garai Gasang gi, "Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê."✧

ga le, dum, "Ngò gi, Yhâng Wa dut râ nghut mù, Yhang gi, Ngá Zo dut râ nghut lhê."✧

ga le, maumang lagyô hká yuq lé hkâ-nhám wá taí wú é nghut lhê lú?

<sup>6</sup> Dum, Garai Gasang gi, Yhâng é zomún lé mingkan shut nhang hâng kat é hkûn,

"Ngá é maumang lagyô pé banshoq gi, Yhang lé noqkuq kó sháng gaq."✧

ga taí ri.

<sup>7</sup> Maumâng pé eq séng luí Garai Gasang taí é má,

"Yhang gi, Yhâng é maumang lagyô pé lé lai su dut nhang mù, Yhâng é dui-nhâng

zoshâng wuì lé, myishâm pé su dut nhang é nghut ri."✧

gâ ri.

<sup>8</sup> Nghut kôlhang, haú Zo eq séng luí, Yhang gi,

"Garai Gasang ê, Náng é hkohkâm-tanghkuq gi, pyat dedu ahtum abyuq gîng nyì mù,

Náng é dingmán hkyô gi, Náng é mingdán lé uphkan é hkyô dut râ nghut lhê.

<sup>9</sup> Nàng gi, dingmán hkyô lé chyitdap bê nghut mù, agè ashop é hkyô lé a ngui byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xù but byí é dông, Náng é luzúm wui htoq je lhoq gyaú to bê nghut ri."✧

ga taí ri.

<sup>10</sup> Hau htoq agó, Yhang gi,

"Yhumsîng ê, Nàng gi, a-nham sâng-hi má myidàm é apùn awang lé hi tô é nghut mù,

mauhkûng pé gi, Náng é loqmú chyat nghut ri.

<sup>11</sup> Haú pé gi, htên byoq byuq râ nghut lhê; nghut kôlhang, nàng gi, ru gîng nyì râ nghut lhê; haú pé banshoq gi, mebu su xau byuq râ nghut lhê.

<sup>12</sup> Nàng gi, haú pé lé, bumó lé su dîng yup râ nghut lhê; Nàng gi, haú pé lé, mebu su htaí pyám râ nghut lhê.

Nghut kôlhang, Nàng gi, rajung za ru gîng nyì râ nghut mù, Náng é zanwut pé gi, hkâ-nhám le htûm râ a nghut."✧

ga le taí ri.

<sup>13</sup> Garai Gasang gi,

"Ngò, náng é gye pé lé, náng é hkyî nang tanghkuq kut pyám byí é hkyíng jé shoq,

Ngá é loqyo hkyam shut zung nyì shi aq."✧ ga maumang lagyô hká yuq lé hkâ-nhám wá taí wú é lú?

<sup>14</sup> Maumâng pé banshoq gi, hkyi yù hkyô lé hkam yù râ nghut é bang lé dojaú râ matú, nhang kat huí é mù wùn woi-nyí pé chyat za nghut akô, a nghut kó lú?

## 2

*Sadiq Byi É Hkyô*

<sup>1</sup> Haû mù luî, nga-nhúng gi, châng nghoq ló byuq é a hui zo sháng gaq, haû nga-nhúng wó gyô yu to bê hkyô lé je riyhang rago châng nyi râ dut lê.

<sup>2</sup> Hkâsu mù gâ le, maumang lagyô pê èq taí bê mungdang gi, gíng nyi mù, shut shaí lu laí é hkyô eq jino a gyô é hkyô hkangmó kut é sù gi, yhumsíng eq gíng é mara dam byí é hui zo kô é nghut le gi,

<sup>3</sup> nga-nhúng gi, haû-í yhang gyaú é hkyi yù hkyô lé haí su a ngàm kut é nghut jáng, nga-nhúng hkâsu wó hpang lut râ lú? Hkyi yù hkyô haû gi, haû Yhumsing èq hí taí pyo htoq é nghut mù, Yhâng chyáng mai wó gyô yu é bang gi, haû hkyô têng é lé, ngamoq chyáng saksé shit bekô nghut ri.

<sup>4</sup> Garai Gasang le, kumlhá pé, mauhpo muzó pé, laklaí kumlhá myo myo eq, Yhang ô nau é eq rajung za Chyoiyúng Woinyí chyunghuq pé lé gàm byí é dông mai, haû hkyô lé saksé shit bê nghut ri.

*Hkyi Yù Hkyô Hpông Byi Sù*

<sup>5</sup> Garai Gasang gi, maumang lagyô pé lé, ngamoq taí nyi é jé lô râ mingkan lé, uphkâng nhâng rá a nghut.

<sup>6</sup> Rayuq yuq mai, rawò má saksé hkâm tô é gi,

"Byù gi, haí wá nghut mù, Nàng, yhang lé bûn nyi lê lú?

Byu Yhangzo gi, haí wá nghut mù, Nàng, yhang lé wú gôn nyi lê lú?

<sup>7</sup> Nàng gi, yhang lé, maumang lagyô pê htoq ratsuí lhoq nyhum to bê nghut ri.

Nàng gi, yhang lé, hpungwup shing kang eq aróng bò nhâng mù,

<sup>8</sup> jung hkangmó lé, yhâng é hkyiwa ô má tô to bê nghut ri."\*

gâ ri. Jung hkangmó lé yhâng é a-ô má tô to bê gâ é gi, Garai Gasang, haí lhang a myhit to loshoq yhang uphkâng é a-ô má tô to bê nghut é lé gâ lê. Nghut kôhlang, yhang é a-ô má tô tô é jung hkangmó lé, ahkuí, nga-nhúng a myàng shí é za nghut lê.

<sup>9</sup> Nghut kôhlang, nga-nhúng gi, maumang lagyô pê htoq ratsuí zo lhoq nyhùm huí é sù Yesuq lé myang é nghut lê. Yhang

gi, Garai Gasang jeju mai, yuq hkangmó é matú shí hkâm byí é hui zo sháng gaq ga, shí-nò jamjau hkyô lé hkâm zo bê nghut é yanmai, ahkuí, Yhang lé hpungwup shing kang eq aróng bò nhâng bê nghut ri.

<sup>10</sup> Zo wuí myo myo lé hpungwup shing kang wó hkam yù nhâng sháng gaq ga, jung hkangmó lé Yhang é matú chyat eq Yhang dông mai chyat joq nyi nhang é Garai Gasang gi, wuîhke jamjau hui nhang é dông, yhangmoq é hkyi yù Sù lé lhoq gumjup byi râ matú htuk âng nyi ri.

<sup>11</sup> Haû byu pé lé chyoiyúng nhang é Sù eq lhoq chyoiyúng huí é bang gi, ikun ralhùm za mâ é bang chyat nghut lê. Haû mù, Yesuq gi, yhangmoq lé, gumang wuî nghû râ lé a hoq é nghut lê.

<sup>12</sup> "Ngò gi, Náng myíng lé, Ngá gumang wui chyáng taí pyô râ nghut lê;

Ngò gi, shiwa hpông é myoq hí má, Nang lé hkya-on mahkôn hkôn râ nghut lê."\*

ga, Yhang taí ri.

<sup>13</sup> Yhang gi,

"Ngò gi, Yhang lé lumhkau nyi râ nghut lê."\*

ga le dum taí ri. Hau htoq agó,

"Ngò gi, Garai Gasang ngo lé byí é zoshâng wuî eq shí má nyi nyi lê."\*

ga, Yhang dum taí ri.

<sup>14</sup> Haû zoshâng wuî gi, sui sho eq nghut é yanmai, Yhang le, yhangmoq é xângzo gùng bo hkam yù bê nghut ri. Hau é yanmai, Yhang gi, Yhâng é shí-nò hkyô dông mai, shí-nò hkyô é a-tsam lé zuí zing é sù nghut é nat Tsadán lé wó lhoq htên pyám râ eq,

<sup>15</sup> yhangmoq é shí-nò hkyô lé gyuq é èq, yhangmoq é asak gón lé jùn dông zuí zing to huí é bang lé, wó lhoq lhut râ nghut lê.

<sup>16</sup> Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lê.

<sup>17</sup> Haû nghut é yanmai, Yhang gi, Garai Gasang lé dojaú é má shogyo nhikmyîn é eq lhumzuí é hkyangjong mó wó dut râ eq, byu pé é yubak marâ é matú shíhtaí gunglik hkungga wó kut râ matú, hkyô hkangmó

má Yhâng é gumang wuì eq dù shoq kut é hui râ dut é nghut lhê.

<sup>18</sup> Yhang gi, gunglaú huì é hkûn, Yhânggùng yhang jamjau hui zo bê nghut é yanmai, gunglaú huì nyi é bang lé wó garúm yu é nghut lhê.

### 3

#### *Yesuq Gi, Mosheq Htoq Gyaú É Hkyô*

<sup>1</sup> Haú mù luí, mauhkúng mai wut yù huì é, chyoiyúng é gumang wuì ê, lagyo eq hkyangjong mó nghû nga-nhúng yín yu é Yesuq é hkyô lé rago myit wú keq.

<sup>2</sup> Mosheq, Garai Gasâng é yhûm gón má lhumzuí é su, Yesuq le, Yhang lé masat yù sù Garai Gasâng chyáng lhumzui sù dut bê nghut ri.\*

<sup>3</sup> Yhûm kut sù gi, yhûm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri.

<sup>4</sup> Hkâsu mù gâ le, yhûm hkangmó gi, rayuq yuq èq saí é chyat nghut ri. Nghut kôlhang, Garai Gasang gi, jung hkangmó lé saí é sù nghut lhê.

<sup>5</sup> Mosheq gi, Garai Gasâng é yhûm gón má dui-nhâng zoshâng rayuq dông lhumzui mù, Garai Gasang taí râ nghut é lé saksé hkám bê nghut ri.

<sup>6</sup> Nghut kôlhang, Hkrisduq gi, lhumzuí é zo rayuq dông Garai Gasâng é yhûm lé up ri. Nga-nhúng kúm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zing nyi é nghut jáng, Yhâng é yhûm nghut nyí bê.

#### *A Lumjúng Bang Lé Sidiq Byí É Hkyô*

<sup>7</sup> Haú mù luí, haú Chyoiyúng Woi-nyí taí é eq rajung za,

"Hkû-nyí, nungmoq gi, Yhâng é danghtê lé wó gyo kô é nghut jáng,

<sup>8</sup> yoso má Yhang lé chyâm kô é u lé, gumlau toq é hkûn nungmoq é íchýí íwâ pé kut kô é su, nungmoq é i-myit lé hkâlhoq htan to kó.

<sup>9</sup> Nungmoq é íchýí íwâ pé gi, myi xê zàn yhang Ngò kut é muzó lé myàng kôle,

yoso haú má Ngo lé chyam lik bekô nghut ri.

<sup>10</sup> Haú nghut é yanmai, Ngò gi, ipyat haú lé nhikjum yo mù,

'Yhangmoq é myit nhiklhum gi, hkâ-nhám le hkyô nghoq byuq akô;

yhangmoq gi, ngá é hkyô pé lé a sé kômù nghut ri.' nghû taí é nghut lhê.

<sup>11</sup> Haú mù, 'Ngá é bánno jowò má yhangmoq hkâ-nhám le wó wâng kó râ a nghut.' nghû, Ngò, nhikjum yô é eq dakâm dang taí bê nghut lhê."\*

gâ ri.

<sup>12</sup> Gumang wuì ê, nungmoq mâ é ó yuq le, haú rù dui nyi é Garai Gasâng chyáng mai, lhing taú ló byuq sê é, yubak mara byíng é, a lumjúng é i-myit a bò sháng gaq, sidiq nyi keq.

<sup>13</sup> Nungmoq gi, ó yuq le, yubak marâ é mhaú zô é hkyô èq i-myit lhoq htan pyâm é a hui kó sháng gaq, "hkû-nyí" nghû ru wó taí nyi nyi gi, nyí wuì, rayuq eq rayuq myit wum byí lhum nyi keq.

<sup>14</sup> Nga-nhúng gi, sâng-hi mai wó to bê myit lùm hkyô lé, ló htáng shoq zuí gíng nyi é nghut jáng, Hkrisduq eq chôm zùm yap nyi é bang dut bê nghut ri.

<sup>15</sup> Haú gi,

"Hkû-nyí, nungmoq, Yhâng é danghtê lé wó gyô é nghut jáng, gumlau toq é hkûn, nungmoq é íchýí íwâ pé kut kô é su, nungmoq é i-myit lé hkâlhoq htan to kó."\*

ga taí é eq rajung za nghut ri.

<sup>16</sup> Wó gyô yù mù, gumlau toq é bang gi, ô pé nghut akô lhú? Haú bang banshoq gi, Egutuq ming mai Mosheq èq shuí htoq lo é bang nghut bum lhê, a nghut kó lhú?

<sup>17</sup> Myi xê zàn yhang Garai Gasang lé nhikjum yó nhang é bang gi, ô pé nghut akô lhú? Haú bang gi, mara kut shut mù, yoso má shi leq byuq é bang nghut bum lhê, a nghut kó lhú?

<sup>18</sup> Jìno a gyô bùm kô é nghut jáng, Yhâng é bánno jowò má yhangmoq hkâ-nhám le wó wâng kó râ a nghut ga, Garai Gasâng èq dakam é bang gi, ô pé nghut akô lhú?

\* **3:2** Bun zo shí eq bun zo 5, 6 lhum mâ é *Garai Gasâng é yhûm gâ é gi*, Garai Gasâng é byu pé lé gâ é nghut lhê. ✧ **3:11** Hkya-on 95:7-11 ✧ **3:15** Hkya-on 95:7-8

<sup>19</sup> Haû mù, yhangmoq a lumjìng kô é yanmai, a wó wàng kô é lé, nga-nhúng myang é nghut lhê.

## 4

### *Garai Gasâng É Byu Pê É Matú Bánno Buinyì Đông Nghut É Bánno Jowò*

<sup>1</sup> Haû nghut mù luí, Garai Gasâng é bánno jowò má wàng rà danggidiq ru gîng nyì ashî nghut é yanmai, nungmoq mâ é ó yuq le, haú má a hkyit hkap é a dut rà matú, nga-nhúng sidiq nyì sháng.

<sup>2</sup> Hkâsu mù gà le, yhangmoq lé gabú danglù haû hko kyo bê su, ngamoq lé le hko kyo bê nghut lhê; nghut kôlhang, yhangmoq wó gyô é mungdang gi, yhangmoq é matú akyú a bò, haû mù gà le, haû wó gyô é bang gi, lumjìng myit mai a lhom hap yù kô é yanmai nghut ri.

<sup>3</sup> Nga-nhúng lumjìng bê bang za, bánno jowò haú má wó wang é nghut lhê. Haû hkyô gi,

"Haû mù, 'Ngá é bánno jowò má yhangmoq hkâ-nhám le wó wàng ko rà a nghut.' nghû, Ngò, nhikjum yô é eq dakâm dang taí bê nghut lhê."✧

ga Garai Gasang taí bê eq rajung za dut é nghut ri. Nghut kôlhang, Yhâng é muzó gi, mau htoq xâng hkun mai ban kut to bê nghut lhê.

<sup>4</sup> Hkâsu mù gà le, "Garai Gasang gi, nyhit nyí nghû rà buinyì má Yhâng é muzó ban-shoq mai bánno bê nghut ri."✧ gà é dang pé má, haû nyhit nyí nghû rà buinyì eq sêng é hkyô lé rawò má Yhang taí tô ri.

<sup>5</sup> Bánno jowò joq é eq séng luí, Yhang dum taí tô é gi, "Ngá é bánno jowò má yhangmoq hkâ-nhám le wó wàng kô rà a nghut."✧ gà ri.

<sup>6</sup> Bánno jowò haú má wàng rà bang ram nyi é danggidiq joq tô ashî nghut ri; hí hkûn, gabú danglù haû wó gyô wú bê bang kúm gi, yhangmoq jîno a gyo kô é yanmai, a wàng kô é nghut lhê.

<sup>7</sup> Haû mù luí,  
"Hkû-nyí, nungmoq, Yhâng é danghtê lé wó gyo kô é nghut jáng, nungmoq é i-myit lé hkâlhoq htân kó."✧

gâ é lé, ngò hí lé taí bê eq rajung za, Garai Gasang gi, gyai myáng é htâng má Dawiq đông mai taí é hkûn, "Hkû-nyí" gà é buinyì ra-nyí dum masat to bê nghut ri.

<sup>8</sup> Hkâsu mù gà le, yhangmoq lé, Yoshuq eq bánno jowò byi bê ru nghut le gi, Garai Gasang gi, htâng má, gotû buinyì eq séng luí taí rà a nghut lo.

<sup>9</sup> Haû mù luí, Garai Gasâng é byu pê é matú gi, Bánno buinyì đông nghut é bánno jowò ru joq tô ashî nghut lhê.

<sup>10</sup> Hkâsu mù gà le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno rà nghut lhê.

<sup>11</sup> Haû nghut mù, yhangmoq é jîno a gyo hkyô é alik lé cháng mù leqbat é, ó yuq le a bò sháng gaq, nga-nhúng gi, bánno jowò haú má wó wàng shoq, a-tsam bo é í shikut sháng.

<sup>12</sup> Hkâsu mù gà le, Garai Gasâng é mungdang gi, rû dui nyi é eq a-tsam bo é nghut lhê. Haû gi, shamsó íshut dap é sham htoq má je htoq é nghut mù, myit nhiklum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haû gi, nga-nhúng myit é hkyô pé eq myit sôn é hkyô pé lé wó jéyáng é nghut lhê.

<sup>13</sup> Hpan tô é lhunglhang gi, Garai Gasâng é hí mai wó haq pyâm é haû le a joq é nghut lhê. Jung hkangmó gi, nga-nhúng, jihpán shit ra rà Su é myoq hí má a wó nghop tô é hkyô, de de dut é nghut lhê.

### *Je Gyaú É Hkyangjong Mó Yesuq*

<sup>14</sup> Haû mù luí, nga-nhúng gi, Garai Gasâng é Yhangzo Yesuq nghut sù, mauhkûng pé shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjìng hkyô lé ging ging myhik zing nyì sháng.

<sup>15</sup> Hkâsu mù gà le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkangmó má gunlau é huí wú kôlhang mara a bo é sù hkyangjong mó lé sheq wó é ru nghut lhê.

<sup>16</sup> Haû mù luí, nga-nhúng gi, shogyo nhikmyîn é hkyô wó yù rà eq, nga-nhúng ra

châ é u má nga-nhúng le wó garúm râ jeju lé myang hô sháng gaq, hkyak lum é myit mai Garaí jeju tanghkuq shut chyâng htep ê sháng.

## 5

<sup>1</sup> Hkyangjong mó yuq hkanmó gi, byu pê chyáng mai hkyin htoq yû huí é nghut mù, mara pê é matú, chyunghuq pé eq hkungga pé nhông byi hkyô nghut é, Garaí Gasang eq sêng é muzó pé má, yhangmoq é gunglik dông, hkyin masat to huí é bang nghut akô.

<sup>2</sup> Yhânggùng yhang gi, wum nyhóm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é dông wó shuí-û é nghut lê.

<sup>3</sup> Wum nyhóm é yanmai, yhang gi, byu pê é marâ é matú le, yhanggùng yhang é marâ é matú le, hkungga nhông byi râ dut é nghut lê.

<sup>4</sup> Ó yuq le, yhumsing gùng yhumsing aróng haû lé wó yu é a nghut; Arun lé su, Garaí Gasâng eq wut yu é hui jáng sheq wó é nghut lê.

<sup>5</sup> Haû eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garaí Gasang sheq, Yhang lé, "Nàng gi, Ngá Zo nghut ri; Ngò, hkû-nyí Náng Wa dut bê nghut lê."✧

ga taí é nghut lê.

<sup>6</sup> Hau htoq agó,

"Nàng gi, Melahkizedek wó é hkyangjong ayá hkyô dông mai ahtum abyuq hkyangjong rayuq nghut nyi ri."✧  
ga, gó wô má le, Yhang taí to ashî nghut ri.

<sup>7</sup> Yesuq gi, myidàm htoq má asak dui nyi é buinyi pé má, Yhang lé, shi é mai wó hkyi yû Su chyáng, ngaubyi ngau-nhap eq wut garû é eq, kyûdung é eq dung tôngbán bê nghut mù, Yhâng é hkungga gíng é ap nóng hkyo é yanmai, gyo byi é hui bê nghut ri.

<sup>8</sup> Yhang gi, Zo rayuq nghut to kôle, Yhang hui zô é wuîhke jamjau hkyô mai jìno gyo hkyô wó mhoq yû bê nghut ri.

<sup>9</sup> Yhang gi, lhoq gumjup huí é hkûn, Yhang é jìno gyo bang banshoq é matú,

ahtum abyuq é hkyi yû hkyo é awang dut byuq bê nghut é eq,

<sup>10</sup> Melahkizedek wó é hkyangjong ayá hkyô dông mai hkyangjong mó dut râ matú, Garaí Gasâng eq hkyin masat é hui bê sù nghut ri.

### *Woi-nyí Má Wáng Ra Bê Hkyô*

<sup>11</sup> Ngamoq gi, shí hkyô eq séng luí taí râ gyai joq lhê; nghut kôlhang, nungmoq gi, ra lui za a sê gyô é bang nghut kô é yanmai, taí sân kyo wuî ri.

<sup>12</sup> Gè gè ga jáng, ahkui lhê ahkyíng má, nungmoq gi, sará dut gíng bê bang nghut lhê; nghut kôlhang, Garaí Gasâng é mung-dang mâ é tengmán hkyo é awang lé, rayuq yuq eq nungmoq lé dum taû mhoq byi râ ru dut nyi akô nghut ri. Nungmoq gi, htan é zoshuq râ é bang a nghut, naú wing râ é bang ru nghut nyi ashî kó myhi-nhung!

<sup>13</sup> Naú wing shuq râ é sù ó yuq le, zonú nghut nyi ashî mù, dingmán é hkyô lé mhoq-qshit é má a mán shi nghut ri.

<sup>14</sup> Nghut kôlhang, htan é zoshuq gi, ge é hkyô eq agè ashop é hkyô lé wó sê gam hkoq yû shoq, hkâ-nhám le yhumsing gùng yhumsing lhoq mhân yu nyi é, kô dîng bê bâng é matú ru nghut lê.

## 6

<sup>1</sup> Haû mù luí, nga-nhúng gi, Hkrisduq eq séng é mhoqshit hkyô awang lé tô to mù, myit kô dîng é hkyô shut xoq sô ê sháng. Nga-nhúng gi, shí-nò hkyô shut shuí jé é muzó mai myit lhîng hkyo é, Garaí Gasang lé lumjîng hkyo é,

<sup>2</sup> bapisma pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq séng é mhoqshit hkyo é, apûn awang dum hí nó a ra lô é nghut lê.

<sup>3</sup> Garaí Gasang gyô é nghut jáng, nga-nhúng gi, myit kô dîng hkyô shut xoq so râ nghut lê.

<sup>4</sup> Myoq lhoq bóng é radàm hui bê bang, mauhkûng chyunghuq lé myang hap yû bê bang, haû Chyoiyúng Woi-nyí lé chôm hkam yû bê bang,

<sup>5</sup> Garaí Gasâng é mungdâng é gè hkyô eq jé lo nyi é ipyat é a-tsam pé lé myang chyam wú bê bang,



<sup>6</sup> yhangmoq hpuq lhik ló byuq é nghut le gi, hká đông lé myit lhing dum ge wó rã a nghut lo, haí mù gã le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyâm kô é nghut lhê.

<sup>7</sup> Yhâng ahtoq má wo gyûn é mau wuî lé shuq yû mù, yò mù saí bãng é matú akyû bo é hôwa nuqhyí lhoq htoq byí é maumyí gi, Garai Gasâng é shimân jeju myang hap yu é nghut ri.

<sup>8</sup> Nghut kôlhang, zu gãm eq myoq gãm yuq htoq nhang é maumyí gi, akyû a bò mù, nhing pyâm é hui zo rã lé chiq rã ri. Haû gi, ló htang má nyhê hkyô pyâm é hui rã nghut lhê.

<sup>9</sup> Nghut kôlhang, chyitdap é gumang wuî ê, ngamoq gi, haû su nghû taí é nghut kôlhang, nungmoq é hkyi yù hkyô eq sêng é je ge é jung pé, nungmoq wó bekô rã nghû hkyak myit lum tô lhê.

<sup>10</sup> Garai Gasang gi, a tara é sũ a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyi é đông, Yhang lé nungmoq chyitdap é myit shit kô é hkyô lé le, a tô-myí rã nghut lhê.

<sup>11</sup> Ngamoq gi, nungmoq é i-myit myoqbyù hkyô wó bying jup rã matú, nungmoq yuq hkangmó ipyat htum shoq xoq shikut nyi kó rã lé gyai ô nau ri.

<sup>12</sup> Ngamoq gi, nungmoq lagon bang dut byuq rã lé a ô nau é za, Garaí danggidiq byí to bê é lé, lumjing myit eq myit hing hkyô đông mai hkam yu é bang su châng kut kó rã lé ô nau é ru nghut lhê.

### *Garai Gasâng É Danggidiq Gîng Nyi É Hkyô*

<sup>13</sup> Garai Gasang gi, Abraham lé danggidiq tô é hkûn, Yhâng htoq gyaú é dakâm mying lang rã rayuq lhang a nyi é nghut mù, Yhânggùng lé Yhang lang luí dakam é gi,

<sup>14</sup> "Ngò gi, nang lé teng yhang shimân byi mù, nang lé awut ashín myo myo byi rã nghut lhê."\* gã ri.

<sup>15</sup> Haû mù, Abraham gi, myit hing hing lãng yu é htang má, byí tô é danggidiq lé wó yû bê nghut ri.

<sup>16</sup> Byu pé gi, yhangmoq htoq gyaú su é mying lé lang luí, dakâm kô é eq, yhangmoq dakam é dang lé saksé kut mù, dang-rhâng é hkyô pé banshoq lé lhoq pân pyâm akô nghut ri.

<sup>17</sup> Garai Gasang gi, Yhang myit hpyit tô é hkâ-nhâm le a htaí lhik é hkyô lé, danggidiq byí tô é lé hkam yù rã bãng chyáng san za shit nau ri; haû mù luí, dakâm dang eq lhoq gîng to bê nghut ri.

<sup>18</sup> Garai Gasang gi, mhaú a ge é yanmai, hkâ-nhâm le a htaí lhik é hkyô í hkat nghut é danggidiq eq dakâm dang joq é nghut mù, Yhang haû su kut é gi, nga-nhùng hí má tô to byí é myit myoqbyù hkyô lé myhik zing rã matú gaú é jowò shut hpang wàng bê bang nga-nhúng lé wum mó byí é dut rã matú nghut lhê.

<sup>19</sup> Nga-nhúng gi, myit nhiklhùm é sham-toq goknghe đông myit myoqbyù hkyô haû lé wó é nghut mù, haû gi, gîngtîng é eq gaú é hkyô nghut ri. Myit myoqbyù hkyô haû gi, mauhkûng noqkuq yhùm mâ é pãngyang ahkaú mâ é sãn-yúng gok má jé wang é nghut ri.

<sup>20</sup> Jowò haû gi, nga-nhùng é akyu é matú, nga-nhùng é hí má wàng byí é sũ Yesuq wang jé é jowò nghut ri. Yhang gi, Melahkizedek wó é hkyangjong ayá hkyô đông mai, ahtum abyuq é hkyangjong mó dut bê nghut ri.

## 7

### *Hkyangjong Melahkizedek É Hkyô*

<sup>1</sup> Melahkizedek gi, Salem myuq é hkohkâm eq Myhang Htâng é Garai Gasâng é hkyangjong nghut ri. Yhang gi, hkohkâm pé lé sat ùng pyâm luí dum taû lo é Abraham lé hui mù, shimân byi bê nghut ri.

<sup>2</sup> Haû mù, Abraham gi, wó lo é jung hkangmó mâ é, xê gambùm mâ é ragambùm, yhang lé byi bê nghut ri. Sâng-hi lhê é Melahkizedek é mying lichyúm gi, "dingmán hkyo é hkohkâm" gã é nghut mù, htang lhê é "Salem é hkohkâm" gã é gi, "nguingón hkyo é hkohkâm" gã é nghut lhê.

\* 6:14 Apûn 22:17

<sup>3</sup> Yhâng é înu îwa é hkyô eq byùxik labaû le, hi é buinyi eq asak htûm é hkyô le a kê to nghut ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

<sup>4</sup> Yhang hkâ-í hkik lhê nghû é lé, myit wú keq. Haû îchyí îwa Abraham lháng gi, wó lo é mâ é xê gambùm mâ é ragambùm, yhang lé byi ri-nhung!

<sup>5</sup> Hkyangjong dut bang Lewiq é awut ashîn pé gi, yhangmoq é gumang wui, Abraham mai nyi gyó lo é bang nghut kôle, tarâ má bo é eq rajung za, haû bâng chyáng mai xê gambùm mâ é ragambùm lé hkyui yù râ dut é bang nghut akô.

<sup>6</sup> Nghut kôlhang, Melahkizedek gi, Lewiq mai gyó lo é amyû a nghut kôle, danggidiq pé wó to sù nghut é Abraham chyáng mai xê gambùm mâ é ragambùm hap yù mù, shimân byî ri.

<sup>7</sup> Shimân byi sù gi, shimân byî é lé hkam yù sù htoq je gyaú sù nghut é lé, ó yuq le úng-áng râ hkyô a joq é nghut lhê.

<sup>8</sup> Hkyangjong pé eq séng luí ga jang, shi byuq sê é byu èq, xê gambùm mâ é ragambùm lé hkyui yu é nghut lhê; nghut kôlhang, Melahkizedek eq séng luí nghut jáng, asak dui nyi é ga taí pyô byî é huí su èq hkyui yu é nghut lhê.

<sup>9</sup> Xê gambùm mâ é ragambùm hkyui yù sù, Lewiq lháng gi, Abraham dông mai xê gambùm mâ é ragambùm byi bê nghû wó taí ri.

<sup>10</sup> Haí mù gà le, Melahkizedek gi, Abraham lé huí é hkûn, Lewiq gi, yhâng é îchyí îké é gungdu hkaû má ru bo tô ashî nghut ri.

### *Melahkizedek Eq Dù É Yesuq*

<sup>11</sup> Haû Lewiq hkyangjong amyû pé é ipyat má, byu pé gi, jep é tarâ lé wó yu bùm kô é nghut mù, hkyangjong ayá haû mai gumjup hkyô wó yû kô é nghut le gi, haí mù luí, Arun wó é hkyangjong ayá hkyo dông a nghut é za, Melahkizedek wó é hkyangjong ayá hkyo dông lo é sù gotû hkyangjong rayuq ra shirâ lhú?

<sup>12</sup> Hkâsu mù gà le, hkyangjong amyû htaí é hkûn gi, tarâ le htaí yhang htaí râ dut é nghut lhê.

<sup>13</sup> Haû su nghû taí é hkyô pé eq séng é Sû gi, gotû byuhú mâ é sù nghut mù, byuhú haû mai gi, ó yuq le hkungga gyap má dojaú wú é a nghut.

<sup>14</sup> Hkâsu mù gà le, nga-nhung é Yhumsîng gi, Yudaq byuhú mai gyó lo é awut ashîn nghut é hkyô, san za nghut nyi ri. Mosheq kúm gi, byuhú haû eq séng é hkyô má, hkyangjong pé eq séng luí haí lé a taí é nghut lhê.

<sup>15</sup> Melahkizedek eq dù é gotû hkyangjong rayuq pô htoq bê nghû, ngamoq taí bê hkyô gi, je riyhang san za dut bê nghut ri.

<sup>16</sup> Yhang gi, îwa rayuq é awut ashîn pé nghut râ lhê gà é tarâ dông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê.

<sup>17</sup> Hkâsu mù gà le,  
"Nàng gi, Melahkizedek wó é hkyangjong ayá hkyô dông mai, ahtum abyuq hkyangjong rayuq nghut nyi ri."\*

ga Yhang eq séng luí taí pyô tô é nghut lhê.

<sup>18</sup> Haû hí lhê é cháng râ tarâ gi, wum nyhôm é eq akyû a bo é yanmai, tô pyám bê nghut lhê.

<sup>19</sup> Hkâsu mù gà le, haû jep é tarâ gi, gumjup hkyô haí a wó kut byî é nghut lhê. Haû mù, je ge é myit myoqbyù hkyô lajang byî é nghut luí, nga-nhung gi, myit myoqbyù hkyô haû mai Garai Gasâng chyáng wó chyâng htep ê é nghut lhê.

<sup>20</sup> Myit myoqbyù hkyô haû gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjong pé wó dut bekô nghut ri.

<sup>21</sup> Nghut kôlhang, Yesuq kúm gi,  
"Nàng gi, ahtum abyuq hkyangjong rayuq nghut lhê.'

ga haû Yhumsîng dakâm bê nghut mù,  
Yhang myit é hkyô htaí râ a nghut."\*  
ga, Yhang eq séng luí Garai Gasang taí é hkûn, dakâm dang haû mai hkyangjong rayuq dut bê nghut ri.

<sup>22</sup> Dakâm dang hau é yanmai, Yesuq gi, je ge é dangshikaq é pahkâm wò yù sù dut bê nghut ri.

<sup>23</sup> Hkyangjong pé myo myo nyi râ dut é gi, yhangmoq é muzó a wó xoq zui shoq shi

byuq hkyô èq hkûm zing pyám kô é yanmai nghut ri.

<sup>24</sup> Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zuí nyí rá nghut lhê.

<sup>25</sup> Haû mù luí, Yhang gi, Yhang đông mai Garai Gasâng chyáng lé jé é bang lé, hkânám le wó hkyi yu é nghut lhê; haî mù gâ le, Yhang gi, yhangmoq é matú dúng tôngbán byi nyi rá matú, rû dui nyi é sù nghut lhê.

<sup>26</sup> Yesuq gi, chyoiyúng é sù, mara hùn rá hkyô a bo é sù, sân-yúng é sù, yubak dap bang eq rahá a nghut shoq gotû san kut huí é sù, mauhkúng pè ahtoq má lhoq toq lhoq gyaú yu huí é sù nghut ri. Haû sù é hkyangjong mó gi, nga-nhúng rá é lé lajang byi rá htuk ang ri.

<sup>27</sup> Nyí nyi bui bui, yhumsing é marâ é matú hí hkungga nhông byi mù, byu pè é mara matú le hkungga nhông byi é gotû hkyangjong mó pé su, Yhang gi, a kut rá é sù nghut lhê. Yhang gi, Yhânggùng lé Yhang nhông byi é hkûn, yhangmoq é yubak marâ é matú banshoq radàm za hkungga nhông byi pyám bê nghut ri.

<sup>28</sup> Hkâsu mù gâ le, haû jep é tarâ gi, wum nyhôm é byu pé lé hkyangjong mó pé đông masat é nghut ri. Nghut kôlhang, Garai Gasang gi, haû jep é tarâ é htâng má lé jé é dakâm dâng èq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

## 8

### *Dangshikaq Asik É Hkyangjong Mó Yesuq*

<sup>1</sup> Ngamoq taí nyi é dangkâng gi, shí đông nghut lhê: Nga-nhúng gi, haû sù é hkyangjong mó lé wó é bang nghut lhê. Yhang gi, mauhkúng htoq má, Hkikhkam dik Sù Garaí é hkohkâm-tanghkuq é loqyô hkyam shut zùng to mù,

<sup>2</sup> byu èq saí é a nghut é za, haû Yhumsing èq saí é saksé zúm akying hkaû mâ é, sân-yúng dik gok má dojaú é sù nghut ri.

<sup>3</sup> Hkyangjong mó hkangmó gi, chyunghuq pé eq hkungga pé lé nhông byi rá matú

wò hun to huí é chyat nghut lhê. Haû mù luí, hkyangjong mó shí yuq le, rajung jung nhông byi ra rá nghut lhê.

<sup>4</sup> Yhang gi, mingkan htoq má nyi tô é ru nghut le gi, hkyangjong dut rá a nghut; hkâsu mù gâ le, jep é tarâ đông ga jang, chyunghuq nhông jaú é byu pé nyi to gù bê nghut lhê.

<sup>5</sup> Yhangmoq, sân-yúng dik gok má dojaú é hkyô gi, mauhkúng htoq má joq é azông eq wupzo đông nghut ri. Haû nghut é yanmai, Mosheq gi, saksé zúm saí rá nghut é hkûn, "Nang lé, bùm má tûn shit é azông eq rajung za jung hkangmó wó saí shoq kut aq."\* ga sidiq byi huí é nghut lhê.

<sup>6</sup> Nghut kôlhang, Yesuq, gyoro sô xoq byi é dangshikaq gi, axaû lhùm htoq má je gyaú é eq rajung za Yhang hap yu tô é dojaú hkyô gi, yhangmoq é dojaú hkyô htoq má je gyaú é nghut lhê. Haû mù, dangshikaq haû gi, je ge é danggidiq pè htoq má awang hi tô é nghut lhê.

<sup>7</sup> Hkâsu mù gâ le, sân-hi lhê é dangshikaq má rá é hkyô haî a bo é ru nghut le gi, gotû ra rá a nghut lo.

<sup>8</sup> Nghut kôlhang, Garai Gasang gi, byu pè chyáng mara bo é myàng mù, taí é gi, "Haû Israelaq é yhumbyù wui eq le, Yudaq é yhumbyù wui eq le,

Ngò, dangshikaq asik to rá ahkyíng jé lo nyi ri ga haû Yhumsing taí pyo ri.

<sup>9</sup> Haû gi, Ngò, yhangmoq é íchýí îwâ pé lé loq èq zui mù, Egotuq ming mai shuí htoq lo é hkûn,

yhangmoq eq tô tô é dangshikaq su dut rá a nghut.

Haî mù gâ le, yhangmoq gi, Ngá é dangshikaq lé a xoq cháng kô é nghut mù, Ngò gi, yhangmoq chyáng mai lhing ló byuq é nghut lhê ga haû Yhumsing taí pyo ri.

<sup>10</sup> Shî gi, ahkyíng haû laí é htâng má, Israelaq é yhumbyù wui eq Ngò to rá nghut é dangshikaq nghut lhê ga haû Yhumsing taí pyo ri.

Ngò gi, Ngá é tarâ pé lé, yhangmoq é i-myt má kat byi mù, yhangmoq é myit nhikhlum má kê to byi rá nghut lhê.

\* 8:5 Htoq Ló 25:40

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó râ nghut lhê.

11 'Haû Yhumsîng lé sé keq.' ga, yhâng é gumang hpó lé nghut nghut, yhâng é chyangnâm mâ é sù lé nghut nghut, mhoqshit é byù nyi râ a nghut lo,

haî mù gâ lé, yhangmoq lhunglhâng bang gi, tiq htáng sù mai kô htáng sù jé shoq Ngo lé sé kó râ nghut lhê.

12 Hkâsu mù gâ le, Ngò gi, yhangmoq é agè ashop hkyô lé mara hkyut pyâm byi mù, yhangmoq é mara pé lé dum a bun byi lo râ nghut lhê.<sup>☆</sup>

gâ ri.

13 Dangshikaq haû lé, Yhang "asik" gâ é gi, sâng-hî lhum lé, axau kut pyâm é nghut ri; xau ló byuq é haî le, hkâ-myhâng a myáng má byuq ló byuq râ nghut lhê.

## 9

### *Myidàm Saksé Zúm Má Noqkuq É Hkyô*

1 Sâng-hi lhê é dangshikaq gi, noqkuq râ htûngtarâ pé eq noqkuq râ myidàm sân-yúng dik gok bo é nghut ri.

2 Saî tô é saksé zúm é sâng-hi gok má gi, haû myibung tsûng jang, siboî eq haû nhông byî é muk joq mù, haû gok lé gi, Chyoiyúng Jowò ga myhîng ri.

3 Í dang nghû râ gok pán-gyang é ahkaû mâ é gok lé gi, Chyoiyúng Htâng é Jowò gâ é nghut lhê.

4 Gok haû má gi, namngón jung nyhê é hîng hkungga gyap eq hîng shup dangshikaq sidek joq ri. Dangshikaq sidek haû má gi, mannaq muk bo é hîng yam, ahaq nyún tô é, Arun é dumbáng eq, dangshikaq luqlong pé bo tô ri.

5 Dangshikaq sidek é ahtoq má gi, shîhtaî gunglik hkungga byi jang htoq má wup tô é, Hpungwup shingkang bò Sù é hkerubim\* pé joq tô ri. Nghut kôlhang, ngamoq gi, ahkuî haû pé lé jihkúm nuqguq a wó taî san kyo é nghut lhê.

6 Haû đông jung hkangmó ban lajang tô é hkûn, hkyangjông pé gi, ayang sâng-hi gok

má wàng mù, yhangmoq é dojaú muzó lé wùn waq bekô nghut ri.

7 Nghut kôlhang, ahkaû gok má gi, hkyangjong mó za, yhânggùng é matú le, a sé é za byu pé kut shut é marâ é matú le, nhông byi râ sui chûng mù, razàn má radàm za wang é nghut lhê.

8 Haû Chyoiyúng Woi-nyí gi, haû pé đông mai, sâng-hi é saksé zúm ru joq nyi nyi, haû Chyoiyúng Htâng é Jowò wàng hkyô a hpông shit shi é lé, tûn shit nyi ri.

9 Haû gi, ipyat shi é matú tûn shit é azông nghut mù, nhông byî é chyunghuq pé eq shigu hkungga pé gi, dojaú sù é i-myt lé a wó lhoq sân-yúng byî é hkyô lé taí nau é nghut lhê.

10 Haû pé gi, zojung, shuqjung eq chí san chí séng hking ahú hú eq za séng é nghut mù, htûngli asik, lé joq é ahkýng jé shoq za tô tô é gungsho eq séng é tarâ pé nghut ri.

### *Hkrisduq É Sui*

11 Hkrisduq gi, shî má joq to gù nghut é gè hkyô pé é hkyangjong mó đông lé jé é hkûn, hpan tô é má a lom nghû nau é, byu eq saî é a nghut é, je kô é eq je gumjup é saksé zúm mai wang lai bê nghut lhê.

12 Yhang gi, Chyoiyúng Htâng é Jowò má wang é hkûn, bainám eq nojûng zo pé é sui lé chûng mù wang é a nghut é za, Yhâng é sui eq yhang banshoq é matú radàm za ahtum abyuq é hkyi yù hkyô wó yù bê nghut ri.

13 Htûngli đông agot a-û dut é bang lé lhoq sân-yúng râ matú, bainám eq nohtó zo pé é sui eq no-pyâ é myi-mhop lé, yhangmoq é ahtoq má hpyun gyun é hkûn, yhangmoq gi, ahtoq gungsho pyâm wó lhoq sansêng é hui kô é nghut lhê.

14 Haû nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí đông mai nhông byî é Hkrisduq é sui gi, rû dui nyi é Garai Gasang lé nga-nhúng wó dojaú sháng gaq ga, shi é hkyô shut shuí jé é nyi yap sâmlai mai nga-nhúng é myit sôn sé é hkyô lé, je riyhang wó lhoq sansêng yu ri-nhung mhaî!

15 Haû nghut é yanmai, Hkrisduq gi, danggidiq byi tô é ahtum abyuq é muizè lé,

☆ 8:12 Yer 31:31-34 \* 9:5 Hkerubim gâ é gi, byù su su, dusak su su dut é, dùng dap é maumang lagyo rahú nghut lhê.

ji yù huí é bang wó hap yù kó sháng gaq ga, dangshikaq asik é gyoro sô xoq byi sù nghut nyi ri. Haú su wó kut é gi, sâng-hi lhê é dangshikaq ahkaú má mara kut shut é bang lé lhoq lhut yù rá matú, yubak chyîn xap zê ralhum dông, Yhang shî hkám byi yanmai nghut ri.

<sup>16</sup> Madat dang eq séng luí ga jang, madat dang taí sù haú shî bê hkyô saksé shit rá lhê.

<sup>17</sup> Haí mù gâ le, madat dang gi, rayuq yuq shî jáng za sheq lichyúm htoq é nghut lhê. Madat dang taí sù rú dui nyi nyi, haú gi, hkâ-nhám le lichyúm htoq rá a nghut.

<sup>18</sup> Haú nghut é yanmai, sâng-hi lhê é dangshikaq lhang gi, sui a bo lòm jáng lichyúm a htoq é nghut lhê.

<sup>19</sup> Mosheq gi, haú jep é tarâ má bo é hkunmó hkangmó lé, shiwa byù banshoq bang lé ban taí pyo é hkún, zam zam ne é saumaú eq jàm kyâng lé yù mù, nojùng zô é sui eq bainám sui eq wuì nyhò tô é lé, chyúmding má le, shiwa byù banshoq bang lé le, hpyun gyûn é nghut ri.

<sup>20</sup> Yhang gi, "Sui shî gi, nungmoq cháng rá matú, Garai Gasang, hkunmó hkyô to bê nghut é, dangshikaq tô tô é sui nghut lhê."✧ ga taí ri.

<sup>21</sup> Yhang gi, saksé zúm eq dojaú é má chung é zè pé má le, haú eq rajung za sui haú hpyûn gyûn ri.

<sup>22</sup> Gè gè gi, haú jep é tarâ má bo é dông ga jang, azíng zê aluq banshoq gi, suí èq lhoq sâ-yúng é hui rá dut é nghut mù, sui htoq hkyô a joq jáng, mara hkyut byi hkyô le joq é a nghut.

<sup>23</sup> Haú mù, mauhkúng zè pé é azòng pé gi, hkungga haú pé èq lhoq sâ-yúng é hui rá é nghut lhê. Nghut kôhang, mauhkúng zè pé yhang gi, haú pé htoq je ge é hkungga pé èq lhoq sâ-yúng é hui rá dut é nghut lhê.

<sup>24</sup> Hkâsu mù gâ le, akying lhúm é azòng za nghut é, byu èq saí é chyoiyúng dik é jowò má Hkrisduq wang é a nghut é za, Yhang gi, mauhkúng má yhang wang é nghut mù, ahkuí gi, nga-nhúng é matú Garai Gasâng é hí má bo yap byi nyi é nghut lhê.

<sup>25</sup> Yhang gi, haú hkyangjong mó mai yhumsîng é sui a nghut é sui lé chùng mù,

Chyoiyúng Htâng é Jowò má zàn wuì wàng luí kut é su, yhànggùng lé dum nhông byi byi kut rá matú mauhkúng má wang é le a nghut.

<sup>26</sup> Haú dông ru nghut le gi, Hkrisduq gi, mau htoq xâng hkún mai shî hkâm é adàm myo myo nghut berâ nghut lhê. Nghut kôhang, ahkuí, Yhang gi, yubak mara huí sêng pyám byi rá matú, yhànggùng lé hkungga nhông byi rá ga ipyat pé ló htâng ló nyi é má, banshoq é matú radàm za htoq shit bê nghut ri.

<sup>27</sup> Byù gi, radá za shî rá nghut mù, hau htâng má tarâ jéyáng é hui rá nghut é eq rajung za,

<sup>28</sup> Hkrisduq gi, byù myo myô é yubak mara lé yu pyám byi rá matú, radá za hkungga nhông é hui bê nghut ri. Haú mù, Yhang gi, yubak mara wun pyám byi rá a nghut lo é za, Yhang lé lánng nyi é bang lé hkyi yù hkyô yu lé byi rá matú, htâng má í dàm nghú rá dàm htoq shit rá nghut lhê.

## 10

### *Hkrisduq É Gùng Lé, Banshoq É Matú Radàm Za Nhông Byi É Hkyô*

<sup>1</sup> Haú jep é tarâ gi, jé lô rá nghut é gè hkyô pé é akyîng a nghut é za, wupzo za nghut ri. Haú nghut é yanmai, jep é tarâ gi, zàn wuì ru nhông byi byi kut nyi é eq rajung zâ é shigu hkungga pé dông mai, noqkuq rá matú chyâng lé é bang lé hkâ-nhám lé wó lhoq gumjup é a nghut.

<sup>2</sup> Tarâ haú wó lhoq gumjup byi é ru nghut le gi, yhangmoq nhông byi é hkyô nô pyám kó rá a nghut lí? Hkâsu mù gâ le, haú noqkuq é bang gi, banshoq é matú radàm za lhoq sanséng huí é nghut jáng, yhangmoq é yubak marâ é matú, hkâ-nhám le mara a bò bun lo kó rá nghut lhê.

<sup>3</sup> Nghut kôhang, shigu hkungga haú pé gi, zàn wuì yubak mara pé lé lhoq pun byi é zè nghut ri.

<sup>4</sup> Haí mù gâ le, nohtó pé eq bainám pé é sui gi, yubak mara lé huí sêng pyâm é hkyô wó dut é a nghut.

<sup>5</sup> Haú mù luí, Hkrisduq, mingkan má lé jé é hkún, Yhang taí é gi,

"Shigu hkungga eq hkungga lé Nàng a o é nghut mù,  
Nàng kúm gi, Ngá é matú gungdu hen to byi bê nghut ri.

6 Myi nyhé hkungga pé eq mara hkyut hkungga pé gi, Nàng lé gabú nhang é a nghut.

7 Hau htâng, Ngò gi, 'Garai Gasang ê, Ngò eq séng luí chyúmding má kê tô é eq rajung za,  
Nàng ô nau é hkyô kut râ matú, Ngò, shí má nyi lhê.' nghũ taí é."✧

gâ ri.

8 Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haú pé lé Nàng a gabú é nghut lhê." ga taí ri. Haú jep é tarâ dông haú pé lé kut râ dut kôlhang taí é nghut ri.

9 Hau htâng má, Yhang gi, "Nàng ô nau é hkyô kut râ matú, Ngò, shí má nyi lhê." ga taí ri. Haú gi, Yhang, htang lhum dangshikaq lé htaí masat to râ matú, sâng-hi lhum lé tô pyâm é nghut ri.

10 Myit ô nau hkyô hau é yanmai, Yesuq Hkrisduq, Yhâng é gungdu lé hkungga dông banshoq é matú radàm za nhông byí é dông mai, nga-nhúng gi, lhoq chyoiyúng é hui bê nghut ri.

11 Hkyangjong hkangmó gi, nyí nyí bui bui, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lhang a wó huí séng pyám byí é, rajung zâ é shigu hkungga lé, dum nhông byi byi kut é nghut lhê.

12 Nghut kôlhang, hkyangjong mó nghut é Hkrisduq gi, yubak mara hkyut byi râ hkungga ralhum lé za, ahkyíng banshoq é matú ban nhông byí é hkún jáng, Garai Gasâng é loqyo hkyam shut zung to bê nghut ri.

13 Haú hkún mai, Yhang gi, Yhâng é gye pé lé, Yhâng é hkyí nang jang kut byi râ lé láng nyi é nghut ri.

14 Haí mù gâ le, Yhang gi, lhoq chyoiyúng é huí nyi bang lé, hkungga ralhum eq za, pyat dedû é matú lhoq gumjup byi bê nghut ri.

15 Haú Chyoiyúng Woi-nyí le, haú hkyô eq séng luí nga-nhúng lé saksé hkâm kyô ri. Sâng-hi má, Yhang taí é gi,

16 "Haú Yhumsíng taí ri, shí gi, ahkyíng haú laí htâng má, Ngò, yhangmoq eq to râ dangshikaq nghut lhê.

Ngò gi, Ngá é tarâ pé lé, yhangmoq é myit nhiklhum hkaú má kat byi mù, yhangmoq é i-myt má kê to byi râ nghut lhê."✧

gâ ri.

17 Hau htâng, Yhang taí jat é gi,

"Ngò gi, yhangmoq é yubak mara pé eq tarâ a chung é muzó pé lé, bûn lô râ a nghut."✧

gâ ri.

18 Haú mù, mara haú pé lé hkyut pyám byi bê nghut jáng, yubak mará é matú hai hkungga le a ra lo nghut ri.

### *Hkam Jan Râ Hkyô*

19 Haú mù luí, gumang wui ê, nga-nhúng gi, Yesuq é suí eq, haú Chyoiyúng Htâng é Jowò má wàng râ matú hkyak wó lum to bê nghut lhê.

20 Haú gi, Yesuq é gungdu nghut é pán-gyang dông mai, nga-nhúng é matú hpóng byi bê nghut é asik eq rû dui nyi é hkyô nghut lhê.

21 Haú nghut é yanmai le, Garai Gasâng é yhùm lé up é gyaú é hkyangjong lé nga-nhúng wó é yanmai le,

22 nga-nhúng gi, gingtíng é lumjíng hkyô mai sansêng é i-myt eq, Garai Gasâng chyáng é mù, mara bò bûn é myit sôn sê é hkyô mai, nga-nhúng lé lhoq sansêng râ matú nga-nhúng é i-myt lé hpyun gyûn é hui nhâng luí, nga-nhúng é gungdu gi, sânyúng wui eq chi byí é hui yù sháng.

23 Nga-nhúng gi, nga-nhúng yín yu é myit myoqbyù hkyô lé zui gingtíng nyi sháng; hkâsu mù gâ le, danggidiq byí to bê Sû gi, lhumzui Sû nghut lhê.

24 Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaú toq byí lhum râ hkyô lé, dat myit nyi sháng.

25 Chôm huí zup lhùm nyi é hkyô lé, ra-am lhaq tô pyâm nyi kê é su, nga-nhúng gi, a tô

pyâm é za, haû Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byi lhûm nyi sháng.

<sup>26</sup> Nga-nhúng gi, tengmán hkyô lé sê yu é htâng má, shi-ngé ngé mara dum kut shut kut é nghut jáng, mara hkyut byi rá hkungga a joq lo.

<sup>27</sup> Tarâ jéyáng hkyô eq Garai Gasâng é gyè pé lé nyhê hkyô pyám rá nghut é nhikmo-yô é myi lé za, gyuq chiq myit mai láng nyi rá dut bê nghut lhê.

<sup>28</sup> Mosheq é tarâ lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê.

<sup>29</sup> Haû jáng, Garai Gasâng é Yhangzo lé hkyiwa ô má nâng pyeq bê sù, yhumsîng lé lhoq sân-yúng byi bê nghut é dangshikaq é sui lé a chyoiyúng é zè dông kut pyám bê sù eq, jeju byi é Woi-nyí lé rhoi é sù gi, hkâ-í yhang gyaú é mara dam byi é hui gíng rá nghut lhê nghû, nungmoq wó myit akó lhú?

<sup>30</sup> Hkâsu mù gâ le, "Lató hpuq rá gi, Ngò ru nghut lhê; Ngò lató hpuq rá."\* ga le, "Haû Yhumsîng gi, Yhâng é byu pé lé tarâ jéyáng rá nghut lhê."\* ga le, taí é Sù lé, nga-nhúng sê lhê.

<sup>31</sup> Haû rû dui nyi sù Garai Gasâng é loq hkaû má byit gyó wang é gi, gyuq chiq jung yhang nghut ri.

<sup>32</sup> Nungmoq, haû maubó lé hap yu é\* htâng, wuîhke jamjau huí é má gyai yhang shikut kôluí wó jân pyám bê nghut é, hí lhê buinyi pé lé myit bun keq.

<sup>33</sup> Ra-u u má, nungmoq gi, byu pé hí má de de rhoi shit é eq zing-rí é hui zo bekô nghut ri; ra-u u má, nungmoq gi, haû su hui zo bang eq rahá bo hui zo bekô nghut ri.

<sup>34</sup> Nungmoq yhang, je ge é eq ru gîng nyi é zè pé wó é lé sé kô é yanmai, nungmoq gi, htóng lúng bang lé shogyo nhikmyin bekô eq, nungmoq é sutzè pé lé sing yu pyám byi é bang lé, gabú myit eq jân pyám bekô nghut ri.

<sup>35</sup> Haû mù luí, nungmoq é hkyak myit lum tô é hkyô lé hkádú pyám kó; agùn agó

chyunghuq shigyaú é hui kó rá nghut lhê.

<sup>36</sup> Nungmoq gi, Garai Gasâng é ô naù hkyô lé kut é hkûn, Yhâng danggidiq byi tô é lé wó hap yù rá matú, nungmoq hkam jan rá dut é nghut lhê.

<sup>37</sup> Hkâsu mù gâ le, razup zo nghut jáng, "Haû lé lô rá Sù gi, jé lé rá nghut mù, ahkyíng lhoq myáng rá a nghut.

<sup>38</sup> Nghut kôlhang, Ngá é dingmán sù gi, lumjínng myit mai asak duí rá nghut lhê.

Yhang nungzut zut é nghut le gi, Ngò, Yhang lé myit nguí rá a nghut."\* ga tô ri.

<sup>39</sup> Nghut kôlhang, nga-nhúng gi, nungzut zut mù htên byoq huí é bang a nghut é za, lumjínng mù hkyi yù huí é bang ru nghut lhê.

## 11

### *Lumjínng Myit Mai*

<sup>1</sup> Lumjínng myit nghu é gi, nga-nhúng myit myoqbyu tô é lé hkyak wó rá nghu é eq nga-nhúng a myàng shí é lé joq lhê nghû hkyak sê é hkyô nghut lhê.

<sup>2</sup> A-nham lhê bang gi, lumjínng myit haû mai Garaí eq owaq é hui kô é nghut lhê.

<sup>3</sup> Lumjínng myit mai, nga-nhúng gi, nyi mi-nyí, joq mijoq lhunglhang lé Garai Gasâng é hkunmó eq hpan tô é hkyô sê gyô é nghut lhê. Haû mù, myoq eq wó myang é pé gi, byu-myang é pé mai saí htoq tô é a nghut.

<sup>4</sup> Lumjínng myit mai, Abelaq gi, Ka-in kut é htoq je ge é hkungga, Garai Gasang lé nhông byi é nghut ri. Lumjínng myit mai, yhang gi, yhâng é hkungga eq séng luí Garai Gasang hkya-ôn é hkûn, dingmán sù rayuq dông owaq é hui bê nghut ri. Haû mù, lumjínng myit mai, yhang gi, shi byuq bê nghut kôlhang, dang rû nyo nyi ashí nghut lhê.

<sup>5</sup> Lumjínng myit mai, Enuq gi, shi é a hui zo shoq, asak shí mai mauhkûng shut shuí yu é hui bê. Yhang lé, Garai Gasang shuí ló byuq bê nghut é yanmai, yhang lé a wó myáng lo nghut ri. Hkâsu mù gâ le, yhang gi, shuí yu é a hui shí é hí má, Garai Gasang lé nguí nhâng sù rayuq dông owaq é hui sù nghut ri.

\* 10:30 Tarâ Pun 32:35 \* 10:30 Tarâ Pun 32:36 \* 10:32 Haû maubó lé hap yu é gâ é gi, gabú danglù lé sâng-hi wó hap yu é lé gâ lhê. \* 10:38 Hbk 2:3-4

<sup>6</sup> Lumj́ing myit a bo é nghut le gi, Garai Gasang lé a wó nguí nhang é nghut lhê. Haî mù gà le, Yhâng chyáng shikut luí lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng èq shigyaú é lé le, lumj́ing râ dut é nghut lhê.

<sup>7</sup> Lumj́ing myit mai, Noaq gi, a myang wú shî é hkyô pé eq séng luí sidiq byi huí é hkûn, yhâng é yhumbyù wui lé hkyî râ matú, gyuq hkunggâ é dông mai wui-sanghpo sai bê nghut ri. Yhâng é lumj́ing myit mai, mingkan lé mara byî é nghut mù, lumj́ing myit mai lo é dingmán hkyo é jeju lé hkam yù sù dut bê nghut ri.

<sup>8</sup> Lumj́ing myit mai, Abraham gi, yhâng é muizè dông, htâng má yhang hap yù râ nghut é, Garai Gasang byî é jowò shut e ló râ matú ji yu é huí é hkûn, jìno gyo mù, yhang hká shut e ló é a sé kôlhang, ê bê nghut ri.

<sup>9</sup> Lumj́ing myit mai, yhang gi, gó ming má nyi é byù bíng rayuq su, danggidiq byî tô é mau má nyi bê nghut ri. Yhang gi, zúm pé má lúng é nghut mù, rajung zâ é danggidiq é muizè lé hkam yu é Isak eq Yakup le, zúm pé má lúng bekô nghut ri.

<sup>10</sup> Hkâsu mù gà le, Abraham gi, Garai Gasâng èq azòng hên mù sai tô é, gîng é apûn awang pé eq mu é myuq lé myit myoqbyu nyi é nghut ri.

<sup>11</sup> Lumj́ing myit mai, Abraham gi, yhâng é asak ipyat laî ló byuq é eq, Sarah le baùdung nghut to kôlhang, haû danggidiq byi Sù, lhumzui sù nghut lhê ga myit sôn yu é yanmai, îwa rayuq wó dut é huí bê nghut ri.

<sup>12</sup> Haû mù luí, yhang gi, shî gùng dông nghut kôle, yhang rayuq mai lo é awut ashín pé gi, mauhkûng mâ é kyî pé eq wuimau yàm mâ é a ung nghap é semuî myhó myô lò bê nghut ri.

<sup>13</sup> Byù haú bang banshoq gi, yhangmoq shi é hkûn jé shoq lumj́ing myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôlhang, haú pé lé myàng za myàng kômù, we mai te yu akô. Yhangmoq gi,

myidàm htoq má gó ming byu pé eq byù bíng pé nghut é lé yín yù bekô nghut ri.

<sup>14</sup> Haû su yín yu é byu pé gi, yhangmoq yhumsing é ming lé ho nyi é bang nghut é lé tûn shit é nghut akô.

<sup>15</sup> Yhangmoq htoq lo é ming lé, yhangmoq myit tui nyi kô é ru nghut le gi, dum tau ló râ ahkáng wó kó râ nghut lhê.

<sup>16</sup> Ahkuí kúm, yhangmoq gi, je ge é ming nghut é, mauhkûng mingdán lé myit tuí nyi akô nghut ri. Haû mù luí, Garai Gasang gi, yhangmoq é Garai Gasang nghu é huí râ lé a hoq é nghut lhê. Hkâsu mù gà le, Yhang gi, yhangmoq é matú myuq ralhum lajâng to byi bê yanmai nghut ri.

<sup>17</sup> Lumj́ing myit mai, Abraham gi, Garai Gasâng èq yhang lé chyam é hkûn, Isak lé hkungga ralhum dông nhông byi bê nghut ri. Haû gi, danggidiq pé lé hap yu to bê sù gi, yhâng é yuqzo zote lé nhông byi râ dâ é nghut lhê.

<sup>18</sup> Garai Gasang gi, "Isak dông mai lo é lé, náng é awut ashín nghu sôn byi râ nghut lhê."\* ga yhang lé danggidiq byî to bê nghut kôle, yhang haû su kut é nghut ri.

<sup>19</sup> Abraham gi, shi é mai Garai Gasang wó lhoq dui toq lhê ga myit yu ri. Taí sháng ga jáng, Isak lé, shi byuq bê mai, yhang dum wó hap yu é nghut ri.

<sup>20</sup> Lumj́ing myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.

<sup>21</sup> Lumj́ing myit mai, Yakup gi, yhang shi ló râ u má, Yosep é yhangzô nhik lé shimân byi mù, yhâng é dumbáng-u má nè luí, noqkuq bê nghut ri.

<sup>22</sup> Lumj́ing myit mai, Yosep gi, yhâng asak htûm ló râ u lé, Israelaq byu pé Egotuq ming mai htoq lò râ eq séng luí taí mù, yhâng é showui pé eq séng luí hkâsu kut râ hkyô lé pying to bê nghut ri.

<sup>23</sup> Lumj́ing myit mai, Mosheq é yhângnu eq yhângwâ nhik gi, yhang hku lé é htâng má, yhang lé lhamó sum hkyap haq to bekô nghut ri. Haî mù gà le, yhangnhik gi, zoshâng haû yúng é myàng kômù, hkohkam é mungdang lé a gyuq kó nghut ri.\*

\* **11:18** Apûn 21:12 \* **11:23** Haú-u lé, hkohkâm hpó gi, Israelaq pé é yuqzo zonú wui lé sat pyám râ hkunmó hkyô tô é nghut lhê.



<sup>24</sup> Lumjǐng myit mai, Mosheq gi, yhang kô lo é hkûn, Hpara-uq é byizô é yhangzo ga râ lé he-ngik pyâm ri.

<sup>25</sup> Yhang gi, yubak marâ é ngón hkyô má rayoq zo ngón kún râ malaî Garai Gasâng é byu pé eq rahá hpuzô é hui râ lé sheq hkyin yù bê nghut ri.

<sup>26</sup> Yhang gi, haû Hkrisduq é matú rhoi huí é lé, Egutuq ming mâ é sutzè htoq má je riyhang hpaudap lhê ga myit sôn yu ri. Haî mù gâ le, yhang gi, yhâng é shigyaú chyunghuq lé myit myoqbyu nyi sù nghut ri.

<sup>27</sup> Lumjǐng myit mai, yhang gi, hkohkâm hpó nhikjum yô é lé a gyuq é za, Egutuq ming mai htoq ló byuq bê nghut ri. Yhang gi, myoq èq a wó myang é sù Garai lé wó myang é sù dông, hkam jân é nghut ri.

<sup>28</sup> Lumjǐng myit mai, yhang gi, haû zomún lé sat é maumang lagyô èq Israelaq byu pé é zomún lé a wó záng sháng gaq ga, Lhoqlhai Poî eq sui hpyûn é hkyô le kut hî bê nghut ri.

<sup>29</sup> Lumjǐng myit mai, haû shiwa byu pé gi, Nhões Nè lé kyuq huí é myigùng htoq mai su lai byit bekô nghut ri; nghut kôlhang, Egutuq byu pé le, haû dông lai shikut wú kô é hkûn, yhangmoq gi, myup shi byuq bekô nghut ri.

<sup>30</sup> Lumjǐng myit mai, shiwa byu pé, Yerihko myuq xêwâm lé nyhit nyi sô lhing é htâng má, xêwâm haû leq gyop byuq bê nghut ri.

<sup>31</sup> Lumjǐng myit mai, shiwa myhí Rahap gi, haû Israelaq jó wú bang lé nguingón é eq lhom hkulum yu é yanmai, jìno a gyo bang eq rahá sat pyâm é a huí é nghut lhê.

<sup>32</sup> Haû htoq lai luí, ngò haî taî jat ra shirâ lhú? Gidon, Barak, Samson, Yephta, Dawiq, Samuelaq pé eq myiqhtoî pé é hkyô lé taî râ ahkyíng ngò a wó.

<sup>33</sup> Haû bang gi, lumjǐng myit mai mingdán pé lé wó zân ung yù bekô, tengmán hkyô lé chung jai bekô, danggidiq byi to bê lé wó hap yù bekô, hkanghkyi pé é nhut lé wó myhí pyâm bekô,

<sup>34</sup> myidug myishâm lé wó sat pyâm bekô, shamsó mai le wó hfang lut bekô nghut ri. Yhangmoq é wum nyhóm hkyô gi, wum taû bo byuq é dut bekô nghut ri. Yhangmoq

gi, majan má a-tsam mó bò bang dut mù, maigan gyè pé lé wó ung pyâm kô é nghut lhê.

<sup>35</sup> Myiwe wuì gi, yhangmoq eq sêng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui râ lé he-ngik pyâm kômù, zing-rî é gyai yhang hui zo bekô nghut ri.

<sup>36</sup> Ra-am gi, wuìzui kut pyâm byi é eq nhuq bat é hui bekô, góbang gi, shamtoq kyum hut huí é eq htóng lhúng é hui bekô nghut ri.

<sup>37</sup> Yhangmoq gi, luqgok eq dú sat é, í túm dut shoq yik hpyit é, sham èq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún luí, myung kyuq é, zing-rî é eq rhoi pyâm é hui bekô nghut ri.

<sup>38</sup> Yhangmoq lhumzui nyi kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkyung pé eq myidong pé má nyi lhing wún bekô nghut ri.

<sup>39</sup> Haû bang banshoq gi, yhangmoq é lumjǐng myit é yanmai, owaq é hui bê nghut kôle, yhangmoq ó yuq le, danggidiq byi tô é lé a myang hkam yù kó nghut ri.

<sup>40</sup> Haî mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajâng to byi bê nghut ri.

## 12

### *Garai Gasang, Zo Wuí Lé Mhoqshit É Hkyô*

<sup>1</sup> Haû mù luí, nga-nhúng gi, haû myhó é saksé pé mhutdum su nga-nhúng é lhinghkyuq má joq to bê nghut é yanmai, nga-nhúng lé hkum tang é hkyô pé jung hkangmó eq, lui za lhoq nhúng byi é yubak mara lé dú pyâm mù, nga-nhúng din râ matú tô tô é hkyô lé, hkam jan lui din e ló sháng.

<sup>2</sup> Nga-nhúng gi, nga-nhúng é lumjǐng hkyo é apûn awang lé hî sù eq lhoq gumjup byi sù nghut é Yesuq lé wú tsuq nyi sháng. Yhang gi, Yhâng é hí má joq tô é gabú hkyo é yanmai, hoq hpû é hkyô lé haî su

a ngam é za, tapzîng má shî hkâm é hkyô lé jân pyám luí, Garai Gasâng é hkohkâm-tanghkuq é loqyo hkyam shut zung to bê nghut ri.

<sup>3</sup> Nungmoq gi, a ngu byuq râ eq myit wum a gyui byuq kó sháng gaq, yubak dap bâng chyáng mai haû su htuq htîng é hkyô lé jân pyâm é Yesuq chyáng mai myit wum yù keq.

<sup>4</sup> Nungmoq gi, yubak mara lé htuq htîng shikut é hkyô má, nungmoq é sui shun pyám shoq yhang a kut shi kó nghut ri.

<sup>5</sup> Hau htoq agó, nungmoq gi, zo wuî lé dông Garai Gasang nungmoq lé wum byî é dang lé tô-myhî pyám bekô lhú? Wum byi dang haû gi,

"Ngá zo ê, haû Yhumsîng mhoqshit é hkyô lé agya alhá hkâkut pyám,  
Yhang, nang lé tân é hkûn, myit wum hkâgyui,

<sup>6</sup> haî mù gâ le, haû Yhumsîng gi, Yhang chyitdap é bang lé mhoqshit mù, zo rayuq lé dông,

Yhang hap yu é bang yuq hkangmó lé dam byî é nghut lhê."<sup>✧</sup>

gâ é nghut ri.

<sup>7</sup> Mhoqshit huî é hkyô má, wuîhkê é lé hkam jan keq. Garai Gasang gi, nungmoq lé, zo wuî lé dông kut é ru nghut lhê. Hkâsu mù gâ le, yhumsîng é yhângwâ èq a mhoq é zo gi, ó wá nyi lhê lhú?

<sup>8</sup> Nungmoq gi, yuq hkangmó huî laî é mhoqshit hkyô lé, a hui kô é nghut jáng, dezô pé dông nghut byuq mù, zo sîng wuî a nghut lo kó.

<sup>9</sup> Nga-nhúng banshoq bang gi, nga-nhúng lé mhoqshit é xângzo íwâ pé wó é bang chyat nghut mù, yhangmoq lé hkunggâ é nghut lhê. Haû nghut jáng, je riyhang, nga-nhúng é woi-nyí eq sêng é Íwâ é a-ô má nyi mù, asak duì râ dut ri myhi-nhung!

<sup>10</sup> Nga-nhúng é xângzo íwâ pé gi, yhangmoq je ge dik bûn é lé, nga-nhúng lé rayoq zo mhoqshit é nghut ri. Nghut kôhang, Garai Gasang gi, Yhâng é chyoyúng hkyô má nga-nhúng wó bo lôm shoq, nga-nhúng é gè hkyô é matú, nga-nhúng lé mhoqshit ri.

<sup>11</sup> Mhoqshit é hkyô hkangmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haû lé hkam yù bê bâng é matú gi, htâng má, nguingón hkyô eq dingmán hkyo é ashi lhoq htoq byî ri.

<sup>12</sup> Haû mù luí, myûng byuq é nungmoq é loq pé eq wum nyhôm byuq é nungmoq é hkyihput pé lé wum-o lhoq kíng keq.

<sup>13</sup> Hkyî hten bang a wó sô é a dut shoq, lhoq gê byî é wó hui kó sháng gaq, nungmoq so râ matú, hkyô lhoq nyhang nyi keq.

### *Garai Lé He-ngik Bang Dàm Byi Hui Râ Hkyô*

<sup>14</sup> Byù banshoq bang eq nguingón shoq nyi râ eq chyoyúng râ matú wó dut é í shikut keq. Hkâsu mù gâ le, ó yuq le, chyoyúng hkyô a bo é gi, haû Yhumsîng lé myàng râ a nghut.

<sup>15</sup> Ó yuq le, Garai Gasâng jeju lé a tô pyám râ matú, sidiq keq. Haû, yuq htoq lô mù, wuîhke hkyô lhoq htoq é eq byù myo myo lé agot a-û dut nhang é nuì hko su, ó yuq lé le hkâdut nhâng kó.

<sup>16</sup> Ó yuq le, ashop é dông gungsho zùm yap é hkyô nghut nghut, zang radún é matú, yhang wó tô é yuqzo zomún muizè ahko ahkáng lé ung zô pyâm é, Garai a lom é Eso su nghut nghut, a kut râ matú sidiq keq.

<sup>17</sup> Nungmoq sê é eq rajung za, Eso gi, htâng má, shimân jeju haû lé hkam yù nau é hkûn, he-ngik pyâm é hui bê. Yhang gi, shimân jeju haû lé ngaubyi ngau-nhap èq hô kôhang, yhang kut é hkyô lé a wó htaî byi lo nghut ri.

<sup>18</sup> Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyî dut é eq laidun lo é má le,

<sup>19</sup> tut htê mying é eq, dang taî htê mying é má le, a jé ê kó nghut ri. Dang htê haû lé wó gyô é bang gi, yhangmoq lé, dang a taî jat lo râ matú dung tôngbán akô nghut ri.

<sup>20</sup> Haî mù gâ le, yhangmoq gi, "Bùm haû má dusak pé záng jáng lháng, luqgok èq dú sat râ dut lhê."<sup>✧</sup> ga Garai Gasang hkyô tô é hkunmó lé a wó hkâm kô é yanmai nghut ri.

21 Haû byu-myàng hkyô gi, lûm wú gyuq hpo dut é yanmai, Mosheq lháng gi, "Ngò, gyuq nán ri."\* ga taí é nghut ri.

22 Nghut kôlhang, nungmoq gi, Zi-un Bùm eq rû dui nyi é Garai Gasâng é myuq nghut é mauhkûng Yerusalem má, mau-mang lagyô pé ajùm ayò gabú ratung zup zîng é jang eq,

23 mauhkûng htoq má myìng kê to huí é, zomún pé é noqkuq hpúng joq jang má, jé lé bekô nghut ri. Haû mù, nungmoq gi, byù banshoq é tarâ agyì nghut sù Garai Gasâng chyáng le, lhoq gumjup huí é dîngmán bâng é woi-nyí pé chyáng le,

24 dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyún gyûn é sui má le, jé lé é nghut bekô.\*

25 Nungmoq gi, dang nyô Sû lé a gyo a kut râ matú, sidiq keq. Myidàm htoq má sidiq byí é sù lé he-ngik pyâm é bang, a lut kô é nghut lhê. Haû mù, mauhkûng mai nga-nhúng lé sidiq byí é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut râ a nghut kó lhí?

26 Haû Garaí dang taí é u má, Yhâng é htê gi, mingkan lé lhoq nhûn kat ri, ahkuí kúm gi, "Ngò, mingkan lé za a nghut, mauhkûng pé lé le radàm dum lhoq nhún râ nghut lhê."\* ga Yhang danggidiq byí to bê nghut ri.

27 "Radàm dum" gâ é dang gi, haû a wó lhoq nhûn é pé wó myit to sháng gaq ga, hpan to huí é zè pé nghut é, wó lhoq nhûn é pé lé huí sêng pyám râ lé gâ é nghut lhê.

28 Haû mù luí, nga-nhúng gi, a wó lhoq nhûn é mingdán lé hap yu to bê nghut mù, jeju bun luí, hpautap é eq gyuq hkunggâ é myit mai Garai Gasang hap yù gíng é dông noqkuq sháng.

29 Hkâsu mù gâ le, nga-nhúng é "Garai Gasang gi, nyhê jôm é myi nghut ri".\*

## 13

### Ló Htáng Má Lhoq Pun Kyîng É Hkyô

\* 12:24 Abelaq lé gi, yhangmang Ka-in èq sat é nghut luí, yhâng é sui gi, lató-hpuq râ matú nghut ri; nghut kôlhang, Hkrisduq é sui kúm gi, hkyi yù hkyô lajang byí ri. ✧ 12:26 Hagi 2:6 ✧ 12:29 Tarâ Pun 4:24 ✧ 13:5 Tarâ Pun 31:6 ✧ 13:6 Hkya-on 118:6-7

1 Rayuq eq rayuq, gumang yhangchang dông chyitdap lhûm nyi keq.

2 Byù bíng pé lé hkulûm râ hkâtô-myhí kó, hkâsu mù gâ le, ra-am gi, haû su kut nyi kô é yanmai, a sê é za maumang lagyô pé lé hkulum záng bekô nghut ri.

3 Nungmoq gi, htóng lúng bang eq rahá htóng lúng luzúm wuí dông, htóng lúng bang lé le, nungmoq yhang jamjau hui zô nyi é dông, hpuzô é bang lé le, myit bun keq.

4 Myiháng hkyô gi, lhunghâng bâng èq hpautap é hui râ dut é nghut mù, myiháng yhuphpú gi, sân-yúng râ dut lhê. Hkâsu mù gâ le, Garai Gasang gi, su-myi sulàng lú é bang eq ashop é dông gungsho zùm yap é bang banshoq lé jéyáng râ nghut lhê.

5 Nungmoq é asak dui hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haû mù gâ le, Garai Gasang gi,

"Hkâ-nhám le, Ngò, nàng eq a gang râ; hkâ-nhám le, Ngò, nang lé a tô pyám râ."\* ga taí é nghut lhê.

6 Haû mù, nga-nhúng gi, hkyak lum é myit mai,

"Haû Yhumsîng gi, ngo lé garúm sù nghut lhê yanmai, ngò, gyuq râ a nghut. Ó yuq wá, ngo lé hai wó kut râ lhú?"\* nghu taí é nghut lhê.

7 Nungmoq lé Garai Gasâng é mungdang taí kyô é, nungmoq é hkyô-u shê bang lé, myit bun keq. Yhangmoq asak htum shoq nyi lai lo é sâmlai lé myit wú mù, yhangmoq é lumjîng myit lé alik kut yù keq.

8 Yesuq Hkrisduq gi, a-nyí nap, hkû-nyí, htàngnùng pyat dedu rajung za nghut nyi ri.

9 Maú nhô zâ é mhoqshit hkyô ajung jung maí èq shuí nghoq huí é bang hkâdut kó. Zo bang lé hai akyû a byí é, htûngli zoshuq èq a nghut é za, Garaí jejú èq nga-nhúng é myit nhiklum lé wum-o lhoq kîng yu é gi, gè hkyô nghut lhê.

10 Nga-nhúng gi, saksé zúm má dojaú é hkyangjong pé zo râ ahkáng a wó é hkungga gyap ralhum wó é nghut lhê.

11 Haû hkyangjong mó gi, dusak pé é sui lé, yubak mara hkungga dông Chyoiyúng Htâng é Jowò má yu wang ri; nghut kôlhang, gungsho pé lé gi, byù nyì jowò shinggan má nyhê hkyô pyâm ri.

12 Haû eq rajung za, Yesuq le, Yhâng é sui dông mai byu pé lé wó lhoq chyoiyúng râ matú, myuq hkum shinggan má jamjau hpuzo mù shî hkám bê nghut ri.

13 Haû mù luí, nga-nhúng gi, byù nyì jowò shinggan má Yhâng chyáng ê mù, Yhang hui zô é rhoí hkyô lé ê bo hui zo sháng.

14 Hkâsu mù gâ le, nga-nhúng gi, mingkan shî má ru gíng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

15 Haû mù luí, nga-nhúng gi, Garai Gasâng é myíng lé yín yu é nhutwui é ashi nghut é, hkya-on hkungga lé, Yesuq dông mai, Garai Gasâng chyáng xoq xoq nhông byí nyì sháng.

16 Ge é hkyô kut râ eq góbang lé shuí gam chûng râ hkyô lé, hkâtô-myhí kó; hkâsu mù gâ le, Garai Gasang gi, haû sù é hkungga pé lé ô ngui nyi ri.

17 Nungmoq é hkyô-u shê bâng é jìno gyo mù, yhangmoq é ahko ahkáng ô má nyì keq. Yhangmoq gi, jihpán shit râ dut é bang dông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyù a bo é wòlai a dut é za, gabú hkyô ralhum wó dut sháng gaq, yhangmoq é jìno gyô nyì keq.

18 Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é dông asak ùi râ lé ô nau lhê nghû, hkyak wó myit ri.

19 Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghû wum taí tsuq kat lhê.

20 Sau hpúng pé é sau zúng Sù mó nghut é, nga-nhúng é Yhumsíng Yesuq lé, haû ahtum abyuq é dangshikaq é sui dông, shî bê mai dum lhoq ùi toq é sù, nguínón hkýo é Garai Gasang gi,

21 Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq dông mai Yhang lé gabú nhang é hkyô lé, nga-nhúng chyáng kut nyì sháng gaq. Hpungwup

shingkang gi, Yesuq Hkrisduq chyáng pyat dedu ahtum abyuq ru joq nyì sháng gaq. Amen.

22 Gumang wui ê, ngò lhoq pûn kyíng é dang lé nungmoq wó hkam jan kó sháng gaq nghû, wum taí tsuq kat lhê; hkâsu mù gâ le, ngò gi, nungmoq lé, laiká ratot za ká kat é nghut lhê.

23 Ngò gi, nga-nhúng é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shî má myap jé lé é nghut le gi, ngò, yhang eq rahá nungmoq lé, lé hui râ nghut lhê.

24 Nungmoq lé shuí-u bang banshoq eq Garai Gasâng é byu pé banshoq lé bo shi-kyám byi keq. Itali ming mâ é gumang wui gi, nungmoq lé shi-kyám kat akô nghut ri.

25 Jeju gi, nungmoq banshoq bâng chyáng ru joq nyì sháng gaq ô.

## YAKUQ Hun Kat é Laiká (James)

<sup>1</sup> Garai Gasang eq Yhumsîng Yesuq Hkrisduq é jùn, ngò Yakuq gi, byo myín tô é Israelaq raxe í myû lé, nguingón dang shit kyô kat lhê.

### *Lumjîng Myit Lé Chyam É Hkyô Eq Hpaqchyî Byéng-yá*

<sup>2</sup> Ngá gumang wuî ê, nungmoq é lumjîng myit lé chyam wú é hui jáng, shikut shirâng sê é myit jat nyi é lé, nungmoq sê nyi lhê nghut mù,

<sup>3</sup> wuîhke jamjau ajung jung lé htûng huî é hkûn, gaù jowò mó nghut nyi lhê nghû luî myit yù keq.

<sup>4</sup> Hau htoq agó, nungmoq banshoq gúm gumjup jup dut mù luî, haî le a langhpyut shoq, shikut shirang é myit gi, yhumsîng kut nyi é muzó lé wó lhoq gumjup nyi sháng gaq.

<sup>5</sup> Nungmoq má rayuq yuq hpaqchyî byéng-yá langhpyut tô é nghut le gi, haù banshoq bang lé, mara a hun é za, agùn agó byî nyi é Garai Gasâng chyáng dúng nyi sháng gaq, haù jáng, Garai gi, yhang lé byi râ nghut lhê.

<sup>6</sup> Nghut kôlhang, lum shut é myit a bo é za, lumjîng é myit èq dúng nyi sháng gaq, hkâsu mù gà le, lum shut é sù gi, laidún èq hik luî toq lo é nhông mâ é wuîlhêng eq wuî nyi ri.

<sup>7</sup> Haù yuq gi, Yhumsîng Garaî chyáng mâ é haî le wó yû râ su a ngam nyi sháng gaq.

<sup>8</sup> Yhang gi, myit-kó xan sù nghut luî, yhang é hkyô hkat hkangmó má, mù htâng a nyang é sù nghut nyi ri.

### *Myùng Sù Eq Wó Sù*

<sup>9</sup> Myung é gumang hpó gi, waq toq huî é má, wó sù gi, lhoq nyhûm huî é má, gabú gumrong nyi sháng gaq.

<sup>10</sup> Hkâsu mù gà le, wó sù gi, wàhu banbó su woi byuq ló râ nghut lhê.

<sup>11</sup> Bui gi, nyé é lai èq toq lô jáng, haù wàhu nyhuî byuq ló mù, abó le yoq gyó byuq é eq, hau é yúng sâm pé gi, htên byuq é su; wó sù

le haù eq rajung za, yhang kut nyi é muzó má woi byuq ló râ nghut lhê.

### *Gunglaú É Hkyô*

<sup>12</sup> Wuîhke jamjau huî le, wó shikut shirang nyi sù gi, hkungsô wó nyi ri; hkâsu mù gà le, chyam wú é ban hui jáng, yhang gi, Garai Gasang lé chyitdap é bang lé, byî tô é danggidiq asak janmaú lé, wó yû râ nghut lhê.

<sup>13</sup> Gunglaú huî é sù ó yuq nghut kôlhang, gunglaú huî é hkûn lé, "Garai Gasang, ngo lé gunglaú nyi ri." nghû luî, a taí sháng gaq, hkâsu mù gà le, agè ashop é hkyô gi, Garai Gasang lé wó gunglaú é a nghut, ó yuq lé le Garai Gasang gunglaú râ a nghut.

<sup>14</sup> Nghut kôlhang, ó yuq nghut le le, yhum-sing é gungsho ô nau é dông, shuî lêng nghoq ló é nghut le gi, agúng alaú hui bê.

<sup>15</sup> Gungsho ô nau é hkyô kúm gi, zogûng dut jáng, mara lé hku htoq lo ri. Mara kô dîng jáng, shi é má jé râ nghut lhê.

<sup>16</sup> Ngò chyitdap é gumang wuî ê, i-myt hkyô nghoq hkâ-nghoq nyi kó.

<sup>17</sup> Gè réng é eq byíng jup é chyunghuq lhunglhang gi, ahtoq shut mâ é nghut mù luî, maubó gung pé\* é Yhângwa Garaî chyáng mai gyó lo é nghut ri. Yhang gi, ahpuq alik atau ahû dut é buishûm su dut râ a nghut.

<sup>18</sup> Yhang hpan tô é amyû pé má, nga-nhúng gi, sâng-hi myhîng é ashi pé dut lo sháng gaq ga, Yhang gi, Yhang ô nau é hkyô cháng luî, haù tengmán é mungdang mai, nga-nhúng lé hkû to bê nghut ri.

### *Gyo Yu É Eq Cháng Kut É Hkyô*

<sup>19</sup> Ngò chyitdap é gumang wuî ê, shí hkyô lé nungmoq sê nyi akô. Byù ó yuq nghut kôlhang, gyô yû râ lé han nyi sháng; dang taí râ lé a hân sháng gaq; nhik-yo râ lé le hkâhân kó.

<sup>20</sup> Hkâsu mù gà le, byù nhik-yô é hkyô gi, Garai Gasang ô nau é dingmán é dông asak dui hkyô wó lhoq htoq râ a nghut.

<sup>21</sup> Haù mù luî, achayut é banshoq eq ladu laî agè ashop é pé lé lhoq san lhoq sêng pyám luî, nungmoq é i-myt lé wó hkyi yû râ matú, i-myt unghkaù má Garaî

\* **1:17** Maubó gung pé gà é gi, bui, kyî, lhamó lé gà lhê.

Gasang hô tô é mungdang lé, nú-nhâm é myit eq hkam yu nyi keq.

<sup>22</sup> Nungmoq gi, yhumsing gùng lé a mhaû pyám sháng gaq, haû mungdang lé wó gyô yu é bang za a nghut, haû đông châng kut é bang le nghut nyi sháng gaq.

<sup>23</sup> Mungdang haû lé wó gyô yù mù, a châng kut é sù ó yuq le, yhumsing é gungdu lé myoqjàm má wú sù eq wuî ri.

<sup>24</sup> Yhang gi, yhang é gungdu lé wú yù mù, myoqdong lhik é eq, yhumsing gungdu hkâsu dut é lé tô-myhî pyâm ri.

<sup>25</sup> Nga-nhúng lé wó lhoq lhut yu é gumjup é tarâ má, rago za wú tsuq nyi sù kúm gi, wó gyô yù mù tô-myhî pyâm é sù a nghut, muzó eq tún shit é sù nghut é yanmai, haû yuq gi, yhang châng kut é muzó má shimân jeju wó râ nghut lê.

<sup>26</sup> Byù rayuq yuq, "Ngò gi, noqkuq htung lé lhoq dik sù nghut lê." ga luî, myit to kôlhang, yhumsing nhut shô lé a wó hkâng mù, yhumsing myit lé mhaû pyâm é nghut le gi, haû yuq é noqkuq htung gi, akôm za nghut nyi ri.

<sup>27</sup> Îwa Garai Gasâng é hí má sansêng é eq, râ é hkyô a bo é noqkuq htung gi, wuîhke jamjau huî é chuimó chuizô pé lé, châng wú garúm é hkyô eq, mingkan htoq mâ é achauq achyut é hkyô lé koi pyâm é hkyô nghut ri.

## 2

### *Myoqdong A Wó Hkyin Lhum*

<sup>1</sup> Ngá é gumang wuî ê, hpungwup shingkang bo é nga-nhúng é Yhumsing Yesuq Hkrisduq lé lumjúng hkyô má, byu é myoqdong lé hkâhkyin lhum kó.

<sup>2</sup> Dangké, hng loqchyop chyop luî, réng é mebu wut é sù rayuq eq ajeq amyha é mebu wut é asho awuî é sù rayuq gi, nungmoq é tarajong má wang lò kô é nghut le,

<sup>3</sup> haû réng é mebu wut é sù lé, nungmoq lhom wú mù je hkunggâ é eq, "Shî aróng wó é jowò má zùng aq." dum, haû asho awuî é sù lé nghut jáng gi, "Mhó má yap to aq." haû su a nghut jáng, "Ngá é hkyî htang má zùng aq." ga taî kô é nghut le gi,

<sup>4</sup> nungmoq rayuq eq rayuq gamhkuî lhum luî, a ge é i-myit eq doqdân é bang dut lò bekô a nghut kó lú?

<sup>5</sup> Ngò chyitdap é gumang wuî ê, gyô yù keq, lumjúng hkyô má wó sùt nyi luî, gidig tô tô é mingdân é silí wunlí lé, Yhang lé chyitdap bang wó hkam yù sháng gaq ga, Garai Gasang gi, myigùng htoq mâ é asho awuî é bang lé hkyin yù bê a nghut kó lú?

<sup>6</sup> Nungmoq kúm gi, asho awuî é sù lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luî, yhumsing é loq eq yhang, tarâ tingnyang shut she hkyut ló bekô, a nghut kó lú?

<sup>7</sup> Nungmoq eq sêng é kô dik é mying lé lhang, yhangmoq yhang rhoi dang taî bum akô, a nghut kó lú?

<sup>8</sup> Haû mù luî, Chyúmdang má, "Náng gung lé náng chyitdap é su, náng é chyangnâm mâ é bang lé le chyitdap aq."\* ga luî, taî tô é hkohkam tarâ lé, nungmoq tsuq za châng é nghut le gi, nungmoq ge é hkyô lé kut nyi bê.

<sup>9</sup> Nghut kôlhang, byu é myoqdong lé nungmoq hkyin nyi kô é nghut le gi, nungmoq mara kut nyi gû nghut bê yanmai, haû tarâ lé shut é bang lé su tarâ jéyang é huî nyi bekô râ nghut lê.

<sup>10</sup> Byù ó yuq nghut le le tarâ banshoq lé châng kôlhang, haû mâ é ralhum lhum lé shut pyám jáng gi, tarâ banshoq lé shut pyám sù dut byuq râ nghut lê.

<sup>11</sup> Hkâsu mù gâ le, "Su-myi sulàng hkâlú."\* ga luî, hkang tô é sù gi, "Byù lé hkâsat."\* ga luî le, taî tô ashî. Náng su-myi sulàng a lú kôlhang, byù sat é sù nghut le gi, tarâ lé shut é sù nghut bê.

<sup>12</sup> Haû su mù luî, nungmoq lé lhoq lhut kat é tarâ đông jéyang doqdân é hui râ bang su, ru taî nyi keq; ru châng kut nyi keq.

<sup>13</sup> Hkâsu mù gâ le, shogyo myit a bò sù gi, a shogyô é đông jéyang doqdân é hui râ nghut lê. Shogyo nhikmyin é hkyô kúm gi, jéyang doqdân é hkyô lé wó ông lut râ nghut lê.

### *Lumjúng Myit Eq Zui Saî É Hkyô*

<sup>14</sup> Ngá gumang wuî ê, byù rayuq yuq, "Ngò gi, lumjúng myit bo lê." ga taî nyi

kôlhang, muzó a bo lom é nghut le gi, hai akyû bò râ lúhú? Lumjínng myit haû gi, yhang lé wó hkyi yù râ lúhú?

<sup>15</sup> Gumang, gu-nhá rayuq yuq a chîn dut nyi é eq, nyi wui é zoshuq langhpyut tô é nghut le,

<sup>16</sup> nungmoq chyáng mâ é rayuq yuq gi, yhangmoq é gungsho má râ é hkyô hai le a byi é za, yhangmoq lé, "Nungmoq wut é gùng lúm sháng gaq, zô é ùng gyi sháng gaq, ngui ngui ngón ngón ló keq." ga taí é nghut le gi, hai akyû bò kó râ lúhú?

<sup>17</sup> Haû eq rajung za, lumjínng myit má muzó a bo é nghut le gi, shi é eq rajung za nghut nyi ri.

<sup>18</sup> Dum rahkyô gi, "Nàng gi, lumjínng myit bo ri, ngò gi, muzo bo lhê. Muzó a bo é náng é lumjínng myit ngo lé tûn shit wú aq, haû hkûn, ngá muzó eq ngá lumjínng myit lé, nang lé ngò tûn shit râ nghut lhê." ga luí, rayuq yuq taí râ nghut lhê.

<sup>19</sup> Garai Gasang rayuq za nghut é lé nàng lumjínng ri-nhung! Nghut bê, haû gi, jô é hkyô nghut nyi ri, nat gâng pé le haû su yhang lumjínng mù gyuq nán nyi akô nghut ri.

<sup>20</sup> Kyoq a bo é byù bam ê, lumjínng myit má muzó a bo le akôm za nghut é hkyô lé, nàng sé nau lhê a nghut lúhú?

<sup>21</sup> Nga-nhúng é Íwa Abraham gi, hkungga gyap htoq má yhangzo Isak lé shigu hkungga kut é hkûn lé, zui saí é muzó mai dingmán é sù gâ é lé wó yû bê a nghut lúhú?

<sup>22</sup> Haû mù luí, yhâng é lumjínng myit gi, yhâng é muzó eq rahá za e ló é yanmai, lumjínng myit gi, jup byíng lo é lé, nàng wó myâng bê nghut ri.

<sup>23</sup> Haû su mù, "Abraham gi, Garai Gasang lé lumjínng é nghut mù luí, yhang lé dingmán sù ga són byi bê."\* ga luí, kâ tô é Chyúmdang gi, dik to bê. Dum, yhang lé Garai Gasâng é buinùm hpó ga luí le myhíng byi bê.

<sup>24</sup> Haû mù luí, byù gi, lumjínng é myit èq baú za a nghut, zui saí é muzó èq mara hkyut san byi huí é lé, nungmoq bûn sê nyi akô.

<sup>25</sup> Haû eq rajung za, Rahap gâ é shiwa myhí gi, jowú su nhik lé lhom te yù mù luí,

hkyô gó hkat dông nhang kat pyâm é hkûn le, yhang zui saí é muzó mai dingmán é sù gâ é wó yû bê a nghut lúhú?

<sup>26</sup> Haû su mù, gungdu má woi-nyí a bo le gi, shi é eq rajung za, haû lumjínng myit má muzó jizó a bo le gi, shi gû nghut bê nghut ri.

### 3

#### *Mhé Wuí É Shô*

<sup>1</sup> Ngá é gumang wui ê, byù myo myo sará hkâkut naû kó. Hkâsu mù gâ le, ngamoq sê é eq rajung za, sará pé gi, je riyhang htan é dông jéyáng doqdân é hui zo râ nghut lhê.

<sup>2</sup> Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkang é sù nghut ri.

<sup>3</sup> Nga-nhúng myang lé nhutkyáng kyáng byi jâng, myang hau é gungdu gón lé, nga-nhúng ô nau é dông wó cháng nhang lhê.

<sup>4</sup> Haû mai gotú, wui-sanghpo pé lé wú wú keq, haû-í kô é sanghpo lé htan é laidûn èq mut é hui kôlhang, sanghpo hkâng sù gi, gyai tiq é sanghpo shap èq za, yhâng ô nau é dông, haû pé lé wó hkang yu ri.

<sup>5</sup> Haû eq rajung za, shô gi, tiq é gungsho za nghut kôlhang, gyai gumrông nghutbûn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung.

<sup>6</sup> Shô haû gi, myi eq wui nyi ri. Nga-nhúng é gungsho má, shô haû gi, agè ashop é mingkan dut lò mù, nga-nhúng é gungsho asak lé achayut dut nhâng luí, gungsho asak lé nyhê tuq kat ri. Haû gi, ngaraí myí èq nyhê tuq kat é nghut bê.

<sup>7</sup> Dusak ajung jung, nghoq ahú hú, myi má yê é jung eq wui hkaû má nyi jung banshoq gi, wó mhê yu é jung chyat nghut mù, byu pé gi, haû pé lé mhê yu nyi akô.

<sup>8</sup> Nghut kôlhang, shô lé kúm gi, byù ó le a wó mhê yù kó nghut ri. Haû gi, apyí abat, agè ashop, uphkâng a wó é eq, shi é jung duq èq byíng tô é jung nghut nyi ri.

<sup>9</sup> Nga-nhúng gi, shô hau èq nga-nhúng é Yhumsing eq Íwa Garai lé hkya-on nyi lhê; hau èq za, Garai Gasâng é gunglhô dông

hpan tô é waxâng zo wuî lé le nhîng pyâm nyi ri.

<sup>10</sup> Nhut ralhum za mai, hkya-ôn é dang eq nhîng é dang htoq lo ri. Ngá é gumang wuî ê, haû su kut é gi, a gè.

<sup>11</sup> Wuîbúm radong za mai, chuî nghâm é wuî eq hkô é wuî wó htoq râ lú?

<sup>12</sup> Ngá gumang wuî ê, maihpáng gâm mai tsanlun shi, tsibiyiq nuî mai maihpáng shi, wó zui râ lú? Haû eq rajung za, xô ngam é wuî gi, chuî nghâm é wuî lé wó lhoq htoq byi râ a nghut.

### *Ahtoq Mai Lo É Hpaqchyî*

<sup>13</sup> Nungmoq má, hpaqchyî byéng-yá bo é sù eq sê é dat é sù, ó nghut lê lú? Haû yuq gi, yhang hpaqchyî bo é hkyô lé, hpaqchyî mai wó yu é, myit lhoq nyhum é hkyo èq, yhumsîng zui saî é ge é muzó dông tân shit nyî sháng gaq.

<sup>14</sup> Nghut kôhang, nungmoq é myit má ladu lai é manon é i-myit eq, lú lhum bat zik é i-myit bo é nghut le gi, hkâ-nghutbun kó, haû tengmán hkyô lé le hkâ-mhaû pyám kó.

<sup>15</sup> Haû sù é hpaqchyî byéng-yá kúm gi, mauhkûng htoq mai gyó lo é hpaqchyî byéng-yá a nghut, haû gi, myigùng htoq mâ é, gungsho ô nau é eq, nat é hpaqchyî byéng-yá chyat nghut nyi ri.

<sup>16</sup> Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkûm nyi ri.

<sup>17</sup> Mauhkûng htoq mâ é hpaqchyî byéng-yá kúm gi, sâng-hi awang má sansêng nyi ri; hau htâng má gi, nguîngón hkyô lé ô nau é, myit nûm é, jîno gyô é, shogyo nhikmyin sê é eq ge é ashî zui nyi mù luî, gamhkuî a bò, ahpuq alik a dut é eq, kut mhaû a sê é hpaqchyî byéng-yá nghut nyi ri.

<sup>18</sup> Hau htoq agó, nguîngón é hkyô dat xô é bang gi, nguîngón é shijí lé sân kat é bang nghut mù, ge é ashî wó yû kó râ nghut lê.

## 4

### *Yhumsing Gùng Lé, Garai Gasâng Chyáng Ap To Râ Hkyô*

✧ 4:6 Sânghkyang 3:34

<sup>1</sup> Nungmoq má gyè dut lhûm é eq mabyoq jishûm gi, hkâmai htoq lo é lú? Nungmoq ahkaû má gungsho ô nau é hkyô pé ngón hkyô hô mù, majan zân lhûm é yanmai, dut htoq lo é a nghut kó lú?

<sup>2</sup> Nungmoq yut yut myit ô nau nyi kôhang, haî le a wó yû kó. Nungmoq sat nyi é eq manon nyi kôhang, a wó yû kó. Nungmoq byoq lhûm nyi é eq majan htoq lhûm nyi kôhang, haî le a wó yû kó; hkâsu mù gâ le, nungmoq, Garai Gasâng lé a dung kô é yanmai nghut ri.

<sup>3</sup> Nungmoq dung kôhang, a myang yù kó nghut ri; hkâsu mù gâ le, nungmoq é ngón kún hkyô má jai chûng langsâ pyám râ matú, shut é dông dông nyi kô é yanmai nghut ri.

<sup>4</sup> Su-myi sulàng lú é bang su gididq a gîng é bang ê, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lú? Haû mù luî, mingkan ô nau é hkyô eq buinùm dù nau sù ó nghut kôhang, Garai Gasâng é gyè nghut nyi ri.

<sup>5</sup> Dum ralhum, nga-nhúng má Garai Gasâng kat lhûng tô é woi-nyî gi, manon é myit lúng nyi ri ga luî, Chyúmdang má taî é gi, akôm nghut ri nghû, nungmoq myit ngam nyi akô lú?

<sup>6</sup> Nghut kôhang, Yhang gi, je kô é jeju ru byî nyi lê. Haû eq rajung za, Chyúmdang má,

"Garai Gasâng gi, nghutbûn é bang lé hkûm zing pyám kôhang, myit lhoq nyhum é bang lé jeju byî ri."✧

ga taî tô ri.

<sup>7</sup> Haû mù, Garai uphkang é a-ô má ru nyi nyi keq; Nat Tsadán lé hkûm tang pyám keq; haû hkûn, yhang nungmoq chyáng mai hpang byuq râ nghut lê.

<sup>8</sup> Garai Gasâng chyáng huî ê keq, haû hkûn, Yhang, nungmoq chyáng huî lé lô râ nghut lê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhiklhum lé lhoq chyoi lhoq yúng to keq. Yudaq htung dông loq lé chí san chí sêng pyám keq gâ é lichyúm gi, i-myit, gungdu lé lhoq san lhoq sêng pyám é lé gâ lê.



<sup>9</sup> Nungmoq gi, myit yón é, iyon yôn é eq ngaubyi ngau-nhap é kut nyi keq. Nungmoq é wuihâ é hkyô lé gi, iyon dông, nungmoq é gabú é hkyô lé gi, yón kuq é dông htaí pyám keq.

<sup>10</sup> Haú Yhumsing Garaí é hí má i-myt lhoq nyhum nyi keq, haú hkûn, Yhang gi, nungmoq lé lhoq toq râ nghut lhê.

<sup>11</sup> Gumang wui ê, nungmoq yhangchang a ge é dông hkâtaí hpoí lhum kó. Yhumsing é yhanggu yhangmang lé a ge é dông taí hpoí nyi é sù, haú a nghut jáng, jéyáng é sù gi, haú tarâ lé a ge é dông taí hpoí nyi mù luí, jéyáng é sù nghut nyi ri. Haú tarâ lé nàng jéyáng nyi é nghut le gi, tarâ lé châng é sù a nghut é za, tarâ jéyáng sù nàng dut nyi ri.

<sup>12</sup> Garaí Gasang za tarâ byi tô é eq tarâ dara sù, wó hkyi yu é sù eq, wó lhoq htên é sù nghut nyi lhê. Hau é yanmai, náng é yhumkyo hpó lé jéyáng é sù nàng gi, ó yuq wa nghut lhê lhú?

### *Gyáng Dang A Tai Râ Hkyô*

<sup>13</sup> "Ngamoq, hkû-nyí napmá ra-nyí nyí, wà rawà wà shut ê mù, haú má razàn kô é nyí luí, hpugá wuiloq gá mù amyat wó myang yù râ." ga taí nyi é bang ê, gyô wú keq.

<sup>14</sup> Napmá haí dut lô râ lé lhang, nungmoq gi, a sé ko. Nungmoq é asak gi, haí nghut nyi lhê lhú? Haú gi, razup rahtâng za htoq shit luí dum byuq byuq ló mù é, nghansoq eq rajung za nghut nyi ri.

<sup>15</sup> Haú mù luí, nungmoq haú su ga taí nyi râ malaí gi, "Yhumsing Garaí dông é nghut le gi, ngamoq le ru wó dui nyi mù, shí le, mhô le, wó kut râ nghut lhê." nghu luí, wó taí râ nghut lhê.

<sup>16</sup> Ahkuí kúm gi, nungmoq é gyáng é dang dông gumrong nyi akô; haú su gumrong é hkyô banshoq gi, agè ashop é jung chyat nghut nyi ri.

<sup>17</sup> Haú mù luí, ge é mù sê kut to luí, a kut é sù gi, mara kut sù dut bê nghut ri.

## 5

### *Sùt Wó Bang Lé Sidiq Byi É Dang*

<sup>1</sup> Sùt wó é bang ê, gyo keq, nungmoq chyáng jé lé lô râ é wuihke jamjau hkyo é yanmai, ngau garú nyi keq.

<sup>2</sup> Nungmoq é sutzè gi, htên bup byuq bê nghut ri; nungmoq é wutbu wutmè le manot èq zô pyám bê nghut ri.

<sup>3</sup> Nungmoq é hîng eq ngùn má lhang, jogyik zuí byuq mù luí, haú jogyik gi, nungmoq é mara hkyam shut saksé dut byi é eq, nungmoq é gungsho lé myi su zô pyám râ nghut lhê. Nungmoq gi, jihtùm buinyi shí pé má, sutzè lé za hkong to bekô hung!

<sup>4</sup> Wú keq, nungmoq é yohtung dùng yò yam nhâng mù luí, ahpau a byi é za, nungmoq mhaú zô tô é ahpau pé garú nyi é htê pé eq, mù zui bang garú é htê pé lé gi, haú a-tsam dik shoq bo é Garaí wó gyo byi bê nghut ri.

<sup>5</sup> Nungmoq gi, myigùng htoq má hkik hkik hkâm hkâm wó nyi é eq, i-myt ô nau é dông ngón hkyô chyat châng nyi bum akô. Nungmoq gi, sat râ buinyi matú yhumsing é gùng lé tsô myum to bekô nghut ri.

<sup>6</sup> Haú dingmán é sù\* lé, nungmoq mara hùn mù, sat pyám bekô. Yhang kúm gi, nungmoq lé a lhom hkâm zìng nghut ri.

### *Myit Hîng Hîng Hkam Jan Ra Râ Hkyô*

<sup>7</sup> Haú mù luí, gumang wui ê, haú Yhumsing dum jé lé é buinyi jé shoq myit hîng é èq lánng nyi keq ô! Hkyâm saí sù lé wú wú keq, yhang gi, myihpún mai ahpau dán é ashi lé wó yû shoq ga mau mún eq wò htáng htáng é mau wo gyûn é jé shoq myit hîng hîng lánng nyi ri.

<sup>8</sup> Haú eq rajung za, nungmoq le, Yhumsing Yesuq dum jé lé râ gi, chyâng lo nyi bê nghut é yanmai, myit hîng é èq, i-myt lé lhoq ging lhoq tîng to keq.

<sup>9</sup> Gumang wui ê, nungmoq jéyáng a hui sháng gaq, nungmoq yhangchang hkânyung nyâng lhùm nyi ko. Wú keq, Tarâ agyi gi, hkúmdong má jé nyi to bê nghut ri.

<sup>10</sup> Gumang wui ê, haú Yhumsing Garaí é myiing eq hko kyô é myiqhtoí pé wuihke jamjau huí é hkûn, jân pyâm é myit lé, nungmoq gi, ge é alik agàn kut yû keq.

<sup>11</sup> Wú keq, shikut shirang é bang lé, nganhung gi, hkungsô wó é bang nghu é nghut

\* 5:6 Dingmán é sù gâ é danghkun lé, Chyúmlaika ra-am má gi, dingmán é bang gâ ri.

lhê. Yobaq hkâm jân é yanmai, Yhumsîng Garai gi, yhang lé htâng má myo myo dum shimân byî é hkyô lé, nungmoq wó gyô wú bê nghut lhê. Haî mù gâ le, haû Yhumsîng Garai gi, gyai shogyo nhikmyîn é sù nghut nyi ri.

<sup>12</sup> Ngá é gumang wui ê, banshoq má ahkyak dik é gi, haî le le hkâdakâm kó. Mauhkûng lé a nghut jáng, myigùng lé lang lui le hkâdakâm kó. Dakam é dang gotû lé le hkâtaî nyi kó. Nungmoq doqdân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghû za, taí keq.

### *Lumjîng Myit Eq Kyûdung Râ Hkyô*

<sup>13</sup> Nungmoq má rayuq yuq wuîhke jam-jau huî é nghut le gi, kyûdûng nyi sháng gaq; rayuq yuq myit ngón nyi é nghut le gi, hkya-on mahkôn hkon nyi sháng gaq.

<sup>14</sup> Nungmoq má rayuq yuq nôhpyo huî é nghut le gi, noqkuq hpúng mâ é nhik bô suwún wuî lé ji yù mù, haú bang gi, Yhumsîng Yesuq é myîng mai yhang lé xû but byi lui, kyûdung byi kó sháng gaq.

<sup>15</sup> Haû su mù, lumjîng myit eq kyûdûng é dang gi, haû nò sù lé lhoq gê lui, Yhumsîng Garai gi, haú yuq lé lhoq toq yû râ nghut lhê. Yhang gi, yubak mara kut shut é nghut kôlhang, hkyut pyám byî é hui râ nghut lhê.

<sup>16</sup> Haû mù lui, nungmoq lhoq ge é hui kó sháng gaq, nungmoq é yubak mara lé rayuq eq rayuq yín lhum mù, kyûdung byî lhûm nyi keq. Dingmán su é kyûdung dang gi, wó dut nhâng râ a-tsam wum-o myo myo bo nyi ri.

<sup>17</sup> Eliyaq gi, nga-nhúng su i-myit unghkaû bo é xângzo byù za nghut lhê. Nghut kôlhang, yhang gi, mau a wò sháng gaq ga, wum kat o kat kyûdung jáng, súm zan eq lhamó hkyuq hkyap tup myigùng htoq má mau a wò shoq dut byuq é nghut lhê.

<sup>18</sup> Kyû dum dûng kat jáng, mauhkûng gi, maú wo hkyô kat byi mù, myigùng gi, yhâng é kyô shi mui shi lé lhoq htoq byî wú bê nghut lhê.

<sup>19</sup> Ngá é gumang wui ê, nungmoq chyáng mâ é rayuq yuq, haû tengmán hkyô mai nghoq ló byuq é hkûn, rayuq yuq gi, yhang

lé tengmán hkyô shut dum wó shuî taû lo é nghut le kúm gi,

<sup>20</sup> haû shuî taû yù sù gi, yubak mara kut é sù lé, shut shai é hkyô mai tengmán hkyô shut shuî taû yù mù, myit woi-nyí lé shi é mai hkyi yù bê nghut é yanmai, yubak mara myo myo lé shuî nghop pyám byî é sù dut berá lé, bûn nyi keq ô!

## PETRUQ

### Hî Dàm Hun Kat é Laiká (1 Peter)

<sup>1</sup> Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jìno gyo râ matú le, Yhâng é suí eq hpyûn gyûn é hui\* râ matú le, haû Woi-nyí é lhoq sân-yúng nyi é muzó dông mai, Îwa Garai Gasâng é hî te sê tô é hpaqchyî má cháng luî, hkyin yù hui é bang nghut é,

<sup>2</sup> Garai Gasâng eq hkyin htoq yù luî, mingkân é byùbing dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyi sháng gaq.

#### *Dui Nyi É Myit Myoqbyù Hkyô*

<sup>3</sup> Hkya-on kungtôn hkyô gi, nga-nhûng é Yhumsing Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô dông, Yhâng é gyai shogyo nhikmyín é yanmai, nga-nhúng lé, asik hku é dum hui nhâng mù, rû dui nyi é myit myoqbyù hkyô lé wó nhang é htoq agó,

<sup>4</sup> nungmoq é matú mauhkûng htoq má tô to byi bê nghut é, hkâ-nhám le, a hten a byoq é, agot a-û a dut é, a hpoî byuq é mui lé le wó nhang é nghut lhê.

<sup>5</sup> Nungmoq gi, lumjîng kô é yanmai, ló htâng é ahkyíng má lhoq htoq shit râ rì rì nghut é hkyi yù hkyô jé shoq, Garaî é hpungwup a-tsâm eq upzúng é hui bang nghut akô.

<sup>6</sup> Haû mù, nungmoq gi, ahkuî razup zo, wuîhke hkyô junghkang jungmó má yón hpuzô é hui kó râ nghut kôlhâng, gyai yhang gabú nyi keq.

<sup>7</sup> Wuîhke hkyô haû pé mai, nungmoq é lumjîng myit gi, jet é hkyô lé wó chyam htoq mù, myi mai jên yù kôlhâng htên byoq sê é hîng htoq je gyaú luî, Yesuq Hkrisduq htoq shit é hkûn, hkya-on kungtôn hkyô,

hpungwup shingkang eq aróng sitang lé, nungmoq wó kó râ nghut lhê.

<sup>8</sup> Nungmoq gi, Yesuq lé a myang wú kôlhâng, Yhang lé chyitdap bum akô; Ahkuî, nungmoq, Yhang lé a myàng kôlhâng, Yhang lé lumjîng kô é nghut mù, a ung htoq taî é eq hpungwup bo é gabú hkyô gi, nungmoq chyáng byíng jup nyi ri.

<sup>9</sup> Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjîng myit é akyû lé wó yu nyi kô é nghut ri.

<sup>10</sup> Hkyi yù hkyô haû eq séng luî, nungmoq chyáng jé bê nghut é jeju hkyô lé taî é myiqhtoî pé gi, gyai yhang sidiq myit eq jí jí chyun chyun ho gon wú bekô nghut ri.

<sup>11</sup> Yhangmoq gi, Hkrisduq wuîhke jam-jau hui luî, hpungwup shingkang wó râ nghut é hkyô lé, yhangmoq má lúng nyi é, Hkrisduq é Woi-nyí mai te taî é hkûn, hkâ-nhám nghut râ eq hkasû é u má nghut râ hkyô lé ho gôn wú bekô nghut ri.

<sup>12</sup> Mauhkûng mai nhang kat é Chyoiyúng Woi-nyí eq, nungmoq lé gabú danglù hko kyo bê bang mai, ahkuî nungmoq lé taî kyo bê nghut é hkyô pé lé, yhangmoq taî kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyô pé lháng gi, haû hkyô pé lé gyai wú nau bum akô nghut ri.

#### *Chyoiyúng Nyi Râ Hkyô*

<sup>13</sup> Haû mù luî, zui saí râ matú nungmoq é i-myit lé hen to keq; yhumsing gùng yhumsing hkang nyi keq; Yesuq Hkrisduq htoq shit é hkûn, nungmoq lé byi râ nghut é jeju lé, hkyak za myit myoqbyu nyi keq.

<sup>14</sup> Jìno gyô é zoshâng wuî su, myoq a bóng shí é pyat má nungmoq nyi tô é hkûn, nungmoq é agé ashop ô nau hkyô lé a châng kut é za,

<sup>15</sup> haû nungmoq lé ji yu é Sû gi, chyoiyúng é su, nungmoq zui saí é hkyô banshoq má chyoiyúng nyi keq.

<sup>16</sup> Hkâsu mù gâ le, "Ngò gi, chyoiyúng Sû nghut é yanmai, nungmoq le chyoiyúng nyi keq."\* ga kâ tô ri.

\* **1:1** *Yhâng é suí eq hpyûn gyûn é hui gâ é gi, Yhâng é suí eq mara chí sân pyám byi é lé gâ lhê.* ✧ **1:16** *Nhong 11:44-45; 19:2; 20:7*

17 Byù yuq hkanmó é muzó lé, myoq-dong a hkyin é za tarâ jéyang é sù Iwa lé, nungmoq wut dung kô é yanmai, byùbing dông shí má nyi é u lé, Garai lé gyuq hkinggâ é myit mai asak duì keq.

18 Hkâsu mù gâ le, nungmoq gi, nungmoq é îchyí îwâ pê chyáng mai bo gyó lo é hpau a dap é asak duì hkyô mai, htên byoq sê é ngùn, hing èq hkyi yù huí é a nghut é za,

19 gumjup é eq mara a bo é sauzo nghut sù, Hkrisduq é hpaû dik é suí èq sheq hkyi yù huí é ru nghut é lé, nungmoq sê lhê.

20 Yhang gi, mau htoq xâng hkun mai hkyin yu é hui bê nghut kôlhang, jhtùm ahkyíng shí pé má sheq, nungmoq é matú htoq shít nhang é hui bê nghut ri.

21 Yhang lé, shi é mai lhoq dui toq yù mù, hpungwup shingkang bò nhang é Garai Gasang lé, nungmoq gi, Hkrisduq dông mai lumjíng kô é nghut luí, nungmoq é lumjíng myit eq myit myoqbyù hkyô gi, Garai Gasâng chyáng nghut nyí bekô nghut ri.

22 Ahkuí kúm, nungmoq gi, haû tengmán hkyô lé châng é dông mai, yhumsing gùng yhumsíng lhoq sân-yúng yù bekô nghut mù, nungmoq é gumang wuì lé, lhumzuí é dông chyitdap bekô nghut luí, myit nhiklhum mai, rayuq eq rayuq gyai yhang chyitdap lhum keq.

23 Hkâsu mù gâ le, nungmoq gi, htên byoq sê é amyui mai dum hkú huí é a nghut é za, Garai Gasâng é, rû dui nyi é eq ru gíng nyi é mungdang dông, htên byoq a sê é amyui mai dum hku é hui bang ru nghut lhê.

24 Hkâsu mù gâ le,  
"Byù lhunglhang bang gi, wàhu mhan eq pung ri, yhangmoq banshoq bâng é hpungwup shingkang gi, yò má é banbó pé eq pung ri;

wàhu mhan gi, nyhuí kyuq byuq luí, banbó pé gi, yoq gyó byuq lhê;

25 nghut kôlhang, haû Yhumsing é mungdang gi, ahtum abyuq gíng nyi lhê."\*  
gâ tô ri. Haû gi, nungmoq lé hko kyo bê mungdang nghut lhê.

\* 1:25 Esai 40:6-8 \* 2:2 Woi-nyí eq sêng é jet é nau gâ é gi, Garai Gasâng é mungdang lé taí é nghut lhê. † 2:5 Woi-nyí eq sêng é yhùm gâ é gi, noqkuq hpúng lé taí nau é nghut lhê. \* 2:6 Esai 28:16 ‡ 2:7 Ahkyak é luqgok gâ é gi, Hkrisduq lé taí é nghut lhê. \* 2:7 Hkya-on 118:22 \* 2:8 Esai 8:14

## 2

1 Haû mù luí, i-myt dû é hkyô banshoq eq mhaú zô é hkyô banshoq, gegùn labyoq kut é hkyô, manon é hkyô eq lumù gansang é hkyô jung hkanmó pé lé tô pyám keq.

2 Asik hku é zonú pé nau lé ô nau gadaú é su, woi-nyí eq sêng é jet é nau\* lé ô nau gadaú nyí keq, haû jáng, nungmoq gi, hau é yanmai, nungmoq é hkyi yù hkyô má wó kô myhâng kó râ nghut lhê.

3 Hkâsu mù gâ le, haû Yhumsing gi, gè sù nghut é lé, nungmoq chyam wú bekô nghut ri.

*Rû Dui Nyi É Luqgok Eq Hkyin Yù Huí É Byù Myù*

4 Byu pé mai hkyin htoq pyám kôlhang, Garai Gasâng é matú hpaudap luí, Yhâng èq hkyin yù huí é, rû dui nyi é Luqgok nghut sù, haû Yhumsing chyáng nungmoq jé lé é hkùn,

5 nungmoq le, rû dui nyi é luqgok pé su, woi-nyí eq sêng é yhùm† saí nyi é hui luí, Yesuq Hkrisduq dông mai, Garaí èq hap yù gíng é, woi-nyí eq sêng é hkungga nhông byi râ matú, chyoiyúng é hkyangjong amyû dut bekô nghut ri.

6 Hkâsu mù gâ le, Chyúmdang má,  
"Wú keq, hkyin yù huí é eq hpaudap é htungchyûn luqgok racham lé, Zi-un bùm má ngò lhez tô é nghut lhê;  
Yhang lé lumhkau é sù gi, hkâ-nhám le hoq hpû é hui râ a nghut."\*  
ga taí tô ri.

7 Haû mù, lumjíng bang nungmoq é matú gi, luqgok haû hpaudap é nghut lhê. Nghut kôlhang, a lumjíng bâng é matú gi,  
"Haû yhùm saí bang hkyin htoq pyâm é luqgok gi, htungchyûn má é ahkyak dik é luqgok‡ dut bê nghut ri."\*  
ga le,

8 "Byu pé lé, htung leng râ luqgok eq myit leqbat nhâng râ luq mó cham dut bê nghut ri."\*  
ga le, taí tô ri. Yhangmoq gi, mungdang lé a cháng kô é yanmai, myit leqbat kô é nghut lhê. Haû dut râ lé, yhangmoq é matú masat to gû nghut bê nghut ri.

<sup>9</sup> Nghut kôlhang, nungmoq gi, mauchut hkaû mai Yhâng é mauhpo maubó shut nungmoq lé wut htoq yú Su é mauhpo muzó lé wó taí pyô kó sháng gaq ga, hkyin yù huí é byuhú, hkohkâm hkyangjong amyû, chyoiyúng é byù myû, Garai Gasang eq sêng é byu pé nghut akô nghut ri.

<sup>10</sup> Nungmoq gi, hí lé byù ra-myû a nghut wú kôlhang, ahkuí gi, Garai Gasâng é byù myû nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yú bekô nghut ri.

<sup>11</sup> Chyitdap é luzúm wuê ê, nungmoq é asak woi-nyí lé majan zân nyi é, yubak mara byíng Jup é ô nau gadaú hkyô lé koi pyám keq nghú, gó ming byu pé eq byùbing pé dông mingkan htoq má nyi é bang nungmoq lé, ngò, wum taí tsuq kat lhê.

<sup>12</sup> Haû a lumjíng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômù, nga-nhúng lé Garai Gasâng eq lé kûm é buinyi má Garai lé shigyaú kó sháng gaq, a lumjíng shí é byu pé é ahkaû má haû su ge é asak duì hkyô dông nyi yap keq.

### *Uphkâng Bang Eq Yhumsîng Wui É A-ô Má Nyi Râ Hkyô*

<sup>13</sup> Haû Yhumsing é yanmai, byu pé mâ é ahko ahkáng wó bang banshoq é a-ô má nyi keq: kô dik é ahkáng ayá wó é hkosêng é a-ô má nghut kôle,

<sup>14</sup> shut é hkyô kut bang lé dam byi râ matú eq jô é hkyô kut bang lé shigyaú râ matú, hkosêng eq nhang tô é mauzaú pé é a-ô má nghut kôle, nyi nyi keq.

<sup>15</sup> Hkâsu mù gâ le, ge é hkyô kut é dông, byù nâ pé é a sé a dat é dang lé nungmoq lhoq zîm pyâm é gi, Garai Gasang ô nau é hkyô nghut lhê.

<sup>16</sup> Lut bê bang dông nyi keq, nghut kôlhang, agè ashop é hkyô lé nghop pyám râ matú nungmoq é luthkyô lé hkâchûng kó; Garai Gasâng é dui-nhâng zoshâng wui dông nyi keq.

<sup>17</sup> Yuq hkanmó lé rago za hkunggâ é hkyô shit keq; lumjíng é gumang wui

lé chyitdap keq; Garai Gasang lé gyuq hkunggâ nyi keq; hkosêng lé hkungga keq.

<sup>18</sup> Dui-nhâng zoshâng wui ê, hkungga myit banshoq eq, nungmoq é yhumsîng wui é a-ô má nyi keq; ge é eq nú-nhám bang é a-ô má za a nghut, byuwuê pé é a-ô má le nyi keq.

<sup>19</sup> Hkâsu mù gâ le, byù rayuq gi, Garai Gasang lé bûn nyi sù nghut é yanmai, mara dông a nghut kôlhang, wuîhke jamjau huí é hkyô lé hpuzô é lé, jân pyâm é nghut le gi, hkya-on gíng é sù nghut lhê.

<sup>20</sup> Nghut kôlhang, nungmoq gi, mara kut shut é yanmai, nhuq bat é hkâm zo luí, haû lé jân nyi é nghut le gi, hai aróng wó kó râ lhú? Nghut kôlhang, nungmoq gi, ge é hkyô kut luí, wuîhke hui zô é lé jân pyâm é nghut jáng, haû gi, Garai Gasâng hí má hkya-on gíng é hkyô nghut lhê.

<sup>21</sup> Nungmoq gi, haû hkyo é matú ji yù huí é nghut lhê; haû mù gâ le, Hkrisduq gi, nungmoq é matú wuîhke hkyô huí é má, nungmoq lé alik dông tô to byi bê nghut mù, nungmoq gi, Yhâng é hkyí-kám pé lé cháng râ dut lhê.

<sup>22</sup> "Yhang gi, hai mara le a kut shut, Yhâng é nhut mai mhaû é lé a myàng."☆

<sup>23</sup> Yhang gi, rhoi é huí é hkûn, yhangmoq lé a dum taû rhoi; wuîhke hkyô huí é hkûn, kyuq é dang a taí. Haû kut râ malaî, tengmán é dông jéyang é Su chyáng, Yhânggùng lé ap pyâm ri.

<sup>24</sup> Nga-nhúng gi, yubak mara eq wó shi gang mù, dingmán hkyo é matú asak wó duí kó sháng gaq ga, Yhang gi, sik zîng má, Yhânggùng eq yhang, nga-nhúng é yubak mara lé Yhânggùng má wun pyám byi bê nghut ri; Yhâng é dâm pé é yanmai, nungmoq gi, lhoq gê byí é hui bekô nghut ri.

<sup>25</sup> Hkâsu mù gâ le, nungmoq gi, hkyô nghoq byuq é sau pé su dut wú kôlhang, ahkuí, nungmoq gi, haû sau zúng Sù eq nungmoq é asak woi-nyí lé upzúng Su chyáng lhing taû lò bekô nghut ri.

## 3

### *Ikun Myhî Pé Eq Ikun Hpô Pé*

<sup>1</sup> Ikun myhî pé ê, haû eq rajung za, yhum-sing é ikun hpô uphkang é a-ô má nyi keq;

☆ 2:22 Esai 53:9

haú hkûn, yhangmoq mâ é rayuq yuq, haú mungdang lé a lumjing kôlhang,

<sup>2</sup> yhumsing é asak dui hkyô mâ é sansêng é hkyô eq hkunggâ é hkyô lé myàng kôjáng, dang dông a nghut é za, yhang é yhumsing myhî é nyi yap é sâmlai dông mai yhang lé wó lhoq lhik yû râ nghut lhê.

<sup>3</sup> Nungmoq yúng é hkyô gi, ahtoq pyâm za nghut é, xâmban nik é dông, hîng zè mhôn chung é eq réng é mebu wut é dông mai lo é a ge nghut.

<sup>4</sup> Hau é malaî, haú gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoî é yúng hkyô nghut é nungmoq é i-myt unghkaû mâ é su é yúng hkyô sheq dut râ lhê.

<sup>5</sup> Hkâsu mù gà le, gó hkûn, Garai Gasâng chyáng myit myoqbyù bang nghut é, chyoiyúng é myiwe wuî gi, yhangmoq gùng lé haú dông mhôn yù yù kut kô é nghut lhê.

<sup>6</sup> Sarah gi, Abraham é jìno gyo luî, yhang lé yhang é yhumsing ga wut é su, yhangmoq gi, ó le ô é yhumsing é ikun hpó uphkan é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

<sup>7</sup> Ikun hpô pé ê, haú eq rajung za, yhumsing é ikun myhî eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haú hkûn, nungmoq é kyûdung dang lé a he-ngik pyâm byi râ nghut lhê.

### *Ge É Kut Luî, Jamjau Hkam É Hkyô*

<sup>8</sup> Dang htâng sat é má, nungmoq banshoq bang gi, rayuq eq rayuq myit huî lhûm nyi keq; myit wú nô mù, gumang nhiktâng wuî su chyitdap lhûm nyi keq; shogyo nhikmyin myit bò luî, i-myt nyhum nyi keq.

<sup>9</sup> Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haî mù gà le, nungmoq gi, haú pê é matú, shimân jeju muì wó hkam yù kó sháng gaq ga, ji yu é hui kô é ru nghut lhê.

<sup>10</sup> Hkâsu mù gà le,

"Asak dui râ lé chyitdap é eq ge é buinyi pé lé myàng nau é sù ó yuq le, yhang é shô lé, agè ashop é mai, yhang é nhutwuî lé, mhaú dang taî é mai, lhoq kâng pyâm ra râ nghut lhê.

<sup>11</sup> Yhang gi, agè ashop hkyô mai lhing tau mù, ge é kut ra râ nghut lhê; yhang gi, nguigon simsaq hkyô lé hô mù, châng hkat nyi ra râ nghut lhê.

<sup>12</sup> Hkâsu mù gà le, haú Yhumsing é myoqjí gi, dingmán bang lé wú nyi é nghut luî, yhangmoq é kyûdung dang lé, Yhang é nohkyap eq gyo byi ri;

nghut kôlhang, haú Yhumsing é myoqdong gi, agè ashop hkyô kut bang lé gye dông myang pyâm ri."✧

gâ tô ri.

<sup>13</sup> Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang râ lhú?

<sup>14</sup> Nghut kôlhang, dingmán hkyo é matú, nungmoq wuîhke jamjau huî le lhang, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dàn kó."✧

<sup>15</sup> Nungmoq kúm gi, myit nhiklum má, Hkrisduq lé, Yhumsing dông jowò byi keq. Nang wó é myit myoqbyù hkyô lé myí é sù yuq hkanmó lé, haî mù wó é hkyô tû taî kyo râ matú, ayang hen to aq. Nghut kôlhang, nú-nhâm é eq hkunggâ é dông haú lé kut nyi aq;

<sup>16</sup> nungmoq é unghkaû myit san za dut nyi keq, haú hkûn, Hkrisduq dông mai nungmoq wó é ge é a-kyang lé rhoi dang taî é bang gi, yhangmoq lumù gansang é yanmai hoq hpû é hui kó râ nghut lhê.

<sup>17</sup> Garai Gasang ô nau é nghut le gi, agè ashop kut luî jamjau hkâm râ htoq má, ge é kut luî jamjau hkam le gi, je ge é nghut lhê.

<sup>18</sup> Hkâsu mù gà le, nungmoq lé Garai Gasâng chyáng shuí jé shoq, Hkrisduq gi, byu pê é yubak marâ é yanmai, radâm za shî hkâm pyâm bê nghut ri; haú gi, dingmán Sù, a dingmán bâng é matú shî hkâm byi é nghut lhê. Yhang gi, gungdu shî bê nghut kôlhang, haú Woi-nyí má lhoq dui é hui bê nghut ri.

<sup>19</sup> Yhang gi, Woi-nyí dông, htóng lúng tô é woi-nyí pé lé ê hko kyô ri.

<sup>20</sup> Woi-nyí haú pé gi, a-nham lé, Noaq é ipyat má wui-sanghpo lé Noaq tsuq nyí é hkûn Garai Gasang myit hîng hîng lǎng nyi é u lé, jìno a gyô é bang nghut akô. Wui-sanghpo má wàng mù, wui mai hkyi yù huí é byù shau luí, shit yuq za nghut akô.

<sup>21</sup> Wui haú gi, ahkuí nungmoq lé le hkyi yu é nghut é baptisma é azòng nghut ri; haú gi, gungdu mâ é agot a-û lé huí sêng pyám byí é a nghut é za, sansêng é unghkaú myit mai Garai Gasang é hí má gidìq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luí, hkyi yu é hui kô é nghut lhê.

<sup>22</sup> Yesuq Hkrisduq gi, mauhkûng má doq ló luí, Garai Gasang é loqyò hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkanq é a-ô má nghut nyi bum akô.

## 4

### *Garai Gasang É Matú Asak Dui Râ Hkyô*

<sup>1</sup> Haú mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myit sâmlai hau èq yhumsing gùng má gyehking dông wut to keq, haí mù gà le, yhâng é gungdu má hpuzo bê sù gi, mara eq gang bê nghut ri.

<sup>2</sup> Haú nghut é yanmai, yhang gi, yhang nyi tùm tô é mingkan asak dui hkyô má, agè ashop é xângzo byù ô nau é dông a nghut é za, Garai Gasang ô nau é dông asak dui é ru nghut lhê.

<sup>3</sup> Hkâsu mù gà le, nungmoq gi, lai lò bê ahkyíng má, a lumjìng shí é byu pé hkyin kut nau é hkyô nghut é, shut é dông nyi zô lhúm nau é i-myit, agè ashop é yut yut ô nau é hkyô, í shuq wut é hkyô, zo yê shuq yê mù achaq achyut kut é hkyô, ye lai rá wut jung zoshuq lé yut yut ô nau é hkyô, achaq achyut é hparà noq hkyô pé má, ahkyíng luq shoq nyi lai lò bê bang nghut akô.

<sup>4</sup> Nungmoq gi, ladu lai shoq achaq achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maú byuq luí, nungmoq lé lumù gansang pyám akô nghut ri.

<sup>5</sup> Nghut kôlhang, yhangmoq gi, dui nyi é bang eq shí bê bang lé tarâ jéyáng râ rì rì nghut to Sù lé jihpán shit kyo ra kó râ nghut lhê.

<sup>6</sup> Hau é yanmai, ahkuí shi byuq bê bang lé lhang gabú danglù hko kyô é hui bekô nghut lhê; haú gi, gungdu eq séng luí ga jang, yhangmoq gi, byù dông mai tarâ jéyáng é hui râ eq, woi-nyí eq séng luí ga jang, Garai Gasang dông mai asak wó duí râ matú nghut lhê.

<sup>7</sup> Lhunglhang htum râ ahkyíng gi, chyáng bê nghut ri. Haú mù luí, nungmoq kyú wó dung kó sháng gaq, bûn gying luí, yhumsing gùng yhumsing hkanq nyi keq.

<sup>8</sup> Banshoq htoq má ahkyak é gi, rayuq eq rayuq gyai yhang chyitdap lhúm é hkyô nghut lhê, haí mù gà le, chyitdap myit gi, yubak mara myo myo lé wó nghop pyám é nghut lhê.

<sup>9</sup> Rayuq eq rayuq, taí nyung nyâng é hkyô a bo é za, rago hkulum lhum keq.

<sup>10</sup> Yuq hkanqmó gi, yhumsing wó hkam yù bê chyunghuq eq rajung za, góbang lé dojaú râ lhê; Garai Gasang jeju chyunghuq ajung jung lé, lhumzui é èq rago chung jai râ lhê.

<sup>11</sup> Rayuq yuq taí é nghut jáng, Garai Gasang é mungdang haú eq yhang rajung za taí ra râ nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojaú é nghut jáng, Garai Gasang byí é wum-ô èq dojaú ra râ nghut lhê. Haú hpungwup shingkanq eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

### *Hkristan Dut É Yanmai Jamjau Huí É Hkyô*

<sup>12</sup> Chyitdap é luzúm wui ê, wuihke hkyô dông chyam é lé nungmoq hkâm zô nyi é hkûn, nungmoq chyáng maú nhô zâ é hkyô dut htoq bê dông, hkâgyuq dàn kó.

<sup>13</sup> Hkrisduq é jamjau hkyô pé lé bo hui zô é yanmai kúm gi, nungmoq gabú keq, haú hkûn sheq, Yhang é hpungwup shingkanq eq rahá Yhang htoq shit é hkûn, nungmoq gi, gabú dik é hui kó râ nghut lhê.

<sup>14</sup> Hkrisduq é myìng yanmai, nungmoq gi, rhoi é hui zô é nghut jáng, hkungsô

wó nyi ri; hkâsu mù gâ le, hpungwup shingkang bo é Woi-nyí nghu é, Garai Gasâng é Woi-nyí gi, nungmoq chyáng nyi nyi ri.

<sup>15</sup> Nungmoq mâ é rayuq yuq jamjau huí é nghut le gi, byù sat sù, hkau sù, gotù agè ashop kut sù, góbâng é mù má cháng gunjang sù dông jamjau huí é a dut sháng gaq.

<sup>16</sup> Nghut kôlhang, Hkristan rayuq dông nungmoq jamjau huí é nghut le gi, hkâhoq nyí kó, Garai Gasang lé kúm gi, myìng hau é yanmai hkya-ôn nyi keq.

<sup>17</sup> Hkâsu mù gâ le, tarâ jéyáng râ ahkyíng gi, jé bê nghut luí, Garai Gasâng é ikun byu pé mai hí râ nghut lhê; haù gi, nga-nhúng mai hí é nghut jáng, Garai Gasâng é gabù danglù lé a châng é bang gi, hkâsu wá dut lò râ nghut lhê lú?

<sup>18</sup> "Haù dingmán sù, hkyi yù hui râ wui é nghut le gi, tarâ a hkunggâ é eq yubak dap é sù gi, hkâsu wá dut râ nghut lhê lú?"<sup>☆</sup>

gâ tô ri.

<sup>19</sup> Haù nghut mù luí, Garai Gasang ô nau é dông jamjau huí é bang gi, yhumsing gùng lé, lhumzuí é Hpân Su chyáng ap byi mù, ge é lé xoq kut nyi ra râ nghut lhê.

## 5

### *Suwún Wuí Éq Zorâm Wuí*

<sup>1</sup> Nungmoq mâ é hpúng suwún wui lé, ngò, nungmoq é byinzùm suwún, Hkrisduq é jamjau hkyô pé é saksé nghut sù eq lhoq htoq shit râ nghut é Yhâng é hpungwup shingkang lé bo hkâm râ nghut sù dông mai sang kat kôlé:

<sup>2</sup> Nungmoq lé ap to bê nghut é Garai Gasâng é sau hpúng\* lé zúng rém bang dut mù, shuí u bang dông dojaú nyí keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut râ lhê; ngunzè lé a myoqnoq é za, shirông myit mai dojaú râ lhê.

<sup>3</sup> Nungmoq é loq má ap byi to bê bang lé a up zô é za, yhangmoq é hí má alik dut nyi keq.

<sup>4</sup> Haù jáng, Sau zúng Agyi mó† htoq shit é hkûn, nungmoq gi, hpungwup shingkang bo é, hkâ-nhám le a shum a byuq é janmaù lé myang hap yù kó râ nghut lhê.

<sup>5</sup> Zorâm wui ê, nungmoq le, nungmoq htoq ipyat ko bâng é a-ô má nyi keq. Nungmoq lhunglhang bang gi, myit lhoq nyhum é hkyô lé mebu su wut to mù, rayuq eq rayuq dojaú nyí keq, hkâsu mù gâ le,

"Garai Gasang gi, nghutbùn é bang lé hkûm zing pyám kôlhang, myit lhoq nyhum é bang lé jeju byí ri."<sup>☆</sup>

ga tô ri.

<sup>6</sup> Haù mù luí, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaù má, yhumsing myit lé yhumsing lhoq nyhum nyi keq.

<sup>7</sup> Nungmoq é myit chiq hkyô banshoq lé, Yhâng htoq má dú kê pyâm to keq, haì mù gâ le, Yhang gi, nungmoq é matú chiq byí nyi sù nghut lhê.

<sup>8</sup> Yhumsing gùng lé yhumsing hkâng mù, machya nyi keq. Nungmoq é gye nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón wún ri.

<sup>9</sup> Yhang lé htuq htíng pyám mù, lumjíng myit má gíngtíng nyi keq, haì mù gâ le, mینگan gón mâ é nungmoq é gumang wui le, rajung zâ é jamjau hkyô pé hui zô nyi kô é lé, nungmoq sê lhê.

<sup>10</sup> Haù mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shingkang matú nungmoq lé ji yù bê nghut luí, nungmoq razup zo jamjau huí é htâng má, Yhang yhang nungmoq lé gumjup nhâng mù, wum bô nhâng luí, gíng gíng tíng tíng dut nhâng râ nghut lhê.

<sup>11</sup> Haù hpungwup a-tsam banshoq gi, Yhâng chyáng pyat dedu ahtum abyuq rú joq nyí sháng gaq. Amen.

### *Ló Htâng É Shi-kyám Dang*

<sup>12</sup> Lhumzuí é gumang nghu ngò sôn yu é Sila èq garúm luí, ngò gi, nungmoq lé myit wum byi dang eq, myit wum byi dang haú

☆ 4:18 Sânghkyang 11:31 \* 5:2 Sau hpúng gâ é gi, lumjíng bang lé gâ lhê. † 5:4 Sau zúng Agyi mó gâ é gi, Hkrisduq lé gâ é nghut lhê. ☆ 5:5 Sânghkyang 3:34



pé gi, Garai Gasâng é tengmán é jeju nghut é lé saksé hkâm é dang pé lé, tot za kê kat é nghut lhê. Tengmán é jeju haú má yap gîng nyî keq.

<sup>13</sup> Babelon má nyi é, nungmoq eq rahá hkyin yù huî é Hpúng gi, nungmoq lé shi-kyâm kat ri; ngá zo đông nghut sù Markuq le, nungmoq lé shi-kyâm kat ri.

<sup>14</sup> Rayuq eq rayuq, chyitdap bopuq puq é èq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyî sháng gaq ô.

## PETRUQ Htang Dàm Hun Kat é Laiká (2 Peter)

<sup>1</sup> Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhông é Garai Gasang eq hkyi yù Sù nghut é Yesuq Hkrisduq é dingmán hkyô dông, ngamoq su, hpaù dik é lumjínng hkyô lé hap yù bê bâng chyáng dang kyô kat lhê.

<sup>2</sup> Garai Gasang eq nga-nhông é Yhumsing Yesuq lé, nungmoq sê jat nyi é hkyô má, jeju eq nguingón hkyô gi, nungmoq chyáng agùn agó ru joq nyi sháng gaq.

*Ji Yu É Eq Hkyin Yu É Hkyô Lé Lhoq Ging Lhoq Tíng Râ Hkyô*

<sup>3</sup> Yhâng é hpungwup shingkang eq ge é hkyô dông nga-nhông lé ji yù Sù lé nga-nhông sê é dông mai, Garai Gasang é hpungwup a-tsam gi, asak duì hkyô eq tarâ hkungga hkyô é matú nga-nhông râ é jung hkanngó lé byi bê nghut ri.

<sup>4</sup> Haú pé dông mai, Yhang gi, Yhâng é kô dik, hpaù dik é danggidiq pé nga-nhông lé byi bê nghut ri; haú hkùn, nungmoq gi, haú danggidiq pé dông mai, Garaí é myit sâmlai lé wó bo hkam yù râ eq agè ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô râ nghut lhê.

<sup>5</sup> Hau é yanmai yhang, nungmoq gyai yhang shikut luí, nungmoq é lumjínng hkyô má ge é hkyô lé jat yù keq; ge é hkyô má sumsé hpaqchyí lé,

<sup>6</sup> sumsé hpaqchyí má yhumsing gùng yhumsing hkanng é hkyô lé, yhumsing gùng yhumsing hkanng é hkyô má jân shirang é hkyô lé, jân shirang é hkyô má tarâ hkunggá é hkyô lé,

<sup>7</sup> tarâ hkunggá é hkyô má gumang chyitkâng myit lé, gumang chyitkâng myit má chyitdap myit lé, jat yù keq.

<sup>8</sup> Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhông é Yhumsing Yesuq Hkrisduq lé nungmoq sê é hkyô má, nungmoq lé akôm

a dut nhang é htoq agó, ashi a zui le dut nhâng râ a nghut.

<sup>9</sup> Nghut kôhang, rayuq yuq gi, hau pé lé a wó é nghut jáng, chyâng é lé za myang é eq myoqjit é sù nghut luí, lai lò bê yhâng é yubak mara pé mai lhoq sanséng byi é hui bê hkyô lé, tô-myhî pyám bê sù nghut ri.

<sup>10</sup> Haú mù luí, ngá é gumang wui ê, nungmoq lé ji yu é hkyô eq hkyin yu é hkyô lé, je riyhang lhoq gingtíng nyi keq. Hkâsu mù gâ le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó râ a nghut;

<sup>11</sup> hau htoq agó, nga-nhông é Yhumsing eq hkyi yù Sù nghut é Yesuq Hkrisduq é ahtum abyuq é mingdán má agùn agó lhom pang yu é lé, nungmoq myang hap yù kó râ nghut lhê.

*Chyúmdang Mâ É Myiqhtoi Dang*

<sup>12</sup> Haú mù luí, nungmoq gi, hau pé lé sé kô é htoq agó, nungmoq wó tô é tengmán hkyô má gingtíng nyi kô é nghut kôhang, ngò, nungmoq lé hkâ-nhám le hau pé lé ru lhoq pùn nyi râ nghut lhê.

<sup>13</sup> Shí gungdu má ngò rû dui nyi nyi gi, nungmoq lé lhoq pùn kying byi le ge ri nghù, ngò wó myit ri;

<sup>14</sup> haí mù gâ le, nga-nhông é Yhumsing Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyâm to râ nghut é lé sê lhê.

<sup>15</sup> Ngò htoq ló byuq é htâng má, nungmoq, hkâ-nhám le haú pé lé ru wó bân nyi râ lé myàng nau mù, ngò, wó dut é í shikut nyi râ nghut lhê.

<sup>16</sup> Nga-nhông é Yhumsing Yesuq Hkrisduq é a-tsam eq lé lo é hkyô eq séng luí, nungmoq lé ngamoq taí kyô wú é hkùn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq eq myang é saksé pé nghut lhê.

<sup>17</sup> Hkâsu mù gâ le, haú Kô Làm Hkikhkâm Hkyô é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."\* ga taí é htê, Yhâng chyáng jé é hkùn, haú Íwa Garaí

\* 1:17 Mht 17:5; Mrk 9:7; Luk 9:35

Gasâng chyáng mâ é aróng eq hpungwup shing kang lé Yhang wó hap yù bê nghut ri.

<sup>18</sup> Ngamoq yhang, chyoiyúng bùm má Yhang eq rahá nyi tô é hkûn, htê haû mauhkûng mai htoq lo é lé wó gyô é nghut lhê.

<sup>19</sup> Haû mù luí, myiqhtoí pê dang lé je lhoq ging bê hkyô, ngamoq wó é nghut lhê; haû mù, maubó lô luí, nungmoq é myit má bómýhû htoq lo é hkûn jé shoq, mauchut tuq dut é jowò má duq nyi é myibung lé su, myiqhtoi dang haú lé, nungmoq gyo mù rago châng kut râ dut lhê.

<sup>20</sup> Banshoq htoq má, Chyúmdang mâ é myiqhtoi dang gi, haû myiqhtoí pé mai ó le ó lichyúm lhoq htoq yu é đông a nghut é lé, nungmoq sê to râ dut lhê.

<sup>21</sup> Hkâsu mù gâ le, myiqhtoi dang gi, byù ô nau é đông hkâ-nhám lé a htoq wú é za, haû Chyoiyúng Woi-nyí èq shuí u huí é bang mai, Garai Gasâng chyáng mâ é dang taí é ru nghut lhê.

## 2

### *Sará Apyoq Pê É Hkyô*

<sup>1</sup> Nghut kôlhang, myiqhtoi pyoq pé gi, Israelaq byù haû bang é ahkaû má nyi wú bê nghut lhê, haû eq rajung za, nungmoq é ahkaû má le sará apyoq pé nyi râ za nghut lhê. Yhangmoq gi, htên byoq hkyô nghut é byoq gang râ mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsing lé lhang he-ngik pyám kó râ nghut lhê. Haû mù, yhangmoq gi, yhumsing gùng yhumsing byòdàn tung htên byoq hkyô jé nhâng bekô râ nghut lhê.

<sup>2</sup> Byù myo myo gi, haû bang é ahoq ahí hkyô má cháng kó râ eq, tengmán hkyô lé taí hpoi pyám nhâng kó râ nghut lhê.

<sup>3</sup> Sará apyoq haû bang gi, yhangmoq myoqnoq é hkyô má, yhangmoq kut htoq tô é mhô-myi đông nungmoq lé mhaú zo kó râ nghut lhê. Yhangmoq lé mara dam byi hkyô gi, gohkûn mai yhangmoq ahtoq má lhang to gù bê nghut é htoq agó, yhangmoq é htên byoq hkyô gi, yhup myhí tô nyi é a nghut.

<sup>4</sup> Hkâsu mù gâ le, Garai Gasang gi, mara kut shut é maumâng pé lé lhang a ha bûn é za, ngaraí ming má hkyô pyám luí, tarâ

jéyáng é hui râ hkûn jé shoq, yhangmoq lé tuq tuq chut é dong hkaû má kat tô é nghut lhê.

<sup>5</sup> Yhang gi, tarâ a hkunggâ é byu pé lé dowuítng é hkûn, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sù Noaq eq gotú nyhit yuq lé hung yu é nghut ri;

<sup>6</sup> Yhang gi, Sodom eq Gomoraq myuq lé, myi-mhop dut shoq nyhê hkyô pyám é đông mara dam byi luí, tarâ a hkungga bang chyáng dut lò râ hkyô é azòng kut tô é nghut ri;

<sup>7</sup> nghut kôlhang, tarâ a chùng bang é ahaq achyut asak duí hkyo é yanmai myit wui myit hke huí é, haû dingmán sù Lot lé hkyi htoq yu é nghut ri;

<sup>8</sup> (hkâsu mù gâ le, dingmán sù haû gi, nyí hkanmó yhangmoq ahkaû má nyi nyi é nghut luí, tarâ a chùng é muzó hkyô lé, yhang wó myâng wó gyô é yanmai, yhang é dingmán myit má gunjâng é hui sù nghut ri.)

<sup>9</sup> Haû su nghut é nghut jáng, Yhumsing gi, tarâ hkunggâ é byu pé lé, wuítke hkyô mai hkâsu kut hkyi htoq yu râ eq, a dingmán é bang lé, tarâ jéyáng é buinyi jé shoq, dam byí é hkyô lé xoq kut nyi é u má hkâsu kut zuí zing to râ lé sê lhê.

<sup>10</sup> Haû yubak gungshô é htên byoq sê é yut yut ô nau hkyô châng é eq ahko ahkáng lé wú tiq bang chyáng, haû hkyô hkyak dut râ nghut lhê.

Byù haú bang gi, ngegáng-htu é eq nghutbûn é bang nghut kôluí, mauhkûng bang lé lumù gansâng râ lé a gyuq kó nghut ri;

<sup>11</sup> nghut kôlhang, maumang lagyô pé lhang gi, wum je bo é eq a-tsam je bo é nghut kôle, haû Yhumsing é hí má, haû mauhkûng bang lé mara hun é đông lumù gansâng hkyô a wám kut kó nghut ri.

<sup>12</sup> Nghut kôlhang, haû sará apyoq pé gi, yhumsing a sê gyô é hkyô pé lé rhoí dang taí akô. Yhangmoq gi, haû chyup yu é hui luí, lhoq htên pyám é hui râ matú za hku lé lo é, nhik a bo é tân jung dusak đông nghut akô; dusak haú pé su, yhangmoq le, htên byoq byuq kó râ nghut lhê.

<sup>13</sup> Yhangmoq gi, nò shoq kut bekô nghut

é yanmai, nò shoq kut é hui zo kó râ nghut lhê. Yhangmoq é ngón kún nau é myit gi, nyí mó káng lé lháng gungsho yut yut ô nau hkyô lhoq dik râ matú nghut ri. Yhangmoq gi, nungmoq eq rahá zoshuq poî kut kô é hkún, mhaû é lé yhangmoq é ngón hkyô kut kômù, agè agau é eq achau achyut é bang nghut akô.

14 Yhangmoq é myoqjí pé má gi, su-myi sulàng lú hkyô byíng zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingtîng é bang lé mhoq hpyoq yu akô; yhangmoq gi, myoqnoq é hkyô má kûng é bang nghut kômù, nhîng pyâm é hui bang nghut akô.

15 Yhangmoq gi, haû dîng é hkyô lé tô pyâm to kômù, Beora é yhangzo nghut é, agè ashop hkyo é ahpau lé chyitdap sù Balam é hkyô má châng yông wún bekô nghut ri.

16 Nghut kôlhang, Balam gi, yhang kut shut é hkyo é yanmai, logúng èq tân mhoqshít é hui ri; dang a dat nyo é logúng haû gi, byu é htê dông dang taí lò mù, myiqhtoî hpó a gyîng é hkyô lé hkûm tang pyâm ri.

17 Byù hau bang gi, wuì a bo é wuìhtung eq, laidûn èq mut tâng ló é nghansoq eq pûng kômù, yhangmoq é matú gi, tuq tuq chut é mauchut hkaû lé lajang to bê nghut ri.

18 Hkâsu mù gâ le, yhangmoq gi, asôm gyáng dang lé taí mù, yubak gungshô é yut yut ô nau é hkyô dông mai, haû shut shai é hkyô má asak dui nyi é mai asik za hfang htoq lo é bang lé, mhoq hpyoq yu akô nghut ri.

19 Yhangmoq gi, haû bang lé luthkyô byi râ gidîq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyo é jùn dut nyi akô; haî mù gâ le, byù rayuq gi, yhumsîng lé hai èq up sing le, hai é jùn nghut lhê.

20 Byu pé gi, nga-nhûng é Yhumsîng eq hkyi yù Sù nghut é Yesuq Hkrisduq lé sê é dông mai, mîngkân é agè ashop hkyô mai wó hfang lut htoq bê nghut kôle, yhangmoq lé hau èq tuí yup tô é dum hui luí, ung pyâm é hui kô é nghut jáng, yhangmoq é matú, hí lhê htoq má je wuì byuq kó râ

nghut lhê.

21 Haû dingmán é hkyô lé yhangmoq sé luí, yhangmoq lé ap byi to bê nghut é chyoiyúng hkunmó lé tô pyâm to mù lhing taú ló byuq kô é htoq má, haû hkyô lé a sê é gi, yhangmoq é matú je gè kó râ nghut lhê.

22 "Hkui gi, yhang hpat tô é lé dum taú zô lhê." gâ é eq, "Waq gi, chí pyâm byi é htâng, yhâng é galhu htum má dum taú lhú lhê." ✧ gâ é sanghkyang gi, yhangmoq chyáng dik bê nghut ri.

### 3

#### *Haû Yhumsîng Jé Lé Râ Buinyi*

1 Chyitdap é luzúm wuì ê, shî gi, nungmoq lé ngò í dá nghû râ dâm ká byi kat é laiká nghut lhê. Laiká shî í lhum má, nungmoq é sansêng é i-myi lé lhoq toq râ matú taí pûn kat é laiká nghut lhê.

2 Haû gi, chyoiyúng myiqhtoî pé mai laí lò bê hkún taí tô é dang pé eq, nga-nhûng é Yhumsîng eq hkyi yù Sù mai, nungmoq é lagyô pé dông byi to bê nghut é hkunmó lé, ngò, nungmoq lé bun nhâng nau luí nghut lhê.

3 Sâng-hi má, ló htâng é buinyi pé má yhumsîng é agè ashop ô nau hkyô má cháng luí taí hpoi bang htoq lô râ nghut é lé, nungmoq sê gyô to ra râ nghut lhê.

4 Haû bang gi, "'Dum jé lé râ' ga Yhang gidîq byi é gi, hkâmá lhú? Nga-nhûng é îchyí îwá pé gi, shi byuq ló bekô nghut mù, junghkang jungmó gi, mau htoq xâng hkun mai dut é su roq dut nyi ri." ga taí kó râ nghut lhê.

5 Nghut kôlhang, yhangmoq gi, a-nham lé, Garai Gasâng é hkunmó mai, mauhkûng pé joq é eq, myigùng gi, wuì mai dut htoq nhâng mù, wuì dông hpan tô é hkyô lé, a sé gûn kut pyâm akô nghut ri.

6 Wuì hau èq sheq, haû hkun lhê é mingkan lé dowuì tîng mù, lhoq htên pyâm é nghut lhê.

7 Ahkui lhê é mauhkûng pé eq myigùng lé gi, tarâ a hkungga bang htên byoq hui râ nghut é, tarâ jéyáng é buinyi jé shoq, myi má nyhé râ matú, hkunmó hau èq Yhang hkong to bê nghut ri.

<sup>8</sup> Nghut kôlhang, chyitdap é luzúm wuî ê, haû Yhumsing é hí má, ra-nyí gi, zanwut rahkyíng dông, zanwut rahkyíng gi, ra-nyí dông nghut é hkyô shí lé, hkâtô-myhí kó.

<sup>9</sup> Haû Yhumsing gi, Yhâng é danggidiq lé hân a lhoq dik ga byù ra-am myit ngam pyâm é su, nyhâm é Sû a nghut. Yhang gi, ó yuq le htên byoq byuq râ lé a ô nau é yanmai, yuq hkangmó myit lhíng râ lé za ô naù mù, nungmoq lé myit hîng byî nyi é nghut lhê.

<sup>10</sup> Nghut kôlhang, haû Yhumsing é buinyi gi, hkau sù su a bún nùng má jé râ nghut lhê. Haú buinyi má, mauhkûng pé gi, mying hum htê eq byuq byuq râ nghut lhê; duqbó-gûng pé gi, myî èq lhoq htên pyâm é hui luí, myigùng eq haú mâ é joq mijoq gi, nyé gyó byuq râ nghut lhê.

<sup>11-12</sup> Joq mijoq gi, haú hkyô dông lhoq htên pyâm é hui râ nghut é yanmai, nungmoq gi, hkasû é byu pé dut ra râ lú? Nungmoq gi, haû Garai Gasâng é buinyi lé ho nyi é eq buinyi haû hân za jé râ lé ô nau nyi é hkûn, chyoiyúng é eq tarâ hkunggâ é asak duì hkyô dông nyi ra râ nghut lhê. Buinyi haû gi, mauhkûng pé lé, myî èq lhoq htên pyám luí, duqbó-gûng pé le, lûm nyé luí, nyé yui pyâm é buinyi dut râ nghut lhê.

<sup>13</sup> Nghut kôlhang, nga-nhúng gi, Garaî é danggidiq nghut é, dingmán hkyô é yhûm, mauhkûng asik eq myigùng asik lé, myoqbyu nyi é bang nghut lhê.

<sup>14</sup> Haû nghut mù luí, chyitdap é luzúm wuî ê, nungmoq gi, haú hkyô lé myoqbyu é bang nghut kô é yanmai, Yhang é hí má achaq achyut a dut é eq mara hûn râ hkyô a bo é za, Yhang eq nguínón nyi râ hkyô lé gyai yhang shikut nyi keq.

<sup>15</sup> Nga-nhúng é chyitdap gumang Poluq gi, yhang lé, Garai Gasang byî tô é hpaqchyî byéng-yá èq, nungmoq chyáng ká byi bê eq rajung za, nga-nhúng é Yhumsing é myit hîng hkyô gi, hkyi yù hkyô nghut é lé matsing to keq.

<sup>16</sup> Poluq gi, yhang kê é laiká pé banshoq má, haú hkyô pé eq séng luí rajung za kê shit tô ri. Yhang é laiká hkaû pé má, ra-am gi, sê gyo wuî é hkyô pé bo é yanmai, a mhoq wú é bang eq a gingtíng é bang gi, gotû Chyúmdang pé lé lichyúm htaî lhik

pyám kô é su, yhangmoq lichyúm htaî lhik pyám kômù, yhumsing htên byoq hkyô kut yu nyi akô nghut ri.

<sup>17</sup> Haû mù luí, chyitdap é luzúm wuî ê, nungmoq gi, shí hkyô lé sê to gù nghut é yanmai, tarâ a chûng bâng é shut shaî hkyo èq nungmoq lé a wó shuí nghoq yù râ eq, nungmoq é gaú é jowò mai a wó byit gyó byuq sháng gaq, yhumsing gùng yhumsing upzúng nyi keq.

<sup>18</sup> Nga-nhúng é Yhumsing eq hkyi yù Sû nghut é Yesuq Hkrisduq é jeju eq hpaqchyî hkyô má, nungmoq kô myhang lò kó sháng gaq. Hpungwup shíngkang gi, Yesuq Hkrisduq chyáng, ahkuí le, ahtum abyuq le, ru joq nyi sháng gaq ô! Amen.

## YOHAN Hî Dàm Hun Kat é Laiká (1 John)

### *Asak Mungdang*

<sup>1</sup> Ngò gi, haù sâng-hi mai joq nyi mù, ngamoq wó gyô wú bê é, ngamoq é myoq eq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé taí kyô kat lhê.

<sup>2</sup> Asak haù gi, htoq shit bê nghut mù, ngamoq gi, haù lé myang wú luí, saksé hkám bê; haù Íwa eq rahá nyi wú é, ngamoq chyáng htoq shit bê nghut é ahtum abyuq é asak haù lé nungmoq lé taí kyô lhê.

<sup>3</sup> Ngamoq eq zùm yap é hkyô lé, nungmoq le wó sháng gaq nghû, ngamoq gi, myang wú bê eq wó gyô wú bê hkyô lé, nungmoq lé taí kyô lhê. Ngamoq gi, haù Íwa eq le, Yhâng zo Yesuq Hkrisduq eq le, zùm yap nyi é bang nghut lhê.

<sup>4</sup> Ngamoq é gabú hkyô byíng jup sháng gaq nghû, ngamoq gi, nungmoq lé shí hkyô ká byí kat lhê.

### *Maubó Hkaù Má Sô Nyi Râ Hkyô*

<sup>5</sup> Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé taí kyô é danglù nghut lhê.

<sup>6</sup> Nga-nhúng gi, Yhang eq zùm yap nyi lhê nghû taí kôlhang, mauchut hkaù má ru sô nyi bum é nghut jáng, nga-nhúng gi, mhaù é bang dut mù, haù tengmán hkyô dông asak a dui é bang nghut ri.

<sup>7</sup> Nghut kôlhang, Yhang gi, maubó má nghut nyi é eq rajung za, nga-nhúng le haù maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi râ nghut lhê.

<sup>8</sup> Mara a bò nghû nga-nhúng taí é nghut le gi, yhumsing gùng yhumsing mhaù pyám luí, haù tengmán hkyô gi, nga-nhúng chyáng a bò nghut ri.

<sup>9</sup> Nghut kôlhang, nga-nhúng gi, yhumsing é mara lé yín yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a ding a mán é hkyô banshoq mai le, nga-nhúng lé lhoq sân-yúng byi râ nghut lhê.

<sup>10</sup> Nga-nhúng gi, mara a kut shut nghû taí é nghut jáng, nga-nhúng mai Yhang lé mhaù sù nghû chyo pyám é nghut luí, Yhâng é mungdang gi, nga-nhúng má a bò nghut ri.

## 2

### *Hkrisduq Gi, Nga-nhúng Lé Garúm Sù*

<sup>1</sup> Ngò chyitdap é zo wuí ê, ngò gi, nungmoq mara a kut shut kó sháng gaq nghû, nungmoq lé shí hkyô ká byí kat lhê. Nghut kôlhang, rayuq yuq mara kut shut é nghut le gi, nga-nhúng é matú haù Íwâ chyáng bo taí xoq byí é, Yesuq Hkrisduq gâ é Dingmán Sù lé, nga-nhúng wó lhê.

<sup>2</sup> Yhang gi, nga-nhúng é yubak marâ é matú, shíhtáí gunglik hkungga nghut nyi ri. Nga-nhúng é yubak marâ é matú baú za a nghut, mingkan gón mâ é byu pè é yubak marâ é matú le nghut nyi ri.

<sup>3</sup> Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri.

<sup>4</sup> Byù rayuq yuq mai, "Ngò gi, Yhang lé rago sê lhê." ga taí kôlhang, Yhang hkyô tô é hkunmó lé a châng kut é nghut jáng, haù yuq gi, byù mhaù nghut luí, tengmán hkyô gi, yhang má a bò nghut ri.

<sup>5</sup> Ó yuq nghut kôlhang, Garai Gasâng é mungdang lé châng kut nyi é nghut jáng, Yhang lé chyitdap é myit gi, haù yuq má gè gè byíng jup bê nghut ri.

<sup>6</sup> Yhang má asak dui nyi lhê ga taí é sù ó yuq nghut kôlhang, Yesuq kut bê eq rajung za, châng kut râ lhê. Haù hkùn sheq, nga-nhúng gi, Yhang má nghut nyi bê hkyô lé, wó sé lhê.

### *Hkunmó Asik*

<sup>7</sup> Chyitdap é luzúm wuí ê, ngò gi, nungmoq lé hkunmó asik ká byí kat é a nghut é za, haù sâng-hi mai nungmoq wó to bê hkunmó axau sheq ru nghut lhê. Hkunmó

axau shî gi, nungmoq wó gyô wú bê mungdang nghut nyi ri.

<sup>8</sup> Nghut kôlhang, ngò gi, nungmoq lé hkunmó asik ká byî kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haû mauchut gi, laî ló byuq luî, haû tengmán é maubó gi, duq nyi gù bê nghut ri.

<sup>9</sup> Ngò gi, maubó hkaû má nghut nyi lhê ga luî, yhumsing é gumang lé a jú é sù ó yuq nghut kôlhang, haû mauchut hkaû má ru nghut nyi ashî.

<sup>10</sup> Yhumsing é gumang lé chyitdap é sù ó yuq nghut kôlhang, haû maubó má asak dui nyi é nghut mù luî, yhang má myit leqbat nhâng râ hkyô haî le a bò nghut ri.

<sup>11</sup> Nghut kôlhang, yhumsing é gumang lé a jú é sù kúm gi, haû mauchut hkaû má nghut nyi luî, haû má sô lhing jón wún ri; haû mauchut gi, yhang lé myoq lhoq chit to byî é yanmai, yhang gi, hká shut e ló nyi é hkyô lé a sé nghut ri.

<sup>12</sup> Chyitdap é zo wuî ê, Yhâng mying é yanmai, nungmoq é mara pé hkyut pyám byi hui bekô nghut luî, nungmoq lé ngò kê kat é nghut lhê.

<sup>13</sup> Íwâ pé ê, nungmoq gi, haû sâng-hi mai nyi é sù lé sé bekô nghut é yanmai, nungmoq lé ngò kê kat é nghut lhê.

Zorâm wuî ê, nungmoq gi, haû agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

Chyitdap é zo wuî ê, nungmoq gi, haû Íwâ lé sé bekô nghut é yanmai, nungmoq lé ngò kê kat é nghut lhê.

<sup>14</sup> Íwâ pé ê, nungmoq gi, haû sâng-hi mai nyi é sù lé sé bekô nghut é yanmai, nungmoq lé ngò kê kat é nghut lhê.

Zorâm wuî ê, nungmoq gi, wum-o bo é eq, haû Garai Gasâng é mungdang nungmoq chyáng dui nyi é nghut mù, haû agè ashop sù lé ùng pyám bekô nghut é yanmai, nungmoq lé ngò kê kat é nghut lhê.

### *Mingkan Lé A Chyitdap Râ Hkyô*

<sup>15</sup> Mingkan eq mingkan htoq mâ é haî le lé, hkâchyitdap kó. Byù rayuq yuq, mingkan

lé chyitdap é nghut le gi, haû Íwâ lé chyitdap é myit, yhâng chyáng a bò nghut ri.

<sup>16</sup> Hkâsu mù gâ le, mingkan htoq má joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haû gi, Íwâ chyáng mai htoq lo é a nghut, haû mingkan mai htoq lo é ru nghut lhê.

<sup>17</sup> Mingkan eq mingkan ô nau hkyô pé gi, laî ló byuq râ nghut lhê; nghut kôlhang, haû Garai Gasang ô nau é hkyô lé kut é sù gi, ahtum abyuq dui nyi râ nghut lhê.

### *Hkrisduq É Gye Pé*

<sup>18</sup> Chyitdap é zo wuî ê, shî gi, ló htâng é ahkyíng nghut bê; haû anti-hkrisduq\* gi, lé lo nyi ri gâ é lé, nungmoq wó gyô wú bê eq rajung za, ahkuî lhang, anti-hkrisduq myo myo gi, jé lé bekô nghut ri. Hau é yanmai, nga-nhung gi, ló htâng é ahkyíng nghut bê hkyô lé wó sé bê nghut ri.

<sup>19</sup> Yhangmoq gi, nga-nhung é hpúng mai htoq ló byuq bê bang nghut kôle, gè gè ga jang, nga-nhung eq a sêng é bang nghut akô. Hkâsu mù gâ le, nga-nhung eq sêng é nghut jáng, yhangmoq gi, nga-nhung eq nyi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lhang nga-nhung eq a sêng é hkyô lé tân shit bê nghut ri.

<sup>20</sup> Nghut kôlhang, nungmoq gi, haû Chyoiyúng Sù mai xú but byî é hui† bekô nghut mù luî, nungmoq banshoq bang haû tengmán hkyô lé sê akô nghut ri.

<sup>21</sup> Haû tengmán hkyô lé nungmoq a sé kôluî, nungmoq lé ngò kê kat é a nghut; haû hkyô lé nungmoq sé gù nghut luî le, haû mhaú é hkyô gi, tengmán hkyô mai lo é a nghut é lé nungmoq sé gù nghut luî le, nungmoq lé ngò kê kat é nghut lhê.

<sup>22</sup> Mhaú é sù gi, ó yuq nghut lhê lú? Haû Yesuq gi, Hkrisduq a nghut ga he pyám é sù nghut ri. Haû Íwâ eq Yhangzo lé he-ngik é sù gi, anti-hkrisduq yhang nghut nyi ri.

<sup>23</sup> Haû Yhangzo lé he-ngik sù ó yuq nghut kôle, haû Íwâ lé sé sù a nghut. Haû Yhangzo

\* **2:18** Anti-hkrisduq ngù é lichyúm gi, Hkrisduq lé gyè kut é sù lé gâ lhê † **2:20** Xú but byî é hui gâ é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gâ lhê.

lé hap yu é sù kúm gi, haû Íwa lé le sé bê sù nghut lhê.

<sup>24</sup> Haû sâng-hi mai nungmoq wó gyô wú bê é hkyô pé lé, nungmoq i-myt má ru bo nyi keq. Haû nghut jáng, nungmoq gi, haû Yhangzo eq Íwâ chyáng nyi nyi râ nghut lhê.

<sup>25</sup> Haû gi, nga-nhúng lé Yhang byi tô é ah-tum abyuq é asak wó yû râ gâ é danggidig nghut ri.

<sup>26</sup> Ngò gi, nungmoq lé hkyô shuí nghoq shikut nyi bâng é hkyô eq séng luí, nungmoq lé shí gú kâ kat é nghut lhê.

<sup>27</sup> Nungmoq chyáng kúm gi, Yhâng chyáng mai xú but jeju lé nungmoq wó yû bekô nghut mù luí, mhoqshit râ góyuq a ra lo nghut ri. Nghut kôlhang, haû Yhâng é xú but jeju gi, hkyô hkangmó má nungmoq lé mhoqshit byi mù, haû gi, tengmán nyi é nghut luí, mhaû é hkyô haí le a bo é za, nungmoq lé mhoqshit byi nyi é eq rajung za, Yhâng chyáng nungmoq nyi nyi keq.

<sup>28</sup> Chyitdap é zo wuî ê, nga-nhúng gi, Yhang jé lé mù htoq shit é hkûn, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.

<sup>29</sup> Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkû kat é sù nghut é hkyô lé, nungmoq sê akô nghut ri.

### 3

#### *Garai Gasâng É Yhangzô Pé*

<sup>1</sup> Nga-nhúng gi, haû Garai Gasâng é yhangzô pé ga wut râ hui bê nghut é yanmai, haû Íwâ é chyitdap myit gi, nga-nhúng ahtoq má hkâ-í yhang ko nyi ri myhi-nhung! Nga-nhúng gi, yhangzô pé yhang nghut bu-nhung! Mingkan gi, Yhang lé a sê é yanmai, nga-nhúng lé le a sé nghut ri.

<sup>2</sup> Chyitdap é luzúm wuî ê, ahkuí, nga-nhúng gi, Garai Gasâng é yhangzô pé nghut nyi to kôlhang, nga-nhúng hkâsu dut râ hkyô lé, a tûn shit shi nghut ri. Nghut kôlhang, Hkrisduq htoq shit é hkûn, nga-nhúng gi, Yhang su dut râ nghut é hkyô lé, nga-nhúng sê lhê; hkâsu mù gâ le, Yhang hkâsu nghut

é hkyô lé roq yhang, nga-nhúng myàng râ nghut lhê.

<sup>3</sup> Myit myoqbyù hkyô shí lé, Yhâng chyáng má wó tô é bang ó yuq nghut kôle, Yhang sâng-yúng é eq rajung za, yhumsing gùng lé lhoq san lhoq yúng nyi ri.

<sup>4</sup> Mara kut é sù ó yuq nghut kôle, tarâ lu laí é sù nghut ri; gè gè ga jang, mara gi, tarâ lu laí é hkyô nghut nyi ri.

<sup>5</sup> Nghut kôlhang, Yhang gi, nga-nhúng é yubak mara lé hkyut pyám byi râ matú, pô htoq bê hkyô lé nungmoq sé akô; Yhâng chyáng mara a bò nghut ri.

<sup>6</sup> Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

<sup>7</sup> Chyitdap é zo wuî ê, nungmoq lé ó yuq eq le hkyô a shuí nghoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri.

<sup>8</sup> Mara kut nyi é sù gi, nat Tsadán chyáng mâ é nghut nyi ri; hkâsu mù gâ le, Tsadán haû gi, sâng-hi mai yhang mara kut nyi bê nghut ri. Haû Garai Gasâng é Yhangzo gi, Tsadán é muzó lé lhoq hpyoq lhoq hten râ matú pô htoq le é nghut lhê.

<sup>9</sup> Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haú yuq gi, Garai Gasang chyáng mai hku kat é hui bê nghut é yanmai, mara wó xoq kut lo râ a nghut.

<sup>10</sup> Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sê yu ri.

#### *Rayuq Eq Rayuq Chyitdap Lhum Râ Hkyô*

<sup>11</sup> Nga-nhúng rayuq eq rayuq chyitdap lhum râ lhê gâ é hkyô haû gi, sâng-hi mai nungmoq wó gyô yû bê danglù nghut ri.

<sup>12</sup> Haû agè ashop sù eq le séng é, yhanggu lé sat pyám é Ka-in su a ge kut. Yhang gi, haí mù luí yhanggu lé sat pyám lhê lú ga



le, yhang é muzó pé gi, agè ashop hkyô, yhanggû é muzó pé gi, dingmán é hkyô nghut é yanmai nghut ri. ✧

<sup>13</sup> Ngá é gumang wuî ê, nungmoq lé mingkân eq a ngui a jú kut kôlhang, hkâmaú kó.

<sup>14</sup> Nga-nhúng gi, nga-nhúng é gumang wuî lé chyitdap é yanmai, shi byuq é mai wó lut luí asak dui é hkyô lé, wó sê é nghut lhê. Chyitdap myit a bò sũ gi, shi é hkyô má lúng tô ashî nghut ri.

<sup>15</sup> Yhâng é gumang lé a ngui a jú é sũ gi, byù sat sũ dut râ nghut lhê; byù sat sũ ó yuq chyáng nghut kôle, ahtum abyuq é asak a bo é hkyô lé, nungmoq sê nyi akô.

<sup>16</sup> Yesuq Hkrisduq gi, nga-nhúng é matú Yhâng é asak byî pyám bê lé wú jáng, chyitdap myit hkasú é nghut é hkyô lé, nga-nhúng wó sê ri. Nga-nhúng le, gumang wui é matú, nga-nhúng é asak lé byî pyám gíng ri.

<sup>17</sup> Ó yuq nghut kôlhang, mingkan sutzè wó to luí, yhâng gumang hpó asho awui dut nyi é lé myàng kôlhang, a shogyô yu é nghut jáng, haú Garai Gasâng é chyitdap myit gi, yhang chyáng hkâsu wó bò râ lúhú?

<sup>18</sup> Chyitdap é zo wuî ê, nga-nhúng gi, dang nhut shô mai za a nghut, muzó eq tengmán é đông le chyitdap nyi sháng.

<sup>19</sup> Haú hkûn, nga-nhúng gi, tengmán hkyô eq séng bê bang nghut é lé wó sê é eq, nga-nhúng é i-myt mai nga-nhúng lé mara hun lò hkangmó, Garai Gasâng é hí má nga-nhúng i-myt wó ngón nyî bê nghut ri.

<sup>20</sup> Hkâsu mù gâ le, Garai Gasang gi, nga-nhúng myit é htoq má je kô é sũ nghut mù, jung hkangmó lé sê nyi ri.

<sup>21</sup> Chyitdap é luzúm wuî ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyúm râ hkyô a joq lo nghut ri.

<sup>22</sup> Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô haí lé le kut é yanmai, nga-nhúng dúng é hkyô lhunglhang lé, Yhâng chyáng mai wó yũ râ nghut lhê.

<sup>23</sup> Yhang hkunmó hkyô tô é eq rajung za, Yhâng zo Yesuq Hkrisduq é myìng má lumjìng é eq, rayuq eq rayuq chyitdap lhùm

é hkyô gi, Yhang hkyô tô é hkunmó yhang nghut bê.

<sup>24</sup> Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haú bâng chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byî tô é Woi-nyí đông nga-nhúng wó sê yu é nghut lhê.

## 4

### *Woi-nyí Pé Lé Gôn Wú Râ Hkyô*

<sup>1</sup> Chyitdap é luzúm wuî ê, woi-nyí hkangmó lé hkâlumjìng ko, woi-nyí haú pé gi, Garai Gasâng chyáng mâ é nghut é, a nghut e lé gôn wú keq; hkâsu mù gâ le, myiqhtoi pyoq pé myo myo gi, mingkan htoq má jón wún bekô nghut ri.

<sup>2</sup> Garai Gasâng é Woi-nyí lé nungmoq wó sê yù râ hkyô gi, shí đông nghut lhê: haú Yesuq Hkrisduq gi, gungsho đông jé lé bê ga, yín yu é woi-nyí hkangmó gi, Garai Gasâng chyáng mâ é nghut lhê.

<sup>3</sup> Nghut kôlhang, Yesuq Hkrisduq lé a yín yu é woi-nyí hkangmó gi, Garai Gasâng chyáng mâ é a nghut. Woi-nyí haú gi, lé lo nyi ri ga nungmoq wó gyô wú bê; ahkuí lhang mingkan htoq má nyi to gù nghut é anti-hkrisduq é woi-nyí nghut ri.

<sup>4</sup> Chyitdap é zo wuî ê, nungmoq gi, Garai Gasâng chyáng mâ é nghut mù luí, yhangmoq lé ung pyám bekô nghut ri. Hkâsu mù gâ le, nungmoq má lúng to Sũ gi, mingkan má nyi to su htoq je kô ri.

<sup>5</sup> Yhangmoq gi, mingkan eq séng é bang nghut lhê mù luí, mingkan hkyam đông taí bum akô; mingkan zo wuî le yhangmoq é dang lé gyo byî akô nghut ri.

<sup>6</sup> Nga-nhúng gi, Garai Gasang eq séng é bang nghut lhê; Garai Gasang lé sê é sũ ó yuq nghut kôle, nga-nhúng é dang lé gyô ri; nghut kôlhang, Garai Gasang eq a séng é sũ gi, ngamoq é dang lé a gyo nghut ri. Shí hkyô lé wú jáng, tengmán hkyo é Woi-nyí eq hkyô shuí nghoq é woi-nyí lé, nga-nhúng sê gam hkoq yũ bê nghut ri.

### *Garai Gasang Gi, Chyitdap Myit*

<sup>7</sup> Chyitdap é luzúm wuî ê, nga-nhúng gi, rayuq eq rayuq chyitdap lhùm nyi sháng; hkâsu mù gâ le, chyitdap myit gi, Garai

Gasâng chyáng mâ é nghut ri. Chyitdap myit bò sù ó yuq nghut kôle, Garai Gasâng chyáng mai hku kat é hui bê sù nghut luí, Garai Gasang lé sé sù nghut ri.

<sup>8</sup> Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê.

<sup>9</sup> Garai Gasang gi, Yhang Zô é yan-mai nga-nhúng asak wó duí sháng gaq ga, Yhang Zo zote lé mingkan htoq má nhang kat byi bê nghut ri. Haû gi, Garai Gasang mai nga-nhúng lé, Yhâng é chyitdap myit tân shit é hkyô nghut ri.

<sup>10</sup> Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap luí, nga-nhúng é yubak marâ é matú, shîhtai gunglik hkungga dut sháng gaq ga, Yhang Zo lé nhang kat byi é nghut ri; haû gi, chyitdap myit yhang nghut bê.

<sup>11</sup> Chyitdap é luzúm wuê ê, Garai Gasang gi, nga-nhúng lé haû-í yhang chyitdap é nghut jáng, nga-nhúng le rayuq eq rayuq chyitdap lhum râ dut lhê.

<sup>12</sup> Garai Gasang lé ó yuq eq le, hkâ-nhám lháng myang wú é a nghut; nghut kôlhang, nga-nhúng rayuq eq rayuq chyitdap lhum nyi é nghut jáng, Garai Gasang gi, nga-nhúng má nyi nyi bê nghut luí, Yhâng é chyitdap myit gi, nga-nhúng má gumjup râ nghut lhê.

<sup>13</sup> Garai Gasang gi, nga-nhúng lé, Yhâng é Woi-nyí byi to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng má nyi nyi bê hkyô lé le, nga-nhúng sé bê nghut ri.

<sup>14</sup> Haû Íwa gi, Yhang Zo lé mingkân é hkyi yù Sù dut sháng gaq ga nhang kat é hkyô lé, ngamoq myàng luí, saksé hkâm lhê.

<sup>15</sup> Ó yuq nghut kôlhang, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasang nyi nyi bê nghut luí, yhang le Garai Gasâng chyáng dui nyi bê nghut ri.

<sup>16</sup> Nga-nhúng gi, Garai Gasâng eq nga-nhúng lé chyitdap é hkyô lé, sé luí lumjínng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui

nyi bê nghut luí, Garai Gasang le haû yuq má nyi nyi bê nghut ri.

<sup>17</sup> Haû đông mai, chyitdap myit gi, nga-nhúng chyáng gumjup bê nghut luí, nga-nhúng gi, tarâ jéyáng é buinyi má a gyuq a kyum é myit wó yû râ nghut lhê; hkâsu mù gâ le, nga-nhúng gi, mingkan shî má Yhang su dut nyi bê nghut ri.

<sup>18</sup> Chyitdap myit má gyuq é hkyô a bò nghut ri; gyuq é hkyô gi, mara dam byi é hkyô eq sêng é nghut mù luí, gumjup é chyitdap myit gi, gyuq é hkyô lé hkat htoq pyâm ri. Haû gyuq é myit bò sù gi, chyitdap myit má gumjup sù a nghut.

<sup>19</sup> Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê.

<sup>20</sup> Byù rayuq yuq gi, "Ngò, Garai Gasang lé chyitdap lhê." ga taí kôlhang, yhâng é gumang lé a jú é nghut jáng, haû yuq gi, byù mhaû rayuq nghut ri; hkâsu mù gâ le, yhumsing byu-myang é gumang lé lháng a chyitdap é sù gi, a byu-myang é Garai Gasang lé wó chyitdap râ a nghut.

<sup>21</sup> Garai Gasang lé chyitdap é sù ó yuq le, yhumsing gumang lé le chyitdap râ lhê gâ é dang haû gi, nga-nhúng é matú, Yhang mai hkyô tô é hkunmó nghut lhê.

## 5

### *Garai Gasâng É Yhangzo Lé Lumjínng Hkyô*

<sup>1</sup> Yesuq gi, haû Hkrisduq nghut ri ga lumjínng é sù ó yuq nghut kôle, Garai Gasâng chyáng mai hku kat bê sù nghut ri; íwa lé chyitdap é sù ó yuq nghut kôle, yhang zo lé le chyitdap é nghut bê.

<sup>2</sup> Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhúng wó sê yu é yanmai,

<sup>3</sup> Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wôlai mó a nghut.

<sup>4</sup> Hkâsu mù gâ le, Garai Gasâng chyáng mai hku kat bê sù ó yuq nghut kôle,

mingkan lé ung pyám bê nghut ri. Nga-nhung é lumjínng myit gi, mingkan lé nga-nhung ung pyám é ongdang hkyô nghut ri.

<sup>5</sup> Yesuq gi, Garai Gasâng é Yhangzo nghut é lé lumjínng é sù mai lai luí, mingkan lé wó ung pyám é sù gi, ó yuq wá nghut lhê lhú?

<sup>6</sup> Haú yuq gi, wuì eq sui\* mai lé é sù, Yesuq Hkrisduq yhang nghut nyi ri. Yhang gi, wuì mai za lé é a nghut, wuì mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkám byí ri.

<sup>7</sup> Hkâsu mù gâ le, Woi-nyí le, wuì le, sui le, haú sùm lhûm é saksé hkám akô nghut ri;

<sup>8</sup> haú sùm lhum gi, rajung za nghut akô.

<sup>9</sup> Nga-nhung gi, byu é saksé lé lhom yu lhê; nghut kôlhang, Garai Gasâng é saksé gi, haú htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byí é yanmai nghut ri.

<sup>10</sup> Garai Gasâng é Yhangzo lé lumjínng é sù gi, saksé haú lé yhâng é i-myit má wó bê nghut ri; Garai Gasang lé a lumjínng é sù kúm gi, Yhang lé byu mhaú rayuq ga chyo pyám bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkám é lé, yhang a lumjínng é yanmai nghut ri.

<sup>11</sup> Nga-nhung lé, Garai Gasang byí é ahtum abyuq é asak gi, saksé haú nghut nyi ri. Asak haú gi, Yhang Zô chyáng bo ri.

<sup>12</sup> Garai Gasâng é Yhangzo lé wó sù gi, asak haú lé wó bê; Yhang Zo lé a wó sù gi, asak haú lé le a wó nghut ri.

### *Ahtum Abyuq Asak*

<sup>13</sup> Garai Gasang é Yhangzô é myìng lé lumjínng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghû, shí hkyô pé lé ngò ká byí kat é nghut lhê.

<sup>14</sup> Nga-nhung haí dúng le le, Garai Gasang ô nau é dông nghut jáng gi, Yhang gyo byi rá nghut lhê; haú gi, Yhâng é hí má nga-nhung a gyuq a kyum wó wâng rá matú nghut ri.

<sup>15</sup> Haú mù, nga-nhung haí dung kôlhang, Yhang gyo byí é lé nga-nhung sê é nghut le gi, Yhâng chyáng nga-nhung dúng é hkyô lé, nga-nhung wó yu é lé, nga-nhung sê lhê.

<sup>16</sup> Ó yuq nghut kôle, yhumsing é gumang hpó mai shí a gíng é mara kut shut é lé, myang é nghut le gi, haú yuq é matú kyûdung byi rá lhê. Haú hkûn, Garai Gasang gi, haú yuq lé asak byi rá nghut lhê. Haú gi, shí a gíng é mara wó bâng é matú taí é nghut lhê. Shí gíng é mara le joq lhê; nghut kôlhang, hau é matú dung rá lhê nghû, ngò taí nyi é a nghut.

<sup>17</sup> A dîngmán é hkyô lhunglhang gi, mara nghut lhê; nghut kôlhang, shí a gíng é mara le joq lhê.

<sup>18</sup> Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhung sê lhê; hkâsu mù gâ le, haú Garai Gasâng é Yhangzo gi, haú yuq lé wú zúng nyi é nghut mù luí, haú agè ashop sù gi, haú yuq lé wó záng htung rá a nghut.

<sup>19</sup> Nga-nhung gi, Garai Gasâng é yhangzô pé nghut é lé le, mingkan gón lé haú agè ashop su eq up tô é hkyô lé le, sê lhê.

<sup>20</sup> Hau htoq agó, Garai Gasâng é Yhangzo jé lé luí, haú tengmán Sù lé sé sháng gaq ga, nga-nhung lé sê gyô é nyan byi bê hkyô lé le, nga-nhung sê lhê. Nga-nhung gi, Yhang Zo Yesuq Hkrisduq má nghut nyi bê eq rajung za, haú tengmán Sù má le nyi nyi bê nghut lhê. Yhang gi, haú tengmán é Garai Gasang eq ahtum abyuq é asak nghut nyi lhê.

<sup>21</sup> Chyitdap é zo wuì ê, hparà lhó pé lé koi pyám nyi keq.

\* 5:6 Wuì eq sui nghu é gi, Yesuq baptisma hkam yu é hkyô eq shí hkám é hkyô lé taí nau é nghut ri.

## YOHAN Htang Dàm Hun Kat é Laiká (2 John)

<sup>1</sup> Ngò suwún hpó gi, tengmán hkyô má ngò chyitdap é, hkyin yù huí é nàng hpô-myhí eq nung zô pé lé, dang kyô kat lhê; ngò baú za a nghut, haú nga-nhúng chyáng lúng to luí,

<sup>2</sup> nga-nhúng eq ahtum abyuq ru joq nyí râ nghut é tengmán hkyô é yanmai, haú tengmán hkyô lé sê é lhunglhâng bang le, nungmoq lé chyitdap nyi lhê.

<sup>3</sup> Haú Íwa Garai Gasang eq Íwâ é Yhangzo Yesuq Hkrisduq chyáng mâ é jeju, shogyo nhikmyin hkyô eq nguingón hkyô gi, haú tengmán hkyô eq chyitdap hkyô má, nga-nhúng eq rahá joq nyi sháng gaq.

<sup>4</sup> Haú Íwa mai nga-nhúng lé hkunmó hkyô tô é eq rajung za, nung zô pé ra-am gi, haú tengmán hkyô má châng nyi é hkyô lé, ngò wó sê é yanmai, gyai yhang gabú nyi lhê.

<sup>5</sup> Chyitdap é hpô-myhí ê, nga-nhúng rayuq eq rayuq chyitdap lhum sháng nghû, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhum a nghut.

<sup>6</sup> Yhang hkyô tô é hkunmó eq rajung za, nga-nhúng cháng kut é nghut jáng gi, chyitdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyi râ matú nghut lhê.

<sup>7</sup> Hkâsu mù gâ le, Yesuq Hkrisduq gi, gungsho dông jé lé é hkyô lé a yín yu é, mhaú zô é byù myo myo gi, mingkan htoq má jón wún bekô nghut ri; haú sù é byù gi, haú mhaú zo sù eq anti-hkrisduq dut râ nghut lhê.

<sup>8</sup> Nungmoq zui saí bê muzó é akyû lé a lhoq hpyuq é za, gumjup é shigyau chyunghuq lé, nungmoq wó hkam yù kó sháng gaq, yhumsing gùng sidiq nyi keq.

<sup>9</sup> Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haú mhoqshit

é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri.

<sup>10</sup> Mhoqshit é dang haú lé a wun é byù rayuq yuq, nungmoq chyáng jé lé é nghut le gi, haú yuq lé nungmoq é yhúmhkaú má hkâwâng nhâng kó; yhang lé hkâlhom xoq yù kó.

<sup>11</sup> Hkâsu mù gâ le, haú yuq lé lhom xoq yu é sù gi, yhâng é agè ashop é muzó má lóm bê sù nghut ri.

<sup>12</sup> Ngò gi, nungmoq lé ká byí kat râ hkyô myo myo joq kôlhâng, laiká hkyap eq kajung-chi lé a kâm chùng naù. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq eq myoqdong hkyûm kut nyo lhum râ lé myit myoqbyu nyi lhê.

<sup>13</sup> Hkyin yù huí é náng nhâ é yhangzô pé gi, nang lé shi-kyâm kat akô nghut ri.

## YOHAN Súm Dam Dám Hun Kat é Laiká (3 John)

<sup>1</sup> Ngò suwún hpó gi, haú tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

<sup>2</sup> Chyitdap é luzúm hpó ê, ngò gi, haú náng é asak woi-nyí nyi-ngón yuqyo nyi é eq rajung za, nàng nguingón wángzán rà eq hkyô hkat hkangmó má, nyi-ngón yuqyo nyi sháng gaq nghú, kyûdung byî kat lhê.

<sup>3</sup> Hkâsu mù gâ le, ngò gi, gumang wui ram, ngá chyáng lé jé mù, haú tengmán hkyô má nàng lhumzui é hkyô lé le, haú tengmán hkyô má nàng hkâsu kut xoq châng nyi é hkyô lé le, lé taí kyo kô é hkûn, gyai yhang gabú é yanmai nghut lhê.

<sup>4</sup> Haú tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotû gabú hkyô a wó lo nghut ri.

<sup>5</sup> Chyitdap é luzúm hpó ê, haú gumang wui gi, maú we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri.

<sup>6</sup> Yhangmoq gi, haú noqkuq hpúng má é bang lé, náng é chyitdap myit eq séng luí taí kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm luí, dé kat é nghut jáng, ge é muzó jizó kut é nghut bê.

<sup>7</sup> Hkâsu mù gâ le, yhangmoq gi, Hkrisduq é myìng hau é matú htoq ló kôluí, a lumjìng bâng chyáng mai haí lhang a hap yù kó nghut ri.

<sup>8</sup> Haú mù luí, nga-nhúng gi, haú tengmán hkyô é matú rahá za wó chòm zui saí sháng gaq, haú sù é byu pé lé lhom hkûlum yù rà lhê.

<sup>9</sup> Ngò gi, haú noqkuq hpúng lé laiká ká byî kat bê nghut lhê; nghut kôlhang, haú ushuq kut nau é sù Diotrehpi gi, ngamoq lé a lhom hap yù nghut ri.

<sup>10</sup> Haú mù luí, ngò lé jé jáng gi, ngamoq lé a jo a âng é dang taí é eq lumù gansang é, yhang kut é muzó lé, taí hpyî kyo rà nghut lhê; yhang gi, haú hkyô lé myit a dik shî é

nghut mù luí, yhang yhang le gumang wui lé a lhom hkûlum yù, lhom hkûlum yù nàu bang lé le, yhang mai hkûm zing pyám luí, yhangmoq lé haú noqkuq hpúng mai hkat htoq pyâm ri.

<sup>11</sup> Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng má é nghut bê; agè ashop é hkyô kut é sù gi, Garai Gasang lé a myàng shî é sù nghut ri.

<sup>12</sup> Demetri ge é hkyô lé, yuq hkangmó mai le, haú tengmán hkyô eq le, saksé hkám byî akô nghut ri; ngamoq le, yhang ge é hkyô lé saksé hkám byî lhê; haú ngamoq hkâm é saksé gi, têng é hkyô nghut é lé, nàng sê lhê.

<sup>13</sup> Ngò gi, nang lé ká kat ra hkyô myo myo joq kôlhang, kâjung eq kâjung-chi dông a ká kat nàu lo.

<sup>14</sup> Ngò gi, a myáng má, nàng eq myang huí lhum rà lé myit myoqbyu tô lhê. Haú hkûn sheq, ngá-nhik myoqdong hkyûm myang nyo lhum rà nghut lhê.

<sup>15</sup> Nàng nguingón yuqyo nyi sháng gaq; shî má é luzúm wui gi, nang lé shi-kyâm kat akô nghut ri. Nàng le, haú má é luzúm wui lé, myìng du htau luí bo shi-kyám byi laq.

## YUDE Hun Kat é Laiká (Jude)

<sup>1</sup> Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Íwa Garai Gasâng èq ji yù mù, chyitdap é hui luí, Yesuq Hkrisduq èq upzúng é hui bâng chyáng dang kyô kat lhê.

<sup>2</sup> Shogyo nhikmyin hkyô, nuingón hkyô eq chyitdap hkyô gi, nungmoq chyáng agùn agó joq nyì sháng gaq ô!

### *Garai A Wó Bâng É Yubak Mara*

<sup>3</sup> Chyitdap é luzúm wuî ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kê kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjúng hkyo é matú nungmoq htuq htíng rã dut é lé, myit wum byi rã hkyô ká rã dut é lé, ngò byu-myang ri.

<sup>4</sup> Hkâsu mù gâ le, haù mara dam byí é hui zo rã hkyô lé, a-nham pyat mai kê matsíng tô é hui bê bang ra-am gi, nungmoq chyáng hkaù wang lô bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo èq htaì lhik pyám kê é htoq agó, Yhang za nga-nhúng é Yhumsíng nghut sù eq Ahko ahkáng lhunglháng wó sù, Yesuq Hkrisduq lé he-ngik pyám akô nghut ri.

<sup>5</sup> Nungmoq kúm gi, shí pé banshoq lé sê to gù nghut kôlháng, ngò mai nungmoq lé taí pún nau é hkyô gi, a-ô mâ é pé nghut lhê: Haù gi, Yhumsíng Garai mai, Yhâng é byu pé lé, Egutuq ming mai hkyi htoq yù kôlháng, a lumjúng é bang lé gi, htâng má dum lhoq htên pyám é nghut lhê.

<sup>6</sup> Hau htoq agó, haù yhumsíng é ayá lé tô pyám luí, yhumsíng é nyì jowò lé pyám tô é maumâng pé lé, Yhang gi, haù tarã jéyáng é hui rã Buinyì mó jé shoq, ahtum abyuq é toqjâng tuí èq tui luí, mauchut hkaù má lhúng tô é nghut lhê.

<sup>7</sup> Haù eq rajung za, Sodom eq Gomoraq myuq eq hau é awui ayám mâ é wà pé mâ é bang gi, ashop é dông gungsho zùm yap é hkyô shut é eq myiwe yhangchang yuqgè yhangchang nyì zô lhúm é hkyô kut kê é nghut mù, yhangmoq gi, ahtum abyuq é myi má dam byí é hpuzo bâng é alik dut bekô nghut ri.

<sup>8</sup> Haù eq rajung za yhang, yhupmoq moq é byù shí bang gi, yhumsíng é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akô nghut ri.

<sup>9</sup> Nghut kôlháng, haù maumang lagyo agyì Mihkaelaq lháng gi, Mosheq é gùng eq séng luí, haù nat zau eq dang rhâng lhúm é hkùn, yhang lé rhoi é dông mara hùn dang a wám taí é za, "Nang lé, haù Yhumsíng nhikyo sháng gaq!" ga za taí ri.

<sup>10</sup> Nghut kôlháng, byù haù bang gi, yhangmoq a sê gyô é hkyô pé lé rhoi dang taí pyám akô nghut ri; yhangmoq gi, haù myit woi-nyì a bo é dusak pé su, yhumsíng myit mai sê gyô é hkyô pé má lháng, yhumsíng gùng lé lhoq htên yu akô nghut ri.

<sup>11</sup> Yhangmoq gi, dingnyé wó rã! Hkâsu mù gâ le, yhangmoq gi, Ka-in\* kut é agè ashop é hkyô dông cháng kê é yanmai le, akyù wó rã matú, Balam† shut é dông bo shut kê é yanmai le, Kora‡ é gumlau toq hkyô kut kômù, yhang su htên byoq byuq é hui kê é yanmai le nghut ri.

<sup>12</sup> Yhangmoq gi, nungmoq é chyitdap zoshuq poí má nungmoq lé agot a-ù wó dut nhang é bang nghut mù, gyuq hoq a bo é za, nungmoq eq rahá chôm zoshuq kê é hkùn, yhumsíng gùng lé za yhumsíng lhoq gyí yu é sau zúng bang nghut akô; yhangmoq gi, lai èq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpùn pyám luí, í dâm shi é, xung nám lhê é sikgâm pé su nghut akô.

<sup>13</sup> Yhangmoq gi, yhumsíng é hoq jung lé, tsû-myup su htoq nhang é, haù wuimau mâ é kê é wuìlhêng pé eq, tuq tuq chut é mauchut hkaù má tarã jéyáng hui rã matú,

\* **1:11** Ka-in gi, yhanggu lé sat sù nghut lhê. Apùn 4:1-8 † **1:11** Balam gi, myiqhtoi nghut lhê, nghut kôlháng, ngunzè lé myoqnoq mù, Garai lé shut sù nghut lhê. Gyung So 22:1-35 ‡ **1:11** Kora gi, Garaí byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

ahtum abyuq tô to huí é, yông wún é kyí pé su nghut akô.

<sup>14</sup> Byù haú bang eq séng luí, Adam mai byùxik nyhit xik má nyi é E nuk, myiqhtoi htoi tô é gi, "Wú keq, haú Yhumsing gi, Yhâng é chyoiyúng bang mun mun sen sen eq rahá gyó lé lo nyi bê nghut ri.

<sup>15</sup> Yhang gyó lé lo é gi, yuq hkgangmó lé tarâ jéyáng rá matú eq, haú tarâ a hkunggâ é lhunglhâng bang, tarâ a hkunggâ é dông kut é muzó pé banshoq lé le, tarâ a hkunggâ é yubak byu pé, Yhang lé taí shut é dang htân pé banshoq lé le, mara byi rá matú nghut lhê." gâ ri.

<sup>16</sup> Byù haú bang gi, put dang taí é bang eq mara hún dang taí é bang nghut akô; yhangmoq gi, yhumsing ô nau é agè ashop hkyô cháng kô é htoq agó, yhumsing gùng yhumsing nghutbún é dang taí é eq yhum-sing maiwáng zat é dông, góbang lé owaq é bang nghut akô.

### *Hkam Jân Râ Hkyô*

<sup>17</sup> Nghut kôlhang, ngò chyitdap é luzúm wú ê, nungmoq gi, haú nga-nhông é Yhumsing Yesuq Hkrisduq é lagyô pé mai te taí tô é dang lé, bún nyi keq.

<sup>18</sup> Hkâsu mù gâ le, yhangmoq gi, "Haú ló htâng é ahkyíng pé má, tarâ a hkunggâ é yhumsing ô nau é hkyô dông châng é, rhoijap-dap dang taí é byu pé nyi to rá nghut lhê." ga, nungmoq lé taí wú kô é nghut lhê.

<sup>19</sup> Byù haú bang gi, nungmoq lé gam hkoq é bang, mingkan hkyô lé baú za châng é bang, haú Woi-nyí a bo é bang nghut akô.

<sup>20</sup> Nghut kôlhang, ngò chyitdap é luzúm wú ê, nungmoq gi, haú Chyoiyúng Woi-nyí má kyûdúng é dông, nungmoq é chyoiyúng é lumjúng hkyô má, yhumsing gùng yhumsing lhoq kô yu nyi keq.

<sup>21</sup> Ahtum abyuq é asak lé wó yú rá matú, haú nga-nhông é Yhumsing Yesuq Hkrisduq é shogyo nhikmyin hkyô lé láng uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

<sup>22</sup> Lumjúng hkyô má úng-âng é bang lé, shogyo nhikmyin nyi keq;

<sup>23</sup> góbang lé gi, myi mai she htoq yú mù, hkyi yú keq; dum, góbang lé gi, sidiq myit

èq shogyo nhikmyin hkyô tún shit mù, haú gungshô é achag achyut dap é yhangmoq é mebu lé chaq nyí keq.

### *Hkya-on Kungtôn Dang*

<sup>24-25</sup> Nungmoq lé, a lingbat shoq wó upzúng luí, nungmoq lé, mara hún rá hkyô a bo é za, gabú dik é dông mai Yhang é hpungwup shingkang bo é myoq hí má wó shuí shit é, nga-nhông é hkyi yú Sû, rayuq za nghut é Garai Gasâng chyáng, hpungwup shingkang, hkikhkam hkyô, hpungwup a-tsam eq ahkáng ayá gi, nga-nhông é Yhumsing Yesuq Hkrisduq dông mai, lai lò bê ipyat pé má le, ahkuí pyat má le, pyat dedu ahtum abyuq má le, rujoq nyí sháng gaq ô! Amen.

## YOHAN É SHING-RÁN Laiká (Revelation)

### *Dang-hi Hpóng*

<sup>1</sup> Yesuq Hkrisduq é shing-rán shí gi, adê myáng má dut lò râ hkyô pé lé, Yhâng é dui-nhâng zoshâng wui lé tûn shit nhâng râ matú, Garai Gasâng eq Yesuq Hkrisduq Yhang lé byî tô é nghut lhê. Yhang gi, Yhâng é maumang lagyo lé nhang kat luî, Yhâng é dui-nhâng zoshâng Yohan lé, shing-rán haû sé nhang ri.

<sup>2</sup> Yohan gi, Garai Gasâng é mungdang eq Yesuq Hkrisduq é saksé lé, yhang myang é gû banshoq eq rajung za saksé hkâm kyô é nghut ri.

<sup>3</sup> Haû ahkyíng gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù luî, haû má kê tô é gû lé châng kut é bang gi, hkungsô wó nyi akô.

### *Noqkuq Hpúng Nyhit Lhum Lé Dang Kyô Kat É Hkyô*

<sup>4</sup> Ngò Yohan gi, Asia mau mâ é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rû nyi nyi é Su chyáng mai le, Yhâng é hkohkâm-tanghkuq hí mâ é nyhit woi-nyî chyáng mai le,

<sup>5</sup> Lhumzui é saksé nghut sù, shi byuq é mai sâng-hi dui toq é zomún dut sù, myidàm htoq mâ é hkohkam pé lé up sù, Yesuq Hkrisduq chyáng mai le, jeju eq nguingón hkyô gi, nungmoq chyáng joq nyî sháng gaq.

Nga-nhúng lé chyitdap luî, Yhâng é suî eq, nga-nhúng lé, nga-nhùng é mara pé mai lhoq lhut byî é eq,

<sup>6</sup> Yhâng é Garai Gasang eq Íwa lé dojaú râ matú, nga-nhúng lé, mingdán byu pé eq hkyangjông pé\* dut nhang é Su chyáng, duqwpup shing kang eq hpungwup a-tsam gi, pyat dedu ahtum abyuq ru joq nyî sháng gaq ô! Amen.

\* **1:6** Htoq Ló 19:6 † **1:7** Htau rot bang gâ é gi, Yesuq tapzîng má jén to huî é hkûn, Yhâng é namcham má lham eq htaû é bang lé gâ lhê. ‡ **1:8** Alhpa eq Omega gi, Grik laiká myhí mâ é sâng-hí cham eq ló htâng cham nghut lhê; haû taí nau é gi, rû dui nyi sù gâ é nghut lhê. § **1:10** Yhumsing é Buinyî gâ é gi, yuban nyi lé gâ lhê.

<sup>7</sup> Wú keq, Yhang gi, mhut mai lé lo nyi é nghut luî, myoqjí hkanmó gi, Yhang lé myàng kó râ nghut lhê;

haû Yhang lé htaû rot bang† lháng, myàng kó râ nghut lhê;

haû myidàm htoq mâ é byù lhunglhâng bang gi, Yhâng é yanmai, yón ngau é hui zo kó râ nghut lhê.

Haû dông nghut sháng gaq! Amen.

<sup>8</sup> "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat má le rû nyi nyi é, wum-o a-tsam dik shoq bò Sù nghut lhê." ga, haû Yhumsing Garai Gasang taí ri.

### *Byu Yhangzo Su Dut Su É Hkyô*

<sup>9</sup> Yesuq é, wuîhke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zinlóng má nyi nyi é nghut lhê.

<sup>10</sup> Haû Yhumsing é Buinyî§ má, ngò gi, Woi-nyî eq shuí moq byuq ló é nghut mù, "Nàng myang é eq rajung za, chyúmding ralhum má ká luî, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é,

<sup>11</sup> noqkuq hpúng nyhit lhûm chyáng hun kat aq." ga, tut htê su gâ é htê mó, ngá é nunghtáng má mying é lé, ngò wó gyô ri.

<sup>12</sup> Haû ngo lé nyo nyi é htê yhumsing lé wú râ matú, ngò, gùng lhing kat é nghut lhê. Ngò gi, gùng lhing kat é hkûn, hîng myi-kok tsungjang nyhit lhum lé le,

<sup>13</sup> myi-kok tsungjang haú pê é agùng má, byu yhangzo su dut é Sù rayuq nyi tô é lé le, myang kat ri; haú yuq gi, hkyigoq htoq jé é buhîng wut to luî, wànggàng má hîng wànggò le wut tô ri.

<sup>14</sup> Yhâng é ulhum eq xâm gi, sau hpyû maú eq gyo su hpyu zan tô ri; Yhâng é myoqjí gi, myishâm su duq nyi ri.

<sup>15</sup> Yhâng é hkyî gi, myi bunghkyûng má jên yu é jet é gyi su dut ri; Yhâng é htê gi, wui myo myo mying hûm é htê su gâ ri.



16 Yhâng é loqyo loq má gi, kyî nyhit cham chung tô ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyí gûng bui su tso nyi ri.

17 Yhang lé myang é hkûn, ngò gi, shí gùng su, Yhâng é hkyî wang má lêng leq tô é nghut lhê. Haú hkûn, Yhang gi, Yhâng é loqyo loq ngá ahtoq má ke byi mù, taí é gi, "Hkâgyuq, Ngò gi, Sâng-hi eq Jihtûm nghut lhê.

18 Ngò gi, dui nyi Sû le nghut lhê; Ngò gi, shí bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shí hkyô eq momíng é zoqshi pé lé chûng Su nghut lhê.

19 Haú mù, nàng myang é lé le, ahkui dut é hkyô eq htàngnùng le dut lò rá hkyô lé le, kâ to aq.

20 Nàng myang é, Ngá é loqyo loq mâ é kyî nyhit cham eq hîng myi-kok tsungjang nyhit lhûm é zaú tô é hkyo é lichyûm gi, isu nghut lhê. Kyî nyhit cham gi, noqkuq hpúng nyhit lhûm é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

## 2

### *Ehpesu Myuq Mâ É Noqkuq Hpúng Lé Kâ Kat É Laiká*

1 Ehpesu myuq mâ é noqkuq hpúng é maumang lagyo lé isu nghû kâ kat aq:

Haú yhâng é loqyo loq má kyî nyhit cham chûng luí, hîng myi-kok tsungjang nyhit lhûm é gyoro má sô nyi Su é dang gi,

2 'Ngò gi, nàng é a-kyang, nàng shikut é hkyô, nàng hkam jân é hkyô pé lé, sê lhê. Agé ashop é byu pé lé, nàng a jân pyâm é hkyô lé le, haú lagyo a nghut kôlhang, lagyo pé nghut lhê gâ é bang lé, nàng chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lhê.

3 Nàng gi, shikut shirâng bê nghut é htoq agó, Ngá mying é yanmai, wuîhke hkyô lé hkam jan bê nghut kôle, nú byuq é hkyô a bò nghut ri.

4 Nghut kôlhang, nàng gi, nàng é sâng-hi lhê é chyitdap myit lé tô pyâm é yanmai, ngò, nang lé mara hûn rá hkyô joq ri.

5 Nàng hká mai byit gyó é lé, myit bun aq! Myit lhîng luí, sâng-hi nàng kut é muzó pé lé, kut aq. Nàng myit a lhîng é nghut jáng, ngò, nàng chyáng lé jé mù, nàng é myi-kok tsungjang lé, hau é jowò mai huí pyám byi rá nghut lhê.

6 Nghut kôlhang, Ngò a jú é, Nikola é chángzô pé kut é hkyô lé, nàng le a jú kut é yanmai, nàng chyáng ge é hkyô ralhum bo ashî nghut ri.

7 Gyo rá nohkyap dap sù gi, haú Woi-nyí mai noqkuq hpúng pé lé taí é hkyô lé, gyô yù sháng gaq. Wó ung é sù lé gi, haú Garai Gasâng é hparadisú má joq é asak sîkgâm mâ é ashi zo rá ahkáng, Ngò byi rá nghut lhê.' gâ ri.

### *Samurna Myuq Mâ É Noqkuq Hpúng Lé Kâ Kat É Laiká*

8 Samurna myuq mâ é noqkuq hpúng é maumang lagyo lé isu nghû kâ kat aq:

Haú Sâng-hi eq Jihtûm nghut é eq, shi byuq luí, asak dum dui Su é dang gi,

9 'Nàng hui zô é wuîhke jamjau hkyô eq nàng myung é hkyô lé, Ngò sê lhê; nghut kôlhang, nàng gi, wó sù nghut ri! Tsadán é tarajong bang nghut to luí, Yudaq byu pé a nghut kôlhang, Yudaq byù nghut lhê gâ é bang taí hpoí é hkyô lé le, Ngò sê lhê.

10 Nàng hui zo rá nghut é wuîhke hkyô lé, hkâgyuq. Ngò, nungmoq lé taí kyo kôlé, haú nat Tsadán gi, nungmoq lé chyam wú é dông, nungmoq chyáng mâ é ra-am lé, htóng má hkyô pyám rá nghut lhê; hau htâng, nungmoq gi, raxê nyí tup zing-rî é hui zo kó rá nghut lhê. Shí shoq lhumzui nyi aq, haú hkûn, Ngò, nang lé, asak jan-má byi rá nghut lhê.

11 Gyo rá nohkyap dap sù gi, haú Woi-nyí mai noqkuq hpúng pé lé taí é hkyô lé, gyô yù sháng gaq. Í dâm nghû rá shi é hkyô\* gi, wó ung é sù lé, wó záng htung rá a nghut.' gâ ri.

### *Pergamu Myuq Mâ É Noqkuq Hpúng Lé Kâ Kat É Laiká*

\* 2:11 Í dâm nghû rá shi é hkyô gâ é gi, ngaraí ming wang é lé gâ lhê.

12 Pergamu myuq mâ é noqkuq hpûng é maumang lagyo lé isu nghû kê kat aq:

Haû shamsó í shut dap é shâm wó Su é dang gi,

13 'Nàng nyi é jowò lé, Ngò sê lhê; haû gi, Tsadán é hkohkâm-tanghkuq joq é jang nghut ri. Nghut kôlhang, nàng gi, Ngá myîng má lumhkau nyi é nghut luí, Tsadán nyi é jang nghut é nungmoq é myuq má, Ngá é lhumzuí é saksé hpó Antipa sat huí é hkûn lhang, nàng Ngo lé lumjîng é hkyô lé, a he-ngik pyám nghut ri.

14 Nghut kôlhang, Ngò, nang lé mara hûn râ hkyô ratsuí joq ashî; hkâsu mù gà le, hparà lhô pé lé tîng byî é zoshuq zô é eq, ashop é dông gungsho zùm yap é mara kut shut râ matú, Israelaq byu pé lé mhoq hpyoq râ hpaqchyî, Balak lé mhoq byî é Balam é mhoqshit hkyô lé myhik zîng é byu pé, náng chyáng nyi ri.

15 Haû eq rajung za, haû Nikola é chángzô pé mhoqshit é hkyô lé myhik zîng é byu pé le, náng chyáng nyi ri.

16 Haû mù luí, myit lîng aq! Haû a nghut jáng, Ngò gi, náng chyáng hân jé lé mù, haû Ngá nhut mai htoq é sham èq yhangmoq lé zan râ nghut lhê.

17 Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq. Wó ung é sù lé gi, haq tô é mannaq muk lé le, myîng asik kê tô é luqgok hpyû racham lé le, Ngò byi râ nghut lhê, lhom hap yu é sù za sheq, myîng haû lé sé râ nghut lhê.' gà ri.

### *Htuatira Myuq Mâ É Noqkuq Hpûng Lé Kâ Kat É Laiká*

18 Htuatira myuq mâ é noqkuq hpûng é maumang lagyo lé isu nghû kê kat aq:

Haû myishâm su duq nyi é myoqjí eq jet é gyi su dut é hkyí dap é Sù, Garai Gasâng é Yhangzô é dang gi,

19 'Náng é a-kyang, chytidap myit, lumjîng myit, dojaú é hkyô, hkam jân é hkyô pé lé le, nàng gi, hí lhê htoq má ahkuí je myô zui saí é hkyô lé le, Ngò sê lhê.

20 Nghut kôlhang, yhumsing gùng yhumsing myiqhtoí myhí nghut lhê gà é myiwe Yezebulaq lé, nàng nyi nhang tô

é yanmai, Ngò, nang lé mara hûn râ hkyô joq ri. Yhang gi, Ngá é dui-nhâng zoshâng wuì lé, ashop é dông gungsho zùm yap râ eq hparà lhô pé lé tîng byî é zoshuq zo râ hkyô lé mhoqshit luí, yhangmoq lé hkyô shuí nghoq ri.

21 Ngò gi, yhang lé, ashop é dông gungsho zùm yap é hkyô mai myit lîng râ ahkyíng byi kôlhang, yhang gi, a myit lîng nau nghut ri.

22 Haû mù, Ngò gi, yhang lé, jamjau hui râ yhupchong má dú lheq pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lîng kô é za a nghut jáng, wuîhke jamjau mó hui zo nhâng râ nghut lhê.

23 Ngò gi, yhang zô pé lé sat pyám râ nghut lhê; haû hkûn, Ngò gi, myit nhiklhum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkgangmó lé, Ngò tau byi râ nghut é lé le, haû noqkuq hpûng pé banshoq wó sé kó râ nghut lhê.

24 Mhoqshit hkyô haû lé a châng é eq Tsadán é nik é hkyô lhaq gà é lé a mhoq yu é, Htuatira myuq má myit gyó tô é bang nungmoq lé, Ngò taí kôlé, nungmoq lé gotù wòlai Ngò jat byi râ a nghut.

25 Ngò jé lé é jé shoq, nungmoq wó tô é lé za myhik zîng nyi keq.

26-27 Wó ung é eq Ngò ô nau é hkyô lé jîhtûm jé shoq châng é sù lé gi,

"Yhang gi, yhangmoq lé, shamtoq dumbáng èq up<sup>†</sup> râ nghut lhê;

Yhang gi, tso-au hkoq pé lé su, yhangmoq lé bat hkyop pyám râ nghut lhê."<sup>☆</sup>

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê.

28 Ngò gi, yhang lé, haû bó-myhû byi râ nghut lhê.

29 Gyo râ nohkyap dap sù gi, haû Woi-nyí mai noqkuq hpûng pé lé taí é hkyô lé, gyô yù sháng gaq.' gà ri.

## 3

<sup>†</sup> 2:26-27 Shamtoq dumbáng èq up gà é gi, ahko ahkáng banshoq wó luí, up é lé gà lhê.

<sup>☆</sup> 2:26-27 Hkya-on 2:9

*Sardi Myuq Mã É Noqkuq Hpúng Lé Kâ Kat É Laiká*

<sup>1</sup> Sardi myuq mã é noqkuq hpúng é maumang lagyo lé isu nghû kâ kat aq:

Haû Garai Gasâng é woi-nyí nyhit woi-nyí eq kyí nyhit cham lé chûng Su é dang gi, 'Ngò gi, náng é a-kyang lé sê lhê; nàng gi, asak dui nyí sù ga kôlhang, shi byuq sù nghut ri.

<sup>2</sup> Gyíng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gà le, Ngá é Garai Gasâng é hí má, náng é a-kyang a gumjup é hkyô lé, Ngò myang ri.

<sup>3</sup> Haû mù, nàng hkâsu kut wó hap yu é eq wó gyô yu é hkyô lé, myit bun aq; haû dông cháng luí, myit lhíng aq. Nàng a bûn gyíng é nghut le gi, Ngò hkau sù su lé râ nghut luí, nàng gi, Ngò hká u lé râ lé, sé râ a nghut.

<sup>4</sup> Nghut kôlhang, Sardi myuq má, yhumsing é mebu lé agot a-û a kut é byù ra-am nyi akô. Haû bang gi, hpyu é mebu wut luí, Ngò eq rahá sô wún kó râ nghut lhê; hkâsu mù gà le, yhangmoq gi, gîngdán é bang nghut akô.

<sup>5</sup> Wó ung é sù gi, haû bang su, hpyu é mebu myang wut râ nghut lhê. Ngò gi, haû yuq é myíng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wá é hí má le, Yhâng é maumang lagyo pé é hí má le, haû yuq é myíng lé, Ngò yín yù râ nghut lhê.

<sup>6</sup> Gyo râ nohkyap dap sù gi, haû Woi-nyí mai noqkuq hpúng pé lé taí é hkyô lé, gyô yù sháng gaq.' gâ ri.

*Hpiladehpi Myuq Mã É Noqkuq Hpúng Lé Kâ Kat É Laiká*

<sup>7</sup> Hpiladehpi myuq mã é noqkuq hpúng é maumang lagyo lé isu nghû kâ kat aq:

Haû chyoiyúng é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhí é Su é dang gi,

<sup>8</sup> 'Nàng kut é muzó pé lé, Ngò sê lhê. Wú aq, ó yuq le a wó myhí é hkum ralhum, Ngò náng hí má hpông to byí lhê. Nàng gi, wum-o ratsuí za bò kôlhang, Ngá é dang gyo luí, Ngá é myíng lé a he-ngik pyâm é hkyô lé, Ngò sê lhê.

<sup>9</sup> Haû tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gà é byù mhaû pé lé, Ngò, náng é hkyí wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng râ nghut lhê.

<sup>10</sup> Nàng gi, myit hîng hîng hkam jan râ é Ngá é hkunmó lé châng nyi bê nghut é yanmai, myidàm htoq má nyi é bang lé chyam lik wú râ matú, mingkan gón má jé râ nghut é wuîhke jamjau ahkyíng mai, Ngò, nang lé lhoq lhut yù râ nghut lhê.

<sup>11</sup> Ngò gi, a myáng má jé lé lô râ nghut lhê. Náng é janmaú lé, ó yuq èq le a wó yu pyám byi sháng gaq, nàng wó tô é pé lé myhik zing nyi aq.

<sup>12</sup> Wó ung é sù lé gi, Ngá é Garai Gasâng é noqkuq yhûm mã é hkungzing mó dut nhâng râ nghut lhê. Haû yuq gi, hkâ-nhám le haû mai dum htoq ló râ a nghut. Ngò gi, Ngá é Garai Gasâng é myíng lé le, Ngá é Garai Gasâng chyáng mai htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myíng lé le, Ngá é myíng sik lé le, yhâng chyáng kâ tap byi râ nghut lhê.

<sup>13</sup> Gyo râ nohkyap dap sù gi, haû Woi-nyí mai noqkuq hpúng pé lé taí é hkyô lé, gyô yù sháng gaq.' gâ ri.

*Ladoki Myuq Mã É Noqkuq Hpúng Lé Kâ Kat É Laiká*

<sup>14</sup> Ladoki wà mó mã é noqkuq hpúng é maumang lagyo lé isu nghû kâ kat aq:

Haû lhumzúi é eq tengmán é saksé nghut é, Garai Gasang hpan tô é lé up é, Amen gá Su é dang gi,

<sup>15</sup> 'Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jáng gú, nye jáng jáng nye dut râ lé, Ngò ô nau ri.

<sup>16</sup> Nghut kôlhang, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám râ za nghut bê.

<sup>17</sup> "Ngò gi, wó sù nghut lhê; ngò gi, sutzè gyai wó bê nghut luí, haí lhang a ra lo." ga nàng taí ri. Nghut kôlhang, nàng gi, wuîhke jamjau hui sù, asho awui dut sù,

myùng sù, myoqjit sù eq achîn dut sù nghut é lé, nàng a sé myhi-nhung.

<sup>18</sup> Haù mù luí, nàng gi, wó sù sùt sù wó dut sháng gaq, myi má jên yu é hîng lé le, nàng achîn dut é hoq hpu hkyô lé, wó nghop pyám sháng gaq, wut râ matú, mebu hpyû lé le, nàng myoq wó myâng sháng gaq, nàng é myoqjí má kat râ matú, myoq chi lé le, nàng, Ngá chyáng mai wui yù râ matú, Ngò, nang lé hpaqchyî byî lhê.

<sup>19</sup> Ngò chyitdap é bang lé gi, tan luí, mhòqshít lhê. Haù mù, nàng gi, hân bûn gying luí, myit hîng aq.

<sup>20</sup> Wú aq! Ngò gi, hkum yâm má yap to luí, hkum lé kok nyi lhê. Rayuq yuq, Ngá é htê lé wó gyo luí, hkum hpóng byî é nghut jáng, Ngò gi, wàng mù, haù yuq eq rahá zo shuq râ nghut lhê; haù yuq le, Ngò eq rahá zo shuq râ nghut lhê.

<sup>21</sup> Ngò gi, ùng luí, Ngá Wa eq rahá Yhâng é hkohkâm-tanghkuq má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zung râ ahkáng, Ngò byi râ nghut lhê.

<sup>22</sup> Gyo râ nohkyap dap é sù gi, haù Woi-nyí mai noqkuq hpûng pé lé taí é hkyô lé, gyo yù sháng gaq.' gâ é nghut ri." gâ ri.

## 4

### *Mauhkûng Htoq Má Hkohkâm-tanghkuq Joq É Hkyô*

<sup>1</sup> Hau htâng má, ngò wú kat le, mauhkûng má hkum ralhum bóng tô é lé myang ri. Ngò sâng-hî dàm wó gyo é tut htê su gâ é danghtê ngo lé taí é gi, "Shî má doq lò aq, htàngnùng má dut lò râ hkyô pé lé, Ngò, nang lé tún shit bá." gâ ri.

<sup>2</sup> Haù hkûn jáng yhang, ngò gi, Woi-nyí má moq byuq ló luí, mauhkûng htoq má hkohkâm-tanghkuq ralhum joq é lé myàng ri; tanghkuq haù má, byù rayuq zung tô ri.

<sup>3</sup> Haù má zung to Su é isâm gi, huhpé eq ne yúng lungsêng su dut ri. Huí nyùi lungsêng su dut é woqgan síng-yang gi, haù hkohkâm-tanghkuq má hkông hîng tô ri.

<sup>4</sup> Hkohkâm-tanghkuq hau é hîngkyuq má, hkohkâm-tanghkuq gotû í xe myí lhum le joq to luí, hpyu é mebu wut mù, ulhum má hîng janmaú tsung tô é suwún í xe myi yuq gi, haù má zung tô bum akô.

<sup>5</sup> Haù hkohkâm-tanghkuq mai, lhap hpyat é, mying hûm é eq maugum gûm é pé dut htoq lo ri. Haù hkohkâm-tanghkuq hí má, myi-kok nyhit lhum le duq tô ri; haù pé gi, Garai Gasâng é woi-nyí nyhit woi-nyí nghut ri.

<sup>6</sup> Hau htoq agó, san zâ é myoqjâm su dut mâ é wui-nhông le, haù hkohkâm-tanghkuq hí má dîng tô ri.

Haù hkohkâm-tanghkuq agùng má le, hîngkyuq má le, hî-u nunghtáng hîngkyuq myoqjí dap é dui é dusak myí du nyi tô ri.

<sup>7</sup> Dui é dusak sâng-hî du gi, hkanghkyi su dut ri; í du nghû râ du gi, nohtó su dut ri; sùm du nghû râ dû é myoqdong gi, byu myoqdong su dut ri; myí du nghû râ du gi, dâng wún é zung su dut ri.

<sup>8</sup> Dui é dusak myí du haù gi, du hkanmó dùng hkyuq lhum lhum dap é htoq agó, hîngkyuq má myoqjí kôm dap luí, dùng hkaù má lhang dap ri. Yhangmoq, nyí myín hkâ-nhám a no lohoq taí nyi kô é gi,

"A-nham pyat le, ahkuí pyat le, htang pyat má le, rû nyi nyí é, haù wum-o a-tsam dik shoq bò Sù Yhumsîng Garai Gasang gi,

chyoiyúng, chyoiyúng, chyoiyúng nyi ri." gâ akô.

<sup>9</sup> Haù dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shíngkang, aróng eq jeju bun hkyô byî é hkanmó,

<sup>10</sup> haù suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaú lé, haù hkohkâm-tanghkuq hí má hkyut to mù, taí kô é gi,

<sup>11</sup> "Ngamoq é Yhumsîng eq Garai Gasang é, nyi mi-nyí, joq mijoq lé, Nàng hpan to bê nghut luí,

haù pé gi, Nàng ô nau é dông hpan tô é hui bê nghut mù, nyi to joq tô bùm bê nghut é yanmai,

Nàng gi, hpungwup shíngkang, aróng eq hpungwup a-tsam lé, hap yù gíng Sù nghut ri."

gâ akô.

## 5

### *Chyúmding Eq Sauzo*

<sup>1</sup> Hau htâng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le myang ri.

<sup>2</sup> Hau htoq agó, a-tsam mó bo é mau-mang lagyo rayuq gi, "Haû dizik pé lé hí pyám rá eq chyúmding lé hpóng rá gi, ó yuq wá gingdán lhê lhu?" ga luí, htê mó eq wut taí nyi é lé le, ngò myang ri.

<sup>3</sup> Nghut kôhlang, mauhkûng htoq má le, myigùng htoq má le, myigùng ô má le, haû chyúmding lé wó hpóng rá eq ahkaû má wó wú rá byù rayuq lháng a nyi nghut ri.

<sup>4</sup> Haû chyúmding lé hpóng mù, ahkaû má wú rá gingdán é byù rayuq hkâlháng a nyi é yanmai, ngò gyai yhang ngau pyâm é nghut lhê.

<sup>5</sup> Haû hkûn, haû suwún wuî má é rayuq, ngo lé taí é gi, "Hkâ-ngaû! Wú aq, haû Yudaq byuhú má é Hkanghkyi nghu é, haû Dawiq é Amyit nghut Sû gi, ûng bê nghut luí, haû chyúmding eq haû má é dizik nyhit lhum lé wó hpông lhê." gâ ri.

<sup>6</sup> Hau htâng, haû dui é dusak myí du eq suwún wui é agùng má é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haû gi, hkyuî nyhit lhum eq myoqjí nyhit lhum dap ri. Myoqjí haû nyhit lhum gi, myidàm htoq gón má nhang htoq kat é, Garai Gasâng é woi-nyí nyhit woi-nyí nghut ri.

<sup>7</sup> Haû Sauzo gi, lé mù, hkohkâm-tanghkuq má zung to Su é loqyo má é chyúmding lé yu ri.

<sup>8</sup> Haû chyúmding lé yu é hkûn jáng, haû dui é dusak myí du eq suwún í xe myi yuq gi, Sauzô é hí má ngóm gop akô. Yhangmoq yuq hkangmó gi, tíng eq sân-yúng bâng é kyûdung dang gâ é namngón jung byíng mui tô é hîng góm pé le chung bum akô nghut ri.

<sup>9</sup> Yhangmoq gi,  
"Nàng gi, haû chyúmding lé yù rá eq hau é dizik pé lé hpóng rá gingdán Sû nghut ri.

Haí mù gâ le, Nàng gi, sat hui bê nghut luí, byuhú hkangmó mai le, myíng hkangmó mai le,

byù myù hkangmó mai le, mingdán hkangmó mai le, Garai Gasâng é matú,

Náng é suí eq byù pé lé wui hpyit yù bê nghut ri.

<sup>10</sup> Nga-nhûng é Garai Gasang lé dojaú rá matú, Nàng gi, yhangmoq lé, mingdán byu pé eq hkyangjông pé dut nhâng bê nghut luí, yhangmoq gi, myidàm htoq má up kó rá nghut lhê."

ga luí, mahkôn sik ralhum hkon akô nghut ri.

<sup>11</sup> Haû hkûn, ngò wú kat le, haû hkohkâm-tanghkuq lhîngkyuq má le, dui é dusak pé eq suwún wui é lhîngkyuq má le, nyi tô bum é maumang lagyo ajùm ayò mun mun sen sên é htê lé wó gyô ri.

<sup>12</sup> Yhangmoq gi,  
"Haû sat hui bê Sauzo gi, hpungwup a-tsam, sutzè, hpaqchyí byéng-yá, wum-o, aróng sitang, hpungwup shingkang eq hkyá-on kungtôn hkyô lé, hap yù gíng ri."

ga luí, htê mó eq ton bum akô nghut ri.

<sup>13</sup> Hau htoq agó, mauhkûng htoq má nyi é, myigùng htoq má nyi é, myigùng ô má nyi é, wuiming má nyi é, hpan to huí é lhunglháng gi,

"Hkyá-on kungtôn hkyô, aróng sitang, hpungwup shingkang eq hpungwup a-tsam gi,

haû hkohkâm-tanghkuq má zung tô é Sû eq Sauzô chyáng,

pyat dedu ahtum abyuq ru joq nyí sháng gaq ô!"

ga luí, ton nyi bùm kô é lé, ngò wó gyô ri.

<sup>14</sup> Haû dui é dusak myí du gi, "Amen" ga taí jang, haû suwún wuî gi, ngóm gop luí noqkuq akô nghut ri.

## 6

### *Dizik Nyhit Lhûm É Hkyô*

<sup>1</sup> Haû Sauzo gi, dizik nyhit lhum má é sânghî lhum lé hpông kat é hkûn, ngò myang é nghut lhê. Hau htâng, haû dui é

dusak myî du mâ é radu gi, maugum su gâ é htê mó èq, "Lé aq." gâ é lé, ngò wó gyô ri.

<sup>2</sup> Ngò wú kat é hkûn, ngá é myoq hí má myang hpyû radu nyi tô é lé myang ri! Haú má jî to sù gi, lai rahpu chung tô é htoq agó, yhang lé, janmaú ralhum tsûng to byî luî, ûng budang wó râ matú ûng sù rayuq dông htoq ló ri.

<sup>3</sup> Haú Sauzo gi, í lhum nghû râ dizik lé hpông kat é hkûn, haú í du nghû râ dui é dusak gi, "Lé aq." ga taí é lé, ngò wó gyô ri.

<sup>4</sup> Hau htâng, myang nè radu htoq lo ri; haú má jî tô é sù gi, myidàm htoq mâ é nguingón simsaq hkyô lé wup yù râ eq, byù yhangchang rayuq eq rayuq sat lhum nhâng râ a-tsam byî é hui sù nghut luî, yhang lé shâm mó rahkyam le byî to bê nghut ri.

<sup>5</sup> Haú Sauzo gi, sùm lhum nghû râ dizik lé hpông kat é hkûn, haú sùm du nghû râ dui é dusak gi, "Lé aq." ga taí é lé, ngò wó gyô ri. Ngò wú kat le, myang noq radu ngá myoq hí má nyi tô é lé myang ri! Haú má jî tô é sù gi, yhâng é loq má jàng rahpu chung to ri.

<sup>6</sup> Haú hkûn, "Ra-nyí é zuihpau gi, sungsó rabyé, ra-nyí é zuihpau gi, muk-yo guq sum byé nghut lhê; haú tsanlun xû eq tsibiyiq wing lé kúm gi, hkâlhoq hten kó." gâ é htê, haú dui é dusak myî du hkaú mai htoq ló é su gâ é lé, ngò wó gyô ri.

<sup>7</sup> Haú Sauzo gi, myî lhum nghû râ dizik lé hpông kat é hkûn, haú myî du nghû râ dui é dusak gi, "Lé aq." ga taí é lé, ngò wó gyô ri.

<sup>8</sup> Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é myìng gi, Shî hkyô gâ ri; Moming le, yhâng é htâng má châng tô ri; yhangnhik gi, sham èq, mutmó gyó é èq, wúm gyó é èq, tân é yosô-ze èq, myidàm htoq myi tú mâ é ratú má nyi é bang lé sat pyám râ ahkáng wó yu to bekô nghut ri.

<sup>9</sup> Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsîng hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri.

<sup>10</sup> Yhangmoq gi, "Chyoiyúng é eq tengmán é, ahko ahkáng lhunglhâng wó é Yhumsîng ê, myidàm htoq má nyi é byu pé

lé, ngamoq é sui manglat dam a byî é eq tarâ a jéyáng é za, hkâ-myháng jé shoq nyi nyi râ lhú?" ga, htê mó èq garu bum akô.

<sup>11</sup> Haú hkûn, yhangmoq yuq hkangmó gi, bu hpyû hîng radung dung hut é hui luî, yhangmoq su sat hui râ bang, yhangmoq é byinzùm dui-nhâng zoshâng wuì nghut é gumang wuì sat huì ngap é hkûn jé shoq, razup zim za nyi shi keq ga taí é lé wó gyô akô nghut ri.

<sup>12</sup> Hkyuq lhum nghû râ dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú bui gi, saumaú noq èq woq é pán su noq byuq ri; haú lhamó lhum gón gi, sui su ne byuq ri;

<sup>13</sup> maihpáng gâm lé, laì mó èq lo mut nhûn kat é hkûn, a myhíng shî é maihpáng-shi yoq gyó é su, mauhkûng mâ é kyí pé gi, myidàm htoq má byit gyó lo bum ri.

<sup>14</sup> Haú mauhkûng gi, laiká lé dîng lhûm é su htot pyâm é hui luî, bùm hkang bùm mó eq zinlóng lhumjup pé gi, yhâng é jowò mai huì pyâm é huì ri.

<sup>15</sup> Haú hkûn, haú myidàm htoq mâ é hkohkam pé, uphkâng bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé mâ é luqgok gyoro pé má haq tô bùm uchyang,

<sup>16</sup> haú bùm pé eq luqgok pé lé, "Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq.

<sup>17</sup> Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lhú?" ga garu taí bum akô nghut ri.

## 7

### *144,000 Yuq Masat Lhô Tap Hui Kô É Hkyô*

<sup>1</sup> Hau htâng má, maumang lagyo myi yuq gi, maumyî myi chyûn má yap to mù, myigùng htoq má le, wuì ming htoq má le, sikgâm pé má le, laì a hik sháng gaq ga, myi shut mâ é laì lé zuí zing to kô é lé, ngò myang ri.

<sup>2</sup> Haú hkûn, haú dui nyi é Garai Gasâng é masat lhô chung é maumang lagyo gotû

rayuq gi, buihotoq hkyam mai htoq lé lo é lé, ngò dum myang ri. Yhang gi, haû myigùng eq wui ming lé lhoq hten rá ahkáng wó tô é maumang lagyo myi yuq haû lé,

<sup>3</sup> "Nga-nhûng é Garai Gasâng dui-nhâng zoshâng wui é ngelang má, ngamoq mai masat lhô a tap byi byi gi, haû myigùng, wui ming eq sikhâm pé lé hkâlhôq hten shi kó." ga htê mó eq wut taî kat ri.

<sup>4</sup> Haû hkûn, masat lhô tap huî é bang byù hkâ-myhó yuq nghut é lé, ngò wó gyô ri. Israelaq byuhú banshoq mâ é 144,000 yuq nghut ri.

<sup>5</sup> Masat lhô tap huî yu é, Yudaq up mâ é bang gi, 12,000 yuq, Rubin up mâ é bang gi, 12,000 yuq, Gat up mâ é bang gi, 12,000 yuq,

<sup>6</sup> Ashe up mâ é bang gi, 12,000 yuq, Nahtali up mâ é bang gi, 12,000 yuq, Manase up mâ é bang gi, 12,000 yuq,

<sup>7</sup> Simeon up mâ é bang gi, 12,000 yuq, Lewiq up mâ é bang gi, 12,000 yuq,

Yishahka up mâ é bang gi, 12,000 yuq,

<sup>8</sup> Zebulun up mâ é bang gi, 12,000 yuq, Yosep up mâ é bang gi, 12,000 yuq, Ben-yamyin up mâ é bang gi, 12,000 yuq, nghut bum akô.

### *Bu Hpyû Hing Wut Bâng É Hkyô*

<sup>9</sup> Hau htâng, ngò wú kat é hkûn, mingdán hkanngó mai le, byuhú hkanngó mai le, byù myû hkanngó mai le, myíng chângjup mai le, lé é bang, ó yuq lháng a ung nghap é byù moq mó gi, haû hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hing wut luî, yhangmoq é loq má byùm-haq chung tô bùm kômù,

<sup>10</sup> "Hkyi yù hkyô gi, haû hkohkâm-tanghkuq má zung tô é nga-nhûng é Garai Gasang eq Sauzo chyáng mâ é nghut ri ô!"

ga luî, htê mó eq garû bum akô nghut ri.

<sup>11</sup> Haû maumang lagyo lhunglhâng bang gi, haû hkohkâm-tanghkuq é lhinghkyuq má le, suwún wui eq dui é dusak myí du é lhinghkyuq má le, yap tô akô nghut ri. Yhangmoq gi, hkohkâm-tanghkuq hí má

myoqdong ngóm gop mù, Garai Gasang lé noqkuq uchyang,

<sup>12</sup> "Amen! Hkya-on kungton hkyô eq hpungwup shingkang, hpaqchyî byéng-yá eq jeju bun hkyô, aróng, hpungwup a-tsam eq wum-o gi, nga-nhûng é Garai Gasâng chyáng pyat dedu ahtum abyuq ru joq nyí sháng gaq ô!"

Amen!" ga taî bum akô.

<sup>13</sup> Haû hkûn, suwún wui mâ é rayuq gi, "Shí bu hpyû hing wut é bang gi, ô pé lhú? Yhangmoq gi, hkâmai lé é bang nghut akô lhú?" ga ngo lé myí ri.

<sup>14</sup> Ngò gi, "Suwún hpó ê, nàng sê lhê." nghû tû taî jáng, yhang gi, "Shí bang gi, haû wuîhke jamjau mó mai wó lut htoq lô luî, yhangmoq é bu hing lé, haû Sauzô é sui má chí hpyû yù bê bang nghut akô.

<sup>15</sup> Haû mù, yhangmoq gi, Garai Gasâng é hkohkâm-tanghkuq hí má nyi mù, Yhâng é noqkuq yhûm má, nyí, myín Yhang lé dojaú nyí kô é nghut lhê; haû hkohkâm-tanghkuq má zùng Sû gi, Yhâng é jonghpang lé, yhangmoq é ahtoq má nghop byi rá\* nghut lhê.

<sup>16</sup> Yhangmoq gi, hkâ-nhám le, zòmut wuîshit hui rá a nghut lo; bui lhap é le, hkyíng hkyíng nyé é le, yhangmoq lé wó záng rá a nghut.

<sup>17</sup> Hkâsu mù gâ le, haû hkohkâm-tanghkuq agùng mâ é Sauzo gi, yhangmoq é sau-rém sú dut rá nghut luî, Yhang gi, yhangmoq lé, asak wuîbúm jé shoq shuí é rá nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi rá nghut lhê." ga taî ri.

## 8

### *Nyhit Lhum Nghû Râ Dizik Eq Namngón Jung Nyhê É Hing Góm*

<sup>1</sup> Haû Sauzo gi, nyhit lhum nghû rá dizik lé hpông kat é hkûn, mauhkûng htoq má hkyíng hkum rawuí kô zím byuq ri.

<sup>2</sup> Haû hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byi tô ri.

\* 7:15 Yhâng é jonghpang lé, yhangmoq é ahtoq má nghop byi rá, gâ é gi, yhangmoq eq rahá nyi mù, yhangmoq lé upzúng nyí rá gâ é nghut lhê.

<sup>3</sup> Namngón jung nyhê é hîng góm chung é maumang lagyo gotû rayuq gi, haú hkungga gyap yâm má lé yap tô ri. Haú hkohkâm-tanghkuq hí mâ é hîng hkungga gyap má, sân-yúng bang banshoq é kyûdung dang eq rahá nhông byi râ matú, namngón jung gyai myo shoq, yhang lé byi tô ri.

<sup>4</sup> Haú namngón jûng é myihkau gi, sân-yúng bâng é kyûdung danghtê eq rahá, maumang lagyo haú yuq é loq mai Garai Gasâng chyáng hkyang rot ló bê nghut ri.

<sup>5</sup> Hau htâng, maumang lagyo haú yuq gi, góm lé yù mù, hkungga gyap mâ é myi lhoq pyîng yù luí, myidàm htoq má dú hkyô kat é hkûn, maugum mó gûm é, mying hûm é, lhap hpyat é eq layàng nún é pé dut htoq lo ri.

### *Tut Mut É Hkyô*

<sup>6</sup> Hau htâng, tut nyhit lhum wó é maumang lagyo nyhit yuq gi, tut mut râ hen akô nghut ri.

<sup>7</sup> Sâng-hî yuq nghû râ maumang lagyo gi, yhâng é tut lé mut kat ri; haú hkûn, sui nyó é likwò eq myi htoq lô mù, haú lé myidàm htoq má lhoq hkyô kat jáng, maumyî sum tú mâ é ratú eq sigâm sum tú mâ é ratú nyé gyó byuq é htoq agó, wâhu mhanzo banshoq le nyé gyó byuq bê nghut ri.

<sup>8</sup> Í yuq nghû râ maumang lagyo gi, yhâng é tut lé mut kat ri; haú hkûn, myi dap tô é bùm mó su é lé, wuîshuq lung-aú má dú hkyô kat ri. Wuîshuq lung-aú sum tú mâ é ratú gi, sui dut byuq bê nghut ri;

<sup>9</sup> wuîshuq lung-aú mâ é dui jung sum tú mâ é ratú gi, shî byuq luí, wuî-sanghpo pé sum tú mâ é ratú gi, htên byuq bê nghut ri.

<sup>10</sup> Sum yuq nghû râ maumang lagyo gi, yhâng é tut lé mut kat ri; haú hkûn, myihu dùm su duq é kyî mó racham gi, mauhkûng mai byit gyó lô mù, wuìlàng sum tú mâ é ratú eq wuìbúm pé htoq má lo gyó záng ri.

<sup>11</sup> Kyî hau é mying gi, Kyî Kyî Hko gâ é nghut ri. Wuìlàng sum tú mâ é ratú hkô byuq luí, wuì haú hkô byuq é yanmai byu myo myo shi byuq bekô nghut ri.

<sup>12</sup> Myi yuq nghû râ maumang lagyo gi, yhâng é tut lé mut kat ri; haú hkûn, bui sum tú ratú, lhamó sum tú ratú, kyî sum tú ratú gi, hten luí, haú pê é sum tú ratú gi, mauchut byuq bê nghut ri. Hau htoq agó,

nyí sum tú mâ é ratú le, myín sum tú mâ é ratú le, maubó a joq dut byuq ri.

<sup>13</sup> Ngò wú nyi le, zunbung radu gi, maulat má dâng wún mù, "Gotû maumang lagyo sum yuq eq mut râ nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga luí, htê mó eq garû taí ri.

## 9

<sup>1</sup> Ngo yuq nghû râ maumang lagyo gi, yhâng é tut mut kat é hkûn, mauhkûng mai myidàm htoq má byit gyó tô é kyî racham lé, ngò myang ri. Haú nik dik htûm é Lasang-dông é zoqshi gi, kyî haú lé byi tô ri.

<sup>2</sup> Kyî haú gi, nik dik htûm é Lasang-dong lé hpông kat é hkûn, myi bungghkyûng mó mai htoq lo é myihkau dùm sù é myihkau gi, dong haú mai htoq lo ri. Nik dik htûm é Lasang-dong haú mâ é myihkau dum é yanmai, bui eq maulat gi, mauchut byuq bê nghut ri.

<sup>3</sup> Myihkau dùm haú mai dinggám pé htoq lô mù, myidàm htoq má gyó lé akô; myidàm htoq mâ é gogok é a-tsam sù é a-tsam le, yhangmoq lé byi to bê nghut ri.

<sup>4</sup> Myidàm htoq mâ é wâhu pé lé le, mhan-haq hpoqnoq pé lé le, sigâm pé lé le a lhoq htên é za, yhumsing é ngelang má Garai Gasâng é masat lhô a dap é byu pé lé baú zing-ri râ matú, yhangmoq lé taí tô ri.

<sup>5</sup> Nghut kôlhang, haú bang lé sat pyám râ ahkáng kúm gi, yhangmoq a wó e za, lhamó ngo hkyap tup haú bang lé zing-ri râ ahkáng za ru wó akô nghut ri. Haú bang hui zô é shî-nò jamjau gi, gogok eq pat hkûn no hpû é su yhang nghut ri.

<sup>6</sup> Haú buinyi pé má, byu pé gi, shî hkyô hô kôlhang, myàng kó râ a nghut; shî nau dik kôlhang, haú shî hkyô gi, yhangmoq chyáng mai hpang byuq râ nghut lhê.

<sup>7</sup> Dinggám haú pé gi, majan zan râ matú bui tô é myang pé su dut akô. Yhangmoq é ulhum má gi, hîng janmaú sù é tsûng tô é htoq agó, yhangmoq é myoqdong gi, byu myoqdong su dut bum akô nghut ri.

<sup>8</sup> Yhangmoq é xâm gi, myiwe wui é xâm su dut luí, yhangmoq é zuì gi, hkanghkyi zuì su dut ri.



<sup>9</sup> Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang ló é myang jùm eq myanglhêng pé mying hùm é htê su gâ ri.

<sup>10</sup> Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri râ a-tsam bo ri.

<sup>11</sup> Yhangmoq é hkohkâm gi, nik dik htùm é Lasang-dong mâ é maumang nghut ri; haû é mying gi, Hebre mying dong Abadon ga, Grik mying dong Apolion\* gâ ri.

<sup>12</sup> Sâng-hî lhum dingnyé gi, lai ló byuq bê nghut ri; nghut kôlhang, dingnyé í lhum jé lô shirâ nghut lhê.

<sup>13</sup> Haû hkyuq yuq nghû râ maumang lagyo gi, yhâng é tut mut kat ri. Haû hkûn, Garai Gasâng é hí má joq é hîng hkungga gyap é hkyuî myî lhum mai htê htoq lo é gi,

<sup>14</sup> "Uhprat wuî mó lâng má tuî lhûng tô é maumang myi yuq lé, nhang pyám aq." ga tut chung tô é hkyuq yuq nghû râ maumang lagyo lé taí é lé, ngò wó gyô ri.

<sup>15</sup> Haû hkûn, xângzo byù sum tú mâ é ratú lé sat pyám râ matú, ahkying, buinyî, lhôhkyap, zanwut lé, rì rì hen to bê nghut é haû maumang myi yuq lé nhang kat bê nghut ri.

<sup>16</sup> Myang ji jî é gyè jum gi, byù du sen í hkying bo é hkyô lé, ngò wó gyô ri.

<sup>17</sup> Ngò, shing-rán myang é má, myang jùm eq haû pé má ji bâng é wànggò-long pé gi, myi su ne é, shing shing nyuî é eq hang su hui é nghut ri. Myáng jum é ulhum gi, hkanghkyí pé é ulhum su dut luî, yhangmoq é nhut mai, myi, myihkau eq hang pé htoq lo ri.

<sup>18</sup> Haû yhangmoq é nhut mai htoq lo é myi, myihkau eq hang gâ é wúm ihkyup sùm jûng é yanmai, xângzo byù sum tú ratú gi, sat hui bekô nghut ri.

<sup>19</sup> Myang haû jum é sho-myi gi, lhangmui su dut luî, ulhum dap mù, hte sê é yanmai, yhangmoq é a-tsam gi, nhut eq sho-myi pé má nghut ri.

<sup>20</sup> Wúm ihkyup haû sùm jung mai wó lut luî, myit gyó tô é xângzo byu pé gi, yhang-

moq é loq pê èq zui saí é muzó mai, myit a lhîng shi kô é htoq agó, nat gâng pé lé le, a wó myâng, a wó gyo, a wó sô é, hîng, ngùn, gyi, luqgok, sik pê é alhô lé le, noqkuq é hkyô lé a tô pyám shi kó nghut ri.

<sup>21</sup> Hau htoq agó, yhangmoq gi, byù sat é mù mai le, myoqheq hpaqchyî mù mai le, ashop é dông gungsho zùm yap é hkyô mai le, hkaû é mai le, myit a lhîng shi kó nghut ri.

## 10

### *Maumang Eq Laiká Ding É Hkyô*

<sup>1</sup> Hau htâng, ngò gi, wum-o bo é maumang lagyo gotû rayuq, mauhkûng mai gyó lé lo é lé myang é nghut lhê. Yhang lé gi, mhut èq htup yup to luî, yhâng é u htoq má woqgan síng-yang gyân tô ri; yhâng é myoqdong gi, bui su dut luî, yhâng é hkyí gi, myi zing su dut ri.

<sup>2</sup> Yhâng é loq má gi, hpông tô é laiká ding zo ralhum chung tô ri; yhâng é loqyo hkyí gi, wuîshuq lung-aû má nang, yhâng é loqpaî hkyí gi, myigùng htoq má nâng to luî,

<sup>3</sup> hkanghkyi mying é htê su ga, htê mó èq garû kat ri. Yhang garu kat jáng, maugum htê nyhit lhum tú gûm kat ri.

<sup>4</sup> Haû maugum htê nyhit lhum tú gûm kat é hkûn, ngò ká râ da jáng, "Haû maugum htê nyhit lhum tú gûm é hkyô lé zaú pyám aq; haû pé lé hkâkâ to." ga, mauhkûng mai danghtê htoq lo é lé ngò wó gyô kat ri.

<sup>5</sup> Haû hkûn, wuîshuq lung-aû eq myigùng htoq má nâng yap tô é lé, ngò myang é maumang lagyo haû gi, yhâng é loqyo loq lé mauhkûng shut tu toq kat ri.

<sup>6</sup> Haû mù, yhang gi, mauhkûng eq haû má nyi é lhungháng lé le, myidàm htoq eq haû má nyi é lhungháng lé le, wuîshuq lung-aû eq haû má nyi é lhungháng lé le, hpan tô é, pyat dedu ahtum abyuq dui nyi Su é mying lé lang luî, dakam é gi, "Ahkying ratsuí le, lhoq myáng nyi lo râ a nghut!"

<sup>7</sup> Nghut kôlhang, Garai Gasang mai Yhâng é dui-nhâng zoshâng wuî nghut é myiqhtoí pé lé taí to bê é danglù eq rajung za, Yhâng é zaú tô é hkyô gi, nyhit yuq nghû râ maumang lagyo èq yhâng é tut lé mut myhîng é buinyi pé má, shit râ nghut lhê." gâ ri.

\* **9:11** Apolion gâ é lichyúm gi, lhoq hten lhoq hpyoq sù gâ é nghut ri.

<sup>8</sup> Hau htoq agó, ngò wó gyô wú bê mauhkûng mâ é htê, ngo lé dum taí é gi, "Haú wuîshuq lung-aú eq myidàm htoq má nâng yap tô é maumang lagyô loq má hpông tô é laiká ding lé, ê yù aq." gâ ri.

<sup>9</sup> Haú mù, ngò gi, ê luí, laiká ding zo haú, ngo lé byi râ matú maumang lagyo haú lé ê dung le, yhang gi, "Shî lé yù mù, zo kat aq. Náng é wam má hko râ nghut lhê; nghut kôle, náng é nhut má gi, byo-î su yhang chui râ nghut lhê." gâ ri.

<sup>10</sup> Haú mù, ngò gi, laiká ding zo haú lé, maumang lagyô é loq mai yù mù, zô é nghut lhê; haú hkûn, ngá é nhut má gi, byo-î su yhang chui nghâm ri; nghut kôle, bàn zô kat é hkûn, ngá é wam hkaú má hkô bê nghut ri.

<sup>11</sup> Haú hkûn, "Nàng gi, byù myû myo myo eq séng luí le, mingdán myo myo eq séng luí le, myíng ahú hú eq séng luí le, hkohkam pé myo myo eq séng luí le, myiqhtoi dum htoi ra râ nghut lhê." ga, ngo lé taí kyô ri.

## 11

### *Saksé Í Yuq É Hkyô*

<sup>1</sup> Ké râ jung dumbáng su dut é jàm-yang rahkat ngo lé byi luí, ngo lé taí é gi, "È mù, haú Garai Gasâng é noqkuq yhúm lé le, hkungga gyap lé le, kê wú luí, haú má noqkuq é bang lé nghap wú aq.

<sup>2</sup> Nghut kôlhang, shinggan mâ é wâng lé gi, a kê é za lhaí pyâm to aq; hkâsu mù gâ le, haú gi, tûngbaù pé lé byí to bê nghut lhê. Yhangmoq gi, haú chyoyúng myuq lé, lhamó myixe í hkyap tup chôm nang kó râ nghut lhê.

<sup>3</sup> Hau htoq agó, ngò gi, ngá é saksé í yuq lé a-tsam byi râ nghut luí, yhangnhik gi, ji mebu wut\* mù, buinyì 1260 nyí tup myiqhtoi htoi kó râ nghut lhê." gâ ri.

<sup>4</sup> Yhangnhik gi, haú myidàm Yhumsing é hí má yuq tô é tsanlun gâm í gâm eq myibung tsungjang í lhum nghut ri.

<sup>5</sup> Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gyè pé lé nyhê hkyô pyám râ nghut lhê. Yhangnhik lé kâm

zing-ri é sù gi, haú su kut sat pyâm é hui zo râ nghut lhê.

<sup>6</sup> Yhangnhik gi, yhangnhik myiqhtoi htoi nyi é buinyì pé má mau a wò râ matú, mauhkûng lé myhî pyám râ a-tsam wó akô; hau htoq agó, wuì pé lé sui dut nhâng râ eq, nau é hkûn, wúm ajung jûng èq myidàm htoq lé ihkyup hkyó byi râ a-tsam le, wó akô nghut ri.

<sup>7</sup> Yhangnhik gi, saksé ban hkâm é hkûn, haú nik dik htûm é Lasang-dong mai htoq lo é tân jung dusak gi, yhangnhik lé htim mù, úng luí, sat pyám râ nghut lhê.

<sup>8</sup> Yhangnhik é mâng lé gi, danglêng dong Sodom eq Egutuq gâ é, yhangnhik é Yhumsing lé le, tapzîng má jén sat pyâm é myuq mó é hkyô gùng má, leq to râ nghut lhê.

<sup>9</sup> Haú hkûn, byù myû hkanmó mâ é bang, byuhú hkanmó mâ é bang, myíng hkanmó mâ é bang, mingdán hkanmó mâ é bang gi, yhangnhik é mâng lé myhup pyám râ matú a gyo kô é za, sum nyí èq rahkyuí tup chôm wú nyí kó râ nghut lhê.

<sup>10</sup> Myidàm htoq má nyi é bang gi, yhangnhik shi byuq é yanmai gabú ngu-ingón luí, rayuq eq rayuq chyunghuq byí lhum é đông ngón poí kut kó râ nghut lhê. Hkâsu mù gâ le, myiqhtoi haú nhik gi, myidàm htoq má nyi nyi é bang lé, wuîhke jamjau byí lai bê su nhik nghut akô.

<sup>11</sup> Nghut kôlhang, sum nyí èq rahkyuí tup laí é htâng má, Garai Gasâng chyáng mâ é asak soq gi, yhangnhik chyáng wàng mù, yhangnhik gi, toq yap tô kô é nghut luí, yhangnhik lé myang é bang gi, gyai yhang gyuq nán bûm bekô nghut ri.

<sup>12</sup> Haú hkûn, "Shî má doq lò keq." ga, mauhkûng mai yhangnhik lé wut é htê mó lé wó gyo kômù, yhangnhik é gye pé wú tô é u lé, mhut ji mù mauhkûng shut doq lô bekô nghut ri.

<sup>13</sup> Haú u lé yhang, layàng mó nún lô luí, myuq hkaú raxê tú mâ é ratú gi, htên gyop byuq bê nghut ri. Hau htoq agó, byù nyhit hkyíng yuq shi byuq bê nghut luí, myit gyó tô é bang gi, gyai yhang gyuq nán bûm kômù, mauhkûng mâ é Garai Gasang lé hkya-on shigyaú bum akô nghut ri.

\* 11:3 Ji mebu wut gâ é gi, iyon yôn é lé gâ lhê.

14 Í lhum nghû râ dingnyé gi, lai byuq bê nghut ri; sùm lhum nghû râ dingnyé gi, jé râ za nghut bê.

### *Nyhit Lhum Nghû Râ Tut Mut É Hkyô*

15 Nyhit yuq nghû râ maumang lagyo gi, yhang é tut mut kat ri; haú hkûn, mauhkûng htoq má htê mó pé htoq lo é gi, "Mingkan htoq mâ é mingdán gi, nga-nhûng é Yhumsîng eq Yhang é Hkrisduq é mingdán dut bê nghut luí, Yhang gi, pyat dedu ahtum abyuq up nyi râ nghut lhê."

gâ ri.

16 Haú hkûn, yhumsing é hkohkâm-tanghkuq má zùng mù, Garai Gasâng é hí má nyi tô é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang tái kô é gi,

17 "Ahkuí pyat, a-nham pyat rû dui nyi é, wum-o a-tsam dik shoq bò Sû Yhumsîng Garai Gasang ê!

Nàng gi, hpungwup a-tsam mó chûng mù, up nyi bê nghut é yanmai, ngamoq, Nang lé jeju hkya-on lhê.

18 Byù myû pé gi, nhikjum yo bùm kôluí, Náng é nhikmo-yo hkyô gi, jé bê nghut ri.

Shí bê bang lé, tarâ jéyáng râ eq, Náng é dui-nhâng zoshâng myiqhtoí pé lé le,

Náng é sân-yúng bang lé le, Náng é myìng lé gyuq hkunggâ é tiq ko lé le,

shigyaú chyunghuq byi râ eq, myidàm htoq lé lhoq hten bang lé lhoq hten râ, ahkyíng gi, jé bê nghut ri."

gâ akô.

19 Haú hkûn, mauhkûng htoq má, Garai Gasâng é noqkuq yhûm hpông to luí, Yhang é noqkuq yhúmhkaú má, Yhang é dang-shikaq eq sêng é saksé sidek lé byu-myang ri. Haú hkûn jáng, lhap hpyat é, myìng hûm é, maugum gûm é, layàng nún é, likwò mó gyó é pé dut htoq lo ri.

## 12

### *Myiwe Myhí Eq Manjung É Hkyô*

1 Hau htoq agó, mauhkûng má limik kumlhá mó htoq shit é gi: myiwe myhí rayuq gi, bui lé wut chûng mù, lhamó má

\* 12:3 Manjung nè mó gâ é gi, Tsadán lé tái nau é nghut lhê.

hkyi ke luí, kyi raxe í cham dap é janmaú lé, yhang é ulhum má tsûng tô ri.

2 Yhang gi, zogûng dut tô é nghut luí, zo hkû râ matú, zohkû-nò no nyi é yanmai, gyai yhang ngau garû nyi ri.

3 Hau htâng, mauhkûng má gotû kumlhá dum htoq shit é gi: gyai kô é manjung nè mó\* radu gi, ulhum nyhit lhum eq hkyuí raxê lhum dap luí, yhang é ulhum hkgangmó má janmaú tsûng tô ri.

4 Yhang é sho-myi gi, mauhkûng má é kyi sum tú má é ratú lé shûm tsîng yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má láng yap tô ri.

5 Myiwe myhí haú gi, mingdán banshoq lé shamtoq dumbáng eq up râ nghut é yuqzo rayuq lé hkû bê nghut ri; yhang é zoshâng lé gi, Garai Gasâng é hí má le, Yhang é hkohkâm-tanghkuq hí má le bún toq yù bê nghut ri.

6 Myiwe myhí haú gi, yhang é matú Garai Gasang lajâng to byi é yoso hkaú má hpang wang é bê nghut ri; haú jowò má, yhang gi, 1260 nyi tup lhom baú é hui râ nghut lhê.

7 Mauhkûng htoq má majan htoq bê nghut ri. Mihkaelaq eq yhang é maumang lagyo pé gi, manjung lé majan é zan kôluí, haú manjung eq yhang é maumâng pé le, tau zân akô.

8 Nghut kôlhang, yhangmoq gi, a ûng kômù, mauhkûng má é yhangmoq nyi jowò lhoq hpyuq pyám bekô nghut ri.

9 Haú mingkan gón lé hkyô shuí nghoq é, natzau eq Tsadán ga é, a-nham lhê é lhang-mui nghut é manjung mó haú gi, yhang é maumang pé eq rahá myidàm htoq má dú hkyô pyâm é hui bê nghut ri.

10 Haú hkûn, mauhkûng htoq má htê mó đông tái é lé, ngò wó gyô é gi,

"Ahkuí gi, nga-nhûng é Garai Gasâng é hkyi yù hkyô, hpungwup a-tsam eq mingdán le,

Yhang é Hkrisduq é ahko ahkáng le, jé bê nghut ri.

Hkâsu mù gâ le, nga-nhûng é Garai Gasâng é hí má, nga-nhûng é gumang wui lé,

nyí, myín mara hun nyi é sù gi, dú hkyô pyâm é hui bê nghut ri.

11 Yhangmoq gi, haû Sauzô é suí é yan-mai le, yhangmoq saksé hkâm é mungdâng é yanmai le, yhang lé ung pyâm bekô nghut luí, shi byuq é jé shoq yhumsing asak lé a ha kô nghut ri.

12 Haû mù luí, mauhkûng eq haû má nyi é bang ê, gabú nyí keq!

Nghut kôlhang, myidàm htoq eq wuìshuq lung-aû gi, dingnyé wó ri;

hkâsu mù gâ le, haû natzau gi, yhâng é ahkyíng yàm-yoq tot za ru joq alô nghut é lé sê é yanmai,

nhikmo-yô é eq, nungnhik chyáng gyó lé lô bê nghut ri."

gâ ri.

13 Haû manjung gi, myidàm htoq má dú hkyô kat huí é lé myàng luí, haû yuqzo hku é myiwe myhí lé zing-rí ri.

14 Myiwe myhí haû gi, lhangmuí chyáng mai wó lut luí, yhang é matú lajâng tô é yoso má wó dang jé mù, ahkyíng ralhum, ahkyíng í lhum, ahkyíng rawuí hkup<sup>†</sup> lhom baú nyi é hui sháng gaq ga, zùn mó é dùng í lhum byí é huí ri.

15 Haû hkûn, haû lhangmuí gi, myiwe myhí haû lé wó lhoq myhú pyâm shoq ga, myiwe myhí é nunghtáng má, yhâng é nhut mai wuì mó lêng í é wuì lhoq htoq kat ri.

16 Nghut kôlhang, manjung nhut mai lhoq htoq kat é wuì mó lêng haû lé, myigùng gi, yhâng é nhut há mù myui pyâm byí é dông, myiwe myhí haû lé garúm yu ri.

17 Haû mù, manjung haû gi, myiwe myhí hau é yanmai, gyai yhang nhikmo-yo luí, Garai Gasâng é jep é tarâ lé châng é bang eq Yesuq é saksé lé myhik zing nyi é bang nghut é, myit gyó tô é, myiwe myhí é awut ashín pé lé, majan zan râ matú htoq e ri.

18 Manjung haû gi, wuìshuq lung-aû yàm má yap tô ri.

## 13

### *Tân Jung Dusak Radu Wuìshuq Lung-aû Mai Htoq Lo É Hkyô*

<sup>†</sup> 12:14 Ahkyíng ralhum, ahkyíng í lhum, ahkyíng rawuí hkup gâ é gi, "razàn, í zân, lhamó hkyuq hkyap" lé gâ é nghut lhê; haû gi, 1260 nyí nghut ri.

1 Haû hkûn, haû wuìshuq lung-aû mai tân jung dusak radu htoq lo é lé, ngò myàng ri. Dusak haû má, hkyuí raxê lhum eq ulhum nyhit lhum dap to luí, yhâng é hkyuí pé má gi, janmaú raxê lhum tsúng to mù, ulhum hkangmó má gi, Garaí aróng lhoq hpoi é myìng dap tô bum ri.

2 Ngò myang é tân jung dusak haû gi, bauze-lo su dut ri; nghut kôlhang, hkyí gi, wàm hkyí su dut luí, nhut gi, hkanghkyí nhut su dut ri. Haû manjung gi, yhâng é a-tsam eq yhâng é hkohkâm-tanghkuq lé le, ahko ahkáng mó lé le, tân jung dusak haû lé ap byí ri.

3 Tân jung dusak hau é ulhum ralhum gi, shí râ í é dàm dap huí é su dut kôlhang, damhkô haû gi, yâ ge pyâm bê nghut luí, mingkan gón gi, mauhong byuq kômù, yhâng htàng châng bùm bekô nghut ri.

4 Manjung gi, tân jung dusak lé ahko ahkáng ap byí é yanmai, byu pé gi, manjung haû lé noqkuq é htoq agó, tân jung dusak haû lé le, noqkuq kômù, "Ó yuq wá, tân jung dusak shí du su dut ri lú? Ó yuq wá, yhang lé wó zan ûng râ lú?" ga bum akô.

5 Gyáng dang taí râ eq Garaí aróng lhoq hpoi dang taí râ nhut gi, tân jung dusak haû lé byi to bê nghut é htoq agó, lhamó myí xe í hkyap tup, yhâng é ahko ahkáng lé chûng râ ahkáng wó bê nghut ri.

6 Yhang gi, yhâng nhut hpóng mù, Garai Gasâng aróng lé lhoq hpoi dang taí é htoq agó, Garai Gasâng é myìng eq nyi jowò lé le, mauhkûng htoq má nyi é bang lé le, lumù gansang é sù nghut ri.

7 Haû sân-yúng bang lé majan zân ung yù râ a-tsam, yhang lé byi bê nghut ri. Hau htoq agó, byuhú hkangmó lé le, byù myû hkangmó lé le, myíng hkangmó lé le, mingdán hkangmó lé le, up râ ahkáng, yhang lé byi bê nghut ri.

8 Haû sat hui bê Sauzo eq sêng é asak jihpán laiká buk má, mau htoq xâng hkun mai, myìng a kê lhôm é, myidàm htoq má nyi é lhunglhang bang gi, haû tân jung dusak lé noqkuq kó râ nghut lhê.

9 Gyo râ nohkyap dap sù gi, gyô yù sháng

gaq.

<sup>10</sup> Shúm zung é hui râ sù gi, shúm zung é hui râ za nghut lhê.

Sham èq sat é hui râ sù gi, sham èq sat é hui râ za nghut lhê.\*

Haû mù, sân-yúng bang gi, hkam jân é hkyô eq lhumzui hkyô bò kó râ nghut lhê.

### *Tân Jung Dusak Radu Myigùng Mai Htoq Lo É Hkyô*

<sup>11</sup> Hau htâng, ngò gi, tân jung dusak gotû radu† myigùng mai htoq lo é lé myang ri. Yhang gi, sauzô é hkyuî su dut é hkyuî í lhum yuq ri; nghut kôhang, yhang gi, manjung su ga dang nyo ri.

<sup>12</sup> Yhang gi, tân jung dusak hí lhê dû é ahko ahkáng lhunglhang lé, haú du é hí má chûng mù, shî râ í é damhkô ge byuq é tân jung dusak haû lé, haû mingkan eq mingkan htoq má nyi é bang lé noqkuq nhang ri.

<sup>13</sup> Hau htoq agó, yhang gi, byu pé é myoq hí má, mauhkûng mai myigùng shut myi lé lhang wó lhoq hkyô é, limik kumlhá mó kut shit ri.

<sup>14</sup> Yhang gi, tân jung dusak hí lhê dû é hí má, kumlhá haú pé kut râ ahkáng wó é yanmai, myidàm htoq má nyi é bang lé mhoq hpyoq yû luí, haû shâm damhkô dap kôhang, dui nyi é tân jung dusak haû lé, hkunggá é dông, yhangmoq lé, yhang é alhô saí nhang ri.

<sup>15</sup> Yhang gi, haû tân jung dusak hí lhê dû é alhô lé, soq wó mut kat byí é a-tsam lé wó yû sù nghut ri; haû mù, alhô haû gi, dang wó taí luí, yhang lé a noqkuq é bang lé, sat hui nhang ri.

<sup>16</sup> Hau htoq agó, yhang gi, byù mó byù zo, wó sù myùng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lô zik tap yû nhang ri.

<sup>17</sup> Haú hkûn, haû tân jung dusak é mying, a nghut jáng, yhang mying é masat námbat dap sù mai lai luí, ùng é, wui é hkyô, ó yuq le wó kut râ a nghut.

<sup>18</sup> Hpaqchyí byéng-yá gi, shî má bo râ ri. Hpaqchyí bò sù gi, haû tân jung dusak é

námbat lé sôn wú sháng gaq; hkâsu mù gâ le, haû gi, byù rayuq é námbat nghut lhê. Yhang é námbat gi, 666 nghut ri.

## 14

### *Sauzo Eq 144,000 Yuq É Hkyô*

<sup>1</sup> Hau htâng, ngò wú kat le, haû Sauzo gi, Zi-un bùm má yap tô é lé myang ri; Yhang mying eq Yhang Wâ é mying lé, yhumsing é ngelang má kê tap tô é byù 144,000 yuq le, Yhang eq rahá yap tô bùm ri.

<sup>2</sup> Haú hkûn, ngò gi, wui pé mying hûm é htê eq maugum mó gûm é htê su gâ é htê, mauhkûng mai htoq lo é lé wó gyô ri. Ngò wó gyô é htê haû gi, tíng bat bang, yhangmoq é tíng lé bat myhíng é htê su gâ ri.

<sup>3</sup> Yhangmoq gi, haû hkohkâm-tanghkuq é hí má le, dui é dusak myî du eq suwún wui pé hí má le, mahkôn sik lé hkon akô nghut ri. Haû myidàm htoq mai hkyi yû huí é byù 144,000 yuq mai lai luí, ó yuq le, mahkôn haû lé a wó mhoq sê yû kó nghut ri.

<sup>4</sup> Haú bang gi, myiwe wui eq gungsho a zum é bang nghut luí, yhangmoq gi, zorâm jet pé nghut bum akô. Yhangmoq gi, haû Sauzo hká shut é le hká shut châng é bang nghut akô. Yhangmoq gi, byu pé chyáng mai wui yu é hui luí, sân-hi myhíng é ashí lé su, haû Garai Gasang eq Sauzo lé ap byí é hui akô nghut ri.

<sup>5</sup> Yhangmoq é nhut má, mhaû é hkyô haí le a taí kó; yhangmoq chyáng mara hûn râ hkyô le a bò kó nghut ri.

### *Maumang Sum Yuq É Hkyô*

<sup>6</sup> Hau htâng, maumang lagyo gotû rayuq gi, maulat má dang wún é lé ngò myang ri; yhang gi, haû mingkan htoq má nyi é, mingdán hkangmó mâ é bang, byuhú hkangmó mâ é bang, myíng hkangmó mâ é bang, byù myû hkangmó mâ é bang lé, hko kyo râ ahtum abyuq é gabú danglù wó ri.

<sup>7</sup> Yhang gi, "Garai Gasang, tarâ jéyáng râ ahkyíng jé bê nghut é yanmai, Yhang lé gyuq hkungga luí, Yhang é hpungwup a-tsam lé shigyau keq. Haû mauhkûng eq myigùng, wuìshuq lung-aû eq wuìbúm pé

\* **13:10** Chyúmding ra-am má gi, *Byù rayuq yuq lé, shúm kut é sù gi, shúm zung é hui râ nghut lhê. Sham èq byù sat é sù gi, sham èq sat é hui râ nghut lhê, ga bo tô ri.* † **13:11** *Tân jung dusak gotû radu gâ é shî gi, myiqhtoi pyoq lé gá nau é nghut lhê.*

hpan tô é Sû lé, noqkuq keq." ga luí, htê mó èq taí ri.

8 Í yuq nghû râ maumang lagyo gi, htâng má châng lé mù, "Haû mingdán pè\* lhunglháng lé, yhang kut shut é ashop é dông gungsho zùm yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga taí ri.

9 Sum yuq nghû râ maumang lagyo gi, yhangnhik é htâng má châng lé mù, "Haû tân jung dusak eq yhâng é alhô lé, noqkuq luí, yhumsing é ngelang má nghut nghut, loq má nghut nghut, yhâng é masat lhô lé tap yu é sù, ó yuq nghut kôle,

10 Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq râ nghut lhê. Hau htoq agó, haû chyoiyúng maumang lagyo pè hí má le, Sauzô é hí má le, yhang gi, duq nyi é myi eq hang èq zing-rí é huí zo râ nghut lhê.

11 Yhangmoq zing-ri huí é myihkau gi, pyat dedu ahtum abyuq htoq nyi râ nghut lhê. Haû tân jung dusak eq yhâng é alhô lé, noqkuq é bang eq yhâng mying é masat lhô tap yû sù é matú gi, nyí, myín, no râ ahkyíng wó râ a nghut." ga luí, htê mó èq taí ri.

12 Garai Gasâng é jep é tarâ cháng luí, Yesuq lé lhumzúi nyi é bang nghut é, sân-yúng bang gi, hkam shirang é hkyô bò râ lhê.

13 Hau htâng, "Ahkuí mai gi, haû Yhumsing má shí é sù, hkungsô wó nyi ri nghû kê to aq." gâ é htê, mauhkûng mai htoq lo é lé, ngò wó gyô ri.

Haû hkûn, haû Woi-nyí gi, "Nghut rô, yhangmoq kut é muzó é akyû gi, yhangmoq htâng cháng râ nghut é yanmai, yhangmoq gi, yhumsing zúi ngú é muzó mai myang hkying bekô râ nghut lhê." ga taí ri.

#### *Myidàm Htoq Mã É Kyôshi Shû É Hkyô*

14 Ngò dum wú kat le, mhut hpyû rahtui ngá hí má joq tô é lé myang ri; mhut hpyû htoq haû má Byu Yhangzo su dut é byu rayuq zung tô ri; Yhâng é ulhum má gi, hîng janmaú tsúng to luí, Yhâng é loq má gi, htoq é zaiyik ralhum chung tô ri.

15 Haû hkûn, gotû maumang lagyo gi, noqkuq yhûm mai htoq lô mù, "Haû myidàm htoq mã é kyôshi gi, myhîng zan to bê nghut luí, kyôshu yoq jé bê nghut é yanmai, náng é zaiyik chûng mù, yik shû yù aq." ga, haû mhut htoq mã zung tô é Sû lé, htê mó èq taí garû kat ri.

16 Haû mù, mhut htoq mã zung tô é Sû gi, Yhâng é zaiyik lé, myigùng htoq mã dú hkyô kat luí, myidàm htoq mã é kyôshi lé, ban shû yù bê nghut ri.

17 Maumang lagyo gotû rayuq gi, mauhkûng htoq mã é noqkuq yhûm mai htoq lo ri; haû yuq le, htoq é zaiyik ralhum chung tô ri.

18 Haû, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mã é tsibiyiq shi gi, myhîng bê nghut é yanmai, náng é htoq é zaiyik yù mù, tsibiyiq shipaû haû pé lé, yâm tsîng yù aq." ga, htê mó èq taí garû kat ri.

19 Maumang lagyo haû gi, yhâng é zaiyik lé, myidàm htoq mã dú hkyô kat mù, haû mã é tsibiyiq shi pé lé yâm tsîng yù luí, Garai Gasang nhikmo-yô é tsibiyiq wing pyik jang mó má hut kat bê nghut ri.

20 Myuq shinggan mã é tsibiyiq wing pyik jang haû má, tsibiyiq shi haû pé lé nâng nyhoq luí, tsibiyiq wing pyik jang haû mai súi yui htoq lo é gi, myang lunghtúng myháng jé shoq jé lô mù, 180 déng† kô we shoq yui ló bê nghut ri.

## 15

### *Ló Htâng É Wúm Nyhit Lhum Chung É Maumang Lagyo Nyhit Yuq É Hkyô*

1 Ngò gi, mauhkûng má gotû limik kumlhá joq é lé, dum byu-myang ri; haû gi, wúm nyhit lhum chung é maumang lagyo nyhit yuq nghut ri; wúm haû pé gi, ló htâng é wúm pé nghut ri; hkâsu mù gâ le, Garai Gasang nhikmo-yô é hkyô gi, haû gû mai bàn râ nghut lhê.

2 Hau htoq agó, myi eq nyhò tô é myoqjâm wui-nhông su dut é lé le, ngò myang ri; haû tân jung dusak eq yhâng é alhô lé le, yhâng mying é námbat lé le, wó ung pyám

\* 14:8 Mingdán pé gâ é gi, a lumjîng bang lé gâ é nghut lhê.

† 14:20 180 déng gi, Grik pé é stadia 1600 kô bo ri.

bê bang gi, wuì-nhông yàm haú má yap tô bum akô; yhangmoq gi, Garai Gasang byî é títg pé lé chung to kôluí,

<sup>3</sup> Garai Gasâng é dui-nhâng zoshâng Mosheq é mahkôn eq haú Sauzô é mahkôn lé hkôn kô é gi,

"Wum-o a-tsam dik shoq bò Sû Yhumsîng Garai Gasang ê, Nàng kut é muzó gi, hkik é eq mauhpo yhang nghut ri.

Pyat pyat zaí zaí é Hkohlâm ê, Nàng é hkyô gi, dingmán é eq tengmán é nghut ri.

<sup>4</sup> Yhumsîng ê, Nàng lé a gyuq a hkungga râ eq Nàng myîng lé a lhoq gyaú râ gi, ó yuq wá nyi râ lúh?

Hkâsu mù gâ le, Nàng za chyoyúng é Sû nghut ri.

Nàng kut é dingmán hkyô gi, tân shit bê nghut é yanmai,

byù myú lhunglhang gi, Nàng hí má lé noqkuq kó râ nghut lhê."

gâ akô nghut ri.

<sup>5</sup> Hau htâng, ngò wú kat le, mauhkûng má, saksé zúm joq é noqkuq yhûm bóng tô é lé, myang ri.

<sup>6</sup> Haú wúm nyhit jung chung é maumang lagyo nyhit yuq gi, noqkuq yhûm haú mai htoq lo ri; yhangmoq gi, sân-yúng duqbó é nú nhám mebu wut luí, yhangmoq é wànggàng má hîng hpyihit baíyup tô akô nghut ri.

<sup>7</sup> Haú hkûn, haú dui é dusak myî du mâ é radu gi, pyat dedu ahtum abyuq dui nyi é Garai Gasâng é nhikmo-yo hkyô byíng tô é hîng góm nyhit lhum, haú maumang lagyo nyhit yuq lé byî ri.

<sup>8</sup> Garai Gasâng é hpungwup shingkanq eq hpungwup a-tsâm é yanmai, haú noqkuq yhûm gi, myihkau byíng zan to bê nghut luí, haú maumang lagyo nyhit yuq é wúm nyhit jung za a bàn bàn gi, noqkuq yhûm haú má ó yuq le a wó wâng kó nghut ri.

## 16

### *Garai Gasâng É Nhikmo-yo Hkyô Bo É Góm Nyhit Lhum*

<sup>1</sup> Hau htâng, maumang lagyo nyhit yuq lé, "Htoq ê mù, haú Garai Gasâng é nhikmo-yo hkyô bo é góm nyhit lhum lé, myigùng

htoq má hut hkyô kat keq." ga, noqkuq yhûm mai htê mó èq taí é lé, ngò wó gyô ri.

<sup>2</sup> Haú hkûn, sân-hî yuq nghû râ maumang lagyo gi, htoq ê mù, yhâng é góm lé, myigùng htoq má hut hkyô kat jáng, haú tân jung dusak é masat lhô dap é eq yhâng é alhô lé noqkuq é bâng chyáng, achayut é eq hkê-nho dik é, yapjeq ana dap tô bùm bê nghut ri.

<sup>3</sup> Í yuq nghû râ maumang lagyo gi, yhâng é góm lé, wuìshuq lung-aú má hut hkyô kat ri; haú gi, shí bê byù rayuq é sui su dut byuq é htoq agó, haú má lúng é dui jung lhunglhang gi, shi byuq bê nghut ri.

<sup>4</sup> Sum yuq nghû râ maumang lagyo gi, yhâng é góm lé, wuìlàng pé eq wuìbúm pé má hut hkyô kat jáng, haú pé gi, sui dut byuq bê nghut ri.

<sup>5</sup> Haú hkûn, haú wuì lé upzúng é maumang lagyo taí é lé, ngò wó gyô é gi,

"A-nham pyat le, ahkui pyat le, rú nyi nyi é Chyoyúng Sû ê,

Nàng haú su kut jéyáng bê nghut é yanmai, Nàng gi, tengmán Sû nghut ri;

<sup>6</sup> hkâsu mù gâ le, yhangmoq gi, Nàng é sân-yúng bang eq myiqhtoí pé é sui lé, lhoq htoq pyám bekô nghut luí,

Nàng gi, yhangmoq lé sui shuq nhang é nghut ri; haú gi, yhangmoq hui zo gíng é hkyô nghut ri."

gâ ri.

<sup>7</sup> Haú hkûn, haú hkungga gyap mai,

"Nghut rô! Wum-o a-tsam dik shoq bò Sû Yhumsîng Garai Gasang ê, Nàng jéyáng é hkyô pé gi, tengmán é eq dingmán é nghut ri."

ga le, taí kat é htê lé, ngò dum wó gyô ri.

<sup>8</sup> Myi yuq nghû râ maumang lagyo gi, yhâng é góm lé, bui é ahtoq má hut hkyô kat é hkûn, bui gi, byu pé lé myî èq nyhê kyuq râ ahkáng wó bê nghut ri.

<sup>9</sup> Haú mù, yhangmoq gi, nyé dik é eq nyhê kyuq é hui zo luí, wúm shí pé lé up nyi é Garai Gasâng é myîng lé nhîng akô; haú-í yhang hpuzo kôlhang, yhangmoq gi, myit le a lîng kó, Garai Gasang lé le a shigyaú kó nghut ri.

<sup>10</sup> Ngo yuq nghû râ maumang lagyo gi, yhâng é góm lé, tân jung dusak é hkohlâm-tanghkuq htoq má hut hkyô kat jáng, yhâng

é mingdán gi, mauchut tuq dut byuq bê nghut ri. Mingbyû wuì gi, yhumsing é shô lé lhang, ngat tân bùm shoq shî-nò jamjau hui zo kôluì,

<sup>11</sup> yhangmoq no hpû é eq jeq é ana dap é yanmai, mauhkûng mâ é Garai Gasang lé nhîng akô; haû-í yhang hpuzo kôlhang, yhangmoq gi, yhangmoq kut é hkyô mai myit a lhang shi kó nghut ri.

<sup>12</sup> Hkyuq yuq nghû râ maumang lagyo gi, yhang é góm lé, Uhprat wuì mó lhang má hut hkyô kat jáng, wuilàng haû gi, kân byuq luì, haû buihotoq hkyam mâ é hkohkam pé, lé lô râ hkyô dong bê nghut ri.

<sup>13</sup> Haû hkûn, po su dut é, agè ashop é byò sum woi-nyí lé, ngò myang ri; haû pé gi, manjung, tân jung dusak, myiqhtoi pyoq pé é nhut mai htoq lô kô é bang nghut akô.

<sup>14</sup> Woi-nyí haû pé gi, nat gâng pé é woi-nyí nghut luì, limik kumlhá pé kut shit kômù, haû wum-o a-tsam dik shoq bò Sû Garai Gasang é buinyi mó má majan zan râ matú, mingkan gón mâ é hkohkam pé lé lhoq tsîng yù râ ga, htoq e ló akô nghut ri.

<sup>15</sup> "Wú keq, Ngò gi, hkau sù su jé lé é nghut lhê! Su hí má gungchîn a so râ eq hoq hpu hkyô a lhoq htoq shit sháng gaq ga, yhumsing é wutbu wutmè lé, zúng nyí luì, gyîng gyîng kut nyi é sù gi, hkungsô wó nyi ri."\*

<sup>16</sup> Haû mù, nat haû bang gi, hkohkam pé lé, Hebre myîng dông Armagedon gâ é jowò má, rahá ji tsîng tô akô nghut ri.

<sup>17</sup> Nyhit yuq nghû râ maumang lagyo gi, yhang é góm lé, maulat má hut hkyô kat ri; haû hkûn, haû noqkuq yhûm mâ é hkohkâm-tanghkuq mai, "Bàn bê!" gâ é hte mó htoq lo ri.

<sup>18</sup> Haû htoq agó, lhaphpyat é, myîng hûm é, maugum gûm é eq layàng mó nún é pé dut htoq lo ri. Myidàm htoq má, xângzo byù lé nyi é hkûn mai, layàng haû su nún é eq haû-í htan é gi, a joq wú shî é nghut lhê.

<sup>19</sup> Haû mù, haû myuq mó gi, sûm hkyam byak goq byuq luì, mingdán pé mâ é myuq pé le, gyop byuq bê nghut ri. Garai Gasang gi, Babelon myuq mó lé le myit bun luì, Yhang é nhikmo-yô é tsibiyiq wing byîng shoq bo é góm lé shuq nhâng bê nghut ri.

<sup>20</sup> Zinlóng hkangmó gi, hfang byuq bê nghut luì, bùm pé le byuq byuq bê nghut ri.

<sup>21</sup> Haû hkûn, myi xê joí kô lai é likwò mó gi, mauhkûng mai byu pé htoq má wo gyò gyûn ri; likwò wúm gi, gyai yhang wuîhke jamjaû é wúm nghut é yanmai, byu pé gi, Garai Gasang lé nhîng bum akô nghut ri.

## 17

### *Shiwa Myhí Mó É Hkyô*

<sup>1</sup> Haû góm nyhit lhum chung tô é maumang lagyo nyhit yuq mâ é rayuq gi, lé lô mù, "Lé aq, haû wuì myo myô pé htoq má zung tô é shiwa myhí mó lé dam byi râ hkyô, ngò, nang lé tân shit bá.

<sup>2</sup> Myidàm htoq mâ é hkohkam pé gi, yhang eq rahá ashop é dông gungsho zùm yap é hkyô kut shut kôluì, myidàm htoq má nyi é bang gi, yhang kut shut é myiwe yuqgè nyi zô lhum hkyo é tsibiyiq wing lé shuq wut bùm bekô nghut ri." ga luì, ngo lé taí ri.

<sup>3</sup> Haû mù, maumang lagyo haû gi, Woi-nyí má, ngo lé yoso shut shuí wang e ló ri. Haû ulhum nyhit lhum eq hkyuí raxê lhum dap luì, taí hpoí é myîng kôm dap tô é, zam zam ne é tân jung dusak htoq má zung tô é myiwe myhí rayuq lé, ngò myang ri.

<sup>4</sup> Myiwe myhí haû gi, me me dut é eq zam zam ne é mebu wut luì, hîng, lungsêng, palhé pé eq mhôn chung ri; yhang é loq má gi, yhang é myiwe yuqgè nyi zô lhum hkyo é agot a-û hkyô eq achayut é zè pé byîng tô é hîng góm ralhum chung tô ri.

<sup>5</sup> NIK DIK É HKYÔ, MYIDÀM HTOQ MÁ É  
ACHAQ ACHYUT HKYÔ PÉ EQ SHIWA  
MYHÍ PÉ É YHÂNGNU, BABELON MYUQ  
MÓ.

gâ é myîng gi, yhang é ngelang má kê tap tô ri.

<sup>6</sup> Myiwe myhí haû gi, sân-yúng bâng é sui eq Yesuq é saksé hkâm bâng é sui shuq wut tô é lé, ngò myang ri.

Haû mù, ngò gi, gyai yhang maú byuq é nghut lhê.

<sup>7</sup> Haû hkûn, maumang lagyo haû ngo lé taí é gi, "Nàng, haî mù maú lhê lhu? Myiwe myhí haû eq, yhang ji tô é, ulhum nyhit lhum eq hkyuí raxê lhum dap é tân jung

\* **16:15** Dang shí hkun gi, Yesuq taí é dang nghut lhê.



dusak é zaú tô é hkyô lé, ngò, nàng lé taí kyo râ nghut lê.

<sup>8</sup> Nàng myàng é tân jung dusak haú gi, hí hkûn nyi wú bê, ahkuí a nyi lo, nghut kôlhang, ník dik htûm é Lasang-dong mai htoq lô mù, htên byoq é hui râ nghut lê. Mau htoq xâng hkun mai, asak jihpán laiká buk má mying a kâ tô é, myidàm htoq má nyi é bang gi, tân jung dusak haú lé myàng kô é hkûn, maú byuq bùm kó râ nghut lê. Hkâsu mù gâ le, haú gi, nyi wú bê, ahkuí a nyi lo, nghut kôlhang, dum lé râ nghut é yanmai nghut ri.

<sup>9</sup> Hpaqchyí byéng-yá bo é nyan gi, shí má râ ri. Haú ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri.

<sup>10</sup> Ngo yuq gi, byit gyó byuq bê; rayuq gi, ahkuí nyi to ashí; myit tô é rayuq gi, a jé lé shi nghut ri; haú yuq jé lé é hkûn, yhang gi, ahkying razup zo za wó nyi râ nghut lê.

<sup>11</sup> Hí hkûn nyi wú bê, ahkuí a nyi lo dut é tân jung dusak haú gi, shit yuq nghû râ hkohkâm nghut ri. Yhang gi, haú nyhit yuq eq sêng é yanmai, yhâng é htên byoq hkyô shut e ló râ nghut lê.

<sup>12</sup> Haú nàng myàng é hkyuí raxê lhum gi, mingdán a myang yù shí é hkohkâm raxê yuq nghut ri; nghut kôlhang, yhangmoq gi, haú tân jung dusak eq rahá za, hkying hkum rahkum kô hkohkâm ayá lé wó yù kó râ nghut lê.

<sup>13</sup> Yhangmoq gi, myit myoqbyù hkyô rahum za nghut kômù, yhangmoq é a-tsam eq ahko ahkáng lé, haú tân jung dusak lé byi kó râ nghut lê.

<sup>14</sup> Yhangmoq gi, haú Sauzo lé majan chô m zan kó râ nghut lê; nghut kôlhang, Sauzo haú gi, yhumsing pé é Yhumsing eq hkohkam pé é Hkohkâm nghut é yanmai, yhangmoq lé ung pyám râ nghut lê. Haú Sauzo eq rahá nghut é bang gi, ji yù huí é bang, hkyin yù huí é bang eq lhumzuí é bang nghut akô." gâ ri.

<sup>15</sup> Hau htâng, maumang lagyo haú ngo lé dum taí é gi, "Nàng myang é, shiwa myhí zung tô é wuì pé gi, byù myû pé, byù ajùm ayò pé, mingdán pé eq mying lhumjup nghut ri.

<sup>16</sup> Haú nàng myang é tân jung dusak eq hkyuí raxê lhum gi, shiwa myhí haú lé a jú kut kó râ nghut luí, yhâng é sutzè banshoq shang yu pyám byi mù, mebu lhang a dap loshoq achindum kut to kó râ nghut lê; hau htoq agó, yhâng é sho lé zo luí, myí èq nyhê hkyô pyám kó râ nghut lê.

<sup>17</sup> Hkâsu mù gâ le, Garai Gasang gi, haú bang mai, i-myit rahkat zâ èq, yhumsing é a-tsam, haú tân jung dusak lé byi râ myit, yhangmoq lé kat byi Sû nghut ri. Haú mù, yhangmoq gi, Garai Gasang é mungdang lhoq dik é hkûn jé shoq, haú su kut kó râ nghut lê.

<sup>18</sup> Nàng myang é myiwe myhí haú gi, myidàm htoq mâ é hkohkam pé lé up zô é myuq mó nghut ri." gâ ri.

## 18

### *Babelon Lêng Gyop É Hkyô*

<sup>1</sup> Hau htâng, maumang lagyo gotù rayuq mauhkung mai gyó lo é lé, ngò myang ri. Yhang gi, ahko ahkáng mó wó é nghut luí, haú myidàm htoq lé, yhâng é hpungwup èq duqbó to byi ri.

<sup>2</sup> Yhang, htê mó o mó èq garû taí kat é gi, "Babelon myuq mó gi, lêng gyop bê, lêng gyop bê!

Myuq haú gi, nat gâng pé é yhûm eq agè ashop é nat hkangmó é hkyûng dut byuq é htoq agó, a sansêng é eq achaq achyut é nghoq pé nyi é sùt dut byuq bê nghut ri.

<sup>3</sup> Hkâsu mù gâ le, haú byù myû lhunglhang gi, yhang kut shut é ashop é dông gungsho zùm yap é hkyo é nhik lhoq yô é tsibiyiq wíng shuq wut bùm bekô nghut ri.

Haú myidàm htoq mâ é hkohkam pé gi, yhang eq myi shut làng shut hkyô kut bekô nghut é htoq agó, myidàm htoq mâ é hpugá wuiloq gá bang gi, yhâng é ladu lai shoq ngón kûn é hkyo é yanmai, sutzè wó bôm bekô nghut ri."

gâ ri.

<sup>4</sup> Hau htâng, mauhkung mai htoq lo é htê gotù lé ngò dum wó gyô é gi, "Ngá é byu pé ê, myuq hau é mara pé má nungmoq a bo lôm râ matú le,

yhâng é wúm pé lé nungmoq a hui zo kó râ  
matú le, haú mai hân hfang htoq lò  
keq;

5 hkâsu mù gâ le, yhâng é mara gi,  
mauhkûng htung shoq bum zang to  
bê nghut luí,

Garai Gasang gi, Yhâng é a dingmán é  
hkyô lé myit bun bê nghut ri.

6 Yhang kut byî é eq rajung za, yhang lé tau  
kut byi keq; Yhang kut bê muzó eq  
rajung za, yhang lé í tú taú kut keq.

Yhang nyhó byî é góm má, í tú taú nyhó  
byi keq.

7 Yhang gi, yhumsing gùng lé yhumsîng  
lhoq gyaú yû luí, ladu lai shoq ngón  
kún nhang é í,

wuîhke jamjau hkyô eq iyon hkyô myo  
myo, yhang lé taú byi keq.

Hkâsu mù gâ le, yhang gi, yhâng é myit má,  
'Ngò gi, hkohkâm myhí nghut lhê; ngò  
gi, chuimó a nghut;

hkâ-nhâm le iyon hui râ a nghut.' ga  
gumrong nyi ri.

8 Haú mù luí, yhâng é wúm nghu é shî hkyô,  
iyon hkyô eq mutmó gyó hkyô gi,  
ra-nyí bui má za, yhâng chyáng jé râ  
nghut lhê.

Hau htoq agó, yhang gi, myî eq nyhê hkyô  
pyâm é lé hui râ nghut lhê;

hkâsu mù gâ le, yhang lé jéyáng é, haú  
Yhumsîng Garai Gasang gi, wum-o a-  
tsam bò Sú nghut ri.

9 Haú yhang eq rahá myiwe yuqgè nyi  
zô lhum hkyô kut shut é eq yhâng é ladu  
lai shoq ngón kún hkyô má bo lom é, haú  
myidàm htoq mâ é hkohkam pé gi, yhang  
lé nyhê hkyô é myihkau lé myàng kôjáng,  
ngaubyi ngau-nhap eq iyon yôn é huí bùm  
kó râ nghut lhê.

10 Yhangmoq gi, yhang no jamjaú nyi é lé  
wú gyuq kôluí, we we má yap to kômù,  
'Hkik é myuq mó, a-tsam bo é Babelon gi,  
dingnyé wó ri-nhung!

Dingnyé wó ri-nhung! Hkyíng hkum ral-  
hum má za, dam byî é hkyô gi, náng  
chyáng jé bu-nhung!"

ga luí, taí garu kó râ nghut lhê.

11 Myidàm htoq mâ é hpugá byu pé gi,  
yhang é yanmai, ngaubyi ngau-nhap é eq  
iyon yôn é hui kó râ nghut lhê; hkâsu mù gâ

le, yhangmoq é gài zè lé, ó yuq le a wuì byi  
lo kô é yanmai nghut ri.

12 Gài zè haú pé gi, hîng, ngùn, lungsêng  
eq palhé, nú-nhâm é pán, me me dut é pán,  
laí hkyíng eq zam zam ne é pán; namngón  
jung sik ajung jung, maguí zuí lé saí é, gùloq  
hpaú jung sik lé saí é, gyi lé saí é, shamtoq  
lé saí é, luq hpyû lé saí é jung ajà jà nghut  
ri.

13 Hau htoq agó, changhpyik gâm,  
xunmân, namngón jung, mura, loban,  
tsibiyiq wing, tsanlun xû, mún eq sungso,  
nojûng eq sau, myang eq myanglhêng pé;  
byù é gungdu eq asak pé nghut ri.

14 Yhangmoq gi, 'Nàng myit ô nau nyi  
é hkyô pé gi, náng chyáng mai gâng ló  
byuq bê nghut ri. Nàng wó é sùt é hkyô  
eq hkikhkam é hkyô pé banshoq gi, byuq  
byuq bê nghut luí, hkâ-nhâm le dum wó taú  
yù râ a nghut.' ga taí kó râ nghut lhê.

15 Gài zè haú pé lé ung luí, yhâng chyáng  
mai sutzè wó yu é byù pé gi, yhang hpuzô  
é jamjau hkyô lé wú gyuq kô é yanmai, we  
we má yap to kômù, ngaubyi ngau-nhap eq  
iyon yon uchyang,

16 'Nú-nhâm é pán, me me dut é pán eq  
zam zam ne é mebu wut luí, hîng,  
lungsêng eq palhé pé lé  
mhôn tô é myuq mó gi, dingnyé wó ri-  
nhung! Dingnyé wó ri-nhung!

17 Hkyíng hkum rahkum má za, haú-í  
yhang wó é sutzè pé htên byoq byuq  
bu-nhung!"  
ga taí kó râ nghut lhê.

Wuì-sanghpo agyi yuq hkangmó eq wuì-  
sanghpo mai jón wún é bang banshoq, wuì-  
sanghpo hkâng bang eq wuìshuq lung-aú  
mai wam baú hkyô wó yu é bang banshoq  
gi, we we má yap to kômù,

18 myuq haú nyé gyó nyi é myihkau lé  
myàng kôjáng, 'Myuq mó shî eq pûng é  
myuq gi, hkâmá joq shirâ lhú?' ga taí garu  
kó râ nghut lhê.

19 Yhangmoq gi, yhumsing é ulhum má  
hpuilhup kyaq gyun mù, ngaubyi ngau-  
nhap eq iyon yon uchyang,

'Myuq mó gi, dingnyé wó ri-nhung!  
Dingnyé wó ri-nhung!

Wuìshuq lung-aù má wuì-sanghpo pé wó é  
bang gi, yhâng é sutzè pé é yanmai,  
sutzè wó bum akô.

Nghut kôlhang, hkyíng hkum rahkum má  
za, htên byoq hkyô gi, yhâng chyáng  
jé bu-nhung!

<sup>20</sup> Mauhkûng ê, yhang é yanmai hkye gabú  
aq! Sên-yúng bang, lagyô pé eq my-  
iqhtoî pé ê, hkye gabú keq!

Hkâsu mù gâ le, yhang, nungmoq lé kut é  
eq rajung za, Garai Gasang gi, yhang  
lé jéyáng bê nghut ri.  
ga taí kó rá nghut lhê." gâ ri.

<sup>21</sup> Hau htâng, wum-o a-tsam mó bo é  
maumang lagyo rayuq gi, luqluí long mó sù  
é luqgok racham waq toq yú mù, wuìshuq  
lung-aù má dú hkyô kat luí, taí é gi,

"Haù Babelon myuq mó gi, haù su kut wum  
kat dú hkyô pyâm é hui rá nghut luí,  
hkâ-nhám le dum myàng rá a nghut lo.

<sup>22</sup> Haù tíng bat é bang, dat gó dat ye é bang,  
sampyí mut é bang eq tut mut é bâng  
é htê lé,  
náng chyáng hkâ-nhám le dum wó gyo  
lo rá a nghut.

Loq hpaqchyí ajung jung kûng é byù  
lé, náng chyáng hkâ-nhám le dum  
myàng lo rá a nghut.

Luqluí luí é htê lé, náng chyáng hkâ-nhám le  
dum wó gyo lo rá a nghut.

<sup>23</sup> Haù myibung duq é myishâm lé, náng  
chyáng hkâ-nhám le dum wó duq lo  
rá a nghut.

Myisik lusik é htê lé, náng chyáng hkâ-nhám  
le dum wó gyo lo rá a nghut.

Náng é hpugá byû pé gi, mingkân é byù mó  
pé nghut ri.

Náng é myoqheq hpaqchyí èq mingdán  
banshoq mâ é bang lé, hkyô shuí  
nghoq bê nghut ri.

<sup>24</sup> Haù myiqhtoî pé é sui, sên-yúng bâng é  
sui eq myidàm htoq má sat hui bang  
banshoq é sui pé gi,

yhâng chyáng chyat byu-myàng bê  
nghut ri."  
gâ ri.

## 19

### *Haleluya!*

<sup>1</sup> Hau htâng, mauhkûng htoq má, byù  
ajùm ayò garû é htê mó su gâ é lé, ngò wó  
gyô é gi,

"Haleluya!"\*

Hkyi yù hkyô eq hpungwup shingkang, a-  
tsam gi, nga-nhûng é Garai Gasang  
eq sêng é nghut lhê.

<sup>2</sup> Hkâsu mù gâ le, Yhang tarâ jéyáng é hkyô  
gi, tengmán é eq dingmán é yanmai  
nghut ri.

Yhang gi, myidàm htoq mâ é bang lé, haù  
yhâng é ashop é dông gungsho zùm  
yap é hkyo èq mara kut shut nhang  
é shiwa myhí mó lé, mara byi luí,  
Yhâng é dui-nhâng zoshâng wuì é sui  
yuichyín dam byi bu-nhung ô!"

gâ ri.

<sup>3</sup> Dum radàm, yhangmoq taí garu kô é gi,  
"Haleluya!"

Myuq hau é myihkau gi, pyat dedu ahtum  
abyuq ru íng doq nyí sháng gaq ô!"  
gâ bum akô nghut ri.

<sup>4</sup> Haù suwún í xe myi yuq eq dui é dusak  
myí du gi, haù hkohkâm-tanghkuq má zung  
tô é Garai Gasang lé paí gop luí, noqkuq  
uchyang,

"Amen, Haleluya!"

ga, taí garû bum akô.

<sup>5</sup> Haù hkûn,

"Garai Gasâng é dui-nhâng zoshâng wuì  
nghut é, yhang lé gyuq hkunggâ é tiq  
ko banshoq bang è!"

Nga-nhûng é Garai Gasang lé, hkya-on  
kungtôn keq ô."

gâ é htê, haù hkohkâm-tanghkuq mai htoq lo  
ri.

<sup>6</sup> Hau htâng, byù ajùm ayo é htê su ga, wuì  
myo myo mying hûm é htê su ga, maugum  
mó é htê su ga, taí garû é htê lé ngò wó gyô  
é gi,

"Haleluya!"

Hkâsu mù gâ le, wum-o a-tsam dik shoq  
bò Sù nga-nhûng é Yhumsîng Garai  
Gasang gi, up nyi ri.

\* **19:1** *Haleluya* gâ é gi, Hebre myíng dông, "Yhumsîng Garai Gasang lé hkya-on kungton lhê" gâ é dang nghut ri.

7 Nga-nhúng gi, ngón gabú luí, Yhâng é hpungwup shingkang lé lhoq gyaú sháng ô!

Hkâsu mù gâ le, haú Sauzo myiháng poí gi, jé bê nghut luí, Yhâng é myisik gi, rì rì mhôn to bê nghut ri.

8 Sân-yúng duq wik nú-nhâm é mebu le, wut râ matú, Yhang lé byí to bê nghut ri." gâ ri. (Nú-nhâm é mebu haú gi, sân-yúng bang kut é dingmán é muzó nghut ri.)

9 Hau htâng, maumang lagyo gi, ngo lé, "'Haú Sauzô é myiháng zoshuq poí má ji yu é hui bang gi, hkungsô wó nyi ri.' nghû ká aq." ga taí luí, "Dang shí pé gi, Garai Gasâng é tengmán mungdang yhang nghut lhê." ga xoq taí ri.

10 Haú hkûn, ngò gi, yhang lé noqkuq râ nghû, yhâng é hkyí wang má paí gop kat é nghut lhê. Nghut kôlhang, yhang gi, "Haú su hkâkut! Ngò gi, nàng eq haú Yesuq é saksé lé hkâm é náng gumang wui eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoi htoí é Woi-nyí é myit dông nghut ri." ga, ngo lé taí hkûm ri.

### *Myang Hpyû Jí To Su É Hkyô*

11 Hau htâng, ngò gi, mauhkûng bóng tô é lé le, ngá é myoq hí má myang hpyû radu nyi tô é lé le, myang ri. Myang hpyû haú má jí tô é gi, Lhumzui eq Tengmán gâ é Sû nghut ri. Yhang gi, tengmán é dông tarâ jéyáng luí, majan zan Sû nghut ri.

12 Yhâng é myoqjí gi, myishâm su dut mù, Yhâng é ulhum má gi, janmaú myo myo tsûng tô ri. Yhang mai lai luí, ó yuq le a bo sê é myìng, Yhâng chyáng kê tap tô ri.

13 Yhang gi, sui má jum yù bê nghut é buhîng radung wut to luí, Yhâng é myìng gi, Garai Gasâng é mungdang gâ ri.

14 Haú mauhkûng gyè pé gi, hpyu é eq sanséng nú-nhâm é mebu wut mù, myang hpyû jí kôluí, Yhâng htâng má châng bum akô nghut ri.

15 Byù myú haú pé lé zan râ matú, htoq é shâm gi, Yhâng é nhut mai htoq lo ri. Yhang gi, yhangmoq lé, shamtoq dumbáng eq up râ nghut lhê. Yhang gi, wum-o a-tsam dik shoq bò Sû Garai Gasâng é nhikmo-yô é

tsibiyiq shi pyik jang má, yhangmoq lé pyik râ nghut lhê.

16 Hkohlkam pê é Hkohlkâm eq yhumsing pê é Yhumsîng gâ é myìng gi, Yhâng é buhîng eq Yhâng é tangbaú má kê tap tô ri.

17 Dum, maumang lagyo rayuq gi, buí má yap tô é lé ngò myang ri; yhang gi, maulat má é nghoqzô pé banshoq lé, "Lé keq, Garai Gasâng é zoshuq poí mó matú, lé zup zing keq;

18 haú hkûn, nungmoq gi, hohlkam pê é, gyezaú pê é, wum-o a-tsam mó bò bâng é, myang jûm eq jí bâng é gungsho, luthkyô wó bang eq jùn pê é, byù mó byù zo pé lhunglhâng é gungsho pé lé, myàng zo kó râ nghut lhê." ga, htê mó eq wut garú taí ri.

19 Hau htâng, haú tân jung dusak eq myidàm htoq má é hohlkâm eq yhangmoq é gyezô pé gi, haú myang htoq má jí to Sû eq Yhâng é gyezô pé lé, majan zan râ matú chôm zîng bùm kê é lé, ngò myang ri.

20 Nghut kôlhang, haú tân jung dusak gi, chyup yu é hui bekô nghut ri; hau htoq agó, haú tân jung dusak é masat lhô lé hkam yù luí, yhâng é alhò lé noqkuq é bang lé, mhaú zo râ matú, tân jung dusak hau é gunglik dông limik kumlhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má duí gù dú hkyô kat é hui bekô nghut ri.

21 Haú myit gyó tô é bang gi, myang gûng má jí to Su é nhut mai htoq lo é sham eq sat pyâm é hui bekô nghut luí, nghoq pé lhunglhâng gi, haú bâng é gungsho lé, gyi gyi dau dau myàng zô bùm bekô nghut ri.

## 20

### *Rahkyîng Zàn*

1 Dum, maumang lagyo rayuq gi, nik dik htûm é Lasang-dông é zoqshí eq joqtoq tui mó lé, yhâng é loq má chûng mù, mauhkûng mai gyó lé lo é lé, ngò myang ri.

2 Yhang gi, natzau eq Tsadán nghut é, a-nham lhê é lhangmuí gâ é manjung lé, zanwut rahkyîng lhûng to râ matú, chyup tuí yù bê nghut ri.

3 Haú mù, maumang lagyo haú gi, rahkyîng zàn a byíng shí é gyoro má, manjung haú, byù myú pé lé a wó mhaú

zo sháng gaq ga, nik dik htûm é Lasangdong má yhang lé dú hkyô hâng kat luí, zoq myhí to mù, hau é ahtoq má dizik htûng tô ri. Haû rahkyîng zàn lai eq, yhang lé, ra yoq zo hpông htoq kat ra râ nghut lhê.

<sup>4</sup> Ngò gi, haû tarâ jéyáng râ ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haû Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bâng é sobyô pé lé, ngò myang ri. Haú bang gi, haû tân jung dusak eq yhâng é alhô lé a noqkuq é htoq agó, yhumsing é ngelang eq loq má hau é masat lhô lé a htûng tap yû bâng é sobyo pé nghut ri. Yhangmoq gi, dum dui toq mù, zanwut rahkyîng tup Hkrisduq eq rahá up nyi bekô nghut ri.

<sup>5</sup> Haû gi, sâng-hî dâm dum dui toq é hkyô nghut ri. (Shi byuq bê myit gyó tô bang gi, rahkyîng zàn haû a byíng byíng wó dum dui toq kó râ a nghut.)

<sup>6</sup> Sâng-hî dâm dum dui toq é hkyô má lom é bang gi, hkungsô wó bang eq chyoiyúng bang nghut ri. Í dâm nghû râ shi é hkyô gi, haú bang lé up râ ahkáng wó é a nghut; haú bang gi, Garai Gasang eq Hkrisduq é hkyangjông pé dut râ nghut é htoq agó, Hkrisduq eq rahá zanwut rahkyîng tup up kó râ nghut lhê.

### *Tsadán Htên Byoq Huí É Hkyô*

<sup>7</sup> Rahkyîng zàn haû lai jáng, Tsadán gi, htóng mai nhang htoq kat é hui luí,

<sup>8</sup> majan zan râ matú, myidàm htoq myi chyûn má nyi é, Goga eq Magoga gâ é byù myú pé lé mhaû shuí tsing yù râ ga, htoq ê râ nghut lhê. Byù haú bang gi, wuìshuq lung-aû yàm mâ é semuí myhó myo kó râ nghut lhê.

<sup>9</sup> Yhangmoq gi, maumyî htunghtáng hkap shoq chòm yán doq lò kômù, haû Garai Gasâng é byu pé nyi é dap nghut é, Garai Gasang chyitdap é myuq lhinghkyuq má, lé lóm tô bùm bekô. Nghut kôlhang, mauhkûng mai myi gyó lô luí, yhangmoq lé nyhê hkyô pyám bê nghut ri.

<sup>10</sup> Haû tân jung dusak eq myiqhtoi pyoq pé lé dú hkyô kat jang nghut é, hang myi duq nyi é nhông má, yhangmoq lé mhoq

hpyoq yu é natzau haû le dú hkyô pyâm é hui bê nghut ri. Yhangmoq gi, nyí, myín, pyat dedu ahtum abyuq wuìhke jamjau hui zô nyi kó râ nghut lhê.

### *Ló Htâng É Tarâ Doqdan Hkyô*

<sup>11</sup> Hau htâng, hkohkâm-tanghkuq hpyû mó ralhum eq haú má zung tô é Sû lé, ngò myang ri. Haû mauhkûng eq myigùng gi, Yhâng é hí mai hfang ló bê nghut mù, yhangnhik é matú jowò a joq lo nghut ri.

<sup>12</sup> Hau htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gâ é gotû laiká buk le, hpông tô ri. Haû shi byuq bê bang gi, yhumsing kut é eq rajung za, laiká buk pé má kê tô é dông, tarâ doqdan é huí bùm bekô nghut ri.

<sup>13</sup> Haú hkûn, wuìshuq lung-aû gi, yhang má lúng tô é, shi byuq bê bang lé ap byi luí, haû shi é hkyô eq Moming le, yhangnhik chyáng lúng tô é, shi byuq bê bang lé ap byí akô nghut ri; yuq hkgámó gi, yhumsing kut é eq rajung za tarâ doqdan é hui bekô nghut ri.

<sup>14</sup> Hau htâng, shi é hkyô eq Moming gi, myi nhông má dú hkyô kat é hui bekô nghut ri. Myi nhông haû gi, í dâm nghû râ shi é hkyô nghut lhê.

<sup>15</sup> Asak jihpán laiká buk má, myìng a bo é sù ó yuq nghut kôle, myi nhông haú má dú hkyô kat é hui bekô nghut ri.

## 21

### *Yerusalem Asik*

<sup>1</sup> Hau htâng, mauhkûng asik eq myigùng asik lé, ngò myang ri; hkâsu mù gâ le, hí lhê é mauhkûng eq myigùng gi, lai ló byuq bê nghut luí, wuìshuq lung-aû le, dum joq râ a nghut lo.

<sup>2</sup> Haú hkûn, Chyoiyúng Myuq gâ é Yerusalem asik gi, lusik é matú mhôn yúng tô é myisik su, hen lajâng yù luí, Garai Gasâng chyáng mâ é nghut mù, mauhkûng mai gyó lé lo é lé, ngò myang ri.

<sup>3</sup> Hau htoq agó, hkohkâm-tanghkuq mai htoq lo é danghtê mó lé, ngò wó gyô é gi, "Ahkuí, Garai Gasâng é nyi jowò gi, xângzo

byu pé eq rahá nghut luí, Yhang gi, yhangmoq eq rahá nyi nyi râ nghut lhê. Yhangmoq gi, Yhâng é byu pé dut râ nghut luí, Garai Gasang yhang, yhangmoq eq rahá nyi mù, yhangmoq é Garai Gasang dut râ nghut lhê.

<sup>4</sup> Garai Gasang gi, yhangmoq é myoq mâ é ngaubyi lhunglhang lé, sut pyám byi râ nghut lhê. Htângnùng má gi, shî-nò hkyô, iyon hkyô, ngaubyi ngau-nhap hkyô eq no hpu hkyô nghû é joq râ a nghut lo; hkâsu mù gâ le, hí lhê é hkyô pé gi, lai lô byuq bê nghut ri." gâ ri.

<sup>5</sup> Haú hkohkâm-tanghkuq má zung to Sû gi, "Wú aq, jung hkangmó lé, Ngò asik kut nyi bê nghut lhê." ga tai luí, "Shí lé kê to aq, hkâsu mù gâ le, dang shí pé gi, lungíng é dang eq tengmán é dang nghut lhê." ga tai ri.

<sup>6</sup> Hau htoq agó, Yhang gi, "Haú pé gi, ban kut bê. Ngò gi, Alhpa eq Omega nghut lhê; Sâng-hi Awang eq Ló Htáng Sû le nghut lhê. Wuì shit sù lé gi, ahpa a dúng é za, asak wuìbúm mâ é uchyam lé, Ngò byi huq râ nghut lhê.

<sup>7</sup> Wó ung é sù ó yuq nghut kôle, Garaí é silí wunlí haú pé banshoq lé sîng râ nghut mù, Ngò gi, yhâng é Garai Gasang dut luí, yhang gi, Ngá zo dut râ nghut lhê.

<sup>8</sup> Nghut kôlhang, gyuq myit bò bang, a lumjîng bang, achayut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyî kut é bang, hparà noq é bang eq mhaú bang lhunglhang é jowò gi, haú hang myi duq nyi é nhông nghut râ nghut lhê. Haú gi, í dâm nghû râ shi é hkyô nghut ri." ga ngo lé tai ri.

<sup>9</sup> Ló htâng é wúm nyhit jung byíng tô é góm nyhit lhum chung tô é maumang lagyo nyhit yuq mâ é rayuq gi, lé mù, "Lé aq, haú Sauzô é yhangmyi gâ é myisik lé, ngò tân shit râ nghut lhê." ga ngo lé tai ri.

<sup>10</sup> Hau htâng, yhang gi, ngo lé Woi-nyí mai bùm myhâng mó ralhum má shuí jé luí, Garai Gasâng chyáng mâ é nghut mù, mauhkûng mai gyó lé lo é, haú Chyoiyúng Myuq gâ é Yerusalem lé tân shit ri.

<sup>11</sup> Myuq haú gi, Garai Gasâng é hpungwup shing kang hû é htoq agó, haú maubó gi, hpaú dik é huhpé lungsêng su dut luí, myoqjâm su sân-yúng ri.

<sup>12</sup> Myuq xêwâm gi, kô myhang é htoq agó, hkum raxe í lhum hpông tô ri; hkum haú pé má, maumang lagyo raxe í yuq zúng tô ri. Hau htoq agó, Israelaq byù myû raxe í hu é myìng lé, hkum haú pé má kê tap to bum ri.

<sup>13</sup> Hkum haú pé gi, buihtoq hkyam shut sùm lhum, buiwàng hkyam shut sùm lhum, maupyî shut sùm lhum, mautsûng shut sùm lhum kut hpông tô ri.

<sup>14</sup> Myuq xêwâm haú gi, awang raxe í lhûm èq hí tô é nghut luí, awang haú pé má, Sauzô é lagyo raxe í yuq é myìng dap tô bum ri.

<sup>15</sup> Haú ngo lé nyo é maumang lagyo gi, myuq lé le, hau é hkum pé lé le, xêwâm pé lé le, kê râ matú, kê é jung híng jâm-yang ralhum chung tô ri.

<sup>16</sup> Myuq haú gi, myi chyûn dut mâ é nghut luí, híng hpyang làm hpyang rawuí wuí za dut mâ é nghut ri. Maumang haú gi, myuq lé jâm-yang hau èq kê wú é hkûn, híng hpyang, làm hpyang, myhâng hpyang banshoq 1400 déng\* kô bo ri;

<sup>17</sup> yhang gi, haú byù kê é jung eq wuí é maumang lagyo é kê jung lé chûng mù, myuq xêwâm lé kê wú é hkûn, rasho myi xê myi dúng bo ri.

<sup>18</sup> Myuq xêwâm haú gi, huhpé lungseng èq saí é nghut ri; myuq gi, híng gyíng èq saí é nghut mù, myoqjâm su yhang sân-yúng ri.

<sup>19</sup> Myuq xêwâm haú é awang pé gi, hpau jung lungsêng ajung jûng èq mhôn tô é nghut ri. Sâng-hí lhum gi, huhpé lungseng èq, í lhum nghû râ gi, nila (mauhkûng nyuì su dut jung) lungseng èq, sùm lhum nghû râ gi, mahuya (noq é isâm myo jung) lungseng èq, myi lhum nghû râ gi, myaq (huì nyuì é jung) lungseng èq,

<sup>20</sup> ngo lhum nghû râ gi, nyhaú myoqjí su dut jung lungseng èq, hkyuq lhum nghû râ gi, pate-mya (nè é jung) lungseng èq, nyhit lhum nghû râ gi, huì muí muí é su dut jung lungseng èq, shit lhum nghû râ gi, myek-yoi (wuìmau nyuì su dut jung) lungseng èq, gaú lhum nghû râ gi, utohpaya (bó huì

\* 21:16 1400 déng gi, Grik pé é stadia 12000 kô nghut ri.

hui é jung) lungseng èq, raxê lhum nghû râ gi, mahuya nyùi lungsêng èq, raxe ralhum nghû râ gi, wakintu (mhan-haq nyùi eq mauhkûng nyùi nyhò tô é su dut é jung) lungsêng èq, raxe í lhum nghû râ gi, (me me dut é jung) htihtu-nila lungseng èq mhôn tô ri.

<sup>21</sup> Haû myuq hkum raxe í lhum gi, palhé raxe í cham nghut ri; hkum ralhum gi, palhé rachâm èq saí é nghut ri. Haû myuq é hkyô mó gi, híng jet èq saí é nghut luí, myoqjàm su duq san é hkyô nghut ri.

<sup>22</sup> Ngò gi, myuq haû má noqkuq yhûm joq é lé a myàng, hkâsu mù gâ le, haû wum-o a-tsam dik shoq bò Sû Yhumsîng Garai Gasang eq Sauzo gi, myuq hau é noqkuq yhûm nghut nyi é yanmai nghut ri.

<sup>23</sup> Haû Garai Gasâng é hpungwup shingkang gi, myuq haû má duqbó byí é htoq agó, Sauzo gi, myuq hau é myibung nghut é yanmai, myuq haû má gi, bui eq lhamó tsò byi a ra nghut ri.

<sup>24</sup> Haû byù myù pé gi, myuq haû duqbó é hkaû má hkyô wó so kó râ nghut lhê; haû myidàm htoq mâ é hkohkam pê gi, yhangmoq é hkikhâm hkyô lé, myuq haû má yù lé kó râ nghut lhê.

<sup>25</sup> Myuq haû má gi, myín nghû é a joq é yanmai, myuq hkum myhí é le joq râ a nghut lo.

<sup>26</sup> Haû byù myù pê é hpungwup shingkang eq aróng lé, myuq haû má yù lé kó râ nghut lhê.

<sup>27</sup> Myuq haû má, a sansêng é hkyô haí le wó wàng râ a nghut é htoq agó, hoq hpu hkyô eq mhaú zô é hkyô kut é sù ó yuq le wó wàng râ a nghut; haû Sauzô é asak jihpán laiká buk má myìng bo é bang za wó wàng râ nghut lhê.

## 22

### *Asak Wui Mó Lâng*

<sup>1</sup> Hau htâng, Garai Gasang eq Sauzô é hkohkâm-tanghkuq mai yui htoq lô luí, myuq hkaû má é hkyô mó gûng đông yui lô é, myoqjàm su sân-yúng é asak wui mó lâng lé, maumang lagyo haû, ngo lé tân shit ri.

<sup>2</sup> Wuilàng í hpoq é má, ashi raxe í myù zuí é asak shigâm yuq tô é nghut luí, lhohkyap

hkanmó ashi zuí ri. Hau htoq agó, shigâm haû pé mâ é ahaq pé gi, byù myù pé lé yâ gè râ matú nghut ri.

<sup>3</sup> Nhîng é haí le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaû haû má joq nyi râ nghut mù, Yhâng é dui-nhâng zoshâng wui gi, Yhang lé noqkuq dojàu kó râ nghut lhê.

<sup>4</sup> Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é myìng kê tap é hui kó râ nghut lhê.

<sup>5</sup> Myín nghû é le joq râ a nghut lo. Myibung duqbó byí é le, bui tsò byí é le, yhangmoq ra kó râ a nghut lo, hkâsu mù gâ le, haû Yhumsîng Garai Gasang gi, yhangmoq lé duqbó byí nyi râ nghut lhê. Hau htoq agó, yhangmoq gi, pyat dedu ahtum abyuq up nyi kó râ nghut lhê.

<sup>6</sup> Maumang haû gi, ngo lé, "Dang shí pé gi, lungíng é dang eq tengmán é dang nghut lhê. Myiqhtoí pê é woi-nyí lé up é Yhumsîng Garai Gasang gi, adê myáng má dut lò râ hkyô pé lé, Yhâng é dui-nhâng zoshâng wui lé tân shit râ matú, Yhâng é maumang lagyo lé nhang kat é nghut ri." ga taí ri.

### *Yesuq Jé Lé Lô Râ Hkyô*

<sup>7</sup> "Wú keq, Ngò gi, a myáng má jé lé lô râ nghut lhê! Laiká shí má bo é myiqhtoí dang pé lé châng kut é sù gi, hkungsô wó nyi ri."\* gâ é lé, ngò wó gyô ri.

<sup>8</sup> Haû hkyô pé lé wó myâng wó gyô é sù gi, ngò Yohan nghut lhê. Ngò gi, haû hkyô pé lé wó myâng wó gyô é hkûn, ngo lé, shí hkyô pé tân shit é maumang lagyo é hkyí wang má noqkuq râ matú paí gop é nghut lhê.

<sup>9</sup> Nghut kôlhang, yhang gi, ngo lé, "Haû su hkâkut! Ngò gi, nàng eq le, náng é gumang myiqhtoí pé eq le, laiká shí mâ é mungdang pé lé châng kut é lhunglhang bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga taí ri.

<sup>10</sup> Hau htâng, yhang gi, "Laiká shí má bo é myiqhtoí dang pé lé, hkâzaú to lo, hkâsu mù gâ le, haû ahkyíng gi, chyâng lò bê nghut ri.

<sup>11</sup> A dingmán é sù gi, a dingmán é đông xoq kut nyí sháng gaq; a sansêng é sù gi,

\* 22:7 Dang shí hkun gi, Yesuq taí é nghut lhê.

a sansêng é dông xoq dut nyî sháng gaq; dingmán é sù gi, dingmán é dông xoq kut nyî sháng gaq; chyoiyúng é sù gi, xoq chyoiyúng nyî sháng gaq." ga ngo lé tái kyô ri.

12 "Wú keq, ngò gi, a myáng má jé lé lô râ nghut lhê! Ngò gi, yuq hkangmó lé, yhumsing kut é eq rajung za byi râ shigyau chyunghuq chung tô lhê.

13 Ngò gi, Alhpa eq Omega nghut lhê, Sâng-hi eq Jihtúm nghut lhê, Sâng-hi Awang eq Ló Htáng Sù le nghut lhê.

14 Asak shigâm má jé râ eq myuq hkaû shut hkúmdong mai wó wang jé râ ahkáng wó yû shoq, yhumsing é buhîng lé chî sân é bang gi, hkungsô wó nyi ri.

15 Shinggan má gi, hkui dông nyi é bang, myoqheq hpaqchyî kut é bang, ashop é dông gungsho zùm yap é hkyô shut é bang, byù sat é bang, hparà noq é bang eq mhaû é hkyô lé ô nàu luî châng kut é bang lhunglhang nyi bum akô nghut ri.

16 Ngò, Yesuq gi, haû noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngò gi,

Dawiq é Amyit eq Awut Ashín le, haû duqbó é Bó-myhû le nghut lhê."† gâ é lé, ngò wó gyô ri.

17 Haû Woi-nyí eq myisik gi, "Lé aq!" gâ akô. Haû wó gyô é sù gi, "Lé aq!" ga sháng gaq. Wuì shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byi a ra é asak wuì lé, shuq sháng gaq.

18 Laiká shî má bo é myiqhtoi dang pé lé wó gyô é bang yuq hkangmó lé, ngò sidiq byî é gi: dang haû pé má, rajung jung kat jat é sù ó yuq chyáng nghut kôle, Garai Gasang gi, laiká shî má kê tô é wúm pé lé jé nhâng râ nghut lhê.

19 Myiqhtoi laiká shî má bo é dang pé lé, yu pyâm é sù ó yuq lé nghut kôle, Garai Gasang gi, laiká shî má kê tô é asak shigâm eq chyoiyúng myuq mâ é yhang eq sêng é gû lé, yu pyám byi râ nghut lhê.

20 Shí hkyô pé lé saksé hkâm byî é Sù gi, "Nghut bê, Ngò gi, a myáng má jé lé lô râ nghut lhê." ga tái ri.

Amen. Yhumsing Yesuq ê, lé lô aq ô!

21 Haû Yhumsing Yesuq é jeju gi, Garai Gasang é byu pé chyáng joq nyî sháng gaq ô! Amen.

† 22:16 Dang shí hkun gi, Yesuq tái é nghut lhê.